



New Testament

Mukulu Language

Mukulu - Bible - New Testament

Matiye	3	
Markus	87	
Lik	139	
Zaṅ	226	
Naabo doṅ zina	287	
Romeṅ	365	
1 Korent	400	
2 Korent	434	
Galat	456	
Epez	468	
Pilip	480	
Kolos	489	
1 Tessaloni	497	
2 Tessaloni	504	
1 Timote	508	
2 Timote	518	
Tit	525	
Pilemoṅ	529	
Eber	531	
Zak	557	
1 Piyer	566	
2 Piyer	576	
1 Zaṅ	582	
2 Zaṅ	590	
3 Zaṅ	592	
Ziid	594	
Apokalipse	597	

Mukulu - Bible - New Testament

Matiye

Matiye 1

Ita moŋgidagi k'Isa Almasi

(Lik 3.23-38)

- ¹Kun ollo, enj sumbiyagi k'ita moŋgidagi k'Isa Almasi, yonj ti biza bumbu mozigo Dawut, wo yode Dawut batum ti biza bumbu k'Ibirayim.
- ²Ibirayim y'a t'ehe Isaaka, Isaaka y'a t'ehe Yakup, Yakup y'a t'ehe Ziida kane ti zembadi.
- ³Ziida y'a t'ehe Pares ti Zara, kane geŋ meedaŋ Tamar. Pares y'a t'ehe Ezironj, Ezironj y'a t'ehe Araŋ.
- ⁴Araŋ y'a t'ehe Aminadap, Aminadap y'a t'ehe Nasonj, Nasonj y'a t'ehe Salmo.
- ⁵Salmo y'a t'ehe Booz, Booz meedi Raahap. Booz y'a t'ehe Ibet, Ibet meedi Riit. Ibet y'a t'ehe Zeese,
- ⁶wo Zeese y'a t'ehe mozigo Dawut. Mozigo Dawut y'a t'ehe Salamonj, Salamonj meedi ere ki Iri.
- ⁷Salamonj y'a t'ehe Robowan, Robowan y'a t'ehe Abbiya, Abbiya y'a t'ehe Aza.
- ⁸Aza y'a t'ehe Zozapat, Zozapat y'a t'ehe Zoram, Zoram y'a t'ehe Oziyas.
- ⁹Oziyas y'a t'ehe Yotam, Yotam y'a t'ehe Akaz, Akaz y'a t'ehe Ezekiyas.
- ¹⁰Ezekiyas y'a t'ehe Manase, Manase y'a t'ehe Amonj, Amonj y'a t'ehe Zoziyas.
- ¹¹Zoziyas y'a t'ehe Yekoniyas ti zembadi, a ozzine geŋ doŋ k'Izirayel an ti'n ziki buliko ki siido Babiloon.
- ¹²Aame doŋ k'Izirayel an ti'n ziki buliko ki siido Babiloon maŋ, Yekoniyas y'a t'ehe Salatiyel, Salatiyel y'a t'ehe Zorobabel.
- ¹³Zorobabel y'a t'ehe Abbiyut, Abbiyut y'a t'ehe Eliyakim, Eliyakim y'a t'ehe Azor.
- ¹⁴Azor y'a t'ehe Sadok, Sadok y'a t'ehe Asim, Asim y'a t'ehe Eliyut.
- ¹⁵Eliyut y'a t'ehe Eliyazar, Eliyazar y'a t'ehe Matan, Matan y'a t'ehe Yakup.

¹⁶Yakup y'a t'ehe Yusup kule ki Mariyam, tode ere t'a ehe Isa, yoŋ an di y' waaku Almasi Raa yi biire.

¹⁷Iŋkino maŋ an di gize ita moŋgidagi koomat makumu pide, iise ti Ibirayim bini Dawut. Saŋ ita moŋgidagi koomat makumu pide, iise ti Dawut bini sokiyo doŋ k'Izirayel ki siido Babiloon. Saŋ ita moŋgidagi koomat makumu pide, iise ti sokiyadaŋ ki siido Babiloon bini ehiyo k'Almasi Raa yi biire.

Ehiyo k'Isa Almasi

¹⁸Kun ollo t'urzi tuuku an d'ehe Isa Almasi me. Mariyam ere t'a yi t'eha gette tod' t'ibire Yusup. Wo ki poone an di koono boy botto geŋ, ti-ti ziida mahuwe ti toogo k'Unde Kamileŋ ki Raa.

¹⁹Yoŋ Yusup kule k'ebiratú geŋ yoŋ wede ki diine, yi ki dehu y'a ki ti waare ye, iŋkino maŋ y'a dihe y'a t'arga ti tuddutú kaŋ mookiko.

²⁰Aame y'ilke iŋkino maŋ, maaleeka ki Galmeega Raa y'a y'uuna kaŋ suniye wo yi di ruute, y'ede: «K'ollo, Yusup kee wede ti biza bumbu Dawut, kee k'orgide ye, ki ti soodo ere k'ebirayá Mariyam te, kono ulo wede ti t'eha geŋ yoŋ y'ettiyo t'urzi toogo k'Unde Kamileŋ.

²¹Tod' t'a t'eha ulo wo k'a yi waaka sundí Isa, kono yoŋ geŋ y'a utta doŋzi ti oldikadaŋ.»

²²Suldi pay geŋ a iina kono a-t'ette a ono doŋ Galmeega Raa yi ruute ti kaaga ti bize nebi, y'ede:

²³«Kun ollo, uto koŋso t'a seeda mahuwe wo t'a t'eha ulo, an di y' waaka sundí Emanuwel.» Suma gette i-kaza «Raa ti kine.»

²⁴Aame Yusup yi t'inne maŋ, y'a t'ize munda wede maaleeka ki Galmeega Raa yi-ruute y'aase, y'a ti ziida eddí Mariyam te.

²⁵Wo yi k'iide tuddutú ye bini t'a t'eha ulo wede Yusup y'a yi wiike sundí Isa.

Matiye 2

Doŋ suuniyo moldali

¹Isa an y'ehe a Betlehem geeger ki siido Ziide, aame geŋ Erod yoŋ mozigo. Isa an ti y'ehe maŋ, doŋ suuniyo moldali an d'iido ti kese peedo ge-koliyo, an d'iiney a geeger Zeruzalem

²wo an tunde duwo, an'de: «A too me mozigo Yawudiyagi wede an ehe me? Kaye ay wullo moolayí ti kese peedo ge-koliyo wo ay iido ay i d'ottille.»

³Aame mozigo Erod y'illiga rabila gettiyo maŋ, y'a iddira ti doŋ geeger Zeruzalem pay a itadí.

⁴Inkino maŋ y'a-tusse kane deero doŋ sefeke ti doŋ suuniyo k'oogoro doŋ adda siido gette pay, wo y'anni tunde, y'ede: «A too me Almasi Raa yi biire, an di y' t'ehey me?»

⁵Kane an i di ruute, an'de: «A Betilehem siido Ziide, kono enno ono doŋ nebi yi riije ti kaaga adda mattup ki Raa, y'ede:

⁶“Wo kune doŋ ki geeger Betilehem siido Ziide, derec geegirguŋ tod'te neŋko a ki jiire ye ti diine geegiryagi ki Ziide me”, kono ti tode i d'adɔa mozigo y'a dokka doŋzó Izirayel.»

⁷Inkino maŋ mozigo Erod y'anni wiike doŋ suuniyo moldali geŋ kaŋ ombide, kono y'a seɔde mekk'ono, y'ede: «T'ume muno moole y'udɔo, kun yi wulle me?»

⁸Maŋ y'an di'n igibe ki Betilehem, y'an di ruute, y'ede: «Kun'do, ulo'ŋ kun yi dehiti ki koɔwo, wo aame kun y'uuno maŋ, kun o d'agibi kono nuŋ toŋ maŋ n'a etta ni d'ottiley kay.»

⁹Aame mozigo Erod y'an ti ruutite inkino maŋ, doŋ suuniyo moldali an d'ingile, wo geŋ an di y' wulle sey moole wede an wullo ti kese peeɔo ge-koliyo geŋ me. Yoŋ ki daanadaŋ yi d'ettiyo d'ettiyo bini y'iiney t'ekki boy wede ulo adda maŋ, y'a t'ihira.

¹⁰A wolliso ki moole wede an wullo geŋ, addaŋ a uune t'unŋsuwo baadaŋ.

¹¹Kane an iiney maŋ, an t'iide k'adda boy an d'uuney ulo ti meedí Mariyam wo an di dikke an t'uttile a daana k'ulo. Saŋ maŋ sandupiyagaŋ an t'ihinte, an t'udɔo sulɔi doŋ an ziko, aakede: dap, sulɔi koddio eediyadaŋ uŋse wo dunnu sundí mirr zooyayí ooŋe geŋ, an i d'ele a ulo.

¹²Saŋ maŋ Raa y'an di tuuke kuudaŋ kaŋ suniye, y'ede: «Kun kima ye ki tukk' Erod me.» Inkino maŋ kane an di-gime siidadaŋ t'urzi doolo.

Okko ki siido Misir

¹³Aame doŋ suuniyo moldali an ingile maŋ, maaleeka ki Galmeega Raa y'a y'uuney Yusup kaŋ suniye wo yi di ruute, y'ede: «Yusup kesiko ki t'oozo, ki t'ambo ulo ti meedí, kun t'ombo ki siido Misir. Kun di lekki bini onniyo ere n'a di roota, kono mozigo Erod yi y' deha ulo ki t'owwadi.»

¹⁴Inkino maŋ a didɔo gettiyo batum Yusup y'a t'iiziga, y'a t'umbe ulo ti meedí, an t'umbe ki siido Misir.

¹⁵A siido Misir gette an di likko bini unto ki mozigo Erod, geŋ a iina kono a-t'ette a ono doŋ Galmeega Raa yi ruute ti kaaga ti bize nebi, y'ede: «Ulo'ŋ n'a ti y' wiiko y'a t'udɔo ti siido Misir me.»

T'owwo k'inni a geeger Betilehem

¹⁶Aame Erod yi zuune don suuniyo moldali an ti y' mibilde man, y'a gulkuwe baadan. Man y'an di ruute a asigiryagi an di-t'ide a Betlehem ti illiyagi don i ti duule gen, inni kuuli pay don k'ozzine sire a diigo. Ozzinagi sire gen a-t'ide t'ume wede don suuniyo moldali an i ruute moole y'udde.

¹⁷Gen inkinno a iina kono a-t'ette a ono don Raa yi ruute ti kaaga ti bize nebi Zeremi, y'ede:

¹⁸«Duwo an d'illiga tarkuuse ki dollite molo baadan a geeger ki Rama. To Rasel ti molo k'innitu, wo an ti selliyo ton ti k'oyyiso ye, kono innitu an t'inda.»

Kama ki siido k'Izirayel

¹⁹San mozigo Erod y'inda man, maaleeka ki Galmeega Raa y'a y'uuney Yusup kan suniye a siido Misir, yi di ruute,

²⁰y'ede: «Ki t'oozo, ki t'ambo ulo ti meedi, kun di kama ki siido k'Izirayel kono don i dehu towwo k'ulo gen an t'inda.»

²¹Inkinno man Yusup y'a t'iiziga, y'a t'umbe ulo ti meedi, an di-gime ki siido k'Izirayel.

²²Aame Yusup y'iiney a siido k'Izirayel man, y'a illiga rabila ki mozigo wede i gili a siido Ziide gen, yon ulo ki Erod sundi Arkeleyus. Aame gen orgiso t'a yi ziida k'ettiyo k'adda siido Ziide me. Man Raa yi di tuuke kuudi kan suniye, t'ume gen y'a ingile ki siido Galile.

²³Y'iide'n y'a-guune a geeger sundutu Nazaret. Gen a iina kono a-t'ette a ono don Raa yi ruute ti kaaga ti bize nebiyagi, y'ede: «Yon an di y' waaka wede ti geeger Nazaret.»

Matiye 3

Kazita ki Zan Batis

(Markus 1.2-6; Lik 3.1-6; Zan 1.19-23)

¹San ozzinagi k'ita man, Zan Batis gen y'a t'iide k'adda balda ki siido Ziide wo y'a iise kazita, yi d'eesiyo:

²«Kun ti kama lekkiyagun kono Moziko Raa t'iina goppon.»

³Zan gen yon wede nebi Ezayi y'a ruute taayadi ti kaaga, y'ede: «Don an d'ollige golla ki wedusu yi dollite adda balda, yi d'eesiyo: Kun i t'okkon urzi Galmeega, erkiyagi kun i ti'n okkon ki diine delele.»

⁴Zan gen kallayi y'ossiyo an indigo k'ilali zinzo, wo ser a tooni ki golmodo. Ombadi gannoori ti madde.

⁵Inkino maŋ doŋ baadaŋ ti geeger Zeruzalem, ti siido Ziide gette pay, wo ti siido ere a biza k'oooye Zurden gette pay an d'ettiyo tukki Zaŋ.

⁶An t'oodibe addaŋ a urzi k'oldfikadaŋ a daana duwo pay, wo yoŋ yi-ti'n suyyiso batem adda k'oooye Zurden.

⁷Aame Zaŋ yi wulle kane Pariziyen ti Saduseyen baadaŋ an'tiyo tuddi kono y'a ti'n suyye batem maŋ, y'an di ruute, y'ede: «Kune doŋ ulpi aakede maŋkikagi! Wee wee un gize urzi wede kun t'alda ti booro ki Raa ere ettiyo goppon te?»

⁸Inkino maŋ kun iso naabo ere beehiye, geŋ a kize kun ti gime lekkiyaguŋ.

⁹Wo kun roote ye adda k'adduguŋ: «Kaye mugiyey Ibirayim me», kono kun t'alda ti booro Raa te. Wo kun ollo n'un di rooto: Ti moŋgali en miŋ, Raa y'aane yi d'adde duwo a t'ise ita k'inŋi k'Ibirayim me.

¹⁰Ankeŋno booro Raa i guute goppon, tod'te aa wede yi t'umbe ulpaasi y'a-dokkida inda ti sondayzaŋ pay: Undumu tuuku yi k'ehiyo inŋi beehiye ye maŋ, an di-dekka an di sedda adda k'uwwu mendí.

¹¹Nuŋ n'unni suyyiso batem t'ahu kono a kize kun ti gime lekkiyaguŋ, wo de wede ettiyo k'itadó geŋ yoŋ toogo yi jire nuŋ, wo nuŋ ni k'iide n'a ki t'oddipe tobiyagi ye. Yoŋ y'unni suyya batem t'Unde Kamilen wo ti uwwu.

¹²Wo yoŋ y'a dekka booro aakede wedusu yi t'umbo munda ki solde a beezí, y'a silda koduwo, inŋi yi-t'oba giyye, wo oddo y'a t'ogga mentú adda k'uwwu ere i k'unto ye.»

Suyyiso batem k'Isa

(Markus 1.9-11; Lik 3.21-22; Zaŋ 1.29-34)

¹³Inkino maŋ ti siido Galile Isa y'a iide ki tukki Zaŋ a biza k'oooye Zurden kono Zaŋ y'a ti y' suyye batem.

¹⁴Aame geŋ Zaŋ y'a dihe y'a-tooge, wo yi di ruute, y'ede: «Nuŋ miŋ a ni suyye batem kee, de mummino kee ki d'ettiyo ki tukki nuŋ n'a ki suyye batem me?»

¹⁵Wo de Isa yi di'n gime onami, y'ede: «Ankeŋno kee k'oyyo ki ti'n suyyi batem, kono t'urzi enno kine in d'ise suldi doŋ pay ki diine a-t'ette a naabo ere aa Raa yi dehu.» Inkino maŋ Zaŋ y'a iyye y'a ti y' suyye batem.

¹⁶Aame Isa yi ti y' zuyye batem wo y'adfiya t'adda k'ahu maŋ, a kaamiki kandaane a t'ihina wo y'a wulle Unde Raa ti deegu ti kandaane aa deere t'a di guune a tuddi.

¹⁷Wo duwo an d'illiga golla ettiyo ti kandaane t'a ruute, t'ede: «En Ulo nuuno ni y' giyye baadaŋ, ulbó unse ti yode me.»

Matiye 4

Naamiya daggiya k'Isa

(Markus 1.12-13; Lik 4.1-13)

- ¹Sanj mañ Unde Raa t'a-di t'iide Isa k'adda balda kono Meeda siitandani t'a yi naame daggiya.
- ²Y'a likke diddo ada pide onnu ada pide daa k'ombo, mañ mosogo t'a yi ziida.
- ³Meeda siitandani t'a d'iide sirpadí kono t'a yi naame daggiya, wo ti di ruute, t'ede: «Aame kee Ulo Raa kotto mañ, k'elo urzi a mongali eñ a-kime ombo.»
- ⁴Wo Isa yi di'n gime onamtú, y'ede: «Koñ te m'ollo, ono eñ an riije ti kaaga adda mattup ki Raa, an'de: "Lekkiyo wedusu tod'te t'urzi k'ombo bizí ñañjal ye, wo t'urzi k'ono ñoñ pay adfiya ti bize Raa.»»
- ⁵Tiñ geñ Meeda siitandani t'a-di t'iide Zeruzalem geeger ere kamileñ, t'a-ti y' ziipe t'ekki Boy Raa a ume wede awwa,
- ⁶wo ti di ruute, t'ede: «Aame kee Ulo Raa kotto mañ, t'awwa geñ k'oldi k'a zabba siido, kono ono eñ an riije ti kaaga adda mattup ki Raa, an'de: "Raa y'an di roota maaleekiyagí kono kee, wo an gi di seeda beezañ kono k'a t'alda zoñdá a ki t'oggo ekki mukkolo ye.»»
- ⁷Isa yi di ruute, y'ede: «M'ollo, ono eñ an riije sey ti kaaga adda mattup ki Raa, an'de: "Kee Galmeega Raazá ki y' naame ye.»»
- ⁸Sanj mañ Meeda siitandani t'a-di t'iide sey k'ekki mukkolo sohero a jiire, wo ti di gizite moziko duniya pay ti laalatú,
- ⁹wo ti di ruute, t'ede: «Suldi eñ n'a di t'ela pay a kee, aame ki-dikka wo k'o uttila mañ.»»
- ¹⁰Inkino mañ Isa yi di ruute, y'ede: «Meeda siitandani, mi leddo ti tuddó me! M'ollo, ono eñ an riije ti kaaga adda mattup ki Raa, an'de: "Kee k'ottilo a Galmeega Raazá, wo geñ a yode ñañjal ki naabo me.»»
- ¹¹Aame geñ Meeda siitandani t'a y'iili. Sanj mañ maaleekiyagi an a d'iide sirpadí wo an i di naabiya.

Eesiyo naabo k'Isa a siido Galile

(Markus 1.14-15; Lik 4.14-15)

- ¹²Isa y'illiga Zañ Batis an ti y' ziida ñangay mañ, aame geñ y'a t'iide ki siido Galile.
- ¹³Y'iiney mañ y'a ki likke ye a Nazaret me, y'a ingile y'a likke a Kapernayim, geeger ere a biza bar ki Galile adda siido Zabiloñ ti Nepitali.
- ¹⁴Geñ a iina kono a-t'ette a ono ñoñ nebi Ezayi yi ruute ti kaaga, y'ede:

15«Kune ɗoŋ siido Zabiloŋ ti Nepitali, gopponɗi ti biza bar ki Galile, ti dar k'ooye Zurden ki kese peedo k'ooriyo, siido Galile gette, i lekkiyo kane ɗoŋ Yawudiyagi ye.

16Kane ɗoŋ i lekkiyo adda zimolo geŋ an wulle toore Raa. Kane ɗoŋ i lekkiyo adda k'undiso k'unto geŋ toore Raa y'an da t'an gili.»

17T'ume geŋ Isa y'a iise kazita k'ono, yi d'eesiyo: «Kun ti kama lekkiyagun kono Moziko Raa t'iina gopponɗi.»

Sanalliyagi ɗoŋ ki poone

(Markus 1.16-20; Lik 5.1-11)

18Onniyo soo Isa yi sooru a biza bar ki Galile, maŋ yi d'uune zamba sire, Simo wede an yi waaku sundi soo te Piyer, ti leemadi Andire. An kakkiya lebiɗo k'adda bar kono kane naabadaŋ sawwiya puuni.

19Maŋ Isa y'an di ruute, y'ede: «Kun ni daani, wo nuŋ n'un di'n isa ɗoŋ dehuɗu ɗuwo kono an d'etto k'urzizo.»

20A kaamiki lembidagaŋ an d'iili, an di y' diine.

21Tiŋ geŋ Isa y'a iide ki daana maŋ, yi d'uuney zamba sire ti doolo, Zak ti leemadi Zaŋ inŋi Zebede, kane adda tooko ti meegaŋ Zebede an okkime lembidagaŋ. Maŋ Isa y'a ti'n wiike.

22A kaamiki, tooko ti meegaŋ an d'iili wo kane an di y' diine.

Isa ti ɗoŋ duuru

(Markus 1.39; Lik 4.44; 6.17-18)

23Saŋ maŋ Isa yi soorutu adda siido Galile gette pay, yi dooyisito ɗuwo adda boydi ɗoŋ Yawudiyagi ge dooyiso, y'an kazita Rabila Majjaanawa ki Moziko Raa wo y'an d'eliyo beeko a ɗoŋ pay eeni wo a ɗoŋ pay an d'ede ita k'eeni tuuku toŋ maŋ.

24A naabadi gette, Isa sundi t'a iile adda siido Siiri gette pay, inŋino maŋ ɗuwo an i-d'ettiyo ti kane ɗoŋ pay an d'ede ita k'eeni tuuku toŋ maŋ wo ti ɗoŋ eeni yi ti'n dabirsa baadaŋ, aakede: ɗoŋ an d'ede siitandani a eedaŋ, ti ɗoŋ an d'ede amputput wo ɗoŋ ruŋguyun. Geŋ Isa y'an d'eliyo beeko.

25Doŋ duuru baadaŋ an di y' daaniya, wo kane geŋ an iido ti siido Galile, ti siido sundutu Geegiryagi Koomat, ti geeger Zeruzalem, ti siido Ziide wo ti dar k'ooye Zurden ki kese peedo ge-koliyo.

Matiye 5

Unsuwo ere ki kotto

(Markus 3.13; Lik 6.12-13,20)

- ¹Aame Isa yi wulle ɗoŋ duuru baadaŋ geŋŋo maŋ, y'a di gili eego kesse y'a-guune. Kane sanalliyagí an a-t'iide k'ume yode,
- ²maŋ y'a t'ihina bizí, y'an di'n iise dooyiso, y'ede:
- ³«Uŋsuwo a kane ɗoŋ i ki t'iide an ki t'ambɛ eedaŋ a ɗaana Raa ye, kono Moziko Raa tod'te ki kane.
- ⁴Uŋsuwo a kane ɗoŋ i mōolo, kono kane geŋ Raa y'a ti'n sella.
- ⁵Uŋsuwo a kane ɗoŋ biza k'ulbaŋ tasse, kono kane geŋ an t'ooney siido ere Raa yi ruute y'an t'eley.
- ⁶Uŋsuwo a kane ɗoŋ mosogo wo ôrme a urzi lekkiyo ere ki diine aa Raa yi dehu, kono kane geŋ mosigadaŋ ti ôrmayaŋ Raa y'an ti'n t'ida.
- ⁷Uŋsuwo a kane ɗoŋ an isiyo adde koɗuwo a ɗuwo, kono kane geŋ Raa y'an d'isa adde koɗuwo kay.
- ⁸Uŋsuwo a kane ɗoŋ ele tuddaŋ pay a Raa, kono kane geŋ Raa an di y' wolley.
- ⁹Uŋsuwo a kane ɗoŋ i dehu urzi toose y'a koone a diine ɗuwo, kono kane geŋ Raa y'anni waaka inŋizí.
- ¹⁰Uŋsuwo a kane ɗoŋ an i dabirsa kono an isiyo munda wede ki diine aa Raa yi dehu, kono Moziko Raa tod'te ki kane.
- ¹¹Uŋsuwo a kune aame ɗuwo an unni kaldita, an unni dabirsa wo an lohito ita k'ono ɗoŋ pay ulpi a egguŋ, kono kun ziipe adduguŋ a nuŋ.
- ¹²Kune ulbuguŋ un iso uŋse, kun lekko t'uŋsuwo kono munda wede Raa yi dehu y'un t'eley geŋ, yoŋ baadaŋ y'unni delliyo a kandaane. Geŋ inŋino kay an'ni dibire nebiyagi ɗoŋ ti kaaga i t'inŋile ti kune me.»

Sumade wo toore

(Markus

9.50; 4.21; Lik 14.34-35; 8.16; 11.33)

- ¹³«Kune aakede sumade ki duniya, wo ɗe aame sumade geŋ uŋsuwadaŋ i t'ize umbo maŋ, kaŋ mummino k'an ise uŋse sey me? Kane geŋ uŋse ye, ki sebbiyo mendaŋ a disse, ɗuwo an d'oŋy'ilse.
- ¹⁴Kune aakede toore ki ɗoŋ duniya. Aame an iiziga geeger eego kesse maŋ, i ki t'ombida ye.
- ¹⁵Wo aame k'a t'uyye pitila maŋ, k'a ki t'ossibe bogoro ye. Ki too maŋ k'a ti doɗɗe t'awwa, kono tod' t'a toore a kane ɗoŋ pay adda boy.

16Geŋ iŋkino kay, kune toŋ kun di toore a ɗaana ɗuwo me, kono aame an wulla naabaguŋ ere beehiye kun isiyo gettiyo maŋ, an di t'imma Meeguguŋ Raa a kandaane.»

Dooyiso a urzi k'oogoro

17«Kun elkiyo miŋ nuŋ n'iido kono oogoro Muusa ti dooyiso nebiyagi, n'a ti'n t'ide ko? Aha! Nuŋ n'iido kono n'a ki ti'n t'ide ye, wo n'iido n'a-t'ise itadaŋ a t'adde kereŋ.

18Derec iŋkino wo n'un di rooto: Ki poone kandaane ti siido an t'eŋgila geŋ, t'adda k'oogoro ette ise arku raaniya soo wede ŋeŋku a jiire, ise guttiye soo toŋ i ki dagga ye, geŋ iŋkino bini sulɗi pay geŋ an t'eŋgila.

19Kono kamo, wede tuuku urzi k'oogoro wede ŋeŋku a jiire geŋ yi ti y' diipida wo yi duuya ɗuwo an d'ise iŋkino maŋ, yode geŋ Raa y'a ti y' ɗeega ŋeŋku a ceera a Mozikadi me. Wo ɗe wede tuuku urziyagi k'oogoro geŋ yi ti'n sooru eego wo yi dooyiso ɗuwo an d'ise iŋkino kay maŋ, yoŋ geŋ Raa y'a y'isa goole a Mozikadi me

20Kono kun ollo, n'un di rooto: Aame lekkiyaguŋ ere ki diine gette, ti ki jiira ere ki ɗoŋ suuniyo k'oogoro ti Pariziyen ye maŋ, ki kotto Moziko Raa kun ki t'etta ye.»

Dooyiso a urzi kulkuwo

(Markus 11.25; Lik 12.57-59)

21«Kune kun illiga an ruute a moŋgidagiŋ ti kaaga, an'de: “Ki t'owwo wedusu mirsi ulu”, soŋ an'de: “Wede y'iida bakadi mirsi maŋ, yoŋ geŋ an di-t'etta k'ume booro.”

22Wo kun ollo, nuŋ n'un di rooto: Wede tuuku yi ti kulkuwa ti leemadi maŋ, yoŋ geŋ an di-t'etta k'ume booro. Wede yi gilda leemadi: “Ulsu!” maŋ, yoŋ geŋ booradi a ɗaana deero ɗoŋ booradiŋ. Wede yi gilda leemadi: “Maade!” maŋ, yoŋ geŋ an ti y' sedɗa adda k'uwo ere ki dabar.

23Aame ɗe kee k'ette eliyi seɗeke k'adda Boy Raa, wo a ume seɗeke geŋ k'ilke leemada i-d'ede kulkuwo ti kee maŋ,

24seɗikada ki oolo a ume geŋŋo, k'okko ki y'oonoy leemada me, kun t'okkiyi ɗoo miŋ, saŋ k'a-kami k'a t'ela seɗikada a Raa kollo.

25Aame ti leemada un ede ono, wo kune a urzi kun ette k'ume wede booro botto geŋ, ti yode ono kun ti'n odo. Para maŋ leemada geŋ y'a-da t'iida k'ume wede booro maŋ, wede booro y'an gi di t'eley a bey k'asigiryagi, wo kane an ki ti t'eley ɗaŋgay.

26«Derec in̄kino wo n'a di rooto: T'ume geṅ ki ki t'adfa ye, daa ki munda wede an dehu k'an ki y'ela pay ye maṅ, tammiyagi doṅ sunni sunni toṅ an a-k'oola ye.»

Dooyiso a urzi moone t'ere bakadá ise ti kule bakatú

(Matiye 18.8-9; Markus 9.43,47-48)

27«Kune kun illiga an ruute ti kaaga, an'de: “Ki moone t'ere bakadá ise ti kule bakatú ulu.”

28Wo kun ollo, nuṅ n'un di rooto: Wede tuuku yi wulla ere bakadí wo addí i iba a tode maṅ, yoṅ geṅ adda k'addí aa yi-t'udige baa.

29Aame de ersadá k'ammade t'a-da t'ettiyo k'adda k'oldíko maṅ, k'a t'oodo mentú k'a sedfo dokki ti kee. Beehiye i jiiere a kee, moka soo ki tuddá i digge bee miṅ, tuddá pecek an ki ti sedfey adda k'uwwo.

30Wo aame de beezá wede k'ammade y'a-da t'ettiyo k'adda k'oldíko maṅ, k'a-dekko mendí k'a sedfo dokki ti kee. Beehiye i jiiere a kee, moka soo ki tuddá i digge bee miṅ, tuddá pecek ti-t'ettye k'adda k'uwwo.»

Dooyiso a urzi peeriyo

(Matiye 19.7-9; Markus 10.4-5,10-12; Lik 16.18)

31«Soṅ an ruute ti kaaga, an'de: “Aame wede yi-peere eddí maṅ, yi di dekke mattup ki peeriyo yi di t'ele a beytú i-kaza tod'te peeriyo.”

32Wo kun ollo, nuṅ n'un di rooto: Ki peeriyo k'erewo ulu, wo wede yi peere eddí geṅ, aame ti moone ti kule bakatú daṅṅal! Para maṅ yi ti peeriyo geṅ, yi ti t'eliyo a moone ti kule bakatú, aame tod' ti ziidfa maṅ. Wo wede i seedfa erewo ere peeriyo gette, Raa yi yi wolliyo yoṅ wede i moone t'ere bakadí.»

Dooyiso a urzi nâamiya tudde

33«Kune kun illiga sey an ruute a moṅgidagiṅ ti kaaga, an'de: “Munda wede k'a ti nîime tuddá geṅ, ki t'oodiba eedá ye, k'a ti y' daṅgo munda wede k'a ti nîime tuddá a daana Galmeega Raa geṅ me.”

34Wo kun ollo, nuṅ n'un di rooto: Kun nâama tudduguṅ ye tak: Ti kandaane kun nâama tudduguṅ ye, kono yoṅ geṅ kaakido moziko Raa.

35Ti siido kun nâama tudduguṅ ye, kono tod'te ume yi d'obe zoṅdí. Ti Zeruzalem kun nâama tudduguṅ ye, kono tod'te geeger ki Raa mozigo goole.

36Ti egguṅ toṅ kun nâama tudduguṅ ye, kono wedusu geṅ ililso k'eedí soo toṅ yi k'aane yi ki t'ise tuwarwa ye gammilawa ye.

³⁷Aame munda kun isa mañ, kun'de "Eyye, ay isa" ñaṅṅal, wo munda kun k'isa ye mañ, kun'de "Aha, ay k'isa ye" ñaṅṅal. Ono ñoṅ kun rootiyo ti doolo geñ ettiyo t'urzi Mohita k'oldiko.»

Dooyiso a urzi kama k'oldiko ere an a ize

(Lik 6.29-30)

³⁸«Kune kun illiga an ruute ti kaaga, an'de: "Wede yi tuuka ersa bakadí mañ, ki yode an i di tooka kay, wede yi t'iira sinta bakadí mañ, ki yode an i di t'ora kay."»

³⁹Wo kun ollo, nuñ n'un di rooto: A wede y'a ize ulsu geñ, kee ki-ti dooze ye. Aame wede yi ki diiṅe a tobbisadá k'ammade ki bita mañ, ki kama tobbisadá ere ki geelo toñ y'a ki ti daaṅa.

⁴⁰A wede i dehu y'a-di t'ette k'ume wede ñekkiyo booro kono y'a t'amba kallayá wede ñeñku t'adda mañ, ki-oolo kallayá wede goole toñ y'a t'ambo pây.

⁴¹Aame wede yi-k'isiyo ki toogo i-d'ede attidí yi dehu k'a di y' t'igibo suma kubbaara soo mañ, k'a y'agiba kubbaara sire.

⁴²Wede yi tondiyo munda ti beezá mañ, ki eelo, wo wede yi tondiyo see ti beezá mañ, ki-tooge ye.»

Kun geyyo ñoṅ k'adugun

(Lik 6.27-28,32-36)

⁴³«Kune kun illiga an ruute ti kaaga, an'de: "Ki geyyo bakadá wo aduzá ki koogor."»

⁴⁴Wo ñe kun ollo, nuñ n'un di rooto: Kun geyyo kane ñoṅ ti kune adu, wo kun tondo Raa ki ñoṅ unni dabirsa.

⁴⁵Aame kun isiyo iñkino mañ, kun t'isa iñni ki Meegugun Raa a kandaane. Derec, yoñ yi koliyo peedadí a tukki ñoṅ bundidí wo a tukki ñoṅ beehiye pây, yi koppiyo mizzi a ñoṅ ki diine wo a ñoṅ ki diine ye pây.

⁴⁶Aame kun geyyiso ñoṅ unni geyyiso ñaṅṅal mañ, munda wede Raa yi dehu y'un t'eley geñ kun di y' t'ooney ñey ko? Derec, ñoṅ seddu jibaaye kane batum toñ an isiyo iñkino kay.

⁴⁷Aame kun eesiyo zembagun ñaṅṅal mañ, geñ munda wede ki kune i t'ihina siidí too me ti ñoṅ oṅgo me? Derec, kane ñoṅ Yawudiyagi ye batum toñ an isiyo iñkino kay.

⁴⁸Iñkino mañ kun t'iso ñoṅ ñerec ki diine baa, aakede Meegugun Raa a kandaane toñ yoñ ñerec ki diine.»

Matiye 6

Dooyiso a urzi k'eliyo a don an k'ede munda ye

¹«Kun koono mentikagi kono a urzi daaniya Raaguŋ geŋ, kun ise bitin bitin a daana duwo an un gi di'n wolle ye. Para maŋ munda wede Meeguguŋ Raa a kandaane yi dehu y'un t'eley geŋ, kun ki y' t'oone ye.

²Inkino aame ki-t'ele munda a wede i-k'ede munda ye geŋ, ki koppe darru ye, aakede don bizaŋ sire sire ge d'isiyo a urziyagi geeger wo adda boydi don in di dooyiso. An isiyo inkino kono duwo an di'n t'imme. Derec inkino wo n'un di rooto: Kane geŋ munda wede an dehu an t'oona a naabadaŋ, an y'uune baa.

³Wo ki kee, aame ki-t'ele munda a wede i-k'ede munda ye ti beezá wede k'ammade maŋ, beezá wede ki geelo batum y'a ki suune ye.

⁴Inkino maŋ munda wede k'ele geŋ y'a lekke ombide, wo Meegá Raa yi woliyo munda wede k'isiyo kaŋ ombide geŋ me. Inkino munda wede Raa yi dehu y'a di t'ele geŋ, k'a yi t'ooney.»

Dooyiso a urzi tondiyo Raa

⁵«A urzi tondiyo Raa geŋ, kun ise aakede don bizaŋ sire sire ge d'isiyo ye. Kane an geyyiso tondiyo Raa kaŋ ohire adda boydi don in di dooyiso wo a urziyagi k'okkime, kono duwo an di'n wolle. Derec inkino wo n'un di rooto: Kane geŋ munda wede an dehu an t'oona, an y'uune baa.

⁶Wo ki kee, aame ki dehu k'a tonde Raa maŋ, ki t'odo adda biino moonizá, biza k'a-t'appa wo k'a tondo Meegá Raa yoŋ ede a ume ombide geŋ me. Wo Meegá Raa yi woliyo munda wede k'isiyo kaŋ ombide me. Inkino munda wede Raa yi dehu y'a di t'ele geŋ, k'a yi t'ooney.

⁷Aame kun tondiyo Raa maŋ, ono kun'ni foolite ye, aakede kane don Yawudiyagi ye ge d'isiyo me, kono an elkiyo an bobbiso baadaŋ geŋ Raa y'an olliga.

⁸Inkino kun dooze kane ye, kono Meeguguŋ Raa yi suune munda wede kun dehu a urzi lekkiyaguŋ, ki poone kun di y' tonda geŋ me.

⁹Inkino maŋ kun tondo Raa kino: Meegey wede a kandaane, kee k'iso duwo pay an di suune kee Raa kamileŋ,

¹⁰Mozikadá k'a-di t'edi. Munda wede addá i dehu k'aase a siido ette, ki y'iso aakede ki d'isiyo a kandaane.

¹¹Anki kee k'ay eeli ombadey ere ay di t'ide.

¹²K'ay t'isi tambobino a munda wede ulsu ay ize a kee, aakede kaye ton ay an t'ize tambobino a kane don ay ize munda ulsu kay.

13 K'ayn'ooli adda naamiya daggiya i ceera eedey ay t'etta adda k'oldfiko ye, wo de k'ay ti'n addi ti bey Mohita k'oldfiko. [Geŋ moziko, toogo wo tamma, kane pay ki kee ki daayum. Eyye.]

14 Inŋkino maŋ, aame a doŋ a ti doopide a onamguŋ geŋ tambobino kun an t'isiyo maŋ, Meeguguŋ Raa a kandaane toŋ, y'un t'isa tambobino kay a munda wede kun a ti doopide me.

15 Wo de aame a doŋ a ti doopide a onamguŋ geŋ tambobino kun an k'isiyo ye maŋ, Meeguguŋ Raa toŋ y'un k'isa ye kay tambobino a munda wede kun a ti doopide me.»

Dooyiso a urzi lekkiyo daa k'ombo

16 «A lekkiyaguŋ onniyo muno kun lekkiyo daa k'ombo geŋ, kun ti y'ise ume k'edaguŋ zimolo aa doŋ bizaŋ sire sire ge d'isiyo ye. Kane an ti'n neeriyo edayaŋ kono duwo an di'n wolle kane onniyo muno an lekkiyo daa k'ombo. Derec inŋkino wo n'un di rooto: Kane geŋ munda wede an dehu an t'oono, an y'uune baa.

17 Wo kee aame onniyo muno ki lekkiyo daa k'ombo maŋ, edaya ki t'opilo wo eeda k'a t'assigo egey,

18 kono duwo an ki di suune ye kee onniyo muno ki lekkiyo daa k'ombo me. A suune Meega Raa danŋal yoŋ ede a ume ombide geŋ me, wo yoŋ Meega Raa yi wolliyo munda wede k'isiyo ombide me. Inŋkino munda wede Raa yi dehu y'a di t'ele geŋ, k'a yi t'ooney.»

Laale wede a kandaane

(Lik 12.33-34)

19 «Kun t'okume ye laale a siido ette, kono a eŋ amma ti dibe an t'ooma pay, a eŋ doŋ k'oogire an di tooka ti boy wo an di sika.

20 Ki too maŋ kun okumo laale a kandaane, a ummey amma ti dibe umbo, a ummey doŋ k'oogire umbo a-tooka boy wo an di sika me.

21 Derec, a ume wede laalayá yi lekkiyo geŋ, addá'ŋ toŋ anŋeŋno.»

Toore ki tudde

(Lik 11.34-36)

22 «Eda kane aa pitila ki tudde. Aame edaya kane bee maŋ, tuddá pay gette adda toore.

23 Wo aame edaya geŋ kane bee ye maŋ, tuddá pay gette adda zimolo. Inŋkino aame toore wede a-d'ede geŋ i t'ize zimolo maŋ, geŋ kee adda zimolo ere dil baa.»

Naabo a galmaawi sire umbo

(Lik 16.13)

24«Wenda soo toŋ umbo a aane a naabe ti galmaawi sire me, ise maŋ soŋ y'a y'olmida wo y'a-geyye soo me, wo ise maŋ y'a di kette ti wede soo me wo soŋ y'a yi kiigira. Kun k'aane kun ki ti daane ye, urzi Raa wo urzi soŋko sirwaŋ pay me.»

Zaapu k'adde a Raa

(Lik 12.22-31)

25«Geŋ kono k'inŋkino n'un di rooto: Kune a lekkiyaguŋ ulbuguŋ un t'oode ye a urzi k'ombo wo a urzi sobo me, ise a urzi k'ossiyo ere ki tudduguŋ toŋ maŋ. Ki kotto lekkiyaguŋ ere kun lekkiyo ette ti jiire ombó, wo tudduguŋ ti jiire ossiyo.

26Kun wollo embi, an ki korso ye, an k'aydu ye wo an k'okimso mudu adda giiyagi ye, wo Meeguguŋ Raa a kandaane yi di'n moddiyo. Wo kune ki kotto kun i jiire kane geŋ taŋ baadaŋ!

27Wee wee ti diinaguŋ, ti ulbe k'oofiyo wede i-d'ede geŋ, y'aane y'a d'aagila ti kefiise soo onniytagi doŋ ki lekkiyadi a duniya eŋ me?

28Wo de ki moo me ulbuguŋ un d'oofiyo a ossiyo me? Kun wollo bobbo soole adda balda gette, ti d'ohire, ti ki naabiya ye, ti k'isiyo kallagi ye.

29Wo kun ollo, n'un di rooto: Mozigo Salamoŋ toŋ ti laale wede pay i-d'ede geŋ, yi k'usse ye kalle wede majjaane aakede bobbo soole soo toŋ maŋ.

30Inŋkino Raa yi-ti y'ossiyo soole wede adda balda aŋki kuti kutiŋ, wo soggo an t'oggiyo adda k'uwwó mendí. Geŋ taŋ miibi a ceere Raa y'un di'n osse kune batum me! Ki kotto kune zaapu k'adduguŋ a Raa baata.

31Inŋkino maŋ kune ulbuguŋ un t'oode ye, adda k'adduguŋ kun roote ye: “Ay d'ooma moo me?”, “Ay siba moo me?” wo “Ay d'ossa moo me?” me.

32Suldi pay geŋ, daayum i'ni dehutu kane doŋ pay i ki suune Raa soo daŋŋal ye geŋno. Wo Meeguguŋ Raa a kandaane geŋ, yoŋ yi suune suldi geŋ kun'ni dehu a urzi lekkiyaguŋ me.

33Ki too maŋ kun deho ki poone Moziko Raa wo urzi lekkiyo ere ki diine aa Raa yi dehu, wo saŋ suldi pay geŋ y'un di'n t'ela kay.

34Inŋkino maŋ kune ulbuguŋ un t'oode ye a munda wede ki soggo me, kono onniyo ere ki soggo gette tod'te t'onniyatú. Onniyo ere soo dabaratú i-tôwwo k'ettú k'ettú.»

Matiye 7

Ki dekke booro a tukki bakadá ye

(Lik 6.37-38,41-42)

- ¹«Kun dekke booro a tukki wede tuuku tonj manj ye, geŋ Raa tonj yi ki dekke booro eggunj ye.
- ²Derec, t'urzi wede kun dekkiyo booro a tukki doŋ ongo geŋ, Raa tonj y'a dekke booro eggunj, wo doozyo ere kun doozyo a duwo gette, Raa tonj y'un ti dooza a kune injino kay.
- ³Ki moo me ki wolliyo unumu wede adda k'ersa leemada, wo undumu wede adda k'ersada ki gi di y'owwiyo ye me?
- ⁴De mummino k'a aane ki di roote a leemada, k'a t'eese: "K'oolo n'a di t'ambo unumu wede adda k'ersada enno", wo kacinj kee a-d'ede undumu adda k'ersada me?
- ⁵Kee wede biza sire sire, ki t'ambo undumu wede adda k'ersada doo, injino k'a wolla kereŋ, saŋ k'a t'amba unumu wede adda k'ersa leemada kollo.
- ⁶Munda wede kamileŋ a daana Raa geŋ a gede ki-t'ele ye, para manj y'aa kima ki tudda y'a ki ti k'ahita. Dogoro ere zooyatu oone gette kun sedda a daana kinzir ye, para manj tode gette y'a-t'onj'ilsa mentu.»

Kun tondo ti bey Raa kun t'oono

(Lik 11.9-13)

- ⁷«Kun tondo wo munda an un t'eela, kun de hito wo kun t'oono, kun koppo biza wo an un di-t'ihina.
- ⁸Wede tuuku yi ton diyo manj, munda an i-d'eliyo, wede yi de hutu manj, yi d'ooniyo, wo wede yi koppo biza manj, an i di t'ohine.
- ⁹Wee wee ti diinagun aame uli yi tunde omba manj, yi di t'ele moko me?
- ¹⁰Koo yi tunde puuniso manj, yi di t'ele miipo me? Aha umbo!
- ¹¹Injino manj kune doŋ addugun ulpi tonj, kun suune eliyo suldi doŋ majjandani a injinun. Wo geŋ taŋ miibi a ceere Meegugun Raa a kandaane y'aane y'an t'ele suldi doŋ majjandani a doŋ i yi ton diyo me!
- ¹²Suldi doŋ pay kun de hu duwo an un d'ise geŋ, a kane tonj kun an iso injino kay. Geŋ injino ita k'ono doŋ pay an riije ti kaaga adda mattup k'oogoro Muusa ti doŋ ki nebiyagi me.»

Urzi sire

(Lik 13.23-24)

- ¹³«Kun t'odo ti biza perye'e. Derec, biza goole geŋ yonj urzi wede sooruzi i k'oone ye, y'a-da t'ette k'ume daggiya, wo doŋ baadan an adiya t'urzi genno.
- ¹⁴Ki kotto biza perye'e geŋ, yonj urzi sooruzi oone, y'a-da t'ette k'ume lekkiyo ere ki daayum, wo doŋ baata adiya t'urzi genj me.»

Undumu ti inñizí
(Matiye 7.16-17; Lik 6.44-45)

- 15«Kun koona mentikagi ti ñuwo ñoŋ an ti t'isiyo tuddaŋ aa nebiyagi. An'tiyo tudduŋuŋ kane tasse aa dambami, wo kaciŋ t'adda k'addaŋ kane bundidi aa sullibagi.
- 16Geŋ kane kun di'n suune a urzi sooruzañ. Inñi k'inda biñ ekk'undumu k'ahimagi ki ki rakke ye, ise inñi tormo toŋ ekki woskani ki ki rakke ye.
- 17Inñino undumu tuuku beehiye y'a t'ehe inñizí toŋ beehiye, wo undumu wede ulsu y'a t'ehe inñizí toŋ ulpi.
- 18Undumu wede beehiye yi k'aane yi ki t'ehe inñi ulpi ye, wo undumu wede ulsu yi k'aane yi ki t'ehe inñi beehiye ye.
- 19Undumu tuuku yi k'ehiyo inñi beehiye ye maŋ, yoŋ geŋ an di ñekka an di seŋŋa adda k'uwwu mendí.
- 20Geŋ inñino ñuwo ñoŋ an ti t'isiyo tuddaŋ kane nebiyagi kaciŋ nebiyagi ye geŋ, kun di'n suune a urzi sooruzañ.»

Doŋ etta ñaana Raa
(Lik 6.46; 13.27)

- 21«Kane ñoŋ an ni waaku: “Galmeegay, Galmeegay” geŋ, pay an ki t'etta ye k'adda Moziko Raa te. Wo etta kane ñoŋ isiyo munda wede Meego Raa a kandaane yi dehu ñaŋŋalaŋ.
- 22A onniyo booro gette ñoŋ baadaŋ an o di roota, an t'eesa: “Galmeegay, Galmeegay, ki kotto ti sundá ay ruutito ono ñoŋ Raa y'igibo, ti sundá ay d'ilmito siitandani, ti sundá ay d'izito suldi k'armika baadaŋ ñe me!”
- 23Inñino maŋ n'an di roota kereŋ, n'a t'eesa: “Kune toc aŋ wenda n'un ki'n zuune ye. Kun ti ledño dokki ti tuddó me, kune ñoŋ isiyo suldi ñoŋ ulpi!”»

Boyfi sire
(Lik 6.47-49)

- 24«Inñino wede tuuku y'ollige ono ñoŋ ni rootiyo eñño wo yi sooru eego maŋ, yoŋ geŋ yi deey'iso aa wede i-d'ede elkiso y'a t'iiziga boozí eego paŋgiragi.
- 25Mizzi y'a guppe ti maaye baadaŋ, oydayi an d'ûunite i paldita waawiye. Maaye ti bormo geŋ an di ñiiy'a boy geñño wo y'a k'iire ye, kono yoŋ itadi an ziipe ekki paŋgiragi.
- 26Wo ñe wede tuuku y'ollige ono ñoŋ ni rootiyo eñño wo yi ki sooru eego ye maŋ, yoŋ geŋ yi deey'iso aa wede elkisadi umbo y'a t'iiziga boozí a dolso.
- 27Mizzi y'a guppe ti maaye baadaŋ, oydayi an d'ûunite i paldita waawiye. Maaye ti bormo geŋ an di ñiiy'a boy geñño wo a ruuge pay.»

Isa yi dooyiso t'urzi k'aaye?

(Markus 1.22; Lik 4.32)

²⁸Isa y'a ti dinge dooyiso gettiyo mañ, kane don duuru dooyisadi gette t'an di'n ziida,

²⁹kono yon yi dooyiso ti toogo suuniyo ere ki yode batum, wo aakede ki don suuniyo k'oogoro ge ki dooyiso ye.

Matiye 8

Eliyo beeko a wede bitide

(Markus 1.40-44; Lik 5.12-14)

¹Isa yi ti diige t'ekki kesse mañ, don duuru baadan an di y' diine.

²Inkino mañ i d'ede wede bitide y'a d'iide sirpa k'Isa, y'a-dikke a daanadi wo y'a yi tunde, y'ede: «Galmee'ki nuñ, ki dehu mañ, k'o eli beeko n'a t'ise kamilen a daana Raa.»

³Mañ Isa y'a igibe beezí y'a yi butte, wo y'a ruute, y'ede: «Nuñ ni dehu, ki t'iso kamilen!» A kaamiki bitidayi a nukkide, y'a t'ize kamilen.

⁴Wo Isa yi di ruute, y'ede: «K'ollo koduwo, a munda wede ize en a wenda soo ton ki rootey ye! Wo de k'odo deddet ki-ti kazoy tudda a wede sedefe y'a ki ti wolley, wo k'a eloy munda ki sedefe aa Muusa y'a ruute adda k'oogoro in d'ise, kono don pay an di wolle kee k'uune bee.»

Zaapu k'adde ki goole k'asigiryagi

(Lik 7.1-10; Zan 4.46-54)

⁵Isa y'ette k'adda geeger Kapernayim gen, i d'ede goole k'asigiryagi meeda ki Romen, y'a d'iide sirpa k'Isa wo yi-d'obe bey, y'ede:

⁶«Galmee'ki nuñ, wede naabadó eeni, tuddi i t'inda moone a boy, yi dabirsa baadan.»

⁷Mañ Isa yi di ruute, y'ede: «Nuñ n'a etta ni-t'eley beeko te.»

⁸Wo goole k'asigiryagi yi di'n gime onami, y'ede: «Galmee'ki nuñ, nuñ ni k'iide ye k'a ette ki boozó me. Wo t'en miñ ki rooto munda soo kono wede naabadó y'a t'oone bee.

⁹Inkino nuñ batum n'ottilso a don deero t'eedó wo i d'ede asigiryagi don nuñ goole t'eedan. Aame ni rootiyo a wede soo: "K'odo!" mañ, gen yi d'engilso. Aame ni rootiyo a wede doolo: "K'edi!" mañ, gen yi d'ettiyo. Wo aame ni rootiyo a bulayó: "Naabo ette ki-t'iso!" mañ, gen yi-ti t'isiyo.»

¹⁰Aame Isa y'illiga ono genno mañ, y'a ziida giggeri wo y'an di ruute a don duuru don i yi daaniya gen, y'ede: «Derec inkino wo n'un di rooto: Adda

siido k'Izirayel ette wenda soo tonj ni k'uune ye, wede a zaape addí a Raa aa yode kino enj me.

11Wo kun ollo, n'un di rooto sey: Doŋ baadaŋ an d'etto ti kese peedo ge-koliyo wo ti kese peedo k'ooriyo, an di kooney an d'oomey kaŋ soo adda Moziko Raa ti Ibirayim, Isaaka wo Yakup.

12Wo de kane Yawudiyagi doŋ toc ooma Moziko Raa geŋ, doŋ onjo an ti'n sebbey ti paate adda zimolo, ume wede ki dollite molo wo k'aadumu sina.»

13Maŋ Isa yi di ruute a goole k'asigiryagi, y'ede: «Ki-kama ki boozá. Kono ki ziipe addá a nuŋ geŋ, wede naabadá y'oono bee.» A peedo gettiyo batum wede naabo ki goole k'asigiryagi geŋ y'a uune bee.

Eliyo beeko a doŋ k'eeni baadaŋ

(Markus 1.29-31; Lik 4.38-39)

14Saŋ maŋ Isa y'a t'iide daŋ Piyer. Aame y'iiney maŋ yi-t'uuney ande Piyer ekk'onjali i-ti d'iire.

15Maŋ Isa yi ziida beytú, wo a kaamiki ooriyo t'a t'iili, t'a t'iiziga wo ti di naabiya.

16A peedo t'a t'iire maŋ, tiŋ geŋ duwo an i di ziko doŋ baadaŋ an d'ede siitandani a eedaŋ. T'urzi toogo k'onamí Isa y'an ilmiti siitandani me, wo doŋ k'eeni pay geŋ y'an d'ele beeko.

17Y'ize suldi injkino kono a-t'ette a ono doŋ nebi Ezayi yi riije ti kaaga adda mattup ki Raa, y'ede: «Yode batum y'a iyye y'a t'umbe dabaradiŋ ti endanziŋ a eedí.»

Doŋ i dehu daaniya k'Isa

(Lik
9.57-60)

18Onniyo soo Isa yi wulle doŋ duuru baadaŋ an i di-t'ugiye maŋ, y'an di ruute a sanalliyagi an di doopida ti yode ti dar bar ki Galile ti nee.

19Aame geŋ wede suuniyo k'oogoro y'a d'iide sirpa k'Isa wo yi di ruute, y'ede: «Wede dooyisadey, n'a ki daana k'ume wede tuuku kee k'etta geŋ me.»

20Wo Isa yi-ti'n gime onamí, y'ede: «Boo ti boydutú wo embi tonj ti boydizaŋ, wo de nuŋ wede an n'ehe aa ulo wede enj, oo k'ede ume ni ki ti t'ele eedó n'a ki puuke ye.»

21I d'ede wede doolo ti diine sanalliyagi yi di ruute Isa, y'ede: «Galmee'ki nuŋ, k'o eeli urzi n'a ette n'a t'ottibo meegó do.»

22Wo de Isa yi di ruute, y'ede: «Ki ni daani, wo ki'n oolo kane doŋ aa unto an d'ottiba tuddaŋ.»

Isa toogo i jiire maaye baadaŋ

(Markus 4.31-41; Lik 8.23-25)

- 23**Maṅ Isa yi ti gili adda tooko, wo kane sanalliyagí an a di gili ti yode.
- 24**An a iide maṅ, a kaamiki i d'iiziga maaye baadaṅ adda bar. Ahu geṅ i-kolzite kolzite i d'obite k'adda tooko, wo yo Isa geṅ y'a udige kuy.
- 25**Kane sanalliyagi an a d'iide sirpadí an di y'inne kaṅ d'ollite, an'de: «Galmeegey k'in utti, para'ṅ in ti t'inda!»
- 26**Maṅ Isa y'an di ruute, y'ede: «Kun orgiso iṅkino moo me? Ki kotto kune zaapu k'addugun a Raa baata!» Iṅkino maṅ Isa y'a t'iiziga, y'an idfise maaye ti ahū bar geṅ me, wo a kaamiki an d'inniga deddek.
- 27**Kane don pay ti yode geṅ an ziida giggiraṅ wo an di rootiyo, an'de: «Yode eṅ moo wede me, kono aṅ maaye ti ahū bar toṅ an d'ollige onamí me!»

Isa toogo i jire siitandani

(Markus 5.1-20; Lik 8.26-39)

- 28**Aame Isa y'iiney a siido Gadara ti dar bar Galile ti nee maṅ, i d'iide don sire t'ume muuziyagi, an iide'ṅ an a y'ikkima. Kane don geṅ an d'ede siitandani a eedaṅ, kane bundidi wenda soo toṅ yi k'aane yi k'adde t'urzi geṅno ye.
- 29**Wo a kaamiki an d'iise d'ollite, an'de: «Kee Isa Ulo Raa no, ki dehu moo me a tukki kaye me? Kee k'iido keṅno k'ay di'n dabire ki poone onniyo booro t'a aana ko?»
- 30**Goppon tiṅ geṅ i d'ede torfo meeda ki kinzir an elso.
- 31**Kane siitandani geṅ an i d'obe bey a Isa, an'de: «Kee k'ay ti'n lomme maṅ, k'ay ti'n agibi ay t'ette adda torfo kinzir ettiyo.»
- 32**Isa y'an di ruute, y'ede: «Kun t'adfo!» Iṅkino t'ekki don sire geṅ an t'udde, an t'iide adda kinzirdari. A kaamiki t'awwa t'ekki kesse geṅ, torfo pay t'a zide okko, kinzirdari an t'ibi adda bar, an t'inda adda k'ahu.
- 33**Kane don k'elso geṅ an d'ukke k'adda geeger, an an t'iide taaya a suldi pay don ize wo a munda wede ize a tukki don sire an d'ede siitandani a eedaṅ geṅ me.
- 34**Iṅkino maṅ don pay t'adda geeger an t'udfo, an t'ette k'ume k'Isa. Aame an iiney a sirpadí maṅ, an i d'obe bey kono ti siidadaṅ y'a eṅgile.

Matiye 9

Eliyo beeko a wede runguyun

(Markus 2.1-12; Lik 5.17-25)

- 1**Saṅ maṅ Isa yi ti gili adda tooko, y'a diipida bar sey wo y'a t'iide k'adda geeger ere yi-lekkiyo.

²Ɗoŋ miibi an i d’umbo wede ruŋguyun kaŋ moone a zaade. Isa yi wulle kane an ziipe addaŋ a yode maŋ, aame geŋ yi di ruute a wede ruŋguyun, y’ede: «Ulo ki nuŋ ki t’oobo addá, oldíkadá n’a y’ t’ize tambobino.»

³Iŋkino maŋ i d’ede Ɗoŋ suuniyo k’oogoro miibi an di rootiyto t’adda k’addaŋ, an’de: «Wede eŋ yi kalda suma Raa!»

⁴Isa elkisadaŋ y’a ti zuune wo y’a ruute, y’ede: «Ki moo me un d’ede elkiso ere oldo adda k’addugun me?

⁵Ise laylay a jiiire miŋ too me a nuŋ n’a roote: “Oldíkadá Raa y’a y’ t’ize tambobino” kunun, n’a roote: “Ki t’oozo wo k’a oziro” me?

⁶Wo ni dehu kun di suune, nuŋ wede an n’ehe aa ulo wede eŋ, adda duniya ette o d’ede toogo k’isiyo tambobino a oldiko.» Maŋ yi di ruute a wede ruŋguyun, y’ede: «Ki t’oozo, ki t’ambo zaadayá, k’a aaho boozá!»

⁷Wede geŋ y’a t’iiziga wo y’a aahe boozí.

⁸Aame Ɗoŋ duuru an wulle munda wede ize geŋno maŋ, orgiso t’anni ziida wo an di tamma Raa wede ele toogo iŋkino a duwo.

Waaku Matiye

(Markus 2.13-17; Lik 5.27-32)

⁹Tiŋ geŋ Isa y’a iide ɗaana maŋ, a urzi yi wulle wedusu sundí Matiye yi guune a ume naabadí yi seɗɗu jibaaye. Isa yi di ruute, y’ede: «Ki ni daani!» Maŋ yoŋ y’a t’iiziga wo y’a yi diine.

¹⁰Isa y’iide’ŋ y’a guune ombo ti sanalliyagí adda boy ki Matiye. Aame an di-guune maŋ, Ɗoŋ seɗɗu jibaaye baadaŋ ti Ɗoŋ k’oldiko oŋgo pây an di guune ti kane kaŋ soo.

¹¹Kane Pariziyen an wulle iŋkino maŋ, an an di ruute a sanalliyagí, an’de: «Ki moo me wede dooyisagun yi d’ombo ti Ɗoŋ seɗɗu jibaaye wo ti Ɗoŋ k’oldiko oŋgo me?»

¹²Isa yi’n illiga maŋ, y’a ruute, y’ede: «Kane Ɗoŋ waaliŋ an ki y’ dehe ye wede daawiya me, wo i y’ dehe Ɗoŋ k’eeni.

¹³Kun’do, kun ti dooyi ono Ɗoŋ Raa yi ruute ti kaaga, y’ede: “Ni dehu kun d’ise adde koduwo ti duwo, geŋ i jiiire sedeke ere kun isiyo ki seyɗi.” Derec, nuŋ ni k’iido’ŋ waaku kane Ɗoŋ ki diine ye, wo ɗe n’iido’ŋ waaku kane Ɗoŋ k’oldiko.»

Ono ombide a urzi lekkiyo daa k’ombo

(Markus 2.18-22; Lik 5.33-39)

¹⁴Iŋkino maŋ kane sanalliyagi ki Zaŋ Batis an d’iide an tunde Isa, an’de: «Ki moo me kane sanalliyagá onniyo muno an ki lekkiyo daa k’ombo ye, wo kacinj kaye ti kane Pariziyen onniyo muno ay di lekkiyo daa k’ombo me?»

15Isa y'an di'n gime onamañ, y'ede: «Kun elkiyo miñ doñ an'ni wiiko a tarnaape seedu, an di lekke sommagi dondoñ koo, aame kule k'ere yoñ a diinayañ mañ? Aha, iñkino ye! Wo sañ onniytagi an d'aana, aame kule k'ere ti diinayañ an ti y'umba mañ. Aame geñ kane onniyo muno an di lekka daa k'ombo kollo.

16Beehiye ye wenda yi d'ambe buude kalle aware y'a-t'obbira ekki kalle mazzini me, para mañ buude geñ y'a t'aadi kalle geñno, a di sittite a ceere sey.

17Wo soñ beehiye ye wenda yi-t'eepe toote k'iñni biñ wede oozige botto adda riitile wede mazzini me, para mañ riitile a batte, toote geñ a t'obi siido wo riitile a latte pây. Ki too mañ yi-t'eepe toote wede oozige botto adda riitile wede aware, wo geñ a lekke beehiye.»

Eliyo beeko a erewo wo baldiya k'uto ki wede i-d'ede goaliko

(Markus 5.21-43; Lik 8.40-56)

18Aame Isa y'an ti rootiyto iñkino geñ, i d'iina wede iñkino i-d'ede goaliko. Y'a d'iide sirpa k'Isa, y'a-dikke a daanadi wo yi di ruute, y'ede: «Añkenno eñ miñ uto nuñ t'a t'ihe. Wo de k'a ette mañ, ki zaapey beezá a tuddutú wo t'a baldey.»

19Mañ Isa y'a t'iiziga, wo ti sanalliyagi an di diine wede geñno.

20Aame an engile geñ i d'ede erewo soo iñkino ti dabirsa, puuzo obite t'itatú ñide ozzine koomat makumu sire. Iñkino ti-t'iide ti dar k'Isa, t'a-butte bize kallayí,

21kono t'a ruute t'adda k'addutú, t'ede: «Aame n'iina n'a butta a kallayí ñañjal toñ mañ, n'a utta t'eenizó me.»

22Mañ Isa y'a gilde, yi di wolliyo wo y'a ruute, y'ede: «Uto ki nuñ, mi t'oobo addí! Kono koñ mi ziipe addí a nuuno geñ, m'utte.» A kaamiki, erewo t'a uune bee.

23Aame Isa y'iiney a boy ki wede i-d'ede goaliko geñno mañ, yi'n uuney duwo an isiyo unto ti siriryagi.

24Mañ Isa y'a ruute, y'ede: «Kun t'adfo t'adda boy me, kono uto ti k'inda ye, ti moone moone.» Wo kane duwo geñ an di y'okko maade.

25Aame doñ duuru geñ an ti'n udfe mañ, Isa yi-t'iide k'adda biino, yi ziidá bey k'uto wo t'a t'iiziga.

26Rabila gette i di tiipe adda siido gette pay.

Eliyo beeko a koñzayi sire

27Tiñ geñ Isa y'engile mañ, i d'ede koñzayi sire iñkino an di y' daaniya, an di dollite an d'eesiyo: «Kee Wede ti biza bumbu Dawut, k'iso adde koduwo, k'iso adde koduwo!»

28Isa y'iiney boy wo yi t'iide adda mañ, kane koñzayi geñno toñ an a-t'iide, wo an a d'iide sirpadi. Mañ Isa y'anni tunde, y'ede: «Kun ziipe adduguj ko, nuñ

n'aane n'un t'ele beeko me?» Maṅ kane an i ti'n gime onamí, an'de: «Eyye Galmeegey, ay ziipe addey.»

²⁹Inkino maṅ y'an buttite a edayaṅ wo y'a ruute, y'ede: «Munda geṅ Raa y'un ti y'iso kono kun ziipe addugun a nuuno geṅ me.»

³⁰Wo edayaṅ a t'ihina an di woliyo. Maṅ Isa y'an di ruute ti golla zakidí, y'ede: «Kun ollo koduwo, a wenda soo toṅ kun roota ye a munda wede ize eṅ me.»

³¹Wo kane aame an t'udde maṅ, an d'iise rootiyto sundí adda siido gette pay.

Isa ti wede i k'orbe ye

(Lik 11.14-15)

³²Aame kane an eṅgile geṅ, duwo an i d'irkido wede soo inkino bizí i t'ippe yi k'orbe ye, kono i-d'ede siitan a eedí.

³³Isa y'a-t'ilmi siitan gette, wo aame ti t'udde maṅ, wede bizí i t'ippe geṅ y'a iise ono. Maṅ kane doṅ duuru geṅ an ziida giggiraṅ, wo an di ruute, an'de: «A siido k'Izirayel ette, munda kino'ṅ kaṅ soo toṅ ay ki wulle ye.»

³⁴Wo miṅ kane Pariziyen an di ruute, an'de: «Geṅ Meeda siitandani i eliyto toogo ki lommitte siitandani me!»

Isa yi woliyo sommagi doṅ duuru

(Markus 6.6,34; Lik 10.2)

³⁵Adda siido gette Isa yi d'ettiyo geeger ti geeger wo ille ti ille, yi dooyisito duwo adda boydí doṅ Yawudiyagi ge dooyiso, y'an kazita Rabila Majjaanawa ki Moziko Raa, y'an d'eliyo beeko a doṅ pay eeni wo doṅ pay an d'ede ita k'eeni tuuku toṅ maṅ.

³⁶A doṅ duuru pay a daanadí geṅ i di t'ize sommagi, kono kane geṅ an urme wo eedaṅ ti digge aakede dambami daa wede k'elsadaṅ.

³⁷Inkino maṅ y'an di ruute a sanalliyagí, y'ede: «Kane doṅ duuru eṅ aa doome goole y'ize k'aydu, wo doṅ naabo baata.

³⁸Inkino kun tondo wede doome kono y'a-t'igibo doṅ naabo k'aydu.»

Matiye 10

Naabo sanalliyagi kane koomat makumu sire

(Markus 3.16-19; Lik 6.14-16)

¹Isa y'a-wiike sanalliyagí kane koomat makumu sire, y'an d'ele toogo ki lommitte siitandani doṅ an t'ooney a daanadaṅ, an di t'eley beeko a doṅ an d'ede ita k'eeni tuuku toṅ maṅ wo a aadumutu tudde pay.

²Kun ollo enj sumbiyagi donj zina k'Isa kane koomat makumu sire: ki poone Simo wede sundí soo te Piyer, wo leemadí Andire; Zak ti leemadí Zan, kane sirwanj pay inñi Zebede;

³Pilip ti Bartelemi; Toma wo Matiyee wede seddu jibaaye; Taade wo Zak ulo k'Alpe;

⁴Simo wede addí wehini kono siidadí me, wo Ziidas Iskariyot wede sanj y'an di y' t'ela Isa a bey donj k'olmidayí.

Agisa ki sanalliyagi kane koomat makumu sire

(Markus 6.7-11; Lik 9.2-5; Lik 10.3-12)

⁵Kane donj koomat makumu sire genj, Isa y'an agisa k'isiyo naabadí wo y'an di ruute munda wede an d'isey, y'ede: «Kun ettey ye ki tukki kane donj Yawudiyagi ye me, wo k'adda geeger ki siido Samari soo tonj kun ettey ye.

⁶Ki too kun d'ettey ki tukki donj k'Izirayel kane aa dambami i digge.

⁷A urzi kun di kazitoy, kun d'eesoy: “Moziko Raa t'iina gopponj.”

⁸Donj k'eeni kun an d'eloy beeko, donj unto kun ti'n baldoy, donj bitide kun an d'eloy beeko an t'isoy kamilenj, siitandani kun di'n olmitoy. Kune suldi pay kun uune ki waawiye, wo kun an eloy tonj ki waawiye.

⁹Ki torguwagunj dap kun amba ye, ise sonko, ise tammiyagi sunni sunni adda poosagunj me,

¹⁰ise eese, ise kalle ki sirwe, ise tobiyagi zonj ki sirwe, ise dalka tonj manj. Derec, wede yi naabiya'nj i-d'ede urzi y'a oomi ti bey donj y'an naabiya.

¹¹Aame kun t'iidey adda geeger ere tuuku ise adda k'ille tuuku tonj, kun di tonditoy wede beehiye ede wo y'unni seeda bey sire manj, kun di deegoy di yode bini enjilsagunj.

¹²A ettiyagunj ki boy wede kun ettey genj, kun d'eesoy: “Toose Raa ti koonaa eggunj.”

¹³Aame donj boy genj an unni ziidey manj, toose kune t'a koonoy eedanj, wo aame an un ki'n ziidey ye manj, toose kune t'a-kamoy ki tuddugunj.

¹⁴Aame an un ki'n ziidey ye wo onamgunj an k'illigey ye manj, a enjilsagunj ti boy genno ise ti geeger gettiyo genj, odde zongunj tonj kun an ti y' tottigoy, genj i-kaza Raa ulbí unse ye ti kane me.

¹⁵Derec injkino wo n'un di rooto: Onniyo ere Raa yi dekka booro gette, kane donj siido Sodom ti Gomor ti kaaga Raa y'an igge pay genj, booradanj t'a koonaa soodo ti donj ki geeger gettiyo.»

Dabar ere etto a donj k'Almasi

(Markus 13.9-13; Lik 12.11-12; 21.12-19)

16«Kun ollo, nuɲ n'un agisa eɲ aakede dambami k'adda diine sullibagi. Injino maɲ kun koonoy mentikagi aakede mimbayi, wo tasse aakede deere.

17Kun koonoy mentikagi, kono ɗuwo an un ti'n seddey, an un di'n t'ettey k'ume ɗoɲ booro wo an un di'n gorpipay ti marpa adda boydi ɗoɲ an di dooyiso.

18Kono kune ɗoɲzó geɲ, an un di'n t'ettey ɗaana ɗoɲ deero siido wo ɗaana mozagi. Aame geɲ, a ɗaanadaɲ wo a ɗaana kane ɗoɲ Yawudiyagi ye, kun t'ooney urzi kun di rootey a suldi ɗoɲ kun wulle wo kun illiga a tukki nuuno geɲ me.

19Aame an un di'n t'iidey k'ume ɗoɲ booro maɲ, ulbuguɲ un t'oodey ye a maana k'ono ɗoɲ kun di rootey, ise a munda wede kun di rootey me. A ume geɲ miɲ Raa y'un t'eley ono ɗoɲ kun di rootey.

20Injino maɲ aame kun rootey geɲ, ono ettey ti suuniyo kune ye, wo unni dokkey Unde ki Meeguguɲ Raa.

21Leema y'an di y' t'ela leemadi a bey ɗuwo ki towwadi, wo meege toɲ injino kay a inɲizi me. Inɲi an di-kima adu ki maawaɲ, an deha urzi, ɗuwo an di sedfa maawaɲ ki towwadaɲ.

22Kune ɗoɲ duniya pay an un di'n olmidfa kono kun umbe a sundó, wo ɗe wede y'a ziida zakidi a urzizo bini ɗaɲgu maɲ, yode geɲ Raa y'a y'utta.

23Aame adda geeger tuuku an unni dabirsa maɲ, kun t'omboy ki geeger ti doolo. Derec injino wo n'un di rooto: Kune geegiryagi ki siido k'Izirayel geɲ kun ki ti'n ozira pay ye, ki poone nuɲ wede an n'ehe aa ulo wede eɲ, n'a kimo me.

24Sanallusu geɲ yoɲ t'ekki wede dooyisadi ye, wo wede naabo toɲ yoɲ t'ekki galmeegi ye.

25Sanallusu geɲ, i dehu y'a t'ise aa wede dooyisadi ɗaɲɲal, wo wede naabo toɲ injino y'a t'ise aa galmeegi. Aame nuɲ wede boy ɗuwo an ni kalda an'de nuɲ Belzebul maɲ, kune ɗoɲ boozo an un di'n kildita a ceera sey.»

Wedusu wede kun i-d'orgide

(Markus 8.38; Lik 9.26; 12.2-9)

26«Kune a ɗuwo kun an orgide ye. Suldi ɗoɲ pay ombide'ɲ, saɲ onniyo soo a t'oodiba ita, wo ono ɗoɲ i ki dehu ɗuwo an k'olliga ye geɲ, saɲ onniyo soo ɗoɲ pay an di'n olliga.

27Munda wede n'un rootiyo a zimolo geɲ, kun ti y' rooto kereɲ, wo munda wede an un meliɲso a kuuduguɲ geɲ, kun yi rooto aa kun a ti gili t'ekki biino kun ɗolle.

28Kun an orgide ye a donj i tôwwo tudde wo an k'aane tôwwo k'unde ye me. Ki too mañ kun d'orgide a Raa, yode wede aane i t'ide tudde ti unde pây adda k'uwwo.

29Kun suune ooyo sire doo miñ in t'owile ti soñko soo kollo, wo ti diinayanj soo toñ a siido i k'oore ye, daa ki Galmeegugunj Raa yi ki suune ye me.

30Wo ki kune, ilali k'eggunj genno toñ Raa yi ti'n kaza pay.

31Injino kun orgide ye, kono kune zooyagunj yi jiiire ooyo baadañ!»

Rootiyo a daana duwo ki daaniya k'Isa

32«Wede tuuku yi ruuta a daana duwo yonj ki nuuno mañ, nuñ toñ n'a rootey kay yonj ki nuuno, a daana Meegó Raa a kandaane me.

33Wo de wede tuuku yi ruuta a daana duwo yi ki n' suune ye mañ, nuñ toñ n'a rootey ni ki y' suune ye kay, a daana Meegó Raa a kandaane me.»

Isa y'iido ki moo me?

(Lik 12.51-53)

34«Kun elke ye, nuñ n'iido n'un t'ela toose adda duniya me. N'a k'iido ti toose ye, wo de n'a iido ti deyyiso.

35Eyye, nuñ n'iido ulo ti meegí n'an ahinte, uto ti mettú n'an ahinte, erewo ti andutú n'an ahinte.

36Wede tuuku toñ i di t'isa donj k'aduzí miñ, donj adda boozí genno.

37Wede yi geyyiso meegí ise meedí a jiiire nuuno mañ, yonj genj yi k'iide ki daaniyadó ye. Wede yi geyyiso ulí ise utí a jiiire nuuno mañ, yonj genj yi k'iide ki daaniyadó ye.

38Wede yi k'iyya y'a ki t'inda kono nuuno wo y'a ki n' daane ye mañ, yonj genj yi k'iide ki daaniyadó ye.

39Wede yi diha boohiyo tuddí k'aggadí mañ, y'a ti dagga, wo wede y'iila tuddí kono nuuno mañ, y'a t'utta.»

Wede eliyo genj, aggadí y'a ti t'ooney

(Markus
9.37,41; Lik
9.48; 10.16; Zanj 13.20)

40«Wede unni seedu bey sire mañ, genj aa yi seedu nuñ batum, wo wede yi ni seedu bey sire mañ, genj aa yi seedu wede i n'igibo.

41Wede i seedu nebi ki Raa kono yonj nebi mañ, munda wede Raa yi dehu yi-t'eley a nebi genj, y'a yi t'ooney kay, wo wede yi seedu wede ki diine kono yonj ki diine mañ, munda wede Raa yi dehu yi-t'eley a wede ki diine genj, y'a yi t'ooney kay.

⁴²Derec in̄kino wo n'un di rooto: Wede tuuku yi eela ahu ɲoyoyo a kulso ɗaɲɲal, a wede soo ɗuwo an yi wollyo yoɲ ɲeɲku kono yoɲ ti diine sanalliyagó maɲ, munda wede Raa yi dehu yi-t'eley geɲ, y'a yi t'ooney.»

Matiye 11

Don zina ki Zaɲ Batis ti Isa

¹Aame Isa y'a ti ɗiɲge ti rootiyto a munda wede kane sanalliyagí koomat makumu sire an d'isey maɲ, tiɲ geɲ y'a in̄gile dooyiso ɗuwo wo yi kazita adda geegiryagi ki siido gettiyo.

²Wo Zaɲ Batis yi lekkiyo ɗaɲgay geɲ, y'a illiga ɗoɲ an tówwo taaya a naabo k'Almasi Raa yi biire. In̄kino maɲ yi d'igibe ɗoɲ miibi ti diine sanalliyagí ki tukk'Isa.

³An iide'ɲ an di y' tunde, an'de: «Kee miɲ Almasi Raa yi biire, saɲ a etto ko? Kunuɲ ay di dello wede doolo ko?»

⁴Isa y'an di'n gime onamaɲ, y'ede: «Kun'do a Zaɲ, kun i-t'ôodoy taaya a munda wede kun ollige wo kun wollyo eɲ me:

⁵Koɲzayi an di wollyo kereɲ, ɗoɲ jekese an sooru beehiye, ɗoɲ bitide an t'ize kamileɲ, ɗuɲgiyagi an d'ollige, ɗoɲ unto an di bilde wo Rabila Majjaanawa an an gizite a ɗoɲ an k'ede munda ye.

⁶Wo un̄suwo a wede y'a ziida zakidi kono nuuno bini ɗaɲgu!»

Rootiyo k'Isa a tukki Zaɲ Batis

⁷Sanalliyagi ki Zaɲ Batis an t'in̄gile maɲ, aame geɲ Isa y'a iise rootiyto a ɗoɲ duuru a tukki Zaɲ, y'ede: «Kun iide k'adda balda wollyo ki moo me? Ki wedusu wede aa alala ere maaye yi t'agisa gettiyo ko? Aha.

⁸De in̄kino kun iide wollyo ki moo me? Ki wedusu yi t'usse kallagi majjandani ko? Wo ɗe kane ɗoɲ ossiyo kallagi majjandani geɲ, an lekkiyo adda boydi mozagi.

⁹De kun iide wollyo ki moo me? Ki nebi ko? Eyye, wo kun ollo n'un di rooto, yoɲ geɲ yi jiire nebi sey.

¹⁰Yoɲ geɲ wede an riine ti kaaga adda mattup ki Raa, an'de: “Kun ollo, nuɲ n'a t'igiba wede zindó y'a ooguma ki poone ti kee, y'a di t'okkimey urzizá.”»

¹¹Isa y'a ruute sey, y'ede: «Derec in̄kino wo n'un di rooto: Ti diine ɗuwo ɗoɲ pay erayi an ehe geɲ, wede aase goole a ceere Zaɲ Batis umbo. Wo in̄kino toɲ maɲ, wede yoɲ ɲeɲku a jiire adda Moziko Raa geɲ, yoɲ goole yi jiire Zaɲ.

12T'ume Zaŋ Batis y'iise naabo Raa bini aŋkenŋo geŋ, ɗuwo an d'eliyo gotono kono an t'ette adda Moziko Raa, wo kane ɗoŋ i ŋaay'u ki toogo geŋ, an dehu an di-t'oobe.

13Raa y'an di ruute a ɗuwo a tukki Mozikadi ere a etto, t'urzi k'ono ɗoŋ an riije ti kaaga adda mattup k'oogoro Muusa ti ɗoŋ pay ki nebiyagi, bini aaniya Zaŋ Batis.

14Aame kun dehu kun ambe maŋ, geŋŋo Zaŋ yode wede nebiyagi an ruute, an'de: "Saŋ Eli y'a etto me."

15Wede i-d'ede kuwwa k'ollige maŋ, y'ollo kofuwo!

16Doŋ aŋkenŋo eŋ n'a t'eese kane aa wee wee? Kane an deey'iso aa inŋi an ti guune a bere ɗoŋ duuru, an di waakutu eebaŋ, an d'eesiyo:

17"Kaye ay un di biiha siraro toŋ maŋ, kun ki d'immira ye! Ay un d'ûure ôoro k'unto toŋ maŋ, kun ki d'iile ye!"

18Iŋkino Zaŋ y'iina geŋ, onniyo muno yi lekkiyo daa k'ombo, toote k'inŋi biŋ yi k'iibe ye, wo ɗuwo an di rootiyo, an'de: "Yoŋ i-d'ede siitan a eedí!"

19Wo nuŋ wede an n'ehe aa ulo wede eŋ, n'iina maŋ ni d'ombo ni sobo, wo an di rootiyo, an'de: "Kun wollo, wede eŋ y'elkiyo miŋ a ombo ti sobo toote k'inŋi biŋ ɗaŋŋal, yoŋ laŋze ki ɗoŋ seddu jibaaye wo ti ɗoŋ k'oldiko oŋgo." Wo Raa'ŋ, suuniyo k'ono ere i d'ede, ɗuwo an ti zuune tod'te ki diine t'urzi naabatú.»

Geegiryagi ɗoŋ i-tuuge k'ambu a Isa

(Matiye 10.15; Lik 10.12-15)

20Adda geegiryagi ɗoŋ Isa y'a ize suldi k'armika ɗoŋ a ise baadaŋ geŋ, ɗoŋzaŋ an ki ti gime lekkiyadaŋ ye. Iŋkino maŋ y'an di'n iise aapuɗu, y'ede:

21«Dabar a kune ɗoŋ geeger Korazeŋ! Dabar a kune ɗoŋ geeger Betsayda! Derec, aame suldi k'armika ɗoŋ Raa y'ize di kune geŋ aŋki y'aase a geeger Tir ti Sidoŋ maŋ, aŋki ti kaagine ɗoŋzaŋ an t'ossite kallagi m'olo wo tuddaŋ an aa di kosse puure, wo an di-kime lekkiyadaŋ.

22Eyye, wo kun ollo n'un di rooto, onniyo ere Raa yi ɗekka booro gette, kane ɗoŋ geeger Tir ti Sidoŋ geŋ booradaŋ t'a koona soodo ti ere ki kune.

23Wo kune ɗoŋ geeger Kapernayim, kun elkiyo miŋ Raa y'un ti'n sika k'awwa ki kandaane ko? Aha, Raa y'un ti'n ɗeega adda diine ɗoŋ unto. Derec, aame suldi k'armika ɗoŋ ize di kune geŋ, aŋki aase a geeger ki Sodom maŋ, geeger gette aŋkenŋo toŋ t'a lekke sey.

24Kono kamo n'un di rooto, onniyo ere Raa yi ɗekka booro gette, kane ɗoŋ siido Sodom geŋ booradaŋ t'a koona soodo ti ere ki kune.»

Meega Raa ti Ulo

(Lik 10.21-22)

²⁵Aame geɗ geɗ Isa y'a ruute, y'ede: «Mee'ki nuɗ, kee Galmee'ki kandaane ti siido, ni ki tamma kono suldi eɗ k'an di'n umbida a doɗ suuniyo k'ono wo a doɗ eedaɗ soodo a elkiso geɗ me, wo k'an t'iidiba ita a doɗ aa inɗi sunni.

²⁶Eyye Mee'ki nuɗ, geɗ ki dihe suldi a t'ise inɗino.

²⁷Suldi pay Meegó Raa y'o n'ele a beezó, wenda soo toɗ a suune Ulo umbo, i y' suune Meega daɗɗal. Wo wenda soo toɗ a suune Meega umbo, i y' suune Ulo wo ti kane doɗ Ulo yi dehu y'an t'oodiba itadi daɗɗal.»

Isa ume puukiyo k'undiyagun

²⁸«Kune doɗ pay i sarkiya attidi wede ki doɗ dooyiso k'oogoro an zaapu eggun wo kun urme geɗ, kun'di k'ume nuuno, wo nuɗ n'un ti'n puuka.

²⁹Kun t'ambo talgayó wo kun d'oziro a urzi dooyisadó, kono nuɗ addó tasse ni ki koliyo tuddó ye, wo kune kun t'oona puukiyo k'undiyagun.

³⁰Derec, talgayó yoɗ i k'oone ye k'ambu me, wo attidizó wede n'un t'ela yoɗ soodo ki sarkiya me.»

Matiye 12

Isa ti onniyo ere ki puukiyo

(Markus 2.23-28; Lik 6.1-5)

¹Saɗ maɗ a onniyo ere ki puukiyo Yawudiyagi maɗ, Isa yi doopide t'adda dombi doɗ ki geme ti sanalliyagi. Aame geɗ kane sanalliyagi mosogo, maɗ an d'iise sattita geme an di doydiso.

²Kane Pariziyen an wulle inɗino maɗ, an i di ruute Isa, an'de: «Ki wollo sanalliyaga an d'isiyo munda wede oogiradiɗ ti k'ele urzi k'isiyo ye a onniyo ere ki puukiyadiɗ te!»

³Wo de Isa y'an di ruute, y'ede: «Ki kotto kun gire munda wede ti kaaga onniyo soo yode Dawut y'ize ti doɗ a itadi, aame mosogo ti'ni ziida geɗ me.

⁴Yi-t'iide adda Boy Raa wede an ikkima ki golmodo, y'a ziki mappa wede an i ele sedeke a Raa, wo yode ti doɗ a itadi an d'iimi. Wo Raa y'an k'ize munda ye, ki too maɗ kane an k'ede ye urzi an d'oomi me, oogiradiɗ t'ele urzi a doɗ sedeke daɗɗal.

⁵Ki kotto kun gire adda mattup k'oogoro Muusa me a onniyo ere ki puukiyadiɗ toɗ, doɗ sedeke i naabiya adda Boy Raa geɗ, an ki daaniya urzi k'oogoro k'onniyo gettiyo ye, an di naabiya, toɗ maɗ booro t'an ki'n seedu ye.

⁶Wo kun ollo, n'un di rooto: a enno i d'ede wede ede i jire Boy Raa!

⁷Kune'η ɗuwo eη munda ulsu an k'ize ye toη, kun'de booro ti'ni ziida. Injino maη kun ki'n zuune ye ita k'ono ɗoη an riηe ti kaaga adda mattup ki Raa, an'de: "Ni dehu kun d'ise adde koɗuwo ti ɗuwo, geη i jiiere sedeke ere kun isiyo ki seyɗi."»

⁸Isa y'a ruute sey, y'ede: «Nuη wede an n'ehe aa ulo wede eη, o d'ede urzi k'isiyo munda wede aa addó i dehu ekk'onniyo ere ki puukiyadiη te.»

Wedusu beezí unto
(Markus 3.1-6; Lik 6.6-11)

⁹Tiη geη Isa y'a iηgile yi-t'iide adda ɓoy wede Yawudiyagi ge dooyiso.

¹⁰Adda ɓoy geη i d'ede wedusu soo injino beezí unto. Kane Pariziyen an dehu an t'oone urzi an di sakiya Isa, kono kamo an di y' tunde, an'de: «Oogiradiη urzi t'ele ko, k'eliyo beeko a onniyo ere ki puukiyadiη te?»

¹¹Wo yo Isa y'an di'n gime onamaη, y'ede: «Ti diinaguη eη wee wee, aame i-d'ede damsadí soo ɗaηηal ti t'iire adda k'olde sohuru a onniyo ere ki puukiyadiη maη, y'a k'ette, t'adda k'olde y'a ki t'adde ye me? Eyye, y'a-t'adde!

¹²Wo wedusu geη yi jiiere dama taη ɓaadaη! Geη injino oogiradiη urzi t'ele a wedusu ki-d'ise beehiye a onniyo ere ki puukiyadiη te.»

¹³Injino maη Isa yi di ruute a wede geη, y'ede: «Beezá ki y'ondo.» Maη y'a y'unde, wo beezí a t'ikkima aakede bakadí soo me.

¹⁴Saη kane Pariziyen tiη geη an t'udde, an iide'η an t'ugiyee, an t'iide onamaη kaη soo a tukk'Isa, an di dehe urzi ki tōwwadí.

Wede naabo wede Raa yi biire

¹⁵Isa y'a ti zuune elkiso Pariziyen te, injino maη tiη geη y'a t'irga, wo ɗoη ɓaadaη an di y' diine. Ti diinayaη ɗoη pay eeni y'an d'ele beeko.

¹⁶Wo y'an di ruute ti golla zakidí a ɗuwo, kono an ki roote ye a munda wede y'ize me.

¹⁷Geη injino a iina kono a-t'ette a ono ɗoη Raa yi ruute ti kaaga ti bize nebi Ezayi, y'ede:

¹⁸«Eηηo wede naabadó wede ni biire me, nuη ni y' giyye ɓaadaη, wo ulbó pay uηse ti yode me. Undó t'a koonaa eedí, wo a ita ɗuwo pay y'an kizita urzi wede ki diine ki Raa.

¹⁹Yi ki deha niikiyto k'ono ulpi ti wenda ye, yi ki ɗillita ɗollite ye, wo an k'olliga golladí a bere ɗoη duuru ye.

20Yoŋ y'a koono tasse ti kane doŋ toogadaŋ umbo me, geŋ aakede alala ere i-guudite gette yi ki ti damba ye, wo rippinso k'uwwo ti koddiyo botto gette, yi ki ti t'ida ye. Y'aasa iŋkino bini munda wede ki diine geŋ y'a ceera oldiko.

21Wo ita duwo pay an zaapa elkiyadaŋ a sundi.»

Isa ti Belzebul

(Markus 3.22-30; Lik 11.14-23; 12.10)

22Saŋ maŋ Isa an i d'irkido wede soo iŋkino koosiyo wo yi k'orbe ye, kono i-d'ede siitan a eedí. Wede geŋ Isa yi-d'ele beeko, bizi a t'ihina y'a iise ono wo yi wolliyo kereŋ.

23Kane doŋ duuru geŋ an ziidá gaggiraŋ wo pay an di ruute, an'de: «Yode eŋ wede an yi waaku Wede ti biza bumbu Dawut ye ko?»

24Wo kane Pariziyen an illiga iŋkino maŋ, an di ruute, an'de: «Wede eŋ, tode Belzebul Meeda siitandani i eliyo toogo ki lommite siitandani me!»

25Wo Isa y'a zuune elkisadaŋ, iŋkino maŋ y'an di ruute, y'ede: «Moziko ere tuuku doŋtú an deyyiso ti tuddaŋ maŋ, mozikadaŋ a latte. Geeger ere tuuku doŋtú an deyyiso ti tuddaŋ, wo adda boy wede tuuku doŋzí an deyyiso ti tuddaŋ maŋ, kane geŋ an k'aane an ki ti lekke kaŋ soo ye.

26Geŋ iŋkino kay, aame Meeda siitandani ti lommite siitandani eebutú maŋ, geŋ an deyyiso ti tuddaŋ batum. Wo de geŋ ki kotto mozikatú ti k'aane ti ki lekke ye!

27Kune kun'de ni lommite siitandani o eliyo toogo Belzebul. De iŋkino maŋ, doŋ a itaguŋ an lommite siitandani ti toogo k'aaye? Geŋ kane batum an un kaza munda wede kun rootiyo a tukki nuuno geŋ derec ye.

28Wo de geŋ, nuŋ o eliyo toogo Unde Raa ni lommite siitandani me maŋ, geŋ i-kaza Moziko Raa tod' t'iina di kune baa.

29Aame wede yi dehu yi-t'ette adda boy ki wede i-d'ede toogo wo y'a sikiti suldzí maŋ, wede geŋ ki poone y'a-kettite wede toogo doo miŋ, y'a aane y'a sikiti suldi t'adda boy kollo.

30Wede yoŋ ki nuuno ye'ŋ, yoŋ aduzó. Wo wede y'a ki n' noogiyo ki tussiyo ye'ŋ, yoŋ yi teepiyo ki teepiyo.

31Geŋ kono k'iŋkino, n'un di rooto, duwo Raa y'an t'isa tambobino a oldiko ere pay an isiyo, ti kaldita ere pay an kaldita suma Raa gette. Wo de wede i kaldita Unde Raa maŋ, a oldikadí gette Raa yi-k'isa tambobino ye.

32Wede tuuku yi ruuta munda ulsu a tukki nuŋ wede an n'ehe aa ulo wede enno maŋ, a oldikadí gette Raa yi-t'isa tambobino. Wo de wede tuuku i ruutita munda

ulsu a tukki Unde Kamilen maṅ, a oldikadí gette Raa yi-k'isa tambobino ye, ise adda duniya ere aṅkenṅo, ise adda duniya ere ki daana toṅ maṅ.»

Undumu ti inṅizí

(Matiye 7.16-17; Lik 6.44-45)

³³«Aame undumu beehiye maṅ, inṅizí toṅ beehiye pây. Wo aame undumu ulsu maṅ, inṅizí toṅ ulpi kay. Inṅino maṅ undumu in yi suuniyo t'urzi k'inṅizí.

³⁴Kune doṅ ulpi aakede maṅkikagi de! Mummino kun d'aane kun di roote ono doṅ beehiye me? Derec, munda wede duwo an okumso adda k'addaṅ genṅo adḍiya ti bizaṅ me.

³⁵Wedusu wede beehiye'ṅ, beehiyko t'ettiyo ti suldi doṅ beehiye y'ukume adda k'addí, wo wedusu wede ulsu'ṅ, munda ulsu y'ettiyo ti suldi doṅ ulpi y'ukume adda k'addí.

³⁶Kun ollo, n'un di rooto: A onniyo ere Raa yi dekka booro gette, duwo a ono doṅ pay an ruutite daa k'urzizaṅ geṅ an d'oopey eedaṅ.

³⁷Derec, t'urzi k'ono doṅ adḍiya ti bizá, Raa y'a di roota kee ki diine a daanadí, wo t'urzi k'ono doṅ adḍiya ti bizá, Raa y'a di roota kee booro ti ki ziida me.»

Tondiyo ki munda k'armika

(Matiye 16.1-4; Markus 8.11-12; Lik 11.16,29-32)

³⁸Inṅino maṅ doṅ suuniyo k'oogoro miibi ti Pariziyen miibi an di tunde Isa, an'de: «Wede dooyisadey, ay dehu k'ay d'ise munda k'armika ay di wolle a kize kee Raa yi-k'igibo.»

³⁹Isa y'an di'n gime onamaṅ, y'ede: «Ita duwo doṅ aṅkenṅo eṅ, kane doṅ ulpi wo an ki seedu urzi Raa ye, an tondiyo munda k'armika a kize nuṅ Raa yi n'igibo. Wo armika ti doolo Raa y'an k'isa ye, daa ki armika ere Raa y'ize ti kaaga a nebi Zonas ye maṅ.

⁴⁰Kun suune Zonas geṅ y'a likke onṅu aḍo wo diddo aḍo adda k'adde puuniso ere meeda. Inṅino kay nuṅ wede an n'ehe aa ulo wede eṅ, an di n'ottiba wo n'a lekka onṅu aḍo wo diddo aḍo adda muuzo.

⁴¹A onniyo ere Raa yi dekka booro gette, doṅ geeger ki Ninib an d'ooziga ki tukki duwo doṅ aṅkenṅo, wo an di roota: “Kune'ṅ booro t'unni ziida.” An roota inṅino kono aame doṅ geeger ki Ninib an illiga Zonas yi gizite urzi k'ono Raa maṅ, an di gime lekkiyadaṅ. Wo a enṅo i d'ede wede ede y'a jiire Zonas sey.

⁴²A onniyo ere Raa yi dekka booro gette, mohita ere ti siido ki kese dandi t'a ooziga ki tukki duwo doṅ aṅkenṅo, wo t'an di roota: “Kune'ṅ booro t'unni ziida.” Ti roota inṅino kono tod' t'iizigo ti siidiyagi doṅ dokki t'ita Raa kono t'a olliga suuniyo k'ono ere ki Salamaṅ, wo a enṅo i d'ede wede ede y'a jiire Salamaṅ sey.»

Kama ki siitan ki tukki wedusu

(Lik 11.24-26)

⁴³«Aame siitan gette ti tukki wedusu ti t'adfiya mañ, ti d'engilso k'adda balda dehutu k'ume wede t'a lekkey, wo ti ki d'ooniyo ye.

⁴⁴Inkino ti rootiyo adda k'addutú, ti d'eesiyo: “Ni-kime k'adda bindó ere an di n'ilmo.” Wo a kamatú gette, t'iide'ñ ti-t'uuney biino guguba, rookiyo kamileñ wo suldutú okkime beehiye.

⁴⁵Inkino mañ ti di kama k'adda balda, t'a waaku siitanfani ti doolo sarat bundiñi a jiire tode sey. An di-kama kañ soo, an t'ettiyo adda biino gettiyo i-t'isiyo boozañ. Inkino yo wede geñ, lekkiyadi ere k'ita i-t'isiyo ooñe i ceeriyo ere ki poone. Wo geñ aasa inkino kay ki duwo ñoñ añkenño ulpi geñ me.»

Mekk'Isa ti zembadi

(Markus 3.31-35; Lik 8.19-21)

⁴⁶Isa adda boy, a ñoñ duuru y'an ti rootiyo botto, aame geñ meedí ti zembadi an d'iina, wo an t'ihira ti paate, an dehu an i di roote.

⁴⁷Mañ wede soo inkino yi di ruute a Isa, y'ede: «K'ollo, meedá ti zembadá an t'ihira ti paate, an dehu an a-di roote.»

⁴⁸Wo de a wede geñ Isa yi di'n gime onamí, y'ede: «Ki kotto mañ, meedó ti zembadó añ wee wee?»

⁴⁹Mañ y'a d'uuye beezí ki tukki sanalliyagí wo y'a ruute, y'ede: «Kun wollo, kane enño añ meedó ti zembadó me.

⁵⁰Inkino mañ wede tuuku y'isiyo suldi ñoñ pay Meegó Raa a kandaane yi dehu geñ, yode geñño leemadó, teemadó wo meedó me.»

Matiye 13

Ono ombide a tukki wede korso

(Markus 4.1; Lik 8.4)

¹A onniyo gettiyo batum, t'adda boy Isa y'a t'udfe y'a ingile, y'iide'ñ y'a-guune a biza bar.

²Ñoñ duuru baadañ an di-t'ugiye, inkino yi di gili adda tooko, y'a-guune wo kane ñoñ duuru pay an t'ihira a biza bar.

³Yoñ y'an di ruutite suldi baadañ t'ono ombide, y'ede: «I d'ede wedusu soo inkino yi t'iide korso buzu k'adda doome.

⁴Aame yi sakkisa geñ, buzu oñgoñ a-zilditi a urzi, embi an iido'ñ an di-tibbe pay.

⁵Buzu oñgoñ soñ a-zilditi a ume wede t'adda'ñ pañgiragi, siidadi baata. Kane geñ a t'udfe kesiko kono siidadañ soodo.

⁶Aame peedo ti-gilo wo t'ihina maŋ, kane geŋ a t'igge, a-biiha kono sondayzaŋ i ki ti diige ye.

⁷Doŋ soŋ a-zilditi adda k'ahimagi, kane geŋ a t'udde wo ahimagi an iiziga maŋ, an di'n ippe.

⁸Doŋ oŋgoŋ soŋ a-zilditi a siido ere beehiye, kane geŋ a t'udde, an d'ihira wo an d'ehe: ulo muduso soo y'a ehe inŋi meeda, soŋ ada zoot wo soŋ ada g'ado.

⁹Wede i-d'ede kuwwa k'ollige maŋ, y'ollo koduwo!»

Ki moo me Isa yi rootiyto t'ono ombide me

(Markus 4.10-12; Lik 8.9-10)

¹⁰Inkino maŋ kane sanalliyagi an aa d'iide ki sirpa k'Isa wo an di y' tunde, an'de: «De ki moo me k'an rootiyto a doŋ duuru t'ono ombide me?»

¹¹Yoŋ y'an di'n gime onamaŋ, y'ede: «Ni rootiyto inkino kono a kune'ŋ Raa y'un ele suuniyo ki suldi doŋ ombide ki Moziko Raa te, wo a kane geŋ suuniyo gette Raa y'an k'ele ye.

¹²Derec, a wede i-d'ede suuniyo geŋ, an i-t'eela t'eego i di t'isa baadaŋ a ceera, wo de a wede i-k'ede suuniyo ye geŋ, ere booloŋ i-d'ede toŋ an i-t'amba.

¹³Kun ollo, nuŋ n'an orbe t'ono ombide me kono kane an aane an wolle toŋ, ki kotto munda an ki y' wolle ye, wo an aane an olliga toŋ, ki kotto munda an ki y'olliga ye wo itadi an ki ti suune ye.

¹⁴Geŋ a kane geŋno a-t'iide a ono doŋ Raa y'igibo ti kaaga t'urzi nebi Ezayi, y'a ruute, y'ede: “Kune kun d'olliga kereŋ, wo ono itadaŋ kun ki ti suuna ye, kun di wolla kereŋ, wo munda kun ki y' wolla ye.

¹⁵Derec, duwo eŋ kuwwagaŋ an a-ti niy'ye daŋkila kono a k'olliga ye, edayaŋ an a-t'ippe kono a ki wolle ye, wo an t'ize tuusiyagi kono ono itadaŋ an gi di'n suune ye. An ize inkino kono an ki dehu ye an di-kimo ki tukki nuŋ Raa, n'an t'ele beeko me.”

¹⁶Wo nuŋ n'a roote, uŋsuwo a kune kono edagaŋ i woliyo wo kuwwagaŋ ollige.

¹⁷Derec inkino wo n'un di rooto: Nebiyagi baadaŋ ti doŋ ki diine baadaŋ an dihe an di wolle munda wede kun woliyo enno, wo an gi di y' wulle ye. An dihe an d'olliga munda wede kun ollige enno, wo an gi di y'illiga ye.»

Oodibe k'ita k'ono ombide a tukki wede korso

(Markus 4.13-20; Lik 8.11-15)

¹⁸«Inkino kun ollo, ette ita k'ono ombide a tukki wede korso.

¹⁹Buzu wede i zilditi a biza k'urzi geɲ, i-kaza duwo don ollige ono ki Moziko Raa wo an gi di'n seedu addaɲ ye. Aame geɲ Mohita k'oldiko t'ettiyo, ono don an illiga ti t'oddipe t'adda k'addaɲ me.

²⁰Buzu wede i zilditi a ume wede t'adda pangiragi geɲ, i-kaza duwo don ollige ono Raa, kesiko ulbaɲ unse an d'ambu.

²¹Wo de ono sottadaɲ ti ki ti deegu adda k'addaɲ, an aa ki seedu zakidi ye. Aame i ettiyo dabar ise duwo an'ni dabirsa kono an umbe a ono Raa maɲ, kesiko an t'argu.

²²Buzu wede i zilditi adda k'ahimagi geɲ, i-kaza duwo don ollige ono Raa, wo de saɲ elkisito a suldi duniya ti dehuu k'urzi maala an di'n appiya ono geɲ me, an ki d'ohire ye a urzi Raa me.

²³Ki dangu buzu wede i zilditi a siido ere beehiye'ɲ, i-kaza duwo don ollige ono Raa wo an di suuniyo itadaɲ, an d'ohire a urzi Raa, an aa d'ooniyo eebaɲ ti doolo, aakede ulo muduso soo y'a ehe inɲi meeda, soɲ ada zoot, wo soɲ ada g'ado.»

Ono ombide a tukk'iizi buɲgari

²⁴A don duuru geɲ, Isa y'an d'iise rootiyo k'ono ombide ti doolo sey, y'ede: «Kun ollo, Moziko Raa tod' ti deey'iso aa wedusu yi giira buzu wede beehiye adda doomizi.

²⁵Wo a diddo duwo pay an udige maɲ, aduzi y'a t'iide k'adda doome geɲno y'a di giira iizi buɲgari adda kay, wo tuddi yoɲ y'a aahe.

²⁶Aame mudu geɲ an t'udde wo an iise paɲita maɲ, iizi buɲgari geɲno toɲ an di biɲe kay.

²⁷Inkino kane don naabo ki wede boy geɲ, an iido'ɲ an i di ruute, an'de: "Galmeegey, para maɲ ki giira buzu wede beehiye adda doome me, de iizi buɲgari geɲ an iido ti too me?"

²⁸Yoɲ y'an di'n gime onamaɲ, y'ede: "Geɲ ize aduzo." Inkino maɲ kane don naabo an di y' tunde, an'de: "Ki dehu ay t'odo iizi buɲgari ay di'n oddiipay ko?"

²⁹Yoɲ y'an di ruute, y'ede: "Aha, kun'te ye, kono kun oddiipey iizi buɲgari geɲ, kun a t'oddiipey ti mudu pay.

³⁰Kun oolo an d'ohira ti mudu kaɲ soo bini onniyo k'aydu, aame geɲ n'an di roota don k'aydu, ki poone an di kirba iizi buɲgari an di-kettita k'oggiyadaɲ doo miɲ, saɲ mudu an di'n t'aaha k'adda giyyayó kollo.»

Ono ombide ekk'ulo k'undumu sundi mutard

(Markus 4.30-32; Lik 13.18-19)

³¹Isa y'an rootiyo ono ombide ti doolo, y'ede: «Moziko Raa tod' ti deeyiso aa ulo k'undumu soo sundí mutard wedusu y'a t'umbe, y'a-giira adda doomizí.

³²Wo de ulo k'undumu geŋ yoŋ neŋku a jiiire ti diine k'inŋi k'inda pay. Aame yi t'addiya maŋ, yi d'isiyo goole i ceeriyo inda doŋ pay adda jineene geŋno, geŋ embi toŋ an d'appiyta boydi ekki laydayí.»

Ono ombide a tukk'orme

(Lik 13.20-21)

³³Isa y'an rootiyo ono ombide sey ti doolo, y'ede: «Moziko Raa tod' ti deeyiso aa orme erewo ti-sokiyo booloŋ, t'a-t'obe a moonoo baadaŋ lootiyo, wo saŋ orme geŋ moonoo yi-ti t'oozige pay.»

Ki moo me Isa yi naabiya t'ono ombide me

(Markus 4.33-34)

³⁴A onniyo gette, Isa a dooyisadí ere pay gette yi'ni duuye doŋ duuru t'ono ombide, wo munda daa k'ono ombide y'an ki rootiyo ye.

³⁵Yoŋ y'ize iŋkino kono a-t'ette a ono doŋ nebi yi ruute ti kaaga, y'ede: «Nuŋ ni t'ihina bizó n'an rootita t'ono ombide, wo n'an di kizita suldi doŋ Raa yi ti'n umbida t'ume y'ikkima duniya.»

Oodibe k'ita k'ono ombide a tukk'iizi buŋgari

³⁶Iŋkino maŋ doŋ duuru Isa yi'n ili wo y'a aahe boy. Maŋ kane sanalliyagí an aa d'iide sirpadí an di y' tunde, an'de: «Kee k'ay t'oodibi ita k'ono ombide a tukk'iizi buŋgari doŋ adda doome geŋno.»

³⁷Isa y'an di'n gime onamaŋ, y'ede: «Wede i korso buzu beehiye geŋ, nuuno wede an n'ehe aa ulo wede.

³⁸Doome geŋ, duniya. Buzu wede beehiye geŋ, kane doŋ ki Moziko Raa. Iizi buŋgari geŋ, kane doŋ ki Mohita k'oldiko.

³⁹Adu wede i giira iizi buŋgari geŋ, tode Meeda siitandani. Onniyo k'aydu gette, onniyo ere ki daŋgu duniya. Wo doŋ k'aydu geŋ, maaleekiyagi.

⁴⁰Geŋ aakede iizi buŋgari duwo an t'oddipe an di zebbiyo adda k'uwwu k'oggiyo geŋ, aasa iŋkino kay a onniyo ere ki daŋgu duniya te.

⁴¹Nuŋ wede an n'ehe aa ulo wede eŋ, n'a t'igiba maaleekiyagó an di sika t'adda diine doŋ ki Mozikadó, kane doŋ pay i t'eliyo eebaŋ adda k'oldiko wo doŋ pay isiyo suldi doŋ ulpi geŋ me,

⁴²wo an ti'n sebbey adda baala k'uwwu t'oggiyo dala dala, ume wede ki dollite molo wo k'aadumu sina.

⁴³Wo kane don ki diine a daana Raa geɗ, an di rilitay aakede peedo adda Moziko ki Meegaɗ Raa. Wede i-d'ede kuwwa k'ollige maɗ, y'ollo koduwo!»

Ono ombide a tukki laale wede an t'umbida

⁴⁴«Kun ollo, Moziko Raa tod' ti deeyiso aa laale an t'umbida adda doome, wo wedusu y'iide'ɗ y'a y'uune. Yoɗ wede geɗ laale yi di y'umbida sey, wo a unɗuwo ere i-d'ede baadaɗ gette y'a ingile, y'iide'ɗ sulɗizi pay y'a t'iwilto, wo y'iido'ɗ y'a t'iwila doome geɗno.»

Ono ombide a tukki dogoro zooyatu ooɗe

⁴⁵«Kun ollo, Moziko Raa tod' ti deeyiso sey, aakede wede suuk yi dehuu dogoro majjaanawa tuwarwa kar.

⁴⁶Aame dogoro zooyatu ooɗe baadaɗ gette yi t'uune maɗ, y'a ingile, y'iide'ɗ sulɗizi pay y'a t'iwilto, wo y'iido'ɗ y'aa t'iwila dogoro gettiyo.»

Ono ombide a tukki lebido

⁴⁷«Kun ollo sey, Moziko Raa tod' ti deeyiso aa lebido an ti seddiyo adda bar, ita puuni don tuuku toɗ pay, ti t'in sokiyo.

⁴⁸Aame onniyo maɗ don sawwiya an t'argu a zenɗe, maɗ an di konso, an di beeriyo puuni don k'ombo k'adda k'eesayaɗ, wo don k'ombo ye ki sebbiyo mendaɗ.

⁴⁹Geɗ a onniyo ere ki danɗu duniya toɗ aasa inkiɗo, maaleekiyagi an d'etta an di'n ooyey duwo don ulpi t'adda diine don ki diine me,

⁵⁰kono an ti'n sebbey adda baala k'uwwu t'oggiyo dala dala, ume wede ki dollite moolo wo k'aadumu sina.»

Dooyiso aware ti ere mazzini

⁵¹Isa y'a tunde sanalliyagi, y'ede: «Ono ombide pay geɗ itadaɗ kun'ni zuune ko?» Kane an i-di'n gime onami, an'de: «Eyye, itadaɗ ay ti zuune.»

⁵²Maɗ yoɗ y'an di ruute, y'ede: «Geɗ inkiɗo wede suuniyo k'oogoro tuuku toɗ yi daaniya urzi ki Moziko Raa maɗ, yoɗ geɗ yi deeyiso aa wede boy, t'adda laalayí wede y'ukume geɗ, yi d'ambu sulɗi don aware wo sulɗi don mazzini yi naabiya eego.»

Don Nazaret an koogire Isa

(Markus 6.1-6; Lik 4.16-24)

⁵³Aame Isa dooyisadi ere t'ono ombide gette y'a ti dinge maɗ, tiɗ geɗ y'a t'iiziga.

⁵⁴Wo y'a ingile ki Nazaret geeger ere y'a ihira. Aame y'iiney maɗ, y'a iise dooyiso duwo adda boy wede Yawudiyagi ge dooyiso, wo kane don pay adda

boy geɲ an ziiɗa giggiraɲ. Kane an di ruute, an'de: «Yoɲ y'uuno suuniyo k'ono ette ti too me, wo mummino yi d'isiyo sulɗi k'armika kino me?»

⁵⁵Yo eɲ ulo ki wede k'âhuntu sarpanje ɗe me! Tode meedí tiɲ sundutú Mariyam ɗe te! Kane zembadí kuuli'ɲ sumbiyaɲ Zak, Yusup, Simo wo Ziid ɗe me!

⁵⁶Wo zembadí erayi toɲ kane an lekkiyo pay ti kine ɗe me! Toogo ti suuniyo k'ono kino eɲ, y'a uuno ti too me?»

⁵⁷Kono k'ɲkino an di-tuuge k'ambu onamí me. Maɲ Isa y'an di ruute, y'ede: «Derec, nebi geɲ aame tuuku toɲ onamí an d'ollige, wo ɗe ɗoɲ a geeger ere y'a ihira ti ɗoɲ adda ɓoozí ɗaɲɲal, onamí an k'olliga ye me.»

⁵⁸Wo a ume geɲ sulɗi k'armika Isa yi k'ize ɓaadaɲ ye, kono kane an ki ziipe addaɲ a yode ye.

Matiye 14

Taaya k'unto ki Zaɲ Batis

(Markus 6.14-29; Lik
9.7-9; 3.19-20)

¹Aame geɲ Erod yoɲ wede goole yi dokkiyo siido Galile, y'a illiga suma k'Isa ti môolo.

²Maɲ y'an di ruute ɗoɲ naabadí, y'ede: «Wede geɲ yoɲ Zaɲ Batis! Yi bildo ti diine ɗoɲ unto, geɲ kono k'ɲkino i-d'ede toogo yi d'isiyto sulɗi k'armika me.»

³⁻⁴Erod y'ilke ɲkino kono yi-ziiɗa ere leemadí Pilip sundutú Erodiyas, wo Zaɲ Batis yi di ruute, y'ede: «Oogoro urzi ti k'ele ye k'a seeda erewo gette.» ɲkino maɲ Erod y'an di ruute a asigiryagi an ti y' ziiɗo Zaɲ me, an ti y' gittite wo an ti y' zidɗe adda ɗaɲɲay.

⁵Erod yi dehu Zaɲ asigiryagi an di y' t'ide, wo ɗe y'an d'orgiso a Yawudiyagi kono kane pay an zuune adda k'addaɲ Zaɲ geɲ yoɲ nebi.

⁶Ozzine ti ozzine, onniyo k'ehiyo k'Erod t'aaniya maɲ, an d'isiyo tarnaape. ɲkino onniyo gette t'iina maɲ, uto koɲso k'Erodiyas t'a immira a ɗaana ki ɗoɲ an'ni wiiko, wo a tode gette Erod addí i-d'ibi.

⁷ɲkino maɲ y'a-ti nîime tuddí, y'ede: «Munɗa wede tuuku mi dehu'ɲ mi rooto, wo ni di t'ela.»

⁸Mettú Erodiyas ti di t'elite ono, maɲ uto koɲso ti di ruute Erod, t'ede: «Aɲkenɲo k'o ti ɗekki eego Zaɲ Batis, k'o di zaapi adda supira, wo k'o d'adi kenno!»

⁹Aame geɲ mozigo y'a t'ize sommagi dondoɲ, wo ɗe kono y'a ti nîime tuddí a ɗaana ɗoɲ an'ni wiiko geɲ, y'a iyye y'an di ruute a asigiryagi an di-ɗekko eego Zaɲ, an i t'ela.

10 Inƙino maɗ y'an igibe k'adda danɗay an di dikko eego Zaɗ te.

11 Eego an t'umbo adda supira, an i d'ele a uto koɗso wo tod' ti d'iide a mettú.

12 Wo kane sanalliyagi Zaɗ an d'iido, nuune an t'umbe an t'ittiba. Saɗ an d'ingile k'ume k'Isa, an iide'ɗ an i t'iide taaya a munda wede ize.

Eliyo k'ombo a kuuli dupu paat

(Markus 6.30-44; Lik
9.10-17; Zaɗ 6.1-15)

13 Aame Isa y'illiga taaya gettiyo maɗ, tiɗ geɗ yi di gili adda tooko y'a diipida bar kono y'a t'arga siidi k'adda balda. Wo kane don duuru geɗ umayí an di y'illiga, an t'uddito t'adda geegiryagi don go-goppon geɗ me, wo an di y' diine ti zoɗɗaɗ.

14 Isa yi ti diige ti tooko maɗ, yi wolliyo don duuru baadaɗ, wo i di t'ize sommagi a duwo geɗ me, y'an d'iise eliyo beeko a don k'eeni a diinayaɗ.

15 A peedo ti t'aahe k'ooriyo maɗ, sanalliyagi k'Isa an a d'iide sirpadi wo an i di ruute, an'de: «K'ollo, ume eɗ balda wo peedo ton t'ingile, inƙino maɗ duwo pay eɗ k'an eezo an t'ette k'adda k'illiyagi an d'owiltey munda k'ombo.»

16 Wo Isa y'an di ruute, y'ede: «I k'ise ye an d'engile me, ombo an eelo kune batum.»

17 Maɗ kane an di ruute, an'de: «A enno kaye ay d'ede miɗ mappa paat wo puuni sire danɗal.»

18 Yo Isa y'an di ruute, y'ede: «Kane geɗ, kun o d'edi kenno.»

19 Maɗ y'an di ruute a don duuru an di-koone adda soole, saɗ y'a-ziki mappa paat ti puuni sire genno, y'a t'umbe edayi k'awwa ki kandaane, y'a ruute koduwo a Raa. Maɗ mappa y'a burkite, y'an d'ele a sanalliyagi wo kane an an di dikkiɗa a don duuru genno.

20 Kane pay geɗ an d'iimi wo an d'isse. Wo ombo ere uupite sanalliyagi an ti-tusse, a uune dappa koomat makumu sire.

21 Kane don iimi geɗ, an t'iide kuuli suma dupu paat, daa kaza k'erayi wo inni.

Sooru k'Isa ti Piyer ekk'ahu

(Markus 6.45-52; Zaɗ 6.16-21)

22 Saɗ maɗ kesiko Isa y'an di ruute a sanalliyagi, an di-kili adda tooko kono an d'oogume, an di doopida ti dar bar ti nee, koore yon don duuru yi-ti'n t'igiba geɗ me.

23 Aame don duuru yi ti'n igibe maɗ, yon y'a-ti gili ekki kesse kono y'a tonde Raa siidi. Wo siidi y'a tunde Raa a ume genno, bini ume a-t'ize diddo.

- 24**Aame geŋ tooko tod'te dokki botto ti zeŋge me. Wo maaye a giggiraŋ, iŋkino ahu i-kolzite baadaŋ i d'obe dubusuk dubusuk ekki tooko.
- 25**A diddo biza soohe maŋ Isa yi-t'uddo, yi sooru t'ekk'ahu yi d'ettiyo tukki sanalliyagí.
- 26**Aame kane an yi wulle yi sooru t'ekk'ahu maŋ, orgiso t'anni ziida baadaŋ wo an di ruute, an'de: «Eŋ beyye!» Wo a orgisadaŋ gette an d'iise dollite.
- 27**Kesiko Isa y'an di ruute, y'ede: «Kun ombon! Kun orgide ye, eŋ nuuno!»
- 28**Maŋ Piyer y'a t'ihina bizí yi di ruute, y'ede: «Galmee'ki nuŋ, eŋ ki kotto kee maŋ, k'o eli urzi n'a ozire t'ekk'ahu, n'a ette k'ume kee.»
- 29**Isa y'a ruute, y'ede: «Ki t'edi!» Maŋ Piyer t'adda tooko yi-ti diige, y'a iise sooru t'ekk'ahu, yi d'ettiyo tukk'Isa.
- 30**Wo aame y'uwwe maaye yi tûuke baadaŋ maŋ, orgiso t'a yi ziida, y'a iise sooyiso k'adda k'ahu wo yi dollite, yi d'eesiyo: «Galmee'ki nuŋ, ki n'utti, ki n'utti!»
- 31**A kaamiki Isa y'a igibe beezí, y'a yi ziida Piyer me, wo yi di ruute, y'ede: «Kee zaapu k'addá a nuuno baata, ki moo me ki niiku me?»
- 32**Wo aame kane sirwaŋ an ti gili adda tooko maŋ, maaye y'a ziida.
- 33**Iŋkino maŋ kane pay adda tooko geŋ an di dikke a daana k'Isa, wo an i di ruute, an'de: «Ki kotto kee'ŋ Ulo Raa!»

Eliyo beeko a doŋ k'eeni a siido Zenezaret

(Markus 6.53-56)

- 34**An ti diipida bar maŋ, an d'iiney a siido Zenezaret.
- 35**Kane doŋ siido gette Isa an di y' zuune, maŋ rabiladí an ti-tiipe adda siido pay, wo doŋ k'eeni pay an i di ziko.
- 36**Kane duwo geŋ, an i d'obe bey kono doŋ k'eeni an a-botte a bize kallayí daŋŋal toŋ maŋ, wo kane doŋ pay a bottiyo geŋ an d'uttiyo.

Matiye 15

Dooyiso ere ki moŋgidagi

(Markus 7.1-13)

- 1**Saŋ maŋ doŋ miibi ti diine Pariziyen ti doŋ suuniyo k'oogoro iido ti Zeruzalem, an d'iide k'ume k'Isa wo an di y' tunde, an'de:
- 2**«Ki moo me sanalliyagá an a-ti doopide a dooyiso ere ki moŋgidagin an duuye te? K'ollo, ki poone an t'eesa ombo geŋ, beydaŋ an k'opilso ye aa moŋgidagin an ruute me.»

³Isa y'an di'n gime onamaɗ, y'ede: «Wo kune'ɗ, ki moo me kun a-ti doopide a urzi k'oogoro ere ki Raa, wo kun di sooru a urzi dooyisaguɗ me?

⁴Derec, Raa yi ruute ti kaaga, y'ede: «Ki elo suma a meegá ti meedá.» Wo soɗ y'ede: «Wede yi duudiyoo meegí ise meedí koo maɗ, yoɗ geɗ ki tôwwo.»

⁵Wo de kune'ɗ, kun dooyiso duwo, kun'de: «Wede tuuku yi rootiyo a meegí ise a meedí, y'ede: Munda wede n'a-di t'ele a gi di nooge, yoɗ ni ele sedeke a Raa.

⁶Maɗ yode geɗ yi ki t'ize ye munda wede i-t'ele suma a meegí me.» Kun isiyo iɗkino geɗ, kun ti tôwwo ono doɗ Raa yi ruute kun d'ise me, wo kun di sooru a urzi dooyisaguɗ.

⁷Kune doɗ biziguɗ sire sire, nebi Ezayi yi ruute ono doɗ Raa y'igibo a tukki kune geɗ derec, aame yi ruute ti kaaga, y'ede:

⁸«Duwo eɗ an o eliyoo suma t'ono bizaɗ, wo de ki kotto adda k'addaɗ kane dokki ti nuɗ Raa me.

⁹Kane suldi doɗ an isiyo kono an o ottilso geɗ ki bita, kono urziyagi k'oogoro doɗ an dooyiso geɗ ettiyo t'urzi duwo daɗɗal.»

Suldi doɗ a ki ti k'ise ganigi a daana Raa

(Markus 7.14-23)

¹⁰Saɗ Isa y'a wiike doɗ duuru an t'iide k'ume yode, wo y'an di ruute, y'ede: «Kun ollo, wo ono eɗ itadaɗ kun di'n suuno:

¹¹Suldi doɗ pay wedusu y'oomi geɗ, i ki y'ise ganigi ye a daana Raa me, ki too maɗ i y'ise ganigi a daana Raa munda wede addiya ti bizí geɗɗo.»

¹²Iɗkino maɗ kane sanalliyagi an a d'iide sirpa k'Isa wo an i di ruute, an'de: «Kee ki suune deɗ ko, kane Pariziyen a onamá doɗ an illiga geɗ, kane i'n uuɗe me?»

¹³Y'an di'n gime onamaɗ, y'ede: «Kane Pariziyen geɗ aakede inda doɗ Meegó Raa a kandaane yi k'iite ye, wo kane pay geɗ y'an oddipa.

¹⁴Kane geɗ kun oolo, kane aakede koɗzayi, an dokkiyo koɗzayi eebaɗ! Wo de aame wede koosiyo y'arkudu koosiyo bakadi maɗ, sirwaɗ pay an di silfiti adda k'olde.»

¹⁵Maɗ Piyer y'a t'ihina bizí wo yi di ruute, y'ede: «K'ay t'oodibi ita a ono ombide eɗ me.»

¹⁶Isa y'a ruute, y'ede: «Ki kotto, kune toɗ onamó egguɗ ti k'aane ti ki'n seeda ye pi me!

¹⁷Kun ki suune ye ko, suldi doɗ pay wedusu y'oomi geɗ i-ti deegu adda k'addí, wo saɗ yi-ti'n naamiya me?

18Wo ono don adfiya ti bize gen ettiyo ti biza k'ulbe, wo kane genno i-ti y'isiyo wede'ng ganigi a daana Raa me.

19Derec, ti biza k'ulbe genno ettiyo elkiso ere oldo i-ti y'eliyo wede'ng a suldi don ulpi aakede: towwo duwo mirsi, moone t'ere bakadi ise ti kule bakatu, boliyo, oogire, rootiyo k'ono butte a tukki bakada a daana booro, wo kaldita tudde.

20Kane suldi genno don i-ti y'isiyo wede'ng ganigi a daana Raa me! Wo de urzi k'ombo daa k'opilso bey aa mongidagi an ruute gen, wede'ng i ki y'ise ganigi ye a daana Raa me.»

Zaapu k'adde k'erewo Yawudowo ye

(Markus 7.24-30)

21San man tin gen Isa y'a t'iiziga, y'a ingile ki siido ere i duule geeger Tir kane ti Sidon.

22Wo aame gen i d'ede erewo tod'te ti siido Kanahan ti lekkiyo adda siido gettiyo, t'a iido tukk'Isa t'a iise dollite, t'ede: «Galmeega, kee Wede ti biza bumbu Dawut, k'iso adde koduwo! Uto nun i-d'ede siitan a ettú wo ti dabirsa baadan.»

23Wo yon onamtú yi-ki'n gime ye. Kane sanalliyagi an a d'iide sirpadi wo an di y' tunde, an'de: «Erewo gette ki ti-kama, kono t'inni daaniya ti dollite wo ti k'annugu ye.»

24Isa y'an di'n gime onaman, y'ede: «Nun Raa yi n'igibo ki tukki don k'Izirayel danjal, kane aa dambami don i digge.»

25Wo erewo gette t'iide'ng, t'a dikke a daanadi wo ti di ruute, t'ede: «Galmeega, k'edi k'a ni noogi!»

26Yon yi di'n gime onamtú, y'ede: «Beehiye ye k'a t'ambe ombo k'inni, k'an di t'ele a gahiti me.»

27Man tod' ti di ruute, t'ede: «Galmeega onama gen derec, wo ki kotto kane gahiti genno ton ombo ere i soldite ti bey galmaawan aame an ombo gen, an di pettiyo.»

28Inkino man Isa yi di'n gime onamtú, y'ede: «Erewo no, kon zaapu k'addi a nuuno baadan gen, Raa yi elo munda wede addi i dehu.» Wo a kaamiki ututu t'a uune bee.

Eliyo beeko a don k'eeni baadan

(Markus 7.31)

29San man t'ume gen, Isa y'a t'iiziga wo y'a ingile ki biza bar ki Galile. Y'a-ti gili ekki kesse wo y'a-guune.

³⁰Doŋ duuru baadaŋ an d’ettiyo ki tuddí, an di ziko ti kane doŋ jekese, doŋ koŋzayi, doŋ kesiyagaŋ soo soo, doŋ bizaŋ a t’ippe an k’orbe ye, wo doŋ k’eeni baadaŋ ti doolo toŋ ede. Kane geŋ, doŋ duuru an ti’n zippe a daana k’Isa wo yoŋ y’an d’ele beeko.

³¹Kane duwo geŋ an ziida giggiraŋ aame an wulle doŋ bizaŋ a t’ippe an orbe, doŋ kesiyagaŋ soo soo an t’ikkima, doŋ jekese an di sooru beehiye, wo doŋ koŋzayi an di wolliyo. Wo kane pay geŋ an d’iise tamma Raa wede ki doŋ k’Izirayel.

Eliyo k’ombo a kuuli dupu pide

(Markus 8.1-10; Matiye 14.13-21)

³²Isa y’a wiike sanalliyagi wo y’an di ruute, y’ede: «Nuŋ duwo eŋ o t’ize sommagi kono kun wollo an lekkiyo ti nuŋ îide onniyo aɗo, wo aŋkenŋo munda k’ombo an k’ede ye. Ni ki dehu n’an ki ti’n t’igibe addaŋ guguba ye, para maŋ an d’oopey a urzi.»

³³Kane sanalliyagi an di tunde, an’de: «De adda balɗa ette, ti too me in t’oona mappa baadaŋ a doŋ duuru kino eŋ an d’ooma an t’assa me?»

³⁴Maŋ Isa y’an di’n tunde, y’ede: «Kune un d’ede mappa miibi me?» Wo kane an i di ruute, an’de: «Ay d’ede mappa sarat, ti puuni sunŋi miibi.»

³⁵Iŋkino y’an di ruute a doŋ duuru geŋ, y’ede: «Kun ti koona siido!»

³⁶Maŋ y’a ziki mappa sarat ti puuni geŋ a beezí, y’a ruute koduwo a Raa, y’a burkite wo y’an d’ele a sanalliyagi an an di-dikkida a doŋ duuru geŋno.

³⁷Wede tuuku toŋ y’a iimi y’a isse isse a d’uupite, wo ombo ere uupite gette, an ti tussite a ûune dambayi deero sarat.

³⁸Kane doŋ iimi geŋ kuuli dupu pide, daa kaza k’erayi t’iŋŋi.

³⁹Aame doŋ duuru Isa yi ti’n igibe maŋ, yoŋ yi-ti gili adda tooko, wo y’a iŋgile ki siido Magadaŋ.

Matiye 16

Tondiyo ki munda k’armika

(Markus 8.11-13; Matiye 12.38-39; Lik 11.16,29; 12.54-56)

¹Doŋ miibi ti diine kane Pariziyen ti Saduseyen geŋ, an a d’iide sirpa k’Isa kono an dehu an i d’ekke ikka t’urzi k’onamí. Iŋkino maŋ an di y’ tunde y’an d’ise munda k’armika wede a kize yoŋ Raa yi y’igibo.

²Wo Isa y’an di’n gime onamaŋ, y’ede: «Aame peedo t’a t’ooriyo wo kandaane i t’isiyo teeze maŋ, kun d’eesiyo: “Ume y’isa tasse beehiye.”

³Wo ti soohe walak kun d’eesiyo: “Aŋki mizzi yi koppa, kono kandaane teezikadí ki zimolo.” Inŋkino maŋ kun d’aaniya kun di suuniyo ita sulđi đoŋ kun wolliyo t’edaguŋ isiyo a kandaane, wo đe ki moo me kun ki d’aaniya kun gi di y’ suuniyo ye munda wede i-kaza ita sulđi đoŋ Raa y’isiyo aŋkenŋo eŋ me!

⁴Ita duwo đoŋ aŋkenŋo eŋ, kane đoŋ ulpi wo an ki seedu urzi Raa ye, an tondiyo munda k’armika a kize nuŋ Raa yi n’igibo. Wo armika ti doolo Raa y’an k’isa ye, daa ki armika ere Raa y’ize ti kaaga a nebi Zonas ye maŋ.» Inŋkino kane geŋ Isa yi’n iili, y’a inŋile.

Tookiyo kuude a urzi dooyiso ki Pariziyen ti Saduseyen

(Markus 8.14-21; Lik 12.1-6)

⁵Kane sanalliyagi an doopide ti kese bar Galile ti nee geŋ, an dundo an d’ambo mappa me.

⁶Aame geŋ Isa y’an di ruute, y’ede: «Kun koono mentikagi a orme wede ki Pariziyen ti Saduseyen me.»

⁷Kane sanalliyagi an d’iise rootiyto ti tuddaŋ, an’de: «Yi rootiyo inŋkino kono in k’umbo mappa ye.»

⁸Wo yo Isa rootiyadaŋ gette y’a ti zuune, inŋkino maŋ y’anni tunde, y’ede: «Ki moo me kun di rootiyto ti tudduguŋ, kun k’umbo mappa ye me? Ki kotto kune zaapu k’adduguŋ a Raa baata!

⁹Ki kotto kune sulđi đoŋ ize geŋ, itadaŋ kun ki ti zuune ye botto! Kune un dunde baa a mappa paat wede an an di-dikkida a kuuli dupu paat, wo a onniyo gette oopiyo ki mappa dambayi miibi kun zikiti me?

¹⁰Wo kune un dunde baa a mappa sarat wede an an di-dikkida a kuuli dupu pide, wo a onniyo gette oopiyo ki mappa dambayi deero miibi kun zikiti me?

¹¹De mummino kune’ŋ ita k’onamó kun gi di’n suuniyo ye me? Aame n’un ruute, n’ede: “Kun koono mentikagi ti orme wede ki Pariziyen ti Saduseyen” geŋ, n’un rootiyo ti mappa ye.»

¹²Inŋkino maŋ kane sanalliyagi ita k’onamí an di’n zuune, yoŋ y’an ki rootiyo an di koone mentikagi ti orme wede an ki d’oodibe mappa ye, kaciŋ y’an rootiyo ti dooyiso ere ki Pariziyen ti Saduseyen.

Isa miŋ yoŋ wee wee?

(Markus 8.27-30; Lik 9.18-21)

¹³Isa y’inŋile ki geeger Sezare siido Pilip, aame y’iiney maŋ sanalliyagi y’anni tunde, y’ede: «A tukki nuŋ wede an n’ehe aa ulo wede eŋ, duwo an rootiyo nuŋ wee wee?»

¹⁴Kane an i di'n gime onamí, an'de: «Doŋ soŋ an'de kee Zaŋ Batis, doŋ oŋgo an'de kee nebi Eli, wo doŋ oŋgo soŋ an'de kee nebi Zeremi koo ise nebi ti diine nebiyagi doŋ ti kaaga koo maŋ.»

¹⁵Wo yoŋ y'an di ruute, y'ede: «De kune me, kun'de nuŋ wee wee?»

¹⁶Simo wede an yi waaku sundí soo te Piyer yi di'n gime onamí, y'ede: «Kee Almasi Raa yi biire, wo Ulo Raa zeere.»

¹⁷Iŋkino maŋ Isa yi di ruute, y'ede: «Simo ulo Zonas, uŋsuwo a kee kono d'erec gette a-t'iidíba ita'ŋ wede tudde ye, a iidíba ita Meegó Raa a kandaane.

¹⁸Wo aŋkeŋ n'a di rooto kereŋ, kee sundá Piyer, suma i-kaza "mokkolo", wo geŋ ekki mokkolo gettiyo n'a ti'n kooná kane doŋ ogiyo ti sundó me, kono an t'ise aakede boŋ wede nuŋ n'oozige. A kane doŋ ogiyo geŋ, ume ki doŋ i t'inda batum i-k'ede toogo y'a ki'n ceera ye.

¹⁹N'a di t'ela kerle wede ki Moziko Raa a beezá: Munda wede tuuku a siido k'a ti gitta maŋ, a kandaane Raa y'a di kettey, wo munda wede tuuku a siido ki t'iiza maŋ, a kandaane Raa y'a t'eezey.»

²⁰Maŋ Isa a sanalliyagi y'an d'undirde kono a wenda soo toŋ an i roota ye, yoŋ Almasi Raa yi biire me.

Rootiyo k'Isa a urzi k'untadí ti baldiyadí

(Markus 8.31-33; Lik 9.22)

²¹Tiŋ geŋ Isa y'an d'iise rootiyo kereŋ a sanalliyagí, y'ede: «I dehu nuŋ n'a t'ette ki Zeruzalem, wo a ummey geŋ kane doŋ i dokkiyo doŋziŋ, deero doŋ sedeke ti doŋ suuniyo k'oogoro, an t'eley urzi a duwo an di n' seedey, an di n' dabirey baadaŋ, an a di n' t'idey. Wo onniyo sire k'aduwe maŋ Raa y'a ti n' baldey.»

²²Maŋ Piyer y'a y'irga siidí, y'a y'iise aapuđu, y'ede: «Aha Galmeega, kee Raa yi ki booho! Munda geŋ a aana ye!»

²³Wo de yo Isa y'a-gime ki tukki Piyer wo yi di ruute, y'ede: «Kee Meeda siitandani t'a-t'úune adda k'addá, ki ledfo dokki ti tuddó me! Kee a nuŋ mokkolo morkiy'e a munda wede n'aase me kono elkisadá ti ere ki Raa soo ye, elkisadá ki doŋ tudde.»

Urzi daaniya k'Isa

(Markus 8.34-9.1; Lik 9.23-27)

²⁴Saŋ Isa y'an di ruute a sanalliyagí, y'ede: «Wede yi dehu y'a daane urzi nuuno maŋ, tuddí batum y'a ti kiigira, ki unto toŋ y'a oyye y'a t'inda kono nuuno, wo y'a ni daane.

²⁵Inkino wede tuuku yi dehu boohiyo tuddí k'aggadí mañ, y'a ti dagga, wo de wede tuuku y'ooliyo tuddí kono nuuno mañ, y'a t'utta.

²⁶A wede koduwatú moo me suldí duniya pay y'anni t'oone, wo tuddí y'a ti dagge me? Wo ki kotto wede geñ tuddí zooyatú ooñe, geñ yi k'aane y'a ki t'ele munda y'a ki pelke tuddí ye!

²⁷Derec, nuñ wede an n'ehe aa ulo wede eñ, n'aa kimo ti maaleekiyagó adda daryíka ere ki Meegó Raa, wo aame geñ wede tuuku toñ y'a t'oono munda wede ni dehu ni-t'ela a naabadí ere y'ize gette.

²⁸Derec inkino wo n'un di rooto: Doñ ongoñ ti diine kane doñ añkenño eñ an ki ti t'inda ki poone pay ye, an di n' wolla nuñ wede an n'ehe aa ulo wede eñ, n'etto adda mozikadó me.»

Matiye 17

Ume k'eda k'Isa a-gime

(Markus
9.2-9; Lik
9.28-36)

¹Íide onniyo zoot k'ita mañ, Isa y'a-wiike ti yode Piyer, Zak wo leemadí Zan, y'an d'an d'ingile siidañ k'ekki mukkolo soho.

²An iiney mañ, a daanadañ geñ miñ tuddí a-gime sittú, inkino ume k'edayí a iise ralita aa peedo wo kallagí a t'ize tuwardí kar aa toore.

³A kaamiki, kane sanalliyagi ado geñ an wolliyo bibiraw Muusa ti nebi Eli an rootiyto t'Isa.

⁴Inkino mañ Piyer y'a t'ihina bizí, yi di ruute Isa, y'ede: «Galmee'ki nuñ, beehiye'ñ kine in di lekke a eñño! Ki dehu mañ, a eñ n'un d'okkima daabagi ado, a kee soo, a Muusa soo, wo a Eli soo.»

⁵Aame onamí y'a ki ti'n denge ye botto geñ, i d'iido dondirso ti-tooriyo ti di'n ippe kane geñ me. Wo t'adda dondirso gette an d'illiga golla, t'ede: «Eñ Ulo nuuno ni y' giyye baadañ, ulbó unse ti yode me. Kun y'ollo!»

⁶Aame sanalliyagi an illiga golla gettiyo mañ, orgiso t'anni ziida baadañ an di zilditi kañ ossiso.

⁷Isa y'a d'iide sirpadañ, y'an d'an buttite wo y'an di ruute, y'ede: «Kun t'oozon, kun orgide ye!»

⁸Mañ kane an d'umbe edayañ, wo an wolliyo Isa siidí, wenda ti doolo umbo.

⁹A deeguzan t'ekki makkolo, Isa y'an di ruute, y'ede: «Kun ollo, a munda wede iido kun wulle geɗ, a wenda soo toɗ kun rootey ye, bini baldiya ki nuɗ wede an n'ehe aa ulo wede eɗ ti diine doɗ unto.»

¹⁰Maɗ kane sanalliyagi an di y' tunde, an'de: «Ki moo me doɗ suuniyo k'oogoro an di rootiyo, an'de: “Ki poone i kimo Eli doo miɗ, saɗ Almasi Raa yi biire kollo” me?»

¹¹Isa y'an di'n gime onamaɗ, y'ede: «Derec, Eli geɗ y'a etto, wo suldi pay y'an okkima a urzizaɗ.

¹²Wo kun ollo, n'un di rooto, Eli geɗ yoɗ yi t'iido baa, duwo an gi di y' zuune ye, yoɗ wede a etto me, wo an i-d'ize ulsu aa addaɗ i dehu. Geɗ iɗkino kay nuɗ wede an n'ehe aa ulo wede enno toɗ, an di n' dabira.»

¹³Iɗkino maɗ kane sanalliyagi an di zuune, yoɗ y'an rootiyo a tukki Zaɗ Batis, a tukk'Elī ye.

Eliyo beeko a ulo i-d'ede siitan a eedí

(Markus
9.14-29; Lik
9.37-43)

¹⁴Isa ti sanalliyagi aɗo an iiney a ume doɗ duuru maɗ, a ume geɗ i d'ede wede y'a d'iide sirpa k'Isa, y'a-dikke a daanadi

¹⁵wo yi di ruute, y'ede: «Galmee'ki nuɗ, k'iso adde koduwo a ulo nuɗ, yoɗ i-d'ede amputput, yi dabirsa baadaɗ, onniyo ti y'ambu maɗ, ti-ti y' seddiyo adda k'uwwo ise adda k'ahu toɗ maɗ.

¹⁶N'an di y'umbo a sanalliyagá, wo de kane an k'iine an i k'ele beeko ye.»

¹⁷Maɗ Isa y'a t'ihina bizi, y'a ruute, y'ede: «Kune doɗ ulpi wo kun ki ziipe addugun a Raa ye. Nuɗ ti kaagine ni lekkiyo ti kune, wo de a nuɗ kun ki d'umbe ye! Geɗ n'a ombina ki daayum koo ti kune me? Ulo kun o d'edi kenno.»

¹⁸Isa y'a t'idfise siitan gette, maɗ tod' t'a t'udde ti tukk'ulo me. Wo a kaamiki yoɗ y'a uune bee.

¹⁹Iɗkino maɗ sanalliyagi an a d'iide sirpa k'Isa wo an di y' tunde siidaɗ, an'de: «Wo de ki moo me siitan gette kaye ay ki d'iine lommatu ye me?»

²⁰Yoɗ y'an di ruute, y'ede: «Kun k'iine lommatu ye kono kuneɗ zaapu k'addugun a Raa baata. Derec iɗkino wo n'un di rooto: Ise zaapu k'addugun a Raa gette t'aase nenko aa ulo k'undumu sundi mutard toɗ maɗ, kun aane kun i di roote a tokomo ette, kun t'ee: “T'umayi en mi-deeto k'ummey”, toɗ maɗ tod' t'a-deete. Munda wede kun k'aane ye umbo.

21Wo geŋ ita siitan ere kino ette, addiyatú t'urzi tonɗiyo Raa wo ti lekkiyo ere onniyo muno daa k'ombo ɗaŋŋal.»

Rootiyo k'Isa ere ki sirwe a urzi k'untadí ti baldiyadí

(Markus
9.30-32; Lik
9.43-45)

22Onniyo soo kane sanalliyagi an t'ugiye pay a siido Galile, maŋ Isa y'an di ruute, y'ede: «Nuŋ wede an n'ehe aa ulo wede eŋ, an di n' t'eley a bey ɗuwo.

23Kane an di n' t'idey, wo onniyo sire k'aduwe maŋ Raa y'a ti n' baldey.» Inŋkino kane sanalliyagi an t'ize sommagi donɗoŋ.

Eliyo jibaaye ki 'Boy Raa

24Isa ti sanalliyagi an iiney geeger Kapernayim. Aame geŋ kane ɗoŋ sedɗu jibaaye ki 'Boy Raa an a d'iide sirpa Piyer wo an di y' tunde, an'de: «Wede dooyisagun jibaaye y'eliyo ko ki 'Boy Raa te?»

25Yo Piyer y'a ruute, y'ede: «Eyye, y'eliyo.» Saŋ Piyer yi-t'iide k'adda boy, wo ki poone y'a t'ihina bizi geŋ, Isa y'a ruute, y'ede: «Simo kee elkisada moo me? Wee wee a t'ele jibaaye wo patanti a mozagi ɗoŋ a duniya ette? Doŋ siido kunuŋ, torgagi ko?»

26Piyer yi di'n gime onami, y'ede: «Torgagi a t'ele me.» Maŋ Isa yi di ruute, y'ede: «Inŋkino maŋ ɗoŋ siido an ki t'ele ye.

27Wo miŋ kane ɗoŋ sedɗu jibaaye in ki ti'n kulkuwa ye geŋ, k'odo ki biza bar, k'a sedɗoy tiwili k'adda k'ahu, wo puuniso ere k'ambey ki poone gette k'a t'ohinoy bittú, ki-t'ooney tamma soo ere a t'idey ki jibaaye, k'a t'amboy wo ti tode gette k'a eloy jibaaye ki nuuno wo ki kee.»

Matiye 18

Wede goole a jiire a Moziko Raa

(Markus
9.33-37; Lik
9.46-48)

1Aame geŋ kane sanalliyagi an a d'iide sirpa k'Isa wo an di tunde, an'de: «Wee wee goole a jiire a Moziko Raa te?»

2Maŋ Isa yi wiike ulo neŋku, y'a y'ihira a diinayan,

3wo y'a ruute, y'ede: «Derec inŋkino wo n'un di rooto: Aame kun ki ti gima lekkiyagun wo kun ki t'iza aa inŋi sunŋi ye maŋ, Moziko Raa kun ki t'etta ye.

4Inŋkino maŋ wede yi-t'iza tuddi neŋku aa ulo enno maŋ, yode geŋno goole a jiire a Moziko Raa te.

⁵Wede tuuku yi seedu ulo aa yode enj bey sire a sundó mañ, geñ aa yi seedu nuñ batum.»

Suldi ñoñ i-t'eliyo wedusu adda k'oldiko

(Markus
9.42-48; Lik 17.1-2)

⁶«Wede tuuku yi t'eliyo adda k'oldiko wede soo ti diine kane ñoñ tasse a urzi zaapu k'adde a nuuno mañ, a wede injino geñ, dabar ere an i di kette assa meeda a golladí an ti y' sedde adda moyta bar gette, soodo sey ti ere yi t'ooney a ñaana Raa te.

⁷Dabar a ñoñ duniya, kono i d'ede suldi baadañ an t'eliyo ñuwo adda k'oldiko. Derec, kane suldi daayum ede ñoñ i t'eliyo ñuwo adda k'oldiko me, wo ñe dabar a yode wede i t'eliyo bakadí adda k'oldiko.

⁸Aame beezá ise zindá koo a-da t'ettiyo k'adda k'oldiko mañ, k'a-ñekko k'a seddo dokki ti kee. Beehiye i jiire a kee zindá soo ise beezá soo wo k'a t'ooney lekkiyo ere ki daayum, bee miñ k'a lekke beyñañ sirwañ ise zoññañ sirwañ wo an ki ti seddey adda k'uwo ere t'oggiyo ki daayum.

⁹Wo aame ersadá t'a-da t'ettiyo k'adda k'oldiko mañ, k'a t'oodo k'a seddo dokki ti kee me. Beehiye i jiire a kee t'ersadá soo wo k'a t'ooney lekkiyo ere ki daayum, bee miñ k'a lekke edayá sire wo an ki ti seddey adda k'uwo ere ki dabar.»

Ono ombide a tukki damsa i digge

(Lik 15.1-7)

¹⁰«Kun koonaa mentikagi, wenda yi kiigira wede soo ye ti diine kane ñoñ tasse a urzi zaapu k'adde a Raa me. Kun ollo, n'un di rooto, kane geñ maaleekiyagañ an lekkiyo jep a ñaana Meegó Raa a kandaane me.

[¹¹Derec, nuñ wede an n'ehe aa ulo wede enj, n'iido'ñ n'an t'ele uttiyo a ñoñ i digge adda k'oldikadañ.]

¹²Kun ollo taaya ettiyo wo kun d'elkito eego. Aakede wede'ñ i-d'ede dambami meeda wo ere soo ti diinayañ t'a digge. Injino wede geñ y'aase mummino me? Ki kotto ñoñ ada gessat makumu gessat geñ yi d'ooli a ita tokomo, y'a t'ette dehuu ki ere i digge.

¹³Derec injino wo n'un di rooto: Aame wede geñ yi t'uuno mañ, unswadí ere a tukki damsa gette t'aase baadañ a ceere ki ñoñ ada gessat makumu gessat i ki digge ye geño.

¹⁴Geñ injino Meegugun Raa a kandaane yi dehu wenda soo toñ i ki dagge ye ti diine kane ñoñ tasse a urzi zaapu k'adde a yode me.»

Aapudu tudde

15«Aame leemadá wede i ziipe addí a Raa geɗ yi t'ize oldíko ti kee maɗ, k'odo ki y'oonoy wo ki rootoy munda geɗ sigguɗ. Aame yi-k'illigey maɗ, leemadá ki ti y' gimo k'urzi wede beehiye.

16Aame yi ki k'illigey ye maɗ, k'a waako wede soo ise doɗ sire toɗ maɗ, kun di y'oonoy sey, kono suldi pay geɗ kun ti'n t'ide a daana doɗ sire t'ado i wulle wo illiga doo.

17Aame kane geɗ y'an ki'n illigey ye maɗ, k'an t'odo taaya a doɗ ogiyo ti sundó. Wo ki daɗgu, aame kane geɗ yi ki'n illigey ye sey maɗ, ki y' wollo yoɗ geɗ aakede wede i ki suune Raa soo daɗɗal ye, wo aakede wede sedfu jibaaye.

18Derec iɗkino wo n'un di rooto: Munda wede tuuku a siido kun a ti gitta maɗ, a kandaane Raa y'a di kettey, wo munda wede tuuku a siido kun t'iiza maɗ, a kandaane toɗ Raa y'a t'eezey.

19Kun ollo, n'un di rooto sey: Aame a siido geɗ doɗ sire ti diinaguɗ an ti gitte onamaɗ kaɗ soo an di tonde Raa a munda tuuku toɗ maɗ, geɗ Meegó Raa a kandaane y'an di y' t'ela.

20Derec, a ume tuuku doɗ sire t'ado wo a gili geɗ an t'ugiye ti sundó maɗ, nuɗ a diinayaɗ.»

Ono ombife a urzi tambobino

(Lik 17.4)

21Iɗkino maɗ Piyer y'a d'iide sirpa k'Isa wo y'a yi tunde, y'ede: «Galme'e'ki nuɗ, aame leemadó y'o t'ize oldíko maɗ, taɗ miibi ni-d'ise tambobino me? Bini taɗ sarat ko?»

22Isa yi di'n gime onamí, y'ede: «Aha, n'a-ki roote bini taɗ sarat ye, wo n'a di roote bini ada sarat sarat, taɗ sarat.

23Kun ollo, Moziko Raa tod' ti deey'iso aa naabo mozigo yi dehu y'a wolle soɗko ere doɗ naabadí an i di t'ele.

24Iɗkino maɗ yi-t'iise, ki poone an i di wiiko wede i di t'ele soɗko baadaɗ baadaɗ ki k'aane ki ti kize ye.

25Wede geɗ, i-k'ede munda ye yi di t'ele soɗko ki galmeegí me. Iɗkino maɗ galmeegí y'an di ruute a doɗzi, y'ede: “Wede eɗ kun ti y'owol, eddí, iɗɗizi wo suldi zi pay kono a-ti t'ide a soɗkadó.”

26Maɗ wede naabo geɗ y'a iire a zoɗ galmeegí, wo yi di ruute, y'ede: “K'ambó ombiɗe a nuuno me, soɗkadá nuɗ n'a-ti kima pay.”

27Galme'e'ki wede naabo geɗ i di t'ize sommagi, soɗko ere yi di t'ele yi-d'iili mentú, maɗ wede naabo y'a iɗgile.

²⁸Aame wede naabo geɗ ti di mozigo yi t'udde maɗ, an a-t'ikkima ti wede ume naabadaɗ soo, yoɗ geɗ i-d'ede see ki soŋko miibi daɗɗal. Y'iide'ɗ yi di ziida golladí biɗ wo yi di ruute, y'ede: "Seezá k'o y'eli."

²⁹Maɗ yo wede ume naabadaɗ soo geɗ, y'a iire a zoɗdí wo yi-d'obe bey, y'ede: "K'ambo ombiɗe ti nuuno, seezó n'a yi t'ela."

³⁰Wo de yo wede geɗ y'a-tuuge, wo ulsu a jiire sey yi-ti y' zidde daɗɗay koore seezí yi di y' t'ela geɗ me.

³¹Aame kane doɗ ume naabadaɗ soo geɗ an wulle iɗkino maɗ, an t'ize sommagi dondoɗ, an iide'ɗ a galmeegaɗ an i di t'iide taaya a suldi doɗ pay ize geɗ me.

³²Iɗkino maɗ galmeega geɗ wede naabo y'a yi wiike, wo yi di ruute, y'ede: "K'o ibi bey moɗ seezá pay n'a-di y'iide miɗ, kaciɗ kee wede naabo ulsu kino too!"

³³Ki too maɗ kee k'a dehe k'aase adde kofuwo a wede naabo aa kee, aakede nuɗ batum n'ize adde kofuwo a kee."

³⁴Wo galmeegí adda kulkuwadí ere baadaɗ gette y'an di y'ele a bey k'asigiryagi, an di y' dabire adda daɗɗay koore soɗkadí yi di t'ela pay geɗ me.»

³⁵Isa y'an di ruute sey, y'ede: «Geɗ iɗkino kay Meegó Raa a kandaane y'un isa me, aame wede tuuku ti diinagaɗ yi k'iza tambobino a leemadí t'adde soo ye maɗ.»

Matiye 19

Dooyiso k'Isa a urzi peeriyo

(Markus 10.1-12; Lik 16.18)

¹Aame Isa ti dooyiso fuwo y'a ti dɗiɗe maɗ, ti siido Galile y'a t'iiziga y'a-diipida ti siido Ziide ere ti dar k'ooye Zurden ti nee.

²Doɗ duuru baadaɗ an di y' diine wo a ume geɗ y'an d'ele beeko a doɗ k'eeni ti diinayaɗ.

³Doɗ miibi ti diine Pariziyen an a d'iide sirpadí kono an dehu an i d'ekke ikka t'urzi k'ono. Maɗ kane an di y' tunde, an'de: «Oogiradiɗ t'ele ko urzi ki peeriyo k'erewo, aame kule yi uune munda tuuku eddí t'ize wo ulbí i-k'ize unse ye maɗ?»

⁴Isa y'an di'n gime onamaɗ, y'ede: «Ki kotto kune kun gire ono doɗ an riije ti kaaga adda mattup ki Raa, an'de: "T'ume k'eesiyo Raa yi ziipe suldi pay geɗ, y'ikkima aɗ kule t'ere."

⁵Wo Raa y'a ruute sey, y'ede: "Kono kamo kule yi d'oola meegí ti meedí, y'a di ketta biɗ ti eddí. Wo kane sire geɗ an t'isa tudde soo."

⁶Inkino maŋ kane geŋ sire ye baa, an t'ize tudde soo. Geŋ inkino munda wede Raa y'a ti gitte geŋ, wede tudde yi ki t'eeze ye.»

⁷Kane Pariziyen an di y' tunde, an'de: «De ki moo me ti kaaga Muusa y'a ele urzi, aame wede yi-peere eddí maŋ, yi di dekke mattup ki peeriyo yi di t'ele a beytú me?»

⁸Isa y'an di ruute, y'ede: «Muusa y'un ele urzi ki peeriyo k'erayguŋ kono a eego zakidí ere un d'ede gettiyo, para maŋ t'ume k'eesiyo inkino ye.

⁹Wo kono k'inkino toŋ n'un di rooto: Ki peeriyo k'erewo ulu, wo wede yi peere eddí geŋ, aame ti moone ti kule bakatú ɗaŋŋal! Para maŋ yi ti biira wo yi ziida erewo ti doolo maŋ, Raa yi yi wolliyo yoŋ wede i moone t'ere bakadí.»

¹⁰Kane sanalliyagi an i di ruute, an'de: «Aame wede yi peere eddí t'urzi soo ɗaŋŋal geŋno maŋ, geŋ ki ki ziida ye toŋ bee.»

¹¹Isa y'an di'n gime onamaŋ, y'ede: «Doŋ pay an k'aane an k'ambe ye a dooyiso ette, aane ambe kane doŋ soo Raa y'an ele urzi ɗaŋŋal.

¹²I d'ede urziyagi miibi doŋ i-t'eegirso kuuli an k'aane an ki sedde erayi ye me. Ki doŋ oŋgo moytaŋ umbo t'ume k'ehiyadaŋ too, doŋ oŋgo kokkiso t'urzi duwo wo doŋ soŋ kane batum an ti seedu tuddaŋ aa moytaŋ umbo kono Moziko Raa. Geŋ wede y'aane suuniyo k'ita k'ono enno maŋ, yi ni suuno.»

Isa ti inŋi sunni

(Markus 10.13-16; Lik 18.15-17)

¹³Saŋ maŋ duwo an i di ziko inŋi sunni a Isa kono y'an di zaape beezí a eedaŋ wo y'a tonde Raa kono kane, miŋ kane sanalliyagi an ki dehu ye, an di'n eddisito duwo geŋ me.

¹⁴Maŋ Isa y'a ruute, y'ede: «Kun oolo inŋi en an d'etto ki tuddó, kun ti'n eegire ye, kono Moziko Raa tod'te ki doŋ i deeyiso aa kane kino.»

¹⁵Aame geŋ y'an di ziipe beezí a eedaŋ, maŋ t'ume geŋ y'a inŋile ki ɗaana.

Isa ti obulsu ki laale

(Markus 10.17-31; Lik 18.18-30; 13.30)

¹⁶Saŋ i d'ede wede soo y'a d'iide sirpa k'Isa wo y'a yi tunde, y'ede: «Wede dooyisadey, munda wede beehiye n'aase moo me kono n'a t'oono lekkiyo ere ki daayum te?»

¹⁷Isa yi di ruute, y'ede: «Ki moo me ki di n' tonduyo a munda wede beehiye me? Beehiye Raa soo ɗaŋŋal. Aame ki dehu k'a t'oono lekkiyo ere ki daayum maŋ, ki soodo urziyagi k'oogoro Raa.»

¹⁸Wede geŋ yi di ruute, y'ede: «Kane miŋ doŋ tuuku me?» Isa yi di'n gime onamí, y'ede: «Kane enno: Ki t'owwo wedusu mirsi ulu, ki moone t'ere bakadá ise ti

kule bakatú ulu, k'oogire ulu, ki rootiyo k'ono butte a tukki bakadá a daana booro ulu,

¹⁹ki elo suma a meegá ti meedá, wo ki d̄an̄gu ki geyyo bakadá aa ki geyyiso tuddá batum.»

²⁰Obulsu yi di ruute, y'ede: «Kane geñ pay ni'ni seedu, wo o biite moo sey me?»

²¹Isa yi di ruute, y'ede: «Aame ki dehu k'a-t'ette a munda wede aa Raa yi dehu mañ, k'odo, suldi d̄on̄ a-d'ede'ñ ki t'owiltoy pay wo soñko k'an d'eloy a d̄on̄ an k'ede munda ye, iñkino k'a t'ooney laale wede ki kotto a kandaane. Sañ k'a t'edi wo k'a ni daana.»

²²Aame obulsu geñ y'illiga ono geñno mañ, y'a t'ize sommagi dondon̄ kono yoñ maaladí baadañ, sañ y'a iñgile.

²³Mañ Isa y'an di ruute sanalliyagí, y'ede: «Derec iñkino wo n'un di rooto: Ooñe baadañ a wede laale yi t'ettey adda Moziko Raa te.

²⁴Kun ollo, n'un di rooto sey: Ooñe a ziñzo ti-t'adde ti buldo rippile me, wo geñ ooñe baadañ a ceere sey a wede laale yi-t'ettey a Moziko Raa te.»

²⁵Aame kane sanalliyagi an illiga ono geñno mañ, an di ziida giggirañ wo an di ruute, an'de: «Iñkino mañ, geñ a utta wee wee?»

²⁶Isa yi di'n wolliyo yerere adda k'edayañ wo y'an di ruute, y'ede: «Munda eñ duwo an k'aane ye, wo de a Raa suldi pay i-k'ooñe ye, y'aane.»

²⁷Iñkino mañ Piyer y'a t'ihina bizi wo yi di ruute, y'ede: «Añkeñ k'ollo, kaye'ñ suldzey pay ay d'iilo wo ay di daaniya kee. De geñ ki kaye aasa mummino me?»

²⁸Isa y'an di ruute, y'ede: «Derec iñkino wo n'un di rooto: A onniyo ere suldi pay i t'isa awirdi geñ, nuñ wede an n'ehe aa ulo wede eñ n'a di kooney a kaakido moziko adda dary'ikadó. Wo aame geñ kune d̄on̄ kun ni daaniya, kune toñ kun di konditey ekki kaakidagi koomat makumu sire d̄on̄ ki moziko, kun dekkey booro a tukki boha bumdiyagi koomat makumu sire ki d̄on̄ k'Izirayel.

²⁹Wo wede tuuku yi iila boydzí, ise zembadí kuuli erayi, meegí ti meedí, iñnizi wo dombizi kono sundó mañ, kane geñ y'anni t'oona tañ baadañ a ceera wo y'a t'ooney lekkiyo ere ki daayum.

³⁰Don̄ baadañ añkeñno kane ki biza, sañ an t'isa d̄on̄ k'ita, wo d̄on̄ baadañ añkeñno kane k'ita, sañ an t'isa d̄on̄ ki biza.»

Matiye 20

Ono ombide a tukki d̄on̄ naabo doome

- ¹Isa y'a ruute sey, y'ede: «Kun ollo, Moziko Raa tod' ti deey'iso aa naabo wede boy y'a t'udde ti soohe walak, kono yi-deho don naabo y'a ti'n t'igiba k'adda doomizi k'inda sudaŋ biŋ.
- ²Aame don naabo yi uune maŋ, an di ruute ti kane geŋ, y'an t'ela raŋnadaŋ, a wede soŋ a naabo k'onniyo soo soo, wo y'an igibe k'adda doomizi.
- ³A peedo t'ize k'aadumu mesuwe maŋ, y'a udde sey, yi woliyo don doolo an ti guune a bere don duuru, naabo an k'uune ye an delliyo.
- ⁴Maŋ yoŋ y'an di ruute, y'ede: "Kune toŋ maŋ kun t'odo naabo k'adda doomizo, wo n'un t'ela munda wede derec a raŋnaguŋ."
- ⁵Maŋ kane an d'ingile. Wede boy geŋ, a peedo t'ize diine wo a peedo t'ibbira toŋ iŋkino, y'a udde sey don naabo yi d'uune, wo y'an di'n igibe k'adda doomizi.
- ⁶A lohe maŋ y'a udde sey, yi d'uuney don doolo an ti guune a bere don duuru. Wo y'an di ruute, y'ede: "Ki moo me onnuguŋ kun di y'engilso a enno daa naabo me?"
- ⁷Maŋ kane an i di ruute, an'de: "Wenda y'ay ki ti'n ziki naabo ye." Yoŋ y'an di ruute, y'ede: "Aa de geŋ, kune toŋ kun engilo naabo k'adda doomizo."
- ⁸A peedo t'a t'iire maŋ, wede boy yi di ruute a wede yeeriyadi, y'ede: "K'odo, don naabo ki'n oozigi wo wede tuuku toŋ ki-d'elo raŋnadi te, ki-t'eeso ti don a t'iide k'ita, k'a ti denŋo ti don iide ki biza."
- ⁹Iŋkino maŋ kane don iise naabo a lohe geŋ an d'iido, wo wede yeeriyo geŋ y'an d'ele raŋnadaŋ a wede soŋ a naabo k'onniyo soo soo.
- ¹⁰Aame iina kaaba ki kane don iise naabo ti soohe walak maŋ, an elkiyo an t'oon baadaŋ baaki, kaciŋ kane toŋ an d'uune raŋnadaŋ tiŋ wede soŋ a naabo k'onniyo soo soo pay.
- ¹¹Aame wede yeeriyo geŋ y'an ele raŋnadaŋ maŋ, an d'iise gurgirso a tukki wede boy,
- ¹²an'de: "Kane don a t'iido k'ita wo an niibe peedo soo toŋ, kee k'an d'ele raŋnadaŋ aa ki kaye don iido ti soohe, ay niibe kee kee adda malla, ay d'urme bini peedo k'ooriyo."
- ¹³Wo wede boy geŋ, a wede soo ti diinayaŋ yi di'n gime onami, y'ede: "Laŋze ki nuŋ, n'a-k'isiyo ulsu ye, ki kotto kee in ti ruute ti nuŋ, n'a-t'ela raŋna ki naabadá k'onniyo soo.
- ¹⁴Iŋkino ki t'ambo gettiŋ raŋnadá k'engilo. Don iido k'ita toŋ ni dehu raŋnadaŋ n'an t'ele aa ki kee.

15Derec, nuɲ ti maaladó ette o ede urzi n'aase munda wede aa addó i dehu kunuɲ, a beehiyko ere n'isiyo gette kee ki kolbiso ko?"»

16Wo Isa y'a ruute sey, y'ede: «Inkino maɲ ɗoɲ aɲkenɲo kane k'ita, saɲ an t'isa ɗoɲ ki biza, wo ɗoɲ aɲkenɲo kane ki biza, saɲ an t'isa ɗoɲ k'ita.»

Ono k'Isa ɗoɲ k'aduwe a urzi k'untadí ti baldiyadí

(Markus 10.32-34; Lik 18.31-34)

17Isa yi-kili ki Zeruzalem maɲ, y'a-wiike sanalliyagi kane koomat makumu sire, y'an irga siidaɲ, a urzi y'an di ruute, y'ede:

18«Kun ollo, in ti kili ki Zeruzalem wo nuɲ wede an n'ehe aa ulo wede eɲ, an di n' t'eley a bey deero ɗoɲ seɗeke ti ɗoɲ suuniyo k'oogoro. Kane geɲ t'urzi k'onamaɲ nuɲ booro t'a ni seɗey ki tōwwo,

19wo an di n' t'eley a bey ɗoɲ kane Yawudiyagi ye, kono an di n' t'okkey maade, an di n' gorpipay ti marpa wo an ti n' taakey ekk'undumu wede zaapu t'ekki bakadí kaɲ tontilko. Wo onniyo sire k'aduwe maɲ, Raa y'a ti n' balɗey.»

Tondiyo ki mekk'inɲi Zebede

(Markus 10.35-45; Lik 22.25-27)

20Inkino maɲ mekk'inɲi kuuli ki Zebede, t'inɲitú geɲ t'a d'iide sirpa k'Isa, wo t'a dikke ɗaanadí kono t'a yi tonde.

21Maɲ Isa y'a ti tunde, y'ede: «De koɲ mi dehu moo me?» Tod' ti di ruute, t'ede: «Ni dehu k'a t'ele urzi, onniyo ki t'iida mozikadá maɲ, inɲizó sire eɲ k'a ti'n zappey soɲ a ammidadá, soɲ a geeladá.»

22Isa y'an di'n gime onamaɲ, y'ede: «Munda wede kun tondiyo, kun ki y' suune ye. Kun aana kun siba ko kop ki dabar wede nuɲ ni siba me?» Maɲ kane an i di ruute, an'de: «Eyye, ay aana.»

23Yoɲ y'an di ruute, y'ede: «Derec, kop ki dabar wede ni siba geɲ kun siba. Wo ɗe ki ume konso wede a ammidadó soɲ a geeladó geɲ, urzi yoɲ a bey nuuno ye, ume geɲ yoɲ ki kane ɗoɲ Meegó Raa y'an ikkima.»

24Aame kane sanalliyagi ɗoɲ koomat geɲ an illiga maɲ, an di-gulkuwe ti kane zamba sire geɲɲo.

25Maɲ Isa y'a ti'n wiike sanalliyagi geɲ pay ki ɗaanadí, wo y'an di ruute, y'ede: «Kune kun suune, mozagi siidiyagi pay an d'ombo t'ekki ɗoɲzaɲ ti toogo, wo kane ɗoɲ deero an d'ombo t'ekki ɗoɲzaɲ t'urzi dokkiyo ere an d'ede.

26Wo geɲ a diinaguɲ i dehu inkino a k'ise ye. Ki too maɲ, wede tuuku yi dehu y'a t'ise goole ti diinaguɲ maɲ, yoɲ geɲ yi t'iso wede naabaguɲ,

27wo wede tuuku ti diinaguɲ yi dehu y'a t'ise ki biza maɲ, yoɲ geɲ yi t'iso bulaguɲ.

²⁸Geɗ geɗ inkiɗo, nuɗ weɗe an n'ehe aa ulo weɗe eɗ, n'iido'ɗ kono ɗuwo on o-ki naabe ye, wo ɗe n'iido'ɗ n'an di naabe ɗuwo wo n'a oyye n'a t'inda kono n'a t'adde ɗoɗ baadaɗ t'adda k'oldikadaɗ.»

Ohine k'eda koɗzayi sire a Zeriko

(Markus 10.46-52; Lik 18.35-43)

²⁹Isa ti sanalliyagi t'adda Zeriko an a t'adde maɗ, ɗoɗ duuru baadaɗ an di'n daaniya.

³⁰Maɗ i d'ede koɗzayi sire an ti guune a biza k'urzi. Aame an illiga eɗgilso geɗ Isa maɗ, an d'iise ɗollite, an'de: «Galmeegay, kee Wede ti biza bumbu Dawut, k'iso adde koɗuwo a kaye!»

³¹Kane ɗoɗ duuru an di'n eddisito kono an d'anniga, wo kane koɗzayi an a ɗolle baadaɗ i ceeriyo, an d'eesiyo: «Galmeegay, kee Wede ti biza bumbu Dawut, k'iso adde koɗuwo a kaye, k'iso adde koɗuwo a kaye!»

³²Maɗ Isa y'a t'ihira, y'anni wiike wo y'an di ruute, y'ede: «Kune kun dehu n'un d'ise moo me?»

³³Kane an di ruute, an'de: «Galmeegay, ay dehu edayey a-t'ihina.»

³⁴Isa i di t'ize sommagi, y'an di buttite a edayaɗ. A kaamiki, edayaɗ a t'ihina an di wolliyo, maɗ an di y' diine.

Matiye 21

Ettiyo k'Isa ki Zeruzalem

(Markus 11.1-11; Lik 19.28-40; Zaɗ 12.12-16)

¹Isa ti sanalliyagi an iiney gopponɗ ki Zeruzalem, a sirpa k'ille sundutu Betpaze, wo a sirpa makkolo k'inda k'Olibiye. A ume geɗ yi d'igibe sanalliyagi sire,

²wo y'an di ruute, y'ede: «Kun'do k'adda k'ille ere a ɗaanagun gettiyo. Kun iiney, kesiko kun t'ooney buuru kettiyo, t'ulutú a sirpa. Kun t'eezi, kun o di'n arkiɗi.

³Aame wenda y'un ruutey munda maɗ, kun d'eesoy: “Burdari eɗ i dehu Galmeega.” Maɗ kesiko weɗe geɗ burdari y'un d'oolo, kun d'eɗgilo.»

⁴Geɗ a iina kono a-t'ette a ono ɗoɗ nebi yi ruute ti kaaga, y'ede:

⁵«Kun an rooto a ɗoɗ geeger Siyon geɗ: Eɗno mozigagun me, y'ettiyo ki tuddugun ti buuru, yon addi tasse y'a ti gilo ekk'ulo buuru, seysu ki sarkiya k'attidi.»

⁶Inkiɗo maɗ kane sanalliyagi sire geɗ an d'ingile, wo an t'izo munda weɗe Isa y'an ruute an d'iso me.

⁷An t'irkido buuru t'ulutú an d'iido, an a-ti gikkite kallagan don deero a dar burdari wo Isa y'a-ti gili eego.

⁸Kane don duuru gen, don baadan ti diinayan an di gikkite kallagan don deero a urzi, don ongon an dimbo puutagi k'inda an di gikkite a urzi kay.

⁹Kane duwo don i sooru daanadi ti don i yi daaniya gen, pay kan soo an di dollite, an d'eesiyo: «Tamma a Wede ti biza bumbu Dawut! Beeko Raa ti koonaa a ekki wede ettiyo ti suma Galmeega Raa! Tamma a Raa t'awwa a kandaane!»

¹⁰Aame Isa yi t'iide adda Zeruzalem man, kane don geeger pay an d'iise okkito kenno kenno, an di tondiso ti tuddan, an'de: «De yo en wee wee?»

¹¹Man kane don duuru an an di ti'n gime onaman, an'de: «En nebi Isa, ti geeger Nazaret ki siido Galile.»

Lomme don suuk t'adda booro Boy Raa

(Markus 11.15-19; Lik 19.45-48; Zan 2.13-16)

¹²San Isa yi-t'iide a booro Boy Raa, wo y'an ilmiti kane don isiyo suuk ti don k'owilte pay a ume genno. Y'an di gippirde taabulyagi ki don pelkiyto sonko ere ettiyo ti siidiyagi doolo, wo ti kaakidagi don k'owilte deere.

¹³Man y'an di ruute, y'ede: «Kun ollo, ono en an riine ti kaaga adda mattup ki Raa, an'de: “Boozó en an di y' waaka boy wede ki tonديو Raa.” Wo de kune, kun di y'ize urmi k'ombide don k'oogire!»

¹⁴Aame gen i d'ede don konzayi ti don jekese, an a d'iide k'ume k'Isa a booro Boy Raa, wo y'an d'ele beeko.

¹⁵Kane deero don sedeke ti don suuniyo k'oogoro an wulle suldi k'armika don Isa y'ize me. Wo son an wulle inni an dollite a booro Boy Raa, an d'eesiyo: «Tamma a Wede ti biza bumbu Dawut!» Inkinoo man, an di gulkuwe,

¹⁶wo an i di ruute, an'de: «K'ollige dey ko, munda wede an rootiyo me?» Wo Isa y'an di ruute, y'ede: «Eyye n'ollige, wo kune ki kotto kun gire munda wede an riine ti kaaga adda mattup ki Raa, an'de: “Kee k'aaze kono ti bize k'inni sunni ti don odiyo udu ton, ki d'udde tamma?”»

¹⁷Man yi'n iili, wo ti geeger yi t'udde, y'a ingile ki ille Betani y'a onno.

Duufiyo k'undumu sundi pigiyee

(Markus 11.12-14,20-25)

¹⁸Soggo ti soohe Isa yi kama ki Zeruzalem man, aame gen mosogo t'a yi ziida.

¹⁹Man yi wulle undumu sundi pigiyee a biza k'urzi, y'aa d'iide wo de y'iide'n inni umbo, yi d'uuney puutagi danjal. Inkinoo y'a ruute a undumu gen, y'ede: «Ti anki, inni ki ki t'eha ye baa!» A kaamiki pigiyee gen a-biha.

²⁰Kane sanalliyagi an wulle inġino mañ, an ziida gıggırañ wo an di ruute, an'de: «De mummino a kaamiki eñ miñ, pigiyee eñ a-biiha kino me?»

²¹Isa y'an di'n gime onamañ, y'ede: «Derec inġino wo n'un di rooto: Aame un d'ede zaapu k'adde a Raa wo adda k'addugunñ kun ki niikiyo ye mañ, kun aane kun d'ise munda wede aa ni ize a pigiyee enño. Wo kun aane sey kun i di roote a tokomo ette, "T'umayı eñ mi t'oozo mi t'ooro adda bar" toñ, geñ a t'ise.

²²Suldi ñoñ pay kun tonda Raa t'urzi zaapu k'adde a yode geñ, kun di'n t'oonaa.»

Isa yi naabiya t'urzi k'aaye?

(Markus 11.27-33; Lik 20.1-8)

²³Mañ Isa yi-t'iide a booro Boy Raa, aame geñ y'a iise dooyiso ñuwo. Inġino mañ kane deero ñoñ sedefee ti ñoñ i dokkiyo Yawudiyagi, an d'iido tuddi wo an di y' tunde, an'de: «Kee k'isiyto suldi eñ t'urzi k'aaye? Wo urzi eñ a ele wee wee?»

²⁴Isa y'an di'n gime onamañ, y'ede: «Nuñ toñ n'un di'n tondo a munda soo ñaṅṅal. Aame onamó kun o ti'n gima mañ, nuñ toñ n'un ti y' kiza urzi wede ni d'isiyto suldi eñ me.

²⁵Aame Zañ ñuwo y'anni zuyye batem geñ, urzi iido ti Raa kunuñ ti ñuwo ko? Mañ an d'iise rootiyto ti tuddañ, an'de: «Aame kine in ruuta: "Iido'ñ t'urzi Raa" mañ, yoñ y'in di roota: "Inġino ki moo me kun ki d'umbe a ono Zañ ye me?"

²⁶Wo aame kine in ruuta: "Iido'ñ t'urzi ñuwo" mañ, kine in d'ede orgiso a ñoñ duuru kono kane pay geñ an elkiyo'ñ Zañ yoñ nebi.»

²⁷Inġino mañ Isa onamí an i-ti'n gime, an'de: «Ay ki suune ye.» Wo yode Isa toñ y'an di ruute, y'ede: «Nuñ toñ mañ n'un ki y' roote ye kay, wede o ele urzi ni d'isiyto suldi eñ me.»

Ono ombide a tukk'inni sire

²⁸Isa y'a ruute sey, y'ede: «Kun ollo taaya ettiyo wo kun d'elkito eego. I d'ede wede soo inġino inñizi kuuli sire. Yoñ y'iide'ñ a uli ki kabba yi di ruute, y'ede: "Ulo ki nuñ, aṅki k'odo k'in ti wolle doome k'inda biñ.»

²⁹Yo ulo geñ yi-ti'n gime onamí, y'ede: "Aha, ni k'ette ye", wo tañ booloñ mañ i di t'ize attidi, y'a t'iide ki doome me.

³⁰Mañ meega y'a iide tukk'uli wede soo me, wo yi di ruute inġino kay. Mañ yo ulo geñ yi-ti'n gime onamí, y'ede: "Eyye mee'ki nuñ, k'oolo n'a t'ette ki doome me." Wo kaciñ y'a guune, doome y'a k'iide ye.»

³¹Mañ Isa y'a ruute, y'ede: «Ti diine kane sire geñ, wee wee i t'ize munda wede meegi yi dihe me?» Kane deero Yawudiyagi an i di'n gime onamí, an'de: «Wede ki kabba.» Inġino mañ Isa y'an di ruute, y'ede: «Derec inġino wo n'un di rooto:

Kane ɗoŋ seɗɗu jibaaye ti erayi ɗoŋ ooniyo ombo bizaŋ t'itadaŋ geŋ, an un uugume ki Moziko Raa te.

³²Ni rootiyo iŋkino kono Zaŋ Batis y'iido k'ume kune, y'un di gize urzi lekkiyo ere ki diine aa Raa yi dehu toŋ, kun ki d'umbe ye a onamí me, wo de kane ɗoŋ seɗɗu jibaaye ti erayi ɗoŋ ooniyo ombo bizaŋ t'itadaŋ geŋ, an d'umbe a onamí me. Wo kune, kun wulle ɗuwo geŋ an umbe me, wo toŋ lekkiyaguŋ kun ki ti gime ye kono kun d'ambe a onamí me.»

Ono ombide a tukki ɗoŋ naabo doome ɗoŋ ulpi

(Markus 12.1-12; Lik 20.9-19)

³³«Kun ollo ono ombide ti doolo eŋŋo: I d'ede wede doome iŋkino yi d'iite doome k'inda sundaŋ biŋ. Doome geŋ y'a ti y' ɗuule ti waaya moŋgali, y'a d'ittiba sôole ki ŋay'yu k'iŋŋi k'inda biŋ geŋŋo, y'a d'ippe boy sohuru ki boɗɗiyo. Maŋ doome geŋ y'an d'ele ɗuwo an di naabe saŋ yoŋ aggaɗi y'a t'amba, wo yoŋ tuddi y'a iŋgile torguwo.

³⁴Aame onniyo ki rakku k'iŋŋi k'inda biŋ t'iina maŋ, y'a igibe ɗoŋ naabaɗi ki tukki ɗoŋ naabo doome geŋŋo, kono an i di t'elo aggaɗi ere k'iŋŋi k'inda biŋ an rikke te.

³⁵An iiney maŋ, kane ɗoŋ naabo doome'ŋ an ti'n zidde ɗoŋ naabaɗi me: soŋ an di y' gusse baadaŋ, soŋ an di y'iide, wo wede k'aduwe an ti y' gikkite ti moŋgali y'a inda.

³⁶Wede doome'ŋ yi d'igibe ɗoŋ naabaɗi baadaŋ ti doolo a jiiire ɗoŋ ti poone, wo kane geŋŋo toŋ ɗoŋ naabo doome an an d'ize iŋkino kay.

³⁷K'ita maŋ y'an t'igibe uli wo y'a ruute t'adda k'addi, y'ede: "Yoŋ eŋ ulo k'addo, an i d'ottiley."

³⁸Wo de aame kane ɗoŋ naabo doome'ŋ ulo an yi wulle maŋ, an d'iise rootiyto ti tuddaŋ, an'de: "Eŋŋo ulo wede doome i oopa me! In y'odo kono doome eŋ y'in d'ooopa."

³⁹Maŋ ulo geŋ an di y' ziida, t'adda doome an di y'irkiɗe ki toogo ki paate, wo an di y'iide.»

⁴⁰Maŋ Isa y'a tunde, y'ede: «Iŋkino geŋ aame wede doome k'inda biŋ y'iina maŋ, y'an d'isa mummino a ɗoŋ naabo doome geŋ me?»

⁴¹Wo kane deero ɗoŋ seɗeɗe ti ɗoŋ i dokkiyo Yawudiyagi geŋ an i di'n gime onamí, an'de: «Kane ɗoŋ ulpi geŋ wede doome y'iido maŋ, yi ki wolla sommagaŋ ye, y'a ti'n t'ida wo doome k'inda biŋ geŋ, y'an t'ela a ɗoŋ doolo an di naaba, wo kane geŋ aggaɗi an i t'ela aame iina ume rakku k'iŋŋi k'inda biŋ maŋ.»

⁴²Isa y'an di ruute, y'ede: «Ki kotto kune kun gire ono don an riije ti kaaga adda mattup ki Raa, an'de: "Mokkolo ere don k'oozige boy an di zidde mentu gette, tode gettiyo a t'ize mokkolo ere majjaanawa a jire k'oozige boy te. Munda gen iido ti Galmeega Raa, wo a kine in di wolliyo'ng munda gen i jire eego."

⁴³Kono kamo kun ollo, n'un di rooto: Raa Mozikadi ti beezan y'a-t'amba wo y'an t'ela a don doolo, don aana isa naabo beehiye ere yon yi dehu.

⁴⁴Wede tuuku y'a t'iira ekki mokkolo gettiyo man, y'a-damba, wo aame mokkolo gette ti-di t'iira a wenda man, t'a ti y' noguma.»

⁴⁵Kane deero don sedeke ti Pariziyen an illiga ono ombide Isa yi rootiyo genno man, an di zuune kerey yi rootiyo ti kane me.

⁴⁶Inkino man an di dihe urzi an di y' seeda, wo de an d'urgide a don duuru kono kane duwo gen an elkiyo'ng Isa yon nebi.

Matiye 22

Ono ombide a tukki tarnaape seedu

(Lik 14.15-24)

¹Man Isa y'an di ruute sey t'ono ombide, y'ede:

²«Moziko Raa tod' ti deey'iso aa naabo mozigo y'ize tarnaape a seedu k'ere k'uli.

³Yi d'igibe don naabadi an di waako don yi'ni wiike a tarnaape seedu k'ere k'uli, wo kane an di-tuugo k'ettiyo me.

⁴Inkino man yi d'igibe don naabadi ti doolo, y'an di ruute, y'ede: "Kun'do kun an rooti a don ni'ni wiike gen, kun'de: Galmeegey y'ede: Ombo ettu t'iide baa, kun t'edi tarnaape seedu. Bunzarzo ti inni bunzari don bokkidagi iide k'aadumu mozagi ni-wildite."

⁵Wo kane don yi'ni wiike gen seezan ye, an di tiipe wede tuuku ton k'ume naabadi naabadi, son k'adda doomizi, son k'ume suukadi

⁶wo don son an di zidde don naabo mozigo, an an d'ize ulsu wo an a di'n iide.

⁷Inkino mozigo y'a gulkuwe, y'a igibe asigiryagi an t'iido kane don i t'iide don naabadi, wo geegirzan an a-t'uyyo.

⁸Man y'an di ruute don naabadi, y'ede: "Ombo tarnaape seedu ettu t'iide, wo de kane don ni'ni waaku gen an ki t'iide ye k'ombo me.

⁹Inkino man kun'do k'urziyagi k'okkime, wo don pay kun t'ooney a daanagun gen kun ti'n waaki an d'isa tarnaape seedu."

¹⁰Doŋ naabo geŋ an d'iŋgile k'urziyagi k'okkime, wo doŋ an uune pay a daanadaŋ geŋ an ti'n wiiko, doŋ beehiye ise doŋ ulpi toŋ maŋ. Geŋ iŋkino biino ki tarnaape seedu duwo an d'ũune boo.

¹¹Saŋ maŋ mozigo yi-t'iide adda biino y'a-t'eese doŋ yi'ni wiiko, aame geŋ yi woliyo maŋ wede soo yi ki t'usso'ŋ kalle ki tarnaape seedu ye.

¹²Mozigo yi di ruute, y'ede: "Laŋze ki nuŋ, kee ki-t'iido daa kalle ki tarnaape seedu mummino me?" Wo yo wede geŋ y'a k'ihina bizí ye.

¹³Iŋkino maŋ mozigo y'an di ruute doŋ naabo, y'ede: "Wede eŋ kun yi soodo, kun ti kettito beydí ti zoŋdí wo kun di sedfi ti paate adda zimolo, ume wede ki dollite m̄olo wo k'aadumu sina."»

¹⁴Maŋ Isa y'a ruute, y'ede: «Ki kotto doŋ Raa yi'ni waaku kane baadaŋ, wo de doŋ yi biire i-t'etta Mozikadí kane baata.»

Eliyo jibaaye a mozigo goole ki Romeŋ

(Markus 12.13-17; Lik 20.20-26)

¹⁵Iŋkino maŋ kane Pariziyen an a d'irga siidaŋ, an di ruute a tukk'Isa kono an i t'ekka ikka t'urzi k'onamí.

¹⁶Saŋ maŋ an d'igibe doŋ miibi ti diine sanalliyagaŋ ti kane doŋ a ita k'Erod. An iide'ŋ an i di ruute a Isa, an'de: «Wede dooyisadey, ay suune kee ki rootiyo ono doŋ derec, ki dooyiso urzi Raa t'ono doŋ derec, ki k'orgiso eda duwo ye, wo ki'ni woliyo duwo geŋ pay kaŋ soo.

¹⁷Iŋkino k'ay ki ti rooti doo, elkiyadá moo a ono eŋ me: A urzi k'oogiradiŋ miŋ jibaaye a mozigo goole ki Romeŋ geŋ k'eliyo kunuŋ, k'eliyo ye ko?»

¹⁸Wo Isa metiŋkadaŋ y'a ti zuune, maŋ y'an di ruute, y'ede: «Kune doŋ biziguŋ sire sire, de ki moo me kun o d'ekkiyo ikka me?

¹⁹Kun o k'eeli soŋko tamma ere k'eliyo jibaaye n'a ki wolle do?» Maŋ an i-d'eele tamma soo.

²⁰Wo Isa y'anni tunde, y'ede: «Undiso ti suma ekki tamma ette k'aaye?»

²¹Kane an i di'n gime onamí, an'de: «Ki mozigo goole ki Romeŋ.» Maŋ Isa y'an di ruute, y'ede: «Iŋkino maŋ munda wede ki mozigo goole ki Romeŋ yoŋ ki yode, kun i y'elo, wo munda wede ki Raa yoŋ ki yode, kun i y'elo.»

²²Aame an illiga ono geŋno maŋ, an di zida giggiraŋ. Maŋ kane an di y'iili a umayí, an d'iŋgile.

Tondiyo a urzi baldiya

(Markus 12.18-27; Lik 20.27-38)

²³A onniyo gettiyo batum don miibi ti diine don an'ni waaku sudaŋ Saduseyeŋ geŋ, an d'iide sirpa k'Isa. Kun suune kane Saduseyeŋ an rootiyo don i t'inda geŋ an ki ti balda ye. Inŋkino Isa an di y' tunde, an'de:

²⁴«Wede dooyisadey, Muusa yi riine ti kaaga adda mattup k'oogoro, y'ede: "Aame wede yi ziida erewo wo y'a inda daa magine maŋ, mandaayawa gette leemadi y'a ti seeda kono an t'ehe inŋni a suma ki wede inda geŋno."»

²⁵Inŋkino aakede di kaye i d'ede zamba kane sarat. Wede ki poone geŋ y'a ziida erewo wo y'a inda daa magine, inŋkino leemadi wede ki sirwe y'a ti ziida mandaayawa gette.

²⁶Wo leema geŋno toŋ y'a inda daa magine kay, wede k'aduwe toŋ inŋkino, maŋ kane zamba sarat geŋ an ti duude wo an t'inda pay.

²⁷Aame kane sarat geŋ pay an t'inda maŋ, tode erewo gettiyo toŋ t'aa d'inda.

²⁸Inŋkino maŋ a onniyo ere don i t'inda an ti balda geŋ, ti diine kane don sarat geŋ erewo gette t'aasa k'aaye, kono kane pay geŋ miŋ kulutu me?»

²⁹Isa y'an di'n gime onamaŋ, y'ede: «Kune kun ti digge a elkiyagun, kono kun ki'n suune ye ita k'ono don an riine ti kaaga adda mattup ki Raa, ise toogo Raa toŋ maŋ.

³⁰Derec, a onniyo ere don i t'inda an ti balda geŋ, kuuli ti erayi an ki sedda tuddaŋ ye baa, wo de an di lekkey daa seddu aa maaleekiyagi a kandaane.

³¹Wo a urzi baldiya ki don i t'inda geŋ, ki kotto kun gire ono don an riine ti kaaga adda mattup ki Raa, an'de:

³²«Nuŋ Raa k'Ibirayim, k'Isaaka wo ki Yakup.»» Isa y'a ruute sey, y'ede: «Raa geŋ yoŋ Raa ki don unto ye, yoŋ Raa ki don zeere.»

³³Kane don duuru illiga dooyisadi gette, an i ziida an di biyiso biyiso baa.

Urzi k'oogoro wede goole a jiire

(Markus 12.28-34; Lik 10.25-28)

³⁴Aame Pariziyeŋ geŋ an illiga Saduseyeŋ Isa y'an iide, bizaŋ an ki ti y'ohine ye maŋ, kane an iide'ŋ an t'ugiye kaŋ soo.

³⁵Wo wede soo ti diinayaŋ, yoŋ wede suuniyo k'oogoro, y'a d'iide sirpa k'Isa, yi dehu yi-d'ekke ikka t'urzi k'ono, wo y'a yi tunde, y'ede:

³⁶«Wede dooyisadey, adda mattup k'oogoro Muusa, urzi k'oogoro wede goole a jiire tuuku me?»

³⁷Isa yi di'n gime onami, y'ede: «"Ki geyyo Galmeega Raaza ti adda pay, ti unda pay wo ti elkiyada pay."»

³⁸Geŋ urzi k'oogoro wede goole a di jiire pay.

³⁹Wo eŋŋo wede ki sirwe toŋ, yoŋ goole aa bakadí kay, "Ki geyyo bakadá aa ki geyyiso tuddá batum."

⁴⁰Ono doŋ pay an riije ti kaaga adda mattup k'oogoro Muusa, ti doŋ ki nebiyagi geŋ, toogadaŋ tiŋ urzi k'oogoro sire eŋŋo.»

Almasi ti Dawut

(Markus 12.35-37; Lik 20.41-44)

⁴¹Koore kane Pariziyen an lekkiyo ogiyo geŋ, Isa y'an di'n tunde, y'ede:

⁴²«Elkiyaguŋ moo me a tukki Almasi Raa yi biire me? Yoŋ y'adfo ti biza bumbu k'aaye?» Kane an i di'n gime onamí, an'de: «Yoŋ y'adfo ti biza bumbu Dawut.»

⁴³Isa y'an di ruute, y'ede: «De geŋ mummino Dawut t'urzi k'Unde Raa y'a yi wiike Almasi "Galmeegi" me? Ni rootiyo iŋkino kono Dawut y'a ruute ti kaaga, y'ede:

⁴⁴"Galmeega Raa yi di ruute a Galmeego, y'ede: K'edi ki-kona a ammidadó kino, bini doŋ k'aduzá n'an isa aa munda ki bita ti dandi zoŋdá."

⁴⁵Iŋkino maŋ Dawut yi yi waaku Almasi "Galmeega." De geŋ mummino Almasi y'a adfo ti biza bumbu Dawut danŋal me?»

⁴⁶Ti diine kane Pariziyen, wenda soo toŋ i di kime onamí umbo. Wo ti onniyo gettiyo an d'urgide, an di y' tondite ti doolo sey me.

Matiye 23

Tookiyo kuude doŋ duuru ekki Pariziyen

(Markus 12.38-40; Lik 20.45-47; 11.39-52)

¹Saŋ maŋ Isa y'an di ruute doŋ duuru ti sanalliyagi, y'ede:

²«Doŋ suuniyo k'oogoro ti Pariziyen, an d'ede urzi ki dooyiso k'oogoro Muusa.

³Iŋkino maŋ kun ollo onamaŋ wo munda wede an un ruute geŋ kun t'iso. Wo de a urzi naabadaŋ kun ozire ye, kono munda wede an dooyiso geŋ an ki sooru eego ye.

⁴Kane geŋ an di'n isiyo duwo ki toogo an di daane urziyagi k'oogoro doŋ ti doolo kane batum an a zaapu t'eedaŋ t'ekki doŋ ki Raa, sarkiyatú ooŋe aakede an kettiso attidi an a di zaapu a dar duwo. Wo de a attidi geŋ, kane batum ti yilsadaŋ soo toŋ an ki dehu an a ki botte ye ki noogiyo duwo geŋ me.

⁵Kane geŋ naabadaŋ pay gette an isiyo kono duwo an di'n wolle. Iŋkino an d'isiyo munda aakede laaya a ise goole ti doŋ oŋgo an t'eliyto mattup k'oogoro

adda an a di kettiso a zumbaman̄ wo a maydayzan̄, wo a boha kallagan̄ toŋ an a d'isiyo gozubo soŋhirti i ceeriyo.

⁶Adda tarnaapagi a ume k'ombo, an geyyiso an koone a ume wede suma, wo adda boydī doŋ in di dooyiso, an geyyiso an koone a ume wede suma pây.

⁷A bere doŋ duuru toŋ, an dehu d̄uwo an di'n t'eesite ti ottilso, wo an di'n waake "Wede dooyiso, wede dooyiso."

⁸Wo kune ti diinagan̄ wenda y'oyya ye an di y' waake "Wede dooyiso" me, kono kune pay miŋ zamba kaŋ soo, wo wede dooyisagan̄ miŋ yoŋ soo daŋŋal.

⁹A siido ette wenda soo toŋ kun di y' waake "Meegey" umbo, kono kune un d'ede Meega soo daŋŋal, yoŋ a kandaane.

¹⁰Wo kune ti diinagan̄ wenda y'oyya ye an di y' waake "Mozigo" me, kono kune un d'ede Mozigo soo daŋŋal, yoŋ Almasi Raa yi biire.

¹¹Wede goole a jiire ti diinagan̄ geŋ miŋ yi koona wede naabo ki kune.

¹²Wede tuuku tuddī yi ti koliyo maŋ, yoŋ geŋ Raa y'a y'isa ñeŋku, wo wede tuuku tuddī yi ti t'isiyo ñeŋko maŋ, yoŋ geŋ Raa y'a y'isa goole.»

Dabar a kane doŋ suuniyo k'oogoro ti Pariziyen̄

¹³Isa y'a ruute sey, y'ede: «Dabar a kune doŋ suuniyo k'oogoro ti Pariziyen̄, kune doŋ bizigan̄ sire sire! Kune'ŋ a d̄uwo kun an t'appiya a biza k'ettiyo ki Moziko Raa te. Kune batum miŋ kun ki t'ettiyo ye, wo a doŋ i dehu i-t'ette geŋ kun an t'eegirso.

[¹⁴Dabar a kune doŋ suuniyo k'oogoro ti Pariziyen̄, kune doŋ bizigan̄ sire sire! Kune'ŋ bey mandaydayi kun t'ombo pay, wo kun eesiyo tonduyo Raa maŋ ki noko nokot, kono d̄uwo an un di'n wolle. Kono kamo booragan̄ t'a kooney wehini a ceerey.]

¹⁵Dabar a kune doŋ suuniyo k'oogoro ti Pariziyen̄, kune doŋ bizigan̄ sire sire! Kune'ŋ k'ume tuuku toŋ kun d'eŋgilso torquwo, a siido wo t'ekk'ahu pây, k'ooniyo wede soo daŋŋal yoŋ Yawudusu ye wo kun d'isiyo y'a t'ise Yawudusu. Wo aame yi t'isiyo Yawudusu maŋ, kun di y'isiyo wede i t'ide k'ettiyo k'adda k'uwwi i d̄ooliyo taŋ sire a jiire ti ere ki kune batum.

¹⁶Dabar a kune doŋ aa koŋzayi i dokkiyo d̄uwo, kun di rootiyo, kun'de: "Aame wedusu y'alzu ti Boy Raa maŋ, yoŋ geŋ onamī yi ki'n ziida zakidī ye toŋ i k'ise munda ye, wo aame y'alzu ti dap ere adda Boy Raa maŋ, yoŋ geŋ i dehu onamī y'anni seeda zakidī."

¹⁷Kune doŋ elkisagan̄ umbo wo aa koŋzayi, a jiire miŋ dap kunuŋ Boy Raa wede i-ti t'isiyo dap gette kamilen̄ a daana Raa ko?

18Wo kun di rootiyo sey, kun'de: "Aame wede y'alzu ti ume sedefe maŋ, yoŋ geŋ onamí yi ki'n ziidá zakidí ye toŋ i k'ise munda ye, wo aame y'alzu ti munda sedefe zaapu ekk'ume sedefe geŋno maŋ, yoŋ geŋ i dehu onamí y'anni seedá zakidí."

19Kune doŋ aakede koŋzayi no, a jiiire miŋ munda sedefe kunuŋ, ume sedefe wede i-ti t'isiyo sedefe kamileŋ a daana Raa ko?

20Geŋ iŋkino wede y'alzu t'ume sedefe maŋ, geŋ y'alzu t'ume sedefe geŋno wo ti suldí pay doŋ eego.

21Wede y'alzu ti Boy Raa maŋ, geŋ y'alzu ti Boy geŋno, wo ti Raa wede i lekkiyo adda pây.

22Wo wede y'alzu ti kandaane maŋ, geŋ y'alzu ti kaakido moziko Raa wo ti Raa wede i lekkiyo eego batum.

23Dabar a kune doŋ suuniyo k'oogoro ti Pariziyen, kune doŋ biziguŋ sire sire! Kune'ŋ a urzi zakka, kun d'eliyo zakka a Raa ki ita suldí doŋ sunni sunni i d'eliyo uŋsuwo a zaami, ise puutagi doŋ ki zaami toŋ maŋ. Wo de suldí doŋ a jiiire adda k'oogoro ki Raa, aakede munda wede kun d'ise ki diine a duwo, isiyo k'adde koduwo a duwo, ti seedu daayum zakidí a urzi Raa, kane geŋ kun d'ooliyo a kese. Ki too maŋ ki poone kane geŋno doŋ kun d'ozire eego me, wo suldí doŋ sunni sunni toŋ kun ki'n ooli ye.

24Kune doŋ aa koŋzayi i dokkiyo duwo, kune aame kun sobo ahu geŋ, tuude yi tooriro toŋ kun di y'ambu, wo kaciŋ ziŋzo toŋ kun ti soho.

25Dabar a kune doŋ suuniyo k'oogoro ti Pariziyen, kune doŋ biziguŋ sire sire! Kune'ŋ kulso ti bogoro kun t'opilso daaraŋ beehiye, wo adda'ŋ ôoniyo boo ti tama wo ti suldí doŋ ulpi tudduguŋ ti dehu.

26Kune Pariziyen doŋ aakede koŋzayi no, ki poone kulso kun t'opilo addutú kamileŋ doo miŋ, iŋkino maŋ dartú toŋ a-t'isa kamileŋ pây.

27Dabar a kune doŋ suuniyo k'oogoro ti Pariziyen, kune doŋ biziguŋ sire sire! Kun deey'iso aa muuziyagi doŋ an an t'eliyo buuye tuware k'a wolle beehiye, kaciŋ t'adda'ŋ ôoniyo boo t'ossagi ki doŋ i t'inda, ti ita suldí doŋ pay ruumiyo.

28Wo kune toŋ iŋkino, a eda duwo kun ti t'isiyo tudduguŋ kune ki diine a daana Raa, kaciŋ biziguŋ sire sire wo adduguŋ ôoniyo boo ti suldí doŋ ulpi.

29Dabar a kune doŋ suuniyo k'oogoro ti Pariziyen, kune doŋ biziguŋ sire sire! Kun aabuđu muuziyagi majjandani ki nebiyagi ti kaaga, wo a kane doŋ ki diine muuziyagaŋ kun ti'n raaniya murkic ti buuye,

30wo kun d'eesiyo: "Aame ti eda moŋgidagey geŋ kaye ede maŋ, ay a ki ti kette kaŋ soo ye ti doŋ tôwwo nebiyagi me."

31A onamguṅ ti suldi ḍoṅ kun isiyo geṅ, i-kaza kune itaguṅ soo ti ḍoṅ îide nebiyagi me.

32De iṅkino maṅ, kun d'odo t'iṅkino aakede ki maawuguṅ g'aaze!

33Kune aa mimbayi wo ḍoṅ ulpi aakede maṅkikagi, ki kotto kun ki t'alda ye, booro t'un di'n seeda k'adda k'uwwo.

34Kono kamo kun ollo, n'un t'igibo nebiyagi ti ḍoṅ suuniyo k'oogoro, wo ḍuwo ḍoṅ un di'n dooya urzi Raa. Ḍoṅ soṅ kun ti'n t'îda, ḍoṅ oṅgo kun ti'n taakita ekk'inda ḍoṅ zappu ekk'eebaṅ kaṅ tontilko, ḍoṅ oṅgo soṅ kun di'n gorpipa ti marpa adda boydi ḍoṅ kun di dooyiso, wo kun di'n limmita geeger ti geeger.

35T'ume k'eesiyo duniya bini aṅki, kune Yawudiyagi kun îide ḍoṅ ki diine baadaṅ, wo kono ki puuzadaṅ gette kune Raa y'un ti'n t'ela daṅgay. Ki poone kun îide Abel wede ki diine, saṅ ḍoṅ ti doolo bini Zakari ulo Barasi wede kun y'îide adda booro Boy Raa, a diine Boy Raa ti ume sedeke.

36Derec iṅkino wo n'un di rooto: Kane ḍoṅ aṅkenṅo eṅ Raa yi ti'n t'ela daṅgay kono ki puuzo kane pay gette.»

Môolo k'Isa kono Zeruzalem

(Lik 13.34-35)

37«Wayya kune ḍoṅ Zeruzalem no! Wayya kune ḍoṅ Zeruzalem no! Kune ḍoṅ i t'ôwwito nebiyagi, wo ḍoṅ Raa y'un akkisa kun ti'n kakkisa ti moṅgali kun ti'n t'ôwwo. Nuṅ taṅ baadaṅ baadaṅ n'a dihe n'un ti'n tusse aa ôsso ti tussiyo inṅitú adda kambartú, wo ḍe kun ki dihe ye!

38Iṅkino maṅ boyguṅ Raa y'un di y'oola.

39Wo kun ollo n'un di rooto, ti aṅki nuṅ kun ki n' wolla ye baa, bini a t'îda onniyo ere kun di roota: “Beeko Raa ti koona a ekki wede ettiyo ti suma Galmeega Raa.”»

Matiye 24

Ono a urzi ruugiyo Boy Raa

(Markus 13.1-4; Lik 21.5-7)

1Isa yi t'udde t'adda booro Boy Raa wo yi dehu y'eṅgile maṅ, kane sanalliyagi an a d'iide sirpadí kono an i di kize majjaanika k'oozige Boy Raa.

2Maṅ Isa y'an di ruute, y'ede: «Pay eṅ kun wolliyi ḍe'ṅ? Wo derec n'un di rooto, mukkolo soo toṅ t'ekki bakatú i ki lekka ye, pay a ruuga.»

Eesiyo ki dabar ere baadaṅ

3Isa y'iiney ekki mukkolo k'Inda k'Olibiye, maṅ y'a-guune siidí. Aame geṅ sanalliyagi an a d'iide sirpadí wo an di y' tunde, an'de: «Kee k'ay ki ti rooti

ɗoo, sulɗi geɗ an aana woogo me? Wo moo me munda wede a kiza urzi kamada ti onniyo ere duniya ti ɗaɗga me?»

⁴Isa y'an di'n gime onamaɗ, y'ede: «Kun koono mentikagi, wenda soo toɗ y'un ti'n dagga ye.

⁵Derec, i d'etto ɗoɗ baadaɗ an t'ambo sundó, wede tuuku toɗ y'a t'eesa: "Nuɗ Almasi Raa yi biire!", wo kane geɗ an di dagga ɗuwo baadaɗ.

⁶Kun d'olliga tarkuuse ki arka goppon, wo kun d'olliga rabila k'arka dokki. Aame geɗ kun koono mentikagi, kun addira ye. I dehu sulɗi geɗ an d'aane, wo aame geɗ a ki t'isa ɗaɗgiya duniya ye botto.

⁷Doɗ siido soo ti siido soo te an ɗeyya ti tuddaɗ, ɗoɗ mozigo soo ti mozigo soo me an ɗeyya ti tuddaɗ kay. I d'isa mosogo ti ɗoɗɗirso siido adda siidiyagi baadaɗ.

⁸Wo kane sulɗi pay geɗ, aakede kakkisa ere ki poone k'erewo addutu i t'umbe k'ehiyo.

⁹Iɗkino maɗ ɗuwo an un di'n t'ela bey ɗoɗ k'adugun kono an un di'n dabira wo an un ti'n t'ida. Wo kane ɗoɗ siidiyagi pay an un di'n olmiɗa kono kun umbe a sundó.

¹⁰Aame geɗ ɗoɗ baadaɗ urzi zaapu k'addaɗ a nuɗ an d'oola, kane geɗ an d'odɗipa ita tuddaɗ ki sedɗuzaɗ, wo an d'olmiɗa tuddaɗ.

¹¹I d'adɗa ɗoɗ baadaɗ an ti t'isa tuddaɗ aa nebiyagi, wo kane geɗ an dagga ɗoɗ baadaɗ.

¹²A ume tuuku toɗ sulɗi ɗoɗ ulpi geɗ an d'aagila k'aagulu, iɗkino geyyiso tudde toɗ t'a t'isa baata.

¹³Wo ɗe wede y'a ziida zakidi a urzizo bini ɗaɗgu maɗ, yode geɗ Raa y'a y'utta.

¹⁴I dehu Rabila Majjaanawa ki Moziko Raa gette an di kizite adda siidiyagi pay, wo kane ita ɗuwo pay toɗ an di t'olliga ti kuudaɗ ɗoo miɗ, saɗ duniya t'a ɗaɗga kollo.»

Onniytagi ɗoɗ etto ki dabar baadaɗ

(Markus 13.14-23; Lik 21.20-24)

¹⁵«Kune kun di wolla munda wede ulsu k'a y'azzira wo yi lattiya, geɗ a-t'etta a ono ɗoɗ ti kaaga nebi Daniyel yi ruute, munda geɗ an ti y' zaapa adda Boy Raa a ume wede kamilen. Wede i gariya ono eɗ eedí ti'ni soodo beehiye.

¹⁶Aame geɗ kane ɗoɗ adda siido Ziide an t'ombo k'ekki moɗgali.

¹⁷Wede y'a ti gili yi-guune t'ekki ɗaɗgayadi maɗ, yoɗ geɗ yi-ɗeega ambu munda adda ɗaɗgay ye, yi t'ombo.

18Wo wede yoŋ adda doome maŋ, yi t'ombo, yi kima boy ambu kallayí wede goole ye.

19A onniytagi geŋ aasa dabar baadaŋ a kane erayi doŋ mahuwagi ti doŋ inŋizan an oodiyo!

20Kun tondo Raa kono okkaguŋ t'a k'isa a ume reele, ise a onniyo ere ki puukiyadiŋ ye.

21Inkino maŋ dabar gette t'aasa ooŋe baadaŋ. T'ume k'eesiyo duniya bini aŋkeŋŋo, dabar inkino i k'ize ye, wo ki d'aana toŋ i k'isa ye.

22Aame onniytagi doŋ ki dabar geŋ Raa y'a ki'n ihira goppon ye maŋ, wede tudde soo toŋ umbo a lekka zeere me. Wo ki kotto onniytagi geŋ y'an ôhira goppon kono doŋ yi biire ki yode.

23Inkino maŋ aame wenda y'iisa: "Almasi Raa yi biire, yoŋ a eŋŋo!" ise "Yoŋ a ummey!" maŋ, kune onamí kun amba ye.

24Ni rootiyo inkino kono i d'adda duwo an ti t'isa tuddaŋ aa Almasi Raa yi biire, wo ti duwo an ti t'isa tuddaŋ aa nebiyagi. Kane geŋ an d'isa suldi k'armika ti suldi doŋ i ceeriyo eego, aame urzi ede maŋ kane an di dagga duwo doŋ Raa yi biire ki yode, wo an ki d'aana ye.

25Kun ollo, suldi eŋ n'un ti'n ruute ki poone an d'aana.

26Inkino maŋ, aame an un ruuta, an iisa: "Kun ollo, Almasi Raa yi biire, yoŋ adda balda!" maŋ, kun'ta ye, ise wenda y'un ruuta, y'iisa: "Kun ollo, yoŋ yi t'umbida a eŋŋo!" toŋ maŋ, kun amba ye a onamí me.

27Derec, aa kun wolliyo mizzi y'omile i-ti tooriyo kandaane ti kese peedo gekoliyo bini peedo k'ooriyo geŋ, aaniya ki nuŋ wede an n'ehe aa ulo wede eŋŋo toŋ, t'aasa inkino kay.

28A ume wede nuune yi t'udiga geŋ, zumbi toŋ ti t'ogiya aŋgeŋŋo.»

Kama ki yo wede an y'ehe aa ulo wede

(Markus 13.24-31; Lik 17.23-24; 21.25-31)

29«Onniytagi doŋ ki dabar geŋ an t'ingila lewwet maŋ, peedo ti ki toora ye, tere yi ki toora ye, moldali an sildita ti kandaane, wo suldi doŋ an d'ede toogo a kandaane, Raa y'a ti'n gozziga.

30Aame geŋ a kandaane i d'isa munda a kiza kama ki nuŋ wede an n'ehe aa ulo wede eŋŋo. Inkino ita duwo pay adda duniya an dillita molo wo an di n' wolla nuŋ wede an n'ehe aa ulo wede eŋ, ni kama ti kandaane ekki dondirso ti toogo ere pay wo ti daryika ere o d'ede.

31Maaleeka y'a baaha parre ti kandaane, n'a t'igiba maaleekiyagó k'adda siidiyagi don a duniya itatú pide, an di t'ogiya don ni biire.»

Ono ombide a tukki tormo

(Markus 13.28-31; Lik 21.29-33)

32«Kun wollo wo kun elko a ono ombide don a tukki tormo ettiyo: Aame tormo t'eesiyo oddize wo puutagutú eesiyo roobiyo man, geñ kune kun suune adda k'addugun kizini yon goppon.

33Geñ inkinno kay, kune ton kun wulla suldi pay geñ an iina man, kun suuno kama ki nun wede an n'ehe aa ulo wede en tod'te goppon, aakede nun a biza bumbugun.

34Derec inkinno wo n'un di rooto: Don ankenno en an ki ti t'inda pay ye, ki poone suldi pay geñ an d'aana me.

35Kandaane kane ti siido an t'engila, wo kane onamó an ki t'engila ye, an di lekka ki daayum.»

Raa siidi i ti suune onniyo te

(Markus 13.32,35; Lik 17.26-27,34-35; 12.39-40)

36«Wo suldi geñ an aana a onniyo tuuku koo, a peedo ere tuuku koo man, i suune yode Meega Raa siidi. Wenda doolo yi ki suune ye, ise maaleekiyagi a kandaane, ise Ulo Raa ton man.

37Munda wede ize ti kaaga a ozzinagi don ki Nowe geñ, a kama ki nun wede an n'ehe aa ulo wede enno ton, aasa inkinno kay.

38Adda k'onniytagi don ti kaaga ki poone mizzi goole y'a koppa, ahu an t'ooma siido geñ, duwo an d'ombo, an sobo, an seddu ti tuddan bini onniyo ere Nowe yi-t'iide adda tooko ere meeda a jiiere.

39Kane ulban an k'oodiyo a munda ye bini mizzi goole y'a guppe, ahu an t'iimi siido, inkinno duwo geñ pay an t'inda adda k'ahu. Geñ aasa inkinno kay a kama ki nun wede an n'ehe aa ulo wede en me.

40Inkinno man kuuli sire kane adda doome soo, wede soo geñ an di y'amba wo wede son an di y'oola.

41Erayi sire an massu kan soo, ere soo an ti t'amba wo ere soo an di t'oola.

42Inkinno kun lekko zeere, kono kun ki suune ye onniyo ere tuuku nun Galmeegugun ni kimo te.

43Ono en kun ollo koduwo: Aame wede boy geñ yi suune peedo ere tuuku a diddo wede k'oogire y'etto man, y'a lekke zeere, yi k'ooli wede k'oogire yi-ki t'ette k'adda boozí ye.

⁴⁴Geŋ iŋkino kune toŋ maŋ kun koonaa mentikagi, kono nuŋ wede an n'ehe aa ulo wede eŋ, n'etto a peedo ere tuuku kun ki ti suune ye.»

Wede naabo i seedu zakidi a naabadi

(Lik 12.42-46)

⁴⁵«Iŋkino maŋ wede naabo wede i seedu zakidi a naabadi wo i-d'ede elkiyo geŋ, a yode geŋno galmeegi yi oola attidi pay ki doŋ naabadi ongoŋ me, kono y'an t'ela ombadaŋ aame peedo t'iida maŋ.

⁴⁶Uŋsuwo a wede naabo geŋ me, aame galmeegi a kamadi yi y'uuna y'isiyo naabo gettiyo maŋ.

⁴⁷Derec iŋkino wo n'un di rooto: Wede iŋkino geŋ galmeegi yi di t'ela attidi ki suldzizi pay a beezi.

⁴⁸Wo de aakede wede naabo ulsu geŋ y'ilka adda k'addi, y'iisa: "Galmeego eŋ yi t'usso",

⁴⁹wo yi t'iida taazu doŋ an naabiya kaŋ soo, wo yi t'ussa a ombo ti sobito t'eebi doŋ i sobo i ceeriyo eego.

⁵⁰Maŋ galmeegi y'a aana a onniyo ere wede naabo geŋ yi k'elkiyo ye, wo a peedo ere yi ki ti suune ye.

⁵¹Galmeegi yi di t'ela dangay ere zakidi wo yi-t'ela aggadi aa ki doŋ bizaŋ sire sire, a ume wede ki dollite molo wo k'aadumu sina.»

Matiye 25

Ono ombide a tukki konazi koomat

¹Isa y'a ruute sey, y'ede: «Iŋkino maŋ Moziko Raa tod' ti deeyiso aa naabo konazi kane koomat an di zikiti lampiyagaŋ an t'iide okkime ki kule yi seedu erewo.

²Ti diine kane konazi geŋ, doŋ paat soŋ elkiyadaŋ umbo wo doŋ paat soŋ an d'ede elkiyo.

³Kane konazi doŋ elkiyadaŋ umbo geŋ lampiyagaŋ an t'uunite t'egay wo ti doolo an a ki d'umbe ye a bezaŋ me.

⁴Wo kane konazi doŋ an d'ede elkiyo geŋ, lampiyagaŋ an t'uunite wo an a d'iipe egey adda kuŋgilagaŋ.

⁵Wo yo wede i seedu erewo geŋ yi-t'usso y'a k'iina kesiko ye, iŋkino maŋ kane konazi geŋ moone t'an di'n ziida pay, an d'udige kuy.

⁶A diddo meeda maŋ an d'illiga d'olle, an'de: "Kun ollo, kule wede i seedu erewo y'ettiyo! Kun t'addi okkimayi!"

- ⁷Injino maŋ kane konazi pay geŋ an t'innite wo lampiyagaŋ an di'n ikkima.
- ⁸Kane doŋ elkiyadaŋ umbo geŋ, an tunde a bey doŋ an d'ede elkiyo, an'de: "Kun ay eeli egayguŋ kono lampiyagey i t'unto."
- ⁹Wo kane doŋ an d'ede elkiyo geŋ an an di'n gime onamaŋ, an'de: "Aha, in ki t'ida ye! Kun'do k'ume k'owilte, kun owili a kune me."
- ¹⁰Kane an d'ingile an d'owilo egey me, koore geŋ yo kule wede i seedu erewo, y'a iina. Maŋ kane konazi doŋ paat i t'ikkima tuddaŋ geŋ, an t'iide k'adda boy tarnaape seedu ti yode kaŋ soo, wo biza y'an t'ippe ti kerle.
- ¹¹Saŋ maŋ kane konazi doŋ elkiyadaŋ umbo geŋ an d'iina, an d'iise dollite, an'de: "Galmeegey, Galmeegey, k'ay t'ohon!"
- ¹²Wo de yoŋ y'an di'n gime onamaŋ, y'ede: "Derec injino wo n'un di rooto: Kune aŋ wenda n'un ki'n suune ye."»
- ¹³Maŋ Isa y'a ruute, y'ede: «Injino maŋ kun lekko zeere, kono onniyo tuuku ise peedo tuuku ere n'etto kun ki ti suune ye.»

Ono ombide a tukki doŋ naabo afo

(Lik 19.12-27)

- ¹⁴«Wo soŋ Moziko Raa gette tod' ti deey'iso aa naabo wede boy injino, yi dehu y'engile torguwo. Ki poone y'a engila geŋ, y'a wiike doŋ naabadí y'an d'ooli laalayí a bezaŋ.
- ¹⁵A wede soŋ yi d'ele tammiyagi ki dap dupu paat, a wede soo yi d'ele tammiyagi ki dap dupu sire wo a wede soŋ yi d'ele tammiyagi ki dap dupu soo, a wede tuuku toŋ yi-d'eele a toogadí toogadí, maŋ yoŋ tuddí y'a ingile.
- ¹⁶Wede galmeegí yi ele tammiyagi dupu paat geŋ, kesiko y'a ingile yi naabiya eego t'aa d'aagulu wo y'a d'uune t'eego tammiyagi dupu paat sey.
- ¹⁷Wede galmeegí yi ele tammiyagi dupu sire toŋ injino, y'a ti niibe y'a d'uune t'eego tammiyagi dupu sire.
- ¹⁸Wo wede galmeegí yi ele tammiyagi dupu soo geŋ, y'a ingile y'iide'ŋ yi d'ittiba olde a siido wo soŋko galmeegí yi-t'umbida adda.
- ¹⁹Galmeeki doŋ naabo geŋ yi likko bini maŋ, saŋ y'a aaho wo y'a dihe y'a wolle soŋko ere doŋ naabadí an i di t'ele.
- ²⁰Wede galmeegí yi ele tammiyagi dupu paat geŋ, y'a d'iide sirpadí, yi-d'ele tammiyagi dupu paat doŋ y'uune t'eego geŋno, wo yi di ruute, y'ede: "Galmeeki nuŋ, kee k'o iili tammiyagi dupu paat n'a niibe, n'aa d'uune tammiyagi dupu paat ti doolo, aŋken enno ki wollo."

²¹Maɗ galmeegí yi di ruute, y'ede: "Geɗ koɗuwo kee wede naabo beehiye ki seedu zakidí a naabadá, kee a naabo ere booloɗ gettin k'a ti ziida zakidí, aɗkeɗ n'a-ki ti zaapo a naabo ere baadaɗ. K'edi, k'isa unɗuwo ti nuɗ galmeegá."

²²Saɗ maɗ wede galmeegí yi ele tammiyagi dupu sire geɗ, y'a d'iide sirpadí yi di ruute, y'ede: "Galme'e'ki nuɗ, kee k'o ili tammiyagi dupu sire n'a niibe, n'aa d'uune tammiyagi dupu sire ti doolo, aɗkeɗ enno ki wollo."

²³Maɗ galmeegí yi di ruute, y'ede: "Geɗ koɗuwo kee wede naabo beehiye ki seedu zakidí a naabadá, kee a naabo ere booloɗ gettin k'a ti ziida zakidí, aɗkeɗ n'a-ki ti zaapo a naabo ere baadaɗ. K'edi, k'isa unɗuwo ti nuɗ galmeegá."

²⁴Maɗ wede galmeegí yi ele tammiyagi dupu soo geɗ, y'a d'iide sirpadí yi di ruute, y'ede: "Galme'e'ki nuɗ, ni suune kee wehini a naabo me, ki d'ayɗu a ume wede ki ki giira ye, wo ki sokiyo a ume wede ki ki zire ye toɗ maɗ."

²⁵Inkino n'a urgide, n'iide'ɗ ni d'ittiba olde a siido, tammiyagi dupu soo geɗ ni t'umbida adda, aɗkeɗ laalayá enno ki wollo."

²⁶Wo galmeegí yi di'n gime onamí, y'ede: "Kee wede naabo ulsu wo golge, ki suune ni d'ayɗu a ume wede ni ki giira ye, wo ni sokiyo a ume wede ni ki zire ye."

²⁷Inkino ki moo me soɗkadó k'o gi di ziipe adda baɗki ye me, t'o d'aagila, a kamadó geɗ n'iido n'a-t'ambe ti jugulu."

²⁸Inkino y'an di ruute a kane doɗ a sirpadí geɗ, y'ede: "Tammiyagi dupu soo geɗ kun ti soodo, kun i elo a wede i-d'ede tammiyagi dupu koomat."

²⁹Derec, a wede i-d'ede geɗ, an i-t'eela t'eego i di t'isa baadaɗ a ceera, wo de a wede i-k'ede ye geɗ, mundazí wede booloɗ y'elkiyo yi t'oona toɗ an i-t'amba.

³⁰Wo ki yo wede a naabo kontilme geɗ, kun di seddi ti paate adda zimolo, ume wede ki dollite molo wo k'aadumu sina."»

Booro ere a onniyo k'ita

³¹«A onniyo k'ita nuɗ wede an n'ehe aa ulo wede en, n'a-kimo adda mozikadó ti maaleekiyagi pay geɗ, n'a di koonaa a kaakido moziko adda daryikadó.

³²Ita duwo pay an di t'ogiya a daanadó, wo duwo n'a ti'n dokkida sire aakede wede k'elso y'ahuntu moode ti dambami.

³³N'an ooya kane doɗ aa dambami a beezó k'ammade, wo kane doɗ aa moode a beezó ki geelo.

³⁴Inkino maɗ nuɗ mozigo n'an di roota a kane doɗ a ammidadó, n'a t'eesa: "Kun'di kune doɗ Meegó Raa y'un ti ziipe beeko, kun t'odo a Moziko Raa, tod'te yoɗ y'un t'ikkima a kune, t'ume k'eesiyo duniya too."

³⁵N'un rootiyo iŋkino kono aame nuŋ mosogo, ombo kun o d'eele, aame nuŋ ôrme, ahu kun o d'eele, aame nuŋ torgusu, kun di n' ziida bey sire.

³⁶Aame nuŋ bontiliŋ, kun di n' usse, aame nuŋ tuddó eeni kun t'iide tondiyadó, wo aame nuŋ adda daŋgay toŋ kun t'iide wolliyadó."

³⁷Iŋkino maŋ kane doŋ ki diine an o ti'n kima onamó, an t'eesa: "Galmeegey, woogo me kaye ay gi di wulle kee mosogo wo ay a d'eele ombo me, ay gi di wulle kee ôrme wo ay a d'ele ahu me,

³⁸ay gi di wulle kee torgusu wo ay gi di ziida bey sire me, ay gi di wulle kee bontiliŋ wo ay ki ti k'usse me?

³⁹Woogo me kaye ay d'illiga kee tuddá eeni wo ay d'iide tondiyadá me, ay d'illiga kee adda daŋgay wo ay d'iide wolliyadá me?"

⁴⁰Wo nuŋ mozigo n'an di'n kima onamaŋ, n'a t'eesa: "Derec iŋkino wo n'un di rooto: Aame tuuku kun ize munda soo a wede soo ti diine zembadó duwo an i k'eliyo suma ye geŋ, geŋ kun ize a nuuno."

⁴¹San maŋ nuŋ mozigo n'an di roota a kane doŋ a geeladó, n'a t'eesa: "Kune doŋ eggun duudiyo, kun ti ledfo ti tuddó me, kun engilo k'adda k'uwo ere t'oggiyo ki daayum, Raa yi mudfe a Meeda siitandani ti maaleekiyagutu.

⁴²Dabar gette kun uune kono aame nuŋ mosogo, ombo kun o k'eele ye, aame nuŋ ôrme, ahu kun o k'eele ye.

⁴³Aame nuŋ torgusu geŋ kun ki n' ziida bey sire ye, aame nuŋ bontiliŋ geŋ kun gi di n'usse ye, aame nuŋ tuddó eeni wo adda daŋgay geŋ wolliyadó kun k'iide ye."

⁴⁴Iŋkino maŋ kane toŋ an o ti'n kima onamó, an t'eesa: "Galmeegey, woogo me kaye ay gi di wulle kee mosogo ise ôrme, torgusu ise bontiliŋ, ise ay d'illiga kee tuddá eeni ise adda daŋgay wo ay gi di nuuge ye me?"

⁴⁵Maŋ nuŋ mozigo n'an di'n kima onamaŋ, n'a t'eesa: "Derec iŋkino wo n'un di rooto: Aame tuuku munda soo kun k'ize ye a wede soo ti diine kane doŋ duwo an i-k'eliyo suma ye geŋ, kune kun k'ize ye a nuuno."

⁴⁶Wo kane geŋ an t'etta k'adda dabar ere ki daayum, wo kane doŋ ki diine an t'oona lekkiyo ere ki daayum.»

Matiye 26

Dehutu k'urzi ki tôwwo k'Isa
(Markus 14.1-2; Lik 22.1-2; Zaŋ 11.47-49,53)

¹Isa dooyisadí pay gette y'a ti diŋge maŋ, y'an di ruute a sanalliyagí, y'ede:

²«Kune kun suune tarnaapayin̄ ki Pak geṅ a guute onniyo sire maṅ y'a adfa, aame geṅ nuṅ wede an n'eh̄e aa ulo wede eṅ an di n' seeda, an di n' t'ela a bey doṅ k'olmidayó, an ti n' taaka ekk'undumu wede zaapu t'ekki bakadí kaṅ tontilko.»

³A onniyo gettiyo batum deero doṅ sedefe ti kane doṅ i dokkiyo Yawudiyagi an t'ugiȳe adda boy ki mozigo goole doṅ sedefe sundí Kayip.

⁴Kane geṅ an t'iide onamaṅ pay kaṅ soo, Isa an di y' seeda ti metiṅko ki tōwwadí.

⁵Wo kane an di ruute, an'de: «Yoṅ in ki y' seeda adda tarnaape kino ye, para maṅ doṅ duuru an in di'n t'ooziga ono.»

Obe k'eḡey doṅ eediyadaṅ uṅse ekk'Isa

(Markus 14.3-9; Zaṅ 12.1-8)

⁶Isa yoṅ a ille ki Betani adda boy ki Simo wede ti poone yoṅ ki bitife,

⁷an di guune ombo. Aame an ti guune geṅ, i d'ede erewo t'a d'iide sirpa k'Isa, a beytú ulo diṅgile an ikkima ki moko sun dutú albaatir, adda egey doṅ eediyadaṅ uṅse zooyayaṅ ooṅe baadaṅ, ti-t'ibi ekk'Isa.

⁸Kane sanalliyagi an wulle iṅkino maṅ, ulbaṅ an ki t'ize uṅse ye, an di rootiyto diinayaṅ, an'de: «De ki moo me ti ti'n lattiya egey me?»

⁹Egey geṅ in aane in t'owila ti zooye wede ooṅe baadaṅ, wo in an t'ele soṅko gette a doṅ an k'ede munda ye.»

¹⁰Isa y'a zuune munda wede an rootiyto me, maṅ y'a ruute, y'ede: «Erewo kun i-t'ooḍe ulbutú ye, kono munda wede t'o ize geṅ a nuṅ uṅse.

¹¹Kane doṅ an k'ede munda ye geṅ an lekka daayum ti kune, wo de nuṅ ni ki lekka daayum ti kune ye.

¹²Tod' t'ibi egey doṅ eediyadaṅ uṅse a tuddó eṅ, aakede ti n'ikkima ki poone an di n' t'ela adda muuzo.

¹³Derec iṅkino wo n'un di rooto: A omagi pay adda duniya an kizita Rabila Majjaanawa geṅ, erewo ette duwo an t'ida taaya a naabo ere tod' t'ize, wo sun dutú a ki danda ye.»

Ziidas ti deero doṅ sedefe

(Markus 14.10-11; Lik 22.3-6)

¹⁴I d'ede wede soo ti diine sanalliyagi kane koomat makumu sire yoṅ sundí Ziidas Iskariyot. Yoṅ y'iide y'a uuney kane deero doṅ sedefe,

¹⁵wo y'an di ruute, y'ede: «Kun o-t'ela moo me, aame Isa n'un y'ela a beyguṅ maṅ?» Maṅ kane geṅ an i di ruute an i di t'ela tamma ada g'ado.

16T'ume geŋ Ziidas y'a iise dehuu k'urzi wede kaŋ mummino y'an di y' t'ela Isa a beezan me.

Isiyo k'ombo tarnaape ki Pak

(Markus 14.12-16; Lik 22.7-13)

17Onniyo ere ki poone ki tarnaape Yawudiyagi wede an d'ombo mappa daa k'orme gette t'iina maŋ, kane sanalliyagi an aa d'iide k'ume k'Isa an di y' tunde, an'de: «A too me ki dehu ay in d'isey ombo tarnaapayin ki Pak te?»

18Yoŋ y'a ruute, y'ede: «Kun'do k'adda geeger di wede kino, kun t'odoy di yode wo kun i di rootoy, kun d'eesoy: “Wede dooyisadey y'ede, yoŋ onniyadi goppon, wo di kee ay isa tarnaapayin ki Pak ti sanalliyagi me.”»

19Kane sanalliyagi an t'ize munda wede Isa y'an ruute me, inkiino ombo tarnaape ki Pak an t'ize.

20A peedo t'a t'iire maŋ, Isa ti sanalliyagi kane koomat makumu sire geŋ an di guune ombo.

21Aame an ombo geŋ Isa y'a ruute, y'ede: «Derec inkiino wo n'un di rooto: Wede soo ti diinaguŋ y'a ni t'ela bey doŋ k'olmidayó.»

22Kane sanalliyagi an t'ize sommagi dondoŋ, wo wede tuuku toŋ yi di y' tonduyo, yi d'eesiyo: «Galmeeki nuŋ, nuuno ko, nuuno ko?»

23Yoŋ y'an di'n gime onamaŋ, y'ede: «Wede ay igibe beezey kaŋ soo adda k'ooko eŋ, yode i ni t'ela bey doŋ k'olmidayó me.

24Derec, nuŋ wede an n'ehe aa ulo wede eŋ n'a t'inda, geŋ a-t'etta a ono doŋ an riije ti kaaga adda mattup ki Raa a tukki nuuno. Wo de dabar a yode wede i ni t'ela bey doŋ k'olmidayó, nuŋ wede an n'ehe aa ulo wede eŋ me! Yode geŋ, an ki y'ehe adda duniya ye toŋ bee!»

25Ziidas wede i t'ela Isa a bey doŋ k'olmidayí geŋ, y'a yi tunde, y'ede: «Wede dooyisadó, nuuno ko?» Isa yi ti'n gime onamí, y'ede: «Geŋ aa ki ruute.»

Ombo ti sobo i-kaza tudde ti puuzo k'Almasi

(Markus 14.22-25; Lik 22.15-20; 1 Korent 11.23-26)

26Aame an ombo geŋ, Isa y'a t'umbe mappa, y'a ruute koduwo a Raa kono k'ombo gette, maŋ y'a burke, y'an d'ele sanalliyagi wo y'a ruute, y'ede: «Ooho kun soodo, kun t'oomo, ette tuddó.»

27Saŋ y'a t'umbe kop ti sobo adda, y'a ruute koduwo a Raa kono sobo gette, maŋ y'an d'ele wo y'a ruute, y'ede: «Ooho kun soodo, wede soŋ yi d'oobo d'oobo.

28Ette puuzadó, puuzo ki taasuwa ere Raa y'a ketta ti duwo, to t'oba ki doŋ baadaŋ kono an t'ona tambobino k'oldikadaŋ.

29Wo kun ollo, n'un di rooto, n'a t'iibe ti aŋki, ki ɗaana ni ki siba ye baa toote k'iŋni biŋ me, bini onniyo ere ni siba ti kune sey geŋ toote wede aware k'iŋni biŋ a moziko Meegó Raa.»

30Aame an t'iimi an aa t'iibe maŋ, an d'ûure ôrdari tarnaape ki Pak, saŋ an t'udfe an d'iŋgile k'ekki mukkolo k'Inda k'Olibiye.

Rootiyo k'Isa a urzi koogirayí

(Markus 14.26-31; Lik 22.33-34,39; Zaŋ 13.37-38)

31Maŋ Isa y'an di ruute a sanalliyagí, y'ede: «A didfo ettiyo batum, kune pay kun di n' kiigira a munda wede o aana geŋ me, kono ono eŋ an riŋe ti kaaga adda mattup ki Raa, an'de: “Wede k'elso n'a yi t'ida, wo torfo dambami a-teepa.”»

32Isa y'a ruute sey, y'ede: «Wo ɗe saŋ Raa yi ti n' bildfa maŋ, n'un d'ooguma kun di n' t'ooney a siifo Galile.»

33Maŋ Piyer y'a t'ihina bizí, y'a ruute, y'ede: «Aame ɗoŋ pay an ki giigira a munda wede a aana toŋ, nuŋ ti kee tak ni ki kiigira ye.»

34Isa yi di ruute, y'ede: «Derec iŋkino wo n'a di rooto: A didfo ettiyo batum, ki poone uzu y'a ôola geŋ, k'a roota ki ki n' suune ye, suune ye taŋ aɗo.»

35Maŋ Piyer yi di ruute, y'ede: «Ato, ni ki kiigira ye, aame ise k'unto toŋ n'a t'inda ti kee!» Wo kane sanalliyagi ɗoŋ soo toŋ an a-ti ruute iŋkino kay.

Isa yoŋ a Zesimaane

(Markus 14.32-42; Lik 22.40-46)

36Saŋ Isa ti sanalliyagi an d'iiney a ume sundí Zesimaane, wo y'an di ruute, y'ede: «Kun ti koono kino, koore n'a-ledfe n'a tondey Raa geŋ me.»

37Maŋ ti yode y'a-wiike Piyer t'iŋni kuuli sire ki Zebede. Aame geŋ y'a t'ize sommagi dondoŋ wo ulbí i-d'oodiyo baadaŋ.

38Iŋkino yo y'an di ruute, y'ede: «Nuŋ eŋ sommagi dondoŋ aa n'a t'inda, kun ti koono kino wo kun di lekko zeere ti nuuno.»

39Wo yo y'a-lidfe dokki booloŋ ti kane me, maŋ y'a t'uttile zumayí a siifo, y'a iise tondiyo Raa, y'ede: «Mee'ki nuŋ, aame i t'ise maŋ kop ki dabar eŋ k'o ti y' ledfo ti tuddó me, wo toŋ maŋ pay geŋ a ki t'ise aa nuŋ ni dehu ye, wo a t'ise aa kee ki dehu.»

40Saŋ y'a-gime ki tukki sanalliyagi ɗoŋ aɗo geŋno, wo yi'n uuna an udige. Maŋ Isa y'a t'inne Piyer wo yi di ruute, y'ede: «Kune'ŋ ki peedo soo toŋ kun k'iine kun ki likke zeere ti nuŋ ye!

⁴¹Kun lekko zeere wo kun tondo Raa, kono kun ki t'ooraa adda naamiya daggiya ye. Wede tudde geɗ a elkiyadi yi dehu y'aase munda wede beehiye, wo de tuddi toogatu baata.»

⁴²Ki sirwe Isa y'a-lidde siidi sey, wo y'a iise tonduyo Raa, y'ede: «Mee'ki nuɗ, aame kop ki dabar eɗ k'o ti y' ledde ti tuddo i ki t'ise ye n'a dabire do maɗ, i t'iso aa kee ki dehu.»

⁴³Maɗ y'a-gime k'ume sanalliyagi sey, yi'n uuna an urme, edayaɗ an zida moone.

⁴⁴K'aduwe Isa yi'n iili y'a-lidde siidi sey, wo y'a iise tonduyo Raa inkiyo sey.

⁴⁵Maɗ y'a-gime ki tukki sanalliyagi wo y'an di ruute, y'ede: «Kune kun moone pi, wo kun d'udigo baa! Ankeɗ peedo i guute goppon, wo nuɗ wede an n'ehe aa ulo wede eɗ, an n'ele a bey don k'oldiko.

⁴⁶Kun t'oozo, in engile! Kun wollo, wede i ni t'ela a bey don k'olmidayo yi t'uddo.»

Seedu k'Isa

(Markus 14.43-52; Lik 22.47-53; Zaɗ 18.2-11)

⁴⁷Isa onami y'a ki ti'n dinge ye botto, aame geɗ Ziidas wede soo ti diine sanalliyagi kane koomat makumu sire geɗ, yi t'uddo ti don duuru a itadi, a beydan kasigara ti dalyagi. Kane geɗ i'n igibo deero don sedeke ti don i dokkiyo Yawudiyagi.

⁴⁸Yo wede y'an di y' t'ela Isa a bey don k'olmidayi geɗ, y'an di ruuto don duuru a munda wede y'aasey kono an di suuney eɗ Isa me, y'ede: «Wede kun wulley ni izey puuc a tobbisadi maɗ, geɗ yode kun di y' soodoy.»

⁴⁹Kesiko Ziidas y'a y' zikke Isa kabban wo yi di ruute, y'ede: «Toosada wede dooyisado!» Maɗ yi d'ize puuc a tobbisadi.

⁵⁰Isa yi di ruute, y'ede: «Lanze ki nuɗ, munda wede k'iido k'aase, ki y'iso.» Inkiyo maɗ kane don duuru an d'iiziga tuddi, an di y' zida.

⁵¹Maɗ wede soo ti diine don i daaniya Isa, y'a t'iidiba kasigaradi, y'a-diikida wede naabo ki mozigo goole don sedeke, kuudi a dikke.

⁵²Inkiyo maɗ Isa yi di ruute, y'ede: «Kasigarada ki ti t'elo saapatu, kono don pay i deyyiso ti kasigara geɗ untadan ton ti kasigara.

⁵³Kee ki k'elkiyo ye, para'n ni dehu ni deyye maɗ, n'a tonde Meego Raa wo a kaamiki y'o-t'igibo maaleekiyagi dupiyagi baadan?

⁵⁴Wo de n'aase inkiyo maɗ, geɗ ono don an riije ti kaaga adda mattup ki Raa a tukki nuuno a ki t'ette ye. Geɗ i t'iso aa an rootiyo.»

⁵⁵Aame geɗ Isa y'an di ruute a ɗoɗ duuru, y'ede: «De ki moo me kun d'ettiyo seeduzó wo tuddugun kun t'ikkimo ti kasigaryagi wo ti dalyagi, aa nuɗ wede k'oogire me? Para maɗ nuɗ miɗ daayum ni ti konso ni dooyiso a booro Boy Raa, wo kun gi di n' ziida ye.

⁵⁶Wo de sulɗi pay geɗ a iina kono a-t'ette a ono ɗoɗ nebiyagi an riije ti kaaga adda mattup ki Raa.» Maɗ kane sanalliyagi pay an di y'iili, an t'umbe.

Isa a ɗaana deero booro Yawudiyagi
(Markus 14.53-65; Lik 22.54-55,63-71; Zaɗ 18.12-18)

⁵⁷Kane ɗoɗ i ziida Isa geɗ an di-t'iide di Kayip mozigo goole ɗoɗ seɗeke, a ume wede ɗoɗ suuniyo k'oogoro ti ɗoɗ i dokkiyo Yawudiyagi an t'ugiy.

⁵⁸Wo Piyer yi di y' daaniya Isa ti dokki, bini y'a iiney boy ki mozigo goole ɗoɗ seɗeke, maɗ yi-t'iide y'a-guune a booro ti ɗoɗ naabo kono y'a wolle mummino a ti ɗaɗga me.

⁵⁹Kane deero booro Yawudiyagi pay ti deero ɗoɗ seɗeke, an di dehuu ɗuwo an di rootite ono butte a tukk'Isa kono booro t'a yi seeda ki t'owwadi.

⁶⁰Doɗ baadaɗ an iide'ɗ an di ruute ono butte a tukki yode, wo toɗ munda an ki d'uune ye wede i di t'iide k'unto me. K'ita maɗ i d'iido ɗoɗ sire

⁶¹an di ruute, an'de: «Ay y'illiga wede eɗ yi ruute, Boy Raa eɗ y'aane y'a kossite, wo adda k'onniyo ado y'a y'ooziga sey.»

⁶²Maɗ mozigo goole ɗoɗ seɗeke y'a t'iiziga, yi di ruute a Isa, y'ede: «Ono ɗuwo an rootiyo a tukki kee eɗ, kee ki ki roote munda ye ko?»

⁶³Wo yo Isa yi d'annugu ɗeɗɗek. Maɗ mozigo goole ɗoɗ seɗeke yi di ruute, y'ede: «Nuɗ ni dehu k'a di naame tudda ti suma Raa zeere, k'ay ki ti rooti ɗo, kee Ulo Raa, wo Almasi Raa yi biire ko?»

⁶⁴Isa yi di'n gime onami, y'ede: «Geɗ aa ki ruute. Wo kun ollo, n'un di rooto: Ti aɗki kun di n' wolla nuɗ wede an n'ehe aa ulo wede eɗ, n'a-kooney a ammade Raa toogadi t'a jiiire pay wo kun di n' wolla n'a-kimo ekki dondirso a kandaane.»

⁶⁵Iɗkino maɗ mozigo goole ɗoɗ seɗeke yi-ti gulkuwe, kallagi y'a zittite, wo y'a ruute, y'ede: «Yoɗ geɗ yi gilɗe suma Raa. In ki dehe wenda ti doolo wede illiga y'in ki roote sey ye baa! Kun illiga ti kuudugun yi gilɗe suma Raa me.

⁶⁶Kune elkiyagun moo me?» Kane an i di'n gime onami, an'de: «Munda wede yoɗ y'ize eɗ i-iide ki t'owwo.»

⁶⁷Iɗkino maɗ an d'iise padɗita lee a edayi wo an di gohiso kutuba. Doɗ oɗgo an di y' battisa,

⁶⁸an d'eesiyo: «Kee Almasi Raa yi biire, kee nebi mañ, ki y'unto wede i ki diiñe me!»

Piyer y'a kiigira Isa

(Markus 14.66-72; Lik 22.56-62; Zañ 18.17,25-27)

⁶⁹Aame geñ Piyer yi-guune ti paate a booro boy, mañ i d'ede ere naabo t'a d'iide sirpadí ti di ruute, t'ede: «Kee toñ ti Isa wede ti siido Galile, kune soo.»

⁷⁰Wo de Piyer y'a yi giigira a daana duwo pay, y'a ruute, y'ede: «Koñ munda wede mi rootiyo geñ ti nuuno ye!»

⁷¹Sañ mañ y'a t'iiziga y'a t'adde, y'a t'ette ki biza bumbu, aame geñ ere naabo ti doolo t'a yi wulle wo t'an di ruute a kane don a sirpatú, t'ede: «Yode eñ ti Isa wede ti geeger Nazaret, kane soo.»

⁷²Piyer y'a yi giigira sey wo y'a-ti nñime tuddí, y'ede: «Wede eñ ni ki y' suune ye!»

⁷³Tañ booloñ mañ don a ume geñ an aa d'iide sirpa Piyer, an i di ruute, an'de: «Ki kotto, kee toñ wede soo ti diine kane sanalliyagi k'Isa, ay ki zuune t'urzi golladá.»

⁷⁴Inkino mañ Piyer y'a-ti nñime tuddí, y'ede: «Wede eñ ni ki y' suune ye! Para mañ ono don ni rootiyo eñ derec ye mañ, a golladó!» Wo a kaamiki uzu y'a ñile.

⁷⁵Aame geñ Piyer y'a ilke a ono don Isa yi ruute, y'ede: «Ki poone uzu y'a ôola geñ, k'a roota ki ki n' suune ye, suune ye tañ afo.» Mañ t'adda boy Piyer yi-t'udde ti paate wo y'a iise molo baadañ.

Matiye 27

Isa an di-t'ette k'ume Pilat

(Markus 15.1-2; Lik 22.66; 23.1; Zañ 18.28)

¹A biza soohe mañ kane deero don sedeke pay ti don i dokkiyo Yawudiyagi, an t'ugiyee an di ruute a tukk'Isa, a urzi wede booro t'a yi seeda ki tôwwadí.

²Mañ an ti y' gittite, tiñ geñ an di t'iide, an i di y'ele a bey Pilat, yoñ Romen goole siido.

Unto Ziidas

³Ziidas wede y'an d'ele Isa a bey don k'olmidayí geñ, yi wolliyóñ Isa booro ti y' ziida ki tôwwa, mañ i di t'ize attidí. Y'a ziki tamma ada g'ado gette, y'an d'iide deero don sedeke ti don i dokkiyo Yawudiyagi,

⁴wo y'an di ruute, y'ede: «Nuñ ni t'ize oldiko, n'un di y'ele wede i k'ize oldiko ye a beyguñ.» Wo de kane an di ruute, an'de: «Kaye seezey ye, a wollo kee baa.»

⁵Inkino maŋ Ziidas soŋko y'a zibbe adda Boy Raa, wo y'a ingile, y'iide'ŋ y'a zuuye.

⁶Soŋko gette kane deero doŋ sedefe an ti ziki wo an di ruute, an'de: «Soŋko ette, oogiradiŋ ti k'ele urzi ye in a-t'obi a korbite Boy Raa me, kono tod'te zooye ki puuzo.»

⁷Inkino an t'iide onamaŋ kaŋ soo, maŋ soŋko gette an t'iwila doome ki wede k'aabuđu, kono k'ottibe torgagi aŋgeŋŋo.

⁸Geŋ kono k'inkino bini aŋki toŋ, doome geŋ an di y' waaku sundí «doome puuzo.»

⁹Geŋ a iina kono a-t'ette a ono doŋ Raa y'a ruute ti kaaga ti bize nebi Zeremi, y'ede: «An t'umbe soŋko ere tamma ada g'ado te, geŋ zooye wede doŋ k'Izirayel an ti wulle maŋ, an d'iyye eego wede eŋ zooyayí i t'iide ki soŋko ettiyo daŋŋal.

¹⁰Wo ti soŋko gette an t'iwila doome ki wede k'aabuđu, geŋ a-t'ette a munda wede Galmeege Raa y'o ruute n'aase.»

Isa a daana Pilat

(Markus 15.2-15; Lik 23.2-5,13-25; Zaŋ 18.28–19.16)

¹¹Isa an di-t'iide ki daana goole siido. Aame geŋ goole siido y'a y'iise tondiso, y'ede: «Kee mozigo Yawudiyagi ko?» Isa yi di'n gime onamí, y'ede: «Geŋ aa ki rootiyo.»

¹²Wo de a ono doŋ deero doŋ sedefe ti doŋ i dokkiyo Yawudiyagi an rootiyto a eedí geŋ, yoŋ yi k'ohine bizí ye.

¹³Inkino maŋ Pilat yi di ruute, y'ede: «Ki k'ollige ye ko, ono doŋ pay an rootiyto a tukki kee eŋ me?»

¹⁴A ono doŋ an rootiyto pay geŋ, a ono soo toŋ Isa yi k'ihina bizí ye, inkino maŋ goole siido y'a ziida giggirí baadaŋ.

¹⁵Aa daayum goole siido yi d'isiyo a tarnaape ki Pak maŋ, y'an d'adfiya t'adda daŋgay wedusu soo wede doŋ duuru an dehu.

¹⁶Wo aame geŋ adda daŋgay i d'ede wede soo sundí Barabas, sundí ti molo.

¹⁷Inkino Pilat y'a tunde doŋ duuru i t'ugiye, y'ede: «Kun dehu miŋ n'un t'addo Barabas kunuŋ, ni-d'eezo Isa wede an yi waaku Almasi Raa yi biire ko?»

¹⁸Pilat yi rootiyo inkino kono yi suune, kane deero doŋ sedefe Isa an i y'ele beezí kono an kolbiso ti yode.

¹⁹Koore yoŋ konso ekki kaakido booro geŋ, eddí ti-d'igibe ti di ruute, t'ede: «A ono ki wede ki diine eŋ, ki t'ela eedá ye, kono nuŋ te a diddo ni dibire baadaŋ a urzi suniye a tukki yode.»

²⁰Kane deero doŋ sedeke ti doŋ i dokkiyo Yawudiyagi geŋ, an an t'elite ono a doŋ duuru an d'iyye an di roote Pilat y'an t'adde Barabas wo Isa ki tówwadí.

²¹Yo goole siido y'a tunde doŋ duuru, y'ede: «Ti diine kane sire eŋ, kun dehu n'un t'addo wee wee?» Maŋ kane an i di'n gime onamí, an'de: «K'ay t'addi Barabas!»

²²Pilat y'anni tunde, y'ede: «De Isa wede an yi waaku Almasi Raa yi biire geŋ, kun dehu ni-d'ise mummino me?» Maŋ kane pay an i ti'n gime onamí, an'de: «Ki ti y' taako ekk'undumu wede zaapu t'ekki bakadí kaŋ tontilko!»

²³Pilat y'anni tunde sey, y'ede: «De munda ulsu miŋ y'ize moo me?» Wo kane an di dollite baadaŋ ki baadaŋ, an'de: «Ki ti y' taako ekk'undumu wede zaapu t'ekki bakadí kaŋ tontilko!»

²⁴Aame Pilat yi wulle onamí an k'ollige ye wo i t'ooziga deyyiso maŋ, yi d'eezi ahu y'a t'upile beezí a daana doŋ duuru, wo y'a ruute, y'ede: «Wede i k'ize munda ye eŋ n'un di y'elo, wo puuzadí ti k'ooapa eedó ye.»

²⁵Kane doŋ duuru pay an i ti'n gime onamí, an'de: «Eyye, kaye t'innizey pay puuzadí t'ooopo edey.»

²⁶Inkino maŋ Pilat y'an di y'udde Barabas me, wo y'an di ruute a asigiryagi Isa an ti y' girpipe ti marpa, saŋ y'an di y'ele an ti y' taake ekk'undumu wede zaapu t'ekki bakadí kaŋ tontilko.

Isa asigiryagi an y'okko maade
(Markus 15.16-20; Lik 23.11; Zaŋ 19.2-3)

²⁷Inkino maŋ kane asigiryagi ki goole siido, an di-t'iide Isa k'adda boy ki goole siido, wo eebaŋ asigiryagi ti doolo toŋ baadaŋ an a-ti'n wiiko pay, an di ti duule.

²⁸Kallagí an t'idcipe wo an d'umbe kalle wede goole teeze, an i di t'usse.

²⁹An di gini kadumul k'ahimagi an i-t'usse eedí, wo a beezí k'ammade an i d'ele koyile. Maŋ an di dikkite a daanadí, an di y'okko maade, an d'eesiyo: «Toosadá mozigo Yawudiyagi no! Toosadá mozigo Yawudiyagi no!»

³⁰An di padfita lee a tuddí, wo koyile wede a beezí an di ziida an di y'oggiso eedí.

³¹Aame an ti y'ukke maade maŋ, kalle wede goole an t'iidiba wo an i di t'usse kallagí. Maŋ Isa kane an ti y' dukke, an di t'ette kono an ti y' taakey ekk'undumu wede zaapu t'ekki bakadí kaŋ tontilko.

Taakiya k'Isa ekk'undumu

(Markus 15.21-32; Lik 23.26-43; Zaŋ 19.16-24)

³²A adđiyadaŋ ti geeger, an a-t'ikkima ti wede soo iŋkino yoŋ ti geeger Sireŋ, sundí Simo. Asigiryagi an di y'ize ki toogo y'a t'umbe undumu taakiya k'Isa.

³³Maŋ an d'iiney a ume wede sundí Golgota, i-kaza ume aa osse k'eego.

³⁴A ume geŋ, a Isa an i d'eele toote k'inŋi biŋ kalsiya ti munda kadigi y'a sibe. Yi y'uwwe maŋ, y'a-tuuge ki sobo me.

³⁵Kane asigiryagi an ti y' tiike ekk'undumu wede zaapu t'ekki bakadí kaŋ tontilko, saŋ kallagí an di dikkida t'urzi k'arbu teltel muntelliyo [kono a-t'ette a ono doŋ nebi yi ruute ti kaaga, y'ede: «Kallagó an di dikkida, wo kallayó wede goole an t'irbe teltel muntelliyo].

³⁶Maŋ an di guune aŋgeŋŋo, an di y' boohiyo.»

³⁷T'ekk'eedí an tiike pakirte wo an a-ti riŋe, an'de: «Yode eŋ Isa, mozigo Yawudiyagi.» Geŋ munda wede i-d'ide untadí.

³⁸Wo a sirpadí an a-tiike doŋ k'oogire sire, wede soŋ t'undumzí a kese k'ammidadí, wo wede soŋ t'undumzí a kese geeladí.

³⁹Doŋ adđiya tiŋ geŋŋo, an di y' kaldíta wo an deŋilso eedaŋ,

⁴⁰wo an d'eesiyo: «Kee wede k'ede Boy Raa k'a kossita wo adda k'onniyo ado k'a y'ooziga geŋ, kee Ulo Raa kotto maŋ, k'utto tuddá batum wo t'ekk'undumu wede zaapu t'ekki bakadí kaŋ tontilko, ki ti deegi!»

⁴¹Kane deero doŋ sedefe, doŋ suuniyo k'oogoro ti doŋ i dokkiyo Yawudiyagi toŋ, an di y'okko maade kay, an d'eesiyo:

⁴²«Yoŋ doŋ doolo y'an di'n utte miŋ, yi k'aane tuddí batum yi ki t'utte ye! Yoŋ mozigo ki doŋ k'Izirayel kotto maŋ, aŋkeŋŋo t'ekk'undumu geŋ yi ti deegi, iŋkino ay zaapa addey a yode.

⁴³Yoŋ yi ziipe addí a Raa wo Raa yi y' giyye kotto maŋ, aŋkeŋ yi y'utto baa, kono yi ruute, yoŋ Ulo Raa!»

⁴⁴Kane doŋ k'oogire doŋ an tiike a sirpadí toŋ, an di y' kaldíta iŋkino kay.

Unto k'Isa

(Markus 15.33-39; Lik 23.44-48; Zaŋ 19.28-30)

⁴⁵T'ume peedo t'ize diine geŋ, adda siido pay ume a t'ize zimolo dil a likke bini eesiyo peedo lohe.

⁴⁶A eesiyo peedo lohe maŋ, Isa y'a idili ti golla awwa, y'ede: «Eli, Eli, lama sabaktani.» Geŋ i-kaza: «Raa ki nuŋ, Raa ki nuŋ, moo me ki ni giigira me?»

⁴⁷Doŋ oŋgo ti diine doŋ i lekkiyo aŋgeŋno geŋ, an d'illiga wo an di ruute, an'de: «Kun ollo kay, yi waaku nebi Eli.»

⁴⁸Kesiko wede soo ti diinayan y'a ukke yi d'umbe sooso, yi di zulpe adda toote suddo k'inŋi k'inda biŋ, maŋ yi-t'ele a biza koyile, yi-t'usse bize k'Isa y'a suuy'e.

⁴⁹Wo kane doŋ oŋgo an di ruute, an'de: «K'a dello, in gi di wolla do Elizi wenda y'etto yi y'utta maŋ.»

⁵⁰Isa y'a idili sey ti golla awwa, maŋ y'a iili undi t'a t'udde, y'a-t'ihe.

⁵¹Aame geŋ alboy wede i dikke adde Boy Raa soŋ k'adda soŋ ki paate geŋ, a t'ihina tar t'awwa a ti diige les. Siido t'a nuŋŋire, zombali a t'ihinte,

⁵²muuziyagi a t'ihinte, wo doŋ ki Raa baadaŋ doŋ i t'inda geŋ an di bilde.

⁵³Kane doŋ i t'inda toŋ ti muuziyagan an t'uddite wo aame Isa yi bilde maŋ, an t'iide ki Zeruzalem geeger ere kamilen wo doŋ baadaŋ an di'n wulle.

⁵⁴Goole k'asigiryagi meeda ki Romen ti doŋ a itadi i boohiyo Isa, an wulle noŋŋirso siido ti suldi doŋ ize geŋno maŋ, orgiso t'anni ziida baadaŋ wo an di ruute, an'de: «Wede eŋ Ulo Raa ki kotto!»

⁵⁵A ume geŋ i d'ede erayi baadaŋ doŋ i diino Isa ti siido Galile nee kono an i di naabiya, kane an t'ihirte ti dokki an di wolliyo munda wede isiyo.

⁵⁶Ti diinayan i d'ede Mariyam ere ti siido Magdalla, Mariyam mekki Zak ti Yusup, wo soo te mekk'inŋi kuuli ki Zebede.

Eliyo nuune k'Isa adda muuzo

⁵⁷A peedo t'ette k'ooriyo maŋ, wede sundi Yusup ti geeger k'Arimate geŋ y'a iina, yoŋ geŋ wede bey wo sanallusu k'Isa Almasi pay.

⁵⁸Yode geŋ y'iide'ŋ, y'a uuney goole siido Pilat, y'a tunde nuune k'Isa kono y'a t'ottiba. Inŋino maŋ Pilat y'a iyye, y'an di ruute a asigiryagi nuune an i-d'ele.

⁵⁹Yusup y'iide'ŋ, nuune'ŋ y'a t'umbe, y'a ŋilpe ti sotor aware tuwarwa kar.

⁶⁰Yi-t'ele adda muuzo aware ere ki yode batum, tod'te aa urmi an ittiba mukkolo. Maŋ y'a-ti duŋkile a biza muuzo zumbulu yeepiyo wo y'a ingile.

⁶¹Aame geŋ Mariyam ere ti siido Magdalla wo ti bakatu Mariyam kay, an diguune aŋgeŋno, edayan ki biza muuzo.

Boohiyo muuzo k'Isa

⁶²Suldi geŋ ize a onniyo jima duwo an okkime tuddan kono onniyo ere ki puukiyo Yawudiyagi ti t'eesa. A onniyo ere ki puukiyo maŋ, kane deero doŋ sedeke ti Pariziyen geŋ an d'ingile kaŋ soo di Pilat. An iide'ŋ

⁶³an di ruute, an'de: «Galmeegey, kaye ay ilke yo wede daggiya duwo en, yi ruute aame yo zeere, y'ede saŋ yi d'isa onniyo sire k'aduwe y'a balda.

⁶⁴Iŋkino maŋ k'an rooto a asigiryagi an di boohey muuzo bini onniyo k'aduwe, koo sanalliyagí nuune an t'oodiba wo a duwo an t'eesa: "Isa yi bilde ti diine doŋ unto me." Maŋ daggiya duwo ere k'ita ette t'a ceera ere ki poone.»

⁶⁵Pilat y'an di ruute, y'ede: «Asigiryagi enno, kun'do muuzo kun boohoy aa kun ollige.»

⁶⁶Iŋkino maŋ an d'iŋgile wo biza muuzo an a-ti liŋye wo an di zippe asigiryagi an di boohiyo.

Matiye 28

Baldíya k'Isa Almasi

(Markus 16.1-8; Lik 24.1-11; Zaŋ 20.1,11-18)

¹Onniyo ere ki puukiyo Yawudiyagi i t'iŋgile. A onniyo dumas ti soohe maŋ, Mariyam ere ti siido Magdalla ti bakatú Mariyam an t'iide an di wollo muuzo.

²A kaamiki, siido t'a ŋuŋŋire baadaŋ, maaleeka ki Galmeega Raa y'a diigo ti kandaane, y'iide'ŋ zumbulu ti biza muuzo y'a ti y' d'uŋkile kese wo y'a-ti guune t'eego.

³Yoŋ tuddí i ralita aa omile mizzi, wo kallayí tuware kar aa kuube.

⁴Maŋ kane asigiryagi i boohiyo muuzo, orgiso t'anni ziida baadaŋ, an d'iise ŋoŋŋirso wo a t'ibi a siido aa an t'inda.

⁵Maaleeka y'a t'ihina bizi wo y'an di ruute erayi, y'ede: «Kune'ŋ, kun orgide ye. Ni suune kun dehu Isa wede an yi tiike ekk'undumu wede zaapu t'ekki bakadí kaŋ tontilko me.

⁶Yoŋ a enno ye, Raa yi ti y' bilde ti diine doŋ unto me, aakede y'a ruute. Kun'di, kun wolla ume an ziipe nuunayí toŋ enno.

⁷Aŋkeŋ kun'do kesiko, kun an ti kazoy sanalliyagí, kun d'eesoy: "Yoŋ ti diine doŋ unto Raa yi ti y' bilde, wo aŋkeŋ y'unni delliyo a siido Galile, a ume geŋ kun di y' wolley." Geŋ iŋkino ono doŋ o d'ede n'un di ruute.»

⁸Maŋ erayi ti biza muuzo kesiko an di-gime, addaŋ i-t'ûune t'orgiso wo t'uŋsuwo baadaŋ, an d'ukke kono an an d'ette ti rabila a sanalliyagi k'Isa.

⁹A kaamiki Isa y'iide'ŋ, y'an ikkima wo y'an di ruute, y'ede: «Toosaguŋ.» Kane erayi an a d'iide sirpadí, an di dikke, an a-ti ziide zoŋdí wo an i d'uttile.

¹⁰Iŋkino maŋ Isa y'an di ruute, y'ede: «Kun orgide ye, kun'do kun an ti rootoy a zembadó geŋ an t'odoy ki siido Galile, an di n' wolley a ummey.»

Taaya ki ɗoŋ i boohiyu muuzo

11Koore kane erayi a urzi botto geŋ, asigiryagi miibi ti diine ɗoŋ a buuhe muuzo geŋ an t'iide k'adda geegeer, an an t'iide taaya a deero ɗoŋ sedefeke a sulɗi ɗoŋ pay ize geŋ me.

12Maŋ kane deero ɗoŋ sedefeke ti ɗoŋ i dokkiyo Yawudiyagi an t'ugiyee an t'iide onamaŋ kaŋ soo, saŋ an an d'ele soŋko baadaŋ a asigiryagi,

13wo an an di ruute, an'de: «Kun rooto a ɗuwo'ŋ: "Sanalliyagi wede eŋ an iido a didɗo, nuune an t'uugira aame kaye ay moone geŋ me.»

14Aame ono geŋ goole siido y'illiga toŋ maŋ, kaye ay d'isa t'urzi tuuku toŋ addi a yi-ti'n t'assa kono munda un ki d'aana ye.»

15Kane asigiryagi geŋ soŋko an di ziida, wo an di diine ono ɗoŋ an an ruute. Inŋkino maŋ, rabila gette a-tiipe a diine Yawudiyagi bini aŋki.

Isa yi kaza tuddi a sanalliyagi

16Maŋ kane sanalliyagi k'Isa ɗoŋ koomat makumu soo geŋ, an d'ingile siido Galile k'ekki makkolo ere Isa y'an ruute an d'ette.

17A ume geŋ Isa an di y' wulle, maŋ an t'uttile wo ɗoŋ oŋgo ti diinayaŋ an d'ede niiku adda k'addaŋ.

18Isa y'a d'iide sirpadaŋ wo y'an di ruute, y'ede: «Toogo pay Raa y'o ele a kandaane wo a siido toŋ maŋ.

19Inŋkino maŋ kun'do ki tukk'ita ɗuwo pay kun di'n isoy sanalliyagó, kun ti'n suyyoy batem ti suma Meega, ti suma k'Ulo wo ti suma k'Unde Kamileŋ.

20Wo kun di'n dooyoy an seeda sulɗi ɗoŋ pay n'un ruute kun d'ise, wo nuŋ n'a lekka daayum ti kune, bini onniyo ere duniya ti ɗaŋga.»

Markus

Markus 1

Zaŋ Batis yi kazita rabila k'Almasi

(Matiye 3.1-6, 11-12; Lik 3.1-6, 15-18)

- ¹Kun ollo ette eesiyo Rabila Majjaanawa k'Isa Almasi Ulo Raa.
- ²Ono eŋ an riije ti kaaga adda mattup ki nebi Ezayi, an'de: «Kun ollo, n'a t'igiba wede zindó y'a ooguma ki poone ti kee, y'a di t'okkimey urzizá.
- ³Iŋkino maŋ doŋ an d'ollige golla ki wedusu yi d'ollite adda balda, yi d'eesiyo: Kun i t'okkoŋ urzi Galmeega, erkiyagí kun i ti'n okkoŋ ki diine delele.»
- ⁴Geŋ aa Ezayi y'a ruute, Zaŋ Batis y'a iina yi lekkiyo adda balda. Doŋ an d'ettiyo tuddí, y'an di kazita, yi d'eesiyo: «Kun ti kama lekkiyagun, an un ti'n suyyo batem wo Raa y'un t'isa tambobino a oldikagun te.»
- ⁵Doŋ baadaŋ ti siido Ziide wo ti geeger Zeruzalem an d'ettiyo tukki Zaŋ. An t'oodibe addaŋ a urzi k'oldikadaŋ a daana duwo pay, wo yoŋ yi-ti'n suyyiso batem adda k'ooye Zurden.
- ⁶Zaŋ geŋ kallayí y'ossiyo an indigo k'ilali ziŋzo, wo ser a tooni ki golmodo. Ombadí gannoori ti madde.
- ⁷Y'an di kazita duwo, yi d'eesiyo: «I d'ede wede ettiyo k'itadó yoŋ toogo yi jiiire nuŋ, wo ni k'iide n'a ki t'ottile n'a ki t'eeze sibe tobiyagí ye.
- ⁸Nuŋ n'unni suyyiso batem t'ahu, wo yoŋ y'unni suyya batem t'Unde Kamileŋ.»

Suyyiso batem wo naamiya daggiya k'Isa

(Matiye 3.13-17; Lik 3.21-22)

- ⁹Aame geŋ Isa y'a iide ti geeger Nazaret siido Galile, wo Zaŋ y'a ti y' zuyye batem adda k'ooye Zurden.
- ¹⁰Aame Isa y'adfiya t'adda k'ahu, yi wulle kandaane a t'ihina, wo Unde Raa ti deegu ti kandaane aa deere t'a di guune a tuddí.
- ¹¹Wo y'a illiga golla ettiyo ti kandaane t'a ruute, t'ede: «Kee Ulo nuuno, ni ki giyye baadaŋ, ulbó unse ti kee me.»
- ¹²Yi t'udde t'ahu maŋ, a kaamiki Unde Raa t'a-di t'iide k'adda balda.
- ¹³A ume geŋ y'a likke onniyo ada pide ti seydi. Aame yi lekkiyo geŋ, Meeda siitandani t'a yi niime daggiya, wo kane maaleekiyagi Raa ti yode, an i di naabiya.

Sanalliyagi doŋ ki poone

(Matiye 4.12-17; Lik 4.14-15)

¹⁴Onniyo soo Zaṅ an ti y' ziida daṅgay, maṅ Isa y'a iṅgile siido Galile yi kazita Rabila Majjaanawa ki Raa,

¹⁵y'ede: «Onniyo t'îide, wo Moziko Raa t'iina gopponṅ. Kun ti kama lekkiyagunṅ, kun ambo a Rabila Majjaanawa ettiyo.»

¹⁶Onniyo soo Isa yi sooru a biza bar ki Galile, maṅ yi d'uuney zemba sire, Simo ti leemadî Andire. An kakkiya lembidagaṅ k'adda bar kono kane naabadaṅ sawwiya puuni.

¹⁷Maṅ Isa y'an di ruute, y'ede: «Kun ni daani, wo nuṅ n'un di'n isa doṅ dehuṅ duwo kono an d'etto k'urzizó.»

¹⁸A kaamiki lembidagaṅ an d'iili, an di y' diine.

¹⁹Tiṅ geṅ Isa y'a iide ki dfaana booloṅ maṅ, yi d'uuney Zak ti leemadî Zaṅ inṅi Zebede, kane adda tooko an okkime lembidagaṅ.

²⁰Aame geṅ y'a ti'n wiike, maṅ kesiko meegaṅ Zebede an di y'iili adda tooko ti doṅ naabo me, wo kane an di y' diine.

Wede i-d'ede siitan a eedî

(Lik 4.31-37)

²¹Saṅ maṅ an d'iṅgile ki geeger Kapernayim. A onniyo ere ki puukiyo Yawudiyagi maṅ, Isa y'a t'îide k'adda boy wede Yawudiyagi ge dooyiso, y'a iise dooyiso duwo.

²²Dooyisadî gette t'an di'n ziida, kono yoṅ yi dooyiso ti toogo suuniyo ere ki yode batum, wo aakede ki doṅ suuniyo k'oogoro ge ki dooyiso ye.

²³Adda boy geṅ i d'ede wedusu i-d'ede siitan a eedî, y'a idîli, y'ede:

²⁴«Isa wede ti geeger Nazaret, ki dehu moo me a tukki kaye me? Kee k'iido daggiyadey ko? Nuṅ ni ki suune, kee Wede Kamileṅ Raa y'igibo.»

²⁵Iṅkino maṅ Isa y'a t'idîise siitan gette, y'ede: «M'a t'appa bizî, wo mi t'addo ti tukki wede me!»

²⁶Siitan gette t'a-ti yi zihite wede me, wo t'a-t'udde ti dollite.

²⁷Doṅ pay an ziida gaggiraṅ, an d'iise rootiyto ti tuddaṅ, an'de: «Eṅ moo me? Dooyiso ette aware aa ki wede adda toogo kino me! Siitandani toṅ y'an di rootiyo an t'addde, wo an d'ollige onamî!»

²⁸A kaamiki geṅ rabila k'Isa a-tiipe adda siido Galile pay.

Eliyo beeko a doṅ k'eeni baadaṅ

(Matiye 8.14-15; Lik 4.38-39)

- 29** Saŋ maŋ aŋ Isa an t'ufde t'adda boy wede Yawudiyagi ge dooyiso me, an t'iide daŋ Simo kane ti Andire, wo Zak ti Zaŋ toŋ ti kane.
- 30** An iiney maŋ an t'uuney ande Simo ekk'oŋgali i-ti d'iire, aame geŋ an i di ruute Isa kono tode.
- 31** Y'a d'iide goppon ki tuddutú, yi ziida beytú y'a-t'iiziga. A kaamiki ooriyo t'a t'iili, wo t'an d'iise naabiya.
- 32** A peedo t'a t'iire maŋ, tiŋ geŋ duwo an i di ziko doŋ k'eeni ti doŋ an d'ede siitandani a eedaŋ.
- 33** Doŋ geeger pay geŋ an t'ugiyee a biza bumbu boy wede Isa adda.
- 34** Y'an d'ele beeko a doŋ k'eeni baadaŋ i dabirsa wede tuuku toŋ t'ita k'eenizi k'eenizi, wo siitandani baadaŋ y'an ilmiti. Yoŋ y'an k'ooliyo urzi a siitandani an ki d'orba ye, kono kane an yi suune yoŋ Isa wee wee me.
- 35** Soggo maŋ, y'a ziiha ti diddo k'adda balda kono y'a tondey Raa.
- 36** Ume i wiyye maŋ, Simo ti doŋ a itadi an t'iide dehuzi.
- 37** Aame an y'uune maŋ, an i di ruute, an'de: «Doŋ pay an ki dehu.»
- 38** Maŋ Isa y'an di ruute, y'ede: «In t'odo k'illiyagi goppon geŋŋo, rabila gette a kane toŋ n'an di ti kizey kay, kono nuŋ n'iido miŋ k'injino.»
- 39** Maŋ Isa y'a-t'izire siido Galile gette pay, yi kazita ono Raa a boydi doŋ Yawudiyagi ge dooyiso, wo siitandani yi-ti'n lommite.

Eliyo beeko a wede bitide

(Matiye 8.1-4; Lik 5.12-16)

- 40** I d'ede wede bitide y'a iide k'ume k'Isa, y'a-dikke a daanadi wo yi-d'obe bey, y'ede: «Ki dehu maŋ, k'o eli beeko n'a t'ise kamilen a daana Raa.»
- 41** Isa yi y' wulle maŋ, i di t'ize sommagi, y'a igibe beezi y'a yi butte, wo y'a ruute, y'ede: «Nuŋ ni dehu, ki t'iso kamilen!»
- 42** A kaamiki bitidayi an nukkiide, y'a t'ize kamilen.
- 43** Aame geŋ kesiko Isa y'a y'igibe, wo y'a di y'iipide,
- 44** y'ede: «K'ollo koduwo, a munda wede ize eŋ a wenda soo toŋ ki rootey ye! Wo de k'odo deddet ki-ti kazoy tudda a wede sedefee y'a ki ti wolley, wo k'a eloy munda ki sedefee a kize ki t'ize kamilen aa Muusa y'a ruute adda k'oogoro in d'ise, kono doŋ pay an di wolle kee k'uune bee.»
- 45** Miŋ wede geŋ yi t'ufde maŋ, y'a iise kazita a doŋ pay a beeko ere y'uune gette. Injino maŋ rabila gette a-tiipe a omagi pay, urzi Isa y'a ette k'adda k'ille umbo. Y'a uupe balda wo doŋ an d'ettiyo ki tuddi t'ume tuuku toŋ maŋ.

Markus 2

Isa yi ele beeko a wede runguyun

(Matiye
9.1-8; Lik 5.17-26)

¹Onniyo miibi k'ita maŋ Isa y'a-gime Kapernayim. Doŋ an illiga maŋ Isa yi-gimo, yoŋ adda boy.

²Duwo an d'uune boy wede Isa adda geŋ boo a-t'udde biza bumbu. Wo y'an di kazita ono Raa.

³Aame geŋ i d'iido duwo an d'umbo wede runguyun ti zaade, doŋ pide ge sarkiya.

⁴Wo urzi an i-di t'ette k'ume k'Isa umbo kono duwo baadaŋ. Injino maŋ an a-ti gili t'ekki boy, an d'ihina buldo t'eego a ume Isa yi t'ihira. Wede runguyun geŋ an ti y' zuyye ti zaadayi pay a gulbayi.

⁵Isa yi wulle kane an ziipe addaŋ a yode maŋ, aame geŋ yi di ruute a wede runguyun, y'ede: «Ulo ki nuŋ, oldikada n'a y' t'ize tambobino.»

⁶A ume geŋ i d'ede doŋ suuniyo k'oogoro miibi, an ti guune. Kane an d'elkiso adda k'addaŋ, an'de:

⁷«Ki moo me wede eŋ yi rootiyo injino me? Yi kalda suma Raa! Wee wee aane aase tambobino a oldiko wede, daa ki Raa siidi ye maŋ?»

⁸A kaamiki, elkisadaŋ Isa y'a ti zuune adda k'addi, wo y'an di ruute, y'ede: «Ki moo me kun d'elkiso adda k'addugun injino me?»

⁹Ise laylay a jiiire miŋ too me a nuŋ n'a roote a wede runguyun: «Oldikada Raa y'a y' t'ize tambobino» kunuŋ, n'a roote: «Ki t'oozo, ki t'ambo zaadayi wo k'a oziro me?»

¹⁰Wo ni dehu kun di suune, nuŋ wede an n'ehe aa ulo wede eŋ, adda duniya ette o d'ede toogo k'isiyo tambobino a oldiko.» Maŋ yi di ruute a wede runguyun, y'ede:

¹¹«Nuŋ n'a di rooto, ki t'oozo, ki t'ambo zaadayi, k'a aaho boozá.»

¹²A kaamiki wede y'a t'iiziga, y'a t'umbe zaadayi a daana doŋ pay, y'a t'udde y'a injile. Kane doŋ pay geŋ an ziida giggiraŋ, an tamma Raa, an'de: «Munda kino eŋ kaŋ soo toŋ ay ki wulle ye.»

Isa yi waaku Lebi

(Matiye
9.9-13; Lik 5.27-32)

13 Onniyo soo Isa y'a-gime biza bar Galile. Doŋ baadaŋ an d'ettiyo tuddí wo yi di'n dooyiso.

14 Tiŋ geŋ y'a iide, a urzi yi wulle Lebi ulo k'Alpe, yi-guune a ume naabadí yi sedđu jibaaye. Isa yi di ruute, y'ede: «Ki ni daani!» Maŋ yoŋ y'a t'iiziga wo y'a yi diine.

15 Isa y'iide'ŋ y'a-guune ombo ti sanalliyagí di Lebi. Aame an ti guune maŋ, doŋ sedđu jibaaye baadaŋ ti doŋ k'oldfiko oŋgo pây an di-guune ti kane kaŋ soo, kono doŋ baadaŋ i yi diine me.

16 Kane doŋ suuniyo k'oogoro ti diine Pariziyen an wolliyo Isa y'ombo ti doŋ sedđu jibaaye wo ti doŋ k'oldfiko oŋgo iŋkino maŋ, an an di ruute a sanalliyagí, an'de: «Ki moo me yi d'ombo ti doŋ sedđu jibaaye wo ti doŋ k'oldfiko oŋgo me?»

17 Isa yi'n illiga maŋ, y'an di ruute, y'ede: «Kane doŋ waaliŋ an ki y' dehe ye wede daawiya me, wo i yi dehe doŋ k'eeni. Nuŋ ni k'iido'ŋ waaku kane doŋ ki diine ye, wo de n'iido'ŋ waaku kane doŋ k'oldfiko.»

Dooyiso k'Almasi ti ere ki Pariziyen a ki t'ettiyo soo ye

(Matiye

9.14-17; Lik 5.33-39)

18 Onniyo soo sanalliyagi ki Zaŋ Batis ti Pariziyen, an di lekkiyo onniyo muno daa k'ombo. Doŋ miibi an d'iide an tunde Isa, an'de: «Ki moo me kane sanalliyagá onniyo muno an ki lekkiyo daa k'ombo ye, wo kacin sanalliyagi ki Zaŋ ti doŋ ki Pariziyen, onniyo muno an di lekkiyo daa k'ombo me?»

19 Isa y'an di'n gime onamaŋ, y'ede: «Kun elkiyo miŋ doŋ an'ni wiiko a tarnaape seedu, onniyo muno an di lekke daa k'ombo ko aame kule k'ere yoŋ a diinayaŋ maŋ? Aha, iŋkino ye! Ise onniyo miibi toŋ kule k'ere a sirpadaŋ maŋ, onniyo muno an k'aane an ki lekke daa k'ombo ye.

20 Wo saŋ onniytagi an d'aana, aame kule k'ere ti diinayaŋ an ti y'umba maŋ. A onniytagi geŋ kane onniyo muno an di lekka daa k'ombo kollo.

21 Beehiye ye wenda yi d'ambe buude kalle aware y'a-t'obbira ekki kalle mazzini me, para maŋ buude wede aware geŋ y'a t'aadi kalle wede mazzini geŋŋo, a di sittite a ceere sey.

22 Wo beehiye ye wenda yi t'eepe toote k'inŋi biŋ wede oozige botto adda riitile wede mazzini me, para maŋ toote geŋ y'a-batte riitile, wo toote ti riitile pây i-litte. Ki too maŋ toote wede oozige botto geŋ eepiyadí adda riitile wede aware.»

Isa yi rootiyo a urzi k'onniyo ere ki puukiyo

(Matiye 12.1-8; Lik 6.1-5)

²³ Onniyo soo ere ki puukiyo Yawudiyagi mañ, Isa yi doopide t'adda dombi don ki geme ti sanalliyagi. Aame geñ kane sanalliyagi an d'iise sattita geme an di doydiso.

²⁴ Kane Pariziyen an i di ruute Isa, an'de: «Ki moo me sanalliyagi an d'isiyo munda wede oogiradiñ ti k'ele urzi k'isiyo ye a onniyo ere ki puukiyadiñ te?»

²⁵ Mañ Isa y'an di'n gime onamañ, y'ede: «Ki kotto kun gire munda wede ti kaaga onniyo soo yode Dawut y'ize ti don a itadi, aame an t'ize ooñe wo mosogo ti'ni ziida geñ me.

²⁶ Aame mozigo goole don sedeke Abiyatar geñ, Dawut yi-t'iide adda Boy Raa wede an ikkima ki golmodo, y'a ziki mappa wede an i ele sedeke a Raa, wo yode ti don a itadi toñ an d'iimi. Wo Raa y'an k'ize munda ye, ki too mañ kane an k'ede ye urzi an d'oomi me, oogiradiñ t'ele urzi a don sedeke danjal.»

²⁷ Wo Isa y'an di ruute sey, y'ede: «Onniyo ere ki puukiyo gette Raa yi ti ziipe a wede, wo wede geñ Raa yi y'ikkima kono k'onniyo ere ki puukiyo ye.

²⁸ Injino mañ nuñ wede an n'ehe aa ulo wede eñ, o d'ede urzi k'isiyo munda wede aa addo i dehu ekk'onniyo ere ki puukiyadiñ toñ mañ.»

Markus 3

Isa yi ele beeko a wede beezí unto

(Matiye 12.9-14; Lik 6.6-11)

¹ Sañ mañ Isa y'a t'iide sey k'adda boy wede Yawudiyagi ge dooyiso. Adda boy geñ i d'ede wedusu soo injino beezí unto.

² Kane Pariziyen an dehu an t'oone urzi an di sakiya Isa, kono kamo an di wolliyo koomadi, a onniyo ere ki puukiyo Yawudiyagi, a wede geñ yi-t'ela beeko ko.

³ Injino mañ Isa yi di ruute a wede beezí unto geñ, y'ede: «Ki t'oozo, ki t'ohor a diine duwo kino.»

⁴ Mañ Isa y'a tunde don i yi wolliyo, y'ede: «Oogiradiñ t'ele urzi k'isiyo ki moo me a onniyo ere ki puukiyadiñ te? A wedusu ki d'ise beehiye kunuñ, ki d'ise ulsu ko? Wedusu k'a y'utte kunuñ, k'a yi t'ide ko?» Wo de kane an d'annugu deddek.

⁵ Aame geñ kane Isa yi di'n wolliyo adda k'edayan ti kulkuwo, wo addi a litte kono kane addan zakidi. Injino mañ yi di ruute a wede geñ, y'ede: «Beeza ki y'onfo.» Mañ y'a y'unde, wo beezí a t'ikkima.

⁶ Sañ kane Pariziyen tiñ geñ an t'udde, a kaamiki an t'ugiye ti don a ita k'Erod, an t'iide onamañ kañ soo a tukk'Isa, an di dehe urzi ki towwadi.

Don baadan an daaniya Isa

(Matiye 4.25; 12.15-16; Lik 6.17-19)

⁷Isa ti sanalliyagí an t'irga biza bar ki Galile, wo don duuru baadan an di y' diine. Kane duwo gen an'tiyo ti siido Galile, ti siido Ziide,

⁸ti geeger Zeruzalem, ti siido k'Idume, ti dar k'ooye Zurden ki kese peedo gekoliyo, wo ti siido ere i duule geeger Tir ti Sidon. Kane don duuru pay gen an d'iide k'ume k'Isa kono an illiga suldi don pay y'isiyo gen me.

⁹Inkino man Isa y'an di ruute sanalliyagí, y'ede: «Kun'do, kun o wolli tooko, kun o-t'argi goppon kono don duuru an ki ti'n niida ye.»

¹⁰Yi ruute inkino kono yon y'eliyo beeko a don baadan gen, wede k'eeni tuuku ton yi nyaay'u, y'ette, y'a bottey tuddi.

¹¹Wo kane don an d'ede siitan eedan gen, wede tuuku yi wolliyo Isa man yi-t'ottilso, yi d'eesiyo dollite: «Kee Ulo Raa! Kee Ulo Raa!»

¹²Wo de y'an di ruute ti golla zakidi a duwo, kono an ki roote ye a munda wede y'ize me.

Beeriyon don zina k'Isa

(Matiye 10.1-4; Lik 6.12-16)

¹³San man Isa yi wiike don aa addi i dehu, an d'ingile ti yode k'ekki mokoloo.

¹⁴Man yi d'iidiba ti diinayan don koomat makumu sire y'anni wiike sundan don zina. Yon yi'ni biire a yode, kono y'anni t'ikkipa kazita k'ono Raa.

¹⁵Wo y'an d'ele toogo ki lommitte siitandani don an t'ooney a daanadan.

¹⁶Enno sumbiyagi don koomat makumu sire Isa yi biire me: Simo wede Isa y'a yi wiike sundi soo te Piyer;

¹⁷Zak ti leemadi Zan inni Zebede, Isa yi di'n waaku sundan Bonarzez, i-kaza kane gen aa eddiso mizzi;

¹⁸Andire, Pilip, Bartelemi, Matiye, Toma, Zak ulo k'Alpe, Taade, Simo wede addi wehini kono siidadi me,

¹⁹wo Ziidas Iskariyot wede san y'an di y' t'ela Isa a bey don k'olmidayi.

Isa maawi an yi dehu

(Matiye 12.24-32; Lik 11.15-23; 12.10)

²⁰San man Isa ti sanalliyagí an di-gimo boy, wo don baadan an di t'ugiye sey, urzi an d'oomi munda ton umbo.

²¹Aame maawi an illiga inkino man, an t'iide waakuzi, kono an elkiyo eedi ti digge.

Toogo k'Isa t'ettiyo ti too me?

²²Doŋ suuniyo k'oogoro iido ti Zeruzalem an di rootiyo, an'de: «Meeda siitandani sundutú Belzebul ti yode. Geŋ Meeda siitandani i eliyó toogo ki lommité siitandani me!»

²³Iŋkino maŋ Isa y'anni wiike, y'an di ruute t'ono ombide, y'ede: «Mummino me Meeda siitandani t'a limmi tuddutú me?»

²⁴Aame moziko ere tuuku doŋtú an deyyiso ti tuddaŋ maŋ, kane geŋ an k'aane an ki ti lekke kaŋ soo ye.

²⁵Wo aame adda boy doŋzǐ an deyyiso ti tuddaŋ maŋ, kane geŋ an k'aane an ki ti lekke kaŋ soo ye.

²⁶Geŋ iŋkino kay, aame Meeda siitandani ti deyyiso ti siitandani eebutú maŋ, geŋ an deyyiso ti tuddaŋ batum. Wo de geŋ ki kotto, mozikatú ti k'aane ti ki lekke ye, t'a daŋga!

²⁷Aame wede yi dehu yi-t'ette adda boy ki wede i-d'ede toogo wo y'a sikiti suldzǐ maŋ, wede geŋ ki poone y'a-kettite wede toogo doo miŋ, y'a aane y'a sikiti suldi t'adda boy kollo.

²⁸Derec iŋkino wo n'un di rooto: Duwo Raa y'an t'isa tambobino a oldiko ere pay an isiyo, ti kaldita ere pay an kaldita suma Raa gette.

²⁹Wo de wede tuuku i kaldita Unde Kamilen maŋ, yoŋ geŋ toc Raa yi-k'isa tambobino ye, oldikadí t'a lekka ki daayum.»

³⁰Isa y'an orbe iŋkino kono duwo an'de yoŋ i-d'ede siitan a eedí.

Mekk'Isa ti zembadí

(Matiye 12.46-50; Lik 8.19-21)

³¹Isa adda boy, aame geŋ meedí ti zembadí an d'iina, wo an t'ihira ti paate, an d'igibe wedusu y'an di y' waako.

³²Doŋ baadaŋ an di-guune, Isa an ti y' duule, yoŋ a diine. Maŋ an i di ruute, an'de: «K'ollo, meedá ti zembadá an t'ihira ti paate, an ki dehu.»

³³Isa yi di'n gime onamí, y'ede: «Ki kotto maŋ, meedó ti zembadó aŋ wee wee?»

³⁴Maŋ doŋ i-guune i ti y' duule geŋ yi di'n wolliyo adda k'edayaŋ, wo y'a ruute, y'ede: «Kun wollo, kane eŋŋo aŋ meedó ti zembadó me.

³⁵Iŋkino maŋ wede tuuku y'isiyo suldi doŋ pay Raa yi dehu geŋ, yode geŋŋo leemadó, teemadó wo meedó me.»

Markus 4

Ono ombide a tukki wede korso

(Matiye 13.1-9; Lik 8.4-8)

¹Isa yo a biza bar Galile, aame geɗ y'a iise dooyiso ɗuwo sey. Doɗ duuru baadaɗ baadaɗ an di-t'ugiyee, iŋkino yi di gili adda tooko ekk'ahu, y'a-guune wo kane ɗoɗ duuru pay an t'ihira a biza bar.

²A dooyisadi gette y'an di'n duuye a sulɗi baadaɗ t'ono ombide, y'ede:

³«Kun ollo! I d'ede wedusu soo iŋkino yi t'iide korso buzu k'adda doome.

⁴Aame yi sakkisa geɗ, buzu oŋgoɗ a-zilditi a urzi, embi an iido'ŋ an di-tibbe pay.

⁵Buzu oŋgoɗ soɗ a-zilditi a ume wede t'adda'ŋ paŋgiragi, siifadi baata. Kane geɗ a t'udde kesiko kono siifadaɗ soodo.

⁶Aame peedo ti-gilo wo t'ihina maɗ, kane geɗ a t'igge, a-biiha kono sondayzaɗ i ki ti ɗiige ye.

⁷Doɗ soɗ a-zilditi adda k'ahimagi, kane geɗ a t'udde wo ahimagi an iiziga maɗ, an di'n ippe an ki d'ehe ye.

⁸Doɗ oŋgoɗ soɗ a-zilditi a siido ere beehiye, kane geɗ a t'udde, an d'ihira wo an d'ehe: ulo muduso soo y'a ehe iŋni ada g'ado, soɗ ada zoot wo soɗ meeda.»

⁹Maɗ Isa y'a ruute, y'ede: «Wede i-d'ede kuwwa k'ollige maɗ, y'ollo koduwo!»

Ki moo me Isa yi rootiyto t'ono ombide me

(Matiye 13.10-15; Lik 8.9-10)

¹⁰Saɗ Isa y'a t'irga ti tukki ɗoɗ duuru. Aame geɗ ɗoɗ i ti y' ɗuule ti kane sanalliyagi koomat makumu sire geɗ an di y' tunde, ki moo me y'an rootiyto a ɗoɗ duuru t'ono ombide me?

¹¹Yoɗ y'an di ruute, y'ede: «A kune'ŋ Raa y'un ele suuniyo ki sulɗi ɗoɗ ombide ki Moziko Raa te, wo de a ɗoɗ oŋgoɗ sulɗi pay geɗ an an rootiyto'ŋ t'ono ombide,

¹²iŋkino: “Kane geɗ an di woliyo kereɗ, wo munda an ki y' woliyo ye, an d'ollige kereɗ, wo ono itadaɗ an ki ti suuniyo ye, para maɗ an di-kime ki tukki Raa, y'an t'ise tambobino a oldikadaɗ te!”»

Oodibe k'ita k'ono ombide a tukki wede korso

(Matiye 13.18-23; Lik 8.11-15)

¹³Isa y'an di ruute sey, y'ede: «Ono ombide eɗ itadaɗ kun ki'n suuniyo ye! De mummino kun di'n suuna ita k'ono ombide pay geɗ me?

¹⁴Wede korso geɗ yi korso ono Raa.

¹⁵Buzu wede i zilditi a biza k'urzi geɗ, i-kaza ɗuwo ɗoɗ ollige ono Raa, wo de an t'ollige maɗ a kaamiki Meeda siitandani t'ettiyo, ti-t'oddiipe ono geɗ t'adda k'addaɗ me.

¹⁶Buzu wede i zilditi a ume wede t'adda paŋgiragi geŋ, i-kaza duwo doŋ ollige ono Raa, kesiko ulbaŋ uŋse an d'ambu.

¹⁷Wo de ono sottadaŋ ti ki ti deegu adda k'addaŋ, an aa ki seedu zakidi ye, aame i ettiyo dabar ise duwo an'ni dabirsa kono an umbe a ono Raa maŋ, kesiko an t'argu.

¹⁸Buzu wede i zilditi adda k'ahimagi geŋ, i-kaza duwo doŋ ollige ono Raa,

¹⁹wo de saŋ elkisito a suldi duniya, dehu tu k'urzi maala wo zaapu k'adde a suldi doŋ ulpi tuddaŋ ti dehu ti doolo toŋ ede. Kane pay geŋ ono an di'n appiya, an ki d'ohire ye a urzi Raa me.

²⁰Ki daŋgu buzu wede i zilditi a siido ere beehiye gette, i-kaza duwo doŋ ollige ono Raa wo an di'n seedu adda k'addaŋ, an d'ohire a urzi Raa, an aa d'ooniyo eebaŋ ti doolo, aakede ulo muduso soo y'a ehe inŋi ada g'ado, soŋ ada zoot, wo soŋ meeda.»

Ono ombide a tukki pitila

(Matiye 5.15; 10.26; Lik 8.16-18; 11.33; 6.38)

²¹Isa y'an di ruute sey, y'ede: «Aame wede y'a t'uyye pitila maŋ, y'a-t'ossibe bogoro kunuŋ, yi-ti t'ele a ita k'onŋali ko? Aha, ki too maŋ y'a ti zaape t'awwa.

²²Suldi doŋ pay ombide'ŋ, saŋ onniyo soo a t'oodiba ita, wo ono doŋ i ki dehu duwo an k'olliga ye geŋ, saŋ onniyo soo a t'adfa a toore.

²³Wede i-d'ede kuwwa k'ollige maŋ, y'ollo koduwo!»

²⁴Isa y'an di ruute sey, y'ede: «Kun koono mentikagi a ono doŋ kun ollige. Derec, dooziyo ere kun dooziyo a duwo gette, Raa toŋ y'un ti dooza a kune inŋino kay, wo y'a d'oba ti jugulu a kune me.

²⁵Derec, a wede i-d'ede suuniyo'ŋ, an i-t'eela t'eego, wo de a wede i-k'ede suuniyo ye, ere booloŋ i-d'ede toŋ an i-t'amba.»

Ono ombide a tukki buzu wede adfiya siidi

²⁶Isa y'a ruute sey, y'ede: «Moziko Raa tod' ti deeyiso aa wede yi sakkisa buzu adda doomizi.

²⁷Wo ki yode diddo t'ettiyo yi-ti moone, wo ume i t'ompilso maŋ yi-t'oozige, yi ki suune ye ume buzu y'adfiya wo yi d'ohire mummino toŋ maŋ.

²⁸Naabo gette i ti suuniyo tode siido sittu. I-t'adfiya ki poone soole, saŋ i-t'isiyo koyile, saŋ mahuwe i-ti paŋa, saŋ i-ti tana.

²⁹Aame i ti tana maŋ, wede yi d'ambu suwwo ki aydu baa, kono peedo t'iide k'aydu.»

Ono ombide ekk'ulo k'undumu sundi mutard

(Matiye 13.31-32; Lik 13.18-19)

³⁰Isa y'a ruute sey, y'ede: «Moziko Raa in t'eese tod'te aa moo me? In di ruute tod'te ti ono ombide don tuuku me?»

³¹Tode gette ti deey'iso aa ulo k'undumu soo sundi mutard. Aame ki kiira gen, ulo k'undumu miŋ yoŋ ɲenku a jiiire ti diine k'inŋi k'inda pay don adda duniya.

³²Wo de ki-giira kotto maŋ, yi-t'adfiya yi d'isiyo goole i ceeriyo inda don pay adda jineene genno, yi d'ahuntu laydayi deero embi an d'appiyta boydizan eego.»

³³Gen Isa a dooyisadi gette, yi'ni duuye duwo t'ono ombide baadan inŋino, aa ere an aane an y'olliga.

³⁴A duwo munda daa k'ono ombide y'an ki rootiyo ye, wo de aame yoŋ siidi ti sanalliyagi maŋ, y'an t'oodibe ita k'ono ombide pay gen me.

Isa toogo i jiiire maaye baadan

(Matiye 8.18,23-27; Lik 8.22-25)

³⁵A onniyo gettiyo batum a peedo t'a t'iire maŋ, Isa y'an di ruute a sanalliyagi, y'ede: «In ti doopo'ŋ ti dar bar ti nee.»

³⁶Inŋino maŋ don duuru an di'n iili zenŋe t'inno, kane sanalliyagi an a di gili ti yode adda tooko, wo tookiyagi doolo toŋ ede a sirpadaŋ an d'inŋile.

³⁷A kaamiki, i d'iiziga maaye baadan adda bar. Ahu gen i-kolzite kolzite i d'obite k'adda tooko, tod'te i t'ooniyo t'ahu.

³⁸Isa gen yoŋ a ume k'ita, y'a udige kuy y'a ti zidde eedi a wasaade. Sanalliyagi an t'iide an di y'inne, wo an i di ruute, an'de: «Wede dooyisadey, kine in t'unto miŋ, kee ki moone tandan?»

³⁹Inŋino maŋ Isa y'a t'iiziga, y'a y'idfise maaye me, wo ahū bar y'an di ruute, y'ede: «Kun ohor! Kun t'asso!» Maŋ maaye y'a ziida, wo ahū toŋ an t'udige deddek.

⁴⁰San Isa y'an di ruute sanalliyagi, y'ede: «Kun orgiso inŋino moo me? Kun ki ziipe adduŋ a nuuno ye botto ko?»

⁴¹Wo kane orgiso t'anni ziida baadan, an di rootiyo tuddan, an'de: «Yode en moo wede me, kono aŋ maaye ti ahū bar toŋ an d'ollige onami me!»

Markus 5

Eliyo beeko a wede i-d'ede siitan a eedi

(Matiye 8.28-34; Lik 8.26-39)

¹San Isa ti sanalliyagi an d'iiney a siido Gadara ti dar bar Galile ti nee.

²Isa yi ti dfiige t'ekki tooko maŋ, a kaamiki i d'iide wedusu t'ume muuziyagi yoŋ i-d'ede siitan a eedí, y'iide'ŋ y'a y'ikkima.

³Lekkiyadi adda diine muuziyagi, wo wenda soo toŋ yi k'aane yi ki ti kettite ye, ise ti zinziri toŋ maŋ.

⁴Taŋ baadaŋ beydí an di kettiso ti zinziri wo zoŋdí adda poole, wo toŋ zinziri yi-ti dekkiso wo maala poole yi-ti dambu. Wo wenda soo toŋ a aane a ti boohe umbo.

⁵Daayum, diddo onnu, lekkiyadi a ume muuziyagi wo ekki kessagi, yi dollite, tuddí yi-t'âhuntu ti moŋgali, kundayi jerem.

⁶Aame yi y' wulle Isa ti dokki maŋ, y'a ukke k'ume yode, y'a-dikke a dfaanadí,

⁷wo y'a idili ti golla awwa, y'ede: «Ki dehu moo me a tukki nuŋ me, Isa Ulo ki Raa goole a jire pay? Ni dehu k'a di nâame ti suma Raa, ki ni dabire ye.»

⁸Yi rootiyo inkiino kono Isa yi-ruute, y'ede: «Siitan no, mi t'addo ti tukki wede me!»

⁹Isa y'a yi tunde, y'ede: «Kee sundá wee wee?» Wede geŋ yi di'n gime onamí, y'ede: «Nuŋ sundó Doŋ Duuru, kono kaye baadaŋ.»

¹⁰Wo yi-d'obe bey a Isa, yi koddime kono siitandani geŋ y'a ki ti'n limmi dokki ti siido gettiyo ye.

¹¹A ume geŋ i d'ede torfo meeda ki kinzir an elso ekki kesse.

¹²Kane siitandani geŋ an i d'obe bey a Isa, an'de: «K'ay ti'n agibi ay t'ette adda kinzirdari geŋno.»

¹³Maŋ Isa y'an d'iyye. Inkiino siitandani t'ekki wede geŋ an t'udde, an t'iide adda kinzirdari. Wo torfo gette t'awwa t'ekki kesse t'a zide okko, kinzirdari an t'ibi adda bar, an t'inda adda k'ahu. Kane suma dupu sire.

¹⁴Kane doŋ k'elso geŋ an d'ukke, an an t'iide taaya a doŋ adda geeger wo a doŋ i lekkiyto a dombi pây. Duwo geŋ an t'uddito wolliso ki munda wede ize.

¹⁵An iina a sirpa k'Isa maŋ, an wulle wede i ede siitandani baadaŋ a eedí wo an t'udde geŋ, yoŋ yi-guune, yi t'usse kalle wo eedí t'iido. Inkiino kane geŋ orgiso t'anni ziida.

¹⁶Kane doŋ i wulle munda wede ize geŋ an an t'iide taaya, kaŋ mummino wede i-d'ede siitandani a eedí y'a uune bee, wo soŋ a munda wede ize a kinzirdari.

¹⁷Inkiino maŋ kane doŋ pay an i d'iise obe bey a Isa, kono ti siifadaŋ y'a engile.

¹⁸Maŋ Isa yi-ti gili adda tooko, y'a engile. Aame geŋ wede i ede siitandani a eedí wo an t'udde geŋ, yi ton-diyo Isa kono y'a lekke ti yode.

¹⁹Isa yi-ki d'iyye ye, wo de yi di ruute, y'ede: «Ki-kama di kee wo k'an t'ôodoy taaya a donzá a suldi don pay Galmeega y'a ize, a isiyo k'adde koduwo y'ize a kee.»

²⁰Mañ wede y'a-gime, wo y'a iise kazita adda siido ere sundutú «Geegiryagi Koomat» suldi don pay Isa yi ize a yode geñ me. Wo kane don pay illiga geñ an ziida giggirañ.

Eliyo beeko a erewo wo baldiya k'uto Zayiris

(Matiye
9.18-26; Lik 8.40-56)

²¹Isa y'a-gimo ti tooko yi-ti diipido ti dar bar t'inno, mañ y'a t'ihira a biza bar wo don duuru baadañ an di-t'ugiyе.

²²Aame geñ i d'iina wedusu sundi Zayiris, yoñ goole ti diine deero boy wede Yawudiyagi ge dooyiso. Yi wulle Isa mañ y'a iido, y'a iire a zondi

²³wo yi-d'obe bey ti koddime, y'ede: «Uto nuñ tuddutú eeni t'unto. K'a ette mañ, ki zaapey beezá t'a uttey wo t'a lekkey.»

²⁴Inkino mañ Isa y'a iyye, an d'ingile soo. Wo don duuru baadañ an di y' diine, an di y' ñay'yu t'ennno t'ennno.

²⁵Ti diine don duuru i d'ede erewo soo inkino ti dabirsa, puuzo obite t'itatú iide ozzine koomat makumu sire.

²⁶T'a dibire baadañ a bey don daawiya baadañ wo beytú t'a zikkuwe pay kono t'a t'ooone beeko, wo umbo beeko ti k'uune ye, ki too mañ ti dabirsa i-ceeriyo ki ceeriyo.

²⁷Tod' t'illiga rabila k'Isa, inkino ti-t'iide diine don duuru ti dar k'Isa, t'a-butte kallayí,

²⁸kono t'a ruute t'adda k'addutú, t'ede: «Aame n'iina n'a butta kallayí ñañal toñ mañ, n'a utta.»

²⁹T'a butte kallayí mañ, a kaamiki obite puuzo a ihira yip, t'a uwwe a tuddutú t'uune bee.

³⁰Aame geñ Isa y'a uwwe toogo a udfde ti tuddí me. Mañ y'a-tuuye tukki don duuru wo y'a tunde, y'ede: «Wee wee i butte kallayó me?»

³¹Kane sanalliyagi an i di ruute, an'de: «Kee k'owwiyo don an ki ñay'yu t'ennno t'ennno, wo ki-tondiyo wee wee i butte kallayá sey me?»

³²Wo de Isa yi wolliyo don i ti y' duule kono yi dehu y'a suune wede i y' butte.

³³Mañ to ere gette t'a urgide, ti ñoññirso kono ti zuune munda wede i-iide me. T'a d'iide, t'a iire zondi wo derec ti di ruute pay.

34Wo de Isa yi di ruute, y'ede: «Uto ki nuɲ, kono koɲ mi ziipe addí a nuuno geɲ, m'utte. T'eenizí geɲ m'uune bee, m'aaho ti toose.»

35Aame Isa y'a ti rootiyto iɲkino geɲ, doɲ zina an okko ti di goole boy wede Yawudiyagi ge dooyiso, an i di ruute a Zayiris, an'de: «Utá t'a t'ihe, ki moo me wede dooyiso ki y' naatiya sey me?»

36Wo de ono geɲ Isa y'illiga toɲ seezí ye, wo yi di ruute a goole boy wede Yawudiyagi ge dooyiso, y'ede: «Kee k'orgide ye, ki zaapo addá a nuuno daɲɲal.»

37Wo a wenda soo toɲ urzi yi k'ele ye a ette ti yode me, iide ti yode Piyer, Zak ti leemadí Zaɲ daɲɲal.

38An iiney di goole boy wede Yawudiyagi ge dooyiso maɲ, a ume geɲ Isa yi wolliyo doɲ baadaɲ an dollite môolo daɲkar.

39Isa yi-t'iide k'adda boy, wo y'an di ruute, y'ede: «Moo me kun dollite môolo me? Uto ti k'inda ye, ti moone moone.»

40Kane duwo geɲ an di y'okko maade. Wo de yoɲ y'an uɔde duwo t'adda boy me, a uupe ti yode meek'uto ti mekk'uto wo sanalliyagí doɲ aɔo geɲɲo, saɲ Isa yi-t'iide k'adda biino ere uto adda.

41Maɲ yi ziida beytú wo yi di ruute, y'ede: «Talita kum!» Geɲ i-kaza: «Uto ki nuɲ, mi t'onno ni-rootiyo me!»

42A kaamiki, uto t'a t'iiziga ti sooru. Tod'te ozzinatú koomat makumu sire. Kane duwo geɲ an wulle iɲkino maɲ, an ziida giggiraɲ kono i jiire eedaɲ.

43Maɲ Isa y'an d'undirde, y'ede: «A wenda soo toɲ kun i roota ye a munda wede ize eɲ me.» Saɲ y'an di ruute, y'ede: «Uto kun i eelo ombo.»

Markus 6

Doɲ Nazaret an koogire Isa

(Matiye 13.54-58; Lik 4.16,22,24)

1T'ume geɲ Isa y'a t'iiziga, y'a iɲgile ti sanalliyagí ki Nazaret geeger ere y'a ihira.

2A onniyo ere ki puukiyo Yawudiyagi maɲ, y'a iise dooyiso duwo adda boy wede Yawudiyagi ge dooyiso. Doɲ baadaɲ i y'ollige geɲ an ziida giggiraɲ, wo an di ruute, an'de: «De ono pay eɲ y'uuno ti too me? Suuniyo k'ono ette i elo wee wee? Wo mummino yi d'isiyto suldi k'armika kino me?»

3Yo eɲ wede k'âhuntu sarpaɲje de me! Yoɲ miɲ ulo Mariyam de me! Kane zembadí kuuli'ɲ sumbiyagaɲ Zak, Zoz, Ziid wo Simo de me! Wo zembadí erayi toɲ kane an lekkiyo ti kine de me!» Kono k'iɲkino an di-tuuge k'ambu k'onamí me.

⁴Isa y'an di ruute, y'ede: «Derec, nebi geŋ aame tuuku toŋ onamí an d'ollige, wo de doŋ a geeger ere y'a ihira, doŋ a biza bumbizí ti doŋ adda boozí dāŋŋal, onamí an k'olliga ye me.»

⁵A ume geŋ munda k'armika soo toŋ yi k'iine yi k'ize ye, wo y'an di ziipe miŋ beezí a doŋ k'eeni miibi dāŋŋal, an d'uune bee.

⁶Wo Isa yi nuukiso eedí kono kane an ki ziipe addaŋ a yode ye.

Agisa ki sanalliyagi kane koomat makumu sire

(Matiye

9.35; 10.1,5-14; Lik
9.1-6)

Saŋ maŋ Isa y'an izire pay illiyagi doŋ i-đuule Nazaret geŋ me.

⁷Maŋ y'a-wiike sanalliyagi kane koomat makumu sire, y'an ikkipe sire sire, wo y'an d'ele toogo ki lommite siitandani doŋ an t'ooney a dāanadaŋ,

⁸wo y'an di ruute munda wede an d'isey, y'ede: «Ki torguwaguŋ munda a beyguŋ kun amba ye, ise munda k'ombo, ise eese, ise tammiyagi sunni sunni adda poosaguŋ toŋ maŋ. Kun ambo dalka dāŋŋal,

⁹tobiyagi a zoŋguŋ wo kun osso kalle toŋ soo a tudduguŋ.»

¹⁰Wo y'an di ruute sey, y'ede: «Aame kun t'iidey adda boy tuuku wo an unni ziiidey maŋ, kun di lekkoy aŋgeŋno bini eŋgilsaguŋ t'ume geŋno.

¹¹Wo aame kun t'iidey ille wo doŋtú an un ki'n ziiidey ye wo onamguŋ an k'illigey ye maŋ, a eŋgilsaguŋ t'ume geŋno odde zoŋguŋ toŋ kun a ti tottigoy, geŋ i-kaza Raa ulbí uŋse ye ti kane me.»

¹²Kane sanalliyagi geŋ an d'iŋgile, an an kazita a dūwo kono an di-kime lekkiyadaŋ.

¹³Siitandani baadaŋ an ti'n lommite, wo doŋ k'eeni baadaŋ an an di y'ergutu egey an d'ooniyo bee.

Taaya k'unto Zaŋ Batis

(Matiye 14.1-2; Lik
9.7-9)

¹⁴Mozigo Erod geŋ y'a illiga rabila k'Isa te, kono yoŋ sundí ti môolo. Doŋ oŋgoŋ an ruute, an'de: «Geŋ Zaŋ Batis yi bildo ti diine doŋ unto! Geŋ kono k'iŋkino i-d'ede toogo yi d'isiyto suldi k'armika me.»

¹⁵Doŋ oŋgoŋ an'de: «Geŋ nebi Eli.» Wo doŋ soŋ an'de: «Geŋ nebi soo aa wede ti diine nebiyagi doŋ ti kaaga.»

¹⁶Wo de aame Erod y'illiga iŋkino maŋ, y'a ruute, y'ede: «Geŋ Zaŋ Batis wede n'an di ruute a asigiryagi an di-dikke eedí, geŋ yode i-bilde me.»

17-18 Erod y'ilke inġkino kono yi-ziifda ere leemadí Pilip sundutú Erodiyas, wo Zaṅ Batis yi di ruute, y'ede: «Oogoro urzi ti k'ele ye k'a seeda ere leemadá te.» Inġkino maṅ Erod batum y'an di ruute a asigiryagi an ti y' ziifdo Zaṅ me, an ti y' gittite wo an ti y' zidde adda daṅgay.

19 A rootiyo Zaṅ gette Erodiyas ti di gulkuwe t'a ti y' ziifda addutú. Ti dehu t'a yi t'ide, wo de urzi ti k'ooniyo ye,

20 kono Erod geṅ yi orgiso a Zaṅ me, yi suune yoṅ wede ki diine kamileṅ, inġkino yi di y' boohiyo. Aame Zaṅ yi eesiyo kazita k'ono Raa maṅ, Erod yi y'ollige t'unṣuwo wo munda y'a roote yi ki suune ye.

21 Ozzine ti ozzine, onniyo k'ehiyo k'Erod t'aaniya maṅ, an d'isiyo tarnaape. Inġkino onniyo gette t'iina maṅ, Erodiyas ti d'uune urzi. Erod y'an d'ize ombo a doṅ deero siifdo, a deero k'asigiryagi wo a doṅ suma ki siifdo Galile.

22 Aame geṅ uto koṅso k'Erodiyas ti-t'iide adda boy t'a immira, wo a tode gette Erod addí i-d'ibi ti doṅ an'ni wiiko pây. Inġkino maṅ mozigo yi di ruute a uto koṅso, y'ede: «Munda wede tuuku mi dehu'ṅ mi rooto, wo ni di t'ela.»

23 Wo y'a-ti nîime tuddí, y'ede: «Munda wede tuuku mi dehu'ṅ mi rooto, ni di t'ela, ise kese mozikadó toṅ maṅ.»

24 Maṅ uto koṅso t'a t'udde ti di ruute mettú, t'ede: «De n'a tonde moo me?» Mettú ti di'n gime onamtú, t'ede: «Mi tondo eego Zaṅ Batis.»

25 Kesiko uto koṅso t'a-gime ki tukki mozigo, t'iide'ṅ ti di ruute, t'ede: «Ni dehu aṅkenṅo k'o ti dekki eego Zaṅ Batis, k'o di zaapi adda supira, wo k'o d'adi kenṅo!»

26 Aame geṅ mozigo y'a t'ize sommagi dondoṅ, wo de kono y'a ti nîime tuddí a daana doṅ an'ni wiiko geṅ, y'a iyye yi gi di tuuge ye.

27 A kaamiki, yi d'igibe asugursu soo ti diine doṅ boohiyadí, yi di ruute, y'ede: «K'odo, k'o ti dekki eego Zaṅ te, wo k'o d'edi.» Maṅ asugursu geṅ y'a t'iide k'adda daṅgay, y'a-díkko eego Zaṅ te.

28 Eego y'a t'umbo adda supira, yi-d'ele a uto koṅso wo tod' ti d'iide a mettú.

29 Sanalliyagi Zaṅ an illiga rabila gettiyo maṅ, aame geṅ an d'iido, nuune an t'umbe, an d'ingile an t'ele adda muuzo.

Eliyo k'ombo a kuuli dupu paat

(Matiye 14.13-21; Lik
9.10-17; Zaṅ 6.1-15)

30 Doṅ zina k'Isa an di-gimo ki sirpadí, an i di t'iide taaya a naabo ere pay an izo wo a dooyiso ere pay an duuyo duwo.

31A ume geɲ i d'ede duwo baadaɲ, ɗoɲ oɲgoɲ an eɲgile, ɗoɲ oɲgoɲ an ette ettiyo, wo Isa ti sanalliyagí geɲ an t'oone peedo booloɲ an di-koone an d'oomi toɲ umbo. Inkiɲo maɲ y'an di ruute, y'ede: «Kun t'edi ti nuuno, in t'arga siidiɲ ki balɗa kun a-puukey booloɲ.»

32Maɲ an di gili adda tooko, an di diipidɗa bar kono an t'arga siidaɲ k'adda balɗa.

33A eɲgilsadaɲ geɲ ɗoɲ baadaɲ an di'n wulle wo an di'n zuune. Inkiɲo maɲ ɗoɲ t'adda geegiryagi pay geɲ an d'iise okkito ti zoɲɗaɲ, an t'iide geere sey k'ume Isa ti sanalliyagí an'te geɲ me.

34Isa yi ti ɗiige ti tooko maɲ, yi wolleiyo ɗoɲ duuru baadaɲ, wo i di t'ize sommagi kono kane geɲ aakede dambami daa wede k'elsadaɲ. Inkiɲo maɲ y'an di'n iise dooyiso a sulɗi baadaɲ.

35Kane sanalliyagí an wolleiyo peedo t'ingile, maɲ an a d'iide sirpa k'Isa, an i di ruute, an'de: «K'ollo, ume eɲ balɗa wo peedo toɲ t'ingile.

36Inkiɲo maɲ duwo eɲ k'an eezo an t'ette ki boyɗi ɗoɲ doome wo k'adda k'illiyagi ɗoɲ goppon, an d'owiltey munda k'ombo.»

37Wo Isa y'an di ruute, y'ede: «Ombo an eelo kune batum.» Kane an di ruute, an'de: «Kee ki dehu ay t'oono tamma meeda sire, ay t'owilo mappa pay ay an t'ela a ɗoɲ duuru an d'ooma ko?»

38Isa y'an di'n tunde, y'ede: «Un d'ede mappa miibi me, k'un ki ti wollei ɗo a eesaguɲ me?» An ti wullo maɲ, an di ruute, an'de: «Kaye ay d'ede miɲ mappa paat wo puuni sire.»

39Maɲ Isa y'an di ruute a sanalliyagí, y'ede: «Duwo kun ti'n koona kaɲ ogiysito adda soole.»

40Maɲ duwo an di gundite, oɲgoɲ meeda, oɲgoɲ ada paat.

41Aame geɲ Isa y'a-ziki mappa paat ti puuni sire geɲɲo, y'a t'umbe edayí k'awwa ki kandaane, y'a ruute koduwo a Raa. Maɲ mappa y'a burkite, y'an d'ele a sanalliyagí kono an an di-dokkiɗa a ɗoɲ duuru geɲɲo. Puuni toɲ inkiɲo kay y'an di-dikkiɗa a duwo pay.

42Kane pay geɲ an d'iimi wo an d'isse.

43Wo mappa ti puuni ɗoɲ uupite, sanalliyagi an ti-tusse, a îide dappa koomat makumu sire.

44Kane ɗoɲ iimi mappa geɲ, an t'îde kuuli dupu paat.

Sooru k'Isa ekk'ahu
(Matiye 14.22-33; Zaɲ 6.16-21)

⁴⁵Sanj mañ kesiko Isa y'an di ruute a sanalliyagí, an di kili adda tooko an d'oogume, an di doopida ti dar bar ti nee, ki kese geeger Betsayda, koore yode batum donj duuru yi-ti'n t'igiba geñ me.

⁴⁶Aame donj duuru yi ti'n igibe mañ, yoñ y'a-ti gili ekki kesse kono y'a tonde Raa.

⁴⁷Ume y'ize didfo geñ, tooko tod'te a diine k'ahu dokki botto ti biza bar me, wo Isa siidí ti zeñge t'inno me.

⁴⁸Isa yi woliyo kane sanalliyagí an t'ize ooñe ki korre k'ahu me, kono maaye a giggirañ. Injino a didfo biza soohe mañ yi-t'udfo yi d'ettiyo tuddañ, yi sooru t'ekk'ahu aa y'an di'n engile.

⁴⁹Aame kane an yi wulle yi sooru t'ekk'ahu geñ, an elkiyo beyye danj, wo an d'iise dollite

⁵⁰kono kane pay geñ an yi wulle wo orgiso t'anni ziidfa baadañ. Kesiko Isa y'an di ruute, y'ede: «Kun ombonj! Kun orgide ye, eñ nuuno!»

⁵¹Mañ y'a di gili ti kane adda tooko, aame geñ maaye y'a ziidfa. Injino mañ kane sanalliyagi undañ a t'udfe.

⁵²Derec, armika ere y'ize t'urzi mappa gette itatú an ki ti zuune ye, eedañ ti k'aane ti ki'n seeda ye suldi geñ me.

Eliyo beeko a donj k'eeni a siido Zenezaret

(Matiye 14.34-36)

⁵³An ti diipida bar mañ, an d'iiney a siido Zenezaret, tooko an di gitte a zeñge wo an di diggite.

⁵⁴Aame an deggutuu geñ, a kaamiki Isa duwo an di y' zuune.

⁵⁵Mañ an d'iise okkito t'adda siido gette pay. Aame an y'ollige yoñ k'ume tuuku mañ, donj k'eeni an di sokiyo ti zaadagi, an i-d'ettiyo kingenno genno.

⁵⁶A ume wede tuuku Isa y'ettiyo k'adda k'illiyagi, ki geegiryagi, ise ki boydi donj doome geñ, donj k'eeni an an d'an t'ettiyo a bere donj duuru. Mañ kane duwo geñ an i d'obe bey kono donj k'eeni an a-botte a bize kallayí danjal tonj mañ, wo kane donj pay a bottiyo geñ an d'uttiyo.

Markus 7

Dooyiso ere ki monjidagi

(Matiye 15.1-20)

¹Kane Pariziyenj ti donj miibi ti diine donj suuniyo k'oogoro iido ti Zeruzalem geñ, an di-t'ugiyee a Isa.

²An wollyo mañ kane sanalliyagí ongo an ombo beezan ganigi a daana Raa me, geñ i-kaza ki poone an t'eese ombo, beydan an ki t'opilso ye aa mongidagan an ruute me.

³Derec, kane Pariziyen ti Yawudiyagi pay geñ an k'ombo ye beydan daa k'opilso koduwo ye mañ, kono an aa seedu zakidi a dooyiso ere ki mongidagan an duuye te.

⁴Aame an aahiya suuk ton, an k'ombo ye daa k'opilso tuddan me. Wo an aa seedu a dooyiso baadan ti doolo ton ede ere mongidagan an duuye te, aakede: opilsito kunzali, dingilagi wo keyyagi maala.

⁵Inkino mañ kane Pariziyen ti don suuniyo k'oogoro an di tunde Isa, an'de: «Ki moo me sanalliyagá an d'ombo beydan ganigi a daana Raa, wo de an ki daaniya ye dooyiso ere ki mongidagan an duuye te?»

⁶Mañ Isa y'an di'n gime onaman, y'ede: «Kune don bizigun sire sire, nebi Ezayi yi ruute ono don Raa y'igibo a tukki kune geñ derec, aa an riije ti kaaga adda mattup ki Raa, an'de: "Duwo en an o eliyi suma t'ono bizañ, wo de ki kotto adda k'addan kane dokki ti nun Raa me.

⁷Kane suldi don an isiyi kono an o ottilso geñ ki bita, kono urziyagi k'oogoro don an dooyiso geñ ettiyo t'urzi duwo danjal.»

⁸Mañ Isa y'an di ruute, y'ede: «Oogoro Raa kun d'ooliyo kese, wo kun t'ambu dooyiso duwo.»

⁹Wo y'an di ruute sey, y'ede: «Kune konagan k'ooliyo k'urziyagi k'oogoro Raa ki kese, wo kun di sooru a urzi dooyisagan.

¹⁰Derec, Muusa yi ruute ti kaaga, y'ede: "Ki elo suma a meegá ti meedá." Wo son y'ede: "Wede yi duudiyo meegí ise meedí koo mañ, yon geñ ki tôwwo."

¹¹Wo de kune'ñ, kun dooyiso duwo, kun'de: "Aame wede yi rootiyo a meegí ise a meedí, y'ede: Munda wede n'a-di t'ele a gi di nooge yon korban, i-kaza yon ni ele sefeke a Raa" mañ,

¹²geñ kun eliyi urzi a wedusu yi ki t'ele munda a meegí ise meedí ye.

¹³Kun isiyi inkino geñ, kun ti tôwwo ono don Raa yi ruute kun d'ise me, wo kun di sooru a urzi dooyisagan. Wo suldi baadan ti doolo ton ede kun isiyi inkino me.»

Suldi don a ki ti k'ise ganigi a daana Raa

¹⁴Sañ Isa y'a wiike don duuru sey an t'iide k'ume yode, wo y'an di ruute, y'ede: «Kune pay kun ollo, wo ono en itadan kun di'n suuno:

¹⁵Suldi don pay wedusu y'oomi gen, i ki y'ise ganigi ye a daana Raa me, ki too man i y'ise ganigi a daana Raa munda wede adfiya ti bizi genno.

[¹⁶Wede i-d'ede kuwwa k'ollige man, y'ollo koduwo.]]»

¹⁷Aame don duuru Isa yi'n ili y'aahe boy man, kane sanalliyagi an di yi tunde, an'de: «Kee k'ay t'oodibi ita a ono ombide en me.»

¹⁸Yon y'an di ruute, y'ede: «Inkino man ki kotto, kune ton onamo eggun ti k'aane ti ki'n seeda ye pi me! Kun ki suune ye ko, suldi don pay wedusu y'oomi gen i ki y'ise ganigi ye a daana Raa me?

¹⁹Kono suldi don wede y'oomi gen, i-ki ti deegu adda biza k'ulbi ye, wo de i-ti deegu adda k'addi, wo san yi-ti'n naamiya.» A onami gen, Isa yi rootiyo ombo pay kamilen a daana Raa me.

²⁰Yon y'a ruute sey, y'ede: «I ti y'isiyo wedusu ganigi a daana Raa munda wede adfiya t'adda biza k'ulbe.

²¹Derec, t'adda k'adde wede gen, ti biza k'ulbi i d'adfiya elkiso ere oldo i-ti y'eliyo a suldi don ulpi aakede: boliyo, oogire, towwo duwo mirsi,

²²moone t'ere bakadi ise ti kule bakatu, okkiso a suldi pay, bundiko, daggiya duwo ti metinko, eliyo tudde k'isiyo suldi don ulpi, zaapu k'adde a munda wede, kaldita tudde, koliyo tudde wo isiyo munda daa k'elkiso.

²³Suldi don ulpi pay gen adfiya t'adda k'adde, wo an di y'isiyo wedusu ganigi a daana Raa me.»

Zaapu k'adde k'erewo Yawudowo ye

²⁴San man tin gen Isa y'a t'iiziga, y'a ingile ki siido ere i duule geeger Tir. Yi-t'iide adda boy soo inkino, kono yi dehu wenda y'a ki suune umayi ye, min umbo y'a k'iine ombide ye.

²⁵⁻²⁶A ume gen, i d'ede erewo ti Pinisi siido Siiri. Tod'te Yawudowo ye, t'orbe ono Girek, ututu i-d'ede siitan a ettu. T'illiga rabila k'Isa man, kesiko t'a ukke k'ume yode. T'iide'n t'a dikke a daanadi, wo t'a yi tunde, t'ede: «Galmeega, ni ki tonduyo ki-t'olmu siitan ti tukku'to nu.»

²⁷Isa yi di ruute, y'ede: «M'oolo inni an t'oomo an asso do, kono inkino beehiye ye k'a t'ambe ombo k'inni k'an di t'ele a gahiti me.»

²⁸Man to ere gette ti di'n gime onami, t'ede: «Galmeega onama gen derec, wo ki kotto gahiti genno ton an di delliyo a ume k'ombo, ombo ere i soldite ti bey k'inni aame an ombo gen, an di pettiyo.»

²⁹Yon yi di ruute, y'ede: «A tukku'onami gen, mi-kama boozu, siitan ti t'udde ti tukku'uti te.»

³⁰Sanj erewo gette t'aahe, mañ ti-t'uuney uto ekk'onjali ti moone, siitan ti t'udde ti tuddutú me.

Eliyo beeko a wede dugiya

³¹Sanj mañ ti siido ere i duule geeger Tir gette Isa y'a ingile, yi-t'udde ti siido ere i duule geeger Sidon, y'a tûukey siido sundutú Geegiryagi Koomat, y'a-gime biza bar ki Galile.

³²Aame geñ duwo an di wiiko wede dugiya wo ilzí toñ attidí ki rootiyo me. Mañ an i-d'obe bey a Isa, an'de: «Ki ti zaapo beezá a wede enno, y'a t'oone bee.»

³³Isa y'a y'irga siidí ti diine don duuru me, mañ yi-t'ele y'elagí adda kuwwa wede geño, wo yi d'unke leezí yi t'eele ilzí.

³⁴Sanj y'a t'umbe edayí k'awwa ki kandaane, wo y'a zuupe suup, mañ yi di ruute wede dugiya geñ, y'ede: «Eppata!» Geñ i-kaza a-t'ohon kereñ.

³⁵A kaamiki wede kuwwagí a t'ihina, yi d'ollige kereñ wo ilzí toñ a t'ikkima, yi d'orbe koduwo.

³⁶A duwo geñ Isa y'an di ruute, y'ede: «Kun ollo koduwo, a munda wede ize eñ a wenda soo toñ kun i roota ye!» Wo de eñ y'an aapufu a wenda kun i roota ye, wo a kane aa y'an eliyo olno ki rootiyto.

³⁷Kane duwo geñ an di ziida gaggirañ, wo an di ruute, an'de: «Naabadí pay y'isiyo ette beehiye baadañ! Dugiyagi kuwwagañ y'an di'n ohinte, wo don bizañ a t'ippe ki rootiyo umbo toñ an d'orbe.»

Markus 8

Isa y'an ele ombo a don dupu pide

(Matiye 15.32-39; Markus 6.30-44)

¹Aame geñ don duuru baadañ an t'ugiyey sey wo munda an d'oomi umbo, inkino mañ Isa y'a wiike sanalliyagí wo y'an di ruute, y'ede:

²«Nuñ duwo eñ o t'ize sommagi kono kun wollo an lekkiyo ti nuñ îide onniyo ado, wo ankenno munda k'ombo an k'ede ye.

³Wo ni'n igiba addañ guguba mañ, an d'oopey a urzi kono don baadañ ti diinayañ an iido ti dokki.»

⁴Kane sanalliyagí an i di ruute, an'de: «De adda balda ette, ti too me in t'oona mappa baadañ a duwo eñ an d'ooma an t'assa me?»

⁵Isa y'an di'n tunde, y'ede: «Kune un d'ede mappa miibi me?» Wo kane an i di ruute, an'de: «Ay d'ede mappa sarat.»

⁶Inkino y'an di ruute a don duuru geɗ, y'ede: «Kun ti koonaa siido!» Maɗ y'a ziki mappa sarat geɗ a beezí, y'a ruute koduwo a Raa, y'a burkite wo y'an d'ele a sanalliyagí kono an an di-dokkidá a don duuru geɗno.

⁷Wo soɗ an d'ede puuni miibi sunni sunni inkino. Isa y'a ruute koduwo a Raa kono k'ombo gette wo a sanalliyagí, y'ede: «Puuni kun an ti dokko pây!»

⁸Wede tuuku toɗ y'a iimi y'a isse isse a d'uupite, wo ombo ere uupite gette, an ti tussite a dambayi deero sarat.

⁹Kane don iimi geɗ i t'ide suma dupu pide. Saɗ Isa y'an igibe.

¹⁰Wo yoɗ kesiko yi-ti gili adda tooko ti sanalliyagí, an d'ingile ki siido Dalmanuta.

Tondiyo ki munda k'armika

(Matiye 12.38-39; 16.1-4; Lik 11.16-29; 12.54-56)

¹¹Kane Pariziyen an d'iide k'ume k'Isa, an d'iise niikiyto kono an dehu an i d'ekke ikka t'urzi k'onamí. Inkino maɗ an di y' tunde y'an d'ise munda k'armika a kize yoɗ Raa yi y'igibo.

¹²Isa y'a zuupe suup, wo y'a ruute, y'ede: «Ki moo me kane don ankenno en an ton-diyo munda k'armika a kize nuɗ Raa yi n'igibo? Derec inkino wo n'un di rooto: Munda k'armika soo toɗ Raa y'an k'isa ye a kane don ankenno en me.»

¹³Saɗ kane Pariziyen Isa yi'n iili, yi-ti gili adda tooko, y'a-doopida ti dar bar Galile ti nee.

Ita k'ono k'Isa sanalliyagi an ki'n suune ye

(Matiye 16.5-12; Lik 12.1)

¹⁴Kane sanalliyagi an doopide ti kese bar Galile ti nee geɗ, an dundo an d'ambo mappa me, wo adda tooko i d'ede mappa soo danjal a beezan.

¹⁵Aame geɗ Isa y'an di ruute, y'ede: «Kun ollo, kun koonaa mentikagi a orme wede ki Pariziyen wo a orme wede ki Erod.»

¹⁶Maɗ kane sanalliyagi an d'iise rootiyto ti tudaɗ kono an k'umbo mappa ye.

¹⁷Wo yo Isa rootiyadaɗ gette y'a ti zuune, inkino maɗ y'anni tunde, y'ede: «Ki moo me kun di rootiyto ti tuddugun, kun k'umbo mappa ye me? Ki kotto kune suldi don ize geɗ itadaɗ kun ki ti ziida wo kun ki'n zuune ye botto. Kune'ɗ eggun a t'ippe ko?»

¹⁸Ki kotto kune un d'ede eda, wo kun ki wolliyo ye! Kune un d'ede kuwwa, wo kun k'ollige ye! Kune un dunde baa

19 a mappa paat wede n'a-dimbe don dupu paat ga iimi geɗ, wo a onniyo gette oopiyo ki mappa kun d'ûune dambayi miibi kun zikiti me?» Kane an i di'n gime onamí, an'de: «Dambayi koomat makumu sire.»

20 Isa y'a ruute sey, y'ede: «Wo de un dunde baa a mappa sarat wede n'a burkita a kuuli dupu pide ga iimi geɗ, wo a onniyo gette oopiyo ki mappa kun d'ûune dambayi deero miibi kun zikiti me?» Kane an i di'n gime onamí, an'de: «Dambayi deero sarat.»

21 Inƙino maɗ y'an di ruute, y'ede: «Ki kotto suldi don n'ize geɗ itadaɗ kun ki ti zuune ye botto!»

Isa yi ele beeko a wede koosiyo

22 Isa ti sanalliyagí an iiney Betsayda maɗ, duwo an d'irkido wede koosiyo an i-d'iido a Isa, an i-d'obe bey, an'de: «Galmeega wede eɗ ki zaapo beezá, y'a t'ooone bee.»

23 Isa yi ziida bey wede geɗɗo, y'a y'irkide dokki t'ille. Y'iide'ɗ yi d'unƙite lee a edayí, wo y'a-ti ziipe beezí a tuddí, maɗ y'a yi tunde, y'ede: «Munda ki woliyo ko?»

24 Wede y'a ihina edayí wo y'a ruute, y'ede: «Eyye, duwo ni'ni woliyo, wo ni'ni woliyo aa inda i sooru.»

25 Isa y'a butte beezí a edayí sey. Maɗ wede edayí a t'ihina yi woliyo kereɗ.

26 Inƙino maɗ Isa y'a y'igibe wede ki boozí, wo yi di ruute, y'ede: «K'aaho boozá, k'adda k'ille k'addey ye.»

Isa miɗ yon wee wee?

(Matiye 16.13-20; Lik 9.18-21)

27 Isa ti sanalliyagí an d'ingile k'illiyagi gopponɗ ti geeger Sezare siido Pilip. A urzi maɗ sanalliyagí y'anni tunde, y'ede: «Duwo an rootiyo nuɗ wee wee?»

28 Kane an i di'n gime onamí, an'de: «Don soɗ an'de kee Zaɗ Batis, don ongo an'de kee nebi Eli, wo don ongo soɗ an'de kee nebi ti diine nebiyagi don ti kaaga.»

29 Maɗ Isa y'anni tunde, y'ede: «De kune me, kun'de nuɗ wee wee?» Piyer y'a t'ihina bizí, y'a ruute, y'ede: «Kee Almasi Raa yi biire.»

30 Inƙino maɗ Isa y'an di'n iipide, kono a wenda soo ton an i roota munda ye a tukki yode me.

Ono k'Isa a urzi k'untadi ti baldiyadi

(Matiye 16.21-23; Lik 9.22)

³¹Sanj mañ, Isa y'a iise dooyiso sanalliyagí, y'ede: «Nuñ wede an n'ehe aa ulo wede eñ, n'a dabirey baadañ. Kane ñoñ i dokkiyo ñoñziñ, deero ñoñ sedeke ti ñoñ suuniyo k'oogoro pây an di n' kiigirey. Duwo an di n' t'idey, wo onniyo sire k'aduwe mañ Raa y'a ti n' baldëy.»

³²Isa y'an di ruute patañ, mañ Piyer y'a y'irga siidí, y'a y'iise aapuđu.

³³Aame geñ Isa y'a-gime, edayí yi wolliyo sanalliyagí, wo y'a iise aapuđu Piyer, y'ede: «Kee Meeda siitandani t'a-t'ûune adda k'addá, ki ledfo dokki ti tuddó me! Elkisadá ti ere ki Raa soo ye, elkisadá ki ñoñ tudde.»

Mummino daaniya k'Isa te

(Matiye 16.24-28; Lik
9.23-27)

³⁴Sanj mañ Isa y'a wiike ñoñ duuru ti sanalliyagí, wo y'an di ruute, y'ede: «Wede yi dehu y'a daane urzi nuuno mañ, tuddí batum y'a ti kiigira, ki unto toñ y'a oyye y'a t'inda kono nuuno, wo y'a ni daane.

³⁵Inkino wede tuuku yi dehu boohiyo tuddí k'aggadí mañ, y'a ti dagga, wo ñe wede tuuku y'ooliyo tuddí kono nuuno wo ki Rabila Majjaanawa mañ, y'a t'utta.

³⁶A wede koñuwatú moo me suldi duniya pay y'anni t'oone, wo tuddí y'a ti dagge me?

³⁷Wo ki kotto wede geñ tuddí zooyatú ooñe, geñ yi k'aane y'a ki t'ele munda y'a ki pelke tuddí ye!

³⁸Aame wede y'isiyo sukiyagi a nuñ wo a onamó a ñaana ñoñ añkenño, kane ñoñ k'oldiko wo an ki seedu urzi Raa ye mañ, nuñ wede an n'ehe aa ulo wede eñ, aame n'etto ti dary'ika ere ki Meegó wo ti ere ki maaleekiyagi ñoñ kamileñ geñ, nuñ toñ ni-d'isa sukiyagi kay a yoñ me.»

Markus 9

¹Isa y'an di ruute sey, y'ede: «Derec inkino wo n'un di rooto: Ñoñ oñgoñ ti diine kane ñoñ añkenño eñ an ki ti t'inda ki poone pay ye, an di wolla Moziko Raa t'etto ti toogo baadañ gette.»

Ume k'eda k'Isa a-gime

(Matiye 17.1-9; Lik
9.28-36; 2 Piyer 1.17-18)

²Íide onniyo zoot k'ita mañ, Isa y'a-wiike ti yode Piyer, Zak wo Zañ, y'an d'an d'ingile siidañ k'ekki mukkolo sohoró. An iiney mañ, a ñaanañ geñ miñ tuddí a-gime sittú,

³inkino kallagí a t'ize tuwardí kar i ralita, adda siido pay ette wede a aane a-t'opile kallayí a t'ise tuware aa ki yode umbo.

⁴A kaamiki, kane sanalliyagi aɗo geɗ an wolloyo bibiraw nebi Eli ti Muusa an rootiyto t'Isa.

⁵Iɗkino maɗ Piyer y'a t'ihina bizí, yi di ruute Isa, y'ede: «Wede dooyisadey, beehiye'ŋ kine in di lekke a eɗɗo! Ay un d'okkima daabagi aɗo, a kee soo, a Muusa soo, wo a Eli soo.»

⁶Piyer munda y'a roote yi ki suune ye, kono kane aduwaɗ pay geɗ orgiso ti'ni ziida baadaɗ.

⁷Maɗ i d'iido dondirso ti di'n ippe kane geɗ me, wo t'adda dondirso gette an d'illiga golla, t'ede: «Eɗ ulo nuuno ni y' giyye baadaɗ. Kun y'ollo!»

⁸A kaamiki an di geldiso, wo de an wolloyo Isa siidí a sirpadaɗ me, wenda ti doolo umbo.

⁹A deeguzan t'ekki makkolo, Isa y'an di ruute, y'ede: «Kun ollo, a munda wede kun wulle geɗ, a wenda soo toɗ kun rootey ye, bini baldiya ki nuɗ wede an n'ehe aa ulo wede eɗ ti diine doɗ unto.»

¹⁰Onamí an d'umbe, wo de an tondiso tuddaɗ, an'de: «Onamí geɗ miɗ i-kaza moo me: baldiya ti diine doɗ unto me?»

¹¹Saɗ maɗ kane sanalliyagi an di y' tunde sey, an'de: «Ki moo me doɗ suuniyo k'oogoro an di rootiyo, an'de: “Ki poone i kimo Eli doo miɗ, saɗ Almasi Raa yi biire kollo” me?»

¹²Isa y'an di'n gime onamaɗ, y'ede: «Derec, Eli geɗ y'a etto ki poone, wo suldi pay y'an okkima a urzizaɗ. Wo de kun suune ono doɗ an riije ti kaaga adda mattup ki Raa, a tukki nuɗ wede an n'ehe aa ulo wede eɗ, n'a dabira baadaɗ, wo duwo an di n' kiigira.

¹³Wo kun ollo, n'un di rooto: Eli geɗ yoɗ y'iina wo duwo an i-d'ize ulsu aa addaɗ i dehu, geɗ a-t'iide a ono doɗ an riije ti kaaga adda mattup ki Raa a tukki yode.»

Eliyo beeko a ulo i-d'ede siitan a eedí

(Matiye 17.14-21; Lik
9.37-43)

¹⁴Aame Isa ti sanalliyagi aɗo an ti gime k'ume sanalliyagi doɗ an iili maɗ, an wolloyo doɗ duuru baadaɗ an d'an t'ugiye. Ti diinayaɗ i d'ede doɗ suuniyo k'oogoro an niikiyto ti kane.

¹⁵Kane doɗ duuru an wulle Isa maɗ, aame geɗ an d'iddira, an d'ukke tuddí an i t'isey toose.

¹⁶Iɗkino maɗ Isa y'a tunde sanalliyagi, y'ede: «A tukk'amo kun niikiyto ti kane me?»

¹⁷Maṅ ti diine doṅ duuru i d'ede wedusu, yi di ruute Isa, y'ede: «Wede dooyisadó, nuṅ n'a-d'iido ti ulo nuṅ i-d'ede siitan a eedí, bizí ti-t'ippe ki rootiyo umbo.»

¹⁸A ume tuuku siitan ti y'ambu maṅ, ti di-seddiyo a siido, bizí i-d'adfiyta goopiyagi, yi d'aadumu sinaní, wo y'a d'unto seṅ. Nuṅ n'a tunde sanalliyagá kono an ti-limmi siitan gette, wo de kane an ki d'iine ye.»

¹⁹Maṅ Isa y'a t'ihina bizí, y'a ruute, y'ede: «Kune doṅ kun ki ziipe addugun a Raa ye. Nuṅ ti kaagine ni lekkiyo ti kune, wo de a nuṅ kun ki d'umbe ye! Geṅ n'a ombiṅa ki daayum koo ti kune me? Ulo kun o d'edi.»

²⁰Maṅ ulo an i-d'iido. Aame siitan gette ti wulle Isa maṅ, ulo geṅ t'a zidde siido yi tunkulso bizí goopiyagi.

²¹Isa y'a tunde meek'ulo, y'ede: «Ulo t'ume muno i y'iise inḱino me?» Meega y'a ruute, y'ede: «I y'iise t'ume yoṅ neṅku.»

²²Onniyo muno siitan gette ti-ti y' seddiyo adda k'uwwo ise adda k'ahu ki t'owwadí. Wo de aame kee k'aane maṅ, ki wollo sommagey, k'okki a dolladey!»

²³Isa yi di ruute, y'ede: «Ki moo me ki rootiyo, k'ede: “Kee k'aane maṅ” me? A wede i zaapu addí geṅ, suldi pay a Raa i-k'oone ye, y'aane.»

²⁴A kaamiki meek'ulo y'a idili, y'ede: «Nuṅ ni ziipe addó a kee, wo de k'a ni noogi kono nuṅ zaapu k'addó baata.»

²⁵Isa yi wolliyo doṅ duuru i-dihimo tuddaṅ, inḱino maṅ yi di ruute a siitan gette ti golla zakidí, y'ede: «Koṅ siitan no, mi-ti'n isiyto duwo dunḱiyagi wo m'an t'appiyta a bohanaṅ geṅ, m'ollo ni-di rooto, mi t'addo ti tukk'ulo me, wo mi kima ye baa!»

²⁶Siitan t'a iise dollite, ulo t'a zidde siido yi-zehiso bar bar, wo t'a t'udde. Ulo geṅ lokiyok aa y'inda, inḱino doṅ baadaṅ a sirpa an di ruute, an'de: «Yoṅ y'inda.»

²⁷Wo de Isa yi ziida beezí, y'a y'iiziga, maṅ ulo y'a t'ihira.

²⁸Saṅ Isa y'aahe boy maṅ, kane sanalliyagí an di y' tunde siidaṅ, an'de: «Wo de ki moo me siitan gette kaye ay ki d'iine lommatú ye me?»

²⁹Maṅ Isa y'an di ruute, y'ede: «Ita siitan ere kino ette, adfiyatú t'urzi tonḱiyo Raa daṅṅal.»

Ono k'Isa ki sirwe a urzi k'untadí ti baldfiyadi

(Matiye 17.22-23; Lik
9.43-45)

³⁰T'ume geṅ an d'ingile, an di doopida ti siido Galile. Isa yi ki dehu duwo an ki suune umayí ye,

31kono yi dehu y'a dooye sanalliyagí. Injino y'an di ruute, y'ede: «Nuñ wede an n'ehe aa ulo wede eñ, an di n' t'eley a bey duwo. Kane an di n' t'idey, wo onniyo sire k'aduwe mañ Raa y'a ti n' bald'ey ti diine doñ unto me.»

32Wo de kane sanalliyagi ita k'ono geñ an ki'n zuune ye, wo ki tondiyadí an d'orgiso.

Wee wee goole a jiire me?

(Matiye 18.1-5; Lik
9.46-48)

33Isa ti sanalliyagi an d'iiney Kapernayim. Aame geñ an t'iide adda boy, wo Isa y'anni tunde, y'ede: «De a urzi kun niikiyto a tukk'a moo?»

34Wo de kane an d'inda kuy, kono a urzi an niikito ti tuddañ an dehu an di suune, ti diinayañ miñ wee wee goole a jiire me.

35Injino mañ Isa y'a-guune, y'anni wiike sanalliyagi kane koomat makumu sire wo y'an di ruute, y'ede: «Wede tuuku yi dehu y'a t'ise ki biza mañ, yoñ geñ yi t'iso wede k'ita ti doñ pay, wo wede naabo a doñ pay.»

36Mañ Isa yi wiike ulo ñeñku, y'a y'ihira a diinayañ, y'a ti y' ziida beezí wo y'an di ruute, y'ede:

37«Wede tuuku yi seedu ulo aa yode eñ bey sire a sundó mañ, geñ aa yi seedu nuñ batum. Wo wede tuuku yi seedu nuuno mañ, geñ yi seedu nuuno ñañjal ye, wo de aa yi seedu wede i n'igibo pây.»

Wee wee yoñ ki kine me?

(Lik
9.49-50)

38Mañ Zañ yi di ruute a Isa, y'ede: «Galmeegey, kaye ay di wullo wede yi lommitte siitandani ti sundá, wo ay di dihe urzi k'ohirayí kono yoñ ti kine ye.»

39Wo de Isa y'a ruute, y'ede: «Kun y'ohira ye, kono wede y'aase suldí k'armika ti sundó, wo a kaamiki y'a-kime rootiyo ulsu a tukki nuñ sey, i k'ise ye.

40Wede aduziñ ye geñ, yoñ ki kine.

41Derec injino wo n'un di rooto: Wede tuuku yi eela ahu ñoyoyo a kulso ñañjal, a wede soo ti diinaguñ a suma ki nuñ Almasi Raa yi biire mañ, munda wede Raa yi dehu yi-t'eley geñ, y'a yi t'ooney.»

Suldí doñ i-t'eliyo wedusu adda k'oldíko

(Matiye 18.6-11; Lik 17.1-2)

42«Wede tuuku yi t'eliyo adda k'oldíko wede soo ti diine kane doñ tasse a urzi zaapu k'adde a nuuno mañ, a wede injino geñ, dabar ere an i di kette assa meeda a golladí an ti y' sedde adda bar gette, soodo sey ti ere yi t'ooney a daana Raa te.

⁴³Aame de beezá y'a-da t'ettiyo k'adda k'oldiko mañ, k'a-ɗekko mendí. Beehiye i jiire a kee, beezá soo wo k'a t'ooney lekkiyo ere ki daayum bee miñ, k'a lekke beyɗañ sirwañ wo k'a t'ettye k'adda k'uwo ere i k'unto ye.

[⁴⁴A ume geñ ɗuwo ge ruumiyo, ondirɗagi ge d'ombo ki daayum i ki ɗaŋgiya ye, wo uwo t'oggiyo ki daayum.]

⁴⁵Aame zindá t'a-da t'ettiyo k'adda k'oldiko mañ, k'a t'ooɗo k'a seɗɗo dokki ti kee. Beehiye i jiire a kee zindá soo wo k'a t'ooney lekkiyo ere ki daayum, bee miñ k'a lekke zoŋɗá sirwañ wo an ki ti seɗɗey adda k'uwo.

[⁴⁶A ume geñ ɗuwo ge ruumiyo, ondirɗagi ge d'ombo ki daayum i ki ɗaŋgiya ye, wo uwo t'oggiyo ki daayum.]

⁴⁷Wo aame ɗe ersadá t'a-da t'ettiyo k'adda k'oldiko mañ, k'a t'ooɗo mentú. Beehiye i jiire a kee t'ersadá soo wo ki t'ettye Moziko Raa, bee miñ k'a lekke edayá sire wo an ki ti seɗɗey adda k'uwo.

⁴⁸A ume geñ ɗuwo ge ruumiyo, ondirɗagi ge d'ombo ki daayum i ki ɗaŋgiya ye, wo uwo t'oggiyo ki daayum.

⁴⁹Wede tuuku toñ y'a t'oona dabar, wo tod' dabar gette aa uwo t'a ki ti k'oodiba kamileñ aa sumade.

⁵⁰Kane sumade'ñ munda wede beehiye, wo ɗe aame sumade geñ uñsuwadañ i t'ize umbo mañ, kañ mummino k'an ise uñse sey me? Injino mañ kune toñ kun lekko daayum uñse aakede sumade, wo kun di lekko ti toose ti tuddugun me.»

Markus 10

Dooyiso k'Isa a urzi peeriyo

(Matiye 19.1-9; Lik 16.18)

¹Ti Kapernayim Isa y'a t'iiziga, y'a t'iide siido Ziide. Sañ mañ yi-ti diipida ti dar k'ooye Zurden ti nee. Doñ baadañ an di-t'ugiyey sey, wo y'an iise dooyiso aakede naabadí ere daayum yi d'isiyo.

²Aame geñ i d'ede Pariziyen miibi an a d'iide sirpa k'Isa kono an dehu an i d'ekke ikka t'urzi k'ono. Injino an di y' tunde, an'de: «Oogiradiñ t'ele ko urzi a kule y'a-peere eddí te?»

³Isa onamañ y'an ti'n gime ti tonɗiyo, y'ede: «Oogoro ere Muusa y'un ele wee te?»

⁴Kane an di ruute, an'de: «Ti kaaga Muusa y'a ele urzi, aame wede yi-peere eddí mañ, yi di ɗekke mattup ki peeriyo yi di t'ele a beytú wo y'a ti t'igibe.»

⁵Mañ Isa y'an di ruute, y'ede: «Muusa y'un riine urzi k'oogoro geñ kono a eego zakidi ere un d'ede gettiyo.

⁶Wo de ono eŋ an riŋe ti kaaga adda mattup ki Raa, an'de: "T'ume k'eesiyo Raa yi ziipe suldi pay geŋ, y'ikkima aŋ kule t'ere.

⁷Kono kamo kule yi d'oola meegi ti meedi, y'a di ketta biŋ ti eddi.

⁸Wo kane sire geŋ an t'isa tudde soo." Inŋino maŋ kane sire ye baa, an t'ize tudde soo.

⁹Geŋ inŋino munda wede Raa y'a ti gitte geŋ, wede tudde yi ki t'eeze ye.»

¹⁰Isa ti sanalliyagi an aahe boy. An iide'ŋ sanalliyagi an di y' tunde sey a urzi peeriyo geŋ me.

¹¹Maŋ Isa y'an di ruute, y'ede: «Ki peeriyo k'erewo ulu, wo eddi yi ti biira wo yi ziida erewo ti doolo maŋ, yoŋ geŋ yi t'ize oldiko a daana k'eddi ere ki poone, kono Raa yi yi wolliyo yoŋ wede i moone t'ere bakadi.

¹²Wo erewo toŋ inŋino, aame kulatu ti y'iila wo ti ziida kule ti doolo maŋ, tode gette Raa yi ti wolliyo ere ti moone ti kule bakatu.»

Isa ti inŋi sunŋi

(Matiye 19.13-15; Lik 18.15-17)

¹³Duwo an i di ziko inŋi sunŋi a Isa kono y'an di zaape beezi a eedaŋ, miŋ kane sanalliyagi an ki dehu ye, an di'n eddisito duwo geŋ me.

¹⁴Isa yi wulle inŋino maŋ yi-ti gulkuwe, y'an di ruute a sanalliyagi, y'ede: «Kun oolo inŋi eŋ an d'etto ki tuddo, kun ti'n eegire ye, kono Moziko Raa tod'te ki doŋ i deeyiso aa kane kino.

¹⁵Derec inŋino wo n'un di rooto: Wede tuuku Moziko Raa yi ki ti seedu aa yi seedu ulo neŋku ye maŋ, yi ki t'etta ye.»

¹⁶Inŋino maŋ ulo soŋ yi di y'ambu, yi di zaapu beezi ki beeko a eedi eedi.

Wede laale ti Isa

(Matiye 19.16-30; Lik 18.18-30)

¹⁷Isa yi t'iiziga y'engile maŋ, i d'ede wedusu y'a ukko ki tuddi, y'a dikke a daanadi wo y'a yi tunde, y'ede: «Wede dooyisadey kee wede beehiye, n'aase moo me kono n'a t'ona lekkiyo ere ki daayum te?»

¹⁸Isa yi di ruute, y'ede: «Ki moo me ki rootiyo nuŋ wede beehiye me? Beehiye Raa soo danŋal, wenda ti doolo umbo.

¹⁹Kee urziyagi k'oogoro ki'ni suune doŋ an'de: Ki towwo wedusu mirsi ulu, ki moone t'ere bakada ise ti kule bakatu ulu, k'oogire ulu, ki rootiyo k'ono butte a tukki bakada a daana booro ulu, ombo bize ti suma duwo ulu, wo ki elo suma a meega ti meeda.»

20Maṅ wede geṅ yi di'n gime onamí, y'ede: «Wede dooyisadey, kane geṅ pay ni'ni seedu t'ume nuṅ obulso to.»

21Wede geṅ Isa yi di wolleyo tebeṅ wo y'a yi giyye, maṅ yi di ruute, y'ede: «Kee a ki biite munda soo: k'odo, suldi doṅ a-d'ede'ṅ ki t'owiltoy pay wo soṅko k'an d'eloy a doṅ an k'ede munda ye, iṅkino k'a t'ooney laale wede ki kotto a kandaane. Saṅ k'a t'edi wo k'a ni daana.»

22Aame wede geṅ y'illiga ono geṅṅo maṅ, ume k'edayí a t'ize zimolo wo y'a t'ize sommagi dondoṅ, kono yoṅ maaladí baadaṅ, saṅ y'a iṅgile.

23Isa y'a wulle sanalliyagí doṅ i ti y' d'uule, wo y'an di ruute, y'ede: «Ki kotto ooṅe baadaṅ a doṅ maala an t'ettey adda Moziko Raa te!»

24A onamí geṅ kane sanalliyagi an ziidá giggeraṅ. Wo de Isa y'an di ruute sey, y'ede: «Inṅi ki nuṅ, ki kotto ooṅe baadaṅ k'ettiyo k'adda Moziko Raa te!»

25Ooṅe a ziṅzo ti-t'adde ti buldo rippile me, wo geṅ ooṅe baadaṅ a ceere sey a wede laale yi-t'ettey a Moziko Raa te.»

26Maṅ kane sanalliyagi an ziidá giggeraṅ a jiire sey, an di rootiyto tuddaṅ, an'de: «Iṅkino maṅ, geṅ a utta wee wee?»

27Isa yi di'n wolleyo yerere adda k'edayaṅ wo y'an di ruute, y'ede: «Munda eṅ d'uwo an k'aane ye, wo de Raa y'aane, kono a Raa suldi pay i-k'ooṅe ye.»

28Maṅ Piyer yi di ruute Isa, y'ede: «Aṅkeṅ k'ollo, kaye'ṅ suldizey pay ay d'iilo wo ay di daaniya kee.»

29Isa yi di ruute, y'ede: «Derec iṅkino wo n'un di rooto: Wede tuuku yi iila boozí, ise zembadí kuuli erayi, meegí ti meedí, inṅizí wo dombizí kono nuuno wo ki Rabila Majjaanawa maṅ,

30a lekkiyo ere aṅkeṅṅo ette kane geṅ y'anni t'oona taṅ baadaṅ a ceera boydí, ise zemba kuuli erayi, maawi erayi, inṅi, dombi, wo ti dabar ere t'urzi doṅ k'olmidayí. Wo saṅ maṅ adda duniya ere ki daana, y'a t'ooney lekkiyo ere ki daayum.

31Doṅ baadaṅ aṅkeṅṅo kane ki biza, saṅ an t'isa doṅ k'ita, wo doṅ aṅkeṅṅo kane k'ita, saṅ an t'isa doṅ ki biza.»

Ono k'Isa doṅ k'aduwe a urzi k'untadí ti baldiyadí

(Matiye 20.17-19; Lik 18.31-34)

32Isa ti sanalliyagi an ti kili Zeruzalem, yo Isa y'an t'uugume. Kane sanalliyagi undaṅ a t'udde, wo doṅ i'ni daaniya toṅ orgiso t'anni ziidá. Maṅ Isa sanalliyagi koomat makumu sire geṅ y'an irga sey ki sirpadí, wo y'an d'iise rootiyo a munda wede saṅ i aaney, y'ede:

³³«Kun ollo, in ti kili ki Zeruzalem wo nuɗ wede an n'ehe aa ulo wede eɗ, an di n' t'eley a bey deero ɗoɗ sedefe ti ɗoɗ suuniyo k'oogoro. Kane geɗ t'urzi k'onamaɗ nuɗ booro t'a ni seedefe ki t'owwo, wo an di n' t'eley a bey ɗoɗ Yawudiyagi ye.

³⁴Kane geɗ an di n' t'okkey maade, an pidditey lee a tuddó, an di n' gorpipay ti marpa wo an aa di n' t'idey. Wo onniyo sire k'aduwe maɗ, Raa y'a ti n' baldey.»

Tondiyo ki Zak ti Zaɗ

(Matiye 20.20-28; Lik 22.25-27)

³⁵Maɗ maɗ Zak ti Zaɗ, inɗi Zebede, an a d'iide k'ume k'Isa wo an di ruute, an'de: «Wede dooyisadey, kaye ay dehu k'ay t'ise munda wede ay ki tonda.»

³⁶Maɗ Isa y'anni tunde, y'ede: «Kune kun dehu n'un d'ise moo me?»

³⁷Kane an i di ruute an'de: «Ay dehu k'a t'ele urzi, onniyo ki t'iida dary'ikada maɗ, kaye'ɗ k'ay ti'n zappey soɗ a ammidada, soɗ a geelada.»

³⁸Wo ɗe Isa y'an di ruute, y'ede: «Munda wede kun tondiyo, kun ki y' suune ye. Kun aana kun siba ko kop ki dabar wede nuɗ ni sobo me? Wo kun aana kun suyya batem ki dabar ere nuɗ ni suyyiso ko?»

³⁹Maɗ an i di ruute, an'de: «Eyye, ay aana.» Isa y'an di ruute, y'ede: «Derec, kop ki dabar wede nuɗ ni sobo geɗ kun siba, wo suyyiso batem ki dabar ere ni suyyiso gette kun suyya.

⁴⁰Wo ɗe ki ume konso wede a ammidada soɗ a geelada geɗ, urzi yoɗ a bey nuuno ye, ume geɗ yoɗ ki kane ɗoɗ Raa y'an ikkima.»

⁴¹Aame kane sanalliyagi ɗoɗ koomat geɗ an illiga maɗ, an d'iise kulkuwo ti Zak wo Zaɗ.

⁴²Maɗ Isa y'a ti'n wiike sanalliyagi geɗ pay ki daanadi, wo y'an di ruute, y'ede: «Kune kun suune, kane duwo an'ni wolliyo mozagi siidiyagi pay geɗ an d'ombo t'ekki ɗoɗzaɗ ti toogo, wo kane ɗoɗ deero an d'ombo t'ekki ɗoɗzaɗ t'urzi dokkiyo ere an d'ede.

⁴³Wo geɗ a diinaguɗ i dehu inkiyo a k'ise ye. Ki too maɗ, wede tuuku yi dehu y'a t'ise goole ti diinaguɗ maɗ, yoɗ geɗ yi t'iso wede naabaguɗ,

⁴⁴wo wede tuuku ti diinaguɗ yi dehu y'a t'ise ki biza maɗ, yoɗ geɗ yi t'iso bule ki kune pay.

⁴⁵Derec, nuɗ wede an n'ehe aa ulo wede eɗ, n'iido'ɗ kono duwo an o-ki naabe ye, wo ɗe n'iido'ɗ n'an di naabe duwo wo n'a oyye n'a t'inda kono n'a t'adde ɗoɗ baadaɗ t'adda k'oldikadaɗ.»

Eliyo beeko ki wede koosiyo sundi Bartime

(Matiye 20.29-34; Lik 18.35-43)

- ⁴⁶ Saŋ maŋ Isa ti sanalliyagí an d'iiney geeger Zeriko. A adfiyadaŋ ti geeger gettiyo geŋ doŋ duuru baadaŋ an di'n daaniya, an d'uuney wede koosiyo konso a biza k'urzi, yi d'ahultu. Wede geŋ sundí Bartime, ulo Time.
- ⁴⁷ Aame y'illiga eŋgilso geŋ Isa wede ti geeger Nazaret maŋ, y'a iise dollite, y'ede: «Isa kee Wede ti biza bumbú Dawut, k'iso adde koduwo a nuŋ!»
- ⁴⁸ Doŋ baadaŋ an di y'eddisito kono y'a anniga, wo de yoŋ y'a dollé i ceeriyo ki ceeriyo, yi d'eesiyo: «Kee Wede ti biza bumbú Dawut, k'iso adde koduwo a nuŋ, k'iso adde koduwo a nuŋ!»
- ⁴⁹ Isa y'a t'ihira, wo y'a ruute, y'ede: «Kun o yi waaki.» Maŋ koosiyo an di y' wiiko, an'de: «K'omboŋ, ki t'oozigi. Isa yi ki waaku!»
- ⁵⁰ Inŋkino maŋ kallayí y'a zidde, perek y'a t'iiziga, y'a iide k'ume k'Isa.
- ⁵¹ Maŋ Isa y'a yi tunde, y'ede: «Kee ki dehu n'a-d'ise moo me?» Yo koosiyo geŋ yi di'n gime onamí, y'ede: «Wede dooyisadey, ni dehu edayó a-t'ihina.»
- ⁵² Maŋ Isa yi di ruute, y'ede: «Kono kee ki ziipe addá a nuuno geŋ, k'utte k'aaho.» A kaamiki, edayí a t'ihina yi wolliyo, wo y'a diine Isa, an di sooru soo.

Markus 11

Ettiyo k'Isa ki Zeruzalem

(Matiye 21.1-11; Lik 19.28-40; Zaŋ 12.12-16)

- ¹ Isa ti sanalliyagi an iiney gopponŋ ki Zeruzalem, a sirpa k'illiyagi sundaŋ Betpaze wo Betani, wo a sirpa mokololo k'Inda k'Olibiye. A ume geŋ yi d'igibe doŋ sire ti diine sanalliyagí,
- ² wo y'an di ruute, y'ede: «Kun'do k'adda k'ille ere a daanagunŋ gettiyo. Kun iiney, kesiko kun t'ooney ulo buuru kettiyo, wenda kaŋ soo toŋ yi ki gili ye. Kun t'eezi, kun o-t'arkidi.
- ³ Aame wenda y'un ruutey, y'iisey: “Kun isiyo inŋkino'ŋ moo me?” maŋ, kun d'eesoy: “Buuru eŋ i dehu Galmeega, wo saŋ y'un di y' kimo kaamiki.”»
- ⁴ Inŋkino maŋ an d'ingile. An iide'ŋ an d'uuney ulo buuru kettiyo ti paate a biza k'urzi, a biza bumbú soo inŋkino, maŋ an t'iize.
- ⁵ Doŋ miibi i lekkiyo a ume geŋ an di'n wulle, maŋ an di'n tunde, an'de: «Kun isiyo moo me? De ki moo me kun t'eeziyo ulo buuru eŋ me?»
- ⁶ Maŋ kane sanalliyagi an an di'n gime onamaŋ aa doŋ Isa y'an ruuto. Inŋkino maŋ an di'n iili, an d'ingile.
- ⁷ Ulo buuru an i-d'iide a Isa, an a-ti gikkite kallagaŋ doŋ deero a dar k'ulo buuru wo Isa y'a-ti gili eego.

⁸Doŋ baadaŋ kallagaŋ doŋ deero an di gikkite a urzi, doŋ oŋgoŋ an dimbo puutagi k'inda ti balda, an di gikkite a urzi kay.

⁹Kane duwo doŋ i sooru ki daana ti doŋ i daaniya geŋ, pay kaŋ soo an di dollite, an d'eesiyo: «Tamma a Raa! Beeko Raa ti koona a ekki wede ettiyo ti suma Galmeega Raa!

¹⁰Beeko Raa ti koona a moziko ere ettiyo, moziko ere i t'eesa ti meegiŋ Dawut ette. Tamma a Raa t'awwa a kandaane!»

¹¹Maŋ Isa y'a iiney Zeruzalem, yi-t'iide booro Boy Raa. Y'a wullite suldi doŋ adda pay, wo ume y'ize baa peedo t'ette k'ooriyo, kesiko ti sanalliyagi kane koomat makumu sire geŋ, an d'iŋgile ki Betani.

Duudiyoy k'undumu sundi pigiyey

(Matiye 21.18-19)

¹²Soggo Isa ti sanalliyagi an t'udde ti Betani maŋ, aame geŋ mosogo t'a yi ziida.

¹³Ti dokki geŋ yi wulle undumu sundi pigiyey i-d'ede puutagi dogibok, maŋ y'a zikke kabbaŋ y'elkiyo yi-t'ooney inŋi, wo de y'iide'ŋ inŋi umbo, yi d'uuney puutagi daŋŋal kono umayi ki ehiyo i k'iina ye botto.

¹⁴Iŋkino maŋ Isa yi di ruute a undumu geŋ, y'ede: «Ti aŋki, wenda soo toŋ yi ki dekkala ulá y'a ki t'ooma ye baa!» Wo kane sanalliyagi an d'illiga.

Lomme doŋ suuk t'adda booro Boy Raa

(Matiye 21.10-17; Lik 19.45-48; Zaŋ 2.13-16)

¹⁵Saŋ an di gimo sey ki Zeruzalem, maŋ Isa yi-t'iide a booro Boy Raa, y'a iise lommite kane doŋ isiyo suuk ti doŋ k'owilte pay a ume geŋno. Y'an di gippirde taabulyagi ki doŋ pelkiyto soŋko ere ettiyo ti siidiyagi doolo wo ti kaakidagi doŋ k'owilte deere.

¹⁶Wo a doŋ pay y'an di tuuge ki sokiyo suldi k'adda booro Boy Raa me.

¹⁷Maŋ y'an iise dooyiso, y'ede: «Kun ollo, ono eŋ an riine ti kaaga adda mattup ki Raa, an'de: “Boozó eŋ an di y' waaka boy wede ki tondiyo Raa ki ita duwo pay.” Wo de kune, kun di y'ize urmi k'ombide doŋ k'oogire!»

¹⁸Kane deero doŋ seŋeke ti doŋ suuniyo k'oogoro an illiga iŋkino maŋ, an dehuu urzi ki towwadi. Wo an isiyo iŋkino kono an orgiso, kono doŋ duuru dooyisadi ti'ni ziida.

¹⁹A lohe peedo t'a t'iire maŋ, Isa ti sanalliyagi an t'udde t'adda geeger me.

Ono k'Isa a tuk'undumu sundi pigiyey i biiha

(Matiye 21.20-22)

²⁰Soggo ti soohe aŋ Isa an addiya tiŋ geŋno, maŋ an wolliyo pigiyey wede Isa yi duude geŋ i biiha ti sondayzi pay.

²¹Piyer geɗ y'a ilke a munda wede ize, maɗ yi di ruute a Isa, y'ede: «Wede dooyisadey, ki wollo pigiye wede ki duude i biiha.»

²²Maɗ Isa y'an di ruute, y'ede: «Kun zaapo addugun a Raa.

²³Derec inkiwo wo n'un di rooto: Wede'ɗ y'aane yi di ruute a tokomo ette, y'a t'eese: "T'umayí eɗ mi t'oozo, mi t'ooro adda bar", daa niikiyo addí, wo de yi zaapu addí munda wede yi ruute geɗ i t'isa maɗ, geɗ Raa yi di t'ela.

²⁴Kono kamo n'un di rooto: Suldi don pay kun tonɗiyo Raa geɗ, kun zaapu addugun a yode kun uune baa, wo kane geɗ y'un di'n t'ela.

²⁵Wo aame kun t'ihira tonɗiyo Raa wo un d'ede ono ti wenda maɗ, kun i t'iso tambobino, kono Meegugun Raa a kandaane ton y'un t'isa tambobino kay a munda wede kun a ti doopide me.

[²⁶Wo de aame a don a ti doopide a onamgun geɗ tambobino kun an k'isiyo ye maɗ, Meegugun Raa a kandaane ton y'un k'isa ye kay tambobino a munda wede kun a ti doopide me.]»

T'urzi k'aaye Isa yi naabiya me?

(Matiye 21.23-27; Lik 20.1-8)

²⁷Saɗ maɗ an di-gimo ki Zeruzalem. Koore Isa yi t'iide yi sooru adda booro Boy Raa geɗ, kane deero don sedeke, don suuniyo k'oogoro wo ti don i dokkiyo Yawudiyagi an d'iido k'ume yode.

²⁸Inkiwo maɗ an di y' tunde, an'de: «Kee k'isiyto suldi eɗ t'urzi k'aaye? Wo a ele wee wee urzi k'isiyto suldi eɗ me?»

²⁹Maɗ Isa y'an di'n gime onamaɗ, y'ede: «Nuɗ n'un di'n tondo a munda soo danɗal. Onamó kun o-ti'n kami, wo nuɗ ton n'un ti y' kiza urzi wede ni d'isiyto suldi eɗ me.

³⁰Aame Zaɗ duwo y'anni zuyye batem geɗ, urzi iido ti Raa kunun, ti duwo ko? Onamó kun o ti'n kami.»

³¹Maɗ an d'iise rootiyto ti tuddaɗ, an'de: «Aame kine in ruuta: "Iido'ɗ t'urzi Raa" maɗ, yoɗ y'a roota: "Inkiwo ki moo me kun ki d'umbe a ono Zaɗ ye me?"

³²Wo aame in ruuta: "Iido'ɗ t'urzi duwo ..." maɗ? An rootiyto inkiwo kono an d'ede orgiso a don duuru, kono kane pay geɗ an elkiyo'ɗ ki kotto Zaɗ yoɗ nebi.»

³³Inkiwo maɗ Isa onamí an i-ti'n gime, an'de: «Ay ki suune ye.» Maɗ Isa y'an di ruute, y'ede: «Nuɗ ton maɗ n'un ki y' ruute ye kay, wede o ele urzi ni d'isiyto suldi eɗ me.»

Markus 12

Ono ombide a tukki don naabo doome don ulpi

(Matiye 21.33-46; Lik 20.9-19)

¹ Saŋ maŋ Isa y'an d'iise rootiyto t'ono ombide a deero Yawudiyagi, y'ede: «I d'ede wedusu injkino yi d'iite doome k'inda sundaŋ biŋ. Doome geŋ y'a ti y' duule ti waaya moŋgali, y'a d'ittiba sôole ki ŋay'yu k'inni k'inda biŋ geŋno, y'a d'ippe boy sohuru ki boddiyo. Maŋ doome geŋ y'an d'ele duwo an di naabe saŋ yoŋ aggadí y'a t'amba, wo yoŋ tuddí y'a ingile torguwo.

² Aame onniyo ki rakku t'iina maŋ, y'a igibe wede naabadí soo ki tukki doŋ naabo doome geŋno, kono an i di t'elo aggadí ere k'inni k'inda biŋ an rikke te.

³ Aame y'iiney maŋ, kane an di y' ziida, an di y' gusse wo an aa di y'igibe beezi guguba.

⁴ Wede doome'ŋ y'an d'igibe wede naabadí ti doolo, wo yode geŋno toŋ an di y' tiiza a eedí, an a-ti y' gildite.

⁵ Yi d'igibe k'aduwe sey, yode geŋ an di y'ide. Saŋ wede doome doŋ naabadí baadaŋ y'ikkipe k'ita toŋ doŋ naabo doome an di'n gussite, wo doŋ oŋgoŋ an di'n iidite.

⁶ K'ita maŋ i guute miŋ ulo geyyisadí, y'an ti y'igibe wo y'a ruute t'adda k'addí, y'ede: "Yoŋ eŋ ulo k'addó, an i d'ottiley."

⁷ Wo de kane doŋ naabo doome an d'iise rootiyto ti tuddaŋ, an'de: "Eŋno ulo wede doome i oopa me! In y'odo kono doome eŋ in d'ooapa a kine."

⁸ Maŋ ulo geŋ an di y' ziida, an di y'ide wo nuune an t'umbe an di ziddo dokki ti doome me.»

⁹ Maŋ Isa y'a ruute, y'ede: «Wo aŋkeŋ wede doome y'aasa mummino? Yoŋ y'a etto, doŋ naabo doome y'a ti'n t'ida, wo doome k'inda biŋ y'an t'ela a doŋ naabo doolo, saŋ aggadí y'a t'amba.

¹⁰ Ki kotto kune kun gire ono eŋ an riine ti kaaga adda mattup ki Raa, an'de: "Mokkolo ere doŋ k'oozige boy an di zidde mentú gette, tode gettiyo a t'ize mokkolo ere majjaanawa a jiire k'oozige boy te.

¹¹ Munda geŋ iido ti Galmeega Raa, wo a kine in di wolliyo'ŋ munda geŋ i jiire eego."»

¹² Kane deero Yawudiyagi an di zuune kereŋ, Isa yi rootiyo ono ombide geŋ ti kane me. Injkinno maŋ an di dihe urzi an di y' seeda, wo de an d'urgide a doŋ duuru. Maŋ an di y'iili, an d'ingile.

Eliyo jibaaye a mozigo goole ki Romen

(Matiye 22.15-22; Lik 20.20-26)

¹³ Saŋ maŋ deero Yawudiyagi an d'igibe doŋ miibi ti diine Pariziyen ti doŋ a ita k'Erod k'ume k'Isa, kono an i t'ekka ikka t'urzi k'onamí.

¹⁴An iido maṅ, an i di ruute, an'de: «Wede dooyisadey, ay suune kee ki rootiyo ono doṅ d'erec, ki k'orgiso eda d'uwu ye, ki'ni wolliyo d'uwu geṅ pay kaṅ soo, wo ki dooyiso urzi Raa t'ono doṅ d'erec. Aṅkeṅ a urzi k'oogiradiṅ miṅ jibaaye a mozigo goole ki Romeṅ geṅ k'eliyo kunuṅ, k'eliyo ye ko? In t'ele kunuṅ, ulu ko?»

¹⁵Wo Isa y'a zuune kane bizaṅ sire sire, iṅkino maṅ y'an di ruute, y'ede: «De ki moo me kun o d'ekkiyo ikka me? Kun o k'eeli tamma soo, n'a ki wolle d'o.»

¹⁶Maṅ an i-d'eele tamma soo, wo Isa y'anni tunde, y'ede: «Undiso ti suma ekki tamma ette k'aaye?» Kane an i di'n gime onamí, an'de: «Ki mozigo goole ki Romeṅ.»

¹⁷Maṅ Isa y'an di ruute, y'ede: «Iṅkino maṅ munda wede ki mozigo goole ki Romeṅ yoṅ ki yode kun i y'elo, wo munda wede ki Raa yoṅ ki yode, kun i y'elo.» Aame an illiga ono geṅṅo maṅ, an ziida giggeraṅ kono yode geṅ me.

Tondiyo a urzi baldiya

(Matiye 22.23-33; Lik 20.27-38)

¹⁸Doṅ miibi ti diine doṅ an'ni waaku sundaṅ Saduseyeṅ geṅ, an d'iide sirpa k'Isa. Kun suune kane Saduseyeṅ an rootiyo, doṅ i t'inda an ki ti balda ye. Iṅkino Isa an di y' tunde, an'de:

¹⁹«Wede dooyisadey, Muusa yi riije ti kaaga adda mattup k'oogoro munda wede in d'ise me, y'ede: “Aame wede y'inda wo yi iili erewo daa magiṅe maṅ, mandaayawa gette leemadí y'a ti seeda kono an t'ehe iṅṅi a suma ki wede inda geṅṅo.”

²⁰Iṅkino aakede i-d'ede zemba kane sarat. Wede ki poone geṅ y'a ziida erewo wo y'a inda daa magiṅe.

²¹Mandaayawa gette leema wede ki sirwe y'a ti ziida, wo yode toṅ y'a inda daa magiṅe kay, wede k'aduwe toṅ iṅkino.

²²Kane zemba sarat geṅ an ti duude pay, wo wede tuuku yi-t'oone magiṅe umbo. Aame kane sarat geṅ pay an t'inda maṅ, tode erewo gettiyo toṅ t'aa d'inda.

²³Iṅkino maṅ a onniyo ere doṅ i t'inda an ti balda geṅ, ti diine kane zemba geṅ erewo gette t'aasa k'aaye, kono kane sarat pay geṅ miṅ kulutú me?»

²⁴Isa y'an di ruute, y'ede: «Kune kun ti digge a elkiyaguṅ, kono ki kotto kun ki'n suune ye ita k'ono doṅ an riije ti kaaga adda mattup ki Raa, ise toogo Raa toṅ maṅ.

²⁵Derec, a onniyo ere doṅ i t'inda an ti balda geṅ, kuuli ti erayi an ki sedfa tuddaṅ ye baa, wo de an di lekkey daa sedfu aa maaleekiyagi a kandaane.

26Wo a urzi baldiya ki donj i t'inda genj, ki kotto kun gire adda mattup ki Muusa ono donj Raa yi-ruute t'adda beyga k'undumu oggiyo uwwo dala dala genj, y'ede: "Nuñ Raa k'Ibirayim, k'Isaaka wo ki Yakup."»

27Isa y'a ruute sey, y'ede: «Raa genj yonj Raa ki donj unto ye, yonj Raa ki donj zeere. Genj ki kotto kun ti digge a elkiyagun gette.»

Urzi k'oogoro wede goole a jiire

(Matiye 22.34-40; Lik 10.25-28; 20.39-40)

28I d'ede wede suuniyo k'oogoro soo injkino, yi'n ollige Isa an niikiyto ti Saduseyenj me. Wo y'illiga Isa y'anni gime onamanj derec manj, y'a d'iide sirpadí wo y'a yi tunde, y'ede: «T'adda diine k'urziyagi k'oogoro pay ki Muusa genj, urzi k'oogoro wede goole a jiire tuuku me?»

29Isa yi di'n gime onamí, y'ede: «Urzi k'oogoro wede a jiire enno: "Kun ollo donj k'Izirayel no, Galmeega Raaziñ, yonj Galmeega soo danjal."»

30Ki geyyo Galmeega Raazá ti addá pay, ti undá pay, ti elkiyadá pay wo ti toogadá pay."

31Wo wede ki sirwe enno: "Ki geyyo bakadá aa ki geyyiso tuddá batum." Urzi k'oogoro wede a ceera kane sire enj umbo ti doolo me.»

32Wede suuniyo k'oogoro yi di ruute a Isa, y'ede: «Genj beehiye wede dooyisadey, onamá ki ruute genj derec. Galmeega Raa yonj soo danjal, Raa ti doolo umbo daa yode me.

33Wede genj y'a geyye Raa ti addí pay, ti elkiyadí pay wo ti toogadí pay, wo y'a geyye bakadí aa yi geyyiso tuddí batum. Wede iza injkino manj, genj i jiire sedeke ere an oggiyo a ume sedeke, wo i jiire sedeke ere an isiyo ki seydi pay.»

34Isa y'illiga ono wedusu yi'ni ruute genj derec manj, yi di ruute, y'ede: «Kee dokki ye ti Moziko Raa te.» Wo t'ume genj an d'urgide, an di y' tondite ti doolo sey me.

Almasi ti Dawut

(Matiye 22.41-46; Lik 20.41-44)

35Isa yi dooyiso duwo adda booro Boy Raa, aame genj y'an di ruute, y'ede: «De mummino kane donj suuniyo k'oogoro an di rootiyo Almasi Raa yi biire, y'adfo ti biza bumbu Dawut me?

36Wo yode Dawut batum y'a ruute ti kaaga t'urzi k'Unde Kamilenj, y'ede: "Galmeega Raa yi di ruute a Galmeegó, y'ede: K'edi ki-koona a ammidadó kino, bini donj k'aduzá n'an isa aa munda ki bita ti dandi zonjá."

³⁷Kun ollige, yode Dawut batum yi yi waaku Almasi “Galmeega”. De geɗ mummino Almasi y’a adɗo ti biza bumbu Dawut ɗanɗal me?» Aame geɗ ɗoɗ duuru baadaɗ an di y’ollige ti ulbe uɗse.

Ondirso a ɗuwo a tukki ɗoɗ suuniyo k’oogoro

(Matiye 23.1-12; Lik 20.45-47)

³⁸Isa a dooyisadi gette y’an di ruute a ɗuwo, y’ede: «Kun koona mentikagi ti ɗoɗ suuniyo k’oogoro! Kane an geyyiso sooru ti kallagi deero a arga boy, wo a bere ɗoɗ duuru an dehu ɗuwo an an di’n t’eesite ti ottilso.

³⁹Adda boyɗi ɗoɗ in di dooyiso, an dehu an koone a ume wede suma, wo adda tarnaapagi a ume k’ombo toɗ, an dehu an koone a ume wede suma pây.

⁴⁰Kane geɗ bey mandayɗayi an t’ombo pay, wo soɗ an eesiyo tonɗiyo Raa maɗ ki noko nokot kono ɗuwo an di’n wolle. Kono k’iɗkino geɗ booradaɗ t’a kooney wehini a ceerey.»

Mandaayawa i-k’ede munda ye

(Lik 21.1-4)

⁴¹Saɗ maɗ Isa y’a-guune edayí k’ume sandup ere ɗuwo an d’eliyo soɗko adda booro Boy Raa, yi woliyo mummino ɗuwo an obe soɗko me. ɗoɗ bey geɗ an d’obe soɗko baadaɗ.

⁴²Wo i d’ede mandaayawa t’a iina, k’umbatú ti d’ibi soɗko sunni sunni sire.

⁴³Iɗkino maɗ Isa y’a wiike sanalliyagí wo y’an di ruute, y’ede: «Derec iɗkino wo n’un di rooto: Mandaayawa i-k’ede munda ye ette, tod’ t’ele a jiire ti kane ɗoɗ pay oɗgo eliyo soɗko adda sandup gettiyo.

⁴⁴Derec, kane ɗoɗ doolo pay geɗ an ele t’adda soɗko ere an uupe oopiyo, wo ɗe tod’te k’umbatú’ɗ t’a d’ele pay soɗko ere ii guute ki lekkiyatú te.»

Markus 13

Ono a urzi ruugiyo Boy Raa

(Matiye 24.1-3; Lik 21.5-7)

¹Saɗ maɗ Isa yi t’udde t’adda booro Boy Raa, aame geɗ wede soo ti diine sanalliyagí yi di ruute, y’ede: «Wede dooyisadey, ki wollo majjaanika moɗgali ti oozige boy enno ɗo!»

²Isa yi di ruute, y’ede: «Derec, ki woliyo boy an t’iiziga majjaane eɗ, makkolo soo toɗ t’ekki bakatú i ki lekka ye, pay a ruuga.»

Eesiyo ki dabar ere baadaɗ

³Isa y’a iɗgile k’ekki makkolo k’Inda k’Olibiye, y’a guune edayí k’ume Boy Raa. Aame geɗ sanalliyagí Piyer, Zak, Zaɗ wo Andire, kane siidaɗ ti yode ɗanɗal an di y’ tunde, an’de:

⁴«Kee k'ay ki ti rooti d'oo, suldi geɗ an aana woogo me? Wo moo me munda wede a kiza onniyo kino suldi pay geɗ an aana me?»

⁵Inkino maɗ Isa y'an d'iise rootiyto, y'ede: «Kun koona mentikagi, wenda soo toɗ y'un ti'n dagga ye.

⁶I d'etto d'ooɗ baadaɗ an t'ambo sundó, wede tuuku toɗ y'a t'eesa: "Nuɗ Almasi Raa yi biire!", wo kane geɗ an di dagga duwo baadaɗ.

⁷Kun d'olliga tarkuuse ki arka goppon, wo kun d'olliga rabila k'arka dokki. Aame geɗ kun addira ye. I dehu suldi geɗ an d'aane, wo aame geɗ a ki t'isa d'angiya duniya ye botto.

⁸Doɗ siido soo ti siido soo te an deyya ti tuddaɗ, d'oo mozigo soo ti mozigo soo me an deyya ti tuddaɗ kay. I d'isa noɗɗirso siido adda siidiyagi baadaɗ, wo i d'isa mosogo paɗ. Wo kane suldi geɗ aakede kakkisa ere ki poone k'erewo addutu i t'umbe k'ehiyo.

⁹Kun koona mentikagi a urzi lekkiyagun, kono duwo an un ti'n sedda an un di'n t'etta k'ume d'oo booro, wo an un di'n gorpipa ti marpa adda boydi d'oo in di dooyiso. An un di'n t'etta daana d'oo deero siido wo daana mozagi, kono kune d'oozoo. Aame geɗ a daanadaɗ kun t'ooa urzi kun di roota a suldi d'oo kun wulle wo kun illiga a tukki nuuno geɗ me.

¹⁰Ki poone onniyo gette t'a aana geɗ, i dehu Rabila Majjaanawa an an ti kizite a ita duwo pay.

¹¹Wo aame an un ti'n zidda kono an un di'n t'ette k'ume d'oo booro maɗ, ulbugun un t'ooda ki poone ye a munda wede kun di rootey me. A ume geɗ miɗ Raa y'un t'eley ono d'oo kun di rootey. Inkino maɗ aame kun rootey geɗ, ono ettey ti suuniyo kune ye, wo de ettey t'Unde Kamilen.

¹²Leema y'an di y' t'ela leemadi a bey duwo ki towwadi, wo meege toɗ inkino kay a inñizi me. Inñi an di kima adu ki maawaɗ, an deha urzi duwo an di sedda maawaɗ ki towwadaɗ.

¹³Kune d'oo duniya pay an un di'n olmid'a kono kun umbe a sundó, wo de wede y'a ziida zakidi a urzizo bini d'angu maɗ, yode geɗ Raa y'a y'utta.

Onniytagi d'oo etto ki dabar baadaɗ

(Matiye 24.15-25; Lik 21.20-24; 17.23; 21.8)

¹⁴Kune kun di wolla munda wede ulsu k'a y'azzira wo yi lattiya, yode geɗ an ti y' zaapa adda Boy Raa a ume i ki dehu k'ettiyo ye. Wede i gariya ono eɗi ti'ni soodo beehiye. Aame geɗ kane d'oo adda siido Ziide an t'ombo k'ekki moɗgali.

¹⁵Wede y'a ti gili yi-guune t'ekki dangayadi man, yon geɗ yi-deega, y'etta ambu munda adda dangay ye, yi t'ombo.

¹⁶Wo wede yon adda doome man, yi t'ombo, yi kima boy ambo kallayí wede goole ye.

¹⁷A onniytagi geɗ aasa dabar baadan a kane erayi don mahuwagi ti don inñizan an oodiyo!

¹⁸Kun tondo Raa kono suldi geɗ a k'aana a ume reele ye.

¹⁹Derec, a onniytagi geɗ dabar t'aasa ooŋe baadan. T'ume Raa y'ikkima duniya bini ankeŋŋo, dabar inkiino i k'ize ye, wo ki daana ton i k'isa ye.

²⁰Aame onniytagi don ki dabar geɗ Galmeega Raa y'a ki'n ihira goppon ye man, wede tudde soo ton umbo a lekka zeere me. Wo ki kotto onniytagi geɗ y'an ohira goppon kono don yi biire ki yode.

²¹Inkiino man aame wenda y'iisa: "Almasi Raa yi biire, yon a enno!" ise "Yon a ummey!" man, kune onami kun amba ye.

²²Ni rootiyo inkiino kono i d'adfa don an ti t'isa tuddan aa Almasi Raa yi biire, wo ti don an ti t'isa tuddan aa nebiyagi. Kane geɗ an d'isa suldi k'armika ti suldi don i ceeriyo eego, aame urzi ede man kane an di dagga duwo don Raa yi biire ki yode, wo an ki d'aana ye.

²³Kun koono mentikagi, suldi pay en n'un ti'n ruute ki poone an d'aana.»

Kama ki yo wede an y'ehe aa ulo wede

(Matiye 24.29-31; Lik 21.25-28)

²⁴Isa y'an di ruute sey, y'ede: «Onniytagi don ki dabar geɗ an t'ingila lewwet man, i d'aana onniytagi don peedo ti ki toora ye, tere yi ki toora ye,

²⁵molɗali an sildita ti kandaane, wo suldi don an d'ede toogo a kandaane, Raa y'a ti'n gozziga.

²⁶Aame geɗ duwo an di n' wolla nuɗ wede an n'ehe aa ulo wede en, ni kama ekki dondirso ti toogo ere pay wo ti daryika.

²⁷Wo n'a t'igiba maaleekiyagi k'adda siidiyagi don a duniya itatu pide, an di t'ogiya don ni biire.»

Ono ombide a tukki tormo

(Matiye 24.32-36; Lik 21.29-33)

²⁸«Kun wollo wo kun elko a ono ombide don a tukki tormo ettiyo: Aame tormo t'eesiyo oddize wo puutagutu eesiyo roobiyo man, geɗ kune kun suune adda k'addugun kizini yon goppon.

²⁹Geŋ iŋkino kay, kune toŋ kun wulla sulđi geŋ an iina maŋ, kun suuno kama ki nuŋ wede an n'ehe aa ulo wede eŋ tod'te goppon, aakede nuŋ a biza bumbugun.

³⁰Derec iŋkino wo n'un di rooto: Doŋ aŋkenno eŋ an ki ti t'inda pay ye, ki poone sulđi pay geŋ an d'aana me.

³¹Kandaane kane ti siido an t'eŋgila, wo kane onamó an ki t'eŋgila ye, an di lekka ki daayum.»

Raa siidí i ti suune onniyo te

³²«Wo sulđi geŋ an aana a onniyo tuuku koo, a peedo ere tuuku koo maŋ, i suune yode Meega Raa siidí. Wenda doolo yi ki suune ye, ise maaleekiyagi a kandaane, ise Ulo Raa toŋ maŋ.

³³Kun koonaa mentikagi, kun lekko zeere, kono onniyo gette kun ki ti suune ye.

³⁴Sulđi geŋ i deey'iso aa wede yi t'ette torguwo. Attidí boozí y'an d'iili a bey doŋ naabadí, a wede tuuku toŋ yi d'eele naabo sittú sittú, wo a wede boohiyo biza bumbu yi ruute, y'ede: "K'ollo, ki lekko zeere!"

³⁵Iŋkino kun lekko zeere, kono wede boy yi kimo a peedo ere tuuku kun ki suuna ye: y'aana a lohe koo, diddo koo, uzu y'ôola koo, ti soohe koo maŋ.

³⁶Aame yi kimo a onniyo ere kun ki ti suune ye maŋ, y'un gi di'n t'oona kun udige ye.

³⁷Ono doŋ n'un rootiyo eŋ, ni rootiyo a duwo pay: Kun lekko zeere!»

Markus 14

Dehutu k'urzi ki tôwwó k'Isa

(Matiye 26.1-5; Lik 22.1-2; Zaŋ 11.47,49,53)

¹A guute onniyo sire maŋ tarnaape Pak ki Yawudiyagi wo tarnaape wede an d'ombo mappa daa k'orme geŋ, an d'adfa. Maŋ kane deero doŋ sedeke ti doŋ suuniyo k'oogoro, an dehutu urzi Isa an di y' seeda ti metiŋko ki tôwwadí.

²Wo kane an di ruute, an'de: «Yoŋ in ki y' seeda adda tarnaape kino ye, para maŋ doŋ duuru an in di'n t'ooziga ono.»

Obe k'egey doŋ eediyadaŋ unse ekk'Isa

(Matiye 26.6-13; Zaŋ 12.1-8; Lik 7.36-38)

³Isa yoŋ a ille ki Betani adda boy ki Simo wede ti poone yoŋ ki bitide, an di guune ombo. Aame an ti guune geŋ i d'ede erewo ti t'uddo, a beytú ulo diŋgile an ikkima ki mukkolo sundutú albaatir, adda egey doŋ eediyadaŋ unse. Egey geŋ sudaŋ nardo, wo zooyayaŋ ooŋe baadaŋ kono an a ki gilse ti munda ye. T'iide'ŋ, ulo diŋgile golladí t'a dihima, wo egey geŋ ti-t'ibi ekk'Isa.

⁴Maṅ doṅ oṅgo ti diine kane doṅ eṅṅo geṅ ulbaṅ an ki t'ize uṅse ye, an di rootiyto diinayaṅ, an'de: «De ki moo me ti ti'n lattiya egey doṅ eediyadaṅ uṅse geṅ me?»

⁵Egey geṅ in aane in t'owila in t'oone tamma meeda ado ti uto, wo in an t'ele soṅko gette a doṅ an k'ede munda ye.» Wo an i-d'orbite baadaṅ a erewo gette.

⁶Wo de Isa y'a ruute, y'ede: «Erewo kun t'oolo, kun i-t'ooḍe ulbutú ye, kono munda wede t'o ize geṅ a nuṅ uṅse.

⁷Kane doṅ an k'ede munda ye geṅ an lekka daayum ti kune, wo kun aane kun an d'ise beehiye aame kun dehu maṅ. Wo de nuṅ ni ki lekka daayum ti kune ye.

⁸Tod' t'ize munda wede a toogatu, tod' t'o di y'irge egey doṅ eediyadaṅ uṅse a tuddó eṅ aakede ti n'ikkima ki poone an di n' t'ela adda muuzo.

⁹Derec iṅkino wo n'un di rooto: A omagi pay adda duniya an kizita Rabila Majjaanawa geṅ, erewo ette duwo an t'ida taaya a naabo ere tod' t'ize, wo sundutu a ki danda ye.»

Ziidas ti deero doṅ sedefe

(Matiye 26.14-16; Lik 22.3-6)

¹⁰Ziidas Iskariyot wede soo ti diine sanalliyagi kane koomat makumu sire geṅ, y'iide'ṅ y'a uuney kane deero doṅ sedefe kono yi dehu Isa y'an di y' t'ela beezaṅ.

¹¹Aame an illiga iṅkino maṅ, kane ulbaṅ a t'ize uṅse wo an i di ruute an i-t'eela soṅko. T'ume geṅ Ziidas y'a iise dehu k'urzi wede kaṅ mummino y'an di y' t'ela Isa a beezaṅ me.

Isiyo k'ombo ki tarnaape Pak

(Matiye 26.17-19; Lik 22.7-13)

¹²Onniyo ere ki poone ki tarnaape Yawudiyagi wede an d'ombo mappa daa k'orme gette t'a iina, tod'te onniyo ere an di walduṅtu iṅṅi dambami an d'isiyo ombo ki tarnaape Pak ki Yawudiyagi. Aame geṅ sanalliyagi k'Isa an di y' tunde, an'de: «A too me ki dehu ay in d'isey ombo tarnaapayin ki Pak te?»

¹³Maṅ Isa yi d'igibe doṅ sire ti diine sanalliyagi, wo y'an di ruute, y'ede: «Kun'do k'adda geeger, aame geṅ kun t'ikkimey ti wedusu yi t'eezo ahu ti diṅgile, kun di y' daanoy

¹⁴bini adda boy wede y'a t'ettye. Wo kun t'iidey maṅ, a wede boy kun i di rootoy, kun d'eesoy: “Wede dooyisadey yi ki tondiyo, too te biino ere y'a ooma ombo tarnaapayin ki Pak ti sanalliyagi te?”

¹⁵Wo yoṅ biino y'un di-kizey, tod'te dildil t'awwa t'ekki bakatu, suldi pay adda okkime beehiye. Geṅ a ume geṅṅo kun in d'isoy ombo te.»

16Maṅ kane sanalliyagi an d'ingile, an iide'ṅ adda geeger, suldi an di'n uuney pay aakede Isa y'an ruute, iṅkino ombo tarnaape ki Pak an t'ize.

17A peedo t'a t'iire maṅ, Isa y'a iina ti sanalliyagi kane koomat makumu sire geṅ me.

18Kane an di guune ombo, wo aame an ombo geṅ Isa y'a ruute, y'ede: «Derec iṅkino wo n'un di rooto: Wede soo ti diinaguṅ ay ombo kaṅ soo eṅ, y'a ni t'ela bey doṅ k'olmidayó.»

19Kane sanalliyagi an t'ize sommagi dondoṅ, wo an di y'iise tondiso, wede soṅ yi d'eesiyo: «Nuuno ko, nuuno ko?»

20Yoṅ y'an di'n gime onamaṅ, y'ede: «Yoṅ wede soo ti diine kune doṅ koomat makumu sire eṅṅo, wede ay agisa beezey kaṅ soo adda k'ooko.

21Derec, nuṅ wede an n'ehe aa ulo wede eṅ n'a t'inda, geṅ a-t'etta a ono doṅ an riṅe ti kaaga adda mattup ki Raa a tukki nuuno. Wo de dabar a yode wede i ni t'ela bey doṅ k'olmidayó, nuṅ wede an n'ehe aa ulo wede eṅ me! Yode geṅ, an ki y'ehe adda duniya ye toṅ bee!»

Ombo ti sobo i kaza tudde ti puuzo k'Almasi

(Matiye 26.26-29; Lik 22.15-20; 1 Korent 11.23-26)

22Aame an ombo geṅ, Isa y'a t'umbe mappa, y'a ruute koduwo a Raa kono k'ombo gette, maṅ y'a burke, y'an d'ele sanalliyagi wo y'a ruute, y'ede: «Ooho kun soodo, ette tuddó.»

23Saṅ y'a t'umbe kop ti sobo adda, y'a ruute koduwo a Raa kono sobo gette, maṅ y'an d'ele, wede soṅ yi guume guume,

24wo y'an di ruute, y'ede: «Ette puuzadó, puuzo ki taasawa ere Raa y'a ketta ti duwo, to t'oba ki doṅ baadaṅ.

25Derec iṅkino wo n'un di rooto: N'a t'iibe ti aṅki, ki daana ni ki siba ye baa toote k'iṅṅi biṅ, bini onniyo ere ni siba sey geṅ toote wede aware k'iṅṅi biṅ a Moziko Raa.»

26Aame an t'iimi an aa t'iibe maṅ, an d'ûure ôrdari tarnaape ki Pak, saṅ an t'udde an d'ingile k'ekki mukkolo k'Inda k'Olibiye.

Rootiyo k'Isa a urzi koogirayí

(Matiye 26.30-35; Lik 22.33-34; Zaṅ 13.37-38)

27Maṅ Isa y'an di ruute a sanalliyagi, y'ede: «Kune pay kun di n' kiigira a munda wede aana geṅ me, kono ono eṅ an riṅe ti kaaga adda mattup ki Raa, an'de: "Wede k'elso n'a yi t'ída, wo torfo dambami a-teepa."»

28Isa y'a ruute sey, y'ede: «Wo de saṅ Raa yi ti n' bilda maṅ, n'un d'ooguma kun di n' t'ooney a siido Galile.»

29Maɗ Piyer yi di ruute, y'ede: «Aame don pay an ki giigira a munda wede aana ton, nuɗ ni ki kiigira ye.»

30Isa yi di ruute, y'ede: «Derec inkinno wo n'a di rooto: Anki a diddo ettiyo batum, ki poone uzu y'a ôola bizí sire geɗ, kee k'a roota ki ki n' suune ye, suune ye taɗ aɗo.»

31Wo de Piyer yi kodfime, y'ede: «Ato, ni ki kiigira ye, aame ise k'unto ton n'a t'inda ti kee!» Wo kane don soo ton an a-ti ruute inkinno kay.

Isa yon a Zesimaane

(Matiye 26.36-46; Lik 22.40-46)

32Saɗ Isa ti sanalliyagi an d'iiney a ume sundí Zesimaane, wo y'an di ruute, y'ede: «Kun ti koono kino, koore n'ette n'a tondey Raa geɗ me.»

33Maɗ ti yode y'a-wiike Piyer, Zak wo Zaɗ. Aame geɗ orgiso t'a yi ziida wo ulbí i-d'oodiyo baadaɗ.

34Yo y'an di ruute, y'ede: «Nuɗ eɗ sommagi dondon aa n'a t'inda, kun ti koono kino wo kun di lekko zeere.»

35Wo yo y'a-lidde dokki boolon ti kane me, maɗ y'a t'uttile zumayí a siido, y'a iise ton diyo Raa kono ise kotto maɗ dabar gette yi di ti ledde ti tuddí me.

36Adda ton diyadi y'ede: «Abba, i-kaza Meegó, suldi pay a kee i-k'oone ye, ise maɗ kop ki dabar ette k'o ti leddo ti tuddó me. Wo too maɗ pay geɗ a ki t'ise aa nuɗ ni dehu ye, wo a t'ise aa kee ki dehu.»

37Saɗ y'a-gime ki tukki sanalliyagi don aɗo geɗno, wo yi'n uuna an udige. Maɗ Isa y'a t'inne Piyer wo yi di ruute, y'ede: «Simo, kee k'udige! Ki peeɗo soo ton ki k'iine ki ki likke zeere ye!

38Kun lekko zeere wo kun tondo Raa, kono kun ki t'ooro adda naamiya daggiya ye. Wede tudde geɗ a elkiyadi yi dehu y'aase munda wede beehiye, wo de tuddí toogatu baata.»

39Saɗ Isa y'a-lidde siidí sey, wo y'a iise ton diyo Raa inkinno sey.

40Maɗ y'a-gime k'ume sanalliyagi, yi'n uuna an urme, edayaɗ an ziida moone. Wo munda an i-di roote ton an ki suune ye.

41Maɗ k'aduwe Isa y'a-gime ki tukki sanalliyagi wo y'an di ruute, y'ede: «Kune kun moone pi, wo kun d'udigo baa! Ankeɗ peeɗo t'iide, suldi pay i t'ize, wo nuɗ wede an n'ehe aa ulo wede eɗ, an n'ele a bey don k'oldiko.

42Kun t'oozo, in engile! Kun wollo, wede i ni t'ela a bey don k'olmidfayó yi t'uddo.»

Seedu k'Isa

(Matiye 26.47-56; Lik 22.47-53; Zaɗ 18.2-11)

⁴³Isa onamí y'a ki ti'n dinge ye botto, a kaamiki Ziidas wede soo ti diine sanalliyagi kane koomat makumu sire geɗ, yi-t'udfo ti don duuru a itadi, a beydan kasigara ti dalyagi. Kane geɗ i'n igibo deero don sedeke, don suuniyo k'oogoro ti don i dokkiyo Yawudiyagi.

⁴⁴Yo wede y'an di y' t'ela Isa a bey don k'olmidayí geɗ, y'an di ruuto don duuru a munda wede y'aasey kono an di suuney en Isa me, y'ede: «Wede kun wulley ni izey puuc a tobbisadi man, geɗ yode kun di y' soodoy, kun di d'engiloy, kun di boohoy koduwo.»

⁴⁵Ziidas y'iina man, kesiko y'a y' zikke Isa kabban wo yi di ruute, y'ede: «Wede dooyisado!» Man yi d'ize puuc a tobbisadi.

⁴⁶Inkino man kane don duuru an d'iiziga tuddi, an di y' ziida.

⁴⁷Aame geɗ wede soo ti diine sanalliyagi y'a t'iidiba kasigaradi, y'a-diikida wede naabo ki mozigo goole don sedeke, kuudi a dikke.

⁴⁸Wo Isa y'a t'ihina bizi, y'an di ruute, y'ede: «De ki moo me kun d'ettiyo seeduzo wo tuddugun kun t'ikkimo ti kasigaryagi wo ti dalyagi, aa nun wede k'oogire me?

⁴⁹Para man nun min daayum ti kune, ni dooyiso a booro Boy Raa wo kun gi di n' ziida ye. Wo de sulfi geɗ a iina kono a-t'ette a ono don an riine ti kaaga adda mattup ki Raa.»

⁵⁰Man kane sanalliyagi pay an di y'ili, an t'umbe.

⁵¹Wo i d'ede obulsu yi-daaniya Isa, y'a diibo min parde danjalan a tuddi me. Duwo an dehu an di y' seeda,

⁵²wo de y'an di buuye pardayí a beezan, y'a t'umbe bontilin.

Isa a daana deero booro Yawudiyagi
(Matiye 26.57-68; Lik 22.54-55,63-71; Zan 18.12-18)

⁵³Isa an di t'iide k'adda boy mozigo goole don sedeke, a ume wede kane deero don sedeke, don i dokkiyo Yawudiyagi ti don suuniyo k'oogoro an t'ugiye pay.

⁵⁴Wo Piyer yi di y' daaniya Isa ti dokki, bini y'a iiney boy ki mozigo goole don sedeke, man yi-t'iide y'a-guune a booro ti don naabo, an di kookiyo uwo.

⁵⁵Kane deero booro Yawudiyagi pay ti deero don sedeke, an di dehuu wede a roote ono a tukk'Isa kono booro t'a yi seeda ki towwadi, min umbo an k'ooniyo ye.

⁵⁶Don baadan an iide'n an di ruutite ono butte a tukki yode, wo de onaman aa ki t'ettiyo kan soo ye.

⁵⁷Man don miibi an t'iiziga an di ruute ono butte a tukki yode, an'de:

58«Ay y’illiga yi ruute, Boy Raa wede dūwo an iiziga eṅ y’a kossita, wo adda k’onnioyo aḍo y’a y’ooziga a k’isa boy wede i k’iiziga dūwo ye.»

59Wo t’urzi k’ono geṅṅo toṅ onamaṅ aa ki t’ettiyo kaṅ soo ye.

60Inṅkino maṅ mozigo goole ḍoṅ seḍeke y’a t’iiziga a ḍaana ḍoṅ i t’ugiye, wo y’a tunde Isa, y’ede: «Ono dūwo an rootiyo a tukki kee eṅ, kee ki ki roote munda ye ko?»

61Wo yo Isa yi d’annugu ḍeḍḍek, y’an ki rootiyo munda ye. Maṅ mozigo goole ḍoṅ seḍeke y’a yi tunde sey, y’ede: «Kee Almasi Raa yi biire, wo Ulo ki Raa wede dūwo an di tamma ko?»

62Isa yi di’n gime onamí, y’ede: «Eyye nuuno, wo kun di n’ wolla nuṅ wede an n’ehe aa ulo wede eṅ, n’a-kooney a ammade Raa toogadí t’a jiire pay, wo kun di n’ wolla n’a-kimo ekki dondari a kandaane.»

63Inṅkino maṅ mozigo goole ḍoṅ seḍeke yi-ti gulkuwe, kallagí y’a zittite, wo y’a ruute, y’ede: «In ki dehe wenda ti doolo wede illiga y’in ki roote sey ye baa!

64Kun illiga ti kuudugun yi gilḍe suma Raa te. Kune elkiyagun moo me?» Maṅ kane pay geṅ an di ruute, an’de: «Booro ti y’ ziida, munda wede yoṅ y’ize eṅ i-ñide ki tōwwo.»

65Doṅ oṅgo ti diinayan an d’iise padḍita lee a tuddí. Edayí an i-t’ippe, an di gohiso kutuba wo an d’eesiyo: «Kee nebi maṅ, ki y’unto wede i k’ize me!» Maṅ kane asigiryagi an di y’ battisa.

Piyer y’a kiigira Isa

(Matiye 26.69-75; Lik 22.56-62; Zan 18.17,25-27)

66Aame Piyer yoṅ ti ḍandí a booro ki paate geṅ, ere soo ti diine ḍoṅ naabo mozigo goole ḍoṅ seḍeke ti-t’uddo.

67Tode gette Piyer t’a yi wulle yi kookiyo uwwo, ti ti y’ wulle ti ti y’ ḍiṅge maṅ, ti di ruute, t’ede: «Kee toṅ ti Isa wede ti geeger Nazaret, kune soo.»

68Wo Piyer y’a yi giigira, y’a ruute, y’ede: «Koṅ munda wede mi rootiyo geṅ ni ki y’ suune ye, wo itadí toṅ ni ki ti suune ye!» Maṅ ti booro boy y’a t’iiziga, y’a t’iide biza bumbu. Aame geṅ uzu y’a iise mōolo.

69Wo to ere naabo gette t’a yi wulle sey, t’an d’iise rootiyo a kane ḍoṅ a sirpatú, t’ede: «Yoṅ wedusu eṅ ti diine kane sanalliyagi k’Isa.»

70Wo Piyer y’a yi giigira sey. Taṅ booloṅ maṅ kane ḍoṅ a sirpadí geṅ an i di ruute sey, an’de: «Ki kotto kee wede soo ti diine kane sanalliyagi k’Isa, kono kee toṅ ti siido Galile.»

⁷¹Inkino maŋ Piyer y'a-ti nîime tuddí, y'ede: «Wede kun rootiyo eŋ ni ki y' suune ye! Para maŋ ono doŋ ni rootiyo eŋ d'erec ye maŋ, a golladó!»

⁷²Wo a kaamiki uzu y'a îile ki sirwe. Aame geŋ Piyer y'a ilke a ono doŋ Isa yi-ruute, y'ede: «Ki poone uzu y'a ôola bizí sire geŋ, k'a roota ki ki n' suune ye, suune ye taŋ ađo.» Inkino maŋ y'a iise môolo.

Markus 15

Isa a daana Pilat

(Matiye 27.1-2,11-26; Lik 23.1-5,13-25; Zaŋ 18.28–19.16)

¹A biza soohe maŋ, kane deero booro Yawudiyagi pay, deero doŋ sedefe, doŋ i dokkiyo Yawudiyagi ti doŋ suuniyo k'oogoro, an t'ugiyee an di ruute onamaŋ kaŋ soo. Maŋ Isa an ti y' gittite, tiŋ geŋ an di t'iide, an i di y'ele a bey Pilat, yoŋ Romeŋ goole siido.

²Pilat y'a yi tunde, y'ede: «Kee mozigo Yawudiyagi ko?» Isa yi di'n gime onamí, y'ede: «Geŋ aa ki rootiyo.»

³Kane deero doŋ sedefe geŋ, wede tuuku toŋ yi rootiyo ono a eedí eedí.

⁴Maŋ Pilat y'a yi tunde sey, y'ede: «Kee ki ki roote munda ye ko? Ki k'ollige ko ono doŋ pay an rootiyto a tukki kee eŋ me?»

⁵Wo de Isa yi d'annugu ded'dek. Pilat yi wulle inkino maŋ, y'a ziidá giggirí.

Booro k'Isa ki tôwwadí

⁶Aa daayum Pilat yi d'isiyo a tarnaape Pak maŋ, y'an d'ad'fiya t'adda daŋgay wedusu soo wede doŋ duuru an dehu.

⁷Wo aame geŋ adda daŋgay, i d'ede wede soo sundí Barabas ti doŋ doolo kaŋ soo an an t'elite ono a duwo an d'iiziga deyyiso ki tukki Romeŋ. Kane an'ni zidde kono aame an iiziga deyyiso geŋ an t'iide wedusu.

⁸Inkino doŋ duuru an t'iide di Pilat wo an di y' tunde, y'an d'ise munda wede aa daayum yi d'isiyo.

⁹Maŋ Pilat y'an di ruute, y'ede: «Kun dehu miŋ n'un t'ad'fo mozigo Yawudiyagi ko?»

¹⁰Pilat yi rootiyo inkino kono yi suune, kane deero doŋ sedefe Isa an i y'ele beezí kono an kolbiso ti yode.

¹¹Wo de kane deero doŋ sedefe an an t'elite ono a doŋ duuru an d'iyye an di roote Pilat y'an t'adde Barabas.

¹²Inkino maŋ Pilat y'a tunde doŋ duuru sey, y'ede: «De wede kun yi waaku mozigo Yawudiyagi geŋ, kun dehu ni-d'ise mummino me?»

13 Wo kane an d'iise dollite, an'de: «Ki ti y' taako ekk'undumu wede zaapu t'ekki bakadí kaṅ tontilko!»

14 Maṅ Pilat y'an di ruute, y'ede: «De munda ulsu miṅ y'ize moo me?» Wo de kane an di dollite baadaṅ ki baadaṅ, an'de: «Ki ti y' taako ekk'undumu wede zaapu t'ekki bakadí kaṅ tontilko!»

15 Kono adde doṅ duuru a t'asse geṅ, Pilat y'an di y'udde Barabas me, wo y'an di ruute a asigiryagi Isa an ti y' girpipe ti marpa. Saṅ y'an di y'ele an ti y' taakey ekk'undumu wede zaapu t'ekki bakadí kaṅ tontilko.

Isa asigiryagi an y'okko maade

(Matiye 27.27-31; Zaṅ 19.2-3)

16 Inṅkino maṅ kane asigiryagi an di-t'iide Isa k'adda boy ki goole siido, wo eebaṅ asigiryagi ti doolo toṅ baadaṅ an a-ti'n wiiko pay.

17 An d'umbe kalle wede goole teeze an i di t'usse, wo an di gini kadumul k'ahimagi an i-t'usse eedí.

18 Maṅ an i d'iise isiyo toose, an tettiso bezaṅ, an d'eesiyo: «Toosadá mozigo Yawudiyagi no! Toosadá mozigo Yawudiyagi no!»

19 An di y'oggiso a eedí ti koyile, an di paddita lee a tuddí, wo an di dikkiyto, an d'ottilso a daanadí.

20 Aame an ti y'ukke maade maṅ, kalle wede goole teeze an t'iidiba wo an i di t'usse kallagí. Maṅ Isa an ti y' dukke, an di t'ette kono an ti y' taakey ekk'undumu wede zaapu t'ekki bakadí kaṅ tontilko.

Taakiya k'Isa ekk'undumu

(Matiye 27.33-44; Lik 23.36-43; Zaṅ 19.16-24)

21 A addiyadaṅ ti geeger, an a-t'ikkima ti wede soo inṅkino y'aahiya doome, yoṅ ti geeger Sireṅ, sundí Simo. Yoṅ geṅ meek' Alegzandire ti Ripis. Asigiryagi an di y'ize ki toogo y'a t'umbe undumu taakiya k'Isa.

22 Wo an di t'iide Isa k'ume wede sundí Golgota, i-kaza ume aa osse k'eego.

23 A ume geṅ, a Isa an i d'eele toote k'inṅi biṅ kalsiya ti dunnu sundí mirr, miṅ y'a-tuuge ki sobo me.

24 Kane asigiryagi an ti y' tiike ekk'undumu wede zaapu t'ekki bakadí kaṅ tontilko, wo kallagí an di dikkidá t'urzi k'arbu teltel muntelliyo, a wede tuuku i t'ooriyo yi t'ambu t'ambu.

25 Isa an ti y' tiike ekk'undumu geṅ, a peedo t'ize k'aadumu mesuwe.

26 Ekk'undumu an tiike pakirte eego wo an a-ti riine, an'de: «Yoṅ mozigo Yawudiyagi.» Geṅ munda wede i-d'iide untadí.

27Wo a sirpadí an a-tiike don̄ k'oogire sire, soñ t'undumzí a kese k'ammidadí, wo wede soñ t'undumzí a kese geeladí.

[**28**Geñ a-t'iide a ono don̄ an riije ti kaaga adda mattup ki Raa, an'de: «Yoñ an ti yi gize ti don̄ k'oldíko.»]

29Don̄ addiya tiñ geñño, an di y' kaldíta wo an deñilso eedañ, wo an d'eesiyo: «Eeyu, kee wede k'ede Boy Raa k'a kossita wo adda k'onniyo afo k'a y'ooziga geñ,

30k'utto tuddá batum wo t'ekk'undumu wede zaapu t'ekki bakadí kañ tontilko, ki ti deegi!»

31Kane deero don̄ sedeke ti don̄ suuniyo k'oogoro toñ an di y'okko maade kay, wo an di rootiyto ti tuddañ, an'de: «Yoñ don̄ doolo y'an di'n utte miñ, yi k'aane tuddá batum yi ki t'utte ye!

32Yoñ Almasi Raa yi biire, wo mozigo ki don̄ k'Izirayel kotto mañ, añkeñño t'ekk'undumu geñ yi ti deegi! Ay wulla yi ti diiga mañ, kaye ay zaapa addey a yode.» Kane don̄ an tiike a sirpadí toñ, an di y' kaldíta iñkino kay.

Unto k'Isa

(Matiye 27.45-56; Lik 23.44-49; Zan̄ 19.28-30)

33T'ume peedo t'ize diine geñ, adda siido pay ume a t'ize zimolo dil a likke bini eesiyo peedo lohe.

34A eesiyo peedo lohe mañ, Isa y'a idili ti golla awwa, y'ede: «Eli, Eli, lama sabaktani.» Geñ i-kaza: «Raa ki nuñ, Raa ki nuñ, moo me ki ni giigira me?»

35Don̄ on̄go ti diine don̄ i lekkiyo añgeñño geñ an d'illiga wo an di ruute, an'de: «Kun ollo kay, yi waaku nebi Eli.»

36Wede soo ti diinayañ y'a ukke yi d'umbe sooso, yi di zulpe adda toote suddo k'iñni k'inda biñ, mañ yi-t'ele a biza koy'ile, yi-t'usse bize k'Isa y'a suuy'e, wo y'a ruute, y'ede: «Kun dello, in gi di wolla do Elizi wenda yi etto, yi ti y' deega mañ.»

37Wo de Isa y'a idili ti golla awwa, mañ y'a-t'ihe.

38Aame geñ alboy wede i dikke adde Boy Raa soñ k'adda soñ ki paate geñ, a t'ihina tar t'awwa a ti diige les.

39Goole k'asigiryagi meeda ki Romen̄ yi t'ihira daana k'Isa, yi wulle untadí te, mañ y'a ruute, y'ede: «Wede eñ Ulo Raa ki kotto!»

40A ume geñ i d'ede erayi toñ ede, kane an t'ihirte ti dokki an di wolliyo munda wede isiyo. Ti diinayañ i d'ede Mariyam ere ti siido Magdalla, Mariyam mekki Zak wede neñku ti Zoz, wo soo te Salome.

⁴¹Kane erayi geɗ an daaniya Isa wo an i di naabiya aame yoŋ a siido Galile. An di gili ti yode ki Zeruzalem, wo erayi ti doolo toŋ baadaŋ an iido ti kane me.

Eliyo nuune k'Isa adda muuzo
(Matiye 27.57-61; Lik 23.50-56; Zaŋ 19.38-42)

⁴²Suldi geɗ ize onniyo jima, duwo an okkime tuddaŋ kono onniyo ere ki puukiyo Yawudiyagi ti t'eesa. A peedo t'ette k'ooriyo maŋ,

⁴³wede soo ti geeger k'Arimate sundi Yusup y'a iina. Yode toŋ maŋ wede goole ti diine doŋ deero booro Yawudiyagi, wo yi zaapu elkisadi a ettiyo Moziko Raa kay. Y'a iibe edayi, y'a uuney Pilat, y'a tunde nuune k'Isa kono y'a t'ottiba.

⁴⁴Aame Pilat y'illiga Isa y'inda baa maŋ, y'a ziida giggeri. Inkiyo y'a wiike goole k'asigiryagi meeda, y'a yi tunde, y'ede: «Isa y'inda ti kaagine ko?»

⁴⁵Aame goole k'asigiryagi meeda yi-ti ruute maŋ, yi d'iili urzi a Yusup y'a t'ambe nuune k'Isa me.

⁴⁶Yusup yi d'iwila sotor tuwarwa, nuune'ŋ y'a ti y' diige t'ekki undumu wede zaapu t'ekki bakadi kaŋ tontilko me. Wo y'a ŋilpe ti sotor gettiyo, yi-t'ele adda muuzo, tod'te aa urmi an ittiba makkolo. Maŋ y'a-ti doŋkile a biza muuzo zumbulu yeepiyo.

⁴⁷Aame geɗ Mariyam ere ti siido Magdalla wo Mariyam mekki Zoz, kane geɗ an di wolliyo ume an ele nuune k'Isa me.

Markus 16

Baldiya k'Isa
(Matiye 28.1-8; Lik 24.1-11; Zaŋ 20.1)

¹Onniyo ere ki puukiyo Yawudiyagi i t'ingile. Aame geɗ Mariyam ere ti siido Magdalla, Mariyam mekki Zak, wo soo te Salome an t'iide, an d'iwilo egey doŋ eediyadaŋ unse kono an i-t'assigey tukk'Isa.

²Ti soohe a onniyo dumas, peedo ti-gilo maŋ, an d'ingile ki biza muuzo.

³Wo a urzi an di rootiyto ti tuddaŋ, an'de: «De zumbulu a biza muuzo geɗ in ti y' doŋkiley wee wee?»

⁴Wo an iiney maŋ, an wolliyo zumbulu goole an a t'ippe a biza muuzo geɗ doŋkilso a kese.

⁵Kane an t'iide k'adda muuzo, wo an wolliyo obulso ti kalle tuware yi-guune a kese k'ammade. Aame geɗ kane orgiso t'anni ziida baadaŋ.

⁶Wo de wede geɗ y'an di ruute, y'ede: «Kun orgide ye. Ni suune kun dehu Isa wede ti geeger Nazaret, wede an ti y' tiike ekk'undumu wede zaapu t'ekki

bakadí kaṅ tontilko me. Yoṅ geṅ Raa yi ti y' bilde, yoṅ a enno ye. Enno kun wollo ume an ziipe nuunayí me.

⁷Aṅkeṅ kun'do, kun an ti kazoy a sanalliyagí wo a Piyer pây, kun d'eesoy: "Yoṅ y'unni delliyo a siido Galile. A ume geṅ kun di y' wolley, aakede y'un di ruute."»

⁸Iṅkino maṅ t'adda muuzo an t'udde, an di ṅoṅṅirso burbur eedaṅ a digge, an t'umbe dokki. Wo munda a wenda soo toṅ an i-ki ruute ye kono orgiso t'anni ziida.

Isa yi kaza tuddí a Mariyam ere ti siido Magdalla

⁹Onniyo dumas ti soohe walak Isa yi bilde maṅ, ki poone y'a gize tuddí a Mariyam ti siido Magdalla, tode ere yi d'ilmo siitandani sarat t'ettú.

¹⁰Tode gette t'an d'iide rabila a doṅ i likke ti yode, kane an t'ize sommagi dondoṅ an isiyo môolo.

¹¹Wo aame an illiga t'an ruute Isa yoṅ zeere ti yi wullo toṅ, onamtú an ki d'umbe ye.

Isa y'an kaza tuddí a sanalliyagi sire

¹²Saṅ maṅ Isa y'an ti gize tuddí t'urzi doolo, aame geṅ an d'ikkima ti sanalliyagi kane sire an ambe k'adda k'ille ti paate.

¹³Kane sanalliyagi sire geṅ an di-gime ki Zeruzalem, an an t'iide taaya a doṅ oṅgo, wo toṅ maṅ onamaṅ an ki d'umbe ye pây.

Isa y'an kaza tuddí a sanalliyagi kane koomat makumu soo

¹⁴Saṅ maṅ Isa y'an di gize tuddí a sanalliyagi kane koomat makumu soo, an ti guune ombo. Aame geṅ y'an di'n iise aapuḍu, y'ede: «Zaapu k'addugun a nuṅ umbo, biza k'ulbugun zakidi, kono doṅ an ni wulle ni bilde an un kaza toṅ, kun k'ambu onamaṅ ye!»

¹⁵Maṅ y'an di ruute, y'ede: «Kun'do k'adda duniya pay, kun an kazitoy Rabila Majjaanawa a duwo pay.

¹⁶Wede yi ziipa addí a Isa wo an ti y' zuyya batem maṅ, Raa y'a y'utta. Wo de wede yi ki ziipa addí a Isa ye maṅ, booro Raa t'a yi seeda.

¹⁷Doṅ i zaapa addaṅ a nuṅ geṅ, enno suldi k'armika an d'isa a kiza toogo Raa ti kane me: an di limmita siitandani ti sundó, an d'orba t'ono doṅ doolo.

¹⁸An sedda mimbayi ti beydaṅ, an siba inda k'unto toṅ, munda soo toṅ i ki'n isa ye. An di zaapa beezaṅ a tukki doṅ k'eeni, wo kane geṅ an t'oona bee.»

Engilso k'Isa k'awwa ki kandaane

¹⁹Aame Galmeega Isa y'an ti ruute iṅkino maṅ, Raa y'a y'umbe k'awwa ki kandaane, y'a-guune a ammade Raa.

²⁰Wo kane sanalliyagi an di tiipe k'adda duniya pay kazita Rabila Majjaanawa. Wo Galmeega ti kane, y'an di'n noogiyo ti suldi k'armika, i-kaza onamaŋ geŋ derec.]

Lik

Lik 1

Toose ki Lik

¹⁻²Teyopil mee'ki nuɗ, ɗoɗ oɗgo an wulle t'edayan sulɗi ɗoɗ Raa y'ize t'ume k'eesiyo a diinayiɗ me. Saɗ kane an t'ize ɗoɗ kazita k'ono wo an in t'ide taaya a sulɗi geɗ me, maɗ ɗoɗ baadaɗ ti diinayiɗ an d'iise raaniya ki taaya gettiyo.

³Wo aame ni zidde ita mekk'ono a sulɗi ɗoɗ pay ize t'ume k'eesiyo geɗno maɗ, Teyopil nuɗ toɗ o d'ize unse n'a di raane a kee ita ki sulɗi geɗ, soɗ k'ita bakadi bakadi.

⁴Nuɗ n'a raaniya kono k'a suune beehiye, dooyiso ere an ki duuye gette tod'te derec.

Urzi wede an di t'eha Zaɗ Batis

⁵A ozzinagi ɗoɗ Erod yoɗ mozigo ki siido Ziide, i d'ede wede sedefe sundi Zakari, yoɗ geɗ ti diine ɗoɗ sedefe ɗoɗ k'Abbiya. Wo to eddi sundutu Elizabet, ti ita k'inni k'Aron mozigo goole ɗoɗ sedefe.

⁶Kane geɗ sirwan pay ki diine a daana Raa, an ollige onami wo an sooru a urzi wede pay k'oogoro ki Galmeega Raa, duwo an an ki zaapu ono a eedaɗ ye.

⁷Wo kane ulo an k'ede ye kono Elizabet tod'te karta, kane sirwan pay an ti gulike.

⁸Onniyo soo Zakari y'a t'iide k'adda Boy Raa isiyo naabo ki sedefe, kono iina a kaabadaɗ an d'ise.

⁹A urzi k'oogoro, kane ɗoɗ sedefe an t'ize teltel muntelliyo maɗ, i-t'iire a yode a ogge sulɗi koddiyo eefiyadaɗ unse adda Boy Galmeega Raa wede k'adda me.

¹⁰A peedo ere an d'oggiyo sulɗi koddiyo eefiyadaɗ unse, kane ɗoɗ duuru pay ti paate an tonduyo Raa.

¹¹A kaamiki, maaleeka ki Galmeega Raa y'a iide tukki Zakari, wo y'a t'ihira a kese k'ammade ki munda aa sandup an d'oggiyo sulɗi koddiyo eefiyadaɗ unse.

¹²Aame Zakari yi y' wulle maɗ, eedi t'a digge wo orgiso t'a yi ziida.

¹³Wo de maaleeka yi di ruute, y'ede: «Zakari kee k'orgide ye, kono tonduyada a Raa gette, yoɗ y'illiga. Edda Elizabet t'a t'eha ulo, wo ki di-zaapa sundi Zaɗ.

¹⁴Kee adda a ona t'unusuwo kono yode, wo ɗoɗ baadaɗ ulbaɗ an d'isa unse a ehiyadi te.

15Yon y'a t'isa wede goole a daana Galmeega Raa, toote k'in̄ni biñ yi ki siba ye, ise toote ti doolo wede i-d'ede orme toñ mañ. Yon t'adda k'adde meedí gen̄ miñ, addí òniyo t'Unde Kamileñ.

16Doñ k'Izirayel baadañ y'a ti'n kimo ki tukki Galmeega Raazañ.

17Ettiyadí y'etto yon wede zina Raa, ti toogo k'Unde Kamileñ ere i-dokkiyo nebi Eli. In̄kino mañ maawi ti in̄nizañ y'a ti'n sella an di t'okkiya, wo doñ i k'ollige ono ye toñ y'a ti'n kimo a suuniyo k'ono ere ki doñ ki diine, kono y'an isa doñ i t'ikkima tuddañ a Galmeega.»

18Zakari yi di ruute a maaleeka, y'ede: «De kañ mummino n'a suuna ono gen̄ d'erec me? Derec, nuñ ni t'ize gòole wo eddó toñ ozzinagutú ìide, ti ki t'ehe ye.»

19Mañ maaleeka yi di'n gime onamí, y'ede: «Eñ nuñ maaleeka Gabiriyel wede òhire a daana Raa ni di naabiya, yi n'igibo n'a-d'iido ti rabila majjaanawa kono n'a-di kize.

20Wo kee onamó ki k'umbe ye, in̄kino mañ bizá a di t'ippa ki rootiyo umbo bini onniyo ere suldí pay gen̄ a-t'etta. Eyye, ono doñ ni ruute gen̄ a t'isa aame onniyo t'iida mañ.»

21Aame gen̄ kane doñ duuru an delliyo Zakari, wo an ziiida giggirañ kono t'adda Boy Raa wede k'adda gen̄ yi ki t'ad̄iya kesiko ye.

22Aame yi t'ud̄do kotto mañ, yi k'aaniya rootiyo ye a doñ duuru gen̄ me. Wo kane an di zuune yon i-iido munda aa suniye adda Boy Raa wede k'adda gen̄ me, y'an ooyisito dugiyko ñañal wo bizí ki rootiyo umbo.

23Aame Zakari y'a ti ñiñge onniytagi doñ ki naabadí adda Boy Raa mañ, y'a aahe boozí.

24Bini mañ eddí Elizabet ti t'umbe adde, tere paat gen̄ t'ombide tuddutú. Wo tod' t'a ruute t'adda k'addutú, t'ede:

25«Eñño munda wede Galmeega Raa y'ize a tukki nuñ te: Nuñ te sukiyagi a daana doñzó me, kono o k'ede ulo ye. Wo añkeñ y'a dihe y'o di booye sukiyagó a daana duwo pay.»

Urzi wede an di t'eha Isa

26Elizabet mahiwatú ìide tere zoot mañ, Raa y'a igibe maaleeka Gabiriyel k'adda geeger soo ki siido Galile sundutú Nazaret.

27Yi y'igibe ki tukk'uto koñso, tod' t'ibire ulo obulsu sundí Yusup, yon gen̄ ti biza bumbu Dawut. Wo to uto koñso gette sundutú Mariyam.

28Maaleeka yi-t'iide di tode, y'a t'uuney wo yi di ruute, y'ede: «Koñ ulbí i iso uñse, koñ ere Raa yi ize beeko, Galmeega Raa yon ti koñ.»

29A onamí geŋ ettú a digge, ti d'elkiso t'adda k'addutú wo t'ede: «Toose kino ettij i-kaza moo me?»

30Iŋkino maŋ maaleeka yi di ruute, y'ede: «Mariyam koŋ m'orgide ye, kono koŋ m'uune beeko ti Raa.

31Koŋ m'ollo koduwo, m'a seeda mahuwe, m'a t'eha ulo wo mi di zaapa sundí Isa.

32Yoŋ geŋ y'a t'isa wede goole, an di y' waaka Ulo ki Raa goole a jiire pay. Galmeega Raa yi di t'ela kaakido moziko ere ki mugiyí Dawut,

33wo y'a lekka a moziko ki daayum a tukki doŋ k'Izirayel, wo mozikadí ti ki daŋga ye.»

34Mariyam ti di ruute maaleeka, t'ede: «Geŋ aasa mummino, kono nuŋ ti kule kaŋ soo toŋ ay k'ikkima ye me?»

35Maaleeka yi di'n gime onamtú, y'ede: «Unde Kamileŋ t'a deega eedí, wo toogo ki Raa goole a jiire pay ti-ki ti'n diiba aa lukkise. Kono kamo ulo wede mi t'eha geŋ yoŋ kamileŋ, wo soŋ an di y' waaka Ulo Raa.

36Wo m'ollo, Elizabet taasadí toŋ ti uune adde ki tere zoot, t'a t'eha ulo a gôolikátú geŋ me, tode ere an'de karta toŋ maŋ.

37Derec, munda wede Raa yi k'aane ye umbo.»

38Iŋkino maŋ Mariyam t'a ruute, t'ede: «Nuŋ te ere naabo Galmeega Raa, pay geŋ o t'iso aa kee k'o ruute.» Saŋ maaleeka yi-t'iili, y'a iŋgile.

Mariyam tod' daŋ Elizabet

39Onniyto miibi k'ita maŋ, Mariyam t'a t'iiziga, t'a iŋgile ti naariya k'adda geeger ki siido Ziide ere adda diine moŋgali.

40T'iide'ŋ ti t'iide adda boy Zakari wo t'a ruute, t'ede: «Elizabet toosadí.»

41Aame Elizabet t'illiga toose ki Mariyam kotto maŋ, ulo adda k'addutú y'a iise arbu wo tod' Elizabet addutú a ûune t'Unde Kamileŋ.

42Tod' t'a idili ti golla awwa, t'ede: «Koŋ te Raa yi ti ziipe beeko a jiire erayi pay, wo ulo wede adda k'addí toŋ beeko Raa a eedí.

43Nuŋ te wee te doo miŋ mekki Galmeegó t'a iido wollyadó me?

44Ki kotto m'ollo, aame n'illiga toose ki koŋ geŋ, ulo adda k'addó toŋ i-d'ize uŋse, y'a iise arbu.

45Uŋsuwo a tode ere umbe a ono doŋ iido t'urzi Galmeega Raa, kane geŋ a-t'etta.»

Ôoro ki Mariyam

- 46 Injino maŋ Mariyam t'a ruute, t'ede: «Nuŋ t'addó pay n'a t'imme Galmeega.
- 47 Raa yoŋ Wede k'Uttiyadó, kono k'injino addó a ûune t'uŋsuwo,
- 48 kono y'a dihe y'a zibbe edayí a tukki nuŋ ere naabadí ere umbadó ettiyo. Eyye, ti aŋki wo ki daayum ðuwo pay an di roota kereŋ, nuŋ te ere ulbutú uŋse,
- 49 kono Raa toogo a jiire pay, a nuŋ te y'o ize suldí ðoŋ beehiye a jiire, yoŋ sundí kamileŋ.
- 50 Y'isiyo adde koðuwo k'eda k'inŋi a tukki ðoŋ i ottilso me.
- 51 Ti toogo ere pay ki beezí, y'aaze suldí ðoŋ a jiire, aakede: Y'a ti'n tiipe kane ðoŋ an ede elkiso ere ki koliyo tuddaŋ gette,
- 52 kane mozagi yi ti'n gippirde t'ekki kaakidagaŋ me, wo ðoŋ i ki koliyo tuddaŋ ye, yi-ti'n gili t'awwa.
- 53 Kane ðoŋ mosogo yi di'n ûune ti suldí ðoŋ majjandani, wo ðoŋ bey y'an ilmi daa munda beezaŋ.
- 54 Yo y'a iide noogiyo ðoŋ k'Izirayel ðoŋ naabadí, wo y'aaze adde koðuwo a kane i-ki dunde ye.
- 55 Geŋŋo munda wede Raa y'an ruute y'aasa a maawiŋ, a Ibirayim wo a ita k'inŋizí ki daayum me.»
- 56 Mariyam t'a likke ti Elizabet suma tere ađo, saŋ t'a aahe boytú.

Ehiyo Zaŋ Batis

- 57 Aame Elizabet onniyatú îide k'ehiyo maŋ, t'a t'ehe ulo.
- 58 Kane ðoŋ k'ita waayatú ti taasiyagutú an di zuune Galmeega Raa yi ize adde koðuwo a tod'te, wo kane toŋ an d'isiyo uŋsuwo ti tode.
- 59 T'ume an ti y'ehe îide onniyo gessire maŋ, kane an t'iide ulo an i di walda ponde wo an i di zaape sundí Zakari aa suma meegí.
- 60 Wo maŋ meedí t'an di ruute kereŋ, t'ede: «Aha, ulo an di y' waaka sundí Zaŋ.»
- 61 Maŋ kane an i di ruute, an'de: «A biza bumbuguŋ wede sundí injino umbo.»
- 62 Maŋ an i di ruute a meegí kaŋ dugiyko, kono an di suune ulo'ŋ yi dehu an di y' waake wee wee?
- 63 Yoŋ y'a tunde pakirte, maŋ an i d'ele wo y'a riŋe: «Sundí te Zaŋ.» Kane pay geŋ an ziidá giggiraŋ.
- 64 A kaamiki bizí a t'ihina, y'a iise ono wo yi tamma Raa.

⁶⁵Inkino maŋ kane doŋ pay a ita waaya geŋ orgiso t'anni ziida, wo adda siido Ziide ere pay adda diine moŋgali gette, an t'owwo taaya a suldi doŋ pay ize geŋ me.

⁶⁶Kane doŋ pay illiga suldi doŋ ize geŋ, an d'elkiso eego wo an di tondiso tuddaŋ, an'de: «Saŋ maŋ yo ulo eŋ y'a t'isa moo me?» Inkino maŋ ki kotto toogo Galmeega Raa gette ti yode.

Ono doŋ Raa y'igibo t'urzi Zakari

⁶⁷Zakari meek'ulo geŋ addi a uune ti Unde Kamileŋ, wo y'a iise rootiyto ki ono doŋ Raa y'igibo, y'ede:

⁶⁸«Tamma a Galmeega, yoŋ Raa ki doŋ k'Izirayel, kono doŋzi geŋ y'a ukko noogiyadaŋ, yoŋ y'an udfde.

⁶⁹Wo a kine y'in d'udfo Wede k'Uttiyo i-d'ede toogo, ti biza bumbu ki mozigo Dawut wede naabo Raa.

⁷⁰Eŋ onami doŋ y'a ruute ti kaaga ti bize nebiyagi doŋ kamileŋ:

⁷¹Yi ruute y'in di'n utta ti bey doŋ k'aduziŋ wo ti bey kane doŋ pay in olmidde.

⁷²Y'aaze adde koduwo a moŋgidagiŋ, wo i ki dunde ye a taasuwadi ere kamileŋ yi gitte ti kane gette.

⁷³Gette nâamiya ere Raa y'a-ti nîime tuddi ti mugiyiŋ Ibirayim,

⁷⁴y'in di'n adde ti bey doŋ k'adu. Inkino maŋ in d'oola urzi in i di naaba daa k'orgiso,

⁷⁵kono in t'ise doŋ kamileŋ wo ki diine a daanadi me adda k'onniytagi doŋ pay ki lekkiyadiŋ gette.

⁷⁶Wo ulo ki nuŋ, kee k'a ozira a daana Galmeega kono ki-d'okkima urzizi, geŋ inkino k'a t'isa nebi ki Raa goole a jire pay,

⁷⁷wo k'an di kiza a doŋzi an di suuna yoŋ y'an utta t'urzi tambobino k'oldikadaŋ.

⁷⁸Eyye, Raaziŋ yoŋ ôniyo t'isiyo k'adde koduwo. Y'in ti'n tuure ti toore wede iido t'awwa, aakede toore peedo ti koliyo.

⁷⁹Yo y'a toora a tukki kane doŋ i lekkiyo adda zimolo wo doŋ i lekkiyo a biza k'olde, kono y'a dokka zoŋdiŋ a urzi wede ki toose.»

⁸⁰T'ume geŋ miŋ ulo yi d'ohire a urzi tudde wo a urzi k'Unde Raa. Yi lekkiyo adda balda bini a iide onniyo ere tuddi y'an ti gize kereŋ a daana doŋ k'Izirayel.

Lik 2

Ehiyo k'Isa

¹Aame geŋ mozigo goole ki Romenŋ Ogust yi d'ize oogoro ki kaza ɗuwo adda siidiyagi pay ɗoŋ Romenŋ ge-dokkiyo.

²Ette kaza ere ki poone, tod' t'iise aame Kiriniyus yoŋ goole ki siido Siiri.

³Doŋ pay an t'ette an di-kizo tuddaŋ, wede tuuku toŋ yi d'aahiya ki siido k'ehiyadi k'ehiyadi.

⁴Wo yode Yusup toŋ y'a t'iiziga ti geeger Nazaret siido Galile, y'a iŋgile ki geeger Betilehem siido Ziide, ume wede an d'ehe mozigo Dawut, kono yode Yusup toŋ y'udɗo t'adda boy wede k'ita k'inni Dawut.

⁵Y'a t'iide, an di-kizo kaŋ soo ti Mariyam ere k'ebirayi te, aame geŋ tod'te t'adde.

⁶Koore kane a Betilehem geŋ onniyatú k'ehiyo a iide,

⁷t'a t'ehe ulo ki kabbatú me. Ti di mulpite sotor, t'a ti y' duwwe a kulaaye kono ume adda biino torgagi umbo.

Maaleeka ti ɗoŋ k'elso

⁸Adda siido gettiyo batum, i d'ede ɗoŋ k'elso an lekkiyo a balɗa an boohiyo maaladaŋ.

⁹Onniyo soo a didɗo maŋ, maaleeka ki Galmeega Raa y'a d'iide tuddaŋ wo toore Galmeega Raa yi-tooriyo eedaŋ. Inŋkino maŋ orgiso t'an di'n ziida baadaŋ.

¹⁰Wo maaleeka y'an di ruute, y'ede: «Kun orgide ye, kono kun ollo, n'un d'iido n'un di kize rabila majjaanawa aasa unŋsuwo baadaŋ a ɗoŋ pay, tod'te ettiyo:

¹¹Anki adda didɗo ette adda geeger Dawut, an un ehe Wede k'Uttiyo, yoŋ Almasi Raa yi biire, yoŋ Galmeega.

¹²Enno munda wede un kizey kun di y' suuney me: kun t'ooney ulo neŋku mulpiyo ti sotor, duwwiyo adda kulaaye.»

¹³A kaamiki a sirpa maaleeka geŋ, i d'udɗo maaleekiyagi baadaŋ ti kandaane an tamma Raa, an'de:

¹⁴«Tamma a Raa t'awwa a kandaane, wo a siido toose t'a koone a ɗoŋ yi giyye.»

Ettiyo ɗoŋ k'elso ki Betilehem

¹⁵Aame maaleekiyagi an iili an ti gime ki kandaane maŋ, kane ɗoŋ k'elso an d'iise rootiyto tuddaŋ, an'de: «Inŋkino in t'ette Betilehem, in di wollo munda wede iido, wede Galmeega Raa y'in gize.»

¹⁶Maŋ an d'iŋgile an di naariya. An iiney maŋ, an di dihite wo an di'n uune Mariyam ti Yusup, wo ulo neŋku duwwiyo adda kulaaye me.

¹⁷Aame ulo an ti y' wulle maṅ, an d'iise tôwwo taaya ere maaleeka y'an ruuto kono k'ulo geṅ me.

¹⁸Wo doṅ pay illiga geṅ an di ziida giggeraṅ a rabila ere ki doṅ k'elso gette.

¹⁹Wo ki tode Mariyam maṅ, suldi pay geṅ t'a ti'n buuhe adda k'addutu, wo ti d'elkiso baadaṅ eego.

²⁰Saṅ maṅ doṅ k'elso an di-gime, an di tamma Raa wo an di ruute kofuwo a yode a suldi doṅ pay an illiga wo an wulle, kono suldi pay geṅ a-t'iide aakede maaleeka y'an ruute.

Zaapu suma a Isa

²¹T'ume an ti y'ehe iide onniyo gessire maṅ, ulo an i-di wilda ponde, wo yoṅ an i-di ziipe sundi Isa aa maaleeka y'a ruute, ti poone meedi t'a seeda mahuwe botto.

Isa ti maawi adda booro Boy Raa

²²Saṅ maṅ onniyo t'a iide ere aṅ Yusup ti eddi Mariyam an ti t'ise tuddaṅ kamileṅ a daana Raa, aakede oogoro Muusa ti rootiyo. Inkiṅo maṅ ulo an t'umbe k'adda booro Boy Galmeega Raa a geeger Zeruzalem, kono an i-ti y' zaapey a daanadi.

²³An ize inkiṅo a-t'iide a ono doṅ an riine ti kaaga adda mattup k'oogoro Galmeega Raa, an'de: «Inni kuuli doṅ pay ki kabba geṅ, kane kun i di'n ooye kese a Galmeega Raa.»

²⁴Wo soṅ kane maawi an d'ise sedefe ere tode oogoro gettiyo batum ti rootiyo, t'ede: «An di sedde deere sire ere ki balda umbo ere ki moddiyo toṅ sire wo inni.»

²⁵A Zeruzalem geṅ i d'ede wede inkiṅo sundi Simeyoṅ, yoṅ wede ki diine wo y'orgiso a Raazi, yi delliyo wede y'a utta doṅ k'Izirayel. Unde Kamileṅ ti yode

²⁶wo tod' ti di t'iidiba ita ki poone, t'ede: «Kee ki ki t'inda ye, daa ki ki wulla Almasi Galmeega Raa yi biire geṅno ye maṅ.»

²⁷Inkiṅo maṅ t'urzi k'Unde Raa, Simeyoṅ y'a t'iide k'adda booro Boy Raa aame Isa maawi an ti y'umbo, kono an d'ise munda wede aa oogoro ti rootiyo.

²⁸Maṅ Simeyoṅ y'a t'umbe ulo a beezi wo yi tamma Raa, y'ede:

²⁹«Ankenno eṅ Galmeega Raa, kee onama doṅ ki ruute a t'iide, nuṅ wede naabadá ki n'oolo n'a t'inda ti toose.

³⁰Ki kotto ni y' wulle t'edayo wede k'igibo a utta duwo me,

³¹yode wede k'igibo duwo pay an di y' wolla.

³²Yoŋ geŋ toore, wede a kiza a doŋ Yawudiyagi ye an di suuna kee Raa, wo t'urzi yode geŋ duwo an di t'imma doŋ k'Izirayel.»

Ono doŋ Raa y'igibo t'urzi Simeyoŋ

³³A ono doŋ Simeyoŋ yi rootiyo a tukk'ulo geŋ, kane maawí an ziida giggiraŋ.

³⁴Simeyoŋ y'an di ziipe beeko, wo yi di ruute a Mariyam meek'ulo, y'ede: «Koŋ m'ollo, ulo eŋ Raa yi ziipo y'a koono urzi wede doŋ baadaŋ adda siido k'Izirayel an di dagga, wo doŋ oŋgoŋ an t'oona uttiyo. Wo yoŋ y'a koono munda wede a kiza Raa a duwo, wo kane an di y' kiigira.

³⁵Iŋkino maŋ elkiso ere ombide adda k'adde doŋ baadaŋ gette y'a-t'ooro kereŋ, wo koŋ Mariyam dabar t'a ki'n seeda baadaŋ aa an ki'n giira ti kasigara.»

Nebi erewo sundutú An

³⁶I d'ede soŋ nebi erewo sundutú An uto ki Peenuwel, tode gette ti biza bumbu k'Aser. Tod' ti gûulike baa. Ti kule wede ti ziida ki koŋsuwatú geŋ, an di likke ozzine sarat daŋŋal, maŋ y'a inda.

³⁷T'ume geŋ t'a likke mandaayawa bini ozzinagutú a îide ada gessire makumu pide. Ti booro Boy Raa ti ki dekkiyo ye, ti naabiya diddo oŋŋu a Raa me, onniyo muno ti lekkiyo daa k'ombo wo ti tonduyo Raa.

³⁸Aame Simeyoŋ yi rootiyto geŋ, tode toŋ maŋ t'a d'iiney wo t'a iise tamma Raa. Wo ti tôwwo taaya k'ulo a doŋ Zeruzalem pay, doŋ i delliyo Raa y'an adda ti dabaradaŋ.

Kama ki Nazaret

³⁹Aame kane maawi k'Isa an t'ize pay suldi doŋ oogoro Galmeega Raa ti dehu an d'ise me maŋ, an di-gime ti ulaŋ ki Nazaret geeger ere an di lekkiyo adda siido Galile.

⁴⁰Wo ulo geŋ yi d'ohire a urzi tudde wo a urzi k'Unde Raa, eedí ôoniyo boo ti suuniyo k'ono, wo beeko Raa a eedí.

Ettiyo k'Isa ki Zeruzalem ti maawí

⁴¹Ozzine ti ozzine maawi k'Isa an di-koliyo ki Zeruzalem kono an d'isiyo tarnaape Pak ki Yawudiyagi.

⁴²Wo aame Isa i îide ozzine koomat makumu sire maŋ, maawí an ti y' wiike ti kane ki Zeruzalem, aa oogoro ki tarnaape ti rootiyo.

⁴³Aame onniyto tarnaape i t'ingile maŋ, kane an di-gime, wo yo ulo Isa y'a uupe a Zeruzalem, maawí an ki suune ye.

⁴⁴Kane an elkiyo ulo'ŋ ti doŋ an ziido urzizaŋ soo. Iŋkino aame an izire bini peedo t'ette k'ooriyo maŋ, an d'iise dehuzí adda diine taasiyagaŋ ti laŋziyagaŋ.

- ⁴⁵Umbo an ki y'uune ye, maŋ an di dehutu an di-gime ki Zeruzalem.
- ⁴⁶Onniyo sire k'aduwe maŋ, an di y'uuno adda booro Boy Raa, yi-guune adda diine doŋ suuniyo k'oogoro, yi'n ollige wo yi di'n tondiyto.
- ⁴⁷Wo kane doŋ pay i y'ollige an ziida giggiraŋ a eedí soodo a elkiso ere i-d'ede, ti kama k'ono doŋ y'anni kama geŋ me.
- ⁴⁸Kane maawí an yi wulle maŋ, an ziida giggiraŋ wo meedí ti di ruute, t'ede: «Ulo ki nuŋ, k'isiyo kino moo me a kaye maawá me? Ki wollo, nuŋ ti meegá ay ki dehutu eŋ undey i t'udde.»
- ⁴⁹Yoŋ y'an di ruute, y'ede: «De kun ni dehutu iŋkino moo me? Kun ki suune ye ko, i dehu nuŋ n'a lekke adda Boy Meegó me?»
- ⁵⁰Wo kane eedaŋ ti ki seedu ye onamí doŋ y'an rootiyo geŋ me.
- ⁵¹Saŋ maŋ y'a t'iiziga, an di-điige ki Nazaret ti maawí soo. Yo yi d'ollige onamaŋ, wo meedí gette sulđi doŋ pay ize geŋ ti di'n boohiyo addutú.
- ⁵²Isa geŋ yi d'ohire a urzi tudde, a urzi suuniyo k'ono, ti beeko a daana Raa wo a daana duwo pay.

Lik 3

Zaŋ Batis wede zina Raa

(Matiye 3.1-6; Markus 1.1-6)

- ¹Kun ollo, t'ume Tiber yoŋ mozigo goole ki Romen, wo iide ozzine koomat makumu paat maŋ, goole ki siido Ziide sundí Pons Pilat. Goole ki siido Galile sundí Erod Antipas, leemadí Pilip yoŋ goole yi dokkiyo siido k'Iture ti siido Tirakoni. Goole ki siido k'Abilen sundí Lizaniya,
- ²wo mozagi deero doŋ sedefe sumbiyagaŋ Anne ti Kayip. A ozzine geŋ Raa yi-d'ele onamí a Zaŋ ulo Zakari, aame yi lekkiyo adda balda.
- ³Wo yo Zaŋ geŋ yi soorutu adda siidiyagi doŋ pay a biza k'ooye Zurden, yi kazita yi d'eesiyo: «Kun ti kama lekkiyaguŋ, an un ti'n suyyo batem wo Raa y'un t'isa tambobino a oldikaguŋ te.»
- ⁴Geŋ a-t'iide a ono doŋ nebi Ezayi yi riije ti kaaga adda mattupadí, y'ede: «Doŋ an d'ollige golla ki wedusu yi d'ollite adda balda, yi d'eesiyo: Kun i t'okkoŋ urzi Galmeega, erkiyagí kun i ti'n okkoŋ ki diine delele.
- ⁵Poldagi kun ti'n ôono pay, moŋgali ti kessagi pay kun di bursidito, urzi guudiyto kun ti y'ahan delele, wo urzi wede moŋgali toŋ kun ti y'iso patal.
- ⁶Iŋkino duwo pay an di y' suuna urzi k'uttiyo wede Raa y'an ele me.»

⁷A ɗoŋ duuru i dihimu ki tukki Zaŋ y'a ti'n suyye batem geŋ, y'an di rootiyo, y'ede: «Kune ɗoŋ ulpi aakede maŋkikagi! Wee wee un gize urzi wede kun t'alɗa ti booro ki Raa ere ettiyo goppon te?»

⁸Inkino maŋ kun iso naabo ere beehiye, geŋ a kize kun ti gime lekkiyaguŋ. Wo kun roote ye adda k'adduguŋ: “Kaye mugiyey Ibirayim me”, kono kun t'alɗa ti booro Raa te. Wo kun ollo, n'un di rooto: Ti moŋgali eŋ miŋ, Raa y'aane yi d'adɗe ɗuwo a t'ise ita k'inŋi k'Ibirayim me.

⁹Aŋkenŋo booro Raa i guute goppon, tod'te aa wede yi t'umbe ulpaasi y'a-dokkiɗa inda ti sondayzaŋ pay: Undumu tuuku yi k'ehiyo inŋi beehiye ye maŋ, an di-ɗekka an di seɗɗa adda k'uwwu mendí.»

¹⁰Inkino maŋ kane ɗoŋ duuru Zaŋ an di y' tunde, an'de: «De ay d'ise mummino me?»

¹¹Maŋ y'an di ruute, y'ede: «Aame wede i-d'ede kallagi sire maŋ, soŋ yi elo a wede i-k'ede ye. Aame wede i-d'ede ombo maŋ, y'an ti dooko ti wede i-k'ede ye.»

¹²A ume geŋ i d'ede ɗoŋ seɗɗu jibaaye toŋ an iido y'a ti'n suyye batem, wo Zaŋ an di y' tunde, an'de: «Wede dooyisadey, ay d'ise mummino me?»

¹³Maŋ yoŋ y'an di ruute, y'ede: «Kune a munda wede an un ɗikke geŋ, ti doolo kun a amba ye.»

¹⁴Inkino asigiryagi toŋ an di y' tunde, an'de: «Wo ɗe kaye me, ay d'ise mummino?» Yoŋ y'an di ruute, y'ede: «Munda wedusu kun ambe ki toogo ye, ise ombo bize ti suma ɗuwo toŋ ulu, ulbuguŋ iso uŋse a ranŋaguŋ.»

Kaza ki wede ettiyo k'ita

(Matiye 3.11-12; Markus 1.7-8)

¹⁵Kane ɗoŋ duuru geŋ an di delliso wo an di zaapu elkisadaŋ ekki yode, wede tuuku toŋ yi rootiyo adda k'addí a urzi Zaŋ geŋ me, an'de: «Kunuŋ eŋ miŋ aasa Almasi Raa yi biire ko?»

¹⁶Inkino maŋ Zaŋ y'an di ruute a kane pay, y'ede: «Nuŋ n'unni suyyiso batem t'ahu, wo ɗe wede ettiyo k'ita geŋ yoŋ toogo yi jiire nuŋ, ni k'iide n'a ki t'eeze sibe tobiyagí ye. Yoŋ y'unni suyya batem t'Unde Kamileŋ wo ti uwwu.

¹⁷Wo yoŋ y'a ɗekka booro aakede wedusu yi t'umbo munda ki solɗe a beezí, y'a silɗa koɗuwo, inŋi yi-t'oba giyyayí, wo odɗo y'a t'ogga mentú adda k'uwwu ere i k'unto ye.»

¹⁸A ɗoŋ duuru Zaŋ y'an d'eele kooke ti doolo toŋ baadaŋ. Geŋ inkino y'an di kazita urzi Rabila Majjaanawa me.

¹⁹Wo aame geŋ Erod wede i dokkiyo siido Galile, Zaŋ y'a y'iipide kono yi ziida ere leemadí sundutú Erodiyas, wo kono soŋ y'ize suldí doŋ ulpi baadaŋ ti doolo.

²⁰Wo t'ekki suldí doŋ pay ulpi Erod y'ize geŋ, Zaŋ y'a-ti y' ziida daŋgay.

Suyyiso batem k'Isa

(Matiye 3.13-17; Markus 1.9-11)

²¹Doŋ pay Zaŋ yi ti'n zuyye batem maŋ, Isa toŋ y'a-ti y' zuyye batem. Wo aame Isa yi ton-diyo Raa geŋ, kandaane a t'ihina,

²²wo Unde Kamileŋ t'a dīigo a tuddí, ti tudde ere aa deere. Wo golla t'a ruute ti kandaane, t'ede: «Kee ulo nuuno, ni ki giyye baadaŋ, ulbó unŋe ti kee me.»

Ita moŋgidagi k'Isa

(Matiye 1.1-16)

²³Aame Isa i îide suma k'ozzine ada g'afo maŋ, y'a iise kazita Rabila Majjaanawa. Aa in di rootiyo yoŋ ulo ki Yusup, geŋ ita moŋgidagi ettiyo: Yusup yoŋ ulo k'Eli,

²⁴Eli ulo ki Matat, Matat ulo ki Lebi, Lebi ulo ki Melki, Melki ulo ki Yanay, Yanay ulo ki Yusup,

²⁵Yusup ulo ki Matatiyas, Matatiyas ulo ki Amos, Amos ulo ki Nahum, Nahum ulo ki Esili, Esili ulo ki Nagay,

²⁶Nagay ulo ki Maat, Maat ulo ki Matatiyas, Matatiyas ulo ki Simeyin, Simeyin ulo ki Yosek, Yosek ulo ki Yoda,

²⁷Yoda ulo ki Yohanan, Yohanan ulo ki Resa, Resa ulo ki Zorobabel, Zorobabel ulo ki Salatiyel, Salatiyel ulo ki Neri,

²⁸Neri ulo ki Melki, Melki ulo ki Addi, Addi ulo ki Kosam, Kosam ulo ki Elmudam, Elmudam ulo ki Er,

²⁹Er ulo ki Zozuwe, Zozuwe ulo ki Eliyezer, Eliyezer ulo ki Yorim, Yorim ulo ki Matat, Matat ulo ki Lebi,

³⁰Lebi ulo ki Simeyoŋ, Simeyoŋ ulo ki Ziida, Ziida ulo ki Yusup, Yusup ulo ki Yonam, Yonam ulo ki Eliyakim,

³¹Eliyakim ulo ki Meleya, Meleya ulo ki Menna, Menna ulo ki Matata, Matata ulo ki Natan, Natan ulo ki Dawut,

³²Dawut ulo ki Zeese, Zeese ulo ki Ibet, Ibet ulo ki Booz, Booz ulo ki Sala, Sala ulo ki Nasoŋ,

³³Nasoŋ ulo ki Aminadap, Aminadap ulo ki Adimin, Adimin ulo ki Arini, Arini ulo ki Eziron, Eziron ulo ki Pares, Pares ulo ki Ziida,

³⁴Ziida ulu ki Yakup, Yakup ulu k’Isaaka, Isaaka ulu k’Ibirayim, Ibirayim ulu ki Tera, Tera ulu ki Nahor,

³⁵Nahor ulu ki Serug, Serug ulu ki Regu, Regu ulu ki Pelek, Pelek ulu ki Eber, Eber ulu ki Sala,

³⁶Sala ulu ki Kenan, Kenan ulu ki Arpazad, Arpazad ulu ki Sem, Sem ulu ki Nowe, Nowe ulu ki Lemek,

³⁷Lemek ulu ki Matusalem, Matusalem ulu ki Enok, Enok ulu ki Yered, Yered ulu ki Malaleyel, Malaleyel ulu ki Kenan,

³⁸Kenan ulu ki Enos, Enos ulu ki Set, Set ulu ki Adum, Adum ulu ki Raa.

Lik 4

Naamiya daggiya k’Isa

(Matiye 4.1-11; Markus 1.12-13)

¹Isa yi kama ti biza k’ooye Zurden ôoniyo t’Unde Kamilen, mañ Unde Raa gette t’a-di t’iide k’adda balda.

²A ume geñ Meeda siitandani t’a yi niime daggiya adda k’onniyo ada pide geñ me. Adda k’onniytagi geñ yoñ y’a likke daa k’ombo, wo aame onniytagi geñ an t’ingile mañ, mosogo t’a yi ziida.

³Inkino mañ Meeda siitandani ti di ruute, t’ede: «Aame kee Ulo Raa kotto mañ, k’elo urzi a mukkolo ette t’a-kime ombo.»

⁴Isa yi di’n gime onamtú, y’ede: «Koñ te m’ollo, ono eñ an riñe ti kaaga adda mattup ki Raa, an’de: “Lekkiyo wedusu, tod’te t’urzi k’ombo bizí ñañal ye.”»

⁵Mañ Meeda siitandani t’a-di t’iide k’ekki mukkolo sohoru, wo a kaamiki ita moziko pay ki duniya ti di gizite,

⁶⁻⁷wo ti di ruute, t’ede: «Aame ki-dikka wo k’o uttila mañ, n’a di t’ela a kee toogo ti laale wede ki moziko pay ette, kono kane pay eñ an oo n’ele a nuñ, wo ni-t’ele a wede aa ni dehu.»

⁸Mañ Isa yi di ruute, y’ede: «M’ollo, ono eñ an riñe ti kaaga adda mattup ki Raa, an’de: “Kee k’ottilo a Galmeega Raazá, wo geñ a yode ñañal ki naabo me.”»

⁹Sañ mañ Meeda siitandani t’a-di t’iide Zeruzalem t’a-ti y’ ziipe t’ekki Boy Raa a ume wede awwa, wo ti di ruute, t’ede: «Aame kee Ulo Raa kotto mañ, t’awwa geñ k’oldi k’a zamba siido,

¹⁰kono ono eñ an riñe ti kaaga adda mattup ki Raa, an’de: “Raa y’an di roota maaleekiyagi kono kee, an gi di booha.”

11Wo soŋ an riije, an'de: “an gi di seeda beezan, kono k'a t'alda zoŋdá a ki t'oggo ekki mokkolo ye.”»

12Isa yi di ruute, y'ede: «M'ollo, ono eŋ an riije ti kaaga adda mattup ki Raa, an'de: “Kee Galmeega Raazá ki y' naame ye.”»

13Iŋkino aame Meeda siitandani ita naamiya daggiya ere tuuku toŋ pay ti ti dinge maŋ, t'a t'irga ti tuddí bini onniyo ere ti t'oono ti doolo.

Naabo k'Isa a siido Galile

(Matiye 4.12-17; Markus 1.14-15)

14Isa geŋ ôoniyo ti toogo k'Unde Kamileŋ y'a-gime ki siido Galile, wo sundí t'a ñile adda siido pay gette.

15A ume geŋ yi dooyisito adda boydî doŋ Yawudiyagi ge dooyiso, wo doŋ pay an di y' tamma.

Doŋ Nazaret an koogire Isa

(Matiye 13.54-58; Markus 6.1-6)

16Isa y'a t'iiziga, y'a iŋgile ki Nazaret geeger ere y'a ihira. A onniyo ere ki puukiyo Yawudiyagi maŋ, aa daayum yi d'isiyo yi-t'iide adda boy wede Yawudiyagi ge dooyiso, maŋ y'a t'iiziga y'an di gare mattup ki Raa ere ti kaaga.

17An i d'ele mattup lobide ki nebi Ezayi. Aame yi t'ihina maŋ, yi d'uune ume wede an riije, an'de:

18«Unde Galmeega Raa ti konso a eedó, yoŋ yi ni biire kono n'a kizite Rabila Majjaanawa a doŋ an k'ede munda ye. Y'a n'igibe kono n'a kizite a doŋ an zidfo bulagi an t'adde, a doŋ koŋzayi edayan a-t'ihina an di wolle kereŋ, wo a doŋ an an oofibe yeebadaŋ an t'adde ti dabaradaŋ te,

19kono n'an di kize ozzine wede an di wolle beeko Galmeega Raa.»

20Aame yi dinge gariya maŋ, mattup y'a-t'ilbida umatú, yi-di t'ele a wede i naabiya adda boy geŋno, yoŋ y'a-guune. Wo doŋ pay adda boy geŋ edayan ki tukki yode.

21Iŋkino maŋ y'an d'iise rootiyo, y'ede: «Aŋki batum ono doŋ an riije ti kaaga adda mattup ki Raa doŋ kun illiga eŋ, a t'iide a kune.»

22Doŋ pay an di y'imme, an ziida giggeraŋ a ono doŋ majjandani udfde ti bizí geŋ me, wo an di rootiyo, an'de: «Yo eŋ ulo Yusup de me!»

23Maŋ Isa y'an di ruute, y'ede: «Ki kotto n'elkiyo kune kun o roota ono ombide eŋno, kun t'eesa: “Wede daawiya no, ki daawo tuddá do.” Wo kun o di roota soŋ: “Kaye ay y'illiga sulfi doŋ pay kee k'izo a geeger Kapernayim me, wo a eŋno adda siidada toŋ k'iso sulfi doŋ iŋkino kay.”»

24Wo y'a ruute sey, y'ede: «Derec in'kino wo n'un di rooto: Nebi geŋ doŋ a geeger ere y'a ihira daŋŋal, onamí an k'olliga ye me.

25Derec in'kino wo n'un di rooto: Ti kaaga a ozzinagi ki nebi Eli geŋ, ozzine afo ti gootiyo mizzi yi ki guppe ye, i d'ize mosogo baadaŋ adda siido pay. A ozzine geŋ mandaydayi baadaŋ a siido k'Izirayel me,

26wo toŋ nebi Eli Raa yi ki y'igibe ye, y'a nooge ere soo ti diine kane geŋ me. Y'a y'igibe k'ume mandaayawa ere soo Yawudowo ye ti lekkiyo a Sarepita adda siido ki Sidon.

27Soŋ a ozzinagi ki nebi Elize geŋ, i d'ede doŋ bintidagi baadaŋ a siido k'Izirayel me, wo ti diinayaŋ wenda soo toŋ i k'ize ye kamilen me, a t'ize kamilen Naama daŋŋal yoŋ ti siido Siiri.»

28Aame an illiga onamí in'kino maŋ, kane doŋ pay i t'ugiyee adda boy wede Yawudiyagi ge dooyiso geŋ, an di gulkuwe baadaŋ.

29Maŋ kane an t'iiziga, Isa t'adda geeger an di y'udde, an di-t'iide neere tokomo ere geegirzaŋ eego, kono Isa an ti y' kibiro k'ekki zire.

30Wo yoŋ yi t'udde ti diinayaŋ, y'a ziida urzizi y'a ingile.

Isa yo a Kapernayim

(Matiye 7.28-29; Markus 1.21-28)

31In'kino maŋ Isa y'a-diige ki Kapernayim geeger ki siido Galile. A onniyo ere ki puukiyo Yawudiyagi maŋ, duwo yi di'n dooyiso,

32wo kane dooyisadi gette t'an di'n ziida, kono yi dooyiso ti toogo suuniyo ere ki yode batum.

33Adda boy wede Yawudiyagi ge dooyiso geŋ i d'ede wedusu i-d'ede siitan a eedi, y'a idili ti golla awwa, y'ede:

34«Wayya Isa wede ti geeger Nazaret no, ki dehu moo me a tukki kaye me? Ay suune kee k'iido kono k'ay di'n dagge. Kee nuŋ ni ki suune, kee Wede Kamilen Raa y'igibo.»

35Maŋ Isa yi di ruute ti golla zakidi, y'ede: «Koŋ m'a t'appa bizi wo mi t'addo ti tukki wede me.» Wede geŋ siitan t'aa diine siido a diinayaŋ wo t'a t'udde ti tuddi, ti-k'ize munda ulsu ye.

36Kane doŋ pay orgiso t'anni ziida wo an d'iise rootiyto ti tuddaŋ, an'de: «Urzi k'ono doŋ kino eŋ miŋ mummino me! Wede eŋ t'urzi wede an i ele wo ti toogo ere i-d'ede gette, siitandani y'an di rootiyo an t'adde, wo an t'addiya.»

37Wo Isa sundi ti mo'olo adda siido gette pay.

Eliyo beeko a doŋ k'eeni baadaŋ

(Matiye 8.14-17; Markus 1.29-34)

³⁸Isa geɗ geɗ t'adda boy wede Yawudiyagi ge dooyiso yi-t'udde, y'a t'iide daɗ Simo. Aame y'iiney maɗ yi-t'uuney ande Simo i-ti d'iire girgir, wo an tunde Isa, an'de: «Erewo ette mummino ki iso!»

³⁹Maɗ Isa y'aa d'uttile ki tuddutu, wo y'a ruute ti golla zakidi a ooriyo t'a t'ooli. A kaamiki ooriyo t'a t'iili, tod' t'a t'iiziga wo t'an d'iise naabiya.

⁴⁰A peedo t'a t'iire maɗ, kane doɗ pay an d'ede doɗzaɗ eeni wede tuuku toɗ t'ita k'eenizi k'eenizi geɗ, an i di ziko a Isa. Yoɗ a wede tuuku toɗ yi di zaapu beezí beezí, wo kane an d'ooniyo bee.

⁴¹Iɗkino kane siitandani toɗ an t'adfiyta kay ti tukki doɗ baadaɗ kaɗ dollite, an d'eesiyo: «Kee Ulo Raa! Kee Ulo Raa!» Wo yo Isa y'an di rootiyo ti golla zakidi wo y'an k'ooliyo urzi an ki d'orba ye, kono kane an yi suune yoɗ Almasi Raa yi biire me.

Engilso k'Isa ki siido Ziide

(Matiye 4.23; Markus 1.35-39)

⁴²Aame ume i t'umpile maɗ, ti Kapernayim Isa y'a t'udde y'a iɗgile k'adda balda. Kane doɗ duuru an di y' dehu. Aame an y'uune maɗ, kane an dehu y'a lekke a sirpadaɗ wo an di y'eegire yi ki'n ooli ye.

⁴³Wo Isa y'an di ruute, y'ede: «A geegiryagi doɗ ti doolo toɗ, i dehu n'an kizite Rabila Majjaanawa ki Moziko Raa t'iina, kono yi n'igibo miɗ k'iɗkino.»

⁴⁴Maɗ adda siido Ziide yi kazita adda boydi doɗ Yawudiyagi ge dooyiso.

Lik 5

Sanalliyagi k'Isa doɗ ki poone

(Matiye 4.18-22; Markus 1.16-20; Zaɗ 21.1-11)

¹Onniyo soo Isa yoɗ a biza bar ki Zenezaret, wo kane doɗ duuru an di-t'ugiye, an di ɗaay'u ti tuddaɗ kono an dehu an d'olliga ono Raa.

²Maɗ a biza geɗ yi wulle tookiyagi sire, doɗ sawwiya an ti diggite an opilsito lembidagaɗ.

³Isa geɗ yi di gili adda tooko ere soo, tod'te ki Simo, wo yi di ruute a yoɗ, y'ede: «Ti zeɗge k'in odo k'adda k'ahu booloɗ.» Aame an a iide k'adda maɗ, Isa y'aguune ekki tooko wo y'a iise dooyiso doɗ duuru.

⁴Aame y'a ti diɗge dooyisadi maɗ, yi di ruute a Simo, y'ede: «Kun a odo k'adda mohita gettiyo, wo kun ti kakko lembidagaɗ, kun sawwoy puuni.»

⁵Maɗ Simo yi di'n gime onami, y'ede: «Wede dooyiso, diddo ette kaye ay niite bini bini toɗ, munda ay k'uune ye, wo a onama geɗ kaye ay di-kakke lembidagey me.»

- ⁶Aame an ti gikke maṅ, an di ziki puuni lembidagaṅ bokbok aa a sittite.
- ⁷Inkino maṅ kane an d'umbe beezaṅ, i-kaza lanziyagaṅ doṅ adda tooko ere ti doolo an t'okko noogiyadaṅ. Kane an iido maṅ, ti kane pay an t'ũunite bokbok ti puuni tookiyagi sire geṅ aa i di sooyite.
- ⁸Aame Simo Piyer yi wulle inkino maṅ, y'a-dikke a daana k'Isa wo y'a ruute, y'ede: «Galmee'ki nuṅ, k'a ledfo ti tuddo me, kono nuṅ wede k'oldiko.»
- ⁹Yi rootiyo inkino kono yode ti doṅ a itadi pay orgiso t'anni ziida baadaṅ, a baadika puuni doṅ an ziki geṅ me.
- ¹⁰Wo Zak ti Zaṅ inṅi Zebede, kane doṅ naabadaṅ kaṅ soo ti Simo me, toṅ inkino kay orgiso t'anni ziida. Wo de Isa yi di ruute a Simo, y'ede: «Kee k'orgide ye, ti aṅki eṅ k'a t'isa wede dehu tu duwo an d'etto k'urzizo.»
- ¹¹Inkino aame ti tookiyagaṅ an iiney biza zeṅge maṅ, suldiṅaṅ pay an d'iili geṅno, an di diine Isa.

Eliyo beeko a wede bitide
(Matiye 8.1-14; Markus 1.40-45)

- ¹²Onniyo soo Isa yi t'iide k'adda geeger soo ki siido Galile, a ume geṅ i d'iido wede bitide tuddi risimik. Aame yi wulle Isa maṅ, y'a t'uttille zumayi a siido, wo y'a yi tunde, y'ede: «Galmee'ki nuṅ, ki dehu maṅ, k'o eli beeko n'a t'ise kamileṅ a daana Raa.»
- ¹³Maṅ Isa y'a igibe beezi, y'a yi butte wo y'a ruute, y'ede: «Nuṅ ni dehu, ki t'iso kamileṅ!» A kaamiki bitidayi a nukkide.
- ¹⁴Wo Isa yi di ruute, y'ede: «K'ollo koduwo, a munda wede ize eṅ, a wenda soo toṅ ki rootey ye! Wo de k'odo deddet, ki-ti kazoy tudda a wede sedeke y'a ki ti wolley, wo k'a eloy munda ki sedeke a kize ki t'ize kamileṅ aa Muusa y'a ruute adda k'oogoro in d'ise, kono doṅ pay an di wolle kee k'uune bee.»
- ¹⁵Aame geṅ rabila k'Isa ti-tepiyo ki tepiyo, wo doṅ baadaṅ an d'ettiyo ki tuddi kono an d'ollige onami wo an d'ooniyo beeko k'endanzaṅ.
- ¹⁶Wo yo Isa yi t'argu k'adda balda kono yi-tondiyo Raa.

Eliyo beeko a wede runguyun
(Matiye
9.1-8; Markus 2.1-12)

- ¹⁷Onniyo soo Isa yi dooyiso duwo. Kane Pariziyen ti doṅ suuniyo k'oogoro, an iido ti illiyagi doṅ pay ki siido Galile, ki siido Ziide, wo ki Zeruzalem, an di-guune a sirpadi. Wo toogo Galmeege Raa ti yode, ti-d'eliyo urzi y'an d'eliyo beeko a doṅ k'eeni.

18Aame geŋ i d'iido ɗuwo an d'umbo wede ruŋguyun ti zaade, an dehu an ti y' t'ele k'adda boy an ti y' zaape a ɗaana k'Isa.

19Wo kono ɗuwo baadaŋ geŋ urzi an ti y' t'ele k'adda boy umbo, iŋkino maŋ an a-ti gili t'ekki boy geŋŋo, an d'ihina bulɗo, ruŋguyun an ti y' zuuye ti zaadayi pây a diine ɗoŋ duuru a ɗaana k'Isa.

20Isa yi wulle kane an ziipe addaŋ a yode maŋ, aame geŋ y'a ruute, y'ede: «Oldikadá n'a y' t'ize tambobino.»

21Maŋ kane ɗoŋ suuniyo k'oogoro ti Pariziyen, an d'elkiso adda k'addaŋ, an'de: «Yo wede eŋ miŋ wee wee yi kaldita suma Raa iŋkino me? Wee wee aane aase tambobino a oldiko wede, daa ki Raa siidí ye maŋ?»

22Isa elkisadaŋ y'a ti zuune wo y'an di ruute, y'ede: «Ki moo me kun d'elkiso adda k'addugun iŋkino me?»

23Ise laylay a jiiire miŋ too me a nuŋ n'a ruute: «Oldikadá Raa y'a y' t'ize tambobino» kunun, n'a ruute: «Ki t'oozo wo k'a oziro» me?

24Wo ni dehu kun di suune, nuŋ wede an n'ehe aa ulo wede eŋ, adda duniya ette o d'ede toogo k'isiyo tambobino a oldiko.» Maŋ yi di ruute a wede ruŋguyun, y'ede: «Nuŋ n'a di rooto, ki t'oozo, ki t'ambo zaadayá, k'a aaho boozá.»

25A kaamiki geŋ wede y'a t'iiziga a ɗaana ɗuwo pay, y'a t'umbe zaadayi wede yi moone eego, wo y'a aahe boozí yi tamma Raa.

26Kane ɗoŋ pay geŋ an ziiɗa giggiraŋ wo an tamma Raa. Ti orgiso baadaŋ adda k'addaŋ an di rootiyo, an'de: «Aŋki kaye ay wulle sulɗi ɗoŋ ki k'aane ki ki ti'n ruute ye!»

Waaku Lebi

(Matiye

9.9-13; Markus 2.13-17)

27San maŋ tin geŋ Isa y'a t'udde wo yi wulle wede seddu jibaaye sundí Lebi, yiguune a ume naabadí yi seddu jibaaye. Isa yi di ruute, y'ede: «Ki ni daani.»

28Maŋ yon y'a t'iiziga, sulɗizí pay yi d'iili, wo y'a yi diine.

29Lebi yi d'ize ombo baadaŋ a boozí a suma k'Isa, i d'ede ɗoŋ seddu jibaaye baadaŋ wo ɗoŋ ti doolo ton ede, an di-guune ombo ti kane kaŋ soo.

30Kane Pariziyen ti ɗoŋ suuniyo k'oogoro a diinayaŋ an d'orbe sunni sunni, an an di ruute a sanalliyagi k'Isa, an'de: «Ki moo me kun d'ombo wo kun di sobo ti ɗoŋ seddu jibaaye wo ti ɗoŋ k'oldiko ongo me?»

31Maŋ Isa y'an di'n gime onamaŋ, y'ede: «Kane ɗoŋ waaliŋ an ki y' dehe ye wede daawiya me, wo i yi dehe ɗoŋ k'eeni.»

32Nuɲ ni k'iido'ŋ waaku kane ɗoŋ ki diine ye, wo ɗe n'iido'ŋ waaku kane ɗoŋ k'oldiko kono an di-kime lekkiyadaŋ.»

Tondiyo a urzi lekkiyo onniyo muno daa k'ombo

(Matiye
9.14-15; Markus 2.18-20)

33Kane Pariziyen an i di ruute a Isa, an'de: «Sanalliyagi ki Zaŋ ti ɗoŋ ki kaye, onniyo muno an di lekkiyo daa k'ombo wo an tondiyo Raa, wo kaciŋ kane sanalliyagá an d'ombo wo an di sobo me.»

34Isa y'an di ruute, y'ede: «Kun elkiyo miŋ ɗuwo ɗoŋ an'ni wiiko a tarnaape ki seedu, kun di'n ise ki toogo an di lekke daa k'ombo ko, aame kule k'ere yoŋ a sirpadaŋ geŋ me? Aha, iŋkino ye!

35Wo saŋ onniytagi an d'aana, aame kule k'ere ti diinayaŋ an ti y'umba maŋ. A onniytagi geŋ kane onniyo muno an di lekka daa k'ombo kollo.»

Sulɗi ɗoŋ mazzini ti ɗoŋ aware

(Matiye
9.16-17; Markus 2.21-22)

36Isa y'an di ruute ono ombide enno sey, y'ede: «Beehiye ye wenda yi sitte buude kalle aware kono y'a-t'obbira ekki kalle mazzini me, para maŋ kalle wede aware ki ti y' zitto wo buude kalle wede aware ki zitto'ŋ geŋ, ti kalle mazzini an ki t'okkiya ye.

37Wo beehiye ye wenda yi t'eepe toote k'inŋi biŋ wede oozige botto adda riitile wede mazzini me, para maŋ toote wede oozige botto geŋ y'a-batte riitile, toote a t'obi siido wo riitile a latte pây.

38Ki too maŋ i dehu toote wede oozige botto geŋ eepiyadí adda riitile wede aware.

39Geŋ wede tuuku yi t'iibe toote wede iine maŋ, toote wede oozige botto geŋ yi ki y' dehe ye kono y'a t'eese: "Wede iine unse a jiire."»

Lik 6

Isa ti onniyo ere ki puukiyo

(Matiye 12.1-8; Markus 2.23-28)

1 Onniyo soo ere ki puukiyo Yawudiyagi maŋ, Isa yi doopide t'adda dombi ɗoŋ ki geme ti sanalliyagí. Aame geŋ kane sanalliyagí an sattita geme, an t'adɗuzu an t'ayɗu.

2 Kane Pariziyen oŋgo an di ruute, an'de: «Ki moo me kun d'isiyo munda wede oogiradiŋ ti k'ele urzi k'isiyo ye, a onniyo ere ki puukiyadiŋ te?»

³Maɗ Isa y'an di'n gime onamaɗ, y'ede: «Ki kotto kun gire munda wede ti kaaga onniyo soo yode Dawut y'ize ti doɗ a itadí, aame mosogo ti'ni ziida geɗ me.

⁴Yi-t'iide adda Boy Raa wede an ikkima ki golmodo, y'a ziki mappa wede an i ele sedeke a Raa, wo yode ti doɗ a itadí an d'iimi. Wo Raa y'an k'ize munda ye, ki too maɗ kane an k'ede ye urzi an d'oomi me, oogiradiɗ t'ele urzi a doɗ sedeke daɗɗal.»

⁵Maɗ Isa y'an di ruute, y'ede: «Nuɗ wede an n'ehe aa ulo wede eɗ, o d'ede urzi k'isiyo munda wede aa addó i dehu ekk'onniyo ere ki puukiyadiɗ te.»

Wedusu beezí unto

(Matiye 12.9-14; Markus 3.1-6)

⁶A onniyo ere ki puukiyo Yawudiyagi ti doolo maɗ, Isa yi-t'iide adda boy wede Yawudiyagi ge dooyiso, y'a iise dooyiso duwo. Adda boy geɗ i d'ede wedusu soo iɗkino beezí wede k'ammade unto.

⁷Kane doɗ suuniyo k'oogoro ti Pariziyen, an dehu an t'oone urzi an di sakiya Isa, kono kamo an di woliyo koomadí, a onniyo ere ki puukiyo Yawudiyagi a wede yi-t'ela beeko ko?

⁸Wo yo Isa yi suune elkisadaɗ te, iɗkino maɗ yi di ruute a wede beezí unto geɗ, y'ede: «Kee ki t'oozo, ki t'ôhor a daana duwo pay kino.» Maɗ wede y'a t'iiziga, y'a t'ihira a umayí geɗo.

⁹Saɗ Isa y'an di ruute, y'ede: «N'un di'n tondo do, oogiradiɗ t'ele urzi k'isiyo ki moo me a onniyo ere ki puukiyadiɗ te? A wedusu ki-d'ise beehiye kunuɗ, ki-d'ise ulsu ko? Wedusu k'a y'utte kunuɗ, k'a yi t'ide ko?»

¹⁰Aame geɗ kane doɗ pay Isa yi di'n woliyo adda k'edayaɗ, wo saɗ yi di ruute a wede geɗ, y'ede: «Beezá ki y'ondo.» Maɗ y'a y'unde, wo beezí a t'ikkima.

¹¹Wo kane doɗ suuniyo k'oogoro ti Pariziyen geɗ addaɗ a ûune ti kulkuwo, an di rootiyto ti tuddaɗ a munda wede an aane an i d'ise a tukk'Isa geɗ me.

Beeriyó doɗ zina k'Isa

(Matiye 5.1; 10.1-4; Markus 3.13-19)

¹²Aame geɗ saɗ Isa y'a-gili k'ekki kesse kono y'a tonde Raa, wo diddo y'a-t'umpile pay ti tonduyo Raa.

¹³Aame ume i t'umpile maɗ, Isa y'a wiike sanalliyagí, wo yi biire ti diinayaɗ doɗ koomat makumu sire y'anni wiike sundaɗ doɗ zina.

¹⁴Kane sumbiyagaɗ: Simo wede Isa y'a yi wiike sundí soo te Piyer, wo leemadí Andire; Zak, Zaɗ, Pilip, Bartelemi,

¹⁵Matiye, Toma wo Zak ulo k'Alpe; Simo wede an yi waaku wede addí wehini kono siidadí me;

16Ziidas ulo ki Zak, wo Ziidas Iskariyot wede saŋ y'a t'owila Isa.

17Saŋ maŋ t'ekki kesse Isa ti kane doŋ yi biire an di dŋigo ki bere wede ekki kesse geŋŋo batum, a ume wede sanalliyagí doŋ baadaŋ an t'ugiyē. A ume geŋŋo toŋ i d'ede doŋ duuru baadaŋ an iido ti siido Ziide pay, ti geeger Zeruzalem, wo ti geeger Tir ti Sidoŋ doŋ a biza bar.

18Kane an iido kono an dehu an di y'olliga wo y'an t'ele beeko a endanzaŋ. Wo kane doŋ siitandani an'ni dabirsa geŋ, y'an d'ele beeko.

19Kane doŋ duuru pay an dehu an di botte tudde k'Isa, kono toogo i d'adŋiya ti tuddí, an d'ooniyo beeko pay.

Uŋsuwo wo dabar

(Matiye 5.1-12)

20Iŋkino maŋ Isa y'a zibbe edayí k'ume sanalliyagí wo y'a ruute, y'ede: «Uŋsuwo a kune doŋ un k'ede munda ye, kono Moziko Raa tod'te ki kune.

21Uŋsuwo a kune doŋ aŋkenŋo mosogo t'unni t'owwo, kono saŋ maŋ ombó t'un di'n pildēy. Uŋsuwo a kune doŋ aŋkenŋo kun m'olo, kono saŋ maŋ kun di koobitey.

22Uŋsuwo a kune aame duwo an un olmidē, an unni koogire, an unni kaldita wo an un rootiyto ono doŋ ulpi a egguŋ, kono kun ziipe adduguŋ a nuŋ wede an n'ehe aa ulo wede eŋŋo.

23Aame suldi geŋ an iina maŋ, kune ulbuguŋ un iso uŋse wo kun oldito uŋsuwo k'awwa, kono munda wede Raa yi dehu y'un t'eley geŋ, yoŋ baadaŋ y'unni delliyo a kandaane. Geŋ iŋkino kay kane maawaŋ an'ni dibire nebiyagi doŋ ti kaaga me.

24Wo de dabar a kune doŋ bey, kono uŋsuwaguŋ kun t'uune baa.

25Dabar a kune doŋ aŋkenŋo ombó t'unni palda, kono saŋ maŋ mosogo t'un di'n t'idey. Dabar a kune doŋ aŋkenŋo i koobiyto, kono saŋ maŋ kun di lekkey adda m'olo wo kun d'oley ti zumari a edaguŋ.

26Dabar a kune aame duwo pay an unni tamma maŋ, kono geŋ iŋkino kay kane maawaŋ an ize ti doŋ an ti t'isiyo tuddaŋ aa nebiyagi.»

Geyyiso doŋ k'aduguŋ

(Matiye 5.39-47)

27«Wo n'un di rooto a kune doŋ i n'ollige: Kun geyyo kane doŋ ti kune adu, kun an iso beehiye a doŋ unn'olmidē me.

28Kun zaapo beeko a doŋ unni duudiyo, wo kun tondo Raa kono doŋ i rootiyto ono ulpi a tukki kune.

29Aame wede yi ki diiŋe a tobbisadá ki bita maŋ, ki kama tobbisadá ere soo toŋ maŋ y'a ki ti daaŋa. Aame wede yi t'umbe kallayá wede goole maŋ, ki-oolo kallayá wede ŋeŋku t'adda toŋ y'a t'ambo pây.

30Wede tuuku yi tonɗiyo munda ti beezá maŋ, ki eelo, wo aame wede yi t'umbe mundazá maŋ, ki y' tonda ye.

31Munda wede kun dehu dúwo an un d'ise geŋ, a kane toŋ kun an iso iŋkino kay.

32Aame kun geyyiso doŋ unni geyyiso daŋŋal maŋ, sunduguŋ ede deŋ ko? Derec, doŋ k'oldíko toŋ kane an geyyiso doŋ an'ni geyyiso kay.

33Wo aame kun isiyo beehiye a doŋ unn'isiyo beehiye daŋŋal maŋ, sunduguŋ ede deŋ ko? Derec, kane doŋ k'oldíko batum toŋ an isiyo iŋkino kay.

34Aame kun eliyó see a wede kun elkiyo y'un yi kima daŋŋalaŋ maŋ, geŋ sunduguŋ ede deŋ ko? Derec, doŋ k'oldíko toŋ kane an eliyó see a doŋ k'oldíko doŋ aana an yi kima.

35Wo ki too maŋ kun geyyo kane doŋ ti kune adu, kun an iso beehiye, kun an elo see me wo kun zaape adduguŋ eego ye aame an un ki y' gime ye toŋ maŋ. Iŋkino maŋ munda wede Raa yi dehu y'un t'eley geŋ yoŋ baadaŋ, wo kun t'isey iŋŋi ki Raa goole a jiiŋe pay. Derec, yoŋ wede beehiye a doŋ i ki rootiyo koduwo a yode ye, wo a doŋ bundidí pây.

36Kun t'iso doŋ i wolliyo sommagi dúwo, aakede Meeguguŋ Raa toŋ yi wolliyo sommagi dúwo.»

Ki dekke booro a tukki bakadá ye

(Matiye 5.48; 7.1-12; 15.14; 10.24-25; 7.3-5)

37«Kun dekke booro a tukki wede tuuku toŋ maŋ ye, geŋ Raa toŋ yi ki dekke booro egguguŋ ye. Kune doŋ oŋgoŋ kun i seeda ti booro ye, geŋ booro Raa toŋ t'un ki'n seeda ye. Kun oyyo isiyo tambobino a wede tuuku toŋ maŋ, geŋ Raa toŋ y'un t'isa tambobino.

38Kune a wede tuuku toŋ kun i elo, geŋ Raa toŋ y'un t'eela. Y'un t'eela baadaŋ adda mundaguŋ boo, sokkiyo wo a pildita. Derec, dooziyo ere kun dooziyo a dúwo gette, Raa toŋ y'un ti dooza a kune iŋkino kay.»

39Isa y'an di ruute ono ombide sey, y'ede: «Kun ollo, wede koosiyo'ŋ bakadí koosiyo yi y'arkide ko? Para maŋ sirwaŋ pay an di silditi adda k'oldé.

40Sanallusu geŋ, yoŋ t'ekki wede dooyisadí ye, wo de wede tuuku yi-duuye beehiye maŋ, y'a t'ise aa wede dooyisadí.

41Ki moo me ki wolliyo uŋumu wede adda k'ersa leemadá, wo undumu wede adda k'ersa kee, ki gi di y'owwiyo ye me?

⁴²De mummino k'a aane ki di roote a leemadá, k'a t'eese: "Leema ki nuŋ, k'oolo n'a di t'ambo unumu wede adda k'ersadá enno", wo undumu wede adda k'ersadá, kee batum ki ki y' woliyo ye me? Kee wede biza sire sire, ki t'ambo undumu wede adda k'ersadá doo, inkinno k'a wolla kereŋ, saŋ k'a t'amba unumu wede adda k'ersa leemadá kollo.»

Undumu ti inŋizí
(Matiye 12.33-37; 7.16-21)

⁴³«Undumu wede beehiye'ŋ, inŋi ulpi yi ki t'ehe ye, wo undumu wede ulsu toŋ, inŋi beehiye yi ki t'ehe ye.

⁴⁴Undumu tuuku toŋ ki y' suune t'urzi k'inŋizí. Geŋ inkinno inŋi tormo ki ki rakke ye ekk'undumu k'ahimagi me, wo inŋi k'inda biŋ ki ki rakke ye ekki woskani me.

⁴⁵Wedusu wede beehiye'ŋ, beehiyko t'ettiyo ti suldi doŋ beehiye y'ukume adda k'addí, wo wedusu wede ulsu'ŋ, munda ulsu y'ettiyo ti suldi doŋ ulpi y'ukume adda k'addí. Derec, munda wede wedusu y'okumso adda k'addí genno adfiya ti bizí me.»

Boydi sire
(Matiye 7.24-27)

⁴⁶«Ki moo me kune kun di n' waaku "Galmeegey, Galmeegey", wo kun ki t'isiyo ye munda wede n'un rootiyo me?

⁴⁷Wede tuuku y'ettiyo ki tuddó, y'ollige onamó wo yi sooru eego maŋ, nuŋ n'un di roote yoŋ geŋ yi deey'iso aa wee wee.

⁴⁸Yode geŋ yi deey'iso aa wede y'oozige boy. Yoŋ geŋ yi d'ittiba olde sohuru wo ita boy y'a di ziipe eego paŋgiragi. Kuyyo ti gilo wo ooye y'a ûune i paldita waawiye. Bormo gette t'a ŋiiy'a boy genno wo toŋ maŋ y'a k'iddira ye, kono boy geŋ oozigayí koduwo.

⁴⁹Wo de wede y'ollige onamó wo yi ki sooru eego ye maŋ, yoŋ geŋ yi deey'iso aa wede y'a t'iiziga boy a siido daa ki zaapu k'ita boy. Ooye y'a ûune i paldita waawiye. Bormo gette t'a ŋiiy'a boy genno, wo a kaamiki boy a ruuge, a ŋulile pay.»

Lik 7

Zaapu k'adde ki goole k'asigiryagi
(Matiye 8.5-13; Zaŋ 4.46-54)

¹Aame Isa onamí a doŋ duuru y'a ti'n dŋnge pay maŋ, y'a t'iiziga y'a inŋile geeger Kapernayim.

²A ume geɗ i d'ede goole k'asigiryagi meeda ki Romen, yoŋ i-d'ede wede naabo yi y' giyye baadaŋ wo yi-t'iire eeni y'unto.

³Aame goole k'asigiryagi geɗ y'illiga taaya k'Isa maŋ, yi d'igibe doŋ i dokkiyo Yawudiyagi miibi ki tukki yode, an i-d'obo bey kono y'a ette y'a uttey wede naabadí.

⁴Kane deero geɗ an iiney a sirpa k'Isa maŋ, an i-d'iise obe bey an kodfime, an'de: «Wede eŋ, y'ïide kee k'a ette k'a di y' noogey,

⁵kono yoŋ geɗ siidadey yi ti giyye, wo boy wede in di dooyiso toŋ ay iiziga yode.»

⁶Iŋkino maŋ Isa an di giyye ti kane kaŋ soo, an d'iŋgile. Aame yoŋ y'iiney goppon ti boy maŋ, goole k'asigiryagi meeda yi d'igibe lanziyagi, an i-di ruute, an'de: «Goolayey y'ede: Galmee'ki nuŋ, kee ki naate ye, kono nuŋ ni k'ïide ye k'a ette ki boozó me.

⁷Geɗ kono k'iŋkino ni wulle tuddó maŋ, nuŋ batum o k'ede urzi n'a k'ette ki tuddá ye. Wo tiŋ geɗ miŋ ki rooto munda soo kono wede naabadó y'a t'oone bee.

⁸Iŋkino nuŋ batum n'ottilso a doŋ deero t'eedó, wo i d'ede asigiryagi doŋ nuŋ goole t'eedaŋ. Aame ni rootiyo a wede soo: "K'odo!" maŋ, geɗ yi d'eŋgilso. Aame ni rootiyo a wede doolo: "K'edi!" maŋ, geɗ yi d'ettiyo. Wo aame ni rootiyo a bulayó: "Naabo ette ki-t'iso!" maŋ, geɗ yi-ti t'isiyo.»

⁹Aame Isa y'illiga ono geŋno maŋ, y'a ziida giggeri kono yode geɗ me, wo y'a-gime ki tukki doŋ duuru doŋ i yi daaniya, y'an di ruute, y'ede: «Kun ollo, n'un di rooto: Adda siido k'Izirayel batum toŋ, ni k'uune ye wede a zaape addi a Raa aa yode kino eŋ me.»

¹⁰Wo kane doŋ zina an di-gime ki boy, an iide maŋ an y'uuney wede naabo y'uune bee.

Baldiya k'ulo obulso ki mandaayawa

¹¹Saŋ maŋ tiŋ geɗ Isa y'a iŋgile ki geeger sundutú Nayin, sanalliyagi ti doŋ duuru baadaŋ an di y' daaniya.

¹²Aame y'iiney goppon ki biza bumbu ki geeger gettiyo maŋ, an a-t'ikkima ti duwo an t'ette ottibe nuune k'ulo obulso ki mandaayawa yoŋ soo daŋŋal y'inda. Wo doŋ baadaŋ ti geeger gette a itatú.

¹³Aame Galmeega yi wulle erewo gettiyo maŋ, i di t'ize sommagi, wo yi di ruute, y'ede: «Koŋ m'anna, m'ôole ye.»

¹⁴Saŋ y'a d'iide goppon ki sirpa saŋgali y'a-butte, maŋ doŋ i sarkiya an t'ihira, wo Isa y'a ruute, y'ede: «Ulo ki nuŋ n'a di rooto, ki t'onno!»

15Maɗ wede inda y'a t'iizi, y'a-guune, y'a iise rootiyto, wo Isa yi di y'ele a meedí.

16Kane ɗoɗ pay orgiso t'anni ziiɗa, wo an tamma Raa, an'de: «I uɗɗo nebi goole a diinayiɗ, wo Raa y'ukko noogiyo ɗoɗzí!»

17Wo a munda wede Isa y'ize geɗ, rabiladí a-tiipe adda siido Ziide pay, wo ti siidiyagi pay ɗoɗ i ti duule.

Doɗ zina ki Zaɗ Batis

(Matiye 11.2-6)

18A sulɗi ɗoɗ pay ize geɗ, a goolayaɗ Zaɗ Batis sanalliyagí an i-di t'ũide taaya. Maɗ yoɗ yi wiike ɗoɗ sire ti diinayaɗ,

19wo y'an igibe ki tukki Galmeega kono an ti y' tondo: «Kee miɗ Almasi Raa yi biire, saɗ a etto ko? Kunuɗ ay di dello wede doolo ko?»

20Aame an iiney a sirpa k'Isa maɗ, an i-di ruute, an'de: «Kaye Zaɗ Batis y'ayn'igibo kono ay ki ti tonde: “Kee miɗ Almasi Raa yi biire, saɗ a etto ko? Kunuɗ ay di dello wede doolo ko?”»

21A ume geɗ miɗ Isa y'an d'ele beeko a ɗoɗ k'eeni baadaɗ, ɗoɗ kesiyagaɗ soo soo, wo ɗoɗ an d'ede siitandani a eedaɗ, wo koɗzayi baadaɗ edayaɗ y'an di'n ihinte.

22Saɗ y'an di'n gime onamaɗ, y'ede: «Kun'do a Zaɗ, kun i-t'ôodoy taaya a munda wede kun wulle wo kun illiga eɗ me: Koɗzayi an di woliyo kereɗ, ɗoɗ jekese an sooru beehiye, ɗoɗ bitide an t'ize kamileɗ, duɗgiyagi an d'ollige, ɗoɗ unto an di bilɗe, wo Rabila Majjaanawa an an gizite a ɗoɗ an k'ede munda ye.

23Wo uɗsuwo a wede y'a ziiɗa zakidí kono nuuno bini ɗaɗgu!»

Rootiyo k'Isa a tukki Zaɗ Batis

(Matiye 11.7-11)

24Doɗ zina ki Zaɗ Batis an t'ingile maɗ, saɗ Isa y'a iise rootiyto a ɗoɗ duuru a tukki Zaɗ, y'ede: «Kun iide k'adda balɗa woliyo ki moo me? Ki wedusu wede aa alala ere maaye yi t'agisa gettiyo ko? Aha!

25De iɗkino kun iide woliyo ki moo me? Ki wedusu yi t'usse kallagi majjandani ko? Wo ɗe kane ɗoɗ ossiyo kallagi majjandani wo an lekkiyo togos geɗ, an lekkiyo adda boyɗi mozagi.

26De kun iide woliyo ki moo me? Ki nebi ko? Eyye, wo kun ollo n'un di rooto, yoɗ geɗ yi jiiire nebi sey.

27Derec, ono eɗ an riije ti kaaga adda mattup ki Raa a tukki Zaɗ, an'de: “Kun ollo, nuɗ n'a t'igiba wede zindó y'a ooguma ki poone ti kee, y'a di t'okkimey urzizá.”»

28Isa y'a ruute sey, y'ede: «Kun ollo, n'un di rooto, ti diine d'uwu don pay erayi an ehe geŋ, wede aase goole a ceere Zaŋ umbo. Wo inŋkino toŋ maŋ, wede yoŋ neŋku a jiire adda Moziko Raa geŋ, yoŋ goole yi jiire Zaŋ.

29Kane don pay ti don seddu jibaaye batum toŋ an di y'illiga, an di zuune Raa yoŋ ki diine, maŋ an d'iyye Zaŋ y'a ti'n zuyye batem.

30Wo kane Pariziyen ti don suuniyo k'oogoro, an di giigira munda wede Raa yi dehu y'aase a kane me, maŋ an di-tuuge Zaŋ y'a ti'n suyye batem me.»

31Isa y'a ruute sey, y'ede: «Don ankenno eŋ n'a t'ese kane aa wee wee? An deeyiso aa wee wee?

32Kane an deeyiso aa inŋi an ti guune a bere don duuru, an di waakutu eebaŋ, an d'eesiyo: «Kaye ay un di biiha siraro toŋ maŋ, kun ki d'immira ye! Ay un d'ũure ōoro k'unto toŋ maŋ, kun ki d'ũile ye!»

33Inŋkino Zaŋ Batis y'iina geŋ, yi k'ombo mappa ye, toote k'inŋi biŋ yi k'iibe ye, wo kun di rootiyo, kun'de: «Yoŋ i-d'ede siitan a eedí.»

34Wo nuŋ wede an n'ehe aa ulo wede eŋ, n'iina maŋ ni d'ombo ni sobo, wo kun di rootiyo, kun'de: «Kun wollo, wede eŋ y'elkiyo miŋ a ombo ti sobo toote k'inŋi biŋ daŋŋal, yoŋ laŋze ki don seddu jibaaye wo ti don k'oldfiko ongo.»

35Wo Raa'ŋ suuniyo k'ono ere i d'ede, d'uwu an ti zuune tod'te ki diine t'urzi k'inŋizí pay.»

Isa ti erewo t'isiyo oldfiko

36I d'ede wede soo inŋkino yoŋ Pariziyen, y'a wiike Isa y'a oomey di yode. Isa y'a t'iide di wede geŋno wo an di-guune an d'oomi.

37I d'ede adda geeger gette, erewo sundutú ti m̄olo k'isiyo k'oldfiko. Aame t'illiga Isa an ti guune ombo di wede Pariziyen geŋno maŋ, ti d'umbo ulo diŋgile an ikkima ki mokkolo sundutú albaatir, adda egey don eediyadaŋ unse.

38Ti-t'iide dar k'Isa a ume zoŋdí wo t'a iise m̄olo, zoŋdí t'a ti'n zuyye ti zumartú, t'a ti'n zippite t'ilaltú, ti-d'ize puuc a zoŋdí i-kaza ottilsatú baadaŋ a yoŋ me, wo ti di y'irgite egey geŋ a zoŋdí.

39Aame yo Pariziyen wede i wiike Isa yi wulle inŋkino maŋ, y'a ruute t'adda k'addí, y'ede: «Aame wede eŋ yoŋ nebi ki kotto maŋ, y'a ti suune erewo ere i y'butte gettiŋ wee te, tod'te ere an ambu sundutú k'isiyo k'oldfiko.»

40Inŋkino Isa y'a t'ihina bizí, yi di ruute a Pariziyen, y'ede: «Simo, nuŋ oo ede ono n'a di roote.» Maŋ yi di'n gime onamí, y'ede: «Wede dooyiso, ki rooto.»

41Isa y'a ruute, y'ede: «I d'ede don sire, an i di kime soŋko ki wede y'an ele see. Wede soŋ yi di-kime tamma meeda paat, wo soŋ tamma ada paat.

⁴²Aakede kane an k'iine kamatú ye geŋ, wede y'an d'ize beeko, sirwaŋ pay seezaŋ y'an di y'iide. Kane doŋ sire geŋ, wede a yi geyye a di ceere tuuku me?»

⁴³Simo yi di'n gime onamí, y'ede: «A elkiyadó maŋ, yi ize beeko a wede seezí baadaŋ a jiire wo yi-di y'iide geŋŋo.» Isa yi di ruute, y'ede: «Ono geŋ ki ti'n díkke d'erec.»

⁴⁴Maŋ Isa y'a-gime ki tukk'erewo gettiyo, wo yi di ruute a Simo, y'ede: «Erewo ette ki ti wolliyó d'e'ŋ? Nuŋ ni-t'iido adda boozá wo ahu toŋ k'o k'eele ye k'opilso zoŋdó me, wo de tod' t'o t'upile zoŋdó ti zumartú wo t'a zippite t'ilaltú.

⁴⁵Kee ki ki n' ziiida yop k'o k'ize puuc a tobbisadó ye, wo de tod'te t'ume n'iina geŋ miŋ, ti k'iili ye k'isiyo puuc a zoŋdó me.

⁴⁶Kee egey k'inŋi k'olibiyé a eedó k'o ki y'irge ye, wo tod' t'o di y'irgite egey doŋ eediyadaŋ uŋse a zoŋdó.

⁴⁷Kono kamo n'a di rooto: geyyiso ere baadaŋ t'ize gette i-kaza t'oldíkatú ere baadaŋ, tod' t'uune tambobino. Wo a wede ooniyo tambobino k'oldíkadí baata geŋ, yi geyyiso toŋ baata kay.»

⁴⁸Iŋkino maŋ Isa yi di ruute a erewo, y'ede: «Oldíkadí ni t'ize tambobino.»

⁴⁹Kane doŋ i-guune ombó ti yode'ŋ, wede soŋ yi d'elkiyo adda k'addí k'addí, an'de: «Ita doŋ kino eŋ miŋ ti too me, isiyo tambobino k'oldíko toŋ yi d'aaniya me?»

⁵⁰Wo Isa yi di ruute a erewo, y'ede: «Kono koŋ mi ziipe addí a nuŋ geŋ, m'utte m'aaho ti toose.»

Lik 8

Erayi doŋ i daaniya Isa

¹Saŋ maŋ tiŋ geŋ Isa y'a t'iiziga, yi d'ettiyo geeger ti geeger wo ille ti ille, yi kazita Rabila Majjaanawa ki Moziko Raa. Kane sanalliyagi doŋ koomat makumu sire geŋ a itadí,

²ti erayi miibi doŋ y'an ilmito siitandani wo y'an d'elo beeko a endanzaŋ. Kane erayi geŋ Mariyam ere an ti waaku Mariyam ti siido Magdalla, tode ere yi d'ilmo siitandani sarat t'ettú,

³Zane ere ki Kuuza wede i y'eeriyo boy ki mozigo Erod, Suuzan wo erayi doŋ ti doolo toŋ ede baadaŋ, kane geŋ an di noogiyo Isa ti sanalliyagí ti beezaŋ.

Ono ombide t'urzi wede korso

(Matiye 13.1-9; Markus 4.1-9)

⁴Ti geeger ere tuuku toŋ, doŋ baadaŋ an d'iide tukk'Isa, an di-t'ugiyé. Maŋ y'an di'n duuye t'ono ombide eŋŋo, y'ede:

⁵«I d'ede wedusu soo in̄kino yi t'iide korso buzuní k'adda doomizí. Aame yi sakkisa geñ, buzu oñgoñ a-zilditi a urzi, duwo an aa t'inyilse wo embi an aa di tibbe.

⁶Buzu oñgoñ soñ a-zilditi a ume t'adda'ñ pañgiragi. Kane geñ i t'udde mañ, a biiha kono kuyyo umbo.

⁷Doñ soñ a-zilditi adda k'ahimagi, kane geñ a t'udde wo ahimagi an iiziga mañ, an di'n ippe.

⁸Doñ oñgoñ soñ a-zilditi a siido ere beehiye, kane geñ a t'udde, an d'ihira wo an d'ehe: ulo muduso soo y'a ehe in̄ni meeda meeda.» Mañ Isa y'a ruute ti golla awwa, y'ede: «Wede i-d'ede kuwwa k'ollige mañ, y'ollo koduwo!»

Oodibe k'ita a urzi k'ono ombide

(Matiye 13.10-23; Markus 4.10-20)

⁹Kane sanalliyagi k'Isa an di y' tunde, an'de: «Ono ombide geñ i-kaza moo me?»

¹⁰Yoñ y'an di'n gime onamañ, y'ede: «A kune'ñ Raa y'un ele suuniyo ki suldi doñ ombide ki Moziko Raa te, wo a doñ oñgoñ suldi geñ an an rootiyto'ñ t'ono ombide. In̄kino kane'ñ an di wolleyo, wo munda an ki y' wolleyo ye, an d'ollige, wo ono itadañ an ki ti suuniyo ye.

¹¹Kun ollo, ette ita k'ono ombide: Buzu geñ, i-kaza ono Raa.

¹²Buzu wede i zilditi a biza k'urzi geñ, i-kaza duwo doñ ollige ono Raa. Sañ Meeda siitandani t'ettiyo, ono Raa t'adda k'addañ ti t'oddipe kono an ki ti zaape addañ a Raa wo an ki t'oone uttiyo ye.

¹³Buzu wede i zilditi a ume wede t'adda pañgiragi geñ, i-kaza duwo doñ ollige ono Raa, kesiko an di'n seedu t'ulbe un̄se. Wo de ono sottadañ ti ki ti deegu adda k'addañ ye, an di zaapu addañ ki peeño booloñ, wo aame i aaniya naamiya munda mañ, urzi zaapu k'addañ a Raa an d'ooliyo.

¹⁴Buzu wede i zilditi adda k'ahimagi geñ, i-kaza duwo doñ ollige ono Raa, wo de sañ elkisito, dehutu k'urzi maala wo un̄suwo lekkiyo duniya i ceeriyo eedañ. In̄kino an ki d'ohire ye a urzi Raa me.

¹⁵Ki dañgu buzu wede i zilditi a siido ere beehiye'ñ, i-kaza duwo doñ ollige ono Raa t'adde tasse wo beehiye. Ono Raa an di'n boohiyo, an seedu zakidi an d'ohire a urzi Raa, an aa d'ooniyo eebañ ti doolo.»

Ono ombide a tukki pitila

(Markus 4.21-25)

¹⁶«Wenda soo toñ y'a t'oyye pitila kono y'a-t'ossibe bogoro, ise yi-ti t'ele a ita k'oñgali umbo. Ki too mañ y'a dodde t'awwa kono doñ ette k'adda biino an di wolle toore.

¹⁷Suldi donj pay ombide'ŋ, saŋ onniyo soo a t'oodiba ita, wo ono donj i ki dehu duwo an k'olliga ye geŋ, saŋ onniyo soo an di'n olliga, a t'adda a toore.

¹⁸Injino maŋ kun koonaa mentikagi a urzi k'ollige geŋ me. Derec, a wede i-d'ede'ŋ, an i-t'eela t'eego, wo de a wede i-k'ede ye geŋ, mundazí wede boolonj y'elkiyo yi t'oonaa tonj, an i-t'amba.»

Mekk'Isa ti zembadi

(Matiye 12.46-50; Markus 3.31-35)

¹⁹Mekk'Isa ti zembadi an t'iide an di y' t'ooney, wo kane an k'aane ettiyo k'ume yode ye kono duwo baadaŋ.

²⁰Duwo an i-di ruute a Isa, an'de: «Meedá ti zembadá kane ti paate, an dehu an ki ti wolle.»

²¹Wo de Isa y'an di'n gime onamaŋ, y'ede: «Meedó ti zembadó, kane donj ollige ono Raa wo an sooru eego.»

Isa toogo i jiiire maaye baadaŋ

(Matiye 8.18,23-27; Markus 4.35-41)

²²Onniyo soo Isa ti sanalliyagí an di gili adda tooko, maŋ y'an di ruute, y'ede: «In ti doopo'ŋ ti dar bar ti nee.» Wo kane an d'ingile.

²³Aame an doopide geŋ, Isa y'a udige kuy. A kaamiki, i d'iiziga maaye baadaŋ adda bar, tooko i t'ôoniyo t'ahu, an t'ize ooŋe kono t'an di ti'n sooyiso.

²⁴Kane sanalliyagi an a d'iide sirpadi, an di y'inne kaŋ dollite, an'de: «Wede dooyisadey, wede dooyisadey, kine in t'unto!» Maŋ Isa y'a t'inne, y'an iddise maaye ti ahu donj i kolzite baadaŋ geŋ me, wo a kaamiki maaye y'a ziida, ahu an t'udige deddek.

²⁵Saŋ Isa y'an di ruute, y'ede: «Ki moo me kun ki zaapu addugunj a nuuno ye me?» Wo kane orgiso t'anni ziida, an ziida giggiraŋ wo an di rootiyto tuddaŋ, an'de: «Yode eŋ moo wede me, kono yi di rootiyo a maaye ti ahu tonj an d'ollige onamí me!»

Eliyo beeko a wede i-d'ede siitandani a eedí

(Matiye 8.28-34; Markus 5.1-20)

²⁶Saŋ Isa ti sanalliyagí an d'iiney a siido Gadara, tod'te ti dar bar ti nee a daana siido Galile.

²⁷Aame Isa yi deegu ti tooko geŋ, i d'iide wedusu injino ti geeger gettiyo, y'iide'ŋ y'a y'ikkima. Yo wede geŋ i-d'ede siitandani a eedí, ti kaagine yi k'ossiyo kallagi ye, wo yi ki lekkiyo a boy ye, lekkiyadi adda diine muuziyagi.

28Aame yi wulle Isa maɗ, y'a iise dollite, y'a iire zoɗɗi wo y'a ruute ti golla awwa, y'ede: «Ki dehu moo a tukki nuɗ me, Isa Ulo ki Raa goole a jiire pay? Ni ki tonɗiyo, ki ni dabire ye.»

29Yi ruute iɗkino kono Isa yi ruute siitan: «Mi t'adɗo ti tukki yode me!» Siitan gette taɗ baadaɗ ti-ti y' sedɗiyo a siido. Iɗkino maɗ beyɗi an di kettiso ti ziɗziri wo zoɗɗi an t'eliyo adda poole, kono y'a-koone umayí soo, toɗ umbo yi-ti dambu, siitan t'a-di d'eɗgilso k'adda balɗa.

30Isa y'a yi tunde, y'ede: «Kee sundá wee wee?» Wede geɗ yi di'n gime onamí, y'ede: «Nuɗ sundó Doɗ Duuru.» Yi rootiyo iɗkino kono siitandani a eedí baadaɗ.

31Wo kane siitandani an i d'obe bey a Isa, kono y'an gi di roote an ki d'eɗgile k'adda k'oldé wede aakede bulɗume ye.

32A ume geɗ i d'ede torɗo meeda ki kinzir an elso ekki kesse. Kane siitandani an i d'obe bey a Isa kono y'an t'ele urzi an t'ette adda kinzirɗari geɗɗo, maɗ y'an d'iyye.

33Iɗkino siitandani t'ekki wede geɗ an t'udɗe, an t'iide adda kinzirɗari. Wo torɗo gette t'awwa t'ekki kesse t'a zide okko, kinzirɗari an t'ibi adda bar, an t'inda adda k'ahu.

34Aame kane doɗ k'elso an wulle munda wede ize geɗɗo maɗ, an d'ukke wo an an t'iide taaya a doɗ adda geeger wo a doɗ i lekkiyto a dombi pây.

35Duwo geɗ an t'udɗito wolliso ki munda wede ize. An iina a sirpa k'Isa maɗ, an y'uuna wede i ede siitandani a eedí wo an t'udɗe geɗ, yoɗ yi-guune a ume zoɗ k'Isa, yi t'usse kalle wo eedí t'iido. Iɗkino kane geɗ orgiso t'anni ziida.

36Kane doɗ i wulle munda wede ize, an an t'iide taaya kaɗ mummino wede i-d'ede siitandani a eedí y'a y'utte me.

37Iɗkino maɗ kane doɗ siido pay an i-di ruute a Isa ti siidadaɗ y'a eɗgile, kono orgiso ti'ni ziida baadaɗ. Maɗ Isa yi-ti gili adda tooko, y'a eɗgile.

38Wede i ede siitandani a eedí wo an t'udɗe geɗ, yi tonɗiyo Isa kono y'a lekke ti yode, wo Isa y'a y'igibe, y'ede:

39«Ki-kama di kee wo k'an t'ôodoy taaya a sulɗi doɗ pay Raa y'ize a kee geɗ me.» Maɗ wede y'a-gime, y'an di-gizite a doɗ geeger sulɗi doɗ pay Isa yi ize a yode geɗ me.

Eliyo beeko a erewo wo baldiya k'uto Zayiris

(Matiye

9.18-26; Markus 5.21-43)

⁴⁰Isa yi-gimo ti dar bar t'inno maṅ, doṅ duuru an di y' ziida bey sire kono kane pay an yi delliyo.

⁴¹Aame geṅ i d'iina wedusu sundí Zayiris, yoṅ goole boy wede Yawudiyagi ge dooyiso. Y'a iido, y'a iire a zoṅ k'Isa wo yi-d'obe bey y'a ette di yode,

⁴²kono i-d'ede utí tiṅ soo daṅṅal, ozzinatú ette suma koomat makumu sire, tuddutú eeni t'unto. Aame Isa y'ette di yode geṅ, doṅ baadaṅ an di y' ṅay'yu t'enṅo t'enṅo.

⁴³Ti diine doṅ duuru i d'ede erewo soo iṅkino ti dabirsa, puuzo obite t'itatú îide ozzine koomat makumu sire. Beytú t'a zikkuwe pay a doṅ daawiya, wo umbo wenda soo toṅ yi ki ti diiwe ye.

⁴⁴Tod' ti-t'iide ti dar k'Isa, t'a-butte bize kallayí. A kaamiki yip obite puuzo a îhira.

⁴⁵Isa y'a tunde, y'ede: «Wee wee i ni butte me?» Kane pay an di ruute, an'de: «Nuuno ye, nuuno ye.» Maṅ Piyer y'a ruute, y'ede: «Wede dooyisadey, kee duwo an ki ṅay'yu t'enṅo t'enṅo.»

⁴⁶Wo de Isa y'a ruute, y'ede: «Derec, nuṅ wenda yi ni butte, kono n'a uwwe toogo a udfé ti tuddó.»

⁴⁷Erewo t'uwwe maṅ Isa yi ti zuune, iṅkino to t'a iire zoṅdí ti ṅoṅṅirso burbur. A daana doṅ duuru geṅ ti di t'îide taaya, ki moo me ti y' butte wo mummino a kaamiki t'a uune bee me.

⁴⁸Wo de Isa yi di ruute, y'ede: «Uto ki nuṅ, kono koṅ mi ziipe addí a nuuno geṅ, m'utte m'aaho ti toose.»

⁴⁹Aame Isa y'a ti rootiyto iṅkino geṅ, wede zina y'okko ti di goole boy wede Yawudiyagi ge dooyiso, wo yi di ruute a Zayiris, y'ede: «Utá t'a t'îhe, kee ki y' naate ye baa wede dooyiso me.»

⁵⁰Wo ono geṅ Isa yi'n illiga, maṅ yi di ruute a Zayiris, y'ede: «Kee k'orgide ye, ki zaapo addá a nuuno daṅṅal, utá t'utta.»

⁵¹Aame an iiney adda boy ki Zayiris maṅ, a doṅ duuru pay Isa y'an di-tuuge k'ettiyo k'adda biino me, iide ti yode kane Piyer, Zaṅ, Zak wo meek'uto ti mekk'uto daṅṅal.

⁵²Kane duwo pay an dollite môolo daṅkar kono k'uto. Iṅkino maṅ Isa y'an di ruute, y'ede: «Kun ôole ye. Tod' ti k'inda ye, ti moone moone.»

⁵³Wo kane an di y'okko maade kono an zuune tod' t'inda me.

⁵⁴Wo yo Isa geṅ yi ziida beytú, y'a ruute ti golla awwa, y'ede: «Uto ki nuṅ, mi t'onno!»

⁵⁵A kaamiki undutú t'a gimo wo t'a t'iiziga. Mañ Isa y'an di ruute, y'ede: «Kun i eelo ombo.»

⁵⁶Kane maawutú an ziidá giggirañ, wo Isa y'an di ruute, y'ede: «A wenda soo toñ kun i roota ye a munda wede ize eñ me.»

Lik 9

Agisa ki sanalliyagi kane koomat makumu sire

(Matiye 10.1-9,11-14; Markus 6.6-13)

¹Isa y'a-wiike sanalliyagi kane koomat makumu sire, y'an d'ele toogo wo urzi ki lommitte siitandani doñ pay an t'ooney a daanadañ, wo k'eliyo beeko a endani duwo.

²Sañ mañ y'an igibe kazita k'urzi Moziko Raa wo k'eliyo beeko a doñ k'eeni,

³wo y'an di ruute, y'ede: «Ki torguwaguñ munda a beyguñ kun amba ye, ise dalka, ise eese, ise munda k'ombo, ise soñko, ise wede tuuku toñ kalle ki sirwe y'amba ye.

⁴Aame kun t'iidey adda boy tuuku wo an unni ziidey mañ, kun di lekkoy aṅgeṅṅo bini eṅgilsaguñ t'ume geṅṅo.

⁵Aame tuuku duwo an un ki'n ziidey ye mañ, a eṅgilsaguñ ti geeger gette, odde zonguñ toñ kun a ti tottigoy, geñ i-kaza Raa ulbí uñse ye ti kane me.»

⁶Inkino kane sanalliyagi an d'ingile, an d'ettiyo ille ti ille, an di kazita Rabila Majjaanawa wo an d'eliyo beeko a doñ k'eeni a ume tuuku toñ mañ.

Erod ulbí i oodiyi kono suma k'Isa ti moolo

(Matiye 14.1-2; Markus 6.14-16)

⁷Erod yoñ wede goole yi dokkiyo siido Galile, y'a illiga taaya ki suldi doñ pay isiyto geñ me. Wo munda y'a roote yi ki suune ye, kono doñ oṅgoñ an'de: «Zañ Batis yi bildo ti diine doñ unto me.»

⁸Oṅgo an'de: «I gimo ki siido nebi Eli.» Oṅgo soñ an'de: «I bildo nebi soo ti diine nebiyagi doñ ti kaaga.»

⁹Wo Erod y'a ruute y'ede: «Zañ miñ nuñ batum n'an di ruute a asigiryagi an didikke t'eedi me. Wo de wede geñ miñ tuuku me, doo miñ ni d'ollige yi d'isiyto suldi pay geñ me?» Wo yi dehu urzi Isa y'a-ti y' wolle.

Eliyo k'ombo a kuuli dupu paat

(Matiye 14.13-21; Markus 6.30-44)

¹⁰Kane doñ zina k'Isa an ti gimo mañ, an i-di t'iide taaya a naabo pay ere an izo. Mañ y'a ti'n wiike an d'ingile ti yode, an t'irga siidañ goppon ti geeger an ti waaku Betsayda.

11Wo kane ɗoŋ duuru, umayí an di y'illiga wo an di'n diine. Aame ɗuwo an iina maŋ, Isa y'anni ziida bey sire, y'an di gizite urzi Moziko Raa, wo a ɗoŋ i dehu beeko tuddaŋ y'an d'ele beeko.

12Peedo t'ette k'ooriyo maŋ, kane sanalliyagi koomat makumu sire, an a d'iide sirpa k'Isa wo an i di ruute, an'de: «Ɗoŋ duuru eŋ ki'n agiba, an t'ette k'adda k'illiyagi ti boydi ɗoŋ doome go-goppon eŋŋo, kono an di t'ooney ume moone ti ombo, kono kine eŋ adda balɗa.»

13Wo Isa y'an di ruute, y'ede: «Ombo an eelo kune batum.» Maŋ kane an di ruute, an'de: «Kaye ay d'ede miŋ mappa paat wo puuni sire ɗaŋŋal, koo ki dehu kaye batum ay d'ette ay d'owilo ombo a ɗoŋ duuru pay eŋŋo maŋ.»

14An ruute iŋkino kono kane ɗoŋ duuru an t'ide kuuli suma dupu paat. Isa y'an di ruute a sanalliyagi, y'ede: «Duwo eŋ kun ti'n kondita kaŋ ogiysito ada paat, paat.»

15Kane sanalliyagi an t'ize aa y'an ruute, an ti'n gundite pay.

16Isa y'a-ziki mappa paat ti puuni sire geŋŋo, y'a t'umbe edayí k'awwa ki kandaane y'a ruute koduwo a Raa kono k'ombo gette. Maŋ mappa ti puuni y'a burkite, y'an d'ele a sanalliyagi kono an an di-dokkida a ɗoŋ duuru geŋŋo.

17Kane pay geŋ an d'iimi wo an d'isse. Wo ombo ere uupite sanalliyagi an ti-tusse, a iide dappa koomat makumu sire.

Isa miŋ yoŋ wee wee?

(Matiye 16.13-21; Markus 8.27-31)

18Onniyo soo Isa y'a t'irga siidí ti sanalliyagi, yi tonɗiyo Raa. Aame geŋ y'anni tunde, y'ede: «Ɗoŋ duuru an rootiyo nuŋ wee wee?»

19Kane an i di'n gime onamí, an'de: «Ɗoŋ soŋ an'de kee Zaŋ Batis, ɗoŋ oŋgo an'de kee nebi Eli, wo ɗoŋ oŋgo soŋ an'de kee nebi ti diine nebiyagi ɗoŋ ti kaaga i bilɗo me.»

20Wo yoŋ y'an di ruute, y'ede: «De kune me, kun'de nuŋ wee wee?» Piyer yi di'n gime onamí, y'ede: «Kee Almasi Raa yi biire.»

21Maŋ Isa y'an d'undirɗe kono ono geŋ a wenda soo toŋ an'ni ki roota ye.

22Wo y'a ruute sey, y'ede: «Geŋ ɗerec, nuŋ wede an n'ehe aa ulo wede eŋ, i dehu n'a dabirey baadaŋ. Ɗoŋ i dokkiyo ɗoŋziŋ, deero ɗoŋ seɗeke ti ɗoŋ suuniyo k'oogoro pây an di n' kiigirey, ɗuwo an di n' seɗey an di n' t'idey, wo onniyo sire k'aduwe maŋ Raa y'a ti n' balɗey.»

Urzi daaniya k'Isa

(Matiye 16.24-28; Markus 8.34-9.1)

23 Saŋ maŋ Isa y'an di ruute a ɗoŋ pay, y'ede: «Wede yi dehu y'a daane urzi nuuno maŋ, tuddí batum y'a ti kiigira, onniyo ti onniyo ki unto toŋ y'a oyye y'a t'inda kono nuuno, wo y'a ni daane.

24 Inŋkino wede tuuku yi dehu boohiyo tuddí k'aggadí maŋ, y'a ti dagga, wo ɗe wede tuuku y'ooliyo tuddí kono nuuno maŋ, y'a t'utta.

25 A wede koɗuwatú moo me sulɗi duniya pay y'anni t'oone, wo tuddí y'a ti dagge ise y'a t'ettye k'ume daggiya me?

26 Aame wede y'isiyo sukiyagi a nuŋ wo a onamó maŋ, nuŋ wede an n'ehe aa ulo wede eŋ, aame n'etto ti dary'ikadó wo ti dary'ika ere ki Meegó wo ti ere ki maaleekiyagi ɗoŋ kamileŋ geŋ, nuŋ toŋ ni-d'isa sukiyagi kay a wede geŋ me.

27 Derec inŋkino wo n'un di rooto: Doŋ oŋgoŋ ti diine kane ɗoŋ aŋkenŋo eŋ an ki ti t'inda ki poone pay ye, an di wolla Moziko Raa te.»

Ume k'eda k'Isa i-gime tuware kar

(Matiye 17.1-8; Markus
9.2-8)

28 T'ume Isa y'a ti ruutite onamí geŋ îide suma k'onniyo gessire maŋ, y'a-wiike ti yode Piyer, Zaŋ wo Zak, an d'inŋile k'ekki mokoŋo kono an tondey Raa.

29 Aame yi tonɗiyo Raa geŋ, ume k'edayí a-gime siidí wo kallagí a t'ize tuwardí kar.

30-31 A ume geŋ a kaamiki, adda toore wede iido ti kandaane'ŋ i d'ede kuuli sire an rootiyto t'Isa, kane geŋ Muusa ti nebi Eli, an rootiso a urzi wede ki ɗaŋgu naabadí, y'a-t'indey a Zeruzalem.

32 Piyer ti eebí'ŋ kane an udige kuy. Wo aame an t'inne maŋ, kane an woliyo toore addíya ti tukk'Isa wo kuuli sire an t'ihira a sirpadí.

33 Kane kuuli sire geŋ Isa an y'iili maŋ, Piyer yi di ruute, y'ede: «Wede dooyisadey, beehiye'ŋ kine in di lekke a enŋo! Ay un d'okkima daabagi aɗo, a kee soo, a Muusa soo, wo a Eli soo.» Wo yoŋ yi ki y' suune ye munda wede yi rootiyo geŋ me.

34 Aame yi rootiyto inŋkino geŋ, i d'iido dondirso ti di'n ippe kane geŋ me. Aame dondirso ti ti'n ippe maŋ, orgiso t'anni ziida.

35 Wo t'adda dondirso an d'illiga golla, t'ede: «Eŋ Ulo nuuno, yode wede ni y' biire. Kun y'ollo!»

36 Aame golla ti rootiyto geŋ, kane an woliyo'ŋ uupe Isa siidí ɗaŋŋal. Kane sanalliyagi a munda wede an wulle an d'inniga ɗeɗɗek, aame geŋ munda a wenda soo toŋ an i ki ruute ye.

Eliyo beeko a ulo i-d'ede siitan a eedí

(Matiye 17.14-18; Markus
9.14-27)

37Soggo ti soohe an ti d̄iige t'ekki mokkaloo maŋ, aame geŋ doŋ duuru an t'iide okkime k'Isa.

38Maŋ ti diine doŋ duuru i d'ede wedusu, y'a id̄ili, y'ede: «Wede dooyisadó, ni ki ton̄diyo, ki wollo sommagi k'ulo nuŋ, kono yoŋ miŋ soo daŋŋal.

39Siitan ti y'ambu maŋ, a kaamiki yi d'eesiyo d̄ollite, y'a-ti zehiso bar bar wo bizi i d'ad̄diyta goopyagi. Tod' ti di y' dabirsa baadaŋ wo ti dehu ti ki y'ooli ye.

40Nuŋ n'a tunde sanalliyagá kono an ti-limmi siitan gette, wo de kane an ki d'iine ye.»

41Maŋ Isa y'a t'ihina bizi, y'a ruute, y'ede: «Kune doŋ ulpi wo kun ki ziipe addugun̄ a Raa ye. Nuŋ ti kaagine ni lekkiyo ti kune, wo de a nuŋ kun ki d'umbe ye! Geŋ n'a ombiŋa ki da-daayum koo ti kune me? Ulá k'a edi keŋŋo.»

42Aame ulo y'ette k'ume k'Isa geŋ, siitan gette t'a ti y' zid̄de a siido, y'a di zihite bar bar. Wo de Isa y'a t'id̄dise siitan te kono t'a t'ad̄de ti tukk'ulo me, maŋ ulo'ŋ y'a uune bee, wo yi di y'ele a meegi.

43Wo duwo pay an ziida giggeraŋ a toogo ere baadaŋ ki Raa gette.

Ono k'Isa doŋ ki sirwe k'untadi

(Matiye 17.22-23; Markus
9.30-32)

Aame kane pay an seedu giggeraŋ botto a munda wede Isa y'ize geŋ, yoŋ y'an di ruute a sanalliyagi, y'ede:

44«Kune'ŋ kun ollo koduwo munda wede n'un roota eŋ me: Nuŋ wede an n'ehe aa ulo wede eŋ, an di n' t'eley a bey duwo.»

45Wo kane ono geŋ itadaŋ an ki'n suuniyo ye, i t'ize ombide iŋkino itadaŋ an gi di'n suuniyo ye, wo Isa an i d'orgiso kono an di y' tonde a ono geŋ me.

Wee wee goole a jiire?

(Matiye 18.1-5; Markus
9.33-37)

46Kane sanalliyagi an d'iise rootiyto ti tuddaŋ kono an dehu an di suune, ti diinayaŋ miŋ wee wee goole a jiire me.

47Elkisadaŋ gette Isa y'a ti zuune. Iŋkino maŋ yi wiike ulo neŋku, y'a y'ihira a daanadi,

48wo y'an di ruute, y'ede: «Wede tuuku yi seedu ulo aa yode eŋ bey sire kono y'umbe a sundó maŋ, geŋ aa yi seedu nuŋ batum. Wo wede tuuku yi seedu nuuno maŋ, geŋ aa yi seedu wede i n'igibo pay. Derec, yo wede ti diine kune pay eŋ yoŋ neŋku a jiire maŋ, geŋ yode wede goole a jiire me.»

Wee wee yoŋ ki kune me?

(Markus
9.38-41)

49Maŋ Zaŋ y'a t'ihina bizí, y'a ruute, y'ede: «Wede dooyisadey, kaye ay di wullo wedusu soo iŋkino yi lommite siitandani ti sundá, wo ay di dihe ôhirayí kono yoŋ ti diinayey ye.»

50Wo Isa yi di'n gime onamí, y'ede: «Kun y'ôhira ye, kono wede adugun ye geŋ yoŋ ki kune.»

Doŋ k'ille soo ki siido Samari an giigira Isa

51Aame onniyo ere Isa y'a-kima ki kandaane aa guute goppon maŋ, y'a ziida zakidi y'a t'ette ki Zeruzalem.

52Yi d'igibe doŋ zina an d'uugume poone. Kane an d'ingile, maŋ an t'iide adda k'ille soo ki siido Samari kono an i-di t'okkimey ume deeguzí.

53Wo kane doŋ k'ille gette an di-tuuge an di y' seeda me, kono yoŋ y'ette ki Zeruzalem.

54Aame kane sanalliyagi Zak wo Zaŋ an illiga iŋkino maŋ, an di ruute, an'de: «Galmeegey, kee ki dehu maŋ, ay tonde uwwo ti kandaane t'a deego t'an uute mendaŋ?»

55Wo de Isa y'an gime, wo y'an di'n iipife. [y'ede: «Kune kun ki suune ye, unde ere tuuku un ede te.

56Derec, nuŋ wede an n'ehe aa ulo wede eŋ, n'iido'ŋ kono n'a ki dagge undiyagi duwo ye, wo n'an utte.»] Maŋ an d'ingile ki ille ti doolo.

Doŋ i dehu daaniya k'Isa

(Matiye 8.19-22)

57Aame kane a urzi geŋ, i d'ede wedusu soo iŋkino yi di ruute a Isa, y'ede: «N'a ki daana k'ume wede tuuku kee k'etta geŋ me.»

58Wo Isa yi-ti'n gime onamí, y'ede: «Boo ti boydutú wo embi toŋ ti boydizaŋ, wo de nuŋ wede an n'ehe aa ulo wede eŋ, oo k'ede ume ni ki ti t'ele eedó n'a-ki puuke ye.»

59Isa yi di ruute a wede doolo, y'ede: «Ki ni daani.» Wo wede geŋ y'a ruute, y'ede: «Galmeeki nuŋ, k'o eeli urzi n'a ette n'a t'ottibo meegó do.»

60Maŋ Isa yi di ruute, y'ede: «Ki'n oolo kane doŋ aa unto an d'ottiba tuddaŋ, wo kee k'eŋgilo kazita k'ono ki Moziko Raa.»

61Wede doolo sey y'a ruute, y'ede: «Galmeeki nuŋ, ni ki daana, wo de k'o eeli urzi n'a di t'eeso doŋ boozó do.»

⁶²Isa yi di ruute, y'ede: «Wede yi derku ti bungari wo y'a geldfe ki daari genj, yonj beehiykadí umbo ki Moziko Raa te.»

Lik 10

Naabo ki sanalliyagi k'Isa kane ada sarat makumu sire

(Matiye
9.37-38; 10.7-16; Markus 6.8-11; Lik
9.3-5)

¹Sañ mañ tinj genj Galmeega yi biire sanalliyagi ti doolo, kane ada sarat makumu sire, wo y'an ikkipe sire sire, an d'uugume k'adda geegiryagi ti omagi pay donj yode batum yi dihe y'etta.

²Y'an di ruute, y'ede: «Kane donj duuru enj aa doome goole y'ize k'aydu, wo donj naabo baata. Injino kun tondo wede doome kono y'a-t'igibo donj naabo k'aydu.

³Ankenj kun enjilo! Kun ollo, n'un agisa enj aakede injni dambami k'adda diine sullibagi.

⁴A beygunj sonko kun amba ye, ise eese, ise tobiyagi ti doolo tonj mañ. A urzi wenda soo tonj kun t'eesey ye.

⁵Aame kun t'iidey adda boy tuuku mañ, ki poone kun d'eesoy: "Toose Raa ti koonna adda boy enno."

⁶Aame wede i dehu toose a ume genj ede mañ, toose kune t'a koonoy eedí. Wo aame wede injino umbo mañ, toose kune t'a-kamoy ki tuddugunj.

⁷Boy wede unni ziidey mañ, kun lekkoy angenno, kun d'oomoy, kun d'ooboy munda wede an un t'eley me, kono wede yi naabiya'η i-d'ede urzi y'a oomi ti bey donj y'an naabiya. Kun dettitey boy ti boy ye.

⁸Aame kun t'iidey adda geeger ere tuuku wo an unni ziidey mañ, kun oomoy munda wede an un t'eley me.

⁹Adda geeger gette, kun an eloy beeko a donj k'eeni, wo a donjtu kun an di rootoy, kun'de: "Moziko Raa t'iina gopponj ti kune."

¹⁰Wo aame kun t'iidey adda geeger ere tuuku wo donjtu an un ki'n ziidey ye mañ, kun d'enjiloy bere donj duuru wo kun an di rootoy a donj pay, kun d'eesoy:

¹¹"Kaye odde siidagunj wede a zonjdey tonj ay un ti y' tottigo, genj i-kaza Raa ulbí unjse ye ti kune me. Wo genj ono enj kun'ni suuno koduwo: Moziko Raa t'iina gopponj ti kune."

¹²Kun ollo, n'un di rooto, onniyo ere Raa yi dekka booro gette, kane donj geeger Sodom booradañ t'a koonna soodo ti donj ki geeger gettiyo.

13Dabar a kune don geeger Korazen! Dabar a kune don geeger Betsayda! Derec, aame suldi k'armika don Raa y'ize di kune geɗ anki y'aase a geeger Tir ti Sidon maɗ, anki ti kaagine donzan an t'ossite kallagi molo wo tuddan an aa di kosse puure, wo an di-kime lekkiyadan.

14Kono kamo onniyo ere Raa yi deƙka booro gette, kane don geeger Tir ti Sidon booradan t'a koonaa soodo ti ere ki kune.

15Wo kune don geeger Kapernayim, kun elkiyo miɗ Raa y'un ti'n sika k'awwa ki kandaane ko? Aha! Raa y'un ti'n deega adda diine don unto.»

16Isa y'an di ruute sey a sanalliyagi, y'ede: «Wede un ollige maɗ, geɗ aa y'ollige nuuno. Wede unni koogire maɗ, geɗ aa yi koogire nuuno. Wo wede i ni koogire maɗ, geɗ aa yi koogire wede i n'igibo.»

Kama ki sanalliyagi kane ada sarat makumu sire

17Kane sanalliyagi ada sarat makumu sire geɗ an di-gimo ulban onniyo t'unso, wo an di ruute, an'de: «Galmeegay, siitandani ton an ayn'ollige aame ay an rootiyo munda ti suda maɗ.»

18Isa y'an di ruute, y'ede: «Nuɗ ni wolliyo Meeda siitandani, t'a iiro ti kandaane aakede omile mizzi.

19Kun ollo, n'un ele togo ere kun d'ozire t'ekki mimbayi, t'ekk'ottiyagi wo t'ekki togo pay ere ki adu, wo munda un d'isa ulsu a kune umbo.

20Wo beehiye kune ulbugun un isiyo unse kono siitandani an un ollige, wo ki too maɗ beehiye a ceere ulbugun aase unse kono sumbiyagun raaniyta adda mattup ki Raa a kandaane.»

Isa ulbi unse

(Matiye 11.25-27)

21Aame geɗno batum, Isa Unde Kamilen ti di'n une addi t'unso wo y'a ruute, y'ede: «Mee'ki nuɗ, kee Galmeeki kandaane ti siido, ni ki tamma kono suldi en k'an di'n umbida a don suuniyo k'ono wo a don eedan soodo a elkiso geɗ me, wo k'an t'iidiba ita a don aa inni sunni. Eyye Mee'ki nuɗ, geɗ ki dihe suldi a t'ise inkino.

22Suldi pay Meego Raa y'o n'ele a beezo. Wenda soo ton a suune Ulo umbo, i y' suune Meega danjal, wo wenda soo ton a suune Meega umbo, i y' suune Ulo wo ti kane don Ulo yi dehu y'an t'oodiba itadi danjal.»

23San maɗ Isa y'a-gime ki tukki sanalliyagi wo y'an di ruute a kane siidan, y'ede: «Unso a kune a munda wede kun wolliyo enno.

24Kun ollo, n'un di rooto, nebiyagi baadaŋ ti mozagi baadaŋ an dihe an di wolle munda wede kun wolliyo enno, wo an gi di y' wulle ye. An dihe an d'olliga munda wede kun ollige enno, wo an gi di y'illiga ye.»

Ono ombide a tukki wede beehiye ti siido Samari

(Matiye 22.34-40; Markus 12.28-31)

25Onniyo soo, wede suuniyo k'oogoro yi dehu yi-d'ekke ikka t'urzi k'ono a Isa. Injino maŋ y'a d'iide sirpadí, y'a yi tunde, y'ede: «Wede dooyisadey, n'aase moo me kono n'a t'oona lekkiyo ere ki daayum te?»

26Isa yi di ruute, y'ede: «An riine adda mattup k'oogiradiŋ moo me? Moo me ki gariya adda me?»

27Wede geŋ yi di'n gime onamí, y'ede: «An riine, an'de: "Ki geyyo Galmeega Raazá ti addá pay, ti undá pay, ti toogadá pay wo ti elkisadá pay." Wo soŋ an'de: "Ki geyyo bakadá aa ki geyyiso tuddá batum.»

28Injino maŋ Isa yi di ruute, y'ede: «Onamá ki ni ruute geŋ derec. K'iso injino wo k'a lekka.»

29Wo wede suuniyo k'oogoro yi dehu y'a t'okkima bizí, injino y'a tunde Isa, y'ede: «Bakadó wee wee?»

30Isa yi di'n gime onamí, y'ede: «I d'ede wedusu soo injino, yi deegu ti Zeruzalem y'ambe ki geeger Zeriko. Yo yi-t'iire bey doŋ dekkiyo k'urzi, suldízi an t'uube pay, an di y' gusse, an di y'iili pulpul a siido wo an d'ingile.

31Saŋ maŋ i d'iido wede sedefe yi deegu t'urzi geŋno kay. Aame y'iina yi wulle wedusu kaŋ moone maŋ, y'a udfé dokki ti yode, y'a ingile.

32Injino kay i d'iido wedusu yoŋ ti biza bumbu Lebi y'iina a ume geŋno, wo aame yi wulle wede geŋno maŋ, y'a udfé dokki ti yode, y'a ingile.

33Saŋ i d'iido Samariten yi t'ette torguwo, y'a iina a ume geŋno kay. Aame yi wulle wede geŋno maŋ, i di t'ize sommagi baadaŋ.

34Y'a d'iide goppon ki tuddí wo a kundayí yi d'ibiti egey ti toote k'inŋi biŋ, maŋ yi di gittite. Y'a di y'umbe eego buurizí, y'a-di t'iide k'adda k'ille wo y'a ti y' ziipe a ume deegu torgagi, y'a-t'udige dok.

35Soggo ti soohe maŋ, yi d'iidiba tamma sire, yi-d'ele a wede boy wo yi di ruute, y'ede: «Wede eŋ k'a-t'udigo dok a eedí. Wo soŋko ette a biita toŋ ki y'oola ye, aame ni-gimo maŋ, munda wede ki dagga kono yode geŋ, nuŋ batum n'a di y' t'ela.»

36Maŋ Isa y'a ruute sey, y'ede: «A elkiyadá maŋ, ti diine doŋ torguwo ado geŋ, wede tuuku baka ki wede doŋ k'oogire an yi gusse me?»

³⁷Wede suuniyo k'oogoro yi di'n gime onamí, y'ede: «Bakadí wede i ize adde koduwo a yode genno.» Injino maŋ Isa yi di ruute, y'ede: «Geŋ k'odo, kee toŋ k'aasoy injino kay.»

Isa yoŋ di Mariyam ti Marte

³⁸Aame Isa kane ti sanalliyagí an sooru a urzi geŋ, an t'iide adda k'ille soo, a ume geŋ i d'ede erewo sundutú Marte tod' t'anni ziida di tode.

³⁹To Marte i-d'ede teematú sundutú Mariyam, tod' t'a-guune a sirpa zoŋ ki Galmeega ti d'ollige ono doŋ yi dooyiso.

⁴⁰Marte gette naabo zigile i ti ziida, t'a d'iide k'ume k'Isa ti di ruute, t'ede: «Galmee'ki nuŋ, kee a-ki kaza munda ye koo, kunuŋ teemadó gette naabo pay t'o d'iili a nuŋ siidó me? Injino ki rooto t'a di n' nooge»

⁴¹Maŋ Galmeega yi di'n gime onamtú, y'ede: «Marte, Marte, koŋ ulbí i-d'oodiyo wo mi d'elkiso ki suldi baadaŋ,

⁴²wo munda soo daŋŋal wede i dehu m'aase me. To Mariyam ti biire munda wede majjaane a jiire, wenda yi k'aane yi ki t'oodiba ye.»

Lik 11

Dooyiso k'Isa a urzi tondiyo Raa

(Matiye 6.9-13)

¹I d'ede onniyo soo, Isa yi tondiyo Raa a ume soo injino. Aame y'a ti diŋge ti tondiyo maŋ, wede soo ti diine sanalliyagí y'a yi tunde, y'ede: «Galmee'ki nuŋ, k'ay ti'n dooyi urzi tondiyo Raa, aakede Zaŋ Batis y'a duuye sanalliyagí.»

²Isa y'an di ruute, y'ede: «Aame kun tonde Raa maŋ, kun d'eeso: “Meegey, kee k'iso duwo pay an di suune kee Raa kamileŋ, Mozikadá k'a-di t'edi.

³Onniyo ti onniyo k'ay eeli ombadey ere ay di t'ide.

⁴K'ay t'isi tambobino a oldiko ere ay ize a kee, kono kaye toŋ ay isiyo tambobino a wede tuuku ay ize ulsu kay. Wo k'ayn'ooli ye adda naamiya daggiya i ceera eedey ay t'etta adda k'oldiko ye.”»

Ombiŋe a urzi tondiyo Raa

⁵Isa y'an di ruute sey, y'ede: «Kun ollo, aakede wede soo ti diinaguŋ i-d'ede laŋze, y'a ette ki boozí a diddo meeda, wo y'a t'eese: “Laŋze ki nuŋ, kee k'o eeli mappa ado,

⁶kono wede soo ti diine laŋziyagó y'iina ti torguwo di nuuno, wo nuŋ munda k'ombo ni di t'ele umbo.”

⁷Yo laŋzayí ummey t'adda biino y'a t'eese: "Kee ki n'oolo deddek, kono t'innizó biza n'ay t'ippe baa, ay moone, ni k'aane ni ki t'ooziga n'a-ki t'ele mappa ye."

⁸Wo kun ollo, n'un di rooto, laŋzayí yi t'ooziga yi-t'ela suldí doŋ pay yoŋ yi dehu, kono yoŋ laŋzayí ye, wo kono yoŋ yi koddime baadaŋ a munda wede yi dehu me.

⁹Wo nuŋ n'un di rooto: Kun tondo wo munda an un t'eela, kun de hito wo kun t'oona, kun koppo biza wo an un di-t'ihina.

¹⁰Wede tuuku yi ton diyo maŋ, munda an i-d'eeliyo, wede yi de hitu maŋ, yi d'ooniyo, wo wede yi koppiyo biza maŋ, an i di t'ohine.

¹¹Meege tuuku ti diinaguŋ, aame ulí [yi tunde ombo maŋ, yi di t'ele morkkolo me? Koo] yi tunde puuniso maŋ, yi di t'ele miipo me?

¹²Koo yi tunde kumilso maŋ, yi di t'ele otto me? Aha, umbo!

¹³Inkino maŋ kune doŋ adduguŋ ulpi toŋ, kun suune eliyo suldí doŋ majjandani a inniguŋ. Wo geŋ taŋ miibi a ceere Meega Raa a kandaane y'aane y'an t'ele Unde Kamileŋ a doŋ i yi ton diyo me!»

Isa ti Belzebul

(Matiye

9.32-34; 12.22-30; Markus 3.22-27)

¹⁴Onniyo soo, Isa y'a-t'ilmi siitan ere wede'ŋ ti t'ippe bizí yi k'orbe ye geŋ me. Aame siitan gette ti t'udde maŋ, wede geŋ bizí a t'ihina, y'a iise ono, wo kane doŋ duuru an ziida gaggiraŋ.

¹⁵Aame geŋ doŋ oŋgo ti diinayaŋ an di ruute, an'de: «Tode Belzebul Meeda siitandani i eliyo toogo ki lommite siitandani me!»

¹⁶Doŋ oŋgoŋ an dehu an i d'ekke ikka t'urzi k'onamí. Inkino maŋ an di y' tunde y'an d'ise munda k'armika, a kize yoŋ Raa yi y'igibo.

¹⁷Wo Isa y'a zuune elkisadaŋ, inkino maŋ y'an di ruute, y'ede: «Moziko ere tuuku doŋtú an deyyiso ti tuddaŋ maŋ, mozikadaŋ a latte, boydizaŋ a di ruugite wede soŋ ekki bakadí bakadí.

¹⁸Geŋ inkino kay, aame Meeda siitandani ti deyyiso ti siitandani eebutú maŋ, geŋ an deyyiso ti tuddaŋ batum. Wo de geŋ ki kotto, mozikatú ti k'aane ti ki lekke ye! Ni rootiyo inkino kono kun'de, ni lommite siitandani o eliyo toogo Belzebul.

¹⁹De inkino maŋ, doŋ a itaguŋ an lommite siitandani ti toogo k'aaye? Geŋ kane batum an un kaza munda wede kun rootiyo a tukki nuuno geŋ derec ye.

²⁰Wo de geŋ, nuŋ o eliyo toogo Raa ni lommite siitandani me maŋ, geŋ i-kaza Moziko Raa tod' t'iina di kune baa.

21Aame wede'η toogo ti aryagí geη ɓoozǐ y'a ti y' boohe, iηkino maη maalađi wenda soo toη y'a ki botte ye.

22Wo ɗe aame i iido wede toogo ti yode wo yi y' jiiere maη, aryagi ɗoη pay yi zaapu addí geη y'a-t'ooobe, wo sulđi ɗoη pay y'a siki y'an di dokkiɗa a ɗuwo.

23Wede yoη ki nuuno ye'η, yoη aduzó, wo wede y'a ki n' noogiyo ki tussiyo ye'η, yoη yi teepiyo ki teepiyo.»

Kama ki siitan ki tukki wedusu

(Matiye 12.43-45)

24«Aame siitan ti tukki wedusu ti t'adɗiya maη, ti d'engilso k'adda balɗa dehuu k'ume wede t'a lekkey, wo ti ki d'ooniyo ye. Iηkino ti rootiyo adda k'addutú, ti d'eesiyo: “Ni-kime k'adda bindó ere an di n'ilmo.”

25Wo a kamatú gette, t'iide'η ti-t'uuney biino rookiyo kamileη wo sulɗutú okkime beehiye.

26Iηkino maη ti di kama k'adda balɗa, t'a waaku siitandani ti doolo sarat bundiɗi a jiiere tode sey. An di-kama kaη soo, an t'ettiyo adda biino gettiyo, i-t'isiyo ɓoozaη. Iηkino yo wede geη, lekkiyadi ere k'ita i-t'isiyo ooηe i ceeriyo ere ki poone.»

Uηsuwo ere a jiiere

27Aame Isa yi rootiyo iηkino geη, i d'ede erewo soo iηkino ti diine ɗoη duuru, ti di ruute ti golla awwa, t'ede: «Uηsuwo a erewo ere t'a ki zirke adda k'addutú wo k'a uude uɗutú.»

28Wo yoη yi di ruute, y'ede: «Wo uηsuwo a jiiere a kane ɗoη ollige ono Raa wo an di sooru eego.»

Tondiyo ki munda k'armika

(Matiye 12.38-42)

29Kane ɗoη duuru an d'ettiyo k'ume k'Isa. Aame an t'ugiye maη, y'a iise rootiyo, y'ede: «Ita ɗuwo ɗoη aηkenno eη, kane ɗoη ulpi, an tonđiyo munda k'armika a kize Raa yi n'igibo. Wo armika ti doolo Raa y'an k'isa ye, daa ki armika ere Raa y'ize ti kaaga a nebi Zonas ye maη.

30Kun suune Zonas y'a guune munda wede Raa y'an di gize a ɗoη geeger Ninib. Geη iηkino nuη wede an n'ehe aa ulo wede eη, n'a koona munda wede Raa y'an kiza a ɗoη aηkenno kay.

31A onniyo ere Raa yi ɗekka booro gette, mohita ere ti siido ki kese ɗandí t'a ooziga ki tukki ɗuwo ɗoη aηkenno, wo t'an di roota: “Kune'η booro t'unni ziida.” Ti roota iηkino kono tod' t'iizigo ti siidiyagi ɗoη dokki t'ita Raa kono t'a olliga suuniyo k'ono ere ki Salamoη, wo a eηno i d'ede wede ede y'a jiiere Salamoη sey.

32A onniyo ere Raa yi defka booro gette, don geeger ki Ninib an d'ooziga ki tukki duwo don ankenno, wo an di roota: "Kune'η booro t'unni ziida." An roota inkinno kono aame don geeger ki Ninib an illiga Zonas yi gizite urzi k'ono Raa man, an di-gime lekkiyadan. Wo a enno i d'ede wede ede y'a jiire Zonas sey.»

Eda kane toore tudde

(Matiye 5.15; Markus 4.21; Lik 8.16)

33«Wenda soo ton y'a-t'oyye pitila kono yi-ti t'ombida, ise y'a-t'ossibe bogoro umbo. Ki too man y'a ti dodde t'awwa kono don ette k'adda biino an di wolle toore.

34Eda kane aa pitila ki tudde. Aame edaya kane bee man, tudda pay tin adda toore, wo aame edaya kane bee ye man, tudda pay tin adda zimolo.

35Inkinno man ki koono metike kono toore wede a tudda gen, a ki t'ise zimolo ye.

36Wo aame tudda pay adda toore daa munda ki zimolo man, tudda pay gettin adda toore, gen aakede pitila ti tooriyo tudda ti tooratu wede kereṅ genno.»

Isa ti Pariziyen wo ti don suuniyo k'oogoro

(Matiye 23.4,6-7,13,25-27,29-31,34-36)

37Aame Isa y'a ti dinge onami man, i d'ede wedusu soo yon Pariziyen y'a ti y' wiike y'a oomey di yode. Isa y'a tiide k'adda boy, wo an di-guune ombo.

38Yo Pariziyen y'a ziida giggeri aame yi wulle Isa ki poone y'a t'ese ombo'η, bezi yi k'upile ye aa mongidagi an ruute me.

39Inkinno man yo Galmeega yi di ruute, y'ede: «Kun ollo, kune Pariziyen! Kune'η kulso ti bogoro kun t'opilso daaran behiye, wo addugun onniyo boo ti tama k'oogire wo ti bundiko.

40Kune don elkisagun umbo, kun suune kereṅ Raa wede ikkima ume ti paate gen, ikkima ume t'adda ton yode me.

41Wo ki too man a kane don an k'ede munda ye, kun an elo t'addugun pay, inkinno kune kun t'isa kamilen.

42Wo dabar a kune Pariziyen! Kune'η a urzi zakka, kun d'eliyo zakka a Raa ki ita suldi don sunni sunni i d'eliyo unsuwo a zaami, ise puutagi don ki zaami ton man. Wo de munda wede kun d'ise ki diine a duwo, ti geyyiso ki Raa, kane gen kun d'ooliyo a kese. Ki too man ki poone kane genno don kun d'ozire eego me, wo suldi don sunni sunni ton kun ki'n ooli ye.

43Dabar a kune Pariziyen! Kune'η adda boydi don in di dooyiso, kun geyyiso kun koone a ume wede suma, wo a bere don duuru ton, kun geyyiso duwo an un di'n t'eesite ti ottilso.

⁴⁴Dabar a kune! Kune'ŋ doŋ aakede muuziyagi daa zappu moŋgali, doŋ an sooru eego daa suuniyo a urzi k'oogoro an t'isiyo ganigi a daana Raa me.»

⁴⁵Wede soo ti diine doŋ suuniyo k'oogoro yi di ruute a Isa, y'ede: «Wede dooyisadey, a onamá geŋ kee ki kalda kaye ti kane pây.»

⁴⁶Isa yi di'n gime onamá, y'ede: «Dabar a kune doŋ suuniyo k'oogoro pây! Kune'ŋ duwo kun di'n isiyo ki toogo an di daane urziyagi k'oogoro doŋ ti doolo kune batum kun a ziipe t'eggun t'ekki doŋ ki Raa, sarkiyatú ooŋe aakede kun zaapu attidí a dar. Wo a attidízaŋ geŋ, kune ti y'ilsagun soo toŋ kun aa ki bottiyo ye ki noogiyadaŋ me.

⁴⁷Dabar a kune! Kun aabuđu muuziyagi majjandani ki nebiyagi ti kaaga, kane doŋ moŋgidagun an ti'n îide.

⁴⁸A onamgun ti suldí doŋ kun isiyo geŋ, i-kaza kun iyee a naabo ere ki moŋgidagun g'ize te, kono kane an ti'n îide nebiyagi me, wo ankeŋ kune kun d'aabuđu muuziyagaŋ.

⁴⁹Kono kamo Raa ti suuniyo k'ono ere i d'ede gette y'a ruute, y'ede: “Nuŋ n'an t'igiba nebiyagi ti doŋ zina, doŋ ongoŋ ti diinayaŋ an ti'n t'îda, doŋ ongoŋ an di'n dabira.”

⁵⁰T'ume k'eesiyo duniya bini anki, an îide nebiyagi baadaŋ, wo kono ki puuzadaŋ gette kune duwo doŋ ankeŋno Raa y'un ti'n t'ela daŋgay.

⁵¹Ki poone an îide Abel, saŋ doŋ ti doolo bini Zakari wede an y'îide adda booro Boy Raa, a diine k'ume sedefe ti Boy Raa. Eyye, wo kun ollo n'un di rooto, kane doŋ ankeŋno eŋ Raa yi ti'n t'ela daŋgay kono ki puuzadaŋ.

⁵²Dabar a kune doŋ suuniyo k'oogoro! Kune'ŋ kun a-t'ippe a urzi wede i d'eliyo suuniyo ki Raa te. Kune batum kun ki sooru eego ye, wo a doŋ i dehu an d'ozire eego kun an t'iigire.»

⁵³Aame Isa yi t'udde t'adda boy geŋno maŋ, kane doŋ suuniyo k'oogoro ti Pariziyen an di gulkuwe baadaŋ ti yode, wo an di y' tundite a urzi k'ono baadaŋ.

⁵⁴Iŋkino geŋ kane an i ekkiyo ikka kono an t'oona munda wede butte adda k'onamá.

Lik 12

Kun koona mentikagi ti doŋ bizaŋ sire sire

(Matiye 10.19-20,26-33)

¹Aame geŋ doŋ duuru baadaŋ baadaŋ an t'ugiye, ume an d'ozire toŋ umbo, an t'on'yilse dugganaŋ. Isa y'an di ruute ki poone a sanalliyagí, y'ede: «Kun koona mentikagi a orme wede ki Pariziyen, i-kaza an d'ede bize wede sire sire.

²Derec, suldi don pay ombide'η, saη onniyo soo a t'oodiba ita, wo ono don pay i ki dehu duwo an k'olliga ye geη, saη onniyo soo duwo an di'n olliga.

³Kono kamo suldi don pay kun ruute a zimolo geη, saη onniyo soo duwo an di'n olliga kereη, wo munda wede kun miline a kuude bakaguη adda biino appiya geη, saη onniyo soo an di y' roota aa an a ti gili t'ekki biino an dōlle.»

Wedusu wede kun i-d'orgide

⁴«Lanziyagi ki nuη kun ollo, n'un di rooto: Kun an orgide ye a don i tōwwo tudde, wo saη maη an k'aane an aa k'ise munda ti doolo sey ye.

⁵Nuη n'un di y' kaza wedusu wede kun i-d'orgide me: Kun orgido a Raa, yode wede aame kun t'inda maη, i-d'ede toogo y'un di'n t'ette k'adda k'uwwō. Eyye, wo kun ollo n'un di rooto, geη a yode kun i-d'orgide me.

⁶Kun suune ooyo paat doo miη in t'owile ti soηko sire kollo, wo ti diinayaη soo toη Raa i ki dandīya ye.

⁷Wo soη ilali k'eggūη geηno toη Raa yi ti'n kaza pay. Inkino kun orgide ye, kono kune zooyaguη yi jiire ooyo baadaη!»

Wede ono uḏde ti bizī a daana duwo yoη ti Isa

⁸«Kun ollo, n'un di rooto, wede tuuku yi ruuta a daana duwo yoη ki nuuno maη, nuη wede an n'ehe aa ulo wede eηno toη, n'a rootey kay yoη ki nuuno a daana maaleekiyagi don ki Raa me.

⁹Wo de wede tuuku yi ruuta a daana duwo yi ki n' suune ye maη, nuη toη n'a rootey ni ki y' suune ye kay, a daana maaleekiyagi don ki Raa me.

¹⁰Wede tuuku yi ruuta munda ulsu a tukki nuη wede an n'ehe aa ulo wede eηno maη, a oldikadī gette Raa yi-t'isa tambobino. Wo de wede tuuku i kaldita Unde Kamileη maη, a oldikadī gette Raa yi-k'isa tambobino ye.

¹¹Aame an un di'n t'iidey k'ume don booro adda boydi don in di dooyiso, ise ki daana don deero, ise ki daana mozagi toη maη, ulbuguη un t'odey ye a maana k'ono don kun d'oodibey eggūη, ise a munda wede kun di rootey me.

¹²A ume geη miη Unde Kamileη t'un di'n dooyey a munda wede kun di rootey me.»

Ono ombide a tukki wede laale elkisadī umbo

¹³I d'ede wedusu ti diine don duuru yi di ruute a Isa, y'ede: «Wede dooyiso, ki rooto a leemadó y'ay ti dokkidi laale ki meegey wede y'ay iili me.»

¹⁴A wede geη Isa yi di ruute, y'ede: «Wee wee i ni ziipe wede dekkiyo booro a sulduguη, ise wede dokkide laalaguη me?»

¹⁵Sañ mañ y'an di ruute a ñon pay, y'ede: «Kun koona mentikagi, kun okkibe a suldi pay ye, kono lekkiyo wedusu ere ki kotto gette t'ettiyo t'urzi suldi ñon ki laale ye, ise yon laalayí baadañ toñ mañ.»

¹⁶Inkino mañ y'an d'iide taaya t'urzi k'ono ombide, y'ede: «I d'ede wedusu ki laale, i-d'ede dombi majjandani yi-darniyta.

¹⁷Yo yi rootiyo t'adda k'addí, y'ede: “Nuñ geñ n'aase mummino, n'a obita mudizó a ume too me, ume oo k'ede ye me?”

¹⁸Sañ y'a ruute sey, y'ede: “Enño munda wede n'aasa me, giiy'agó eñ n'a-kossita, n'an aabida ti doolo deero, mudizó pay ni-t'obita adda wo suldi ñon ti doolo toñ mañ.

¹⁹Sañ ni di roota a tuddó batum: hay nuñ geñ me, enño suldi kaca kaca k'ozzinagi baadañ, n'a-puuka, n'a ooma, n'a siba wo n'aasa unñsuwo.”

²⁰Wo Raa yi di ruute, y'ede: “Kee wede elkisadá umbo, a diddo ettiyo batum nuñ undá ni t'amba, wo geñ suldi ñon pay k'ukume aaye?”»

²¹Isa y'a ruute sey, y'ede: «Geñ aasa inkino ki wede y'okumso laale a yode batum, wo yi k'okumso laale ki suldi Raa ye me.»

Zaapu k'adde a Raa

(Matiye 6.25-33)

²²Mañ Isa y'an di ruute a sanalliyagí, y'ede: «Geñ kono k'inkino n'un di rooto: Kune a lekkiyagun ulbugun un t'oodo ye a urzi k'ombo, ise a urzi k'ossiyo ere ki tuddugun toñ mañ.

²³Ki kotto lekkiyagun ere kun lekkiyo ette ti jiire ombo, wo tuddugun ti jiire ossiyo.

²⁴Kun wollo gaagagi, an ki korso ye, an k'aydu ye, an k'ede giiy'agi ye wo ume ti doolo k'obite k'ombadañ ye, wo Raa yi di'n moddiyo. Wo kune'ñ ki kotto kun i jiire embi tañ baadañ!

²⁵Wee wee ti diinagun, ti ulbe k'oodiyo wede i-d'ede geñ, y'aane y'a d'aagila ti kefise soo onniytagi ñon ki lekkiyadi a duniya ette?

²⁶Aame a suldi ñon bo-boolon ñaṅṅal toñ kun k'aane ye mañ, ñe ki moo me kune ulbugun un d'oodiyo a suldi ñon pay ti doolo a urzi lekkiyagun me?

²⁷Kun wollo bobbo soole, ti d'ohire, ti ki naabiya ye, ti k'isiyo kallagi ye. Wo kun ollo, n'un di rooto: Mozigo Salamon toñ ti laale wede pay i-d'ede geñ, yi k'usse ye kalle wede majjaane aakede bobbo soole soo toñ mañ.

28 Injino Raa yi-ti y'ossiyo soole wede adda balɗa anki kuti kutiŋ, wo soggo an t'oggiyo adda k'uwwu mendí. Geŋ taŋ miibi a ceere Raa y'un di'n osse kune batum me! Ki kotto kune zaapu k'addugun a Raa baata!

29 Wo kune ulbugun un ki t'oode daayum a urzi dehutu k'ombo ti sobo ye.

30 Sulɗi pay geŋ, daayum i'ni dehutu kane doŋ pay adda duniya i ki suune Raa soo ɗaŋŋal ye geŋno. Wo Meegugun Raa, yoŋ yi suune sulɗi geŋ kun i dehu a urzi lekkiyagun me.

31 Ki too maŋ kun deho ki poone Moziko Raa, wo saŋ sulɗi geŋ y'un di'n t'ela kay.»

Laale wede a kandaane

(Matiye 6.19-21)

32 «Kune aakede torɗo moode ere baata toŋ maŋ, kun orgide ye! Derec, Meegugun Raa yi wulle maŋ beehiye Mozikadi y'un di-t'ele me.

33 Sulɗugun doŋ un d'ede kun t'owilto, wo soŋko kun an di dokko a doŋ an k'ede munda ye. Kun soko zaada ere i ki ruumiyo ye wo ti laale wede i ki dagga ye a kandaane, a ummey wede k'oogire yi k'aana yi ki botta ye, a ummey amma toŋ ti ki ti y' latta ye.

34 Derec, a ume wede laalagun yi lekkiyo geŋ, addugun toŋ aŋgeŋno.»

Doŋ naabo i lekkiyo zeere

(Matiye 24.43-51)

35 «Kun ti ketto toonugun a munda wede kun ise, wo pintilagun oyyisito.

36 Kun lekko aakede doŋ naabo doŋ an delliyo kama ki goolayan ti tarnaape seedu, kono saŋ aame y'iina wo yi guppa biza maŋ, kesiko an i-di t'hina.

37 Uŋsuwo a doŋ naabo geŋno, doŋ goolayan a kamadi yi'ni t'oona kane zeere. Derec injino wo n'un di rooto: Yoŋ yi-t'ossa sulɗi naabo, y'a ti'n koona doŋ naabadi me, wo aame geŋ yoŋ y'an t'ela ombo.

38 Aame yi-kimo a diddo meeda ise ki biza soohe toŋ maŋ, yi'n uuna kane zeere maŋ, geŋ uŋsuwo a kane.

39 Ono eŋ kun ollo koduwo: Aame wede boy geŋ yi suune peedo ere wede k'oogire y'etto maŋ, yi k'ooli wede k'oogire yi-ki t'ette k'adda boozí ye.

40 Kune toŋ maŋ kun koona mentikagi, kono nuŋ wede an n'ehe aa ulo wede eŋ, n'etto a peedo ere tuuku kun ki ti suune ye.»

Wede naabo i seedu zakidi a naabadi

41 Injino maŋ Piyer y'a yi tunde, y'ede: «Galmee'ki nuŋ, ono ombide ki'ni rootiyo eŋ a kaye ɗaŋŋal kunuŋ, a ɗuwo pay ko?»

⁴²Maṅ Galmeega yi di ruute, y'ede: «Inkino maṅ wede y'eeriyo wede i seedu zakidi a naabadi wo i-d'ede elkiyo geṅ, a yode geṅṅo galmeegi yi oola attidi pay ki doṅ naabadi oṅgoṅ me, kono y'an t'ela ombadaṅ aame peedo t'iida maṅ.

⁴³Uṅsuwo a wede naabo geṅ me, aame galmeegi a kamadi yi y'uuna y'isiyo naabo gettiyo maṅ.

⁴⁴Derec inkino wo n'un di rooto: Wede inkino geṅ galmeegi yi di t'ela attidi ki suldi zi pay a beezi.

⁴⁵Wo de aakede wede naabo geṅ y'ilka adda k'addi, y'iisa: "Galmeego eṅ yi t'usso", wo yi t'iida taazu doṅ naabo ti doolo kuuli wo erayi, yi t'ussa a ombo ti sobito i jiira eedi.

⁴⁶Aame geṅ galmeegi y'a aana a onniyo ere wede naabo geṅ yi k'elkiyo ye, wo a peedo ere yi ki ti suune ye. Galmeegi yi di t'ela daṅgay ere zakidi wo yi-t'ela aggadi aa ki doṅ i ki zaapu addaṅ a Raa ye.

⁴⁷Wede naabo wede i suune munda wede galmeegi yi dehu, wo y'a ki t'ikkima tuddi y'a ki t'ize ye naabo ere aa galmeegi yi dehu te maṅ, yoṅ geṅ y'a t'ona kossiyo baadaṅ.

⁴⁸Wo wede naabo wede yi ki y' suune ye munda wede galmeegi yi dehu me, wo yi t'ize naabo ere y'a t'one kossiyo maṅ, kossiyadi t'aase baata. A wede suldi baadaṅ an i ele a beezi geṅ, an tonda baadaṅ kay, wo a wede an ziipe addaṅ baadaṅ geṅ, an tonda baadaṅ sey a ceera.»

Isa y'iido ki moo me?

⁴⁹«Nuṅ n'iido n'a-t'oyye uwo a duniya te, wo aṅkeṅṅo eṅ ni dehu t'adde soo, tod' ti ziida baa.

⁵⁰Nuṅ n'a adda t'urzi dabar aakede an ni suyyiso batem, nuṅ biza k'ulbo i zehiso wo a zehita bini daṅgiya ki suyyiso batem gettiyo.

⁵¹Kune kun elkiyo nuṅ n'iido n'un t'ela toose adda duniya ko? Aha, wo n'un di rooto, kono nuuno geṅ duwo tuddaṅ an ti-t'ahinta.

⁵²Ti aṅki eṅ doṅ adda boozan kane paat maṅ, tuddaṅ an ti-t'ahinta, doṅ ado ki tukki doṅ sire, wo doṅ sire ki tukki doṅ ado.

⁵³Meege y'a t'ahina ti tukkulí wo ulo ti tukki meegi, meede t'a t'ahina ti tukkututu wo uto ti tukki mettú, ande t'a t'ahina ti tukkere kulutu wo ere kulutu ti tukk'andutu.»

Suuniyo k'ita suldi doṅ i-kaza munda wede aana

(Matiye 16.2-3)

⁵⁴Isa y'a ruute sey a donɔ duuru, y'ede: «Aame kun wolloyo dondirso ti koliyo ti kese peedo k'ooriyo maɲ, a kaamiki kun d'eesiyo: "Mizzi yi koppa", wo geɲ ki kotto i-t'isiyo.

⁵⁵Wo aame kun owwiyo maaye yi baahu ti kese ki dandi maɲ, kun d'eesiyo: "Ume aɲki y'isa wehini", wo geɲ ki kotto i-t'isiyo.

⁵⁶Kune donɔ biziguɲ sire sire, kun d'aaniya kun di suuniyo ita suldi donɔ kun wolloyo t'edaguɲ isiyo a siido wo a kandaane me, wo de ki moo me ita suldi donɔ Raa y'isiyo aɲkeɲɲo kun ki'n suuniyo ye me?»

Tôwwo k'ono ti aduzá

(Matiye 5.25-26)

⁵⁷«De ki moo me munda wede ki diine kune batum kun d'ise, kun ki y' suuniyo ye me?

⁵⁸Aame ti leemadá un ede ono, wo kune a urzi kun ette k'ume wede booro botto geɲ, ti yode ono kun ti'n ôodo. Para maɲ y'a-da t'iida k'ume wede booro maɲ, wede booro y'an gi di t'eley a bey k'asigiryagi, wo kane an ki ti t'eley dangay.

⁵⁹Ki kotto n'a di rooto, t'ume geɲ ki ki t'adfa ye, daa ki munda wede an dehu k'an ki y'ela pay ye maɲ, tammiyagi donɔ sunɲi sunɲi toɲ an a-k'oola ye.»

Lik 13

I dehu kun di-kime lekkiyaguɲ

¹Aame geɲ i d'iido duwo an i-t'iide taaya a Isa, mummino Pilat y'ele urzi donɔ miibi ti siido Galile an di'n iide, aame an isiyo sedeke a Raa geɲ me.

²Isa y'an di'n gime onamaɲ, y'ede: «Kune kun elkiyo aame kane donɔ ti siido Galile an ti'n iide iɲkino geɲ, i-kaza kane donɔ k'oldiko a jiire donɔ ti siido Galile ti doolo pay ko?

³N'un di rooto aha, wo aame kun ki ti gima lekkiyaguɲ ye maɲ, kune toɲ kun di-t'inda pay aa kane.

⁴Wo kane donɔ koomat makumu gessire boy wede sohuru ki Silowe y'an di ti'n ruuge an t'inda geɲ, kun elkiyo kane donɔ k'oldiko a jiire donɔ ki geeger Zeruzalem ti doolo pay ko?

⁵N'un di rooto aha, wo aame kun ki ti gima lekkiyaguɲ ye maɲ, kune toɲ kun di-t'inda pay iɲkino kay.»

Ono ombife a tukk'undumu daa k'ingizi

⁶ Saŋ maŋ Isa y'an di ruute ono ombide eŋŋo, y'ede: «I d'ede wedusu yi d'iite undumu sundí pigiyee adda doome k'inda biŋ. Onniyo soo yo wede geŋ y'a iido yi dehu yi rakke iŋŋizí, miŋ umbo yi ki d'uune ye.

⁷ Inŋino maŋ yi di ruute a wede naabadí, y'ede: “Ki wollo, pigiyee eŋ ñide ozzine afo ni d'ettiyo d'ettiyo ni rakke iŋŋizí miŋ ni k'ooniyo ye. Inŋino ki ti y' deŋko, yi t'ambu ume ki bita.”

⁸ Wo wede naabo yi di'n gime onamí, y'ede: “Galmee'ki nuŋ, ki y'oolo y'a-t'ozzine sey k'aŋki me, siido itadí n'a-t'ottiba a t'isa d'olgitte, maŋ n'a d'obita iizi.

⁹ Geŋ inŋino ozzine ki dfaana eŋ koo yi t'eha maŋ, umbo pi maŋ k'a ti y' deŋka kollo.”»

Eliyo beeko a erewo a onniyo ere ki puukiyo

¹⁰ Onniyo soo ere ki puukiyo Yawudiyagi maŋ, Isa yi dooyiso d'uwu adda boy wede Yawudiyagi ge dooyiso.

¹¹ A ume geŋ i d'ede erewo, siitan ti ziida diine dartú i-d'ede ozzine koomat makumu gessire, ti lekkiyo ottilso ume t'a t'ohira deŋele umbo.

¹² Aame Isa yi ti wulle maŋ, y'a ti wiike wo yi di ruute, y'ede: «Erewo no, koŋ te kettiyo ye baa, m'uune bee ti eenizí me.»

¹³ Yoŋ yi di ziipe beezí a tuddutú, a kaamiki t'a t'ohira deŋele wo t'a iise tamma Raa.

¹⁴ Wo yo goole boy geŋ yi-ti gulkuwe a beeko ere Isa yi ele a erewo a onniyo ere ki puukiyo Yawudiyagi gette. Inŋino y'a t'ihina bizí wo y'an di ruute a doŋ duuru, y'ede: «Adda suuk i d'ede onniyo zoot ere ki naabo te. Kune kun dehu beeko maŋ, kun d'etto adda k'onniytagi geŋŋo, a onniyo ere ki puukiyadiŋ ye.»

¹⁵ Maŋ Galmeege yi di'n gime onamí, y'ede: «Kune doŋ biziguŋ sire sire, a onniytagi doŋ ki puukiyadiŋ wede tuuku toŋ yi-t'eeziyo ti kuulaye'ŋ burizí koo, ise buurizí koo maŋ, kun an t'eliyo ahu dee me?

¹⁶ Erewo ette tod'te ti biza bumbu k'Ibirayim, Meeda siitandani ti ti-gitte i-d'ede ozzine koomat makumu gessire, geŋ i k'ise ye ko a onniyo ere ki puukiyadiŋ kino, ni di t'eeze sibatú me?»

¹⁷ A rootiyo k'Isa gette, kane pay doŋ k'olmidayí an ziida sukuyagi, wo kane pay doŋ duuru geŋ ulbaŋ uŋse a sulfi doŋ pay y'isiyto i ceeriyo eego geŋ me.

Ono ombide ekk'ulo k'undumu sundí mutard

(Matiye 13.31-32; Markus 4.30-32)

¹⁸ Maŋ Isa y'a ruute, y'ede: «Moziko Raa tod' ti deeyiso toŋ aa moo me? N'a t'eeze tod'te aa moo me?

19Tod' ti deeyiso aa ulo k'undumu soo sundí mutard wedusu y'a t'umbe y'a-giira adda jineene. Saŋ a t'udde, a t'ize undumu wo embi an d'appiyta boydi ekki laydayí.»

Ono ombide a tukk'orme

(Matiye 13.33)

20Isa y'a ruute sey, y'ede: «Moziko Raa n'a t'eeese tod'te aa moo me?

21Tod' ti deeyiso aa orme erewo ti-sokiyo booloŋ, t'a-t'obe a moonoo baadaŋ lootiyo, wo saŋ orme geŋ moonoo yi-ti t'oozige pay.»

Biza bumbu wede peryeye

22Aame Isa y'ambe ki Zeruzalem geŋ, yi d'ettiyo geeger ti geeger, ille ti ille, yi dooyiso duwo.

23Maŋ i d'ede wedusu y'a yi tunde, y'ede: «Galmee'ki nuŋ, de geŋ Raa yi d'utta duwo booloŋ d'añŋal ko?» Inŋkino Isa y'an di ruute a doŋ duuru, y'ede:

24«Kun ollo, n'un di rooto, kun elo gotono kun t'odo ti biza peryeye. Derec, doŋ baadaŋ an deha an t'ette ti biza geŋŋo wo an ki d'aana ettiyo ye.

25Saŋ onniyo t'aana ere wede boy y'a t'ooziga wo biza y'a di-t'ippa ti kerle, maŋ kune kun d'oopaa ti paate. Aame geŋ kun t'eesa koppiyo a biza bumbu, wo kun di roota: “Galmeegey, k'ay t'ohon!” Wo yoŋ y'un ti'n kima onamguŋ, y'a t'eesa: “N'un ki'n suune ye kune ti tunda me.”

26Inŋkino maŋ kun di roota kun t'eesa: “Kaye ay d'iimito, ay d'iibito ti kee kaŋ soo, k'a duuyite a urziyagi ki geegirzey pây.”

27Wo yoŋ y'un di roota sey: “N'un ki'n suune ye kune ti tunda me. Kun ti ledfo dokki ti tuddo me, kune doŋ pay isiyo suldi doŋ ki diine ye.”

28Wo aame kun wulley Ibirayim, Isaaka wo Yakup ti nebiyagi pay adda Moziko Raa, wo kune an un ti'n zibbey ti paate maŋ, a ume geŋ kun dillitey molo wo kun d'aadimey sina.

29Wo i d'etto duwo sey ti kese peedo ti koliyo, ti kese peedo k'ooriyo, ti kese k'awwa wo ti kese d'andi, an di-kooney an d'oomey kaŋ soo adda Moziko Raa.

30Inŋkino maŋ doŋ oŋgo aŋkenŋo kane k'ita, saŋ an t'isa doŋ ki biza, wo doŋ oŋgo aŋkenŋo kane ki biza, saŋ an t'isa doŋ k'ita.»

Ono k'Isa a tukki Zeruzalem

(Matiye 23.37-39)

31Aame Isa y'a ti diŋge ti dooyiso maŋ, i d'ede doŋ miibi ti diine Pariziyen, an aa d'iide sirpa k'Isa wo an i-di ruute, an'de: «Kee t'enj ki t'oozo k'engilo k'ume doolo, kono mozigo Erod yi dehu t'owwada.»

³²Wo Isa y'an di ruute, y'ede: «Kun'do kun i-ti rootoy a yo wede metike aa boo yi ti daggiya duwo geɲ, kun'de: "Isa y'ede aŋki ti soggo yon y'a limmiti siitandani wo y'a t'ele beeko a doŋ k'eeni, wo a onniyo ere k'aduwe maɲ, naabadí y'a-ti daŋga."»

³³Wo ni roote eɲ a kune: i dehu aŋki, soggo wo soŋŋo kino geɲ, n'a eɲgila ki daanadó, ki too maɲ d'erec nebi y'a t'inda a Zeruzalem, a ume doolo ye.

³⁴Wayya kune doŋ Zeruzalem no, wayya kune doŋ Zeruzalem no! Kune doŋ i tōwwito nebiyagi, wo doŋ Raa y'un akkisa kun ti'n kakkisa ti moŋgali kun ti'n tōwwo. Nuɲ taɲ baadaɲ n'a dihe n'un ti'n tusse aa ôsso ti tussiyo inñitú adda kambartú, wo de kun ki dihe ye.

³⁵Inkino maɲ boyguɲ Raa y'un di y'oola. Wo kun ollo n'un di rooto, nuɲ kun ki n' wolla ye baa, bini a t'ida onniyo ere kun di roota: "Beeko Raa ti koonaa a ekki wede ettiyo ti suma Galmeega Raa."»

Lik 14

Eliyo beeko a wede k'eeni

¹Onniyo soo ere ki puukiyo Yawudiyagi maɲ, Isa y'a t'iide ombo di wede soo ti diine deero Pariziyen. Kane doŋ a sirpa geɲ, ersadaɲ a tukk'Isa tak.

²Aame geɲ i d'ede wedusu tuddí t'iiziga, y'a t'ihira a daana yode.

³Isa y'a t'ihina bizí, y'a tunde kane doŋ suuniyo k'oogoro ti Pariziyen, y'ede: «To oogiradiɲ tiɲ urzi t'ele kunuɲ, ti k'ele ye ko, k'eliyo beeko a wedusu a onniyo ere ki puukiyadiɲ te?»

⁴Wo a onamí geɲ kane an d'inniga deddek. Inkino maɲ wede geɲ Isa y'a yi butte, yi-d'ele beeko wo y'a-y'igibe ki boozí.

⁵Saɲ y'an di ruute, y'ede: «Ti diinaguɲ eɲ wee wee, aame i-d'ede ulo ise buru yi t'iire adda k'osso a onniyo ere ki puukiyadiɲ maɲ, y'a k'ette, t'adda k'osso y'a ki y'adde ye me? Eyye, kesiko y'a-t'adde!»

⁶Wo a onamí geɲ, kane an di roote munda an ki suune ye.

Beeriyó k'ume konso adda tarnaape

⁷Isa yi wulle'ɲ doŋ an'ni waaku k'ombo'ɲ, an beeriyó omagi konsito doŋ majjandani. Inkino y'an di ruute a kane pay geɲ t'ono ombide enno, y'ede:

⁸«Aame wenda yi ki wiike a tarnaape ki seedu maɲ, k'etta ki koonaa ume wede suma a jiire ye. Koo ise an wiiko wede goole i jiire kee y'a-koonaa maɲ,

⁹wo wede unni wiike kee ti yode geɲ, y'a etto y'a di roota, y'a t'eesa: "Ume eɲ ki t'oozo, ki oolo a yode eɲno." Injino k'a t'ooziga ti sukiyagi, k'etta k'a-kooney a ume k'ita.

¹⁰Ki too maɲ an ki wiiko geɲ, k'odo ki-koonoy a ume k'ita, injino aame wede i ki wiiko y'iina maɲ, yoɲ y'a di roota, y'a t'eesa: "Laɲze ki nuɲ, kee ki t'oozigi, ki-koono a ume ki daana a ise majjaane kino." Injino maɲ a kee a di t'isa suma a daana kane doɲ pay ooma ti kee kaɲ soo geɲ me.

¹¹Derec, wede tuuku tuddí yi ti-koliyo maɲ, Raa y'a y'isa ɲeɲku, wo wede tuddí yi ti-t'isiyo ɲeɲko maɲ, Raa y'a y'isa goole.»

Waaku doɲ an k'ede munda ye

¹²Isa yi di ruute sey a wede i y' wiike geɲ, y'ede: «Aame ki dehu ki waake duwo an d'oomi di kee, ise a peeɔo t'ize diine, ise a peeɔo t'ette k'ooriyo toɲ maɲ, ki waake laɲziyagá ye, zembadá ye, taasiyagá ye wo doɲ bey a ita waayadá ye, kono kane geɲno toɲ saɲ an gi di waaka kay, injino ombadá aakede an a-ti gime.

¹³Wo ki too maɲ, aame ki waake duwo a tarnaape di kee maɲ, ki waako doɲ an k'ede munda ye, doɲ kesiyagaɲ soo soo, doɲ jekese wo doɲ koɲzayi.

¹⁴Geɲ kee ulbá aasa uɲse, kono kane an k'ede munda an a-ki ti y' kima ye. Injino a di ti y' kima Raa, a onniyo ere doɲ ki diine a daanadí an ti bilda maɲ.»

Ono ombide a tukki tarnaape goole

(Matiye 22.1-10)

¹⁵Wede soo ti diine doɲ an ti guune ombo, y'illiga ono doɲ Isa yi ruute geɲno maɲ, yi di ruute, y'ede: «Uɲsuwo a wede i kooney ombo adda Moziko Raa.»

¹⁶Wo Isa yi di ruute t'ono ombide eɲno, y'ede: «Onniyo soo wedusu yi d'ize ombo baadaɲ, maɲ yi wiike doɲ baadaɲ.

¹⁷Aame ombo ettú t'ide maɲ, wede boy y'a igibe wede naabadí kono y'an di kizo a doɲ yi'ni wiike. Wede geɲ y'iide'ɲ, y'a ruute, y'ede: "Kun'di, ombo ettú t'ide baa."

¹⁸Injino maɲ kane doɲ pay yi wiike geɲ, wede soɲ yi-t'isiyo tambobino tambobino. Wede ki poone yi di ruute a wede naabo, y'ede: "Nuɲ ni iwila doome, i dehu n'a ette n'a ti y' wollo do. Kee k'o t'isi tambobino."

¹⁹Wede doolo yi di ruute, y'ede: "Nuɲ ni iwila buɲgari koomat ki naabo sire sire, wo n'ette n'a ti'n naamey. Kee k'o t'isi tambobino."

²⁰Wede doolo sey yi di ruute, y'ede: "Nuɲ aɲkeɲno ni ziida erewo ni morbiyo, kono k'injino ni k'aane ettiyo ye me."

²¹Wede naabo geɲ y'a-gime k'ume galmeegí, y'iide'ɲ yi di t'ide taaya a onamaɲ geɲ me. Aame geɲ wede boy yi di gulkuwe wo yi di ruute a wede naabadí, y'ede:

“K’okko kesiko k’omagi don duwo ge lekkiyo, k’adda k’urziyagi don adda geeger, ki waaki kane don an k’ede munda ye, don kesiyagan soo soo, don konzayi wo don jekese, k’an d’an t’edi kenno.”

²²San man wede naabo gen y’a-gimo k’ume galmeegi, yi di ruute, y’ede: “Galmeeki nun, naabo ere k’o ruute n’aase ni-t’izo, wo ume ede sey.”

²³Inkino man wede boy yi di ruute a wede naabadi, y’ede: “K’okko sey ki urziyagi dombi, k’adda jinendani, wo don ki t’ooney a daanada gen, t’urzi tuuku ton ki ti’n waaki an t’edi k’adda boy kono boozo a done.

²⁴Gen kun ollo, n’un di rooto, kane don ni wiike ki poone gen, wenda soo ton i k’ooma ye ombado te.”»

Urzi daaniya k’Isa

(Matiye 16.24-28; Markus 8.34-9.1)

²⁵Don duuru baadan an daaniya Isa, man y’a-gime ki tuddan wo y’an di ruute, y’ede:

²⁶«Aame wede yi ni daane man, i dehu nun y’a ni geyye a ceere meegi, meedi, eddi, innizi, zembadi kuuli erayi, wo tuddi batum ton man. Para man yi k’aane yi ki t’ise sanallusizo ye.

²⁷Wede tuuku yi k’iyya y’a ki t’inda kono nuuno wo y’a ki n’ daane ye man, yon gen yi k’aane yi ki t’ise sanallusizo ye.

²⁸Inkino aame wede ti diinagan yi dehu y’a ooziga boy sohuru man, ki poone y’a-koone y’a-kize sonko ki suldi don pay y’owilta, wo y’a wolle aame sonkadi i-t’ida towwo boy man.

²⁹Wo de aame yi-ziipa ita danjal wo boy y’a ki ti y’ida ye man, don pay i wolla gen an di y’ t’okka maade,

³⁰an t’eesa: “Wede en yi-t’iise oozige boy min naabadi y’a-ki ti dinge ye.”

³¹Inkino kay, aame mozigo yi dehu y’ette deyyiso mozigo bakadi wede ettiyo ti asigiryagi dupu ada sire gen, ki poone y’a-koone y’a wolle toogadi, aame y’aane deyyiso ti asigiryagi dupu koomat genno man.

³²Aame yi k’aane ye man, yi-t’igibe don zina ki tukki mozigo bakadi ki poone yon botto dokki gen, y’a ti y’ tondo toose t’a koone diinayan.»

³³Isa y’a ruute sey, y’ede: «Gen inkino kay, i dehu wede tuuku ti diinagan suldi don pay i-d’ede’u, y’an ooli. Para man yi k’aane yi ki t’ise sanallusizo ye.»

Sumade don daa k’unzuwadan

(Matiye 5.13; Markus 9.50)

³⁴«Kane sumade’η munda wede beehiye, wo de aame sumade un̄suwadaŋ i t’ize umbo maŋ, kaŋ mummino k’an ise un̄se sey me?

³⁵Kane geŋ i k’ise beehiye ki ruumiyo siido ye, ise ki guuru toŋ i k’ise ye, iŋkino kane geŋ ki sebbiyo mendaŋ a disse. Wede i-d’ede kuwwa k’ollige maŋ, y’ollo kofuwo!»

Lik 15

Ono ombide a tukki damu gi digge

(Matiye 18.12-14)

¹Doŋ seŋdu jibaaye ti doŋ k’oldiko doolo, kane pay an aa d’iide ki sirpa k’Isa kono an di y’olliga.

²Kane Pariziyen ti doŋ suuniyo k’oogoro an d’orbe sun̄ni sun̄ni a tukk’Isa, an’de: «Wede eŋ doŋ k’oldiko yi di’n seedu bey sire wo yi d’ombo ti kane.»

³Iŋkino maŋ Isa y’an d’iise tōwwo taaya t’ono ombide eŋno, y’ede:

⁴«Aame wede soo ti diinaguŋ i-d’ede dambami meeda wo ere soo t’a digge maŋ, ki kotto doŋ ada gessat makumu gessat geŋ yi d’ooli adda balda, y’a-kime dehtu ki ere i digge, bini y’a ti t’oono.

⁵Wo aame yi t’uuno maŋ, yoŋ ulb̄i un̄se baadaŋ, y’a t’ambo a dannaȳi,

⁶y’a t’aahe boy, saŋ y’a waake laŋziyagi ti doŋ k’ita waayad̄i, wo y’an di roote, y’a t’ese: “Kun iso un̄suwo ti nuuno, kono nuŋ damuzó wede i digge ni y’uuno baa!”

⁷Kun ollo, n’un di rooto, geŋ iŋkino kay aasa un̄suwo baadaŋ a kane doŋ a kandaane, kono wede k’oldiko soo yi-gime ti lekkiyad̄i ere oldo gette. Un̄suwo ere a tukki wede soo gette, a ceera ere a tukki doŋ ada gessat makumu gessat kane ki diine wo an ti gime lekkiyadaŋ geŋno.»

Ono ombide a tukki tamma i digge

⁸«Wo kun ollo sey, i d’ede erewo soo iŋkino tammiyagutú koomat wo soo i di t’iire maŋ, geŋ ki kotto tod’ t’a modde pitilatú, binditú t’a rooke, t’a dehite boolo booloŋ bini t’a ti t’oone.

⁹Wo aame ti t’uune maŋ, t’a waake laŋziyagutú ti doŋ k’ita waayatú, t’an di roote, t’a t’ese: “Kun iso un̄suwo ti nuuno, kono nuŋ tammadó ere i digge ni t’uune baa.”

¹⁰Kun ollo, n’un di rooto, geŋ iŋkino kay aasa un̄suwo baadaŋ a diine maaleekiyagi doŋ ki Raa, kono ki wede k’oldiko soo yi ti kama ti lekkiyad̄i ere oldo gette.»

Ono ombide a tukki ulo gi digge

- 11** Isa y'a ruute sey, y'ede: «I d'ede wede soo in̄kino in̄n̄izí kuuli sire.
- 12** Onniyo soo, ulo wede ñeñku yi di ruute a meegí, y'ede: “Baaba, kee k'o eli aggadó ere sañ ni t'ooná t'adda laalayá geñño.” In̄kino mañ meegañ y'an di diikida laalayí a in̄n̄izí sire geñño.
- 13** Onniyo miibi k'ita mañ, yo ulo wede ñeñku geñ aggadí y'a t'iwilte pay wo y'a ziida soñko, y'a in̄gile ki siido ere dokki. A ummey geñ yi-t'iide adda lekkiyo ere k'arbutu, in̄kino maaladí pay y'a t'irbe.
- 14** Aame maaladí pay yi ti d̄inge mañ, i d'ize mosogo baadañ adda siido gette, wo yoñ munda a beezí umbo.
- 15** Aame geñ y'a t'iide naabo di wede soo ki d̄oñ siido gettiyo, wo yo wede geñ y'a y'igibe k'adda doomizí elso kinzir.
- 16** Ulo geñ y'a dihe yi d'aadí in̄ni boriyo d̄oñ an sebbiso a kinzir, wo wenda soo toñ i di t'ele umbo.
- 17** In̄kino mañ a lekkiyadí gette yi d'elkiso adda k'addí, y'ede: “Doñ naabo meegó baadañ, an d'ombo i di'n palda! Wo nuñ a eñño n'unto ki mosogo!
- 18** N'a-kima di meegó wo ni di rootey, n'a t'eesey: Baaba, ni t'ize oldíko a Raa wo a kee.
- 19** Ni k'iide k'a ki n' wolle aa ulá ye baa, in̄kino ki n'iso aa wede soo ti diine d̄oñ naabadá.”
- 20** Mañ y'a t'iiziga, y'a-gime k'ume meegí. Aame ulo yo dokki booloñ ti boy geñ, meegí y'a yi wulle, wo i di t'ize sommagi baadañ. Y'a ukke okkimayí, y'iide'ñ y'a yi ziida yop.
- 21** In̄kino mañ ulo yi di ruute, y'ede: “Baaba, ni t'ize oldíko a Raa wo a kee. Ni ki t'iide k'a ki n' wolle aa ulá ye baa.”
- 22** Wo meegí y'an di ruute a d̄oñ naabadí, y'ede: “Kesiko, kun ambi kalle wede goole majjaane a jiire wo kun i-t'osso a ulo me. Kun i t'eelo kokkide a y'elsadí wo zoñdí kun i-t'osso tobiyagi.
- 23** Kun soodí ulo buru wede bokkide, kun t'ôodo, in d'ooma wo in d'isa tarnaape,
- 24** kono ulo nuñ kun wolliyo eñ, yoñ aa y'inda wo añkeñ aa yi bilde, yoñ yi digge wo añkeñ ni y'uune.” Mañ an d'iise isiyo tarnaape.
- 25** Aame geñ ulo kabbadí yoñ a doome. A kamadí ti doome geñ, aame y'iina goppon ki boy mañ, y'ollige tarkuuse k'otoro ti ommire.
- 26** Mañ yi wiike wede soo ti diine d̄oñ naabo, y'a yi tunde, y'ede: “De ize moo me?”

²⁷Wede naabo yi di ruute, y'ede: "Geŋ leemadá aaho me, wo meegá yi d'ïide ulo buru wede bokkide, kono ulí yi y'uune yi lekkiyo bee."

²⁸Inkino maŋ ulo kabba yi di gulkuwe wo yi ki dehu k'adda boy yi k'ette ye. Meegí y'a t'udfo yi di y' selliyo, y'ede: "Ulo ki nuŋ, ki t'edi k'adda boy me."

²⁹Wo ulo yi di'n gime ono meegí, y'ede: "K'ollo kay baaba, nuŋ ozzinagi baadaŋ n'a naabiya me, wo ŋuy'ur kaŋ soo toŋ ni k'ize ye a munda wede k'o rootiyo me, wo a nuŋ gogguru soo daŋŋal toŋ k'o k'eele ye, kono n'a t'ise uŋsuwo ti laŋziyagó me.

³⁰Wo a ulá wede enno kotto maŋ, yode wede maaladá pay y'a ti diggo y'a t'irbo ti erayi, aame y'iina maŋ a yode ki-d'ïide ulo buru wede bokkide!"

³¹Maŋ meegí yi di ruute, y'ede: "Ulo ki nuŋ, kee daayum ti nuŋ wo suldi pay doŋ oo d'ede toŋ kane ki kee.

³²Wo geŋ i dehu kine in d'ise tarnaape wo in d'ise uŋsuwo, kono leemadá eŋ yoŋ aa y'inda wo aŋkeŋ aa yi bilde, yoŋ yi digge wo aŋkeŋ ni y'uune."»

Lik 16

Ono ombide a tukki wede yeeriyo metike

¹Saŋ Isa y'an di ruute a sanalliyagí, y'ede: «I d'ede wede laale soo inkino, yoŋ i-d'ede wedusu yi di yeeriyo laalayí. Wede laale geŋ duwo an i d'ïido ti rabila, kono wede yeeriyo yi-ti y' daggiya laalayí me.

²Maŋ wede laale y'a wiike wede yeeriyo wo yi di ruute, y'ede: "Kee n'illiga naabadá ere k'isiyo te, k'o t'odi taaya a urzi naabadá, kono ki ki yeera ye baa laalayó me."

³Inkino maŋ wede yeeriyo y'a ruute t'adda k'addí, y'ede: "Nuŋ eŋ n'aasa mummino, t'ume naabo yeeriyo galmeegó yi-ti'n adfiya geŋ me? Ki derku nuŋ toogadó umbo, wo k'ahultu a nuŋ sukiyagi.

⁴Geŋ ni suune munda wede n'a isa me. Inkino aame t'ume naabo yeeriyo yi n'udfa maŋ, doŋ ede an di n' seeda di kane me."

⁵Inkino maŋ kane doŋ i zidde seeyagi ki galmeegí, y'a ti'n wiiko soo soo. Yi di ruute a wede ki poone, y'ede: "Kee ginno seezá miibi ki-t'ela a galmeegó me?"

⁶Yoŋ yi di'n gime onamí, y'ede: "Boŋgali ada sire k'egey k'inŋi k'olibiyee." Wede yeeriyo yi di ruute, y'ede: "Mattup ki seezá ettiyo, kesiko ki koono ki raana boŋgali koomat."

⁷Saŋ yi di ruute a wede doolo, y'ede: "Wo kee me, seezá miibi ki t'ela me?" Yoŋ yi di'n gime onamí, y'ede: "Suwal meeda pide ki geme." Wede yeeriyo yi di ruute, y'ede: "Mattup ki seezá ettiyo, ki raana suwal meeda ado."

⁸Wo yo galmeega y'a y'imme wede y'eeriyo wede ki diine ye geɗ me, kono y'ize'ŋ metiŋko. Inkiŋo maŋ kane doŋ duniya a urzi lekkiyo ere ti tuddaŋ gette, kane mentikagi an jiire kane doŋ ki Raa tooraŋ a eedaŋ.»

⁹Isa y'a ruute sey, y'ede: «Wo kun ollo, nuŋ n'un di rooto, kun soddo laŋziyagi ti laale wede kun ooniyo t'urzi wede ki diine ye geɗ me. Inkiŋo onniyo soo yo laale geɗ ti beyguŋ yi dikka maŋ, kane laŋziyagi an un di'n seedey adda boydi doŋ duwo an di lekkey ki daayum.

¹⁰Wede a naabo ere neŋko booloŋ yi ti seedu zakidi geɗ, a naabo ere meeda toŋ duwo an zaape addaŋ a yode kay. Wo wede a naabo ere neŋko booloŋ yi ki ti seedu zakidi ye geɗ, a naabo ere meeda toŋ duwo an ki zaape addaŋ a yode ye kay.

¹¹Inkiŋo maŋ, aame kune a laale wede kun ooniyo t'urzi wede ki diine ye eŋ, kun ki y' ziida zakidi ye maŋ, Raa toŋ yi k'aane y'un ki t'ele a beyguŋ ye laale wede ki kotto me.

¹²Wo aame a laale wede ki kune ye kun ki y' ziida zakidi ye maŋ, Raa toŋ y'un ki t'eley ye laale wede ki kune me.

¹³Wede naabo soo toŋ umbo a aane a naabe ti galmaawi sire me, ise maŋ soŋ y'a y'olmiida wo y'a-geyye soo me, wo ise maŋ y'a di kette ti wede soo me wo soŋ y'a yi kiigira. Kun k'aane kun ki ti daane ye, urzi Raa wo urzi soŋko sirwaŋ pay me.»

Urzi Moziko Raa

¹⁴Aame kane Pariziyen an illiga ono doŋ pay Isa yi ruutite geŋno maŋ, an di y' koobiyto kono kane soŋko an ti geyyiso.

¹⁵Isa y'an di ruute, y'ede: «Kune a daana duwo kun ti t'isiyo tudduguŋ aa doŋ ki diine, wo Raa adduguŋ yi'ni suune, kono munda wede duwo an yi wolliyo goole geɗ, Raa yi y'azzuru a daanadi me.

¹⁶Ono doŋ an riine ti kaaga adda mattup k'oogoro Muusa ti doŋ ki nebiyagi geɗ, urzizaŋ a iide bini aaniya Zaŋ Batis. T'ume geɗ an di kazita Rabila Majjaanawa ki Moziko Raa, wo wede tuuku toŋ yi d'eliyo gotono kono yi-t'ette k'adda.

¹⁷Wo kun ollo koduwo, ooŋe a kandaane ti siido an t'engile me, wo ooŋe baadaŋ sey a arku raaniya soo wede neŋku a jiire k'oogoro ette y'a dagge me.

¹⁸Wede tuuku eddi yi ti biira wo y'a ziida erewo ti doolo maŋ, Raa yi y' wolliyo yoŋ wede i moone t'ere bakadi. Wo wede yi ziida erewo ere kulatu yi ti-biire maŋ, Raa yi y' wolliyo yoŋ wede i moone t'ere bakadi.»

Ono ombide a tukki wede laale kane ti Lazar

¹⁹Sanj maŋ Isa y'an d'ïide taaya, y'ede: «I d'ede wede laale soo inŋkino kallagi y'ossiyo ki ramica zooyatú ooŋe, daayum yi lekkiyo togos adda k'uŋsuwo wo daayum yi d'isiyo ombo baadaŋ aa ki tarnaape, ðuwo an d'ombo.

²⁰I d'ede wedusu i-k'ede munda ye sundí Lazar, tuddí kundayi risimik kaŋ moone a biza bumbu ki wede laale geŋŋo.

²¹Yoŋ y'a dihe y'a oomi ombo ere i soldite t'ekki taabul ki wede laale geŋŋo toŋ umbo, wo ðe kane gahiti toŋ an d'ettiyo an di daldutu kundayzí.

²²Wede i-k'ede munda ye y'inda maŋ, maaleekiyagi an t'umbe undí ki sirpa k'Ibirayim. Sanj wede laale toŋ y'a inda, an t'ittiba.

²³Wo kaŋ unde y'a t'ïide k'adda diine ðoŋ unto, wo a ume geŋ yi dabirsa baadaŋ. Maŋ y'a umbe edayí k'awwa, y'a wulle ti dokki Ibirayim wo Lazar a sirpadí.

²⁴Inŋkino y'a idili, y'ede: “Ibirayim mee'ki nuŋ, k'iso adde koðuwo a nuŋ, k'agibi Lazar yi d'oŋko ahu a biza y'ìlsadí, y'o di zozza a bizó, ilzó a t'orsa kono ni dabirsa baadaŋ adda k'uwwó ette.”

²⁵Wo Ibirayim yi di ruute, y'ede: “Ulo ki nuŋ, ki suune aame kee adda duniya lekkiyadá ki tuuze tuuziyo, wo Lazar y'uune dabar baadaŋ. Wo aŋkeŋ Raa yi ti y' zille a eŋŋo me, wo kee ki-t'ïide adda dabar baadi.

²⁶Wo soŋ i d'ede oldé sohuru wo goole aa bulðume a diine kune ti kaye me. Inŋkino maŋ ðoŋ i dehu ette t'eŋŋo k'ume kune, an k'aane ye, wo ðoŋ t'ume kune an dehu an d'etto k'ume kaye, an k'aane ye.”

²⁷Wede laale y'a ruute, y'ede: “Inŋkino maŋ mee'ki nuŋ, ki wollo sommagó k'agiba Lazar ki boy meegó,

²⁸kono oo d'ede zemba paat, y'a ette y'an di tookey kuudaŋ, kono kane toŋ an ki d'etto k'ume dabar eŋŋo ye.”

²⁹Ibirayim yi di ruute, y'ede: “Zembadá an d'ede mattup k'oogoro Muusa ti ðoŋ ki nebiyagi, onamaŋ an'n olligey.”

³⁰Wede laale yi di ruute, y'ede: “Geŋ i k'ïide ye Ibirayim mee'ki nuŋ, wo aame wede ti diine ðoŋ unto y'iida y'an uuney maŋ, aame geŋ an di-kimey lekkiyadaŋ.”

³¹Wo Ibirayim yi di ruute, y'ede: “Aame mattup k'oogoro Muusa ti ðoŋ ki nebiyagi, onamaŋ an ki dihe an k'olliga ye maŋ, ki kotto kane an k'ambe ye aame wede ti diine ðoŋ unto y'a balde y'a ette toŋ maŋ.”»

Lik 17

Urzi k'oldíko ti tambobino

(Matiye 18.6-7; Markus

9.42)

¹Isa y'an di ruute a sanalliyagí, y'ede: «Derec, kane sulfi daayum ede don i t'eliyo duwo adda k'oldiko me, wo de dabar a yode wede i t'eliyo bakadí adda k'oldiko.

²A wede injino geɗ, dabar ere an i di kette assa meeda a golladí an ti y' sedde adda bar gette, soodo sey ti ere yi t'ooney a daana Raa te, aame yi t'eliyo adda k'oldiko wede soo ti diine kane don tasse a urzi zaapu k'adde a nuuno maɗ.

³Kun kooná mentikagi! Aame leemadá yi t'iza oldiko a kee maɗ, k'odo ki y'oonoy, ki rootoy munda wede y'a ize geɗ ti golla ere tasse, wo aame yi-k'illigey oldikadí yi ti zuuney yi-gimey lekkiyadí maɗ, k'ooyo ki t'iso tambobino te.

⁴Wo aame leemadá yi t'iza oldiko a kee wo saɗ y'a iido ki tuddá, y'a t'eese: "Leema ki nuɗ, nuɗ oldikadó ni ti zuune n'a-kime lekkiyadó", injino injino adda k'onnu taɗ sarat toɗ maɗ, k'ooyo ki t'iso tambobino te.»

Zaapu k'adde a Isa

⁵Don zina Galmeega an i di ruute, an'de: «Zaapu k'addey a kee baata, k'ayni noogi t'a t'ihira.»

⁶Galmeega y'a ruute, y'ede: «Ki kotto, aame kune zaapu k'addugun a nuɗ t'aase neɗko aa ulo k'undumu sundí mutard toɗ maɗ, kun aane kun i di roote a undumu eɗ, kun t'eese: "T'umayá eɗ ki-d'eeto ki koonoy adda bar", ki kotto y'a olliga onamgun, y'a-d'eete.»

Naabo ere in d'ise

⁷«Kun ollo, aakede wede soo ti diinagun i-d'ede wede naabo yi derku ise y'elso moode koo maɗ. Aame yi wulle wede naabo y'aahiya ti doome maɗ, ki kotto yi-ki roote ye: "Kesiko k'okki ki-kooná ombo me.»

⁸Ki too maɗ yi di roote, y'a t'eese: "K'o isi ombo, wo kallagá k'a booyo ki-t'ossi don ti doolo, ombo k'o d'eli, k'o d'eeli sofo koore ni t'iima wo n'aa t'iiba maɗ. Saɗ a kaabadá kee k'a ooma wo k'a siba kollo.»

⁹Wede geɗ yi roota dey koduwo a wede naabadí, a naabo ere yi ruute y'aase, yi t'ize gette? Aha, yi-ki roota ye koduwo me.

¹⁰Geɗ ki kune toɗ injino: Aame naabagun ere an un ruute kun ti t'ize pay maɗ, kun rooto kun'de: "Kaye don naabo ay k'ede urzi duwo an ay ki roote koduwo ye, ay ize munda wede an ay ruute ay d'ise danɗal.»

Eliyo beeko a don bitide kane koomat

¹¹Aame Isa yo a urzi y'ette ki Zeruzalem geɗ, y'a ude ti diine siido Samari kane ti Galile.

12A ettiyadi k'adda k'ille soo injkino gette, don bitide koomat an t'iide an a di y' t'ikkimo. Kane an t'hirte ti dokki

13wo an d'iise dollite, an'de: «Isa, kee wede dooyisadey, k'iso adde koduwo a kaye.»

14Isa y'anni wulle wo y'an di ruute, y'ede: «Kun'do, tuddugun kun an ti kazoy a don sedeke.» Aame an'te k'ume don sedeke botto gen, a urzi bitidayan a nukkiide an t'ize kamilen.

15Wede soo ti diinayan yi wulle y'uune bee man, y'a-gime k'ume k'Isa, yi-tamma Raa ti golla awwa.

16Y'iide'n y'a dikke a zon k'Isa, y'a t'uttile zumayi a siido, wo y'a ruute koduwo a Isa. Wo yo wede gen Samariten.

17Inkino Isa y'a ruute, y'ede: «Kane koomat gen an ki t'ize kamilen ye ko? Wo kane don gessat uune bee too me?

18Wenda a elke y'a-kimo y'a t'imme Raa umbo daa ki torgusu enno ye man?»

19Man Isa yi di ruute, y'ede: «Ki t'oozo, k'engilo. Kono kee ki ziipe adda a nun gen, k'utte.»

Aaniya ki Moziko Raa

20Onniyo soo kane Pariziyen an di tunde Isa, an'de: «Woogo Moziko Raa t'aana me?» Yon y'an di'n gime onaman, y'ede: «Aaniya Moziko Raa, tod'te urzi wede aa munda kun gi di wolla t'ersagun ye.

21Duwo an ki roota ye: “Kun wollo tod'te a enno!”, ise “Tod'te a ummey me!” Derec kun suuno, Moziko Raa tod'te a diinagun.»

22Inkino man Isa y'an di ruute a sanaliyagi, y'ede: «San onniyo t'aana ere kun di deha kun ti n' wolle onniyo soo ton man, nun wede an n'ehe aa ulo wede en me, wo umbo kun ki n' wolla ye.

23Aame gen duwo an un di roota, an t'eesa: “Kun wollo yon a enno!”, ise “Yon a ummey!” Wo kune kun'ta ye, kun t'okkita ye.

24Wo aa kun wolliyo mizzi y'omile bididi i-ti tooriyo kandaane pay gen, onniyo ki nun wede an n'ehe aa ulo wede enno ton, t'aasa injkino kay.

25Wo de ki poone i dehu n'a dabire baadan wo don ankenno en an di n' kiigira.

26Munda wede ize ti kaaga a ozzinagi don ki Nowe gen, a onniytagi don ki nun wede an n'ehe aa ulo wede enno ton, aasa injkino kay.

²⁷Duwo an d'ombo, an sobo, an sedfu ti tuddaṅ bini onniyo ere Nowe yi-t'iide adda tooko ere meeda a jiire. Maṅ mizzi goole y'a guppe, ahu an t'iimi siido, iṅkino duwo geṅ pay an t'inda adda k'ahu.

²⁸Wo soṅ munda wede ize a ozzinagi Lot geṅ a aana iṅkino kay: duwo geṅ an d'ombo, an sobo, an d'owilte, an t'owilte, an d'aatiya wo an d'ossige boydi.

²⁹Wo a onniyo ere Lot yi t'udde ti geeger Sodom maṅ, Raa ti kandaane y'a guppe ubali k'uwwu ti moonu ki suupire, an t'iide duwo pay.

³⁰Geṅ aasa iṅkino kay a onniyo ere nuṅ wede an n'ehe aa ulu wede eṅ, ni kiza tuddó geṅ me.

³¹A onniyo gette, wede y'a ti gili yi-guune t'ekki daṅgayadí wo suldízi yi iili adda maṅ, yi-deego sokiyo ye, yi t'ombo. Iṅkino kay wede yoṅ adda doome maṅ, yi kima ki boozí ye.

³²Kun elko a taaya k'ere Lot.

³³Wede yi diha boohiyo tuddí k'aggadí maṅ, y'a ti dagga, wo wede y'iila tuddí kono nuuno maṅ, y'a t'utta.

³⁴Kun ollo, n'un di rooto, a diddo gettiyo batum doṅ sire an moone oṅgalzaṅ soo, wede soo an di y'amba wo wede soṅ an di y'oola.

³⁵Erayi sire an massu kaṅ soo, ere soo an ti t'amba wo ere soo an di t'oola.

³⁶Kuuli sire kane adda doome soo, wede soo an di y'amba wo wede soṅ an di y'oola.»

³⁷Iṅkino maṅ kane sanalliyagi an di y' tunde, an'de: «Galmeegey, a ume too me aasa me?» Wo yoṅ y'an di ruute, y'ede: «A ume wede nuune yi t'udiga geṅ, zumbi toṅ ti t'ogiya aṅgeṅno.»

Lik 18

Ono ombide a tukki mandaayawa ti wede booro

¹Isa yi dehu y'an di kize a sanalliyagi kono an di tonde Raa daayum an ki t'orme ye. Iṅkino y'an di rootiyo t'urzi k'ono ombide eṅno,

²y'ede: «Adda geeger soo i d'ede wede dekkiyo booro, yoṅ yi k'orgiso a Raa ye wo yi k'ottilso a wenda ye.

³Wo adda geeger gette i d'ede mandaayawa soo iṅkino, ti d'ettiyo daayum ki tukki yode geṅ me, ti d'eesiyo: “Kee k'ay t'isi booradey ti wede k'olmidayó me.”

⁴Iṅkino aaze onniytagi baadaṅ wede geṅ yi ki dehu yi-k'ise booratú ye. Wo saṅ y'a ruute adda k'addí, y'ede: “Derec, nuṅ a Raa ni-k'orgiso ye, wo a wenda soo toṅ ni-k'ottilso ye.

⁵Wo to mandaayawa ette nuɗ ti ti n'ormiyo, iŋkino booratú ni di t'ise, para maɗ ti koddime baadaɗ t'o ti kossa eedó.»»

⁶Saɗ Galmeeɗa y'a ruute sey, y'ede: «Kun ollo koduwo ono ki wede dekkiyo booro wede ki diine ye yi rootiyo.

⁷Wo yo Raa booro ki doɗ yi biire, yi ki ti dekke ye ko aame kane an i m̄olo oɗɗu wo diddo maɗ? Ki noogiyadaɗ y'a-t'ôsse ko?

⁸Kun ollo, n'un di rooto, kesiko booradaɗ y'an ti-dekke. Wo nuɗ wede an n'ehe aa ulo wede eɗ, aame ni-kimo geɗ, n'iido duwo ni-t'oonaa deɗ ko doɗ i ziipe addaɗ a nuɗ a siido me?»

Pariziyen ti wede seddu jibaaye

⁹I d'ede duwo oɗoɗ an elkiyo kane doɗ ki diine a daana Raa, wo an di koogire doɗ oɗoɗ pay. Inkino maɗ Isa yi rootiyo ono ombide sey a tukki kane geɗɗo, y'ede:

¹⁰«I d'ede doɗ sire iŋkino an t'iide tonɗiyo Raa k'adda booro Boy Raa. Kane geɗ wede soɗ Pariziyen, soɗ wede seddu jibaaye.

¹¹Yo Pariziyen geɗ y'a t'ihira yi tonɗiyo Raa t'adda k'addi, y'ede: “Eyye Raa ki nuɗ, n'a di roote koduwo kono nuɗ aa doɗ oɗo ye, kane doɗ k'oogire, doɗ ki diine ye, doɗ i moonite t'erayi ise ti kuuli k'eebaɗ, wo soɗ nuɗ aa wede seddu jibaaye eɗɗo ye.

¹²Adda suuk ni lekkiyo onniyo sire daa k'ombo, ni d'eliyo zakka a Raa ki sulɗizó doɗ pay n'ooniyo me.”

¹³Yo wede seddu jibaaye'ɗ y'a t'ihira dokki, edayi k'awwa ki kandaane toɗ yi ki dehu yi k'ambe ye, wo y'a-t'ibi beydi a giggeri, y'a ruute, y'ede: “Eyye Raa ki nuɗ, ki wollo sommagi ki nuɗ wede k'oldiko eɗɗo.”»

¹⁴Isa y'a ruute sey, y'ede: «Kun ollo, n'un di rooto, yo wede seddu jibaaye'ɗ y'a aahe ki boozí, Raa y'a yi wulle yoɗ ki diine, wo ki bakadi Raa y'a yi wulle yoɗ ki diine ye. Derec, wede tuuku tuddi yi ti-koliyo maɗ, Raa y'a y'isa neɗku, wo de wede tuddi yi ti-t'isiyo neɗko maɗ, Raa y'a y'isa goole.»

Isa ti inɗi sunɗi

(Matiye 19.13-15; Markus 10.13-16)

¹⁵Duwo an di ziko inɗi sunɗi a Isa kono y'an di zaape beezí a eedaɗ. Kane sanalliyagi an wulle iŋkino maɗ, an ki dehu ye, an di'n eddisito duwo geɗ me.

¹⁶Wo de Isa y'a ele urzi kono inɗi an i-d'ette sirpadi, wo y'a ruute, y'ede: «Kun oolo inɗi eɗ an d'etto ki tuddó, kun ti'n eegire ye, kono Moziko Raa tod'te ki doɗ i deeyiso aa kane kino.

17Derec in̄kino wo n'un di rooto: Wede tuuku Moziko Raa yi ki ti seedu aa yi seedu ulo n̄en̄ku ye maŋ, yi ki t'etta ye.»

Isa ti wede laale

(Matiye 19.16-30; Markus 10.17-31)

18I d'ede wede in̄kino i-d'ede gooliko y'a tunde Isa, y'ede: «Wede dooyisadey kee wede beehiye, n'aase moo me kono n'a t'oonaa lekkiyo ere ki daayum te?»

19Isa yi di ruute, y'ede: «Ki moo me ki rootiyo nuŋ wede beehiye me? Beehiye Raa soo ɗaŋŋal, wenda ti doolo umbo.

20Kee urziyagi k'oogoro ki'ni suune ɗoŋ an'de: Ki moone t'ere bakadá ise ti kule bakatú ulu, ki t'owwo wedusu mirsi ulu, k'oogire ulu, ki rootiyo k'ono butte a tukki bakadá a ɗaana booro ulu, wo ki elo suma a meegá ti meedá.»

21Wede geŋ yi di'n gime onamí, y'ede: «Kane geŋ pay ni'ni seedu t'ume nuŋ obulso to.»

22Aame Isa y'illiga in̄kino maŋ yi di ruute, y'ede: «Kee a ki biite munda soo sey: sulɗi ɗoŋ a-d'ede'ŋ ki t'owiltoy pay wo soŋko k'an d'eloy a ɗoŋ an k'ede munda ye, in̄kino k'a t'ooney laale wede ki kotto a kandaane. Saŋ k'a t'edi wo k'a ni daana.»

23Aame wede geŋ y'illiga in̄kino maŋ, y'a t'ize sommagi dondoŋ kono yoŋ laalayí baadaŋ.

24Isa yi wulle wede geŋ yi t'ize sommagi dondoŋ maŋ, y'a ruute, y'ede: «Ki kotto ooŋe baadaŋ a ɗoŋ maala an t'ettye adda Moziko Raa te!

25Derec kun suune, ooŋe a ziŋzo ti-t'adde ti bulɗo rippile me, wo geŋ ooŋe baadaŋ a ceere sey a wede laale yi-t'ettye a Moziko Raa te.»

26Kane ɗoŋ i y'ollige an di ruute, an'de: «In̄kino maŋ, geŋ a utta wee wee?»

27Yo Isa y'an di'n gime onamaŋ, y'ede: «Munda wede ɗuwo an k'aane ye geŋ, a Raa i-k'ooŋe ye, y'aane.»

28Maŋ Piyer y'a ruute, y'ede: «Aŋken̄ k'ollo, kaye'ŋ sulɗizey pay ay d'iilo wo ay di daaniya kee.»

29Isa y'an di ruute, y'ede: «Derec in̄kino wo n'un di rooto: Wede tuuku yi iila boozí, ise eddí, zembadí kuuli, maawí wo in̄nizí kono Moziko Raa maŋ,

30a lekkiyo ere aŋken̄no ette kane geŋ y'anni t'oonaa baadaŋ a ceera, wo saŋ maŋ adda duniya ere ki ɗaana y'a t'ooney lekkiyo ere ki daayum.»

Ono k'Isa ɗoŋ k'aduwe a urzi k'untadí ti baldiyadí

(Matiye 20.17-19; Markus 10.32-34)

³¹Isa y'a ti'n wiike sanalliyagi kane koomat makumu sire ki sirpadí, wo y'an di ruute, y'ede: «Kun ollo, in ti kili ki Zeruzalem wo a ummey suldí pay don nebiyagi an riije a tukki nuñ wede an n'ehe aa ulo wede en, a-t'ettey baa.

³²Inkino mañ nuñ duwo an di n' t'eley a bey don kane Yawudiyagi ye, an di n' t'okkey maade, an di n' kilditey wo an pidfitey lee a tuddó.

³³An di n' gorpipay ti marpa, sañ an aa di n' t'idey, wo onniyo sire k'aduwe mañ, Raa y'a ti n' baldhey.»

³⁴Wo kane sanalliyagi munda soo toñ an ki zuune ye, ita k'ono gette an t'ize ombide, wo an ki zuune ye munda wede Isa yi rootiyo me.

Eliyo beeko a wede koosiyo a Zeriko

(Matiye 20.29-34; Markus 10.46-52)

³⁵Onniyo soo Isa y'iiney goppon ki geeger Zeriko mañ, i d'ede wedusu koosiyo yi guune a biza k'urzi wo yi d'ahultu.

³⁶Wede geñ y'illiga tarkuuse ki don duuru engile genno mañ, y'anni tunde, y'ede: «De tarkuuse ki moo me?»

³⁷Kane an i di ruute, an'de: «Geñ Isa wede ti geeger Nazaret engile me.»

³⁸Mañ y'a iise d'olle, y'ede: «Isa kee Wede ti biza bumbu Dawut, k'iso adde koduwo a nuñ!»

³⁹Kane don i sooru ki daana an di y'eddisito kono y'a anniga, wo de yon y'a d'olle i ceeriyo ki ceeriyo, yi d'eesiyo: «Kee Wede ti biza bumbu Dawut, k'iso adde koduwo a nuñ, k'iso adde koduwo a nuñ!»

⁴⁰Isa y'a t'ihira, wo y'an di ruute, y'ede: «Wede geñ kun oo ti y'arkidi.» Wo aame an i-ti y'irkido mañ, Isa y'a yi tunde, y'ede:

⁴¹«Kee ki dehu n'a-d'ise moo me?» Wede geñ yi di'n gime onamí, y'ede: «Galmeegey, ni dehu edayó a-t'ihina.»

⁴²Mañ Isa yi di ruute, y'ede: «Edayá a-t'ohon k'a wollo! Kono kee ki ziipe addá a nuuno geñ, k'utte.»

⁴³A kaamiki edayá a t'ihina, mañ y'a diine Isa, yi tamma Raa. Kane don duuru pay an wulle inkino mañ, an tamma Raa kay.

Lik 19

Isa ti Zaase

¹Isa yi t'iide adda geeger Zeriko, wo yi-doopida y'engile ki daana.

- ²Maɲ a ume geɲ i d'iido wedusu sundí Zaase, yoɲ goole doɲ seddu jibaaye wo yoɲ ki laale.
- ³Yi dehu tu urzi y'a ti y' wolle yo Isa miɲ wee wee, wo urzi y'a ti y' wolle umbo kono duwo baadaɲ an i-t'iigire, yoɲ kupili.
- ⁴Iɲkino maɲ y'a ukke ki daana, y'iide'ɲ y'a di gili ekk'undumu aa moote, kono Isa y'adfa tiɲ geɲɲo, y'a ti y' wolla.
- ⁵Aame Isa y'iiney a ume k'undumu geɲɲo maɲ, y'a umbe edayí k'awwa wo yi di ruute, y'ede: «Zaase, kesiko ki-deegi, aɲki eɲ i dehu n'a-deegey a di kee.»
- ⁶Kesiko t'ekk'undumu Zaase yi-ti diigo, an d'aahe boozí wo y'a yi ziida Isa t'ulbe uɲse.
- ⁷Aame duwo an wulle iɲkino maɲ, kane pay an d'orbite sunni sunni ti tuddaɲ, an'de: «Kun wollo wede eɲ, y'a diige a di wede k'oldiko!»
- ⁸Wo Zaase y'a d'iide k'ume Galmeega, yi di ruute, y'ede: «Kee k'ollo Galme'e'ki nuɲ, laalayó n'a-dookida omagi sire, ume soo n'an di-dokkida ki waawiye a doɲ an k'ede munda ye. Wo aame ni-t'umbe soɲko ki wenda daa k'urzutu toɲ, ni-di t'ela t'a aagila taɲ pide.»
- ⁹Iɲkino maɲ Isa y'a ruute a tukki Zaase, y'ede: «Aɲki eɲ doɲ boy Zaase an uune uttiyo ere ki kotto, kono yode Zaase toɲ ti biza bumbu k'Ibirayim.
- ¹⁰Derec, nuɲ wede an n'ehe aa ulo wede eɲ, n'iido'ɲ dehu tu ki doɲ i digge adda k'oldikadaɲ wo n'an t'ele uttiyo.»

Ono ombide a tukki doɲ naabo ado

(Matiye 25.14-30)

- ¹¹A kane doɲ illiga ono geɲ, Isa y'an di ruute ono ombide sey kono y'iina goppon ti Zeruzalem, wo toɲ kane an elkiyo Moziko Raa t'aana an di wolla a kaamiki geɲɲo.
- ¹²Iɲkino maɲ y'a ruute, y'ede: «I d'ede wedusu iɲkino ti biza bumbu wede goole, y'a iɲgile ki siido dokki ombo moziko, saɲ y'a-kimo.
- ¹³Ki poone y'a eɲgile geɲ, yi wiike doɲ koomat ti diine doɲ naabadí, wo y'an d'eele a wede soɲ tamma soo soo ki dap ere zooyatú ooɲe, wo y'an di ruute, y'ede: “Kun di naabo eego, t'aa d'aagal bini kamadó.”
- ¹⁴Wo kane doɲ siidadí an y'olmide, iɲkino an d'igibe duwo k'itadí kono an di rootey, an t'eesey: “Kaye wede eɲ ay ki dehu y'a k'ise mozigayey ye.”
- ¹⁵Wo aame wede geɲ yi t'iimo moziko yi-gimo maɲ, y'anni wiike kane doɲ naabadí doɲ y'an dikki soɲko gette, kono y'a-wolle naabadaɲ an aa uune t'eego moo me.

16Wede ki poone y'a iina wo y'a ruute, y'ede: "Galmee'ki nuṅ, ti tamma ere k'o ele gette, n'aa d'uune a ñide tamma koomat ki dap."

17Mozigo yi di ruute, y'ede: "Geṅ koduwo kee wede naabo beehiye, kee a naabo ere boolon gettiṅ k'a ti ziiḍa zakidi, ankeṅ n'a-ki ti zaapo wede goole t'ekki geegiryagi koomat."

18Wede ki sirwe y'a iina wo y'a ruute, y'ede: "Galmee'ki nuṅ, ti tamma ere k'o ele gette, n'aa d'uune a ñide tamma paat ki dap."

19A yode geṅṅo toṅ mozigo yi di ruute, y'ede: "Kee n'a-ki ti zaapo wede goole t'ekki geegiryagi paat."

20Wede ti doolo y'a iina, y'a ruute, y'ede: "Galmee'ki nuṅ, ettiyo tammadá ki dap te, nuṅ n'a-gitte a buude, n'a ziipe a teddise."

21N'a orgiso kono kee wehini a naabo me, ki-t'ambu munda wede i ki ziipe kee ye, wo ki d'aydu a ume wede ki ki giira ye toṅ maṅ."

22Maṅ mozigo yi di ruute, y'ede: "Kee wede naabo ulsu, n'a dekke booro a eedá ti ono doṅ uḍde ti bizá geṅ me. Ki suune nuṅ wehini a naabo me, munda wede i ki ziipe nuuno ye toṅ ni-t'ambu, wo ni d'aydu a ume wede ni ki giira ye maṅ."

23Inkino ki moo me soṅkadó k'o gi di ziipe adda baṅki ye me, t'o d'aagila, a kamadó geṅ n'iido n'a-t'ambe ti jugulu."

24Maṅ y'an di ruute a kane doṅ a sirpadí geṅ, y'ede: "Tammadí ki dap te kun ti soodo, kun i elo a wede i-d'ede tamma koomat."

25Maṅ kane an di ruute, an'de: "Galmeegey, yoṅ i-d'ede baa tamma ki dap koomat te."

26Yoṅ y'a ruute, y'ede: "Kun ollo, n'un di rooto, a wede i-d'ede geṅ, an i-t'eela t'eego, wo de a wede i-k'ede ye geṅ, mundazí wede boolon y'elkiyo yi t'oono toṅ an i-t'amba."

27Wo doṅ kane adu ti nuṅ, an ki dihe n'a k'ise mozigayan ye geṅ, kun ti'n waaki keṅṅo kun ti'n t'ida a daanadó."»

Isa y'aa t'ette ki Zeruzalem

(Matiye 21.1-11,15-17; Markus 11.1-10; Zaṅ 12.12-16)

28Aame Isa y'a ti ruute inkino maṅ, y'an t'uugume a doṅ duuru kono y'a-kili ki Zeruzalem.

29Isa y'iiney goppon t'illiyagi sundaṅ Betpaze wo Betani, a sirpa makkolo ere an ti waaku makkolo k'Inda k'Olibiye. A ume geṅ yi d'igibe doṅ sire ti diine sanalliyagí,

³⁰wo y'an di ruute, y'ede: «Kun'do k'adda k'ille ere a daanagun gettiyo. Kun iiney, aame geɗ kun t'ooney ulo buuru kettiyo, wenda kaɗ soo toɗ yi ki gili ye. Kun t'eezi, kun o-t'arkidi.»

³¹Wo aame wenda y'unni tunday, y'iisey: “Kun ti y'eeziyo moo me?” maɗ, kun d'eesoy: “Buuru eɗ i dehu Galmeega.”»

³²Kane doɗ y'an agisa'ɗ an d'ingile, an iide'ɗ an di'n uuney suldi'ɗ pay aa Isa y'an ruute.

³³Aame an iise eeziyo k'ulo buuru maɗ, kane doɗzi an di ruute, an'de: «De kun t'eeziyo ulo buuru eɗ ki moo me?»

³⁴Kane an an di'n gime onamaɗ, an'de: «Buuru eɗ i dehu Galmeega.»

³⁵Maɗ ulo buuru an i-d'iide a Isa, an a-ti gikkite kallagaɗ doɗ deero a dar k'ulo buuru wo Isa an a-ti y' gili eego.

³⁶A urzi y'ettiyo geɗ, duwo an di gikkite kallagaɗ doɗ deero, yi sooru eego.

³⁷Aame y'iina gopponɗ ti Zeruzalem a ume deegu ti makkolo k'Inda k'Olibiye maɗ, kane sanalliyagi baadaɗ geɗ pay ulbaɗ a uune t'unṣuwo, an d'iise tamma Raa ti golla awwa a suldi k'armika doɗ pay an wullite geɗ me.

³⁸Kane an d'eesiyo: «Beeko Raa ti koonaa a ekki mozigo wede ettiyo ti suma Galmeega Raa! Toose t'a koone a kandaane wo tamma a Raa t'awwa a kandaane!»

³⁹I d'ede Pariziyen miibi ti diine doɗ duuru, an i-di ruute a Isa, an'de: «Wede dooyisadey, sanalliyaga ki'n eddiso, an d'anniga!»

⁴⁰Wo Isa y'an ti'n gime onamaɗ, y'ede: «Kun ollo, n'un di rooto, aame kane an inniga maɗ, moɗgali toɗ an di dillita!»

Môolo k'Isa kono Zeruzalem

⁴¹Aame Isa y'a t'ette ki geeger Zeruzalem wo yi ti wulle maɗ, y'a iise môolo kono tode,

⁴²y'ede: «Wayya, wayya! Kune doɗ ki Zeruzalem, nuɗ ni dihe baadaɗ kune batum, onniyo gette aɗki urzi wede kun di t'oone toose kun yi zuune maɗ! Wo de umbo, aɗkenno edagun Raa y'un t'ippe, urzi toose kun ki y' wolle ye baa.

⁴³Inkino saɗ onniytagi an aana eggun, aame geɗ doɗ k'adugun an kilita siido a-doola geeger gette pay ki deyyisagun, an un ti'n gootika t'ume tuuku toɗ maɗ.

⁴⁴Kane an un ti'n damba kame kamec ti boydugun pay, makkolo soo toɗ t'ekki bakatu an k'oola ye, kono kune onniyo ere Raa y'iido tuddugun, kun ki dihe kun ki di y' suune ye.»

Isa ti doɗ suuk a booro Boy Raa

(Matiye 21.12-13; Markus 11.15-19; Zaŋ 2.13-16)

⁴⁵Saŋ Isa yi-t'iide a booro Boy Raa, wo y'a iise lommite doŋ isiyo suuk.

⁴⁶Y'an di ruute, y'ede: «Kun ollo, ono eŋ an riije ti kaaga adda mattup ki Raa, an'de: "Boozó eŋ y'a koona boy wede ki tondiyo Raa." Wo de kune, kun di y'ize urmi k'ombide doŋ k'oogire!»

⁴⁷Isa geŋ onniyo ti onniyo yi dooyiso duwo a booro Boy Raa. Kane deero doŋ sedeke ti doŋ suuniyo k'oogoro wo ti doŋ deero Yawudiyagi geŋ, an dehuu urzi ki tōwwadí,

⁴⁸wo de urzi an ki y'ooniyo ye, kono kane doŋ pay an ollige baadaŋ dooyisadí gette.

Lik 20

T'urzi k'aaye Isa yi dooyiso me?

(Matiye 21.23-27; Markus 11.27-33)

¹Onniyo soo Isa yi dooyiso duwo wo y'an kazita Rabila Majjaanawa a booro Boy Raa. Maŋ kane deero doŋ sedeke, doŋ suuniyo k'oogoro ti doŋ i dokkiyo Yawudiyagi, an d'iido tuddí

²wo an i di ruute, an'de: «Kee k'ay ki ti rooti doo, k'isiyto suldi eŋ t'urzi k'aaye? Wo urzi eŋ a ele wee wee?»

³Isa y'an di'n gime onamaŋ, y'ede: «Nuŋ toŋ n'un di'n tondo a munda soo. Onamó kun o ti'n kami:

⁴Aame Zaŋ duwo y'anni zuyye batem geŋ, urzi iido ti Raa kunuŋ ti duwo ko?»

⁵Maŋ an d'iise rootiyto ti tuddaŋ, an'de: «Aame kine in ruuta: "Iido'ŋ t'urzi Raa" maŋ, yoŋ y'a roota: "Iŋkino ki moo me kun ki d'umbe a ono Zaŋ ye me?"

⁶Wo aame kine in ruuta: "Iido'ŋ t'urzi duwo" maŋ, doŋ duuru pay an in ti'n kakkita ti moŋgali ki tōwwadiŋ, kono kane an zuune adda k'addaŋ Zaŋ yoŋ nebi.»

⁷Iŋkino maŋ Isa onamí an i-ti'n gime, an'de: «Ay ki suune ye wenda i ele urzi me.»

⁸Maŋ Isa y'an di ruute, y'ede: «Nuŋ toŋ maŋ n'un ki y' roote ye kay, wede o ele urzi ni d'isiyto suldi eŋ me.»

Ono ombide a tukki doŋ naabo doome ulpi

(Matiye 21.33-46; Markus 12.1-12)

⁹Saŋ maŋ Isa y'a iise rootiyo a doŋ duuru t'ono ombide enno, y'ede: «I d'ede wedusu iŋkino yi d'iite doome k'inda sudaŋ biŋ, maŋ doome geŋ y'an d'ele

duwo an di naabe saŋ yoŋ aggadí y'a t'amba. Wo yoŋ tuddí y'a iŋgile torguwo, y'a ki kimo kesiko ye.

10Aame onniyo rakku t'iina maŋ, y'a igibe wede naabadí soo ki tukki doŋ naabo doome geŋŋo, kono an i di t'elo aggadí ere k'iŋŋi biŋ an rikke te. Aame y'iiney maŋ, kane doŋ naabo doome'ŋ wede naabadí an di y' ziida, an di y' gusse, an aa di y'igibe beezí guguba.

11Wede doome'ŋ yi d'igibe wede naabadí ti doolo, wo yode geŋŋo toŋ an di y' ziida, an di y' gusse, an a-ti y' gildite, an aa di y'igibe beezí guguba.

12Wo yi d'igibe wede naabadí k'aduwe sey, yode geŋŋo toŋ an i-t'eelite kundayi, wo t'adda doome an aa di y'ilmi.

13Iŋkino maŋ wede doome k'inda biŋ y'a ruute t'adda k'addí, y'ede: "De n'aase mummino me? N'a t'igiba ulo ki geyyisadó, a yode geŋ koo an i otiley maŋ."

14Wo de aame kane doŋ naabo doome'ŋ ulo an yi wulle maŋ, an d'iise rootiyto ti tuddaŋ, an'de: "Eŋŋo ulo wede doome i oopa me! In y'ôodo kono doome eŋ in d'ooa a kine."

15Maŋ ulo geŋ an di y' ziida, t'adda doome an di y'irkiŋe ki toogo ki paate, wo an di y'iide.» Maŋ Isa y'a ruute, y'ede: «Wo aŋkeŋ wede doome k'inda biŋ y'an d'isa mummino?

16Yoŋ y'a etto, doŋ naabo doome geŋ y'a ti'n t'ida wo doome k'inda biŋ y'an t'ela a doŋ naabo doolo, saŋ aggadí y'a t'amba.» Aame kane duwo an illiga ono geŋŋo maŋ, an di ruute, an'de: «Aha, iŋkino geŋ i k'isa ye!»

17Wo Isa yi di'n wolliso adda k'edayan wo y'an di ruute, y'ede: «I-kaza moo me ono doŋ an riine ti kaaga adda mattup ki Raa, an'de: "Mokkolo ere doŋ k'oozige boy an di zidde mentú gette, tode gettiyo a t'ize mokkolo ere majjaanawa a jiiire k'oozige boy" te?

18Wede tuuku y'a t'iira ekki mokkolo gettiyo maŋ, y'a-damba, wo aame mokkolo gette ti-di t'iira a wenda maŋ, t'a ti y' noguma.»

19Kane deero doŋ sedefe ti doŋ suuniyo k'oogoro, an di zuune kereŋ Isa yi rootiyo ono ombide geŋ ti kane me. Iŋkino maŋ an di dihe an di y' seeda aame geŋŋo batum, wo de an d'urgide a doŋ duuru.

Eliyo jibaaye a mozigo goole ki Romen

(Matiye 22.15-22; Markus 12.13-17)

20Maŋ kane geŋ Isa an di y'iise gerdiyo. Wo an i d'igibe duwo an ti t'ize tuddaŋ aa doŋ ki diine, kane an dehu an di y' seedey t'urzi tondiso, kono aame yi ti ruuta butte maŋ, an t'oono urzi an i-di y' t'ela a bey goole siido.

21 Kane an di y' tunde, an'de: «Wede dooyisadey, ay suune ono don ki rootiyto wo ti dooyisada kane a urzizaŋ, ki'ni wolliyo duwo pay kaŋ soo wo ki dooyiso urzi Raa t'ono don d'erec.

22 Ankeŋ, a urzi k'oogiradiŋ miŋ jibaaye a mozigo goole ki Romeŋ geŋ k'eliyo kunuŋ, k'eliyo ye ko?»

23 Wo Isa metiŋkadaŋ y'a ti zuune, wo y'an di ruute, y'ede:

24 «Kun o k'eeli tamma soo n'a ki wolle do. Undiso ti suma ekki tamma ette k'aaye?» Kane an i di'n gime onamí, an'de: «Ki mozigo goole ki Romeŋ.»

25 Maŋ Isa y'an di ruute, y'ede: «Inkino maŋ munda wede ki mozigo goole ki Romeŋ yoŋ ki yode kun i y'elo, wo munda wede ki Raa yoŋ ki yode kun i y'elo.»

26 A onamí don yi rootiyto a daana duwo geŋ, an ki d'iine seeduzí ye, wo a ono don y'anni gime geŋ kane an zida gigaŋ wo an d'inniga d'eddek.

Baldiya tiŋ ede ko?

(Matiye 22.23-33; Markus 12.18-27)

27 Don miibi ti diine don an'ni waaku sudaŋ Saduseyeŋ, an d'iide sirpa k'Isa. Kun suune kane Saduseyeŋ an rootiyto don i t'inda an ki ti balda ye. Inkino Isa an di y' tunde, an'de:

28 «Wede dooyisadey, Muusa yi riŋe ti kaaga adda mattup k'oogoro munda wede in d'ise me, y'ede: "Aame wede yi zida erewo wo y'a inda daa magiŋe maŋ, mandaayawa gette leemadí y'a ti seeda kono an t'ehe inŋi a suma ki wede inda geŋŋo."»

29 Inkino aakede i d'ede zemba kane sarat. Wede ki poone y'a zida erewo wo y'a inda daa magiŋe.

30 Wede ki sirwe y'a ti zida wo y'a inda daa magiŋe,

31 saŋ wede k'aduwe toŋ inkino. Kane sarat geŋ an di duude pay, wo an t'inda wenda soo toŋ yi k'uune magiŋe ye.

32 K'ita maŋ tode toŋ t'aa d'inda kay.

33 Inkino maŋ a onniyo ere don i t'inda an ti balda geŋ, ti diine kane zemba geŋ erewo gette t'aasa k'aaye, kono kane sarat pay geŋ miŋ kulutu me?»

34 Isa y'an di ruute, y'ede: «Kuuli ti erayi an sedu tudaŋ adda duniya ettiyo.

35 Wo de ki kane don Raa yi'ni wulle an iide ki baldiya ti diine don unto wo an di lekka a duniya ere ki daana gette, kane kuuli ti erayi an ki seeda tudaŋ ye baa.

³⁶Kane geŋ an ki t'inda ye baa, kono an t'ize aa maaleekiyagi. Kane inŋi Raa, kono ti unto an ti bilde.

³⁷Wo a urzi baldiya ki doŋ i t'inda geŋ, Muusa yi ruute kereŋ adda taaya ki beyga k'undumu oggiyo uwwo dala dala gette, aame geŋ y'a yi wiike Galmeega Raa, "Raa k'Ibirayim, k'Isaaka wo ki Yakup."»

³⁸Isa y'a ruute sey, y'ede: «Raa geŋ yoŋ Raa ki doŋ unto ye, yoŋ Raa ki doŋ zeere, kono a yode kane pay geŋ zeere.»

³⁹Doŋ suuniyo k'oogoro miibi ti diinayaŋ an i-di ruute, an'de: «Wede dooyisadey, onamá ki ruute geŋ a urzizaŋ.»

⁴⁰An rootiyo inŋkino kono an urgide, an di y' tondite ti doolo sey me.

Almasi yoŋ ulo k'aaye?

(Matiye 22.41-45; Markus 12.35-37)

⁴¹Isa y'an di ruute, y'ede: «Mummino me duwo an di rootiyo Almasi Raa yi biire, y'addo ti biza bumbu Dawut me?

⁴²Wo yode Dawut batum y'a ruute ti kaaga adda mattup ki Soom, y'ede: "Galmeega Raa yi di ruute a Galmeegó, y'ede: K'edi ki-koonaa a ammidadó kino,

⁴³bini doŋ k'aduzá n'an isa aa munda ki bita ti dandí zoŋdá."

⁴⁴Inŋkino maŋ Dawut yi yi waaku Almasi "Galmeega." De geŋ mummino Almasi y'a addo ti biza bumbu Dawut danŋal me?»

Ondirso a duwo a tukki doŋ suuniyo k'oogoro

(Markus 12.37-40)

⁴⁵Isa y'an di ruute a sanalliyagi a daana doŋ pay i y'ollige, y'ede:

⁴⁶«Kun koonaa mentikagi ti doŋ suuniyo k'oogoro! Kane an geyyiso sooru ti kallagi deero a arga boy, wo a bere doŋ duuru an geyyiso duwo an an di'n t'eesite ti ottilso. Adda boydi doŋ in di dooyiso, an geyyiso an koone a ume wede suma, wo adda tarnaapagi a ume k'ombo toŋ, an geyyiso an koone a ume wede suma pây.

⁴⁷Kane geŋ bey mandaydayi an t'ombo pay, wo soŋ an eesiyo tondiyo Raa maŋ ki noko nokot kono duwo an di'n wolle. Kane geŋ booradaŋ t'a kooney wehini a ceerey.»

Lik 21

Mandaayawa i-k'ede munda ye

(Markus 12.41-44)

¹Saŋ Isa y'a umbe edayi, maŋ yi wolliyo doŋ laale an eliyo soŋkiyagaŋ a Raa, a ume wede an d'eliyo soŋko a booro Boy Raa.

²Wo yi wulle soŋ mandaayawa i-k'ede munda ye, tod' t'ele soŋko sunni sunni sire.

³Maŋ Isa y'a ruute, y'ede: «Derec inŋino wo n'un di rooto: Mandaayawa i-k'ede munda ye ette, tod' t'ele a jiiire ki kane doŋ oŋgo pay.

⁴Derec, kane doŋ laale pay geŋ an ele t'adda soŋko ere an uupe oopiyo, wo de tod'te k'umbatú'ŋ t'a d'ele pay soŋko ere ii guute ki lekkiyatú te.»

Ono doŋ a urzi ruugiyo Boy Raa

(Matiye 24.1-2; Markus 13.1-2)

⁵I d'ede doŋ miibi an di rootiyo a tukki Boy Raa, an'de: «Yo boy eŋ, moŋgalí ti oozigayí wo ti suldí doŋ duwo an i ele a Raa, kane pay majjandani.» Wo Isa y'a ruute, y'ede:

⁶«Boy kun yi wolliyo eŋ, saŋ onniytagi an d'aana makkolo soo toŋ t'ekki bakatú i ki lekka ye, pay a ruuga.»

Onniytagi doŋ etto ki dabar

(Matiye 24.3-8; Markus 13.3-8)

⁷Inŋino maŋ kane an di y' tunde, an'de: «Wede dooyisadey, de suldí geŋ an aana woogo me? Wo moo me munda wede a kiza onniyo kino suldí geŋ an aana me?»

⁸Isa y'an di'n gime onamaŋ, y'ede: «Kun koono mentikagi, kun oola tuddugun a duwo an un ti'n dagga ye. Derec, i d'etto doŋ baadaŋ an t'ambo sundó, wede tuuku toŋ y'a t'eesa: "Nuŋ Almasi Raa yi biire!", wo soŋ "Peedo t'ide!" Kane geŋ kun'ni daana ye.

⁹Kun d'olliga tarkuuse ki arka goppon, wo kun d'olliga rabila k'oozige deyyiso dokki. Aame geŋ kun addira ye. I dehu suldí geŋ an d'aane doo, wo aame geŋ a ki t'isa kaamiki daŋgiya duniya ye botto.»

¹⁰Saŋ y'an di ruute, y'ede: «Doŋ siido soo ti siido soo te an deyya ti tuddaŋ, doŋ mozigo soo ti mozigo soo me an deyya ti tuddaŋ kay.

¹¹I d'isa ŋoŋŋirsito siido ti toogo, wo adda siidiyagi baadaŋ toŋ i d'isa mosogo wo endani dettiso, soŋ i d'isa a kandaane suldí doŋ k'a addira, wo suldí doŋ k'a seeda giggirá i-kaza munda etto.

¹²Wo de ki poone suldí doŋ pay eŋ an d'aana geŋ, kune an un di'n sedfa wo an un di'n dabira. An un di'n t'etta k'ume doŋ booro adda boydi doŋ in di dooyiso, an un ti'n t'ela adda daŋgay, wo an un di'n t'etta daana mozagi wo daana doŋ deero siido kono kun umbe a sundó.

¹³Geŋ un t'isa a kune urzi wede kun di roota a suldí doŋ kun wulle wo kun illiga a tukki nuuno.

¹⁴Kun zaapo addugun a ono ni roota en me: A munda wede kun d'oodiba eggun gen, kun okkima tuddugun ki poone ye.

¹⁵Aame gen nun batum un t'eley ono a ceerey kun di'n rootey ti suuniyo k'ono ere don k'adugun an k'aane an un ki ti'n kiddita ye, an ki rootey ono en butte ye.

¹⁶Kune maawugun, zembagun, taasiyagun wo lanziyagun gen, kane batum unni t'ela bey don deero, wo an ti'n t'ida don baadan ti diinagun me.

¹⁷Kune don duniya pay an un di'n olmidfa kono kun umbe a sundo,

¹⁸wo ililso k'eggun soo ton i ki dagga ye.

¹⁹Kun soodo zakidi bini dangu, injino t'urzi gen kun t'oona lekkiyo ere ki daayum.»

Booro a tukki Zeruzalem

(Matiye 24.15-21; Markus 13.14-19)

²⁰«Aame kun wulla geeger ki Zeruzalem asigiryagi an di ti duula man, kun suuno aame gen onniyatú t'iide, tod'te an di damba kame kamec.

²¹Injino man kane don adda siido Ziide an t'ombo k'ekki mongali, kane don adda geeger Zeruzalem an t'addo, wo kane don a dombi i-duule geeger gette an etta ye k'adda geeger te.

²²Derec, onniytagi gen an koona ki booro Raa, aame gen a aana kono a-t'etta a ono don pay an riije ti kaaga adda mattup ki Raa.

²³A onniytagi gen aasa dabar baadan a kane erayi don mahuwagi ti don innizan an oodiyo! Derec, adda siido gette aasa dabar baadan, wo kulkuwo Raa t'a deega a tukki don siido gettiyo.

²⁴Don ongo an ti'n t'ida ti kasigara, don ongo an ti'n sedda bulagi ki siidiyagi pay adda duniya, wo kane don Yawudiyagi ye, Zeruzalem an d'ony'insa zonnan bini dangu k'onniytagi don Raa y'an dikke.»

Kama ki yo wede an y'ehe aa ulo wede

(Matiye 24.29-31; Markus 13.24-27)

²⁵«Kun ollo, ekki peedo, ekki tere wo ekki moldali ton, i d'isa suldi don a kiza munda. Adda siidiyagi pay duwo an d'addira, an di-t'ela elkiso baadan a tarkuuse wede ki bar wo ti wede ki ahu i kolzite gen me.

²⁶Duwo an di-t'inda k'orgiso ti elkiso a munda wede aana adda siido pay, kono suldi don an d'ede toogo a kandaane, Raa y'a ti'n gozziga.

²⁷Injino man an di n' wolla nun wede an n'ehe aa ulo wede en, n'a aana ekki dondirso ti toogo ere pay wo ti dary'ika ere o d'ede.

28Aame suldi geɗ an iisa ettiyto maɗ, kun t'ôhor kaɗ ôhire, kun t'ambo eggun awwa, kono addiyagun goppon.»

Ono ombide a tukki tormo
(Matiye 24.32-35; Markus 13.28-31)

29Saɗ Isa y'an di ruute ono ombide enno, y'ede: «Kun wollo tormo wo ti inda don ongo pay.

30Aame kun wolliyo inda geɗ puutagizaɗ eesiyo roobiyo maɗ, kune batum kun suune adda k'addugun kizini yon goppon.»

31Geɗ inkiyo kay, kun wulla suldi geɗ an iina maɗ, kun suuno Moziko Raa tod'te goppon.»

32Derec inkiyo wo n'un di rooto: Don ankenno en an ki ti t'inda pay ye, ki poone suldi pay geɗ an d'aana me.

33Kandaane kane ti siido an t'engila, wo kane onamo an ki t'engila ye, an di lekka ki daayum.»

Kooke a urzi metinjo

34«Kun koono mentikagi, peedagun kun ti t'engile a isiyto tarnaapagi, ti sobito wo a elkisito suldi don ki lekkiyo duniya ye. Para maɗ onniyo ere Raa yi deka booro t'aana aame kun ki ti delliyo ye.

35Tod' t'etto aakede lebidó, kono t'a di t'ippa a tukki don adda duniya geɗ pay.

36Kun lekko zeere, kun tondo Raa daa puukiyo. Inkiyo kun t'oono togo kono kun t'alda ti suldi don pay aana k'ita, wo aame nun wede an n'ehe aa ulo wede en n'iina maɗ, n'un di'n t'oono kune kaɗ ôhire a daanadó me.»

37Isa geɗ a onnu yi-t'ettiyo dooyiso duwo k'adda booro Boy Raa, wo a diddo maɗ yi-t'ettiyo yi d'onniyo ekki mokkolo ere an ti waaku mokkolo k'inda k'Olibiye.

38Ti soohe walak maɗ, kane don duuru an t'ettiyo an di y'ooniyo a booro Boy Raa kono an di y'olliga.

Lik 22

Dehutu k'urzi ki towwo k'Isa
(Matiye 26.1-5,14-16; Markus 14.1-2,10-11)

1Tarnaape wede an d'ombo mappa daa k'orme, an yi waaku Pak ki Yawudiyagi geɗ, a guute goppon.»

2Aame geɗ kane deero don sedeke ti don suuniyo k'oogoro an dehutu urzi ki towwo k'Isa, wo an d'orgiso a don duuru me.

Ziidas ti deero don sedeke

³Inkino Meeda siitandani ti-t'iide eedí Ziidas wede an yi waaku sundí soo Iskariyot, yoŋ wede ti diine sanalliyagi kane koomat makumu sire geŋ me.

⁴Yoŋ y'a iide an di ruuto ti deero doŋ sedeke wo ti deero doŋ boohiyo Boy Raa, a urzi wede mummino y'an di y' t'ela Isa a beezaŋ me.

⁵Kane ulbaŋ a t'ize uŋse baadaŋ wo an i di ruute an i-t'eela soŋko.

⁶Aame geŋ Ziidas y'a iyye, maŋ y'a iise dehutu k'urzi wede kaŋ mummino y'an di y' t'ela Isa a beezaŋ wo kane doŋ duuru an ki suuna ye me.

Dehu k'ume k'isiyo k'ombo ere ki Pak

(Matiye 26.17-19; Markus 14.12-16)

⁷Adda tarnaape ki Yawudiyagi wede an d'ombo mappa daa k'orme geŋ, onniyo t'a iina ere an di walduutu inŋi dambami an d'isiyo ombo ere ki Pak ki Yawudiyagi te.

⁸Inkino maŋ Isa y'a igibe Piyer kane ti Zaŋ, wo y'an di ruute, y'ede: «Kun'do kun in isoy ombo tarnaapayiŋ ki Pak kono in d'ooma.»

⁹Maŋ kane an di y' tunde, an'de: «De a too me kee ki dehu ay in d'isey ombe te?»

¹⁰Yoŋ y'an di'n gime onamaŋ, y'ede: «Kun ollo, aame kun aa t'ettey k'adda geeger, kun t'ikkimey ti wedusu yi t'eezo ahu ti diŋgile, kun di y' daanoy bini adda boy wede y'a t'ettey.

¹¹Wo kun t'iidey maŋ, a wede boy kun i di rootoy, kun d'eesoy: “Wede dooyisadey yi ki tondiyo, too te biino ere y'a ooma ombo tarnaapayiŋ ki Pak ti sanalliyagi me?”

¹²Wo yoŋ biino y'un di kizey tod'te dildil t'awwa t'ekki bakatú, suldi pay adda okkime. Geŋ a ume geŋŋo kun d'isoy ombo te.»

¹³Maŋ kane an d'iŋgile, an iide'ŋ suldi an di'n uuney pay aakede Isa y'an ruute, iŋkino ombo tarnaape ki Pak an t'ize.

Isa y'ombo ombo tarnaape ki Pak ti sanalliyagi

(Matiye 26.26-29; Markus 14.22-25; 1 Korent 11.23-26)

¹⁴Aame peedo t'iide maŋ, Isa y'a-guune ombo ti doŋ zindí

¹⁵wo y'an di ruute, y'ede: «Nuŋ ti kaagine ni dihe t'addó pay ombo tarnaapayiŋ ki Pak ette n'a oomi ti kune, ki poone n'a dabira geŋ me.

¹⁶Geŋ kun ollo, n'un di rooto, ombo ette ni k'ooma ye baa, bini urzutú a-t'etta kereŋ a aaniya Moziko Raa.»

¹⁷Inkino maŋ y'a t'umbe kop, y'a ruute koduwo a Raa, maŋ y'ede: «Kun soodó kop eŋ, kun di dokko wede soŋ yi goomo goomo.

18Geɗ kun ollo, n'un di rooto, n'a t'iibe ti aŋki, ki ɗaana ni ki siba ye baa toote k'iɲɲi biɲ me, bini aaniya Moziko Raa.»

19San y'a t'umbe mappa, y'a ruute koɗuwo a Raa kono k'ombo gette, maɲ y'a burke, y'an d'ele sanalliyagi wo y'a ruute, y'ede: «Ette tuddó ere ni t'ela kono kune, kun d'iso iŋkino kono kun d'elka a nuuno.»

20Aame an t'iimi maɲ, ki kop toɲ iŋkino, y'a t'umbe y'an d'ele wo y'a ruute, y'ede: «Kop ti sobo adda ette, tod'te taasawa ere aware Raa yi ketta ti ɗuwo t'urzi puuzadó, to t'oba kono kune.

21Wo kun ollo, wede yi ni t'ela bey ɗoɲ k'olmidayó, yoɲ a eɲɲo, y'ombo ti nuɲ kaɲ soo.

22Derec, nuɲ wede an n'ehe aa ulo wede eɲ n'a t'inda, geɗ a-t'etta a munda wede aa Raa yi dehu, wo ɗe dabar a wede yi ni t'ela bey ɗoɲ k'olmidayó.»

23Iŋkino maɲ an d'iise tondiso ti tuddaɲ, an'de: «De geɗ ti diinayiɲ wee wee aasa munda iŋkino me?»

Wee wee goole a jiire me?

(Matiye 18.1; 20.25-28; Markus 9.34; 10.42-45)

24San maɲ kane sanalliyagi an d'iise niikiyto baadaɲ ti tuddaɲ kono an dehu an di suune, ti diinayaɲ miɲ wee wee goole a jiire me.

25Maɲ Isa y'an di ruute, y'ede: «Kane mozagi siidiyagi pay an d'ombo t'ekki ɗoɲzaɲ ti toogo, wo kane ɗoɲ an d'ede urzi ki dokkiyo ekki ɗoɲzaɲ, an dehu ɗuwo an di'n waake “Doɲ k'isiyo beehiyko.”

26Wo ki kune iŋkino ye. Ki too maɲ wede goole a jiire ti diinaguɲ y'a t'ise aa wede ɲeɲku a jiire, wo wede yi dokkiyo ɗuwo y'a t'ise aa wede naabo a ɗuwo.

27Wo a elkiyaguɲ maɲ, wede goole a jiire wee wee, wede i-guune ombo kunuɲ, wede i naabiya a yode geɲɲo ko? Kun suune, goole wede i-guune ombo. Wo kun wollo, aŋkeɲɲo nuɲ a diinaguɲ eɲ aa wede i naabiya a kune.

28Kune kun ziida daayum zakidi a ita nuɲ adda suldi ɗoɲ ooɲe o iido me.

29Wo Meegó y'o ele Moziko a nuɲ, iŋkino kay nuɲ n'un di-t'ele a kune.

30Iŋkino maɲ kun d'oomey kun di sibey ti nuɲ kaɲ soo adda mozikadó, wo kun di konditey ekki kaakidagi moziko, kun ɗekkey booro a tukki boha bumbiyagi koomat makumu sire ki ɗoɲ k'Izirayel.»

Tookiyo kuude ki Piyer

31Galmeeega y'a ruute, y'ede: «Simo, Simo, kee k'ollo, Meeda siitandani ti tunde urzi ti Raa wo yi-d'ele, kune pay t'un ti'n toɲgile aakede an toɲgilso geme.

³²Wo de nuɲ n'a tunde Raa kono kee, kono zaapu k'addá a nuɲ a ki dagge ye. Wo aame ki-gimo a nuuno maɲ, zembadá k'an eelo toogo.»

³³Maɲ Piyer yi di ruute, y'ede: «Galmee'ki nuɲ, n'iyye n'a t'ette ti kee, ise k'adda dangay, ise n'a t'indey toɲ maɲ.»

³⁴Isa yi di ruute, y'ede: «Piyer k'ollo, n'a di rooto, aɲki a diddo ki poone uzu y'a kookila geɲ, k'a roota ki ki n' suune ye, suune ye taɲ ado.»

Okkime tudde ki sanalliyagi k'Isa

³⁵Maɲ Isa y'an di ruute sey, y'ede: «Aame n'un igibe isiyo naabadó daa soɲko, daa k'eese wo daa tobiyagi geɲ, munda unni biito ko?» Kane an i di'n gime onamí, an'de: «Munda ay ki'n biito ye.»

³⁶Yoɲ y'an di ruute, y'ede: «Wo aɲkenno eɲ wede i-d'ede soɲko maɲ y'a t'ambe, wede i d'ede eese toɲ iɲkino kay, wo wede i-k'ede kasigara ye maɲ, kallayí wede goole y'a t'owol, wo yi d'owili kasigara te.

³⁷Geɲ kun ollo, n'un di rooto, eɲ ono doɲ an riɲe ti kaaga adda mattup ki Raa, an'de: “Yoɲ an aa ti y' gize ti doɲ tôwwo duwo kaɲ soo.” Geɲ iɲkino i dehu o d'aane. Maɲ ono doɲ an riɲe a tukki nuɲ geɲ, a-t'etta.»

³⁸Kane sanalliyagi an di ruute, an'de: «Galmeegey, kasigara ede, sire ettiyo.» Yoɲ y'an di'n gime onamaɲ, y'ede: «Geɲ îide baa.»

Tondiyo Raa ekki makkolo k'Inda k'Olibiye

(Matiye 26.36-41; Markus 14.32-38)

³⁹Maɲ t'adda geeger Isa yi-t'udde, y'a iɲgile k'ekki makkolo k'Inda k'Olibiye aa yi d'isiyo daayum, wo kane sanalliyagi an di y' diine.

⁴⁰Aame y'iiney a ume geɲno maɲ, yoɲ y'an di ruute, y'ede: «Kun tondo Raa kono kun ki t'ooro adda naamiya daggiya ye.»

⁴¹Wo yoɲ y'aa lidde dokki ti tuddaɲ suma wede y'a sedde makkolo, maɲ y'a-dikke wo yi tondiyo Raa, y'ede:

⁴²«Meegó, ki dehu maɲ dabar ette k'o ti ledde ti tuddó me, wo toɲ maɲ a ki t'ise aa nuɲ ni dehu ye, wo a t'ise aa kee ki dehu.»

⁴³Maɲ i d'iido maaleeka ti kandaane yi d'eele toogo a Isa me.

⁴⁴Isa ulbí i-d'oodiyo baadaɲ, maɲ yi tondiyo Raa ti toogo a jiire sey, wo ranɲadí a t'ize aa puuzo i zozziso a siido.

⁴⁵Aame yi-tunde Raa maɲ, y'a t'iiziga y'a-gime ki tukki sanalliyagi, y'an di'n uuney kane an udige kono an t'ize sommagi dondoɲ.

⁴⁶Yoɲ y'an di ruute, y'ede: «Ki moo me kun moone me? Kun t'oozo wo kun tondo Raa, kono kun ki t'ooro adda naamiya daggiya ye.»

Seedu k'Isa ki tōwwadí

(Matiye 26.47-55; Markus 14.43-49)

47Isa onamí y'a ki ti'n dínge ye botto, aame geɗ kane don duuru an t'udfo. Yode wede an yi waaku Ziidas, yoɗ ti diine sanalliyagi kane koomat makumu sire geɗ, y'an t'uugumo a don duuru me. An iiney maɗ, y'a d'iide sirpa k'Isa y'a yi ziida yop kono yi-d'ise puuc a tobbisadí.

48Isa yi di ruute, y'ede: «Ziidas, nuɗ wede an n'ehe aa ulo wede eɗ, k'an di n' t'ele bey don k'olmidayó t'urzi k'isiyo puuc a tobbisadó ko?»

49Aame kane don a ita k'Isa an wulle munda wede isa geɗno maɗ, an di y' tunde, an'de: «Galmeegey, ay ti'n dokko ti kasigara ko?»

50Maɗ wede soo ti diinayan y'a-diikida wede naabo ki mozigo goole don sedefe, kuudí a dikke.

51Wo de Isa y'a ruute, y'ede: «Kun oolo, geɗ iide baa.» Inkinno yo y'aa butte a kuudí wede geɗno wo yi-d'ele bee.

52Inkinno maɗ a kane deero don sedefe, deero don boohiyo Boy Raa wo ti don i dokkiyo Yawudiyagi iido seeduzí, Isa y'an di ruute, y'ede: «De ki moo me kun d'ettiyo tuddó wo tuddugun kun t'ikkimo ti kasigaryagi wo ti dalyagi, aa nuɗ wede k'oogire me?»

53Para maɗ nuɗ miɗ daayum ti kune a booro Boy Raa, wo kun gi di n' ziida ye. Wo de ankenno ette peedagun, peedo ere ki don toogo adda zimolo an d'ise naabadaɗ.»

Piyer y'a kiigira Isa

(Matiye 26.57-58; Markus 14.53-54)

54Maɗ Isa an di y' ziida, an ti y' dukke, an di t'iide k'adda boy ki mozigo goole don sedefe. Wo Piyer yi di'n daaniya ti dokki.

55Duwo an di mudde uwo a diine booro boy, wo Piyer y'a zuɗke yi kookiyo uwo ti kane.

56Aame yi zuɗke yi kookiyo uwo geɗ, i d'ede ere naabo t'a yi wulle, wo ti di y' wolliso tebeɗ adda k'edayí, maɗ t'a ruute, t'ede: «Wede eɗno toɗ yoɗ ti yode kaɗ soo.»

57Wo Piyer y'a yi giigira, yi di ruute, y'ede: «Erewo no, nuɗ ni ki y' suune ye.»

58Taɗ boolon maɗ i d'iido wede ti doolo, y'a yi wulle wo y'a ruute, y'ede: «Derec, kee toɗ wede soo ti diine kane sanalliyagi k'Isa!» Maɗ Piyer yi di'n gime onamí, y'ede: «Ato, nuɗ ti diine kane ye.»

59A likke bini maɗ, i d'iido wede ti doolo yi-kodfime, yi d'eesiyo: «Ki kotto wede eɗ yoɗ ti yode kaɗ soo, kono yoɗ ti siifo Galile.»

⁶⁰Maɗ Piyer yi di'n gime onamí, y'ede: «Aha, munda wede ki rootiyo geɗ a nuuno ye.» Wo a kaamiki aame y'a ti rootiyo botto geɗ, uzu y'a îile.

⁶¹Galmeege y'a gildɛ ki tukki Piyer wo yi di y' woliyo tebeɗ adda k'edayí. Inkiino maɗ Piyer y'a ilke a ono don Galmeege yi-ruute, y'ede: «Anki eɗ ki poone uzu y'a ôola geɗ, k'a roota ki ki n' suune ye, suune ye taɗ aɗo.»

⁶²Maɗ t'adda boy Piyer yi-t'udɛ ti paate wo y'a iise môolo baadaɗ.

Kaldita wo kossiyo k'Isa

(Matiye 26.67-68; Markus 14.65)

⁶³Duwo don i boohiyo Isa an di y'okko maade wo an di y' kossiyo.

⁶⁴Edayí an i-t'ippe wo an di y' tondiso, an'de: «Kee nebi maɗ, ki y'unto wede i ki diiɗe me!»

⁶⁵Wo an i-d'irbita ono baadaɗ ti doolo don ki kaldita.

Isa a daana deero don booro

(Matiye 26.59,63-65; Markus 14.55,61-64)

⁶⁶Aame ume i t'umpile maɗ, kane don i dokkiyo Yawudiyagi, deero don sedɛke ti don suuniyo k'oogoro, an t'ugiye pay an di-t'iide Isa ki daana deero booro Yawudiyagi,

⁶⁷wo an di y' tunde, an'de: «Almasi Raa yi biire, kee ko? K'ay ki ti rooti do.» Yoɗ y'an di'n gime onamaɗ, y'ede: «Aame n'un ruuta maɗ, kun k'amba ye onamó me,

⁶⁸wo aame n'unni tunda toɗ maɗ, onamó kun ki ti'n kima ye.

⁶⁹Wo ti anki eɗ, nuɗ wede an n'ehe aa ulo wede eɗ, n'a-kooney a ammade Raa toogadí t'a jiire pay.»

⁷⁰Kane pay an di ruute, an'de: «Inkiino maɗ kee Ulo Raa ko?» Yoɗ y'an di'n gime onamaɗ, y'ede: «Aa kune batum kun ruute, eɗ miɗ nuuno.»

⁷¹Inkiino maɗ an di ruute, an'de: «In ki dehe wenda ti doolo wede illiga y'in ki roote sey ye baa! Kine in illiga bize yode batum i ruute me.»

Lik 23

Isa a daana Pilat

(Matiye 27.2,11-14; Markus 15.1-5)

¹Maɗ kane don i t'ugiye an t'iiziga pay, an di-t'iide Isa ki daana Pilat, yoɗ Romen goole siido.

²A ume geɗ kane an d'iise sakiysa k'Isa, an'de: «Wede eɗ kaye ay y'uuney don siifadey yi ti'n daggiya, y'an rootiyo jibaaye an ti toogo k'eliyo a mozigo goole

ki Romeŋ me, wo soŋ yi t'ize yode batum Almasi Raa yi biire, yoŋ mozigo Yawudiyagi.»

³Pilat y'a yi tunde, y'ede: «Kee mozigo Yawudiyagi ko?» Isa yi di'n gime onamí, y'ede: «Geŋ aa ki ruute.»

⁴Inkino maŋ Pilat y'an di ruute a kane deero doŋ sedeke ti doŋ duuru, y'ede: «Wede eŋ nuŋ munda k'ulsu a eedí ni k'uune ye, wede i di t'ide booro t'a yi seeda me.»

⁵Wo kane an di kodfime, an'de: «Yoŋ t'urzi dooyisadí doŋ pay y'an t'eliyto ono bini a-t'ooziga deyyiso. Yoŋ y'iiso ti siido Galile, y'a t'úkey siido Ziide pay, wo aŋkeŋ y'aa d'iina a eŋŋo.»

Isa a daana mozigo Erod

⁶Aame Pilat y'illiga ono geŋŋo maŋ, y'a tunde, y'ede: «Wede eŋ yoŋ ti siido Galile ko?»

⁷Wo aame yi zuune Isa yoŋ ti siido ere mozigo Erod Antipas maŋ, Pilat yi di y'igibe a Erod, kono a onniytagi geŋ yode Erod toŋ a Zeruzalem.

⁸Aame Erod yi wulle Isa maŋ, ulbí aaze uŋse baadaŋ, kono yoŋ y'ollige rabiladí ti kaagine wo yi dehu y'a ti y' wolle. Inkino yi zaapu elkisadí yi-d'isa munda k'armika y'a-wolla.

⁹Erod y'a yi tundite taŋ baadaŋ, wo yo Isa yi-k'ohine bizí ye.

¹⁰Kane deero doŋ sedeke, ti doŋ suuniyo k'oogoro, kane a sirpa an di rootiyto ono ti golla zakidí.

¹¹Erod kane ti asigiryagí an di y'okko maade wo an di y'ambutu saa saac. An i-di t'usse kalle majjaane, maŋ yi di y'igibe a Pilat.

¹²Erod ti Pilat geŋ ti poone kane adu, wo ti onniyo gette an t'ize laŋziyagi.

Booro k'Isa ki t'ôwwadí

¹³Inkino maŋ Pilat y'a-tusse kane deero doŋ sedeke, deero Yawudiyagi wo ti doŋ duuru,

¹⁴wo y'an di ruute, y'ede: «Wede eŋ kun oo d'iido'ŋ kun'de, duwo pay yi ti'n daggiya. Inkino ni y' tunde a daanaguŋ a ono doŋ kun rootiyto a tukki yode geŋ me, wo nuŋ munda ulsu a eedí ni k'uune ye a t'ide booro t'a yi seeda me.

¹⁵Erod geŋŋo toŋ munda ulsu yi k'uune ye a eedí me, inkino y'ay ti y' gimo. Kono k'inkino, wede eŋ munda ulsu yi k'ize ye wede a t'ide k'unto me.

¹⁶Inkino maŋ n'an t'ela urzi a asigiryagó an ti y' gorpipa ti marpa doo miŋ, saŋ an i-d'eeza kollo.»

17Yi ruute inĵino kono aa an d'isiyo daayum a tarnaape Pak ki Yawudiyagi, i dehu Pilat y'an d'adde wedusu soo t'adda dangay.

18Wo pay kaŋ soo an d'iise dollite, an'de: «Wede geŋ ki y'ôodo! K'ay t'addi Barabas!»

19Yo Barabas geŋ an yi ziida dangay kono yoŋ wede an t'eelite ono a duwo an d'iiziga deyyiso adda geeger ki tukki Romeŋ, wo soŋ y'iide wedusu.

20Pilat y'an d'iise rootiyo sey a doŋ duuru kono yi dehu Isa yi-d'eeze.

21Wo kane an di dollite, an d'eesiyo: «Ki ti y' taako ekk'undumu wede zaapu t'ekki bakadí kaŋ tontilko! Ki ti y' taako ekk'undumu wede zaapu t'ekki bakadí kaŋ tontilko!»

22Maŋ Pilat y'an di ruute k'aduwe, y'ede: «Wede eŋ munda ulsu miŋ y'ize moo me? Nuŋ maŋ munda ulsu ni k'uune ye a eedí i di t'iide k'unto me. Inĵino n'an t'ela urzi an ti y' gorpipa ti marpa doo miŋ, saŋ an i-d'eeza kollo.»

23Wo kane an di kodfime dollite ti golla awwa, an d'eesiyo: «Isa ki ti y' taako ekk'undumu wede zaapu t'ekki bakadí kaŋ tontilko!» Maŋ Pilat i-di t'iide a dollitadaŋ gette.

24Inĵino yoŋ booro y'an ti-dikke a munda wede Yawudiyagi an tondiyo me.

25Barabas wede kane an dehu geŋ, Pilat y'a y'udde, yode wede an ti y'ele adda dangay kono y'an t'eelite ono a duwo an d'iiziga deyyiso ki tukki Romeŋ, soŋ y'iide wedusu geŋ me. Wo yo Isa y'an di y'ele a bey k'asigiryagi, an d'ise munda wede kane Yawudiyagi an dehu.

Taakiya k'Isa ekk'undumu

(Matiye 27.32; Markus 15.21)

26Maŋ Isa an di-t'ette k'ume taakiyadí. A urzi an a-t'ikkima ti wede soo inĵino yoŋ ti geeger Sireŋ, sundí Simo, y'aahiya doome. Kane asigiryagi an di y' ziida, an i-d'ele undumu wede zaapu t'ekki bakadí kaŋ tontilko, y'a t'umbe a dannayí wo yi daaniya Isa.

27Doŋ duuru baadaŋ ki siido gette an di y' daaniya, ti diinayaŋ erayi an a-t'ibi beydaŋ a giggiraŋ wo an di dollite molo kono k'Isa.

28Maŋ Isa y'a gilde k'ume k'erayi geŋno wo y'an di ruute, y'ede: «Kune erayi Zeruzalem no, kun ôole ye kono nuŋ me, ki too maŋ kun ôolo'ŋ ki kune wo ki inŋigun.

29Derec, onniytagi saŋ maŋ an d'aana, aame geŋ an di roota: “Uŋsuwo a kane erayi doŋ kartiyagi, a kane doŋ an k'ehe ye wo an k'uude inŋi ye botto.”

- 30** Injino maŋ ɗuwo an di roota, an t'eesa: "Moŋgali an ay di ti'n ruugi!" wo soŋ an t'eesa: "Kessagi an ay ti'n ombidi!"
- 31** Aame ɗuwo an o isiyo kino a nuŋ wede aakede undumu zeere eŋ me maŋ, an d'aana moo me a kane ɗoŋ aakede inda ɗoŋ meedi me?»
- 32** An a-dukko a ita k'Isa ɗoŋ sire ti doolo, kane ɗoŋ k'oogire, an ti'n t'ide ti yode kaŋ soo.
- 33** An iiney a ume wede sundí «osse k'eego» maŋ, a ume geŋ Isa asigiryagi an ti y' tiike ekk'undumu wede zaapu t'ekki bakadí kaŋ tontilko. Wo an a-tiike ti yode ɗoŋ k'oogire sire, wede soŋ t'undumzí a kese k'ammidadí wo soŋ t'undumzí a kese geeladí.
- 34** Injino maŋ Isa y'a ruute, y'ede: «Mee'ki nuŋ, k'an t'iso tambobino, kono an ki suune ye munda wede an isiyo geŋ me.» Wo asigiryagi an di dikkida kallagi k'Isa t'urzi k'arbu teltel muntelliyo.
- 35** Kane ɗoŋ duuru an t'ihira aŋgeŋŋo, an di wolleiyo. Kane deero Yawudiyagi an di y'okko maade, an d'eesiyo: «Yoŋ ɗoŋ doolo y'an utte ɗe, aŋkeŋ y'utto tuddí batum, aame yo Almasi Raa yi biire kotto maŋ!»
- 36** Kane asigiryagi toŋ an di y'okko maade, an a d'ettiyo goppon ki sirpadí, an i-d'eliyo toote suddo k'inŋi k'inda biŋ y'a sibe,
- 37** wo an d'eesiyo: «Aame kee mozigo Yawudiyagi kotto maŋ, k'utto tuddá batum!»
- 38** T'ekk'eedí an tiike pakirte wo an a-ti riije, an'de: «Yode eŋ mozigo Yawudiyagi.»
- 39** Ti diine ɗoŋ k'oogire sire an ti'n tiike ekk'inda geŋ, wede soŋ y'a gilɗe Isa, y'ede: «Kee Almasi Raa yi biire kotto maŋ, k'utto tuddá batum wo kaye pây!»
- 40** Wo yo wede soŋ y'a y'idɗise, yi di ruute, y'ede: «Kee a Raa ki-k'orgiso ye, kee wede booro ti ki ziida k'unto ti yode eŋ kaŋ soo.
- 41** Ki kine dabar ette ɗerec, kono in ooniyo munda wede in ize t'urzi naabadiŋ, wo yo wede eŋ munda ulsu yi k'ize ye.»
- 42** Saŋ y'a ruute sey, y'ede: «Isa, k'a n'elko aame ki-kimo ki mozikadá geŋ me.»
- 43** Maŋ Isa yi di'n gime onamí, y'ede: «Derec injino wo n'a di rooto: Aŋki eŋ kee ki-t'etta ti nuŋ adda jenne.»

Unto k'Isa

(Matiye 27.45-56; Markus 15.33-41)

44-45 Aame peedo t'ize diine maṅ, ti ki tooriyo ye, ume a t'ize zimolo dil a likke bini eesiyo peedo lohe. Wo alboy wede i d'ikke adde Boy Raa soṅ k'adda soṅ ki paate, a t'ihina tar a diinayí.

46 Isa y'a idili ti golla awwa, y'ede: «Mee'ki nuṅ, n'a-d'elo undó a beezá.» Aame y'a ti ruute iṅkino maṅ, y'a-t'ihe.

47 Goole k'asigiryagi meeda ki Romenṅ yi wulle munda wede ize me. Maṅ y'a imme Raa wo y'a ruute, y'ede: «Ki kotto wede eṅ yoṅ ki diine.»

48 Kane doṅ duuru pay iide wolleiyo geṅ, aame an wulle munda wede ize maṅ, kane an di-gime, beydaṅ an a-t'ibi g'igiraṅ kono an m'ôolo.

49 Wo kane pay lanziyagi k'Isa ti erayi doṅ i yi diino ti siido Galile, an t'hirte ti dokki an di wolleiyo munda wede isiyo.

Isa adda muuzo

(Matiye 27.57-61; Markus 15.42-47)

50-51 I d'ede wedusu sundí Yusup yoṅ ti geeger ki Yawudiyagi sundutú Arimate. Wede geṅ yoṅ beehiye wo ki diine, yi zaapu elkisadí a ettiyo Moziko Raa. Yoṅ wede ti diine deero booro Yawudiyagi, wo yi k'iyye ye a munda wede doṅ deero booro oṅgo an dihe an d'ise a tukk'Isa, wo soṅ a naabadaṅ ere an ize te.

52 Yo y'a iide y'a uuney Pilat, y'a yi tunde a nuune k'Isa.

53 Pilat yi-d'iyye, maṅ Yusup y'a ti y' d'iige nuune t'ekk'undumu wede zaapu t'ekki bakadí kaṅ tontilko me. Y'a ṅilpe ti sotor tuwarwa zooyatú ooṅe, yi-t'ele adda muuzo, tod'te aa urmi an ittiba m'okkolo, a ume isire wenda kaṅ soo toṅ an k'eele ye.

54 Suldi geṅ ize onniyo jima, duwo an okkime tuddaṅ kono onniyo ere ki puukiyo Yawudiyagi ti t'eesa.

55 Kane erayi doṅ i diino Isa ti siido Galile geṅ, Yusup an di y' diine, an di wullo muuzo wo mummino an ziipe nuune k'Isa me.

56 Saṅ maṅ an di-gime k'adda geeger, an iide'ṅ an d'iwilo egey ti puutagi k'inda doṅ eediyaṅaṅ uṅse, an aa di gilse ki rorriso a nuune k'Isa. A onniyo ere ki puukiyo Yawudiyagi maṅ, an di buuke aakede oogoro ti rootiyo.

Lik 24

Baldiya k'Isa

1 Onniyo dumas ti soohe walak maṅ, erayi an di ziki egey doṅ kalsiya eediyaṅaṅ uṅse a beydaṅ, an d'iṅgile ki biza muuzo.

²An iiney maṅ, an wolleiyo zumbulu wede an a-t'ippe a biza muuzo'ṅ doṅkilso a kese.

³Kane an t'iide k'adda muuzo, wo nuune Galmeega Isa an ki y'uuney ye.

⁴Kane erayi an d'uhibe, a kaamiki a daanadaṅ i d'iido kuuli sire ti kallagi i ralita.

⁵Inkino kane orgiso t'anni ziida, an di nukkite, wo de kuuli doṅ sire geṅ an an di ruute, an'de: «Ki moo me kun wekku wede zeere a diine doṅ unto me?»

⁶Yoṅ umbo a enṅo me, Raa yi ti y' bilde. Kun elko a ono doṅ y'un ruute aame yo botto a siido Galile, y'ede:

⁷“I dehu nuṅ wede an n'ehe aa ulo wede eṅ, an di n' t'ela a bey doṅ k'oldiko, an ti n' taaka ekk'undumu wede zaapu t'ekki bakadi kaṅ tontilko, wo onniyo sire k'aduwe maṅ n'a-balda.”»

⁸Inkino maṅ kane erayi geṅ an di'n ilke ono doṅ Isa y'an ruute geṅ me.

⁹Kane ti biza muuzo an di-gime, wo an iide'ṅ an an t'iide taaya gette pay a kane doṅ koomat makumu soo wo a kane sanalliyagi doṅ oṅgo pay.

¹⁰Kane erayi doṅ iide ki biza muuzo geṅ, Mariyam ere ti siido Magdalla, Zane wo Mariyam ere mekki Zak. Wo erayi doṅ ti doolo doṅ iide ti kane geṅ, taaya gette an an t'iide pay a doṅ zina k'Isa me.

¹¹Wo kane a onamaṅ geṅ an di'n wulle erayi aa doṅ maadagi, onamaṅ an ki d'umbe ye.

¹²Wo toṅ maṅ Piye y'a t'iiziga y'a ukke ki biza muuzo. Y'iiney maṅ, y'a t'uttile yi ṅooniyo k'adda, yi wolleiyo'ṅ sarwilagi daṅṅal, maṅ y'a ziida giggeri a munda wede ize geṅ me, wo y'a-gime ki boozí.

A urzi k'Emayus

¹³A onniyo gettiyo batum i d'ede sanalliyagi sire an ambe k'adda k'ille sundutu Emayus, tod'te suma kubbaara paat ti Zeruzalem me.

¹⁴Kane an di rootiyto tuddaṅ a suldi doṅ pay ize geṅ me.

¹⁵Aame kane an rootiyto wo an niikiyto ti tuddaṅ geṅ, yode Isa batum y'a iide, y'a-ti giyye ti kane an di sooru kaṅ soo.

¹⁶Kane an di y' wolleiyo, wo munda an t'eegirso ki suuniyadi me.

¹⁷Maṅ Isa y'anni tunde, y'ede: «Kune kun di sooru de, kun di niikiyto a tukk'amme?» Inkino maṅ kane an t'ihira, sommagi dondoṅ.

¹⁸Wede soo ti diine kane sire geṅ sundi Kiliyopas, yi di ruute, y'ede: «Kee siida daṅṅal ko, wede i lekkiyo a Zeruzalem wo i ki suune ye munda wede ize adda k'onniytagi doṅ k'ita eṅ me?»

19Yoŋ y’anni tunde, y’ede: «De ize moo me?» Kane an i di’n gime onamí, an’de: «Munḁa wede i-iina a tukk’Isa wede ti geeger Nazaret. Yoŋ geŋ nebi wede toogo, wo y’a ti gize toogadí t’urzi naabadí wo t’urzi k’onamí a ḁaana Raa wo a ḁaana ḁuwo pay.

20Kane deero ḁoŋ seḁikadiŋ ti ḁoŋ dokkiyadiŋ an an di y’ele a bey ḁoŋ k’olmidayí kono booro t’a yi seeda ki tōwwo, wo an ti y’ tiike ekk’undumu wede zaapu t’ekki bakadí kaŋ tontilko.

21Kaye ay ziipe elkisadey a yode, yoŋ wede soo y’an adḁa ḁoŋ k’Izirayel ti bey ḁoŋ k’aduzan. Wo t’ekki sulḁi pay geŋ, onniyo aŋki ette k’aduwe t’ume sulḁi geŋ ize me.

22Wo toŋ erayi miibi ti diinayey an ayn’iddira. Aŋki ti soohe walak an d’iŋgile ki biza muuzo.

23An iide’ŋ, nuune k’Isa an ki y’uune ye. Kane an di-gimo, an ay t’iide taayadan te an’de, maaleekiyagi an’n iido tuddan wo an di ruute, an’de: “Yoŋ zeere.”

24Ti diine kaye ay sooru kaŋ soo geŋ, ḁoŋ miibi an d’ukke ki biza muuzo wo an d’uuney miŋ pay a-t’iide aakede erayi an ruute. Wo yoŋ miŋ umbo, an ki y’ wullo ye.»

25Iŋkino maŋ Isa y’an di ruute, y’ede: «Kune ḁoŋ elkisagun attidi, kun k’ambu kesiko ye ono ḁoŋ pay nebiyagi an ruutite geŋ me.

26Ki kotto i dehu Almasi Raa yi biire geŋ y’a dabire iŋkino ḁoo miŋ, saŋ yi t’etta adda daryikadí kollo.»

27Saŋ y’an di gizite kereŋ sulḁi ḁoŋ pay an riinŋite ti kaaga a tukki yode adda mattup ki Raa geŋ me, y’a iise ti mattup k’oogoro Muusa bini y’a-ti ḁiŋge ti mattupiyagi ḁoŋ pay ki nebiyagi.

28Aame kane an iiney goppon ti ille ere an’te maŋ, Isa yi d’isiyo aakede y’iŋgile ki ḁaana iŋkino.

29Wo kane an di kodḁime, an d’eesiyo: «Kee k’oopo ti kaye kino, peedo t’a t’ooriyo ume y’ize.» Iŋkino maŋ yi-t’iide adda boy, y’a uupe ti kane.

30Y’a-guune ombó ti kane, y’a t’umbe mappa, y’a ruute koduwo a Raa, maŋ y’a burkite, y’an d’ele.

31Aame geŋ edayan a t’ihina, kane an di y’ zuune Isa me, wo a kaamiki ti ḁaanadan y’a ŋukkide.

32Kane an d’iise rootiyto ti tuddan, an’de: «Aame kine a urzi wo yoŋ y’in rootiyto a tukk’ono ḁoŋ an riinŋite ti kaaga adda mattup ki Raa geŋ, ki kotto in d’uwwe munḁa a biza k’ulbiŋ me.»

33Maṅ kesiko kane an t'iiziga, an di-gime ki Zeruzalem. An iide'ṅ an di'n uuney kane sanalliyagi koomat makumu soo geṅ an t'ugiye ti doṅ an sooru soo,

34wo kane an an di ruute a doṅ sire geṅ, an'de: «Ki kotto Galmeega yi bilde, yi gize tuddí a Simo!»

35Wo kane batum an an t'iide taaya a munda wede ize a urzi, wo mummino kane Isa an di y' zuune a ume wede y'an borkiso mappa geṅ me.

Isa yi kaza tuddí a sanalliyagí

36Aame kane onamaṅ botto an a ki ti'n dinge ye geṅ, a kaamiki yode Isa batum y'a gize tuddí a diinayaṅ, wo y'an di ruute, y'ede: «Toose ti koono ti kune.»

37Kane an d'iddira, orgiso t'anni ziida baadaṅ kono an elkiyo an wulle'ṅ beyye.

38Wo Isa y'an di ruute, y'ede: «Moo me kun orgiso me? Moo me un d'ede niikiyo adda k'addugun me?»

39Kun wollo beydó ti zoṅdó, eṅ miṅ nuṅ! Kun ni botto, wo kun wollo beyye'ṅ i-k'ede tukiṅ ye osse ye, wo nuṅ oo d'ede aakede kune kun wolleyo.

40Yoṅ y'a ti dinge onamí maṅ, y'an di gize beydí ti zoṅdí.

41Wo kane onamí an k'ambu ye botto kono addaṅ ũune t'unṣuwo wo an ziida giggeraṅ. Inṅino maṅ yoṅ y'anni tunde, y'ede: «A eṅṅo un ede munda k'ombo ko?»

42Kane an i di burko puuniso gay'irsa an i-d'ele.

43Yoṅ y'a ziida wo y'a t'iimi a daanadaṅ.

44Saṅ y'an di ruute, y'ede: «Aame nuṅ botto ti kune geṅ, eṅṅo munda wede n'un ruute me: I dehu ono doṅ an riine a tukki nuṅ adda mattup k'oogoro Muusa ti ono doṅ ki nebiyagi wo adda mattup ki Soom geṅ, kane pay a aane kono a-t'ette a ono mattupiyagi geṅṅo.»

45Inṅino maṅ yoṅ y'an t'ihina eedaṅ, kono an di seeda ita k'ono doṅ an riine ti kaaga adda mattup ki Raa,

46wo y'an di ruute, y'ede: «Eṅṅo munda wede an riine me, an'de: Almasi Raa yi biire, y'a dabira bini y'a t'inda, saṅ onniyo sire k'aduwe maṅ Raa y'a ti y' balda ti diine doṅ unto me.

47Geṅ i dehu an di kizite ti sundí a ita duwo pay, an di t'eese ti Zeruzalem, an an di roota a duwo an di-kima lekkiyadaṅ wo an t'oona tambobino k'oldfikadaṅ.

48A suldi pay geṅ kune kun illiga wo kun wulle.

49Wo nuŋ ni-t'igibo a eggun munda wede Meegó Raa yi ruute y'un t'ela. Wo kune'ŋ, kun lekko adda geeger bini toogo ere i deego t'awwa ti kandaane t'un di'n ôona.»

Engilso k'Isa k'awwa ki kandaane

50Saŋ t'adda geeger Isa y'an t'udde ti paate, an d'ingile k'ume wede goppon ti ille ki Betani. A ume geŋ y'a ziki beydí wo y'an di ziipe beeko.

51Aame y'an zaapu beeko geŋ, kane y'an di'n iili, yoŋ Raa y'a y'umbe k'awwa ki kandaane.

52Aame geŋ kane an di-dikke wo an t'uttile a daanadí, saŋ an di-gime ki Zeruzalem t'uŋsuwo baadaŋ.

53Kane an d'ettiyo daayum k'adda booro Boy Raa, wo an di tamma Raa.

Zaṅ

Zaṅ 1

Raa yi kaza tuddí t'urzi k'Isa Almasi

- ¹Ki poone Raa y'a okkima sulđi pay geṅ, wedusu an yi waaku Ono yoṅ ede to. Raa kane ti wede an yi waaku Ono geṅ kane soo, wo wede an yi waaku Ono geṅ yoṅ miṅ Raa batum.
- ²Ki poone Raa y'a okkima sulđi pay geṅ, yode ti wede an yi waaku Ono geṅ kane soo.
- ³Sulđi dṅṅ Raa y'ikkima pay geṅ, an ikkima ti wede an yi waaku Ono geṅ soo. Munda wede Raa y'ize siidí umbo, daa wede an yi waaku Ono geṅ me.
- ⁴Wede an yi waaku Ono geṅ, yoṅ lekkiyo ere ki daayum, wo tode lekkiyo gette ti d'eliyo toore a duwo.
- ⁵Toore geṅ yi-tooriyo adda zimolo, wo zimolo t'a ki y' ziida ye.
- ⁶Iṅkino maṅ ti kaaga Raa y'a igibe wede zindí ki tukki duwo, wedusu geṅ sundí Zaṅ.
- ⁷Zaṅ yoṅ wede illiga rabila toore, y'a iide y'an di kize urzi toore geṅṅo, kono t'urzi yode duwo pay an d'olliga, wo an zaape addaṅ a toore geṅṅo.
- ⁸Yode Zaṅ geṅ toore yode batum ye, yoṅ y'iide y'an di kize toore a duwo.
- ⁹Yo Wede an yi waaku Ono geṅ, toore wede ki kotto, y'ettiyo k'adda duniya, y'a toore adda k'adde duwo pay.
- ¹⁰Yoṅ geṅ y'a iido k'adda duniya, wo duniya ette Raa y'ikkima t'urzi yode batum. Y'a likke, wo dṅṅ duniya an gi di y' zuune ye.
- ¹¹Y'a t'iide k'ume dṅṅí Izirayel, wo kane an gi di y' ziida ye.
- ¹²Wo de a kane dṅṅ i yi ziida wo i ziipe addaṅ a yode geṅ, y'an d'ele urzi an t'ize inṅi Raa.
- ¹³An t'ize inṅi Raa t'urzi k'ehiyo ere a urzi tudde ye, aa duwo an ki-dehu ye, wo an t'ize inṅi Raa t'urzi k'ehiyo ere ti toogo Raa.
- ¹⁴Iṅkino maṅ wede an yi waaku Ono geṅ y'a-gime wedusu, y'a iido y'a likke diine kaye, addí ôoniyo ti beeko wo y'in di kaza urzi wede derec. Ay di wulle goolikadí, goolikadí ere meeda gette i ele Meega Raa a yode Ulí soo daṅṅal.
- ¹⁵Wo Zaṅ geṅ y'a iise kazita a tukk'Isa ti golla awwa, y'ede: «Eṅṅo wedusu wede ni rootiyo onamí me, wede n'ede: wede ede ettiyo k'itadó me, wo yoṅ goole y'a jiire nuṅ, kono nuṅ an di'n t'eha botto geṅ, yoṅ ede to.»

16Yon addi'ŋ tasse ti kine me, y'in di ziipe beeko baadan ki daayum a kine pay, wo beekadi daayum a ekki kine.

17Oogoro tod'te Raa yi t'elo ti kaaga t'urzi Muusa a duwo. Wo de beeko ti derec an iido t'urzi k'Isa Almasi.

18Wenda soo ton i wulle Raa umbo, wo de Ulo yon soo danjal yode batum Raa, yi lekkiyo a sirpa Meega Raa gen, y'in di y' gize.

Zaŋ Batis ti don zina ki Pariziyen

(Matiye 3.1-12; Markus 1.2-8; Lik 3.15-17)

19Kun ollo enj ono Zaŋ yi gizite. Onniyo soo deero Yawudiyagi a siido Zeruzalem an d'igibe don sedeke ti don ti biza bumbu Lebi ki tukki Zaŋ. An d'iide, an d'uuney Zaŋ kono an di y' tonde: «Kee'ŋ wee wee?»

20Aame an iide an yi tunde maŋ, yon y'an k'umbida ye, wo y'an di ruute kereŋ, y'ede: «Nuŋ Almasi Raa yi biire ye.»

21Inkino maŋ an di y' tunde sey, an'de: «De kee'ŋ Eli ko?» Maŋ Zaŋ y'ede: «Aha, nuŋ Eli ye.» An di yi tunde sey, an'de: «Kee'ŋ nebi wede ay delliyo ko?» Zaŋ y'ede: «Aha, nuuno ye.»

22Inkino an i di ruute, an'de: «Kee'ŋ wee wee? K'ay ti rooti, kono ay an di kizey a don ayn'igibo me. Kee miŋ wee wee?»

23Maŋ Zaŋ y'an di'n gime onamaŋ ti ono don nebi Ezayi yi ruute ti kaaga, y'ede: «Nuŋ golla ki wedusu yi dollite adda balda, yi d'eesiyo: Urzi Galmeega kun i-ti y'okkon ki diine delele.»

24A diine don zina an igibe ki tukki Zaŋ gen, Pariziyen ton adda.

25Kane gen an di yi tunde Zaŋ sey, an'de: «Kee'ŋ Almasi Raa yi biire ye, Eli ye wo nebi wede ay delliyo ye de, ki moo me ki'ni suyyiso duwo'ŋ batem me?»

26Zaŋ y'an di'n gime onamaŋ, y'ede: «Nuŋ duwo ni'ni suyyiso batem t'ahu, wo de a diinagun gen i d'ede wede ede kun ki y' suune ye.

27Wede gen y'ettiyo k'itadó, wo nuŋ ni k'iide n'a ki t'eeze sibe tobiyagi ye.»

28Suldzan pay an ize gen a ille Betani, ti dar k'ooye Zurden ki kese peedo gekoliyo a ume Zaŋ duwo y'anni zuyyite batem.

Isa Almasi Ulo Damu Raa

29Soggo maŋ Isa yi-t'uddo k'ume Zaŋ. Aame Zaŋ yi y' wulle maŋ, y'ede: «Kun wollo enno Ulo Damu Raa i booyiso oldiko don duniya pay me.

30Ono ni ruute a tukki yode enno, n'ede: «Wede ede y'ettiyo k'itadó me, wo yon goole y'a jire nuŋ, kono nuŋ an di n' t'eha botto gen, yon ede to.»

31Ki poone toŋ nuŋ ni ki y' suune ye yoŋ wenda me, wo n'iido duwo ni di'n suyyiso batem t'ahu'ŋ kono n'an di y' kize a doŋ k'Izirayel.»

32Zaŋ yi kazita a tukk'Isa sey, y'ede: «N'a wulle Unde Raa t'a d̄iigo ti kandaane aa deere, t'a di-guune a tuddí.

33Nuŋ ni ki y' suune ye, wo Raa wede i n'igibe duwo ni di'n suyyiso batem t'ahu geŋ y'o di ruute, y'ede: "Unde Raa gette k'a ti wolla t'a d̄eego ti kandaane, t'a di koonaa a tukki wede. Geŋ yode geŋno wede a suyya duwo ti Unde Kamileŋ me."

34Wo munda geŋ n'a yi wulle, wo iŋkino maŋ n'un di kaza kereŋ, wede eŋ yoŋ Ulo Raa.»

Andire ti Simo Piyer

35Ti soggatú sey toŋ, Zaŋ ti sanalliyagí doŋ sire geŋ an lekkiyo a umayaŋ.

36Zaŋ geŋ yi wulle Isa y' eŋgile maŋ, y'a ruute y'ede: «Eŋno Ulo Damu Raa me.»

37Aame kane sanalliyagi sire geŋ an illiga Zaŋ yi ruute iŋkino maŋ, an d'iise daaniya k'Isa.

38Isa yi gilde maŋ, yi wolliyó'ŋ an yi daaniya, maŋ y'anni tunde, y'ede: «Kun ni daaniya'ŋ kun dehu moo me?» Maŋ kane an i-di'n gime onamí, an'de: «Rabbi (i-kaza wede dooyisadey) kee ki lekkiyo a too me?»

39Isa y'an di ruute, y'ede: «Kun'di, kun di-wolley.» Maŋ an d'ingile, an di wullo ume yi-lekkiyo me. Geŋ a peedo lohe, ume'ŋ an a-ti y'ingile ti yode.

40Andire leema Simo Piyer geŋ, yoŋ ti diine doŋ sire illiga ono Zaŋ yi ruute wo an di diine Isa geŋno.

41An ti gimo maŋ, Andire y'iide'ŋ y'a uuney ki poone'ŋ leemadí Simo, wo yi di ruute, y'ede: «Almasi Raa yi biire'ŋ, ay yi wullo.» (T'ono Girek geŋ Kiris i-kaza Almasi.)

42Maŋ yi-di t'iide leemadí Simo k'ume k'Isa. An iiney maŋ, Isa yi di y' wolliso yerere adda k'edayí, maŋ yi di ruute, y'ede: «Kee'ŋ Simo ulo ki Zonas, wo ti aŋki eŋ an gi di waaka Piyer.» Suma gette i-kaza mukkolo.

Pilip ti Natanayel

43-44Onniyo k'ita maŋ Isa y'a ingile ki siido Galile, an d'ikkima ti Pilip wede ti geeger Betsayda, siido k'Andire ti Piyer. Maŋ Isa yi di ruute a Pilip, y'ede: «Pilip, ki ni daani.»

45Saŋ maŋ Pilip y'a uuney Natanayel, wo yi di ruute, y'ede: «Ay yi wullo wedusu wede Muusa y'a ruute adda mattup k'oogoro, wo nebiyagi toŋ an ruute onamí me. Yoŋ Isa wede ti geeger Nazaret, ulo Yusup.»

⁴⁶Natanayel yi di ruute, y'ede: «Ti Nazaret ummey, munda beehiye etto dey ko?» Pilip yi di ruute, y'ede: «K'edi, wo k'a wolla.»

⁴⁷Aame Isa yi wulle Natanayel y'ette tuddí mañ, y'a ruute ono a tukki yode, y'ede: «Ulo k'Izirayel toc miñ yode enño, yo eñ wede ki diine.»

⁴⁸Natanayel yi di ruute, y'ede: «De kañ mummino k'a ni zuune me?» Isa yi di ruute, y'ede: «Ki poone Pilip y'a ki waako'ñ geñ, ni ki wulle kee'ñ a undiso pigiye.»

⁴⁹Iñkino mañ Natanayel yi di ruute, y'ede: «Wede dooyisadó, kee'ñ Ulo Raa. Kee'ñ mozigo ñoñ k'Izirayel.»

⁵⁰Isa yi di ruute, y'ede: «Kee ki ziipe addá a nuñ kono k'illiga ni ruute ni ki wulle a undiso pigiye, wo k'a wolla suldí baadañ a ceera enño sey.»

⁵¹Mañ Isa yi di ruute sey, y'ede: «Derec ñkino wo n'un di rooto: Kun di wolla kandaane a-t'ihina, wo maaleekiyagi Raa an di ñeegita wo an di kilita t'awwa nuñ wede an n'ehe aa ulo wede enño.»

Zaṅ 2

Armika k'Isa ere ki poone

¹Onniyo sire k'aduwe mañ, i d'ize seedu k'erewo a geeger Kana siido Galile. Mekk'Isa t'iide,

²wo Isa ti sanalliyagi toñ an'ni wiike.

³An ize bini mañ, toote k'inni biñ a biite. Iñkino mañ mekk'Isa ti di ruute a ulutú'ñ, t'ede: «Toote k'inni biñ an biite.»

⁴Mañ Isa yi di ruute, y'ede: «Mee'ki nuñ, nuñ n'aase mummino? Peedadó ti k'iide ye botto.»

⁵Iñkino mañ tod' t'an di ruute ñoñ naabo'ñ, t'ede: «Y'un ruuta munda mañ, kun t'iso.»

⁶Aame geñ i d'ede ñogali zoot an tutte ki moñgali, Yawudiyagi an d'obite ahu adda, an d'opilsito tudda, k'a t'ise kamileñ a ñaana Raa a urzi k'oogiradañ. Bukkulu soo geñ y'oomi suma toolo sire afo.

⁷Mañ Isa y'an di ruute ñoñ naabo, y'ede: «Ñogali geñ kun t'odonito t'ahu.» Iñkino mañ kane ñoñ naabo an iide'ñ, an t'ûunite ñogali'ñ geñ pepelele.

⁸Aame ñogali'ñ an ti'n ûunite mañ, Isa y'ede: «Añkeñ kun eesu ahu geñ, kun i-d'odo a wede dokkide.» Mañ kane ñoñ naabo an d'eezi, an i-d'iide.

⁹Wede dokkide geɗ y'an uwe ahu ɗoɗ i-gime toote k'inni biɗ geɗ me, wo yi ki suune ye toote y'ettiyo ti tunda me, wo ɗoɗ naabo ɗoɗ eeziti ahu geɗ an suune. Wede dokkide y'a wiike kule k'erewo,

¹⁰wo yi di ruute, y'ede: «Ki poone'ɗ ɗuwo an eesiyo dokkide ti toote wede kaɗigi, saɗ ɗuwo geɗ i ti koliyo eedaɗ maɗ, an d'eesiyo wede unse ye k'ita. Wo kee k'a buuhe toote kaɗigi k'ume k'ita.»

¹¹Geɗ iɗkino munda k'armika wede Isa y'ize ki poone, a Kana siido Galile. Y'an di gize toogadi, wo t'urzi geɗ sanalliyagi an di ziipe addaɗ a yode.

¹²Saɗ maɗ tiɗ geɗ Isa y'a t'iiziga, meedi, zembadi ti sanalliyagi pay an di-ɗiige ki geeger Kapernayim. A ume geɗ an di likke onniyo miibi.

Lomme ɗoɗ suuk t'adda booro 'Boy Raa

(Matiye 21.12-17; Markus 11.15-17; Lik 19.45-46)

¹³Aame tarnaape Pak ki Yawudiyagi aa guute goppon maɗ, Isa y'a-gili Zeruzalem.

¹⁴Y'iiney maɗ, yi-t'iide a booro 'Boy Raa, yi d'uuney ɗoɗ k'owilte buɗgari, ki dambami, ki deere wo ɗoɗ pelkiyto soɗko ere ettiyo ti siidiyagi doolo pay, an isiyo suuk adda.

¹⁵Iɗkino maɗ yi d'ize karre, y'an iise lommitte. T'adda booro 'Boy Raa y'a ti'n tiipe pay ti dambanzaɗ wo ti buɗgarzaɗ me. Wo taabulyagi ɗoɗ pelkiyto gurus geɗ y'an di gippirde, ti soɗkiyagaɗ a-zibbite.

¹⁶Wo a ɗoɗ k'owilte deere y'an di ruute, y'ede: «Suldugun eɗ pay kun ti sokito t'eɗ me. Boy Meego eɗ, kun ti y'ise ume suuk ye.»

¹⁷Aame geɗ kane sanalliyagi an d'ilke a ono ɗoɗ an riije ti kaaga adda mattup ki Raa, an'de: «Geyyiso ere o d'ede kono boy kee Raa gette, nuɗ addo i n'aadumu.»

¹⁸Iɗkino maɗ kane deero Yawudiyagi an i di ruute, an'de: «K'ay isi munda k'armika wede a kize kee a-d'ede urzi k'aase kino.»

¹⁹Maɗ Isa y'an di ruute, y'ede: «'Boy Raa eɗ kun di-kossito, wo adda k'onniyo ado n'a y'ooziga.»

²⁰Kane deero Yawudiyagi an i di ruute, an'de: «'Boy Raa eɗ ɗuwo an iiziga adda k'ozzine ada pide makumu zoot miɗ, kee k'ede adda k'onniyo ado maɗ k'a y'ooziga?»

²¹Wo Isa yi rootiyo 'Boy Raa tuddi batum.

²²Bini aame Isa y'inda wo yi-bilde maŋ, sanalliyagí an d'ilke a ono doŋ yi ruute geŋ me. Inŋkino an d'umbe a ono doŋ an riine ti kaaga adda mattup ki Raa, wo a ono doŋ Isa yi ruute.

Isa yi suune adde duwo pay

²³Isa yi lekkiyo a Zeruzalem, a tarnaape Pak ki Yawudiyagi geŋ, y'aaze suldi k'armika baadaŋ duwo an di wulle, wo doŋ baadaŋ an di ziipe addaŋ a yode.

²⁴Wo Isa yi ki zaapu addí a kane ye, kono kane pay yi'ni suune.

²⁵Yoŋ geŋ wenda yi gi di kize ye a tukki kane me, kono adde duwo pay yoŋ yi'ni suune.

Zaŋ 3

Isa ti Nikodem

¹Aame geŋ i d'ede wedusu sundí Nikodem. Yode geŋ ti diine doŋ sundaŋ Pariziyen, wo ti diine deero Yawudiyagi pay.

²Onniyo soo a diddo maŋ, y'a iide y'a uoney Isa, wo yi di ruute, y'ede: «Wede dooyisadey, kaye ay suune kee'ŋ Raa yi-k'igibo dooyisadey. Wenda ti doolo yi k'aane yi ki t'ise ye suldi k'armika doŋ aa kee ki d'isiyo eŋ me, aame Raa ti yode ye maŋ.»

³Isa yi di ruute, y'ede: «Derec inŋkino wo n'a di rooto: Aame wede'ŋ yi k'uune ehiyo ere aware ye maŋ, Moziko Raa yi k'aane yi ki ti wolley ye.»

⁴Maŋ Nikodem yi di ruute, y'ede: «Mummino me, wede yi t'ize goole wo an ti y' t'ehe sey me? Y'aane yi-t'ette adda k'adde meedí, t'a ti y' t'ehe sey ko?»

⁵Isa yi di'n gime onamí, y'ede: «Derec inŋkino wo n'a di rooto: Aame wede'ŋ yi k'uune ehiyo ere aware t'urzi k'ahu wo t'urzi k'Unde Raa ye maŋ, Moziko Raa yi k'aane yi ki t'etey ye.

⁶Munda wede ettiyo t'urzi tudde geŋ yoŋ ki tudde, wo wede ettiyo t'urzi k'Unde Raa geŋ yoŋ unde.

⁷Kee k'elkite ye a ono doŋ n'a ruute, n'ede: “An un ti'n eho doolo geŋ me.”

⁸K'elko a maaye wede i baahu geŋŋo. Yi baahu k'ume wede aa addí i dehu, k'a olliga buukayí daŋŋal wo ume y'ettiyo ti tunda wo y'ambe ki tunda'ŋ ki ki suune ye. Geŋ inŋkino ki wede y'uune ehiyo t'urzi k'Unde Raa toŋ maŋ.»

⁹Maŋ Nikodem yi di ruute a Isa, y'ede: «De geŋ inŋkino mummino me?»

¹⁰Inŋkino maŋ Isa yi di'n gime onamí, y'ede: «De kee'ŋ wede dooyiso goole a siido k'Izirayel, miŋ ono geŋ ki gi di'n suuniyo ye ko?»

- 11**Derec in̄kino wo n'a di rooto: Kaye ay rootiyo munda wede ay suune wo ay kazita munda wede ay wulle, wo kun k'ambu ye a onamey don̄ ay kazita me.
- 12**Wo aame n'un rootiyo ti suldi don̄ isiyo a siido toŋ kun k'ambu ye, de mummino kun d'amba me aame n'un ruuta ti suldi don̄ a kandaane maŋ?
- 13**Wenda soo toŋ ti siido a kili kandaane umbo, daa ki nuŋ wede an n'ehe aa ulo wede en̄no, ni ki diigo t'awwa ye maŋ.
- 14**Aakede ti kaaga aŋ Muusa kane adda balda geŋ yi d'umbe maala, y'a t'ikkima miipo, yi d'ittiba mobbo, y'a-dudde t'awwa. Geŋ in̄kino, nuŋ wede an n'ehe aa ulo wede en̄no toŋ maŋ, an ti'n dodda t'awwa kay,
- 15**kono wede tuuku yi ziipa addi a nuuno maŋ, y'a t'ona lekkiyo ere ki daayum.
- 16**Raa geŋ y'a giyye kine don̄ duniya pay, y'aa t'igibo Ulí yoŋ soo dan̄ŋal ki duniya, kono wede tuuku yi ziipa addi a yode maŋ, y'a ki t'inda ye, wo y'a t'ona lekkiyo ere ki daayum.
- 17**Raa y'igibo Ulí ki duniya kono y'a ki deka booro ekki don̄ duniya ye. Wo de yi y'igibo kono t'urzi yode don̄ duniya an d'utte.
- 18**Wede yi ziipa addi a yode maŋ, booro ti ki y' seeda ye, wo wede yi ki ziipa addi a yode ye maŋ, booro ti y' ziida baa, kono yi ki ziipe addi a suma k'Ulo wede soo dan̄ŋal ki Raa geŋno ye.
- 19**Toore y'a iido adda duniya, wo de toore'ŋ duwo an di y' giigira, an t'umbe zimolo kono kane an isiyo naabo ere oldo. Geŋno urzi wede booro Raa t'a seeda wede me.
- 20**In̄kino maŋ wede tuuku y'isiyo munda wede ulsu geŋ, toore y'a yi kiigira, wo yi k'ette ye ki toore me, kono y'orgiso a naabo ere y'isiyo oldo gette, itadi i t'adfa.
- 21**Wo wede daayum y'isiyo naabo ere derec geŋ, y'a t'adde a toore kono duwo an di wolle naabadi ere derec gette, an t'eese yo en̄ wede Raa kotto.»

Isa ti Zaŋ Batis

- 22**Saŋ maŋ ti Zeruzalem Isa ti sanalliyagi an t'iiziga, an d'ingile ki siido Ziide. An di-guune an̄geŋno, wo Isa yi di'n suyyiso duwo batem.
- 23**Aame geŋ Zaŋ Batis toŋ yi suyyiso pay duwo me a ume sundi Aynoŋ, goppon̄ ti Salim, a ume geŋ ahu baadaŋ. Duwo an d'ettiyo tuddi, yi ti'n suyyiso batem.
- 24**Aame geŋ yoŋ Zaŋ an ki ti y' ziida dan̄gay ye botto.
- 25**In̄kino maŋ onniyo soo i d'iiziga niikiyo, sanalliyagi Zaŋ ti Yawudusu, a urzi wede mummino wede y'a t'ise kamilen̄ a daana Raa me.

²⁶Maṅ kane an di y'uuney Zaṅ me, an i di ruute, an'de: «Wede dooyisadey, kee ki wollo kay, wede kun di likko ti dar k'ooye Zurden ki kese peedo ge-koliyo, k'a ruutite taayadí geṅ, yode toṅ aṅkeṅṅo ḍuwo y'anni suyyiso batem kay, wo aṅkeṅ ḍuwo pay an ti dihimá tuddí.»

²⁷Maṅ Zaṅ y'an di ruute, y'ede: «Wede geṅ ti siidí yi k'aane yi ki t'oone munda ye, daa Raa yi-k'ele ye maṅ.

²⁸Kune toṅ maṅ kuuduguṅ y'illiga aame ni ruute, n'ede: “Nuṅ Almasi Raa yi biire ye. Nuṅ Raa yi n'igibo, ni-d'uugumo a yode.”

²⁹Kun suune, wede i ziida erewo geṅ kulatú yode geṅṅo. Wo yo laṅze kule k'ere geṅ y'a t'ohira a sirpadí, ulbí uṅse baadaṅ kono y'a olliga munda wede laṅzayí yi roota. Geṅ nuṅ toṅ iṅkino, ulbó'ṅ aase uṅse baadaṅ a di ceere.

³⁰Iṅkino maṅ d'erec, yode geṅ sundí t'a ôole, wo suma nuuno a kime k'ita te.»

Wede iido ti kandaane

³¹Wede i d'iigo ti kandaane geṅ, yoṅ yi jiire ḍuwo pay. Wo wede a siido geṅ, yoṅ a siido, wo onamí y'orbe toṅ ki suldí ḍoṅ a siido. Wede yi d'iigo ti kandaane geṅ, yoṅ yi jiire ḍuwo pay.

³²Yi kazita ti munda wede yi wulle wo y'illiga, wo wede a ambe onamí umbo.

³³Wo wede y'umbe onamí geṅ, yi suune adda k'addí Raa yi rootiyo ono ḍoṅ d'erec.

³⁴Wede Raa y'igibo eṅ yi rootiyo ono Raa, kono Raa yi elo Unde ere daa dooziyatú.

³⁵Meega Raa geṅ Ulí yi y' giyye, yi-d'ele suldí pay a beezí.

³⁶Wo wede y'ela addí a Ulo Raa maṅ, y'a t'oona lekkiyo ere ki daayum. Wo wede yi-tuuga zaapu k'addí a Ulo Raa maṅ, lekkiyo gette yi ki ti t'oona ye, wo kulkuwo Raa t'a kooná eedí.

Zaṅ 4

Isa ti erewo ti siido Samari

¹Isa geṅ y'a zuune Pariziyen an illiga ḍuwo an rootiyo an'de, ḍoṅ baadaṅ yi-ti'n isiyo sanalliyagi, wo y'a-ti'n suyyiso batem i ceeriyo ḍoṅ ki Zaṅ,

²wo kaciṅ yo Isa geṅ ḍuwo i'ni suyyiso batem yode ye, i'ni suyyiso batem sanalliyagí.

³Iṅkino maṅ y'a t'iiziga ti siido Ziide, y'a-gime ki siido Galile.

⁴Wo ki Galile geṅ, i dehu y'a adde ti siido Samari.

⁵Maṅ y'a iiney a Sisar, geeger ki Samari goppon ti doome wede Yakup yi-ele a ulí Yusup ti kaaga.

⁶A ume geṅ i d'ede osso Yakup y'ittiba. Isa y'iziro kee, y'iina a ume geṅṅo maṅ, y'urme y'a-guune biza k'osso gettiyo a peedo t'ize diine.

⁷⁻⁸Aame Isa yi-guune biza k'osso yi puukiyo geṅ, kane sanalliyagí an t'iide k'adda geeger an di deho munda k'ombo, maṅ i d'iido erewo t'adda k'ille eesiyo k'ahu. Erewo gette Samariten. Maṅ Isa y'a ti tunde, y'ede: «Erewo no, m'o k'eeli ahu, ni-ki sibe do.»

⁹Iṅkino maṅ tod'erewo ti di ruute, t'ede: «Mummino, kee Yawudusu de ki tondiyo ahu sobo a bey nuṅ Samaritenowo me?» Ki too maṅ kane Yawudiyagi an ki dehu an ki t'okkiy'e ye ti Samariten me.

¹⁰Isa yi di ruute, y'ede: «Aame koṅ mi y' suune munda wede Raa y'eliyo, wo wede i kin tondiyo ahu sobo me maṅ, a tonde ahu sobo miṅ koṅ a bey yoṅ me, wo y'aane yi di t'eele ahu doṅ i d'eliyo lekkiyo.»

¹¹Iṅkino maṅ erewo ti di ruute, t'ede: «Wede no, kee a-k'ede dara ye, wo osso sohoru de k'a t'oona ahu doṅ i d'eliyo lekkiyo ti too me?

¹²Kunuṅ kee k'elkiyo ki ceere mugiyey wede ti kaaga Yakup, wede ay iili osso ettiyo ko? Yode batum y'a iibe, inṅizí wo ti maaladí pay me.»

¹³Isa yi di ruute, y'ede: «Wede tuuku y'iiba ahu k'osso eṅṅo maṅ, ôrme y'a yi seeda sey.

¹⁴Wo wede y'iiba ahu doṅ nuṅ ni-t'ela maṅ, ôrme yi ki y' seeda ye baa. Ahu doṅ nuṅ ni-t'ela eṅ, a yode i di t'isa aa ersa k'ahu okko i di t'ela lekkiyo ere ki daayum.»

¹⁵Iṅkino maṅ erewo ti di ruute, t'ede: «Wede no, ahu geṅ k'o eeli kono ôrme y'a ki n' seeda ye baa, wo n'a k'etto eesiyo ye.»

¹⁶Maṅ Isa yi di ruute, y'ede: «M'odo, mi waaki kulayí, kun t'edi.»

¹⁷Erewo ti di ruute, t'ede: «Nuṅ daa kulayó.» Isa yi di ruute, y'ede: «Koṅ onamí derec, mi rootiyo kulayí umbo me.

¹⁸Koṅ mi zidde kuuli paat, wo wede kun lekkiyo ankeṅṅo eṅ kulayí ye. Mi ruute derec.»

¹⁹Iṅkino maṅ erewo ti di ruute, t'ede: «Galmeegó, nuṅ ni wolliyo maṅ, kee eṅ nebi.

²⁰Ti kaaga moṅgidagey Samariten an uttile a Raa ekki mukkolo ettiyo, wo kune Yawudiyagi kun'de ume k'ottilso a Raa a Zeruzalem.»

- 21** Isa yi di ruute, y'ede: «Erewo no, m'ambo onamó, saɲ onniyo t'aana, aame geɲ kun k'ottila a Meega Raa ekki mokkolo ettiyo ye, wo a Zeruzalem ye.
- 22** Kune Samariten kun ottilso a Raa wede kun ki y' suune ye, wo kaye Yawudiyagi ay ottilso a Raa wede ay yi suune, kono wede a utta dúwo y'ettiyo ti di Yawudiyagi.
- 23** Wo onniyo gette saɲ t'aana, wo tod'tiɲ t'iina, doɲ ottilso a Meega t'addaɲ soo geɲ, an i-d'ottila ti toogo k'Unde Raa wo aa Raa yi dehu, kono Meega yi dehu doɲ ottilso iɲkino.
- 24** Raa yoɲ unde, wo doɲ ottilso a yode geɲ an i-d'ottile ti toogo k'Unde Raa wo t'adde soo.»
- 25** Maɲ erewo ti di ruute, t'ede: «Nuɲ ni suune Almasi Raa yi biire saɲ y'a etto (wede an yi waaku t'ono Girek Kiris) wo aame y'iina maɲ, sulɗi pay y'ay ti'n kizita.»
- 26** Isa yi di ruute, y'ede: «Nuɲ wede i rootiyo eɲ miɲ Almasi.»
- 27** Iɲkino maɲ sanalliyagi k'Isa an aa d'iina, wo an ziidá gígiraɲ aame an wulle Isa yi rootiyo t'erewo gettiyo maɲ, wo wenda soo toɲ ti diinayaɲ yi di roote umbo: «De ki dehu moo me ti bey k'erewo?» kunuɲ, «Kun rootiyo t'erewo moo me?» me.
- 28** Iɲkino maɲ erewo ti d'iili toolatú a biza k'osso, tod' t'a ukke k'adda geeger, t'iide'ɲ t'an di ruuto dúwo, t'ede:
- 29** «Kun okki, kun wolla wenda eɲɲo kay, y'o-t'idɗipe itadó a sulɗi doɲ n'ize pay me. Yode eɲ aasa Almasi Raa yi biire koo maɲ!»
- 30** Maɲ t'adda geeger dúwo an di dihimo k'ume k'Isa.
- 31** Aame erewo t'ingile maɲ kane sanalliyagi an i-di ruute, an'de: «Wede dooyisadey, k'edi ki ooma do.»
- 32** Wo yoɲ y'an di ruute, y'ede: «Nuɲ ombadó ede, wo kune kun ki ti suune ye.»
- 33** Maɲ kane sanalliyagi an di rootiso tuddaɲ, an'de: «Kunuɲ ombo wenda yi-t'eeley ko?»
- 34** Isa y'an di ruute, y'ede: «Ombadó te isiyo naabo ki wede i n'igibo yi dehu, wo n'a-ti daɲge naabo ere y'o elo.»
- 35** Isa y'an di ruute sey, y'ede: «Duwo an rootiyo, an'de: “Adda tere pide aasa k'ayɗu kollo.” Wo kun ollo, nuɲ n'un di rooto, kun ambo edaguɲ, kun wollo dombi an iine k'ayɗu.

³⁶Wede aydu geɗ raɗɗadi y'a ti t'oone, wo inɗi y'a-t'okume a lekke ki lekkiyo ere ki daayum, kono wede yi giira ti wede iyda geɗ, kane miɗ pay ulbaɗ unse.

³⁷Inɗino maɗ ono an rootiyo geɗ derec: "Wede soo'ɗ ki korso wo wede soo'ɗ k'aydu me."

³⁸Nuɗ, n'un igibe aydu k'adda doome wede kune kun ki niibe ye, i dibire doɗ doolo, wo kun aa di-guune a raɗɗadaɗ.»

³⁹Inɗino maɗ kane Samariten doɗ ti geeger gette, doɗ baadaɗ an di ziipe addaɗ a Isa a ono k'erewo t'an ruute, t'ede: «Isa yi-t'iidiba ita a suldi doɗ pay t'ize geɗ me.»

⁴⁰Geɗ inɗino kane Samariten geɗ an iina aame k'Isa maɗ, an di y' tommiyo, an'de y'a lekke ti kane. Maɗ yoɗ yi d'ize onniyo sire ti kane me.

⁴¹A onniyo gette Isa y'an di'n duuye, wo a dooyisadi gette doɗ baadaɗ a jiiire sey an di ziipe addaɗ a yode, a onami doɗ y'an gizite me.

⁴²Inɗino maɗ kane Samariten an i di ruute a erewo, an'de: «Kaye ay ziipe addey a Isa a ono doɗ ay illiga kuudey, a ono doɗ koɗ m'ay ruute daɗɗal ye. Ankeɗ ay zuune ki kotto yoɗ Wede k'Uttiyo doɗ duniya pay.»

Eliyo beeko a ulo ki wede goole adda k'akuuma

(Matiye 8.5-13; Lik 7.1-10)

⁴³Aame Isa yi ize onniyo sire a Samari maɗ, tiɗ geɗ y'a t'iiziga, y'a inɗile ki Galile.

⁴⁴Yode batum y'a ruute, y'ede: «Derec, nebi geɗ doɗ a geeger y'a ihira daɗɗal, onami an k'olliga ye me.»

⁴⁵Wo aame y'iiney Galile maɗ, kaciɗ kane doɗ siido geɗ an di y' ziiida bey sire, kono kane toɗ maɗ an iide tarnaape Pak ki Yawudiyagi a Zeruzalem me, wo an wullo suldi doɗ pay Isa y'ize a onniyo tarnaape geɗ me.

⁴⁶Saɗ maɗ Isa y'a-gime ki Kana geeger ki siido Galile, a ume wede ahu y'a ti'n gime toote k'inɗi biɗ geɗɗo. A geeger Kapernayim i d'ede wede goole adda k'akuuma, uli tuddi eeni y'unto.

⁴⁷Aame y'illiga Isa ti Ziide y'iina Galile maɗ, y'a t'iiziga, y'a iide, y'a y'uuney, wo yi di tommiyo, y'ede: «Galmeeki nuɗ, k'edi in ti deege Kapernayim. Ulo nuɗ tuddi eeni y'unto, ki di t'eley bee.»

⁴⁸Maɗ Isa yi di ruute, y'ede: «Kune duwo eɗ, aame kun ki wulla suldi k'armika ye maɗ, kun ki zaapa addugun a Raa ye.»

⁴⁹Wo yo wede goole geɗ yi-kodfime, yi d'eesiyo: «Galmeeki nuɗ, in ti deege kotok, kono ulo nuɗ y'unto.»

⁵⁰Isa yi di ruute, y'ede: «Ki-kama, ulá y'uune bee.» Maṅ wede geṅ y'a umbe a ono doṅ Isa yi-ruute, wo y'a-gime.

⁵¹Aame yoṅ a urzi geṅ, doṅ naabadí an aa di y'ikkima, an i di ruute, an'de: «Ulá y'uune bee.»

⁵²Maṅ yoṅ y'anni tunde, y'ede: «A peedo t'ize muno ulo y'uune bee me?» Maṅ kane an di ruute, an'de: «Loho a peedo ti dihima gollatú, ooriyo ti y'iili me.»

⁵³Maṅ yo meek'ulo geṅ y'a zuune adda k'addí peedo gettiṅ a-t'îide a peedo ere loho Isa yi di ruute, y'ede: «Ki-kama, ulá y'uune bee.» Inṅkino maṅ ti onniyo gettiyo yode ti doṅ boozí pay an di ziipe addaṅ a Isa.

⁵⁴Geṅ munda k'armika wede ki sirwe Isa y'ize a kamadí ti Ziide siido Galile.

Zaṅ 5

Eliyo beeko a wede runḡuyun

¹Bini maṅ tarnaape ki Yawudiyagi y'a udde a Zeruzalem, wo Isa toṅ y'a gili.

²Wo a Zeruzalem geṅ, gopponṅ ti biza bumbu wede dambami an d'adḡiya, i d'ede togile k'ahu t'ono doṅ k'Eber an yi waaku Betzata. A biza togile geṅ an d'ize daabagi deero paat.

[³Adda daabagi geṅ doṅ k'eeni baadaṅ moonite. Onḡonṅ koṅzayi, doṅ onḡonṅ zoṅḡaṅ unto, muṅkilagi pay an delliyo eesiyo kolzite k'ahu,

⁴kono ume muno maṅ maaleeka Galmeega yi-ti deegu adda k'ahu yi di'n korre. Maṅ wede k'eeni wede i ti deegu ki poone geṅ, yi d'ooniyo bee ise ita k'eenizí tuuku toṅ maṅ.]

⁵Aame geṅ i d'ede wede k'eeni, t'ume eeni yi yi ziiḡa geṅ i-d'ede ozzine ada g'ado makumu gessire.

⁶Aame Isa y'iiney aame geṅṅo maṅ, y'a yi wulle wede geṅ kaṅ moone, wo y'a zuune eenizí ti kaagine me. Maṅ y'a yi tunde, y'ede: «Kee ki dehu k'a t'oone bee ko?»

⁷Maṅ wede k'eeni y'ede: «Galme'e'ki nuṅ, ki nuṅ oo d'ede wee wee i-ti'n sedde adda k'ahu me? Aame ahu an eesiyo kolzite, n'eesiyo moykiso maṅ, wede doolo yi-ti deegu.»

⁸Inṅkino maṅ Isa yi di ruute, y'ede: «Ki t'oozo, ki t'ambo zaadáyá, k'a enḡilo!»

⁹A kaamiki geṅ wede y'a uune bee, y'a t'umbe zaadáyí, yi-sooru y'a inḡile. Wo onniyo gette onniyo ere ki puukiyo Yawudiyagi.

¹⁰Wede geɲ kane deero Yawudiyagi an yi wulle y'uune bee me, maɲ an i-di ruute, an'de: «Aɲki onniyo ere ki puukiyadiɲ. A urzi k'oogiradiɲ a-k'ede urzi ki sarkiya zaade beezá ye.»

¹¹Maɲ yoɲ y'an di ruute, y'ede: «Wede o ele beeko geɲ y'ede: “Ki t'ambo zaadaya, k'a eɲgilo.”»

¹²Maɲ kane an di y' tunde, an'de: «A-ruute iɲkino wee wee: “Ki t'ambo zaadaya, k'a eɲgilo” me?»

¹³Wo wede uune bee geɲ yi ki y' zuune ye wede i-ele beeko me, kono yo Isa y'a-ti digge adda diine doɲ duuru aɲgeɲɲo.

¹⁴K'ita maɲ, wede geɲ Isa y'a y'uune adda booro Boy Raa. Maɲ yi di ruute, y'ede: «K'ollo, aɲkeɲ k'uune bee, wo k'ita k'isa oldiko ye, para maɲ a-d'aana munda wede ulsu a ceera eɲɲo sey.»

¹⁵Maɲ yo wede geɲ y'iide, y'an di gize deero Yawudiyagi, y'ede: «Kaciɲ o ele beeko Isa.»

¹⁶Iɲkino maɲ ti onniyo gettiyo kane deero Yawudiyagi an d'iise gerdiyo k'Isa, kono yi ele beeko a wedusu a onniyo ere ki puukiyo Yawudiyagi me.

¹⁷Maɲ Isa y'an di ruute, y'ede: «Ette naabo ere Meegó yi d'isiyo daayum bini aɲkeɲɲo. Nuɲ toɲ maɲ, n'a naabe.»

¹⁸Aame deero Yawudiyagi an illiga iɲkino maɲ, an d'iise dehutu k'urzi ki tówwadí, kono y'a ti diipida a oogoro k'onniyo ere ki puukiyo, wo ki sirwe y'a ruute sey, y'ede Raa Meegí, yi-t'ize tuddí aa Raa batum.

Toogo k'Ulo Raa

¹⁹Isa y'an di ruute sey, y'ede: «Derec iɲkino wo n'un di rooto: Nuɲ Ulo eɲ munda ti suma nuuno k'eedó ni k'isiyo ye. Wo munda wede n'isiyo geɲ ni wolliyo ki Meega y'isiyo. Munda wede Meega y'isiyo geɲ, nuɲ Ulo toɲ ni d'isiyo kay.

²⁰Derec, Meega yi giyye nuɲ Ulo geɲ, y'o-di gizite suldi pay doɲ yoɲ y'isiyo me. Suldi doɲ y'o kizita a ceera doɲ eɲɲo sey, wo kune kun seeda giggirguɲ.

²¹Wo aa Meega yi baldiya doɲ i t'inda wo y'an d'eliyo lekkiyo geɲ, nuɲ Ulo toɲ ni d'eliyo lekkiyo a duwo doɲ aa addó i dehu.

²²Meega geɲ yi ki dekkiyo booro a tukki wenda ye, yoɲ y'o elo urzi dekkiyo booro a nuɲ Ulo,

²³iɲkino duwo pay an t'imme nuɲ Ulo, aa an tamma Meega. Wo wede yi ki tamma nuɲ Ulo ye maɲ, geɲ aa Meega wede i n'igibo yi ki y' tamma ye.

24Derec in̄kino wo n'un di rooto: Wede y'illiga onamó wo yi ziipa addí a wede i n'igibo maṅ, yoṅ geṅ y'uune lekkiyo ere ki daayum. Booro ti ki y' seeda ye, yi t'udde t'urzi k'unto me, y'uune lekkiyo.

25Derec in̄kino wo n'un di rooto: Onniyo t'aana wo tod'tiṅ t'iina. Kane doṅ a daana Raa aa an t'inda geṅ, an d'olliga golla nuṅ Ulo Raa, wo doṅ illiga golladó maṅ an di lekka ki daayum.

26Wo aa Meega i-d'ede toogo k'eliyo lekkiyo a duwo geṅ, a nuṅ Ulo toṅ maṅ y'o d'ele toogo k'eliyo lekkiyo a duwo kay.

27Derec, nuṅ wede an n'ehe aa ulo wede eṅ, y'o d'ele toogo ki dekkiyo booro.

28In̄kino maṅ ulbuguṅ i t'oodé ye a ono geṅ me, kono onniyo saṅ t'aana, wo doṅ pay adda muuziyagi an d'olliga golladó, wo an di-balda.

29Aame geṅ doṅ ize beehiye'ṅ an di-balda, an t'oona lekkiyo, wo doṅ ize oldiko an di-balda, booro t'anni seeda.

30Nuṅ munda ti suma nuuno k'eedó ni k'aane ni k'ise ye, ni dekkiyo booro n'ollige ti golla Meega Raa. Wo booro ere ni dekkiyo gette ki diine, kono ni ki dehu n'a k'ise munda wede aa addó i dehu ye, n'aase munda wede aa wede yi n'igibo yi dehu.»

Duwo an rootiyo ono a tukk'Isa

31Isa y'a ruute sey, y'ede: «Aame nuṅ batum n'a kizite ono a tukki nuṅ batum maṅ, onamó duwo an k'ambe ye.

32Wo i kazita a tukki nuṅ wede doolo, wo ni suune onamí doṅ yi kazita a tukki nuṅ geṅ derec.

33Kune kun d'igibe doṅ zina ki tukki Zaṅ Batis, wo yoṅ y'un di gizite ono doṅ derec a tukki nuṅ.

34Wo ki nuṅ, ni ki dehu wedusu ye a kizite ono a tukki nuṅ me, wo ni rootiyo in̄kino kono ni dehu kune kun d'utte.

35Zaṅ geṅ yoṅ aa biṅge oyyiso i tooriyo, wo kune kun d'iyye kun d'ize un̄suwo ti yode k'onniyo miibi a toorayí.

36Zaṅ yi gizite ono a tukki nuṅ, wo nuṅ o d'ede suldi baadaṅ ti doolo sey a jiiere doṅ Zaṅ yi gizite. Derec, naabo ere Meega y'o elo, ere ni d'isiyo ettiyo batum, ti kazita a tukki nuṅ, wo i-kaza i n'igibo Meega.

37Wo Meega wede i n'igibo toṅ, yode batum y'a gizite a tukki nuṅ. Yoṅ wede kun k'illiga golladí ye, kun ki wulle ume k'edayí ye,

38wo onamí i ki lekkiyo adda k'adduguṅ ye, kono kun ki ziipe adduguṅ a nuṅ wede y'igibo ye.

³⁹Kun dooyiso baadaŋ ono doŋ an riije ti kaaga adda mattup ki Raa, kono kun elkiyo ti kane geŋ miŋ kun t'oona lekkiyo ere ki daayum. De kane geŋ miŋ an kazita a tukki nuuno.

⁴⁰Wo kune kun ki dehu kun ki d'etto tuddó, kun ki t'oone uttiyo ye.

⁴¹Nuŋ ni ki dehu tamma ere ettiyo t'urzi duwo ye.

⁴²Kune n'unni suune, geyyiso Raa a adduguŋ umbo.

⁴³Nuŋ n'iido'ŋ ti suma Meegó, wo kun gi di'n ziidfa ye. Wo wede doolo y'a etto ti suma yode geŋ, kun di y' seedfa bey sire.

⁴⁴Kune kun dehu duwo an un di'n t'imme, wo tamma ere ettiyo ti Raa soo daŋŋal kun ki ti dehu ye. De kun zaape adduguŋ a nuŋ mummino?

⁴⁵Kun elke ye unni sakiyey a daana Meega nuuno me, unni sakiyey Muusa yode wede kune kun di ziipe elkisaguŋ geŋŋo.

⁴⁶Aame kun ziipe adduguŋ a Muusa kotto maŋ, a nuuno toŋ maŋ kun zaape adduguŋ, kono yoŋ yi riije miŋ a tukki nuuno.

⁴⁷Wo aame ono doŋ Muusa yi riije geŋ kun k'umbe ye maŋ, kun d'ambe onamó mummino?»

Zaŋ 6

Eliyo k'ombo a kuuli dupu paat

(Matiye 14.13-21; Markus 6.30-44; Lik 9.10-17)

¹Saŋ maŋ tiŋ geŋ Isa y'a t'iiziga, yi-ti diipida ti dar bar Galile ti nee, sundutú soo bar ki Tiberiyat.

²Wo doŋ baadaŋ an di y' diine kono an wulle suldi k'armika doŋ y'isiyo a doŋ k'eeni geŋŋo.

³Maŋ Isa ti sanalliyagi an aa di gili eego makkolo, an di-guune.

⁴Onniyto gette tarnaape Pak ki Yawudiyagi aa guute goppon.

⁵Isa yi zibbe edayi maŋ, yi wolliyo doŋ duuru baadaŋ an'tiyo tuddaŋ. Maŋ yi di ruute Pilip, y'ede: «De a too me in d'owila mappa, in an t'ela doŋ duuru kino ga ooma me?»

⁶Isa yi-rootiyo a Pilip iŋkino yi deediyo addi, yi roota moo me. Wo ki yode Isa maŋ, yi suune munda wede y'aasa me.

⁷Maŋ Pilip yi di'n gime onami, y'ede: «In t'oone tamma meeda sire, in t'owila mappa pay toŋ maŋ, a t'ide dey ko wede soŋ yi-t'oone boolo booloŋ me?»

⁸Maṅ Andire leema Simo Piyer, yode toṅ ti diine sanalliyagi k'Isa, yi di ruute, y'ede:

⁹«A sirpa eṅ i d'ede ulo a beezí mappa paat an iidíba ki orz ti puuni sire, de geṅ a t'íde moo a doṅ duuru eṅ me?»

¹⁰Iṅkino maṅ Isa y'a ruute, y'ede: «Duwo eṅ kun ti'n kondíta.» A ume geṅ soole baadaṅ. Maṅ duwo suma dupu paat geṅ an di-gundíte adda.

¹¹Maṅ Isa y'a-ziki mappay'a ruute koduwo a Raa, y'an di-dikkída a doṅ duuru geṅṅo. Wo puuni toṅ y'a-t'ize iṅkino kay, an d'iimi, an d'isse a uupite.

¹²Aame duwo pay geṅ an iimi an issite maṅ, Isa y'an di ruute sanalliyagí, y'ede: «Ombo ere uupite kun ti tussi mentú ye.»

¹³Maṅ kane an ti-tusse, an d'ûune dappa koomat makumu sire, ti oopiyo ki mappa paat ki orz wede duwo an d'iimi geṅ me.

¹⁴Aame doṅ geṅ an wulle munda k'armika wede Isa y'ize geṅṅo maṅ, an'de: «Ki kotto wede eṅ nebi wede an ruute ti kaaga y'a etto k'adda duniya.»

¹⁵Aame geṅ Isa y'a zuune, an iido'ṅ ki toogo miṅ an ti'n t'ela mozigo, maṅ y'a t'irga siidí k'ekki makkolo.

Sooru k'Isa t'ekk'ahu

(Matiye 14.22-27; Markus 6.45-52)

¹⁶A tukki lohe maṅ, t'ekki makkolo sanalliyagí an di-díigo biza bar.

¹⁷An di-gili adda tooko kono an di-doopída ki geeger Kapernayim ti dar bar ti nee. Ume y'ize diddo, wo Isa yi ki'n uuna ye botto.

¹⁸Aame kane adda k'ahu geṅ i d'iiziga maaye baadaṅ, ahu i-kolzite.

¹⁹An ize suma kubbaara paat zoot maṅ, an wolliyo'ṅ Isa yi sooru t'ekk'ahu, y'ettiyo tuddaṅ. Maṅ orgiso t'anni ziidá kono an ki zuune ye ettiyo geṅ Isa me.

²⁰Maṅ Isa y'an di ruute, y'ede: «Kun orgide ye, eṅ nuuno!»

²¹Aame geṅ an dehu y'a di kili ti kane adda tooko, wo kaciṅ taṅ booloṅ an iina zeṅge ki siido ere an d'ette.

Ombo ere ettiyo ti kandaane

²²Soggo maṅ kane duwo doṅ uupe ti zeṅge bar t'inno geṅ, an wulle tooko tiṅ soo daṅṅal. Sanalliyagí an di-gili, wo Isa ti kane yi k'ingile ye, an ingile siidaṅ.

²³Wo saṅ maṅ i d'iina tookiyagi ti Tiberiyat, a ume wede duwo an d'iimi mappa wede Galmeega y'a ruute koduwo a Raa geṅṅo.

²⁴Aame kane duwo geṅ, an wulle Isa ti sanalliyagí kane umbo maṅ, an aa di-giliti adda tookiyagi geṅṅo, an d'umbe Kapernayim dehu k'Isa.

- 25** Aame an ti diipida mañ, an di y'uune ti dar bar ti nee, wo an di y' tunde, an'de: «Wede dooyisadey, de kee k'iina a en woogo me?»
- 26** Isa y'an di ruute, y'ede: «Derec in̄kino wo n'un di rooto: Kune kun ni dehu kono kun zuune ita suldi k'armika geñño ye. Kun ni dehu kono n'un d'ele mappa kun d'iimi, kun d'isse geñño.
- 27** Kun naabe ki ombo ere i-ti lattiya gettiyo ye, wo de kun naabo ki ombo ere un t'ela lekkiyo ere ki daayum, ere nuñ wede an n'ehe aa ulo wede en, n'un t'ela. Derec, Meega y'a ti ziipe tampo ki toogadi a nuuno.»
- 28** Mañ kane an i di ruute, an'de: «Ay d'ise mummino kono ay di naabe naabo ere Raa yi dehu te?»
- 29** Isa y'an di ruute, y'ede: «Naabo ere Raa yi delliyo kune kun d'ise te, kun zaape addugun a yo wede yode batum y'igibo.»
- 30** Mañ kane an di ruute, an'de: «Munfa k'armika miñ tuuku me kee k'isa ay di wolla, wo ay di zaapa addey a kee me? Naabo tiñ k'isa tuuku te?
- 31** Ti kaaga toñ mongidagiñ aame kane adda balda geñ an iimi ombo ere sundutu mann, aa an riñe ti kaaga adda mattup ki Raa, an'de: "Y'an ele ombadañ iido ti kandaane."»
- 32** Mañ Isa y'an di ruute, y'ede: «Derec in̄kino wo n'un di rooto: Ombo ere iido ti kandaane gette un ele Muusa ye, wo Meegó y'un eliyó ombo ere ki kotto, ettiyo ti kandaane.
- 33** Ombo ere Raa y'eliyo, tod'te ti diigo ti kandaane, ti d'eliyo lekkiyo a don duniya pay.»
- 34** In̄kino mañ an i-di ruute, an'de: «Galmeegey, ombo gette k'ay eeli ki daayum.»
- 35** Isa y'an di ruute, y'ede: «Nuñ miñ ombo ere ti d'eliyo lekkiyo. Wede y'iido tuddó mañ, mosogo ti ki y' seeda ye ki daayum. Wo wede yi ziipa addi a nuñ mañ, orme yi ki y' seeda ye ki daayum.
- 36** Wo de n'un ti y' ruute: kun wulle toñ, kun ki ziipe addugun a nuñ ye.
- 37** Kane don pay Meega y'o eliyó en, an d'etto ki tuddó. Wo wede ettiyo ki tuddó geñ, ni ki y' kiigira ye.
- 38** Nuñ n'iido ti kandaane n'a k'ise naabo ere aa addó i ki dehu ye, n'aase naabo ere aa wede i n'igibo yi dehu.
- 39** Wo naabo ere ki wede i n'igibo yi dehu ettiyo: kane don y'o elo en, soo toñ ni ki dagga ye, wo n'a ti'n balda pay a onniyo k'ita mañ.

⁴⁰Eyye, ettiyo naabo ere Meegó yi dehu te: kane dɔŋ pay an ti gima edayaŋ ki tukk'Ulo, an ziipa addaŋ a yode maŋ, an t'oono lekkiyo ere ki daayum, wo nuŋ onniyo k'ita maŋ n'a ti'n balda.»

⁴¹Aame Isa yi ruute, y'ede: «Nuŋ ombo ere i dɔigo ti kandaane» geŋ, kane Yawudiyagi an illiga maŋ, an d'orbe sunni sunni ti tuddaŋ kono yode,

⁴²wo an di ruute, an'de: «Yode eŋ Isa ulo Yusup ye ko? Meegí ti meedí toŋ in'ni suune enno. De yi rootiyo yi dɔigo ti kandaane mummino?»

⁴³Isa y'an di ruute, y'ede: «Kun orba sunni sunni ti tuddugaŋ ye.

⁴⁴Wenda soo toŋ y'a etto ki tuddó ti siidí umbo, daa ki Meega wede i n'igibo y'a ki y'irgo ki tuddó ye maŋ. Wo nuŋ onniyo k'ita n'a ti y' balda.

⁴⁵Ono eŋ nebiyagi an riije ti kaaga adda mattup ki Raa, an'de: “Doŋ pay an t'oono dooyiso ti Raa.” In'kino maŋ wede tuuku y'illiga ono Meega wo y'a zida a dooyiso gettiyo maŋ, y'a etto ki tuddó.

⁴⁶Wenda soo toŋ i wulle Meega umbo, daa ki wede iido ti daana Raa ye maŋ. Yode daŋŋal i yi wulle Meega me.

⁴⁷Derec in'kino wo n'un di rooto: Wede yi ziipa addí a nuŋ maŋ, yode geŋ y'uune lekkiyo ere ki daayum.

⁴⁸Nuŋ miŋ ombo ere i d'eliyo lekkiyo.

⁴⁹Ti kaaga moŋgidagaŋ an iimi ombo sundutú mann a balda toŋ, an t'inda,

⁵⁰wo de ombo ere ti dɔigo ti kandaane ette, tod'te wede y'iima maŋ, yi ki t'inda ye.

⁵¹Nuŋ miŋ ombo ere i d'eliyo lekkiyo, i dɔigo ti kandaane. Aame wede y'iima ombo ettiyo maŋ, y'a t'oono lekkiyo ere ki daayum. Wo ombo ere n'an t'ela tod'te tukiŋadó, n'an t'ele kono duwo pay an t'oono lekkiyo.»

⁵²A onamí geŋ kane Yawudiyagi an d'iise niikiyto ti tuddaŋ, an'de: «Mummino me wede eŋ y'in t'ela tukiŋadí in d'aadima me?»

⁵³Maŋ Isa y'an di ruute, y'ede: «Derec in'kino wo n'un di rooto: Aame kune kun k'iidima tukiŋo ki nuŋ wede an n'ehe aa ulo wede enno ye, wo kun k'iiba puuzadó ye maŋ, lekkiyo kun ki ti t'oono ye.

⁵⁴Wede y'iidima tukiŋadó wo y'iiba puuzadó maŋ, y'a t'oono lekkiyo ere ki daayum. Wo y'inda toŋ maŋ nuŋ onniyo k'ita n'a ti y' balda.

⁵⁵Derec, tukiŋadó tod'te ombo ere ki kotto, wo puuzadó sobo ere ki kotto.

⁵⁶Wede y'iidima tukiŋadó wo y'iiba puuzadó maŋ, y'a lekka kettiyo ti nuŋ, wo nuŋ n'a lekka kettiyo ti yode.

57 Meega wede i n'igibo, yoŋ yi lekkiyo zeere, wo nuŋ toŋ ni lekkiyo zeere t'urzi yode. Geŋ iŋkino wede y'iidima tuddó maŋ, y'a lekka zeere t'urzi nuuno kay.

58 Wo ombo ere i diigo ti kandaane ette: Tod'te aa ombo ere sundutú mann, moŋgidaguŋ doŋ ti kaaga an d'iimi gettiyo ye. Ombo gette an d'iimi toŋ an t'inda. Wo wede y'iima ombo ere nuŋ n'eliyo ettiyo maŋ, y'a t'oono lekkiyo ere ki daayum.»

59 Ono geŋ Isa yi ruute a Kapernayim, aame yi dooyiso duwo a boy wede Yawudiyagi ge dooyiso.

Sanalliyagi oŋgo an t'irga ti tukk'Isa

60 Aame kane sanalliyagí an illiga Isa yi ruute iŋkino maŋ, oŋgoŋ an'de: «Onamí eŋ i jiire eego, iŋkino wee wee a ambe me?»

61 Yode Isa y'a zuune t'adda k'addí sanalliyagí geŋ an orbe sunni sunni ti tuddaŋ a ono doŋ yi ruute geŋ me, maŋ y'an di ruute, y'ede: «Onamó eŋ kune un uuŋe de?

62 Aame kun wulla nuŋ wede an n'ehe aa ulo wede eŋ, ni-gila k'awwa k'umayó ti poone maŋ, kun t'eesa moo me?

63 Eliyo lekkiyo a duwo Unde Raa, wo naabo gette wede tudde yi k'aane yi ki-t'ise ye. Ono doŋ n'un ruute geŋ, kane an'tiyo ti Unde Raa wo an d'eliyo lekkiyo.

64 Wo de ti diinaguŋ doŋ oŋgoŋ an ki ziipe addaŋ a nuŋ ye.» Wo geŋ Isa yi'ni suune t'ume k'eesiyo too kane doŋ i ki ziipe addaŋ a yode ye, wo wede a yi t'ela a bey doŋ k'olmidayí me.

65 Isa y'a ruute sey, y'ede: «Geŋ iŋkino kono kamo n'un ruute, wede ti siidí yi k'aane yi k'etto tuddó ye, aame Meega yi-ki t'ihina urzi ye maŋ.»

66 Aame yi ruute iŋkino maŋ, kane sanalliyagí baadaŋ an di lidde ti tuddí, an d'iili daaniyadi te.

67 Iŋkino maŋ Isa y'an di ruute sanalliyagi kane koomat makumu sire geŋ, y'ede: «Wo kune toŋ, kunuŋ kun dehu kun ti ledde pay ko?»

68 Maŋ Simo Piyer yi di ruute, y'ede: «Galmeegey, kaye ay d'ette k'ita k'aaye? Kee onamá i d'eliyo lekkiyo ere ki daayum me.

69 Kaye ay ziipe addey a kee, wo ay suune kee Wede kamileŋ Raa y'igibo.»

70 Isa y'an di ruute, y'ede: «Kune koomat makumu sire geŋ, unni biire nuuno ye ko? Wo de wede soo ti diinaguŋ yoŋ ulo Meeda siitandani.»

71 Isa yi rootiyo iŋkino ti Ziidas ulo Simo Iskariyot, wede ti diine sanalliyagi kane koomat makumu sire, a y'owila a bey doŋ k'olmidayí.

Zaɗ 7

Zemba k'Isa an ki ziipe addaɗ a yode ye

- ¹Aame geɗ Isa yoɗ daayum a siido Galile, yi sooru, yi d'ambu keɗɗo keɗɗo. Yi ki dehu y'a k'ozirte adda siido ki Ziide ye, kono deero Yawudiyagi an yi dehu ki t'owwadi.
- ²Aame geɗ tarnaape Yawudiyagi sundi soo tarnaape ki daabagi geɗ goppon.
- ³Inkino maɗ zemba k'Isa an i di ruute, an'de: «T'en ki t'oozo, k'engilo ki siido Ziide kono sanalliyaga don a ummey ton maɗ, an di wolle naabo ere k'isiyo gette.
- ⁴Aame wede yi dehu duwo an di y' suune maɗ, yi k'ombida ye naabo ere yi d'isiyo te. Wo kee k'isiyo sulfi k'armika geɗ beehiye'ɗ, don duniya pay an di wolle, wo an gi-di suune.»
- ⁵Kaciɗ kane zemba k'Isa ton an ki ziipe addaɗ a yode ye.
- ⁶Maɗ Isa y'an di ruute, y'ede: «Nuɗ peedado ti k'iide ye botto. Kune peedagun tod'te daayum koduwo.
- ⁷Kune don duniya an un ki'n kiigira ye. Wo nuɗ an ni koogire kono n'an t'oodibe ita a naabadaɗ ere an isiyo oldo gettiyo.
- ⁸Kune tarnaape kun ti kolo. Nuɗ ni ki kili ye kono peedado ti k'iide ye botto.»
- ⁹Aame y'an ti ruute inkino maɗ, yoɗ y'a uupe a siido Galile.

Dooyiso k'Isa a tarnaape ki daabagi

- ¹⁰Aame zembadi an ti gili tarnaape maɗ, saɗ maɗ yode ton y'a-gili, wo kaɗ ombide, wenda soo ton i ki y' wulle ye.
- ¹¹Adda tarnaape geɗ kane deero Yawudiyagi an di y' dehutu, an'de: «De Isa miɗ a too me?»
- ¹²Wo kane don duuru geɗ an di niikutu ti tuddaɗ. Don ongon an'de: «Yoɗ wede isiyo beehiye.» Wo don soɗ an'de: «Ato, yoɗ yi ti daggiya duwo.»
- ¹³Wo ti diinayaɗ geɗ wenda y'a roote ti golla awwa umbo, kono an orgiso a deero Yawudiyagi.
- ¹⁴I t'innite iina diine tarnaape maɗ, Isa y'a t'iide booro Boy Raa, y'a iise dooyiso duwo.
- ¹⁵A dooyisadi gette kane deero Yawudiyagi an ziida gaggiraɗ, an'de: «Mummino me wede en yi ki duuye tunda ye, wo yi suuniyo ono mattup kino me?»

16Maṅ Isa y'an di ruute, y'ede: «Dooyiso ere ni dooyiso ette ti suuniyo nuuno k'eedó ye. T'ettiyo ti Raa wede i n'igibo.

17Aame wede yi dehu y'aase naabo ere Raa yi dehu maṅ, y'a ti suune dooyisadó te. Dooyisadó ettiṅ t'ettiyo ti Raa kunuṅ, ni rootiyo ti suma nuuno k'eedó ko?

18Wede geṅ aame yi rootiyo ti suma yode k'eedí maṅ, geṅ yi dehu dúwo an di y' t'imme. Wo wede yi naabiya a suma wede i y'igibo maṅ, wede geṅ yi rootiyo ono donṅ d'erec, munda wede di yode ki diine ye umbo.

19Ki kotto kune un ele oogoro Muusa, wo kune wenda soo toṅ a seeda aa oogoro ti rootiyo umbo. De ki moo me kun dehu kun di n' t'ide me?»

20Kane donṅ duuru an i-di ruute, an'de: «Kee a-d'ede siitan a eedá ko? Kunuṅ wee wee i dehu tôwwadá me?»

21Isa y'an di ruute, y'ede: «Nuṅ n'ize munda k'armika soo danṅal, wo kune pay kun ziida giggirguṅ.

22Waldu ponde gette t'iise ti moṅgidaguṅ ti kaaga to, ti k'iise ti Muusa ye. Wo Muusa y'un d'ele urzi ki waldu k'inṅni kuuli. Maṅ onniyo ere ki puukiyadiṅ toṅ kune kun di waldu ponde me.

23Wo aame ulo'ṅ onniyo waldu pondayí a t'ooriyo onniyo ere ki puukiyadiṅ, kun di waldu kono kun aa ki ti doopida oogoro Muusa ye maṅ, de ki moo me kune kun di kulkiso ti nuṅ, kono ni ele beeko pay a wede tudde a onniyo ere ki puukiyadiṅ me?

24Kun dekke booro a munda wede kun wolliyo t'edaguṅ ye, wo de kun dekho booro ere ki diine.»

25Donṅ onṅo ti siido Zeruzalem geṅ an di rootiyo, an'de: «Eṅ miṅ wede an dehu ki tôwwadí dey?

26Kun wollo do yi d'orbe a daana dúwo daa k'ombide, wo wenda i di roote umbo. Kunuṅ donṅ deero an yi zuune eṅ Almasi Raa yi biire ko?

27Wo ki too maṅ yo Almasi Raa yi biire ettiyadiṅ gette y'etto ti tunda, wenda soo toṅ umbo a suuna itadí me, wo yode eṅ itadí in ti suune.»

28Iṅkino maṅ Isa yi dooyiso a booro 'Boy Raa geṅ, y'a ruute ti golla awwa, y'ede: «Kune dúwo eṅ, kun'de nuṅ kun ni suune, wo kun suune itadó. Para maṅ ni k'iido ti suma nuuno k'eedó ye, wo yo wede i n'igibo geṅ yoṅ yi rootiyo ono donṅ d'erec, miṅ kun ki y' suune ye.

29Wo nuṅ ni yi suune kono i n'igibo yode, wo nuṅ n'iido ti gulbe yode.»

30Iṅkino maṅ kane an di dehu urzi seeduzí, wo wenda soo toṅ a ette a yi seeda umbo, kono yoṅ onniyadiṅ ti k'iide ye botto.

³¹Aame geɗ ɗoɗ baadaɗ ti diine ɗoɗ duuru an di ziipe addaɗ a yode, wo kane an di ruute, an'de: «Almasi Raa yi biire y'iido toɗ maɗ, y'aasa sulɗi k'armika baadaɗ a ceera wede eɗɗo ɗey?»

Agisa ɗuwo ki seedu k'Isa

³²Maɗ kane Pariziyen an d'illiga ono ɗoɗ, ɗoɗ duuru an orbe sunɗi sunɗi a tukk'Isa geɗ me. Inɗkino maɗ kane Pariziyen ti deero ɗoɗ sedeke an d'igibe ɗoɗ i boohiyo Boy Raa ki seedu k'Isa.

³³Maɗ Isa y'a ruute, y'ede: «Nuɗ ti kune onniyadó oo guute baata, saɗ maɗ n'a-kima k'ume wede i n'igibo.

³⁴Kune kun di n' deha wo kun ki n' t'oona ye, kono ume wede nuɗ n'ette geɗ, kun k'aana ettiyo ye.»

³⁵Inɗkino maɗ kane Yawudiyagi an di ruute diinayaɗ, an'de: «De y'a amba miɗ, ki too me in gi di y' t'oona ye me? Y'a engila ki tukki Yawudiyagi ɗoɗ i-tiipe an lekkiyo adda diine ɗoɗ Yawudiyagi ye geɗɗo ko? Kunuɗ y'a dooyey ɗoɗ Yawudiyagi ye ko?

³⁶Ono ɗoɗ yi rootiyo, y'ede: “Kun di n' deha wo kun ki n' t'oona ye” wo “ume wede nuɗ n'ette geɗ, kune kun k'aana ettiyo ye”, miɗ i-kaza moo me?»

Ahu ɗoɗ i d'eliyo lekkiyo

³⁷Onniyo ere ki ɗaɗɗu tarnaape gette, tod'te onniyo ere meeda. A onniyo gette Isa y'a t'iiziga kaɗ ôhire, wo y'a ruute ti golla awwa, y'ede: «Wede ôrme yi y' ziiɗa maɗ, y'edi tuddó yi-siba.

³⁸Wede yi ziiɗa addi a nuuno maɗ, aakede an riine ti kaaga adda mattup ki Raa, an'de: “Y'a t'isa aa ersa k'ahu ɗoɗ i d'eliyo lekkiyo okko baadaɗ t'adda k'addi.”»

³⁹Isa yi rootiyo inɗkino ti Unde Raa ere Raa y'an t'ela a ɗoɗ i ziipe addaɗ a yode. Aame geɗ Raa y'an k'ele Undi ye botto a ɗuwo me, kono Isa yi ki gili k'awwa ki daryikadi ye botto.

Kono k'Isa ɗuwo tuddaɗ an ti t'ihinte

⁴⁰Doɗ oɗɗo ti diine ɗoɗ duuru geɗ an illiga ono k'Isa maɗ, an di ruute, an'de: «Wede eɗ ki kotto yoɗ nebi wede an ruute a etto.»

⁴¹Oɗɗo soɗ an'de: «Eɗ Almasi Raa yi biire.» Wo ɗe ɗoɗ oɗɗo an'de: «Almasi Raa yi biire geɗ y'a addo ti Galile, i k'ise ye!

⁴²Ki kotto an riine ti kaaga adda mattup ki Raa, Almasi Raa yi biire geɗ y'adda ti biza bumbu mozigo Dawut, wo an yi t'eha a Betlehem siido ere an d'eha Dawut.»

⁴³Inɗkino maɗ kono k'Isa geɗ, ɗuwo tuddaɗ an ti-t'ihinte.

⁴⁴Doŋ oŋgo ti diinayan geŋ an dehu seeduzí, wo wenda soo toŋ a t'ooziga a yi seeda umbo.

⁴⁵Aame geŋ doŋ i boohiyo Boy Raa, kane an igibe ki seedu k'Isa geŋ, an di-gimo. Maŋ kane deero doŋ sedeke ti Pariziyen an di'n tunde, an'de: «De moo me kun ki y' ziido ye me?»

⁴⁶Maŋ kane doŋ i boohiyo Boy Raa an'de: «Wede en me, wede tudde a roote ono aa yode umbo.»

⁴⁷Maŋ kane Pariziyen an an di ruute, an'de: «Kune toŋ maŋ y'un ti'n diggo pay ko?»

⁴⁸Kunuŋ kun wulle ko? Ti diine deero Yawudiyagi ise Pariziyen wede soo i ziipe addi a yode me!

⁴⁹Kun wolliyo kane doŋ ambu ono yode geŋ, kane oogoro an ki ti suune ye, duudiyo Raa a eedaŋ.»

⁵⁰Nikodem yoŋ ede, yoŋ wede ti diine Pariziyen, yode wede onniyo soo y'a uuney Isa a diddo geŋ, y'an di ruute, y'ede:

⁵¹«A urzi k'oogiradiŋ, wede daa k'ollige bizi wo daa suuniyo munda wede y'ize geŋ, booro ti y' seeda ko?»

⁵²Kane an i di'n gime onami, an'de: «Kee toŋ ti siido Galile pay ko? Ki wollo mattup k'ono Raa ki koduwo, ki t'ona ko nebi ti siido Galile me?»

Erewo ti t'udige kule bakatú

[⁵³Iŋkino maŋ an di-tiipe wede tuuku toŋ y'a aahe boozí boozí.

Zaŋ 8

¹Wo Isa y'a iŋgile k'ekki mukkolo k'Inda k'Olibiye.

²Soggo ti soohe walak maŋ, Isa y'a-gimo ki booro Boy Raa, wo doŋ baadaŋ an d'iido tuddi. Iŋkino maŋ y'a-guune, y'an di'n iise dooyiso.

³Aame geŋ doŋ suuniyo k'oogoro ti Pariziyen, an ziido erewo an aa ti ziido ti moone ti kule bakatú, an di-t'iido k'ume k'Isa, an ti-t'ihira a daana duwo pay

⁴wo an i di ruute a Isa, an'de: «Galmeegey, erewo ette ay aa ti ziido ti moone ti kule bakatú.

⁵Adda mattup k'oogoro, Muusa y'in riine ti kaaga y'ede, erayi doŋ isiyo kino en, ki towwo ki kakkisa ti mongali. Wo ki kee maŋ, k'ede moo me?»

⁶An rootiyo iŋkino an i ekkiyo ikka, kono an di y' seeda t'ono. Maŋ Isa y'a t'uttile, yi-reekiso y'elagi a siido.

⁷Kane an koɗɗime tonɗisadí, in̄kino Isa y'a t'umbe eedí, wo y'an di ruute, y'ede: «Ti diinaguŋ eŋ wede yi k'isiyo oldíko ye maŋ, yi ambo mokkolo, y'a ti seɗɗo ki poone.»

⁸Maŋ y'a t'uttile sey, yi-reekiso y'elagí a siido.

⁹Aame an illiga Isa yi ruute in̄kino maŋ, kane ɗoŋ duuru an d'iise eŋgilsito soo me k'ita bakadí bakadí, iise ti gôɗɗali bini a-t'íide. I d'uupe Isa kane ti erewo gettiyo ti d'ôhire a ɗaanadí.

¹⁰In̄kino maŋ Isa y'a t'umbe eedí, wo y'a tunde erewo, y'ede: «Erewo no, ɗoŋ i ki'n ziido'ŋ kane too me? Wenda soo toŋ a roote koŋ booro ti ki'n ziida umbo ko?»

¹¹Maŋ ti di'n gime onamí, t'ede: «Wenda soo toŋ umbo, Galmee'ki nuŋ.» In̄kino maŋ Isa y'a ruute, y'ede: «Nuŋ toŋ maŋ ni ki ɗekke booro eedí ye. Mi t'oozo, m'eŋgilo wo m'isa oldíko ye baa.»]

Isa yoŋ toore a duniya

¹²Isa y'an di ruute sey, y'ede: «Nuŋ miŋ wede i d'eliyo toore a ɗoŋ duniya pay. Wede yi ni diina maŋ, y'a t'oono toore wede i di t'ela lekkiyo, yi k'ozira zimolo ye.»

¹³Maŋ kane Pariziyen̄ an i di ruute, an'de: «Kee ki kazita ono a tukki kee batum geŋ, onamá ay k'ambe ye.»

¹⁴Isa y'an di ruute, y'ede: «Aame nuŋ ni kazita ono a tukki nuuno batum toŋ maŋ, onamó ɗerec kono ni suune ti too me n'iido me, wo ume n'ambe me. Wo ɗe kune, kun ki suune ye ume wede n'iido, wo n'ambe ki tunda me.

¹⁵Kune kun ɗekkiyo booro a suuniyo ere ki kune ɗoŋ tudde. Nuŋ a tukki wenda soo toŋ ni ki ɗekkiyo booro ye.

¹⁶Wo aame ni ɗekkiyo booro maŋ, ni ɗekkiyo ɗerec kono nuŋ siidó ye. Ay ɗekkiyo booro soo ti Meega wede i n'igibo me.

¹⁷Ono eŋ an riije ti kaaga adda mattup k'oogiraguŋ, an'de: “Doŋ sire an rootiyo onamaŋ i t'íide kaŋ soo maŋ, geŋ onamaŋ ɗerec.”

¹⁸Nuŋ ni kazita ono a tukki nuŋ batum, wo Meega wede i n'igibo toŋ, yi kazita ono a tukki nuŋ kay.»

¹⁹In̄kino maŋ kane an i di ruute, an'de: «De Meegá too me?» Maŋ Isa y'an di'n gime onamaŋ, y'ede: «Nuŋ kun ki n' suune ye, wo Meegó toŋ kun ki y' suune ye. Aame nuŋ kun ni zuune maŋ, Meegó toŋ kun di y' suune.»

²⁰Isa yi ruutite ono geɗ aame yo a booro Boy Raa, yi dooyiso goppon ti ume wede duwo an di boohiyo korbite Boy Raa. Wo wenda soo toɗ a yi seeda umbo kono yoɗ onniyadi ti k'iide ye botto.

Ono k'Isa a engilsadi

²¹Isa y'an di ruute sey, y'ede: «Nuɗ n'engila, wo kune kun di n' deha, wo de kun aa di t'inda ti oldikaguɗ a egguɗ. Ume wede n'ette eɗ, kun k'aane ettiyo ye.»

²²Inkino maɗ kane Yawudiyagi an di ruute tuddaɗ, an'de: «Kunuɗ yi rootiyo inkino y'a t'ida tuddi ko, yi rootiyo: "Ume wede n'etta eɗ, kun k'aane ettiyo ye" me?»

²³Maɗ Isa y'an di ruute, y'ede: «Kune'ɗ ti dandi a duniya, wo nuɗ ti kandaane t'awwa. Kune ki duniya ettiyo, wo nuɗ ki duniya ettiyo ye.

²⁴Kono k'inkino n'un di ruute kun di t'inda t'oldikaguɗ a egguɗ me. Aame kun k'ambu "nuɗ miɗ nuɗ" ye maɗ, kune kun di-t'inda ti oldikaguɗ a egguɗ.»

²⁵Maɗ kane Yawudiyagi an di y' tunde, an'de: «De kee miɗ wee wee?» Isa y'an di ruute, y'ede: «Nuɗ n'un ti gize tuddo t'ume k'eesiyo to.

²⁶Nuɗ oo d'ede ono ki rootiyo a ekki kune, ti suldi doɗ n'a dekke booro egguɗ toɗ baadaɗ, wo wede i n'igibo'ɗ yoɗ yi rootiyo ono doɗ derec, wo ni kazita a duwo pay munda wede n'ollige ti bize yode Raa.»

²⁷Wo kane Yawudiyagi an ki zuune ye y'an rootiyo ti Meega me.

²⁸Inkino maɗ Isa y'an di ruute, y'ede: «Aame nuɗ wede an n'ehe aa ulo wede eɗ, kun ti n' ziipa t'awwa maɗ, kun di'n suuna eɗ "nuɗ miɗ nuɗ". Wo kun di suuna munda wede ti suma nuuno k'eedo ni k'isiyo ye, ni rootiyo munda wede Meega yi ni duuye.

²⁹Wo yo wede i n'igibo geɗ, yoɗ ti nuuno. Yi ki n'ooliyo siido ye, kono nuɗ n'isiyo daayum munda wede ulbi i-d'ise unse.»

³⁰A ono doɗ Isa yi ruute geɗ, doɗ baadaɗ an di ziipe addaɗ a yode.

Doɗ eedaɗ toore ti doɗ adda buliko

³¹Maɗ Isa y'an di ruute a Yawudiyagi doɗ i ziipe addaɗ a yode, y'ede: «Aame kun lekkiyo kettiyo a onamo maɗ, kune sanalliyago ki kotto.

³²Aame geɗ derec kun di suuna, wo derec gette t'un di'n isa doɗ eedaɗ toore.»

³³Maɗ kane an i di ruute, an'de: «Kaye ita k'inɗi k'Ibirayim, buliko a wenda kaɗ soo toɗ ay k'ize ye. De k'ay di rootiyo kun t'isa doɗ eedaɗ toore mummino?»

³⁴Isa y'an di ruute, y'ede: «Derec inkino wo n'un di rooto: Wede isiyo oldiko geɗ yoɗ bule k'oldiko.

35Wede ɓule geɗ yi ki lekka daayum adda ɓoy ye, wo ulo ɓoy geɗ yoŋ miŋ daayum y'a lekka adda ɓoy.

36Aame Ulo Raa y'un ti'n iza eggun toore maŋ, kune kun t'isa ki kotto ɗoŋ eedaŋ toore.

37Nuŋ ni suune kune ita k'inŋi k'Ibirayim me. Wo kun di dehu urzi tōwwadó kono onamó geɗ kun k'ambu ye.

38Munɗa wede nuŋ ni rootiyo, ni wullo ki Meegó. Wo kune kun isiyó munɗa wede meegugun y'un ruute.»

39Maŋ kane an di ruute, an'de: «Kaye meegey Ibirayim.» Isa y'an di ruute, y'ede: «Ki kotto aame kune inŋi k'Ibirayim maŋ, kun d'ise naabo ere aa yoŋ y'aaze.

40Nuŋ n'un ruute ono ɗoŋ ɗerec n'illigo ti Raa toŋ, aŋkeŋ kun di dehu urzi tōwwadó. Wo inŋino me Ibirayim yi k'ize ye.

41Kune kun isiyó naabo ere ki meegugun.» Maŋ kane an i di ruute, an'de: «Kaye inŋi ɗoŋ ki bande ye, Meegey soo, yode Raa.»

42Isa y'an di ruute, y'ede: «Aame Meegugun Raa ki kotto maŋ, nuŋ kun di n'geyye kono nuŋ n'udɗo miŋ ti Raa, wo n'iido keŋno t'urzi yode. Ni k'iido'ŋ ti toogo k'eedó ye, yode i n'igibo me.

43Moo me ono ni rootiyo itadaŋ kun ki'n suuniyo ye me? Kono kun ki dehu kun k'olliga ye onamó me.

44Kune meegugun Meeda siitandani, wo kun dehu kun d'ise naabo ere meegugun yi dehu. Yoŋ t'ume k'eesiyo to, naabadí tōwwó ɗuwo. Munɗa wede ɗerec yi k'isiyo ye, kono ɗerec di yode umbo. Aame yi lohito ono maŋ, yi rootiyo t'addí pay, kono yoŋ wede lohito, wo yoŋ meeki lohito k'ono.

45Wo kono nuŋ ni rootiyo ono ɗoŋ ɗerec geɗ, onamó kun ki d'ambu ye.

46Wee wee t'adda diinagun eŋ aane i roote nuŋ ni ize oldíko me? Wo ɗe aame ni rootiyo ono ɗoŋ ɗerec maŋ, ki moo me onamó kun ki d'ambu ye me?

47Inŋino maŋ wede yoŋ ki Raa geɗ y'a olliga ono ki Raa. Wo kun k'ollige ye kono kune ki yode Raa ye.»

Isa ti Ibirayim

48Maŋ kane deero Yawudiyagi an i di ruute a Isa, an'de: «Kaye ay ruute ay'de kee Samariten, wo a-d'ede siitan a eedá geɗ, ɗerec ye ko?»

49Isa y'an di-gime onamaŋ, y'ede: «Nuŋ oo k'ede siitan a eedó ye. Ni tamma Meegó, wo kune kun di-toogiyo ki tammadó me.

50 Nuŋ ni ki dehu tamma tuddó ye, wo wede ede i dehu tammadó me, yoŋ geŋ wede dekkiyo booro.

51 Derec iŋkino wo n'un di rooto: Wede y'ollige onamó wo y'a ti sooru eego maŋ, kudic unto yi ki ti wolla ye.»

52 Maŋ kane deero Yawudiyagi an i di ruute, an'de: «Aŋkeŋ kaye ay zuune baa, kee a-d'ede siitan a eedá. Ibirayim y'inda ti kaaga wo nebiyagi toŋ an t'inda, miŋ kee k'ede: “Wede y'ollige onamó wo y'a ti sooru eego maŋ, kudic unto yi ki ti wolla ye.”

53 Kee'ŋ goole ki ceere meegey Ibirayim wede inda, ti nebiyagi doŋ i t'inda ko? Kunuŋ k'elkiyo kee wee wee?»

54 Maŋ Isa y'an di ruute, y'ede: «Aame nuŋ n'a t'imme tuddó maŋ, tammadó gette ki bita. Nuŋ i ni tamma Meegó, wede kun'de yoŋ Raaguŋ geŋŋo,

55 wo kun gi di y' suuniyo ye. Nuŋ ni y' suune, wo aame n'a roote ni ki y' suune ye maŋ, geŋ nuŋ ni t'ize wede lohito k'ono aa kune. Wo de nuŋ ni y' suune, wo ni d'ollige onamí n'a-ti sooru eego.

56 Aame meeguguŋ Ibirayim y'illiga onniyadó yi ti wolla maŋ, addí a ûune t'unŋsuwo, wo yi ti wulle maŋ, ulbí uŋse.»

57 Maŋ kane deero Yawudiyagi an i di ruute, an'de: «Kee ozzinagá ada paat toŋ i k'iide ye, de Ibirayim k'a yi wulle mummino?»

58 Isa y'an di ruute, y'ede: «Derec iŋkino wo n'un di rooto: Ki poone Ibirayim an di yi t'eha geŋ, “nuŋ miŋ nuŋ”.»

59 Iŋkino maŋ an ziki moŋgali ki kakkisadí, wo Isa yi-ti digge diine doŋ duuru, t'adda booro Boy Raa y'a t'udde.

Zaŋ 9

Eliyo beeko a wede koosiyo

1 Onniyo soo Isa yi sooru, maŋ yi wulle wede koosiyo t'ume an y'ehe to.

2 Maŋ kane sanalliyagí an di y' tunde, an'de: «Wede dooyisadey, wede eŋ ize oldiko miŋ, yode kunuŋ maawí ko, an di y'ehe koosiyo me?»

3 Isa y'an di ruute, y'ede: «Yoŋ koosiyo kono k'oldiko yode ye, wo kono k'oldiko maawí ye. An y'ehe koosiyo kono Raa yi dehu y'a kize toogadí t'urzi yode.

4 Peedo to ede botto, t'a ki t'iire ye geŋ, in d'ise naabo ki wede i n'igibo. Aame diddo t'iina maŋ, wenda soo toŋ a naaba umbo.

5 Aŋkeŋŋo nuŋ adda duniya botto eŋ, nuŋ miŋ wede i d'eliyo toore a doŋ duniya pay.»

⁶Aame Isa y'a ti ruute in̄kino maṅ, yi bidde lee a siido, y'a-lutte, yi-t'elite eda wede koosiyo geṅṅo,

⁷maṅ yi di ruute, y'ede: «K'odo, ki t'opili a togile ki Silowe.» (Suma Silowe i-kaza «Agisa».) Wede geṅ y'a iide, y'a t'upilo, yi-gimo maṅ yi wolliyo kereṅ.

⁸In̄kino maṅ kane doṅ k'ita waayadí ti kane doṅ i yi wullite y'ahultu geṅ, an di ruute, an'de: «De eṅ wede i-ti konso, i d'ahultu ginno ye ko?»

⁹Doṅ oṅgo an'de: «Eṅ yode.» Oṅgo an'de: «Ato, eṅ yode ye. Wenda eṅ yi yi deey'iso.» Maṅ yode batum y'ede: «Eṅ miṅ nuuno dey.»

¹⁰Kane an di yi tunde, an'de: «Kaṅ mummino edayá a t'ihina me?»

¹¹Maṅ yoṅ y'an di'n gime onamaṅ, y'ede: «Wede an yi waaku Isa geṅ yi-lutte siido ti lee bizí, wo y'o-t'elite a edayó, maṅ y'o di ruute, y'ede: "K'odo, ki t'opili a togile Silowe." N'a iide, n'a t'upilo, maṅ edayó o-t'ihino.»

¹²Maṅ kane an di ruute, an'de: «Wede geṅ too me?» Yoṅ y'a ruute, y'ede: «Daṅ ni ki suune ye.»

Tondiso ki wede koosiyo edayí i t'ihina

¹³Koosiyo wede edayí i t'ihina geṅ, an di t'iide ki daana Pariziyen̄.

¹⁴Onniyo ere Isa yi lutte siido, yi d'ihina eda wede geṅ, onniyo gette onniyo ere ki puukiyo Yawudiyagi.

¹⁵In̄kino maṅ kane Pariziyen̄ toṅ an di y' tunde, an'de: «Mummino edayá a t'ihina me?» Maṅ wede y'an di ruute, y'ede: «N'uune bee me, wede y'iide'ṅ, y'o t'un̄kite lee a edayó, wo n'iide'ṅ n'a t'upilo, maṅ edayó a t'ihina, ni wolliyo.»

¹⁶Maṅ kane Pariziyen̄ oṅgo an di ruute, an'de: «Wede ize naabo gette yi k'iido ti Raa ye, kono y'a ti diipida onniyo ere ki puukiyadiṅ.» Wo de kane doṅ soṅ an'de: «Wede k'oldfiko sulfi k'armika kino y'aane yi t'ise ko?» Geṅ ti diinayan̄ an t'ihinte.

¹⁷In̄kino maṅ wede koosiyo edayí i t'ihina geṅ, an di y' tunde sey, an'de: «De kee k'ede moo me a wede a ihina edayá me?» Maṅ wede y'a ruute, y'ede: «Yoṅ geṅ nebi.»

¹⁸Wo kane deero Yawudiyagi an di-tuuge k'ambu, wede geṅ ti poone yoṅ koosiyo wo aṅken̄ edayí a t'ihina me. In̄kino an di wiiko maawi k'ehiyadí.

¹⁹Maawí an iina maṅ, an di'n tunde, an'de: «Yode eṅ ulo kune kotto ko? Wo kun y'ehe miṅ koosiyo to ko? Wo aṅken̄ mummino yi wolliyo me?»

²⁰Kane maawí an an di'n gime onamaṅ, an'de: «Eyye, ay suune eṅ uley, wo ay ehe koosiyo to.

21Wo aŋkenno yi wल्लीyo aaze mummino ay ki suune ye, wenda i ele beeko ay ki y' suune ye. Kun tondo yode, yoŋ enno yi t'ize goole, y'un ti rooto.»

22Maawí an rootiyo iŋkino kono an orgiso a deero Yawudiyagi, kono kane an ti ruute ti diinayaŋ an'de, wede yi ruuta kereŋ Isa yoŋ Almasi Raa yi biire maŋ, an ti y' limma ti diinayaŋ me, k'adda boy wede Yawudiyagi ge dooyiso yi k'etta ye.

23Geŋ iŋkino maawí an ruute, an'de: «Yoŋ enno yi t'ize goole, kun tondo yode» me.

24Maŋ kane Pariziyen an di y' wiike sey ki sirwe, wo an i di ruute, an'de: «Ki rooto derec a daana Raa, ki kaye maŋ ay suune wede en yoŋ wede k'oldiko.»

25Iŋkino yoŋ y'an di ruute, y'ede: «Nuŋ ni ki suune ye yoŋ wede k'oldiko, wede k'oldiko ye toŋ maŋ. Ki nuŋ munda wede ni suune, ti poone nuŋ koosiyo wo aŋken ni wल्लीyo.»

26Kane an di y' tunde, an'de: «Y'a ize moo me? Mummino me y'a di t'ihina edaya me?»

27Y'an di ruute, y'ede: «Nuŋ ono geŋ n'un ti ruute, wo kun ki n'illiga ye. De ki moo me kun dehu n'un di roote sey me? Kunuŋ, kune toŋ kun dehu kun t'ise sanalliyagi pây ko?»

28Iŋkino maŋ an di y'iise kaldita, an'de: «Kee sanallusu yode me, kaye sanalliyagi ki Muusa.

29Kaye ay suune a Muusa Raa yi ruute me, wo yo wede en ay ki suune ye y'ettiyo ti tunda koo maŋ.»

30Wede y'an di ruute, y'ede: «Onamguŋ en nuŋ ni ziida giggiró, wede y'o t'ihina edayó miŋ, way kun'de y'ettiyo ti tunda kun ki suune ye!

31Kine in suune Raa geŋ doŋ k'oldiko yi ki'n ollige ye. Wo y'ollige wede i ottilso wo y'isiyo naabo ere aa yode Raa yi dehu.

32T'ume k'eesiyo duniya bini aŋki, wenda kaŋ soo toŋ yi k'illiga ye wedusu yi di t'ihina eda koosiyo t'ume k'ehiyadí me.

33Aame wede en yi k'iido ti Raa ye maŋ, yi k'aane yi ki t'ise munda ye.»

34Iŋkino maŋ kane an i di ruute, an'de: «Kee miŋ t'ume k'ehiyadá to ŋilpiyo adda k'oldiko, miŋ ki dehu k'ay di'n dooye!» Maŋ an di y'ilmí, an di y'udde paate.

Doŋ koŋzayi a urzi k'unde

35Aame Isa y'illiga wede yi ihina edayí geŋ deero Yawudiyagi an ti y'ilmí maŋ, y'a iide, y'a y'uuney wo yi di ruute, y'ede: «Kee ki ziipe addá ko a yoŋ wede an y'ehe aa ulo wede en me?»

³⁶Maɗ wede geɗ yi di'n gime onamí, y'ede: «Yoŋ wee wee Galmeegó, kono n'a zaape addó a yode me?»

³⁷Isa yi di ruute, y'ede: «Wede ki yi woliyo wo a-rootiyo, eɗ miɗ yode.»

³⁸Maɗ wede yi di ruute, y'ede: «Nuɗ ni ziipe addó a kee, Galmeegó.» Y'a-dikke, y'a t'uttile a daanadí.

³⁹Iɗkino maɗ Isa yi di ruute, y'ede: «Nuɗ n'iido k'adda duniya kono n'a dekká booro, doŋ koŋzayi edayan a-t'ihina, wo doŋ an woliyo geɗ an t'isa koŋzayi.»

⁴⁰A sirpa geɗ i d'ede Pariziyen an illiga iɗkino maɗ, an di ruute, an'de: «Kunuɗ kaye toŋ ay t'isa koŋzayi pay ko?»

⁴¹Isa y'an di ruute, y'ede: «Aame kune koŋzayi wo munda wede kun isiyo kun ki suune ye maɗ, geɗ booro t'un ki'n seeda ye. Wo kune kun'de kun woliyo kereɗ geɗ, booro t'un di'n seeda, oldikaguɗ a lekka daayum a egguɗ.»

Zaɗ 10

Ono ombide a urzi wede k'elso

¹Isa y'an di ruute sey, y'ede: «Derec iɗkino wo n'un di rooto: Aame wede yi k'adfiya ti biza ye, yi dahumu ti zaribe k'adda k'ume moone dambami me maɗ, yoŋ geɗ wede k'oogire goole.

²Wo wede ettiyo ti biza geɗ, yoŋ wede k'elso.

³A wede k'elso geɗ, wede boohiyo dambami yi di t'ihina biza. Yi-t'ette, y'a waake dambamí ere soo ti sundutú sundutú, wo kane an d'ollige golladí, pay y'an adde paate.

⁴Aame yi ti'n adfiya pay ti paate maɗ, y'an t'oogumso wo kane an di y' daaniya, kono kane golladí an ti suune.

⁵Wo wede an ki y' suune ye geɗ, kudic kane an ki y' daane ye. Wo a jire sey an t'ombe dokki ti tuddí me, kono golladí an ki ti suune ye.»

⁶Isa y'an di ruute ono ombide, wo ono geɗ itadan an gi di'n zuune ye, yi rootiyo munda me.

Isa wede k'elso beehiye

⁷Isa y'an di duule sey, y'ede: «Derec iɗkino wo n'un di rooto: Nuɗ miɗ aa biza bumbu wede dambami an d'adfiya.

⁸Doŋ iido ki poone ti nuɗ geɗ, kane deero k'oogire, wo kane'ɗ dambami an ki'n illiga ye.

⁹Nuñ miñ aa biza bumbu. Aame wede y'ettiyo t'urzi nuuno mañ, y'a t'oona uttiyo. Yi-t'ette wo y'a t'adde aa addi i dehu, wo ombó toñ yi-t'oona.

¹⁰Wede k'oogire geñ y'ettiyo miñ ki oogire, ki t'owwo wo ki lattiya. Wo nuñ n'iido kono n'an t'ele lekkiyo a duwo, lekkiyo ere adda darna.

¹¹Nuñ miñ wede k'elso beehiye. Wede k'elso beehiye geñ y'a oyye y'a t'inda kono dambamí me.

¹²Wo wede i naabiya ki raññadí, yoñ wede k'elso ye, dambami ki yode ye geñ, yi wulle sullibe yi t'udfo mañ, y'a t'ombe, dambami yi d'ooli. Mañ dambami sullibe yi-sedde, wo doñ soñ an aa di-teepe.

¹³Wede i naabiya ki raññadí geñ, yoñ y'a t'ombe kono yi wolliyó munda wede ki yode, yoñ seezi ye a dambami me. Nuñ wede k'elso beehiye,

¹⁴dambamó ni'ni suune, wo kane an ni suune.

¹⁵Aakede Meega yi ni suune, wo nuñ toñ ni y' suune. N'a oyye n'a t'inda kono dambamó.

¹⁶Nuñ oo d'ede dambami ti doolo toñ ede, an aa ki t'iido k'adda zaribe enno ye. Kane genno toñ n'a-ti'n waako pây, an d'olliga golladó. Inkinó a t'isa tordó soo, wede k'elso toñ soo.

¹⁷Meega geñ yi ni giyye kono nuñ n'iyye n'a t'inda, kono sañ n'a balda.

¹⁸Wenda soo toñ umbo aane a t'oodiba puukiyadó te, i t'eliyo nuñ ti siidó. Nuñ o d'ede toogo k'oodibe puukiyadó wo o d'ede toogo k'eliyo a umatú. Geñ inkinó munda wede Meegó y'o ruute n'aase me.»

¹⁹Aame kane deero Yawudiyagi an illiga ono k'Isa inkinó mañ, ti tuddañ an t'ihinte sey.

²⁰Doñ baadañ ti diinayan an di ruute, an'de: «Yoñ geñ ki maade, siitan a eedí. De ki moo me kun di y'ollige me?»

²¹Wo doñ soñ an'de: «Eñ ono ki wede i-d'ede siitan a eedí ye. Ki kotto siitan ti k'aane ti ki t'ihina eda ki koñzayi ye.»

Yawudiyagi an giigira Isa

²²Ozzine ti ozzine, a sommide a ume reele baadañ mañ, an d'isiyo tarnaape a Zeruzalem kono an d'elkiyo a onniyo ere Boy Raa an di y'ize kamilen.

²³Aame geñ Isa yi-t'iide adda booro Boy Raa, yi sooru adda daabe goole wede an yi waaku Daabe Salamon, yi d'ambu k'ume soo me, soo me.

24 Inƙino kane deero Yawudiyagi an di ti duule, wo an i-di ruute, an'de: «De kee'ŋ ay della, k'ay k'iza tuddá woogo me? Aame kee Almasi Raa yi biire maŋ, k'ay ti rooti kereŋ.»

25 Maŋ Isa y'an di ruute, y'ede: «Nuŋ n'un ruute, wo kun ki ziipe adduƙuŋ a nuuno ye. Naabo ere pay nuŋ n'isiyo ti suma Meegó gette, i-kaza a tukki nuŋ.

26 Wo kune kun ki ziipe adduƙuŋ a nuuno ye, kono kune dambamó ye.

27 Dambamó an d'ollige golla nuŋ wede k'elsadaŋ. Nuŋ ni'ni suune wo kane an di n' daaniya.

28 Nuŋ n'an t'ela lekkiyo ere ki daayum. Kudic an ki t'inda ye wo wenda soo toŋ a ti'n t'ooba ti beezó umbo.

29 Meegó wede oo n'elo geŋ yoŋ togo y'a jiire pay, wenda soo toŋ umbo a aane a-t'oobe munda ti bey Meega me.

30 Nuŋ ti Meega geŋ kaye wede soo.»

31 Inƙino maŋ kane deero Yawudiyagi an ziki moŋgali sey ki kakkisadí ki tôwwadí.

32 Isa y'an di ruute, y'ede: «Nuŋ a daanaguŋ n'ize naabo beehiye baadaŋ ti suma Meegó me, wo naabo tiŋ tuuku ere n'ize kun dehu kun di n' kakkite ti moŋgali ki tôwwadó me?»

33 Kane deero Yawudiyagi an i-di ruute, an'de: «Ay dehu ay ki ti kakkite ti moŋgali ay gi di t'ide ki naabo ere beehiye k'ize gettiyo ye. Ay ki t'ide kono ki kaldá suma Raa, kee wedusu, wo ki-ti t'isiyo tuddá Raa.»

34 Isa y'an di ruute, y'ede: «Ono eŋ an riije ti kaaga adda mattup k'oogiraguŋ: "Raa y'ede kune raayagi."

35 Kun suune wenda soo toŋ umbo a aane a t'oodiba munda wede an riije ti kaaga adda mattup ki Raa me. Geŋ inƙino kane doŋ Raa y'an ruute onamí geŋ, y'anni wiike kane raayagi me.

36 Wo nuŋ wede Raa y'a-n'uuye kese a yode, y'a-n'igibo k'adda duniya, wo ni rootiyo n'ede nuŋ Ulo Raa maŋ, kune kun'de ni kaldíta suma Raa. Geŋ kaŋ mummino ni kaldíta me?

37 Aame ni k'isiyo naabo Meegó ye maŋ, kune toŋ kun ki zaape adduƙuŋ a nuuno ye.

38 Wo aame naabo Meega ni ti t'isiyo wo a nuŋ kun ki zaape adduƙuŋ ye toŋ, kun zaapo adduƙuŋ a naabo gettiyo, kono tiŋ geŋ kun di suuna kereŋ Meega ti nuŋ wo nuŋ ti yode.»

- ³⁹Inkino maŋ kane Yawudiyagi an di dihe seedufuzí sey, wo yoŋ y'an t'umbilke.
- ⁴⁰Maŋ Isa y'a-gime, yi-ti diipida ti dar k'ooye Zurden ki kese peedo ge-koliyo, k'ume wede Zaŋ y'a zuyyite batem ti poone. Yi lekkiyo aŋgeŋno.
- ⁴¹Doŋ baadaŋ an d'iide tuddí, wo an di rootiyo, an'de: «Zaŋ geŋ munda k'armika yi k'ize ye, wo ono doŋ yi ruutite a tukk'Isa geŋ derec.»
- ⁴²A ume geŋ doŋ baadaŋ an di ziipe addaŋ a yode Isa.

Zaŋ 11

Unto Lazar

- ¹⁻²I d'ede wede soo sundí Lazar ti ille ki Betani. Yoŋ geŋ leema Mariyam ti Marte, an lekkiyo kaŋ soo, wo to Mariyam gette ere i di y'irgite egey doŋ eediyadaŋ uŋse a zoŋ k'Isa, t'a di zippite t'ilaltú. Maŋ onniyo soo leemadaŋ Lazar geŋ yi t'iire eeni.
- ³Inkino maŋ kane zembadí geŋ an di gibe wedusu, yi di rooto a Isa, y'iide'ŋ y'ede: «Galmeegey k'ollo, laŋzayá wede ki giyye geŋ, yi t'iire eeni.»
- ⁴Aame Isa y'illiga inkino maŋ, y'a ruute, y'ede: «T'eení geŋ Lazar yi ki t'inda ye, wo t'urzi geŋ duwo an di t'imma Raa. Wo soŋ t'urzi geŋ duwo an di t'imma Ulo Raa.»
- ⁵To Marte ti teematú Mariyam wo Lazar geŋ, Isa yi'ni giyye baadaŋ.
- ⁶Wo aame y'illiga Lazar tuddí eeni maŋ, y'a k'iide kaamiki ye. A umayí geŋ yi likke onniyo sire.
- ⁷Saŋ maŋ y'an di ruute sanalliyagi, y'ede: «In ti kime ki siido Ziide.»
- ⁸Maŋ kane sanalliyagi an i di ruute, an'de: «Wede dooyisadey, botto botto eŋ miŋ Yawudiyagi an dehu an ki ti kakkite ti moŋgali ki tôwwadá, miŋ ki dehu k'a kime k'ummey sey!»
- ⁹Isa y'an di ruute, y'ede: «T'ume peedo ti koliyo bini t'a-t'oore geŋ, ume'ŋ toore kereŋ, wo wede yi sooru toŋ maŋ morkiy'e yi ki t'ele ye, kono yi wolleiyo toore ki doŋ duniya pay.
- ¹⁰Wo wede yi sooru diddo maŋ, y'a t'ele morkiy'agi kono toore i-k'ede ye.»
- ¹¹Aame Isa yi ruute inkino maŋ, y'an di ruute sey, y'ede: «Laŋzayiŋ Lazar edayi i ziida moone, wo nuŋ n'ette n'a ti y' t'inney.»
- ¹²Maŋ kane sanalliyagi an i di ruute, an'de: «De yi moone maŋ, saŋ y'a utta.»
- ¹³Yo Isa yi ruute inkino ti moone ere Lazar y'inda, wo kane an elkiyo ti moone ere aa daayum.

- 14 Inƙino maɗ Isa y'an di ruute pataɗ, y'ede: «Lazar y'inda.
- 15 Nuɗ ulbó unse a kune sanalliyagó, kono n'a t'ize umbo a untadí me. T'urzi geɗ un t'ela toogo kun di zaapa addugun a nuuno. Wo aɗkenɗ in engile, in ti y' wollo.»
- 16 Inƙino maɗ Toma wede an yi waaku soɗ Wede Rooɗo geɗ, y'an di ruute a sanalliyagi oɗoɗ, y'ede: «Kun t'oozo, kine toɗ in di t'indey ti yode.»
- 17 Isa y'a iiney Betani. A aaniyadi geɗ an i di ruute Lazar an t'eele adda muuzo ñide onniyo pide.
- 18 Betani gette tod'te gopponɗ ti Zeruzalem me, suma kubbaara aɗo.
- 19 Inƙino maɗ a unto ki Lazar leema Mariyam ti Marte geɗ, ti Zeruzalem Yawudiyagi baadaɗ an d'iide selliyadaɗ.
- 20 Aame Marte t'illiga Isa y'iina gopponɗ t'illadaɗ maɗ, t'a t'iiziga t'a t'iide okkimayi, wo to Mariyam gette ti lekkiyo a boy.
- 21 Marte ti y'uuney maɗ, ti di ruute, t'ede: «Galmee'ki nuɗ, aɗki kee ede maɗ, leemadó yi ki t'inda ye.
- 22 Wo nuɗ ni suune aɗkenɗo toɗ maɗ, munda wede ki tonde Raa geɗ, Raa y'aane y'a-t'ele.»
- 23 Maɗ Isa yi di ruute, y'ede: «Leemadí geɗ yi-balɗa.»
- 24 Marte ti di ruute, t'ede: «Nuɗ ni suune a onniyo k'ita ɗoɗ i t'inda an ti balɗa geɗ, yode toɗ y'a-balɗa.»
- 25 Isa yi di ruute, y'ede: «Nuɗ miɗ wede i d'eliyo lekkiyo wo i balɗiya ɗoɗ unto. Wede yi ziipa addí a nuuno maɗ, aame y'inda toɗ y'a-balɗa.
- 26 Wo wede tuuku yi lekkiyo, wo yi zaapu addí a nuuno maɗ, kudic unto yi ki ti wolla ye. A ono eɗ koɗ m'umbe ko?»
- 27 Maɗ tod' ti di'n gime onamí, t'ede: «Eyye Galmee'ki nuɗ, nuɗ n'umbe kee Almasi Raa yi biire, wo Ulo Raa, wede Raa yi ruute a etto ki duniya.»
- 28 Inƙino maɗ, t'a-gime waaku teematú Mariyam. T'iide'ɗ ti di miline, t'ede: «Wede dooyisadiɗ yo a enno. M'edi, yi kin tonɗiyo.»
- 29 Mariyam t'illiga inƙino maɗ, perek t'a t'iiziga, t'a inɗile k'ume yode.
- 30 Aame geɗ Isa k'adda k'ille yi ki t'iide ye botto. Yo daayum a ume Marte t'a y'uuney geɗno.
- 31 Kane Yawudiyagi ɗoɗ a ita Mariyam an ti selliyo geɗ an wulle ti t'iiziga perek maɗ, kane toɗ an a-t'iiziga, an di-diine, kono an elkiyo ti t'ette môolo ki biza muuzo.

³²Mariyam gette t'iiney aame k'Isa wo ti y' wulle maṅ, t'a dikke a ḍaanadí, wo ti di ruute, t'ede: «Galmee'ki nuṅ, aṅki kee ede maṅ, leemadó yi ki t'inda ye.»

³³Isa yi wulle Mariyam ti m̄olo ti Yawudiyagi ḍoṅ a itatú pay maṅ, yode toṅ addí y'a ki n'iibe ye, a-litte.

³⁴Maṅ y'a tunde, y'ede: «A ume too me kun ti y'eele me?» Wo kane an i di ruute, an'de: «K'edi Galmeegey, k'a wolley a ummey.»

³⁵Iṅkino maṅ Isa edayí a ise soldite zumari.

³⁶Maṅ kane Yawudiyagi an di ruute, an'de: «Kun ki wollo ḍo, yi giyye baadaṅ ḍe me, yi m̄olo me.»

³⁷Wo kane ḍoṅ oṅgo ti diinayaṅ an di ruute, an'de: «Yoṅ wede i di t'ihina eda wede koosiyo ḍe, ki moo me y'a iili Lazar y'a inda me?»

Baldíya Lazar

³⁸Isa geṅ daayum yi k'iine addí yi ki n'iibe ye, y'a t'iide biza muuzo. Wo to muuzo gette aa urmi, an t'ele nuune adda, biza an a-ti ḍuṅkile zumbulu.

³⁹Isa y'an di ruute, y'ede: «Zumbulu kun ti y' ḍoṅkilo ti biza muuzo me.» Maṅ Marte teema ki wede inda geṅ, ti di ruute, t'ede: «Galmee'ki nuṅ, yoṅ y'eediyo baa kono i d'ede onniyo pide t'ume an ti y'eele adda muuzo me.»

⁴⁰Maṅ Isa yi di ruute, y'ede: «Nuṅ ni ruute ḍe me, aame mi ziipa addí a nuuno maṅ, m'a wolla toogo ki Raa.»

⁴¹Maṅ zumbulu ti biza muuzo an ti y' ḍuṅkile. Aame geṅ Isa y'a t'umbe edayí k'awwa, y'a ruute, y'ede: «Koduwo baadaṅ a kee Meegó, kono kee ki n'illiga.

⁴²Derec, nuṅ ni suune daayum kee ki n'ollige, wo nuṅ ni rootiyo iṅkino a ḍoṅ sirpadó eṅ an d'ambe kono i n'igibo kee Raa.»

⁴³Aame y'a ti ruute iṅkino maṅ, y'a idili ti golla awwa, y'ede: «Lazar, ki-t'adfi!»

⁴⁴Maṅ Lazar wede inda geṅ y'a bildé, y'a t'udḍo t'adda muuzo me, beydí ti zoṅdí geṅ tuuniyto ti buḍḍani, wo eedí diibiyo ti buude pây. Wo Isa y'an di ruute a ḍoṅ sirpa geṅ, y'ede: «Buḍḍani kun i t'eezito, wo kun di y'oolo, y'a eṅgile.»

Dehutu k'urzi ki t̄owwo k'Isa

(Matiye 26.1-5; Markus 14.1-2; Lik 22.1-2)

⁴⁵Yawudiyagi baadaṅ ḍoṅ iido selliyo Mariyam geṅ an wulle armika ere Isa y'ize gettiyo maṅ, an di ziipe addaṅ a yode.

⁴⁶Wo ḍoṅ oṅgo an iide'ṅ, an an di gize a Pariziyenṅ a munda wede Isa y'ize.

⁴⁷Maɗ kane deero ɗoɗ sedefe ti Pariziyen geɗ an t'ugiyee deero booro Yawudiyagi, an di ruute diinayan, an'de: «In d'ise mummino, kono wede en y'isiyo sulɗi k'armika baadan.

⁴⁸Aame in y'iila a naabadí ettiyo maɗ, duwo pay an di zaapa addan a yode, inkinoo kane Romeɗ an d'etto, Boy kamilen ki Raa an ti y' latta wo siidadiɗ pây.»

⁴⁹Maɗ ti diinayan i d'ede wede soo sundí Kayip, a ozzine geɗ mozigo goole ɗoɗ sedefe yode, y'an di ruute, y'ede: «Kune munda kun ki suune ye.

⁵⁰Kun ki wolliyo ye ko, munda wede beehiye a kine, wede soo y'a t'inda ki kine ɗoɗ siido, miɗ kine pay in di t'inda.»

⁵¹Wo ono ɗoɗ udde ti bize geɗ i k'iido ti suuniyo yode ye, kono a ozzine geɗ mozigo goole ɗoɗ sedefe yode geɗ, Raa yi-d'ele ono ɗoɗ y'a ruute Isa y'a t'inda kono ɗoɗzi Yawudiyagi.

⁵²Wo yi t'inda ki ɗoɗ siido ɗanɗal ye, wo de k'ogiyso k'inɗi Raa ɗoɗ i-tiipe, an t'isa kaɗ soo.

⁵³Geɗ inkinoo ti onniyo gette kane pay an d'iyye ki tówwadí.

⁵⁴Tiɗ geɗ yode Isa toɗ tuddí y'a ti ziida, yi gi di waariya ye a diine Yawudiyagi me. Wo t'umayí geɗ y'a t'irga, y'a inɗile ki geeger sundutú Epirayim a biza balda, ti sanalliyagi an di lekkiyo anɗenno.

⁵⁵Aame geɗ tarnaape Pak ki Yawudiyagi aa guute goppon. Inkinoo maɗ ɗoɗ baadan t'adda siidiyagi an di-gili ki Zeruzalem kono an t'okkimey tuddan, an t'ise kamilen a daana Raazan.

⁵⁶Adda booro Boy Raa geɗ Isa an di y' wekkutu, an di rootiyo tuddan, an'de: «Elkiyagun moo me? Kun elkiyo miɗ Isa y'etto ko tarnaape me?»

⁵⁷Kane deero ɗoɗ sedefe ti Pariziyen geɗ an di ruute, an'de: «Wede tuuku yi zuuna ume k'Isa maɗ, y'ay di rooto, ay di seeda.»

Zaɗ 12

Yergu k'egey ɗoɗ eediyadan unse a zoɗ k'Isa

(Matiye 26.6-13; Markus 14.3-9; Lik 7.36-38)

¹Onniyo zoot ki poone tarnaape Pak ki Yawudiyagi y'a aana geɗ, Isa y'a t'iide Betani, ille ki Lazar wede Isa y'a ti y' bilde ti diine ɗoɗ unto.

²Aame Isa y'iiney Betani maɗ, an d'ize ombo ti sundí. Marte ere k'eliyo k'ombadan, wo Lazar yoɗ ti diine ɗoɗ an iimi kaɗ soo.

³Maṅ Mariyam ti d'umbe egey doṅ eediyadaṅ uṅse sudaṅ nardo, daa kalsiya munda, suma litir a diinayí wo zooyayaṅ ooṅe. Ti di y'irgite zoṅ k'Isa, wo t'a zippite t'ilaltú. Boy geṅ i d'ûune ti eediyó ki egey geṅṅo.

⁴Maṅ i d'ede wede soo ti diine kane sanalliyagi k'Isa sundí Ziidas Iskariyot, yode wede an di y' t'ela Isa a bey doṅ k'olmidayí geṅ, y'ede:

⁵«I dehu egey eṅ in t'owila a adde suma wede y'a naabe ki ozzine batum, wo in an t'ele soṅko gette a doṅ an k'ede munda ye!»

⁶Ziidas yi rootiyo iṅkino kono yoṅ wede k'oogire. I sarkiya korbitayaṅ yode, wo yi ti sokiyo. Yi ki wolliyo sommagi ki doṅ munda an k'ede ye ye.

⁷Maṅ Isa y'a ruute, y'ede: «Tod'te kun t'oolo deddek, kono naabo ere tod' t'ize ette aakede ti n'ikkima ki poone an di n' t'ela adda muuzo.

⁸Kane doṅ an k'ede munda ye geṅ an lekka daayum ti kune, wo de nuṅ ni ki lekka daayum ti kune ye.»

⁹Maṅ kane Yawudiyagi baadaṅ an d'illiga Isa yo a Betani. Iṅkino maṅ an d'iṅgile ki Betani, wo ettiyadaṅ an iide gette an di wollo Isa daṅṅal ye, wo an a di wollo Lazar wede Isa yi ti y' bilde ti diine doṅ unto pây.

¹⁰Ti onniyo gettiṅ kane deero doṅ sedeke an di dihe Lazar toṅ an di y' t'îde,

¹¹kono t'urzi yode Yawudiyagi baadaṅ an t'argu ti tuddaṅ wo an di zaapu addaṅ a Isa.

Ettiyo k'Isa ki Zeruzalem

(Matiye 21.1-11; Markus 11.1-11; Lik 19.28-40)

¹²Ti soggatú maṅ kane doṅ baadaṅ iide tarnaape geṅ, an d'illiga Isa y'ettiyo k'adda geeger Zeruzalem.

¹³Iṅkino maṅ kane doṅ geṅ an dimbo puutagi k'inda sudaṅ palmiye a beydaṅ, an t'iide okkimayí, an di dollite, an d'eesiyo: «Tamma a Raa! Beeko Raa ti koon a ekki wede ettiyo ti suma Galmeega Raa, yoṅ mozigo ki doṅ k'Izirayel!»

¹⁴Isa yi d'uune ulo buuru, y'a-ti gili eego, geṅ a-t'iide a ono doṅ an riije ti kaaga adda mattup ki Raa, an'de:

¹⁵«Kune doṅ geeger Siyoṅ kun orgide ye. Eṅṅo mozigaguṅ y'ettiyo, y'a ti gilo ekk'ulo buuru.»

¹⁶Munda wede ize geṅ ki poone sanalliyagí an ki zuune ye. Wo aame Isa yi-gili kandaane goolikadí Raa yi-t'ele maṅ, kane an d'ilke kaciṅ munda wede an riije ti kaaga adda mattup ki Raa a tukk'Isa geṅ, a-t'iide.

¹⁷Aame Isa y'a wiike Lazar t'adda muuzo wo y'a ti y' bilde ti diine don unto gen, don baadan an wulle, man kane gen an iide'η, an di gizite a duwo a munda wede ize me.

¹⁸Inkino man don baadan an d'ukke okkimayí, kono an illiga munda k'armika wede y'ize gen me.

¹⁹Man kane Pariziyen an d'iise rootiyo ti tuddan, an'de: «Kun wolliyo de'η, kune kun k'aana ye. Wede en y'inni jire, duwo pay an ti buuye k'ume yode.»

Ono k'Isa a urzi k'untadí

²⁰Ti diine don iide Zeruzalem an i-d'ottila a Raa a onniyo tarnaape gen, i d'ede don miibi kane Girek.

²¹Kane gen an d'iide tukki Pilip wede ti Betsayda siido Galile, an di y' tunde, an'de: «Madi, kaye ay dehu ay di wolle Isa.»

²²Man Pilip y'a uuney Andire, sirwan pay an d'ingile k'ume k'Isa an i di ruuto.

²³Aame gen Isa y'an di ruute, y'ede: «Anken peedo t'iide, nuη wede an n'ehe aa ulo wede en, Raa y'an di kiza goolikadó a duwo.

²⁴Derec inkino wo n'un di rooto: Aame buzu ki-giira man, adda siido yi d'unto doo min, yi-t'addiya kollo, yi d'ehiyo inni baadan ti doolo. Wo aame yi k'inda ye man, y'a lekke daayum yoη min yode.

²⁵Wede yi geyyiso tuddi man, y'a ti dagga, wo wede lekkiyadi ere adda duniya ette yi ti giigira man, y'a t'utta wo y'a t'oona lekkiyo ere ki daayum.

²⁶Wede yi dehu yi naabe ki nuη man, y'a ni daane. Gen inkino ume nuη ni lekkey gen, wede naabadó toη angenno. Wede yi dehu yi naabe ki nuη man, Meega y'a yi t'imma.

²⁷Anken undó ti gorpiso, wo nuη n'a roote moo me? N'a t'eese: "Mee'ki nuη, kee ki n'utti ti munda wede ettiyo a eedó en me?" Wo nuη n'iido min kono k'inkino, n'a adá t'urzi dabirsa.

²⁸Mee'ki nuη a duwo sundá k'an ti kaza.» Inkino man ti kandaane golla ti rootiyo, t'ede: «Nuη n'an ti gize, wo n'an di kiza sey.»

²⁹Wo kane don a ume gen an d'illiga, an di ruute, an'de: «Iddise mizzi ko?» Wo don ongo an'de: «I ruute Maaleeka Raa!»

³⁰Man Isa y'an di ruute, y'ede: «Golla gette ti rootiyo a tukki nuuno ye, a tukki kune.

³¹Anken peedo t'iide don duniya booro t'anni seeda, wo Mohita duniya gette Raa y'a ti limma dokki ti paate.

³²Wo ki nuɗ, aame ti siido an ti n' dudda t'awwa maɗ, duwo pay n'an arga a nuuno.»

³³A onamí geɗ yi rootiyo kaɗ mummino urzi yi t'inda me.

³⁴Maɗ kane doɗ duuru geɗ an i di ruute, an'de: «Kaye ay duuye munda wede an riije ti kaaga adda mattup k'oogiradiɗ, Almasi Raa yi biire geɗ yoɗ y'a lekka ki daayum, wo mummino kee ki rootiyo yoɗ wede an y'ehe aa ulo wede eɗ, an ti y' doɗda t'awwa me! Yo wede an y'ehe aa ulo wede, miɗ wee wee?»

³⁵Inkino maɗ Isa y'an di ruute, y'ede: «Toore yoɗ ede botto a diinaguɗ ki onniyto miibi geɗ, kun oziro a toore geɗno kono zimolo t'un gi di'n seeda ye. Wede i sooru a zimolo geɗ, ume y'ette ki tunda yi ki suune ye.

³⁶Miɗ yo toore ede botto geɗ, kun zaapo adduguɗ kun daano toore geɗno, kono kun t'isa inɗi toore.»

Yawudiyagi an ki ziipe addaɗ a Isa ye

Isa y'a ti ruute inkino maɗ, ti tuddaɗ y'a t'irga wo yi-t'umbida.

³⁷Ti suldi k'armika doɗ Isa y'ize baadaɗ a daanadaɗ geɗno toɗ, kane Yawudiyagi an ki ziipe addaɗ a yode ye.

³⁸Geɗ a-t'iide a ono doɗ nebi Ezayi yi ruute ti kaaga, y'ede: «Galme'e'ki nuɗ, wee wee umbe a ono doɗ ay ruutite me? Wo a wee wee Galmeega Raa yi gize toogadi te?»

³⁹Yode Ezayi geɗno batum y'a ruute sey, ki moo me duwo eɗ an k'ambu ye me, kono:

⁴⁰«Raa y'an t'ippe a edayaɗ, wo addaɗ y'an ize zakidi, kono edayaɗ a ki wolle ye, wo eedaɗ t'a ki seeda munda ye. N'an ize inkino kono an ki dehu ye an dikimo ki tukki nuɗ Raa, n'an t'ele beeko me.»

⁴¹Ezayi yi ruute inkino kono yi wulle gooliko k'Isa, maɗ y'a ruute ono a tukki yode me.

⁴²Wo t'urzi geɗno toɗ ti diine deero Yawudiyagi geɗ, doɗ baadaɗ an di ziipe addaɗ a yode kaɗ ombide, kono an orgiso a kane Pariziyen, an ti'n limma ti diinayaɗ, k'adda boy wede Yawudiyagi ge dooyiso an k'etta ye.

⁴³Inkino maɗ kane an di geyyiso tamma ere ettiyo t'urzi duwo, miɗ ti ere ki Raa y'anni t'imme.

Ono k'Isa an dekka booro ekki duwo

⁴⁴Isa y'a ruute ti golla awwa, y'ede: «Wede yi ziipe addi a nuuno geɗ, yi ki ziipe addi a nuuno ye, wo de yi ziipe addi a wede i n'igibo.

⁴⁵Wo wede i ni wulla maɗ, geɗ aa yi wulle wede i n'igibo.

⁴⁶Nuɲ toore wo n'a iido k'adda duniya, kono wede tuuku yi ziipe addí a nuɲ maɲ, y'a ki lekke adda zimolo ye.

⁴⁷Aame wede y'ollige onamó wo yi ki sooru eego ye maɲ, i deƙka booro eedí nuuno ye, kono nuɲ ni k'iido'ŋ deƙkiyo booro ye, n'iido'ŋ n'a utte duwo.

⁴⁸Wede i ni giigira wo onamó yi k'ambu ye maɲ, munda a deƙka booro eedí ede. Wo ono doɲ ni ruute geɲ miɲ, onniyo k'ita maɲ kane geɲ an deƙka booro eedí.

⁴⁹Derec, ono doɲ ni rootiyo eɲ ti suma nuuno k'eedó ye. Meega wede i n'igibo y'o di ruute munda wede n'a roote wo n'a dooye me.

⁵⁰Wo nuɲ ni suune onamí doɲ y'o ruute n'a roote'ŋ kane i d'eliyo lekkiyo ere ki daayum, wo ono doɲ ni rootiyo eɲ, ni'ni rootiyo aa Meega y'o ni ruuto.»

Zaɲ 13

Opilso zoɲ ki sanalliyagi

¹Soggo'ŋ tarnaape Pak ki Yawudiyagi, wo Isa yi suune onniyadi t'iide, duniya ette yi t'oola, yi-kime k'ume Meega. Isa geɲ doɲzi a duniya yi'ni giyye, iɲkino maɲ y'an di'n geyye bini untadí.

²A lohe Isa ti sanalliyagi an ti guune ombo maɲ, Meeda siitandani ti-d'ele elkiyo a biza k'ulbe Ziidas ulo Simo Iskariyot, y'an di y' t'ela Isa a bey doɲ k'olmidayí.

³Wo yo Isa yi suune Raa yi ele suldi pay a beezí, yoɲ yi suune y'iido t'ume Raa, wo y'a-kima k'ume yode Raa,

⁴t'ume k'ombo y'a t'iiziga, kalayí goole t'awwa y'a-buuye, wo yi d'umbe buude y'a gitte a tooní.

⁵Maɲ yi d'ibi ahu a seelo, y'a iise opilso zoɲ sanalliyagi, y'an di sapita ti buude wede yi gitte tooní geɲɲo.

⁶Iina a kaaba Simo Piyer maɲ, y'ede: «Galmee'ki nuɲ, kee k'o ki t'opile ye zoɲdó me!»

⁷Maɲ Isa yi di ruute, y'ede: «Kee munda wede nuɲ n'isiyo'ŋ ki ki y' suune ye, wo saɲ maɲ k'a yi suuna.»

⁸Simo Piyer yi di ruute, y'ede: «Kudic, kee k'o ki t'opila ye zoɲdó me!» Maɲ Isa yi di ruute, y'ede: «Aame n'a ki t'upila ye maɲ, kee ti nuɲ in ki t'okkiya ye.»

⁹Aame geɲ Simo Piyer yi di ruute, y'ede: «Iɲkino maɲ k'o ki t'opile zoɲdó daɲɲal ye, k'o t'opili beydó ti eedó pây!»

¹⁰Maɲ Isa yi di ruute, y'ede: «Wede yi zuyye geɲ y'a ki suyye sey ye, y'a-t'opile zoɲdí baa, kono yoɲ tuddí pay kamileɲ. Wo aɲkeɲɲo eɲ kune kamileɲ, wo pay ye.»

- 11**Wo yo Isa geɗ yi y' suune wede i yi t'ela a bey ɗoɗ k'olmidayí me. Geɗ iɗkino yi rootiyo, y'ede: «Kune pay kamilen ye me.»
- 12**Aame y'a ti ɗiɗge t'opilso zoɗ sanalliyagí maɗ, y'a t'umbe kalayí yi-t'usse, y'a-guune a ume an d'ombo wo y'an di ruute, y'ede: «Munda wede n'ize a kune geɗ, itadí kun yi zuune dey?»
- 13**Kune kun di n' waaku "wede dooyiso" wo "Galmeega", geɗ ki kune ɗerec kono eɗ miɗ nuuno.
- 14**Wo aame nuɗ wede dooyisaguɗ wo Galmeeguguɗ n'un upile zoɗguɗ maɗ, kune toɗ wede tuuku yi-di t'opile zoɗ ki bakadí bakadí.
- 15**Iɗkino geɗ n'un gize urzi, kono kun d'ise aa nuɗ ize a kune.
- 16**Ɗerec iɗkino wo n'un di rooto: Wede naabo geɗ yoɗ t'ekki wede dooyisadí ye, wo wede an y'igibe zina geɗ, yoɗ t'ekki wede i y'igibe ye.
- 17**Ono eɗ kun'ni zuune maɗ, kune adda k'uɗsuwo aame kun a ziida zakidi maɗ.
- 18**Nuɗ ni ki rootiyo ti kune pay ye, wo nuɗ ni'ni suune ɗoɗ ni biire me. Wo geɗ iɗkino a-t'ette a ono ɗoɗ an riije ti kaaga adda mattup ki Raa, an'de: "Wede ay ombo umpadey soo geɗ, yi t'ize wede k'olmidayó."
- 19**T'aɗkenɗo suldi n'un ti'n rooto ki poone an d'aana, wo aame an iina maɗ, kun d'amba miɗ "nuɗ miɗ nuɗ".
- 20**Ɗerec iɗkino wo n'un di rooto: Wede tuuku yi seedu wede n'agisa maɗ, geɗ aa yi seedu nuɗ batum, wo wede tuuku yi seedu nuuno maɗ, geɗ aa yi seedu wede i n'igibo.»

Isa yi-rootiyo Ziidas

(Matiye 26.20-25; Markus 14.17-21; Lik 22.21-23)

- 21**Aame Isa yi ruute iɗkino maɗ, biza k'ulbí a iise zehiso, wo y'a ruute, y'ede: «Ɗerec iɗkino wo n'un di rooto: Wede soo ti diinaguɗ y'a ni t'ela bey ɗoɗ k'olmidayó.»
- 22**Maɗ kane sanalliyagi geɗ wede soɗ yi ti geldiyo bakadí bakadí, wo an ki zuune ye yi rootiyo ti wenda me.
- 23**Ti diine kane sanalliyagi geɗ wede soo Isa yi giyye baadaɗ, y'a-guune a sirpadí.
- 24**Maɗ Simo Piyer yi di dihima ersadí, kono y'a tonde Isa yi rootiyo t'aaye.
- 25**Iɗkino maɗ yo sanallusu geɗ y'a d'uttile k'ume k'Isa, y'a yi tunde, y'ede: «Galmeeki nuɗ, kee ki rootiyo t'aaye?»

²⁶Isa yi di'n gime onamí, y'ede: «Aame ni umba mappa n'a t'ihiba zaami ni ela mañ, geñ yode.» Mañ Isa yi d'umbe mappa, y'a-t'ihiba zaami yi-d'ele a Ziidas ulo Simo Iskariyot.

²⁷T'ume Ziidas yi ziida mappa yi t'iimi mañ, Meeda siitandani ti-t'iide eedí. Mañ Isa yi di ruute, y'ede: «Munda ki dehu k'aase, ki y'iso kesiko.»

²⁸Wo ti diine kane don i-guune ombo geñ, wenda soo toñ umbo a suune ki moo me Isa yi rootiyo Ziidas inkinno me.

²⁹Ziidas geñ yoñ wede sarkiya korbite, inkinno don ongoñ an elkiyo Isa yi rootiyo, y'ette yi d'owilo munda i dehu ki tarnaape koo, y'an d'ette ti munda a don weedayañ umbo koo mañ.

³⁰Wo aame Ziidas yi ziida mappa mañ, kesiko y'a t'udde paate. Ume toñ y'ize diddo baa.

Gooliko k'Ulo Raa

³¹Aame Ziidas yi t'udde mañ, Isa y'a ruute, y'ede: «Anken nuñ wede an n'ehe aa ulo wede en, goolikadó i-gize. Wo t'urzi nuñ geñ, duwo an di wolla gooliko Raa.

³²T'urzi ki nuñ gooliko ki Raa i gize geñ, t'urzi yode Raa y'an di kiza gooliko ki nuñ Ulo gette a duwo, wo tañ booloñ Raa y'a-t'isa.

³³Inni ki nuñ, ti kune n'aa ki lekka baadañ ye baa. Kune kun di'n deha, wo anken n'un di rooto aakede n'an ruute deero Yawudiyagi: Ume wede nuñ n'ette en, kun k'aane ettiyo ye.

³⁴Kun ollo, n'un di rooto urzi k'oogoro aware: Kun geyyo tuddugun. Eyye, kun geyyo tuddugun aakede nuñ n'unni giyye.

³⁵Aame kun giyya tuddugun mañ, duwo pay an un di'n suuna kune sanalliyagó.»

³⁶Mañ Simo Piyer y'a tunde Isa, y'ede: «Galmeeki nuñ, kee k'ambe ki too me?» Mañ Isa yi di'n gime onamí, y'ede: «Ume wede nuñ n'ette en, ankenno ki k'aane ki ki n' daane ye. Wo aame onniyo t'ida mañ, k'a ni daana kollo.»

³⁷Piyer yi di ruute, y'ede: «Galmeeki nuñ, moo me ankenno ni k'aane daaniyadá ye me? Kono kee geñ, k'unto toñ n'a oyye n'a t'inda.»

³⁸Mañ Isa yi di'n gime onamí, y'ede: «Ki kotto k'a oyya k'a t'inda kono nuñ? Derec inkinno wo n'a di rooto: Ki poone uzu y'a ôola geñ, k'a roota ki ki n' suune ye, suune ye tañ ado.»

Zaṅ 14

Isa urzi wede i d'ettiyo k'ume Raa

¹Isa y'an di ruute sanalliyagí, y'ede: «Kune ulbuguñ i t'oodé ye. Kun zaapo addugun a Raa wo kun zaapo addugun a nuuno pây.

²Adda boy Meegó geñ ume lekkiyo baadañ. Ki kotto aame ume umbo mañ, nuñ n'un ki roote ye, n'ette n'un d'okkimey ume me.

³Aame ume n'iida n'un t'ikkimo mañ, n'a-kimo n'un ti'n sika, kono in di lekkey kañ soo a ume wede nuñ ni lekkey.

⁴Kune kun yi suune urzi wede k'ume nuñ n'ette me.»

⁵Mañ Tomas yi di ruute, y'ede: «Galmeegey, kaye ay ki suune ye ume wede kee k'ette me. De mummino ay di suune urzi me?»

⁶Isa yi di ruute, y'ede: «Nuñ miñ urzi, nuñ miñ derec wo nuñ miñ lekkiyo. Wenda soo toñ umbo y'a t'ette k'ume Meega daa nuuno me.

⁷Aame nuñ kun ni zuune mañ, Meegó toñ kun di y' suune kay. Wo ti anki eñ miñ kun yi zuune, wo kun yi wulle.»

⁸Mañ Pilip yi di ruute, y'ede: «Galmeegey, Meega too me k'ay ki y' kazi do, mañ addey a-t'udiga.»

⁹Mañ Isa yi di ruute, y'ede: «Kee Pilip, nuñ ti kaagine ni lekkiyo ti kune, miñ ki ki n' suune ye? Wede yi ni wulle mañ, geñ aa yi wulle Meega. De ki moo me ki rootiyo n'un kaza Meega me?

¹⁰Kee ki k'umbe ye ko, nuñ ti Meega, wo yoñ ti nuñ aa wede soo me. Ono doñ ni rootiyo eñ, ni ki rootiyo ti suma nuuno k'eedó ye. Wo Meega wede i lekkiyo kettiyo ti nuñ geñ, yi d'isiyo naabadí t'urzi nuuno.

¹¹Kun zaapo addugun a nuuno, ki kotto nuñ ti Meega wo yoñ ti nuñ kaye aa wede soo. Aame a onamó eñ kun k'ambu ye toñ, kun ambo a naabo ere n'isiyo.

¹²Derec in kino wo n'un di rooto: Wede yi ziipa addí a nuuno mañ, naabo ere nuñ n'isiyo ette, yoñ y'a-t'isa, wo y'aasa naabo ere a ceera ettiyo sey, kono ni-kime k'ume Meega.

¹³Munda wede kun tunda ti sundó mañ, nuñ n'un di y'isa, kono duwo an t'imma Meega t'urzi k'Ulo.

¹⁴Aame kun tunda munda ti sundó mañ, nuñ n'un di y'isa.»

Agisa k'Unde Kamilen

¹⁵«Aame kun ni geyyiso mañ, urziyagi k'oogoro doñ ni rootiyo geñ kun d'ozire eego.

¹⁶Wo nuñ n'a tonda Meega, y'un t'igibo wede doolo y'un di'n nooga, y'a lekka daayum kettiyo ti kune.

17Wo tod'tiņ Unde ere ki Derec, tode gette doņ duniya an ki ti seeda ye, kono an ki ti wolliyoye wo an ki ti suune ye. Wo de kune kun ti suune, kono tod' ti lekkiyo kettiyo ti kune, wo tod'te t'a lekka adda k'addugun.

18Geņ i-kaza n'un ki'n oola nonğayi ye, n'a kimo tuddugun.

19Taņ booloņ đañnal doņ duniya an ki n' wolla ye baa. Wo kune kun di n' wolla, kono nuņ ni lekkiyo zeere, wo kune toņ kun di lekka zeere kay.

20Onniyo gette t'iina maņ, kune kun di suuna nuņ ti Meegó kaye aa wede soo, kune ti nuņ wo nuņ ti kune aa wede soo.

21Wede yi seedu a urziyagi k'oogoro doņ ni rootiyo wo y'a ti sooru eego maņ, yoņ yi ni giyye. Wo wede i ni giyye geņ, Meegó y'a yi geyya wo nuņ toņ maņ n'a yi geyya kay, nuņ n'a kiza tuddó daayum a yode.»

22Ziid, wede an yi waaku Ziidas Iskariyot ye, yi di ruute a Isa, y'ede: «Galmeegey, mummino me kee k'a kiza tuddá a kaye, a doņ duniya ye me?»

23Maņ Isa yi di ruute, y'ede: «Wede yi ni giyye geņ, y'a seeda onamó, wo Meegó y'a yi geyya. Meegó ti nuņ kaye ay t'etta di yode, ay di lekkey soo.

24Wede yi ki n' geyye ye geņ, onamó yi ki'n seedu ye. Ono doņ kun ollige eņ ti suma nuuno k'eedó ye, ettiyo ti Meega wede i n'igibo.

25Sulđi geņ n'un ti'n ruute ki poone nuņ ede botto ti kune geņ me.

26Wo to Ere Noogiyo tod'te Unde Kamileņ, Meegó yi t'igibo ti suma nuuno. Tode gette t'un di'n dooya a sulđi pay, wo t'un t'ela elkiyo kun d'elka ono doņ pay n'un ruutite.

27Nuņ n'un iili toose, n'un ele toose ere ki nuņ batum. Nuņ n'un ele aa doņ duniya an ki d'eliyo ye. Ulbugun i t'oodo ye, kun orgido ye.

28Kun illiga n'un ruute, n'ede: "N'eņgile wo n'a kimo tuddugun." Aame kun ni giyye maņ, ulbugun aase unse a eņgilsadó k'ume Meega, kono yo Meega goole ti nuņ.

29Sulđi geņ t'aņkeņno n'un ti'n rooto ki poone an d'aana, kono aame an iina maņ kun di zaapa addugun a nuņ.

30Aņkeņ ki daana eņ ni k'aana rootiyo k'ono ti kune ye baa, kono Mohita duniya t'ettiyo, wo derec tode gette i-k'ede toogo ye a tukki nuņ me.

31N'isiyo munda wede a-t'ette a ono doņ Meega Raa y'o ruute, kono t'urzi geņ doņ duniya an di suuna nuņ Meega ni y' giyye. T'eņ kun t'oozo, in eņgile.»

Zaņ 15

Isa aa undumu biņ wede ki kotto

- ¹Isa y'a ruute, y'ede: «Nuṅ aa undumu biṅ wede ki kotto an iite adda doome, wo Meegó wede naabo.
- ²Layḍayi ḍoṅ pay kettiyo ti nuṅ wo i k'ehiyo ye, yi-ti'n ḍekkiso mendaṅ. Wo layḍayi ḍoṅ ehiyo, pay yi di'n okkime, kono an t'ehe baadaṅ sey.
- ³Wo kune sanalliyagó, t'urzi dooyiso ere n'un ele gette, kun t'ize ḍoṅ kamilenṅ aa undumu wede an ti y'ikkima.
- ⁴Kun lekko kettiyo ti nuṅ, wo nuṅ n'a lekka kettiyo ti kune. Aakede layisa k'undumu gette tod'te ekki duntultú ye maṅ ti ki t'ehe ye, geṅ kune toṅ iṅkino aame kun ki likka kettiyo ti nuṅ ye maṅ, kun t'isa ki bita.
- ⁵Nuṅ aa undumu biṅ wo kune aa layḍayi. Wede yi likka kettiyo ti nuṅ, wo nuṅ ti yode maṅ, yode geṅ y'a t'isa aa layisa k'undumu ere ehiyo baadaṅ, kono daa nuuno munda kun k'aane kun ki t'ise ye.
- ⁶Wede yi ki lekkiyo kettiyo ti nuṅ ye maṅ, yoṅ geṅ an di sedḍa dokki ti paate aakede layisa ḍekkiyo. Tode gette i-ti baahu, maṅ an t'ambu, an di sedḍiyo adda k'uwwu, ti-t'oggiyo mentú.
- ⁷Aame kun lekkiyo kettiyo ti nuṅ wo onamó kun'ni seedu maṅ, kun tondo munda wede kun dehu me, wo munda geṅ kun di y' t'ona.
- ⁸Munda wede i d'eliyo tamma a Meego eṅṅo: kun t'iso aa layisa k'undumu ere ehiyo baadaṅ wo kun t'iso sanalliyagó.
- ⁹Aa Meega yi ni giyye geṅ, nuṅ toṅ n'unni giyye. Kun lekko daayum adda geyyisadó.
- ¹⁰Aame kun seedu a urziyagi k'oogoro ḍoṅ ni rootiyo maṅ, kun di lekka adda geyyisadó, aakede nuṅ ni seedu a sulḍi ḍoṅ Meegó yi ruute n'aase wo ni-lekkiyo adda geyyisadí.
- ¹¹Nuṅ n'un ruute iṅkino kono nuṅ ulbó aase uṅse ti kune, wo uṅsuwaguṅ gette t'aase baadaṅ ki baadaṅ a ceere.
- ¹²Kun ollo, eṅṅo urzi k'oogiradó ni rootiyo me: Kun geyyo tudduguṅ, aakede nuṅ n'unni giyye.
- ¹³Wede y'a oyye y'a t'inda kono laṅziyagi geṅ, geyyiso ti doolo a ceera tode gette umbo.
- ¹⁴Aame munda wede n'un rootiyo kun d'ise kun ti y'isiyo maṅ, geṅ kune laṅziyagó.
- ¹⁵Kune n'un ki'n waake ḍoṅ naabadó ye, kono wede naabo geṅ yi ki suune ye munda wede galmeegí y'isiyo me. Wo kune n'unni waaku laṅziyagó, kono sulḍi ḍoṅ Meegó y'o gizite n'un k'iṅga ye, n'un ti'n gizite pay.

¹⁶Nuɲ i ki n' biire kune ye, wo nuuno unni biire me. Nuɲ n'un d'ele attifi kun d'ette kun d'ise naabo ere ki ɗaakatú, aa layisa k'undumu ehiyo ɓaadaɲ. Naabo ere kun isa gette t'a lekka ki daayum. Injino maɲ munda wede kun tonda Meega ti sundó geɲ, y'un di y' t'ela.

¹⁷Eɲ munda wede n'un rootiyo kun d'ise: Kun geyyo tudduguɲ.»

Doɲ duniya an kiigira sanalliyagi k'Isa

¹⁸«Aame doɲ duniya an unni giigira maɲ, kun elko an giigira ki poone nuuno.

¹⁹Aame kune ti doɲ duniya soo maɲ, an un di'n geyye kono kune ki kane. Wo ɗe kune ki kane ye, kono nuɲ n'unni biire wo n'un ti'n iidiba ti diinayaɲ me. Kono kamo doɲ duniya an un di'n koogire me.

²⁰Injino maɲ kun elko a ono doɲ n'un ruute, n'ede: “Wede naabo geɲ yoɲ t'ekki wede dooyisadí ye.” Geɲ nuɲ an ni dibire, wo kune toɲ maɲ an un di'n dabira kay. Wo nuɲ onamó an'ni seedu maɲ, ki kune toɲ an di'n seeda kay.

²¹Dabar ere an unni dabira gette kono kun umbe a sundó, kono wede i n'igibo an ki y' suune ye.

²²Aame nuɲ ni k'iido wo n'an ki ruute ye maɲ, booro k'oldiko t'an ki'n seeda ye. Wo aɲkeɲ an lekkiyo adda k'oldikadaɲ pi maɲ, urzi an t'adda eedaɲ umbo t'oldikadaɲ me.

²³Injino maɲ wede i ni koogire geɲ, yi koogire Meegó pây.

²⁴Aame nuɲ a diinayaɲ ni k'ize sulɗi doɲ wenda ti doolo soo toɲ yi k'ize ye maɲ, geɲ booro k'oldiko ti ki'n seeda ye. Wo aɲkeɲ sulɗi doɲ geɲ an i wulle toɲ, nuɲ ti Meegó an ay di'n koogire pi.

²⁵Wo ɗe sulɗi geɲ a iina kono a-t'ette a ono doɲ an riije ti kaaga adda mattup k'oogiradaɲ, an'de: “An ni giigira daa k'urzutú.”

²⁶Nuɲ n'iiney a ume Meega maɲ, Ere Noogiyaguɲ n'un ti-t'igibo t'a etto. Ni rootiyo ti Unde ere Derec etto ti sirpa Meega. Aame t'iina maɲ, t'an di kiza onamó a duwo.

²⁷Wo kune toɲ kun di kizita onamó, kono t'ume n'iise naabo geɲ kune ti nuuno.»

Zaɲ 16

¹«Sulɗi pay geɲ n'un ti'n ruutite kono urzi zaapu k'adduguɲ a Raa kun ki d'oola ye.

²T'adda ɓoyɗi doɲ in di dooyiso, an un ti'n limma. Wo ulsu a jiire sey, onniyo t'aana injino wede tuuku unni t'ida geɲ y'elkiyo y'isiyo naabo ere beehiye a ɗaana Raa.

³Kane an un isa in̄kino kono nuñ ti Meega an ay ki'n zuune ye.

⁴Wo ðe sulđi geñ n'un ti'n ruute kono aame onniyo t'iina mañ, kun d'elka a ono ðoñ n'un ruute.»

Naabo k'Unde Kamileñ

«Nuñ n'un ki ruute t'ume k'eesiyo ye'ñ kono nuñ ti kune.

⁵Añkeñ ni-kime k'ume wede i n'igibo, wo ti diinaguñ wede a ni tonde umbo, y'a t'eese: "K'ambe ki too me?"

⁶Wo ðe sulđi n'un ti'n ruute in̄kino mañ, ulbuguñ i d'oodiyo baadañ.

⁷Wo ki too mañ n'un rootiyo ono ðoñ ðerec, beehiye a kune nuñ n'a in̄gile. Wo aame ni k'in̄gila ye mañ, tode Ere Noogiyaguñ gette ti k'etto ye. Wo ðe n'in̄gila n'iiney mañ, n'un ti-t'igibo.

⁸Tod' t'iina mañ, ðoñ duniya eedañ t'an ti-dagga a elkisadañ ere a urzi k'oldiko, a urzi wede ki diine ki Raa, wo a urzi Raa yi ðekka booro te.

⁹Kane an ti digge a elkisadañ ere a urzi k'oldiko, kono an ki zaapu addañ a nuñ ye.

¹⁰An ti digge a elkisadañ ere a urzi wede ki diine ki Raa, kono nuñ n'eñgile k'ume Meega wo kun ki n' wolla ye baa.

¹¹Wo an ti digge pây a elkisadañ ere a urzi Raa yi ðekka booro, kono Mohita duniya gette booro ti ti ziida.

¹²Para mañ nuñ oo d'ede sulđi baadañ sey ki rootiyo a kune, wo ðe kune un k'ede toogo ye ki seedizañ añkeñño me.

¹³Aame Unde ere ki Derec t'iina mañ, t'un di'n kiza sulđi ðoñ pay ðerec me. Tod' ti roota munda'ñ ti toogo suuniyo ere k'ettú ye, wo ðe ti rootita sulđi ðoñ pay t'olliga ti kandaane, wo t'un di kiza a sulđi ðoñ etto k'ita.

¹⁴Tode gette t'an di-kiza goolikadó a ðuwo, kono ono ðoñ tod' t'un roota geñ adđa ti bize nuuno.

¹⁵Sulđi ðoñ pay Meega i-d'ede geñ, kane ki nuuno. Kono kamo n'a ruute, Unde gette t'un kiza munda wede t'olliga ti bize nuuno me.»

Môolaguñ t'a-kima t'un̄suwo

¹⁶«Tañ booloñ mañ kun ki n' wolla ye, wo sañ mañ tañ booloñ sey kun di n' wolla.»

¹⁷In̄kino mañ kane sanalliyagí oñgo an di rootiyo diinayañ, an'de: «I-kaza moo me onamí ðoñ y'in rootiyo: Tañ booloñ mañ in ki y' wolla ye, wo sañ mañ tañ booloñ sey in di y' wolla me, wo soñ y'ede: Yi-kime k'ume Meega me?»

18Maɲ kane an'de: «Onamí dɔŋ yi rootiyo “taɲ booloŋ” miɲ, i-kaza moo me? In ki'n suune ye ita k'ono dɔŋ yi rootiyo me.»

19Isa y'a zuune kane an dehu an di y' tonde me, maɲ y'an di ruute, y'ede: «Kune kun tondiso tudduguɲ miɲ a ono dɔŋ n'un ruute, n'ede: “Taɲ booloŋ maɲ kun ki n' wolla ye, wo saɲ maɲ taɲ booloŋ sey kun di n' wolla” geɲɲo ko?

20Derec iŋkino wo n'un di rooto: Kune kun d'ôola wo kun di dillita, wo kane dɔŋ duniya ulbaɲ aasa uɲse. Kun di lekka t'ulbe k'oodiyo, saɲ ulbuguɲ a ôona t'uɲsuwo.

21Geɲ aakede erewo addutú i t'umbe k'ehiyo geɲ, ti dawilsa sommagi dondoɲ aame k'ehiyo geɲ me. Wo aame ti d'ehiyo ulo maɲ, dabaratú i-dandiya, ulbutú i-d'isiyo uɲse kono ti ehe wedusu adda duniya.

22Wo kune'ŋ aɲkeɲɲo kun lekko t'ulbe k'oodiyo, wo de saɲ maɲ n'un di'n wolla sey. Aame geɲ adduguɲ a ôona t'uɲsuwo, wo uɲsuwaguɲ gette wenda soo toɲ a aane un di-dagge umbo.

23Onniyo gette t'iina maɲ, munda wede kun tonda nuɲ umbo. Derec iŋkino wo n'un di rooto: Munda wede kun tonda Meega ti sundó geɲ, y'un di y' t'ela.

24T'ume k'eesiyo bini aɲki munda ti sundó kun ki tunde ye. Kun tondo wo kun t'oono, iŋkino maɲ adduguɲ a ôona t'uɲsuwo.»

Isa duniya yi ti jire

25«Suldi pay geɲ n'un ruutite t'ono ombide, wo de onniyo t'iida maɲ n'un d'orba kereɲ t'ono ombide ye baa. Wo suldi pay ki Meega geɲ n'un ti'n roota kereɲ.

26Onniyo gette t'iida maɲ, ti sigguɲ kun tonda munda ti sundó a bey Meega, wo nuɲ ni ki y' tonda ye baa kono kune me.

27Yo Meega batum miɲ y'unni giyye kono nuɲ kun ni giyye, wo kun umbe nuɲ n'iido'ŋ ti sirpa Raa me.

28Nuɲ n'iido'ŋ t'ume Meegó ki duniya me, wo aɲkeɲ duniya ni t'ooli, ni-kime k'ume Meegó.»

29Maɲ kane sanalliyagí an i di ruute, an'de: «Aɲkeɲ onamá ki rootiyo eɲ kereɲ baa, ombide ye.

30Aɲkeɲ kaye ay zuune kee ki suune suldi pay, wo ki ki dehu wenda y'a ki tonde ye baa. Kono kamo kaye ay umbe kee k'iido ti Raa.»

31Isa y'an di ruute, y'ede: «Aɲkeɲ kun umbe baa ko?

32Saɲ onniyo t'aana wo tod'tiɲ t'iina baa, kun di-teepa wede soɲ k'umayí k'umayí, kun di n'oola siidó. Wo de nuɲ siidó ye, kono Meega ti nuuno.

³³Sulđi geŋ n'un ti'n ruute kono kun di lekke ti toose ere ki nuŋ. Adda duniya ette kun t'oonaa dabar, wo kun omboŋ kono nuŋ duniya ni ti jiire.»

Zaŋ 17

Isa yi tonđiyo Raa ki sanalliyagi

¹Aame Isa y'an ti ruute iŋkino maŋ, y'a t'umbe edayi k'awwa ki kandaane wo y'a ruute, y'ede: «Mee'ki nuŋ, peedo t'iide. K'an ti kaza gooliko k'Ulá a duwo, kono Ulá toŋ y'an di-kize goolikadá te.

²Yo Ulá ki d'ele toogo a tukki duwo pay, kono y'an t'ele lekkiyo ere ki daayum a kane doŋ pay kee ki ele geŋ me.

³Lekkiyo ere ki daayum gette, i dehu an di suune kee Raa wede ki kotto soo daŋŋal, wo i dehu an di suune nuŋ Isa Almasi wede kee k'igibo.

⁴Nuŋ adda duniya ette, goolikadá a duwo n'an ti-gize, wo naabo ere k'o elo n'aase, ni-t'ize.

⁵Mee'ki nuŋ, ti poone k'a okkima duniya botto geŋ, nuŋ o d'ede gooliko a daana kee. Ankeŋ tode gette a daanadá k'o t'eli.

⁶A duwo doŋ kee ki biire t'adda duniya wo k'o di'n ele geŋ, suma kee Raa n'an ti gize. Kane ki kee wo k'o di'n elo, wo onamá an di'n ziiđa.

⁷Ankeŋ kane an zuune sulđi pay doŋ k'o elo a beezó eŋ, kane ettiyo ti kee,

⁸wo ono doŋ kee k'o elo geŋ, a kane nuŋ n'an ti'n ruute. Kane an di'n ziiđa bey sire, an di zuune ki kotto nuŋ n'iido ti gulbe kee, wo an d'umbe i n'igibo kee me.

⁹Nuŋ ni tonđiyo kee'ŋ kono kane. Ni ki-tonđiyo kono doŋ duniya ye, wo de ni ki tonđiyo ki kane doŋ kee k'o elo, kono kane ki kee.

¹⁰Sulđi pay oo d'ede geŋ kane ki kee, wo sulđi ki kee ki nuŋ. Wo t'urzi sulđi doŋ k'o elo geŋ nuŋ duwo an di n' t'imma.

¹¹Wo ankeŋ nuŋ duniya ni t'ooli ni-kime k'ume kee, wo kane an lekka adda duniya. Mee'ki nuŋ kee wede kamileŋ, k'anni booho ti toogo sundá ere k'o ele, kono an di lekke aa wede soo, aa kee ti nuŋ kine aa wede soo.

¹²Aame nuŋ ti kane geŋ, ni di'n boohiyo ti toogo sundá ere k'o ele. N'an di'n buuhe, ti diinayaŋ wenda soo toŋ i ki digge ye. I digge wede soo kono a-t'iide a ono doŋ an riije ti kaaga adda mattup ki Raa.

¹³Ankeŋ ni-kime k'ume kee, wo ni rootiyo ono eŋ nuŋ botto adda duniya, kono uŋsuwadó t'a koone baadaŋ ki baadaŋ adda k'addaŋ.

¹⁴Nuŋ onamá n'an ele a doŋzá me, wo kane doŋ duniya an di'n giigira kono kane ki duniya ye, aakede nuŋ toŋ ki duniya ye.

¹⁵Nuɲ ni ki tonɲiyo ɗoɲzá k'a ki'n aɗɗe t'adda duniya ye, wo ni ki tonɲiyo k'anni boohe ti Mohita k'oldiko gettiyo.

¹⁶Kane ki duniya ye, aakede nuɲ toɲ ki duniya ye.

¹⁷Kane ki'n ooyo kese a kee t'urzi wede ɗerec, kono onamá kane ɗerec.

¹⁸Aakede kee ki n'igibo k'adda duniya geɲ, nuɲ toɲ maɲ n'a ti'n t'igibe k'adda duniya.

¹⁹Wo kono kane geɲ nuɲ batum tuddó n'a-t'uuye kese a kee, kono kane toɲ tuddaɲ an ti-t'ooye kese a kee t'urzi wede ɗerec.

²⁰Nuɲ ni ki-tonɲiyo kono ki kane ɗaɲɲal ye, wo ki ɗoɲ pay i zaapa addaɲ a nuɲ t'urzi k'ono ɗoɲ an an kizita.

²¹Nuɲ ni ki tonɲiyo sey kono kane pay an t'ise aa wede soo. Mee'ki nuɲ, aakede kee kettiyo ti nuɲ wo nuɲ kettiyo ti kee geɲ, kane toɲ an t'ise kettiyo aa wede soo, kono ɗoɲ duniya an d'ambe i n'igibo kee.

²²Gooliko ere kee k'o elo gette, nuɲ n'an ele. Injino kane an t'ise aa wede soo, aakede kee ti nuɲ aa wede soo,

²³nuɲ ti kane wo kee ti nuɲ. T'urzi geɲ an t'ise ɗoɲ i lekkiyo kettiyo kaɲ soo, injino ɗoɲ duniya an di suuna i n'igibo kee, wo sanalliyagó ki'ni giyye aakede ki giyye nuɲ.

²⁴Mee'ki nuɲ, kane kee k'o'n elo, wo nuɲ ni dehu ume wede nuɲ ni lekkey geɲ, kane toɲ an di lekkey kay. Aame geɲ kane an di wolley goolikadó ere k'o ele, kono kee ki ni giyye ti poone t'ume k'a okkima duniya ɓotto too.

²⁵Mee'ki nuɲ, kee wede ki diine. Ɗoɲ baadaɲ adda duniya an ki suune ye, wo nuɲ ni ki suune, wo kane sanalliyagó toɲ an zuune i n'igibo kee me.

²⁶Kee sundá n'an ti gize a kane me, wo n'an di kiza sey sundá te, kono geyyiso ere kee ki ni giyye gette, kane toɲ an di t'oona kay, wo nuɲ batum miɲ ti kane aa wede soo.»

Zaɲ 18

Isa an yi ziida ki tôwwo

(Matiye 26.47-56; Markus 14.43-50; Lik 22.47-53)

¹Aame Isa y'a ti ɗiɲge onamí injino maɲ, tiɲ geɲ ti sanalliyagí an t'iiziga, an d'ingile, an di diipida sorgile ki Sediroɲ. Ti darga geɲ i d'ede jineene k'inda, Isa ti sanalliyagí an t'iide adda.

²Wo Ziidas, wede y'an di y' t'ela Isa a bey ɗoɲ k'olmidayí geɲ, ume'ɲ yi y' suune kono Isa ti sanalliyagí an sooru'ɲ daayum k'ume geɲ me.

³Inkino maŋ Ziidas y'an d'an t'iide k'adda jineene gettiyo a asigiryagi doŋ ki Romen, ti doŋ i boohiyo 'Boy Raa kane doŋ deero doŋ sedefe ti Pariziyen an iidiba geŋ me. Kane asigiryagi geŋ an ziki a beydaŋ lampiyagi, biŋgagi wo suldi deyyiso.

⁴Wo ki Isa yoŋ yi suune suldi doŋ pay i aana me. Inkino maŋ y'a d'iide k'ume kane, wo y'anni tunde, y'ede: «Kun dehu'ŋ wee wee?»

⁵Kane asigiryagi an i di'n gime onamí, an'de: «Ay dehu Isa wede ti geeger Nazaret.» Maŋ Isa y'an di ruute, y'ede: «Nuŋ miŋ nuŋ.» Wo Ziidas wede y'an di y' t'ela Isa a bey doŋ k'olmidayí geŋ yoŋ a diine kane.

⁶Aame Isa y'an ruute «Nuŋ miŋ nuŋ» maŋ, kane asigiryagi an di-guside k'ita, an t'ibi siido ramama.

⁷Isa y'anni tunde sey, y'ede: «Kun dehu'ŋ wee wee?» Wo kane an i di'n gime onamí, an'de: «Ay dehu Isa wede ti geeger Nazaret.»

⁸Isa y'an di ruute, y'ede: «Nuŋ n'un ruute de me, nuŋ miŋ nuŋ. Aame kun dehu nuuno maŋ, doŋzó'ŋ kun oolo an d'eŋgile.»

⁹Geŋ inkino a onamí doŋ yi ruute ki poone'ŋ a-t'iide a urzizaŋ, onamí doŋ yi ruute, y'ede: «Mee'ki nuŋ, duwo doŋ k'o ele eŋ, soo toŋ ni ki digge ye.»

¹⁰Maŋ Simo Piyer i-d'ede kasigara a beezí, y'a t'iidiba, y'a-diikida wede naabo ki mozigo goole doŋ sedefe, kuudí wede k'ammade a dikke. Wede naabo geŋ sundí Malkus.

¹¹Maŋ Isa yi di ruute a Piyer, y'ede: «Kasigaradá ki ti t'elo saapatú. Kee k'elkiyo miŋ kop ki dabar ere Meegó y'o elo ette, n'a ki-ti dabira ye ko?»

Isa ti Anne mozigo goole doŋ sedefe

(Matiye 26.57-58; Markus 14.53-54; Lik 22.54)

¹²San maŋ kane asigiryagi Romen ti goolayaŋ, wo ti asigiryagi deero Yawudiyagi doŋ i boohiyo 'Boy Raa geŋ, Isa an di y' ziiida, an ti y' gittite.

¹³An di-t'iide ki poone'ŋ di Anne eeme Kayip. Kayip geŋ mozigo goole doŋ sedefe a ozzine geŋ me.

¹⁴Wo yo Kayip geŋ y'an di ruute ono a deero Yawudiyagi me, y'ede: «Beehiye'ŋ wedusu soo y'a t'inda kono doŋ duuru pay an d'utte.»

Piyer yi giigira Isa

(Matiye 26.69-70; Markus 14.66-68; Lik 22.55-57)

¹⁵Simo Piyer ti sanallusu soo geŋ an daaniya Isa. Sanallusu wede soo geŋ, mozigo goole doŋ sedefe yi y' suune, yi-t'iide ti Isa soo k'adda booro boy ki mozigo goole doŋ sedefe me.

16Wo Piyer geɲ y'a uupe paate a biza bumbu. Inƙino maɲ sanallusu wede mozigo goole ɗoɲ seɗeke yi y' suune geɲ y'a d'udde, yi di ruute a ere naabo i boohiyo biza bumbu gettiyo, maɲ Piyer toɲ yi-t'iide kay.

17Aame y'ette k'adda geɲ, to ere naabo i boohiyo biza bumbu gette t'a yi tunde Piyer me, t'ede: «Kee toɲ maɲ ti diine sanalliyagi ki wedusu enno dee da?» Piyer yi di'n gime onamtú, y'ede: «Aha! Nuɲ ti kane ye.»

18Ume'ɲ reele, inƙino maɲ kane ɗoɲ naabo ti asigiryagi ɗoɲ i boohiyo Boy Raa geɲ an di mudde uwo, an di kookiyo. Piyer toɲ maɲ y'a-t'iide ti kane, yi-kookiyo kay.

Mozigo goole ɗoɲ seɗeke ti Isa

(Matiye 26.59-66; Markus 14.55-64; Lik 22.66-71)

19Aame geɲ yo mozigo goole ɗoɲ seɗeke y'a iise tondiso k'Isa a tukki sanalliyagi wo a dooyisadí.

20Isa yi di'n gime onamí, y'ede: «Munɗa ombide soo toɲ ni ki ruute ye. Ni ruute onamó'ɲ kereɲ a ɗaana ɗoɲ duniya me. Ni duuyite'ɲ daayum adda boyɗi ɗoɲ in di dooyiso, wo adda Boy Raa, ume wede Yawudiyagi pay an d'ollige.

21De ki moo me ki ni tondiso me? Ki tondo'ɲ ɗoɲ i n'illiga a munɗa wede n'an ruute. K'ollo, munɗa wede nuɲ n'an ruute, an yi suune.»

22A ono ɗoɲ Isa yi ruute inƙino geɲ, i d'ede asugursu i boohiyo Boy Raa y'ohire a ume geɲno, y'a yi bitte Isa me, wo y'a ruute, y'ede: «A mozigo goole ɗoɲ seɗeke miɲ ki di rootiyo inƙino ko?»

23Isa yi di ruute, y'ede: «Munɗa wede ni ruute ulsu'ɲ too me? Ki ki y' kazi ɗo. Wo ni ruute'ɲ derec maɲ, ki moo me ki di n' battiya me?»

24Inƙino maɲ Anne y'a y'igibe kaɲ kettiso di Kayip mozigo goole ɗoɲ seɗeke.

Piyer y'a giigira Isa sey

(Matiye 26.71-75; Markus 14.69-72; Lik 22.58-62)

25Aame geɲ Piyer yo ede a biza k'uwo, yi kookiyo. An di y' tunde, an'de: «Kee toɲ ti diine sanalliyagi ki wede enno dee da?» Maɲ Piyer y'a yi giigira, y'ede: «Aha! Nuɲ ti kane ye.»

26Ti diine ɗoɲ naabo ki mozigo goole ɗoɲ seɗeke geɲ, i d'ede wede ede yoɲ taasa ki wede Piyer y'a-dikke kuudí geɲno, yi di ruute, y'ede: «Wo kee en, ni ki wullo ti yode adda jineene dee da?»

27Maɲ Piyer y'a yi giigira sey Isa me. Aame geɲ uzu y'a îile.

Isa a ɗaana goole siido

(Matiye 27.1-2,11-14; Markus 15.1-5; Lik 23.1-5)

28 Saŋ maŋ ti soohe walak, ti di Kayip Isa an di t'iide di Pilat, yoŋ Romen goole siido. An iiney maŋ, kane deero Yawudiyagi an ki d'iide ye k'adda boy me, kono an ki dehu an ki-t'ise ganigi a urzi k'oogiradaŋ ye, kono an d'ooma ombó tarnaape Pak ki Yawudiyagi.

29 Inŋkino maŋ Pilat y'a t'udde, y'an uuney paate. Aame yi'n uuney maŋ, y'anni tunde, y'ede: «Wede eŋ kun yi zikiye'ŋ ki moo me?»

30 Kane an i di'n gime onamí, an'de: «Aame yi k'ize munda ulsu ye maŋ, ay di y' seedo ay a d'etto ko?»

31 Maŋ Pilat y'an di ruute, y'ede: «Inŋkino maŋ ooho, kune batum kun ti y' waako, kun dekkoy booro aa oogiraguŋ ti rootiyo.» Maŋ kane Yawudiyagi an i di ruute, an'de: «Oogoro t'ay k'ele urzi ki t'owwo wedusu ye.»

32 Geŋ inŋkino a-t'iide a ono doŋ Isa yi ruute a urzi k'untadí, kaŋ mummino untadí ere yi t'inda te.

33 Inŋkino maŋ Pilat y'a-gime k'adda boy, y'a yi wiike Isa me, wo y'a yi tunde, y'ede: «Kee'ŋ mozigo Yawudiyagi ko?»

34 Isa yi di'n gime onamí, y'ede: «Onamá doŋ ki rootiyo eŋ, ilke'ŋ kee kunuŋ, a-gize'ŋ duwo ko a tukki nuŋ me?»

35 Maŋ Pilat yi di ruute, y'ede: «Nuŋ Yawudusu ko? I ki ziido'ŋ doŋ siidadá ti deero doŋ sedefe oo d'iido me. K'izo moo me?»

36 Isa yi di'n gime onamí, y'ede: «Nuŋ mozikadó a siido ettiyo ye. Aame mozikadó ki duniya ettiyo maŋ, doŋzó an d'obbira arka, an k'ooli, an di n' seeda, an an di n' t'ele bey deero Yawudiyagi ye. Wo inŋkino ye, aŋkenno mozikadó a siido ettiyo ye.»

37 Inŋkino maŋ Pilat y'a yi tunde, y'ede: «Kee'ŋ kacij mozigo ko?» Isa yi di'n gime onamí, y'ede: «Eyye aa ki ruute, nuŋ mozigo. Kono inŋkino nuŋ an di n'ehe wo n'a iido k'adda duniya, n'an di kize urzi wede ki derec, wo kane doŋ i dehu urzi wede ki derec geŋ, an d'ollige onamó.»

38 Maŋ Pilat y'a tunde Isa, y'ede: «Wo derec, i-kaza moo me?»

Pilat ti deero Yawudiyagi

Aame Pilat y'a ti ruute inŋkino maŋ y'a t'iiziga, y'a t'udde k'ume Yawudiyagi sey. Y'iide'ŋ y'an di ruute, y'ede: «Nuŋ me, a tukki wede eŋ munda ulsu ni k'uune ye.

39 Wo de aa daayum kun d'isiyo a tarnaape Pak ki Yawudiyagi maŋ, n'un d'addiya wedusu t'adda daŋgay, wede aa adduguŋ i dehu. Geŋ kun dehu n'un t'addo mozigo Yawudiyagi ko?»

⁴⁰Iṅkino maṅ kane an d'iise dollite, an'de: «Aha, yode ye! K'ay t'addi'ṅ Barabas! Aha, yode ye! K'ay t'addi'ṅ Barabas!» Wo yo Barabas geṅ, yoṅ wede dekkiyo k'urzi.

Zaṅ 19

Isa an y'okko maade

¹Iṅkino maṅ Pilat y'an di y'ele Isa a asigiryagi, an di y' kosse ti marpa.

²Asigiryagi an di gini kaḍumul k'ahimagi an i-t'usse eedí, wo an d'umbe kalle teeze an i di t'usse.

³Maṅ an aa d'ettiyo gopponṅ k'ume yode, an d'eesiyo: «Toosadá mozigo Yawudiyagi no! Toosadá mozigo Yawudiyagi no!» Wo an di y' dany'isa.

⁴Pilat y'a t'udde sey, wo y'an di ruute Yawudiyagi, y'ede: «Kun ollo, nuṅ Isa n'un di y'addo paate, wo kun suuno a tukki yode eṅ nuṅ munda ulsu ni k'uune ye, i di t'ide k'unto me.»

⁵Maṅ Isa y'a t'udde paate ti kaḍumul k'ahimagi a eedí, wo ti kalle teeze. Wo Pilat y'an di ruute, y'ede: «Kun wollo wede'ṅ eṅṅo!»

⁶Aame deero doṅ sedefe ti asigiryagi doṅ i boohiyo Boy Raa an wulle Isa maṅ, an d'iise dollite, an'de: «Ki ti y' taako ekk'undumu wede zaapu t'ekki bakadí kaṅ tontilko! Ki ti y' taako ekk'undumu wede zaapu t'ekki bakadí kaṅ tontilko!» Maṅ Pilat y'an di ruute, y'ede: «Kun'do, i ti y' taakoy kune ekk'undumu wede zaapu t'ekki bakadí kaṅ tontilko me, kono nuṅ a tukki yode eṅ munda ulsu ni k'uune ye, i di t'ide k'unto me.»

⁷Maṅ kane deero Yawudiyagi an i di ruute, an'de: «Kaye'ṅ ay d'ede oogoro, wo a urzi k'oogoro y'a t'inda kono yi-t'ize tuddí yoṅ Ulo Raa.»

⁸Aame Pilat y'illiga ono geṅṅo maṅ, y'a urgide baadaṅ.

⁹Yi-t'iide k'adda boy, maṅ y'a tunde Isa, y'ede: «Kee k'ettiyo'ṅ ti too me?» Wo yo Isa yi d'annugu deddek, onamí'ṅ yi-ki'n kama ye.

¹⁰Iṅkino maṅ Pilat yi di ruute, y'ede: «A nuuno miṅ, kee ki d'annugu me? Kee ki ki suune ye ko nuṅ oo d'ede toogo n'aane n'a-d'eeze, wo n'aane n'a ki ti taake ekk'undumu wede zaapu t'ekki bakadí kaṅ tontilko me.»

¹¹Isa yi di ruute, y'ede: «Kee'ṅ a-k'ede toogo a tukki nuuno ye, daa k'ere Raa y'a-k'ele ye maṅ. Kono kamo, wede y'an ele nuṅ a beezá geṅ, yoṅ wede k'oldiko a jiire kee.»

¹²Tiṅ geṅ Pilat y'a iise dehu k'urzi yi-d'eeze a Isa, wo kane deero Yawudiyagi an d'iise dollite, an'de: «Wede eṅ ki iiza maṅ, duwo an di suuna kaciṅ kee'ṅ lanze

ki mozigo goole ki Romeŋ ye. Wede yi ti t'isiyo tuddí aa mozigo geŋ, y'olmide mozigo goole ki Romeŋ.»

¹³Aame Pilat y'illiga inokino maŋ, Isa y'a y'udde ti paate, wo yoŋ y'a-guune ekki kaakido booro. Ume geŋ an iiziga ti kaŋgiragi deero, an di y' waaku Gabata t'ono doŋ k'Eber me.

¹⁴Inokino maŋ soggo tarnaape Pak ki Yawudiyagi geŋ, a peedo t'ize diine maŋ, Pilat y'an di ruute Yawudiyagi, y'ede: «Kun wollo, mozigaguŋ eŋŋo!»

¹⁵Maŋ kane an d'iise dollite, an'de: «Ki y'ôodo, ki y'ôodo, ki ti y' taako ekk'undumu wede zaapu t'ekki bakadí kaŋ tontilko!» Maŋ Pilat y'an di ruute, y'ede: «Kun dehu mozigaguŋ n'a ti y' taako ekk'undumu geŋŋo ko?» Kane deero doŋ sedefe an i di'n gime onamí, an'de: «Mozigayey ti doolo'ŋ umbo. Mozigayey miŋ yoŋ soo, mozigo goole ki Romeŋ.»

¹⁶Inokino maŋ Pilat y'an di y'ele Isa a beezaŋ, kono an ti y' taake ekk'undumu wede zaapu t'ekki bakadí kaŋ tontilko. Maŋ kane asigiryagi an ti y' ziida.

Isa ti undumzí

(Matiye 27.32-44; Markus 15.21-32; Lik 23.26-43)

¹⁷Isa yode batum y'a t'umbe undumzí an di y' taakey, y'a t'udde t'adda geeger me, y'a inigile k'ume wede an yi waaku «osse k'eego», t'ono doŋ k'Eber an yi waaku Golgota.

¹⁸Aame an iiney a ume geŋŋo maŋ, asigiryagi an ti y' tiike Isa ekk'undumu wede zaapu t'ekki bakadí kaŋ tontilko. Wo an aa tiike doŋ sire a sirpa k'Isa me, wede soŋ t'undumzí a kese k'ammade, wede soŋ t'undumzí a kese geelo, wo Isa a diine.

¹⁹Pilat y'an d'ele urzi an a di riine ekki pakirte, an a-ti tiike ekk'undumu geŋŋo: «Isa wede ti geeger Nazaret, mozigo Yawudiyagi.»

²⁰Raaníya gette Yawudiyagi baadaŋ an di girite, kono ume wede an di tiike Isa geŋ yoŋ goppon ti geeger te, wo raaníya gette an riine t'ono doŋ k'Eber, t'ono Romeŋ wo t'ono Girek pây.

²¹Aame kane deero doŋ sedefe Yawudiyagi an wulle raaníya gettiyo maŋ, an d'iide an d'uuney Pilat, wo an i di ruute, an'de: «Raaníya ere yoŋ “mozigo Yawudiyagi” gette mentú. Ki raaná: “Wede eŋ yi-t'ize tuddí, y'ede yoŋ mozigo Yawudiyagi.”»

²²Maŋ Pilat y'an di'n gime onamaŋ, y'ede: «Nuŋ ni riine geŋ, ni riine baa.»

²³Aame asigiryagi an ti y' tiike Isa ekk'undumu wede zaapu t'ekki bakadí kaŋ tontilko maŋ, kallagí an di ziki, an di dikkidá omagi pide, wede soŋ yi d'umbe d'umbe. I d'iili kallayí goole, yoŋ geŋ an indigo miŋ inokino baa, t'awwa a-ti diige dandí daa y'eppiyo.

²⁴Asigiryagi an di ruute tuddaŋ, an'de: «Yo eŋ in ti y' sittite ye, in t'iso teltel muntelliyo, wede tuuku i t'iira maŋ, y'a t'amba.» Geŋ iŋkino a-t'iide a ono doŋ an riŋe ti kaaga adda mattup ki Raa, an'de: «Kallagó an di dikkida, wo kallayó goole an t'ize teltel muntelliyo.» Geŋ iŋkino munda wede asigiryagi an ize me.

²⁵A sirpa k'undumu wede an di tiike Isa geŋ, an t'ihira meedí, teema meedí, Mariyam ere Kilopas, wo Mariyam ere ti siido Magdalla.

²⁶Isa yi wolloyo'ŋ meedí, wo a sirpatú sanallusu wede yi y' giyye geŋno. Maŋ yi di ruute a meedí, y'ede: «Mek'ki nuŋ, mi wollo ulí eŋno.»

²⁷Saŋ maŋ yi di ruute a sanallusu geŋ, y'ede: «Ki wollo, meedá gettiyo.» Iŋkino maŋ t'ume geŋ sanallusu y'a ti wiike Mariyam di yode.

Isa y'a t'ihe

(Matiye 27.45-56; Markus 15.33-41; Lik 23.44-49)

²⁸Tiŋ geŋ, Isa y'a zuune suldí pay a ti d'inge, maŋ y'a ruute, y'ede: «Nuŋ ôrme.» Yi ruute iŋkino kono a-t'ette a ono doŋ an riŋe ti kaaga adda mattup ki Raa.

²⁹Aame geŋ i d'ede keyye boo ti toote suddo k'iŋni k'inda biŋ. Asigiryagi an d'umbe buude, an a di gitte a biza k'undumu aa koy'ile sundí izop. An di zulpe adda toote geŋno, maŋ an i-t'usse a bize k'Isa.

³⁰Aame Isa y'uwwwe toote geŋno maŋ, y'a ruute, y'ede: «Pay a ti d'inge.» Iŋkino maŋ y'a t'uttile eedí ki siido, maŋ y'a iili undí t'a t'udde, y'a-t'ihe.

³¹Aakede kane Yawudiyagi an okkime tuddaŋ soggo'ŋ onniyo puukiyo geŋ, kane deero Yawudiyagi an ki dehu doŋ an ti'n tiike ekk'inda doŋ zaapu t'ekk'eebaŋ kaŋ tontilko geŋ, nundaŋaŋ an ki lekke ekk'indanzaŋ ye, kono onniyo ere ki puukiyo Yawudiyagi ette, tod'te onniyo ere majjaanawa a jiire. Iŋkino maŋ an d'iide, an tunde Pilat, an'de: «Urzi ede maŋ k'an rooto an di dambe zoŋdaŋ an di t'inda, wo an ti'n deego t'ekk'inda me, an t'ottiba ki poone onniyo ere ki puukiyo t'a aana geŋ me.»

³²Maŋ Pilat y'a igibe asigiryagi. An d'iide, an d'iise ti doŋ sire an tiike ti Isa soo geŋno. Wede ki poone an di dimbe zoŋdí, saŋ wede ki sirwe.

³³Aame an iide k'ume k'Isa maŋ, an wolloyo'ŋ yoŋ y'inda. Iŋkino maŋ an d'iili an ki dimbe ye baa zoŋdí me.

³⁴Wo asigursu soo ti diine kane asigiryagi geŋ, y'a yi giira Isa ti arku a sirpadí, maŋ a kaamiki a udde puuzo ti ahu.

³⁵Wede eŋ yi wulle t'edayí suldí pay geŋ me, doo miŋ yi rootiyo taayadaŋ me, wo onamí eŋ yi rootiyo derec. Yoŋ yi suune yi rootiyo ono doŋ derec, kono kune toŋ kun d'ambe kay.

³⁶Inkino maŋ suldi pay eŋ a iina, kono a-t'ette a ono doŋ an riije ti kaaga adda mattup ki Raa, an'de: «Ossayí soo toŋ i ki dahima ye.»

³⁷A ume doolo toŋ ede an riije ti kaaga adda mattup ki Raa, an'de: «Saŋ onniyo soo wede an yi giira geŋ, an di y' wolla.»

Doŋ eliyo Isa adda muuzo

(Matiye 27.57-61; Markus 15.42-47; Lik 23.50-56)

³⁸Saŋ maŋ tiŋ geŋ i d'ede wede soo sundí Yusup ti geeger k'Arimate. Yoŋ geŋ sanallusu k'Isa, wo yi k'oodibe itadí ye kono y'orgiso a deero Yawudiyagi. Y'iide'ŋ, y'a uuney Pilat, y'a yi tunde kono y'a ti y' deege nuune k'Isa me. Maŋ Pilat y'a iyye. Yusup y'iide'ŋ, y'a ti y' diige nuune t'ekk'undumu me.

³⁹Nikodem, wede onniyo soo y'a iide k'ume k'Isa a diddo geŋ, y'a iide kay. Yi ziki dunnu sundí mirr kalsiya ti suldi doolo eediyadaŋ uŋse, attidi suma jeenu ada g'ado.

⁴⁰Inkino maŋ Yusup kane ti Nikodem an t'umbe nuune k'Isa, an a-d'ibiti suldi eediyadaŋ uŋse, an di ŋilpiyo ti sarwilagi, an aa d'obite suldi eediyadaŋ uŋse, an di ŋilpiyo ŋilpiyo. An t'ize aa a urzi k'ottibe Yawudiyagi.

⁴¹Goppon ti ume an tiike Isa ekk'undumu geŋ i d'ede jineene, wo adda jineene gette i d'ede muuzo aware, wenda soo toŋ an k'eele ye.

⁴²An t'eele nuune k'Isa adda muuzo gettiyo kono tod'te goppon. Suldi geŋ ize a onniyo jima, Yawudiyagi an okkime tuddaŋ kono onniyo ere ki puukiyo ti t'eesa.

Zaŋ 20

Muuzo guguba

(Matiye 28.1-10; Markus 16.1-8; Lik 24.1-12)

¹A onniyo dumas ti soohe walak peedo daa koliyo, Mariyam ere ti siido Magdalla t'a iŋgile ki biza muuzo k'Isa. Aame t'iiney maŋ, ti wolliyo'ŋ zumbulu wede an duŋkile a biza muuzo geŋ, doŋkilso a kese.

²Inkino maŋ t'a-gime kaŋ okko. T'iide'ŋ, t'a uuney Piyer kane ti sanallusu soo, wede Isa yi y' giyye geŋŋo, wo t'an di ruute, t'ede: «Galmeega aŋ wenda an t'iidiba t'adda muuzo me, wo an di zaapey a tunda koo maŋ ay ki suune ye.»

³Aame Piyer kane ti sanallusu soo geŋ an illiga iŋkino maŋ, an t'iiziga an d'iŋgile ki biza muuzo.

⁴Sirwaŋ pay an zide okko, wo de yo sanallusu soo geŋ y'okko baadaŋ i jiire Piyer y'a iiney kaaga a biza muuzo me.

⁵Y'iiney maŋ, y'aa d'uttile, yi ŋooŋiyo k'adda muuzo. Yi wolliyo'ŋ sarwilagi doŋ an di ŋilpe'ŋ booyiso a siido, wo k'adda'ŋ yi-ki t'iide ye.

⁶Taŋ booloŋ maŋ, Simo Piyer y'a d'iiney, yi-t'iide k'adda muuzo. Yi wolloyo'ŋ sarwilagi doŋ an di ŋilpe'ŋ booyiso a siido.

⁷Wo sarwilagi doŋ an di gitte bizi'ŋ geŋ, kane'ŋ lobide zaapu a kese siidaŋ ti doŋ an di ŋilpe tudde'ŋ kaŋ soo ye.

⁸Iŋkino maŋ sanallusu wede iiney a biza muuzo kaaga geŋ, yi-t'iide kay, y'a wulle, wo y'a umbe Isa yi-bilde.

⁹Bini onniyo gettiyo toŋ, kane sanalliyagi ita k'ono geŋ an ki zuune ye botto, ono doŋ an riine ti kaaga adda mattup ki Raa, saŋ Isa y'a-bald'a ti diine doŋ unto geŋ me.

¹⁰Saŋ maŋ kane sanalliyagi sire geŋ an di-gime, an d'aahe ki boozaŋ.

Isa ti Mariyam ere ti siido Magdalla

(Markus 16.9-11)

¹¹Saŋ maŋ Mariyam gette t'aa gime ki biza muuzo sey. T'iide'ŋ, t'a t'ihira ti paate a biza muuzo, ti-môolo. Kaŋ môolo geŋ t'a t'uttile, ti-ŋoonjiyo k'adda muuzo.

¹²Ti wolloyo'ŋ adda'ŋ maaleekiyagi sire ossiyo ti kallagi tuwardi an lekkiyo a ume an di ziipe nuune k'Isa. Wede soŋ a ume k'eedi, wo soŋ a ume zoŋdi.

¹³Kane maaleekiyagi geŋ an di-tunde, an'de: «Erewo no, mi môolo moo me?» Tod' t'an di'n gime onamaŋ, t'ede: «Ni môolo Galmeegó, aŋ wenda an t'iidiba, wo ni ki suune ye an di-zaapey a tunda me.»

¹⁴Aame ti rootiyo geŋ t'a gilde, wo ti wolloyo'ŋ Isa yi t'ihira a ume geŋno, wo t'a ki y' zuune ye.

¹⁵Saŋ maŋ Isa y'a ti tunde, y'ede: «Erewo no, mi môolo moo me, wo mi dehu wee wee?» Wo to Mariyam t'elkiyo i ti tondiyo wede jineene, maŋ t'a yi tunde, t'ede: «Wede no, koo i t'iidiba nuune k'Isa kee maŋ, k'o kazi ume k'a ziipe a tunda'ŋ, n'ette n'a t'ambo.»

¹⁶Isa y'a ti wiike ti sundutu, y'ede: «Mariyam.» T'a-gime edatu'ŋ k'ume yode, wo ti di ruute t'ono doŋ k'Eber, t'ede: «Rabuni.» (I-kaza «wede dooyisadó.»)

¹⁷Maŋ Isa yi di ruute, y'ede: «M'odo botte ye, kono nuŋ ni ki gili k'ume Meegó ye botto. Wo koŋ, m'odo k'ume zembadó, m'an rootoy nuŋ ni kili k'ume Meegó wede a kune toŋ Meeguguŋ kay, k'ume Raazó wede a kune toŋ Raaguŋ kay.»

¹⁸Iŋkino maŋ Mariyam ere ti siido Magdalla gette, t'a iŋgile k'ume sanalliyagi. T'iide'ŋ t'ede ti yi wullo Galmeega me, wo t'an di-ruute ono doŋ yi ruuto me.

Isa yi gize tuddi a sanalliyagi

(Matiye 28.16-20; Markus 16.14-18; Lik 24.36-49)

¹⁹A onniyo dumas gettiyo batum a lohe maŋ, sanalliyagi k'Isa an t'ugiye adda boy, boha'ŋ an a-t'ippite ti kerle kono an orgiso a deero Yawudiyagi. Aame kane

an lekkiyo adda geɗ, Isa y'an uuney an wolloyo'ŋ yi t'ihira a diinayan, maɗ y'an di ruute, y'ede: «Toose ti koono ti kune.»

²⁰Aame y'an ti ruute iŋkino maɗ, saɗ y'an d'iise kazita beydí ti ume wede an yi giira a sirpadí. Wo kane sanalliyagi ulbaɗ uɗse an wulle Galmeegaɗ geɗ me.

²¹Isa y'an di ruute sey, y'ede: «Toose ti koono ti kune. Aakede Meegó yi n'igibo k'adda duniya geɗ, kune toɗ n'un di'n agiba k'adda duniya kay.»

²²Y'a ti ruute iŋkino maɗ, y'an di biha maaye a tukki kane, wo y'an di ruute, y'ede: «Kun soodó Unde Kamileɗ.

²³A wede tuuku kun i t'iza tambobino a oldikadí maɗ, Raa toɗ yi t'isa tambobino kay a oldikadí te, wo a wede kun i ki t'iza tambobino ye maɗ, oldikadí Raa yi-k'isa tambobino ye kay.»

²⁴Onniyo ere Isa y'uuney sanalliyagi geɗ, sanallusu wede an yi waaku Tomas, sundí soo Ulo Roono, yoɗ ti diine sanalliyagi kane koomat makumu sire geɗ, yoɗ umbo.

²⁵Aame Tomas y'iina maɗ, kane sanalliyagi oŋgo an i di ruute, an'de: «Kaye ay yi wulle Galmeega me!» Wo de Tomas y'an di ruute, y'ede: «Aame ni ki wulla ume an di y' tiike ti ponte a beydí ye, aame ni ki t'eela y'elsadó adda buldó ponte ye, wo beezó eɗ ni ki t'eela a buldó ere an yi giira a sirpadí ye maɗ, onamguɗ eɗ ni k'amba ye.»

²⁶Onniyo dumas ki daana maɗ, kane sanalliyagi an t'ugiye sey adda boy, wo onniyo gette Tomas toɗ ti kane baa. Boha an aa t'ippite ti kerle, maɗ Isa y'an di'n uuney sey, y'a t'ihira a diinayan, y'an di ruute, y'ede: «Toose ti koono ti kune.»

²⁷Saɗ maɗ yi di ruute Tomas, y'ede: «Kee ki wollo beydó me, k'agibi y'elsadá, ki t'eelo adda. K'eli beezá pây ki t'agiba adda sirpadó, wo ki niikiyo'ŋ k'a oolo baa, ki zaapo addá a nuuno.»

²⁸Maɗ Tomas yi di ruute, y'ede: «Kee Galmeegó, wo kee Raazó.»

²⁹Isa yi di ruute, y'ede: «Kee ki ziipe addá a nuɗ kono ki ni wulle t'edayá, wo uɗsuwo a kane doɗ an ki n' wulle ye wo an di ziipe addaɗ a nuɗ.»

³⁰Isa y'ize'ŋ suldi k'armika baadaɗ a daana sanalliyagí me, wo kane raaniya pay ye adda mattup ette.

³¹Ono doɗ soo raaniya adda mattup ette, kono kun d'ambe Isa yoɗ Almasi Raa yi biire, wo Ulo Raa. Wede y'umbe a sundí maɗ, yi di t'ela lekkiyo ere ki daayum.

Zaɗ 21

Isa yo a biza bar ki Tiberiyat

- ¹Aame suldi geɗi i t'ingile maɗ, Isa y'an di-gize tuddi sey a sanalliyagi a biza bar ki Tiberiyat. Kun wollo mummino me y'an di-gize tuddi te.
- ²Simo Piyer, Tomas wede an yi waaku Ulo Rooɗo, Natanayel wede ti Kana siido Galile, inɗi Zebede, wo sanalliyagi k'Isa sire ti doolo, kane pay geɗi an lekkiyo kaɗi soo.
- ³Maɗi Simo Piyer y'an di ruute, y'ede: «Nuɗi ni t'ette sawwiya puuni.» Wo kane an i di ruute, an'de: «In t'ette soo.» Inɗi maɗi an d'ingile, an iiney maɗi an di gili adda tooko, an d'iise sawwiya. A diddo gette an ziwwe kee, puuniso soo toɗi an k'umbe ye.
- ⁴Ume i t'umpile maɗi, Isa y'a t'ihira a biza bar, wo kane sanalliyagi an ki y' zuune ye.
- ⁵Inɗi maɗi Isa y'anni tunde, y'ede: «Inɗi ki nuɗi, puuni kun uune deɗi?» Kane an i di'n gime onami, an'de: «Aha, ay k'uune ye.»
- ⁶Inɗi maɗi Isa y'an di ruute, y'ede: «Kun seddo lebedo ki kese k'ammade tooko, wo kun t'oono puuni me.» Maɗi an di zidde lebedo ki kese k'ammade ki tooko. An iise argu maɗi, k'ambu k'adda tooko an k'aaniya ye kono puuni'ŋ baadaɗi, lebedo boo.
- ⁷Sanallusu wede Isa yi giyye geɗi, yi di ruute a Piyer, y'ede: «Eɗi Galmeega!» Aame Piyer y'illiga eɗi Galmeega maɗi, kallayi wede goole yi t'iidiba geɗi yi t'usse, yi-ti diige adda k'ahu.
- ⁸Wo kane sanalliyagi doɗi soɗi an d'ettiyo ti tooko, an d'argu lebedo boo ti puuni gettiyo, kono kane'ŋ ti zeɗe dokki ye, suma k'oole meeda sire daɗɗal.
- ⁹Aame an ti diige a siido maɗi, an wolliyo'ŋ puuni ossiyto a biza k'uwwo, wo mappo a kese.
- ¹⁰Maɗi Isa y'an di ruute, y'ede: «Puuni doɗi kun ziko geɗi, kun soki miibi.»
- ¹¹Simo Piyer y'a di gili adda tooko, y'a-t'irgo siido lebedo ti puuni boo gette, adda puuni deero, meeda uto ada paat makumu ado, toɗi lebedo a ki zitte ye.
- ¹²Maɗi Isa y'an di ruute, y'ede: «Kun'di, kun ooma.» Inɗi maɗi an d'iide, wo ti diine sanalliyagi wenda soo toɗi umbo a yi tonde, y'a t'eese: «Kee wee wee me?» Derec, kane an yi zuune yoɗi Galmeega me.
- ¹³Isa y'aa d'iide, y'a t'umbe mappo, y'an di-dikkida, wo puuni toɗi y'an d'eele.
- ¹⁴Eɗi k'aduwe Isa y'an kaza tuddi a sanalliyagi, t'ume yi-bilde ti diine doɗi unto me.

Isa ti Piyer

15Aame an t'iimi maṅ, Isa y'a tunde Simo Piyer, y'ede: «Simo ulo ki Zaṅ, kee ki ni giyye a jiiire kane eṅṅo ko?» Simo yi di'n gime onamí, y'ede: «Eyye Galmee'ki nuṅ, kee ki suune nuṅ ni ki giyye me.» Maṅ Isa yi di ruute, y'ede: «K'elso inṅi dambamó.»

16Y'a yi tunde ki sirwe, y'ede: «Simo ulo ki Zaṅ, kee ki ni giyye ko?» Yoṅ yi di'n gime onamí, y'ede: «Eyye Galmee'ki nuṅ, kee ki suune nuṅ ni ki giyye me.» Isa yi di ruute, y'ede: «Ki booho dambamó.»

17Saṅ maṅ y'a yi tunde k'aduwe sey, y'ede: «Simo ulo ki Zaṅ, kee ki ni giyye ko?» Aame yi y' tunde k'aduwe sey «Kee ki ni giyye ko?» maṅ, Piyer y'a t'ize sommagi dondoṅ, wo yi di ruute, y'ede: «Galmee'ki nuṅ, kee ki suune suldi pay, wo ki suune ni ki giyye me.» Maṅ Isa yi di ruute, y'ede: «K'elso dambamó.»

18Derec inṅino wo n'a di rooto: Aame kee'ṅ obulsu geṅ ki kettiyo serrayá ti siidá, wo ki d'ettiyo k'ume wede aa addá i dehu, wo aame ki t'iza gôole maṅ, beydá k'an onda sokeṅ, a di ketta serrayá wede doolo, wo y'a-da t'etta k'ume wede ki ki deha ye.»

19Isa yi rootiyo inṅino kono yi kaza t'urzi mummino Piyer yi t'inda, wo a t'ela tamma a Raa me. Aame y'a ti ruute inṅino maṅ, a Piyer yi di ruute, y'ede: «Ki ni daani.»

20Maṅ Piyer y'a gilde, yi wolliyô'ṅ sanallusu wede Isa yi giyye geṅṅo ti daraṅ me, wede onniyo soo aame an ombô geṅ, y'aa d'uttile k'ume k'Isa, y'a yi tunde, y'ede: «Galmee'ki nuṅ, wee wee wede a ki ti k'owila me?»

21Piyer yi y' wulle maṅ, y'a tunde Isa, y'ede: «Galmeegó, wo a yode eṅ i-d'aana moo me?»

22Isa yi di ruute, y'ede: «Ni dehu maṅ, y'a lekke bini kamadó ki duniya, wo kee'ṅ seezá ye, ki ni daani daaniya.»

23Inṅino maṅ rabila gette a-tiipe, zemba doṅ i ziipe addaṅ a Isa geṅ an d'illiga, sanallusu geṅ yi ki t'inda ye. Wo ki too maṅ Isa yi ki ruute ye a Piyer sanallusu geṅ yi ki t'inda ye me, wo de yi ruute'ṅ, y'ede: «Ni dehu maṅ y'a lekke bini kamadó ki duniya, wo kee'ṅ seezá ye.»

24Yode sanallusu geṅṅo i rootiyo taaya ki suldi geṅ me, wo y'a ti'n riije. Wo ay suune onamí yi rootiyo eṅ derec.

25Isa y'ize suldi ti doolo toṅ baadaṅ, wo aame an ti'n raaje pay soo ti soo maṅ, n'elkiyo duniya pay ette ti ki'n ambe ye mattupiyagi doṅ an raaje me.

Naabo don zina

Naabo don zina 1

Don zina k'Almasi a Zeruzalem

- ¹Teyopil mee'ki nuɗ, nuɗ adda mattupadó ere ki poone, ni riije suldi don pay Isa y'ize wo yi duuye duwo t'ume k'eesiyo,
- ²bini onniyo ere Raa y'a y'umbe k'awwa ki kandaane. Wo ki poone y'a y'amba geɗ, ti toogo k'Unde Kamileɗ y'an di ruute suldi don an d'ise a don zindí don yi biire.
- ³Aame yi dibire bini y'inda wo yi bilde maɗ, y'an di gize tuddí te a kane don zindí t'urzi baadaɗ, geɗ i-kaza yoɗ ki kotto yi-bilde. Wo adda k'onniyo ada pide geɗ tuddí y'an di gize, wo y'an di gizite suldi don ki Moziko Raa.
- ⁴Onniyo soo an ti guune ombo ti kane geɗno maɗ, y'an di ruute, y'ede: «Kun ollo koduwo, ti Zeruzalem eɗ kun arga tunda ye, kun dello munda wede Meega Raa yi ruute y'un t'ela, aa kun illiga n'un ruute ti bizó.
- ⁵Ti poone Zaɗ duwo yi'ni zuyyite batem t'ahu, wo de kune'ɗ adda k'onniyto miibi Raa y'un ti'n suyya batem t'Unde Kamileɗ.»

Isa y'engile k'awwa ki kandaane

- ⁶Wo kane don i t'ugiye a daanadí geɗ an di y' tunde, an'de: «Galmegey, kee a onniyo gettiyo ko moziko ki don k'Izirayel k'an ti t'ela me?»
- ⁷Isa y'an di ruute, y'ede: «Kane suldi don aakede onniyto, ise peedo ere tuuku Meega Raa yi dihe y'aase ti toogadí geɗ, kun k'aane kun ki ti'n suune ye.
- ⁸Wo de kune kun t'oona toogo aame Unde Kamileɗ ti diiga eggun maɗ. Injino maɗ kun kizita onamó, kun t'eesa ti Zeruzalem, kun d'amba k'adda siido ki Ziide ti Samari pay, bini dangu siido pay.»
- ⁹Aame y'a ti ruute injino maɗ, a daanadaɗ geɗ miɗ y'a t'iiziga jomkey, y'a ingile k'awwa ki kandaane, an di wolliyo bini dondirso ti di y'ippe.
- ¹⁰Aame kane an babbiya Isa y'engile k'awwa ki kandaane geɗ, an wolliyo bibaraw a sirpadaɗ don sire ti kallagi tuwardi, an an di ruute, an'de:
- ¹¹«Kune don ti siido Galile no, kun ohire kun babbiya k'awwa ki kandaane moo me? Geɗ Isa Raa yi y'umbe ti daanagun, saɗ onniyo soo y'a-kimo, kun di y' wolla aa kun yi wulle y'ingile k'awwa ki kandaane injino sey.»
- ¹²Injino maɗ kane don zina geɗ, t'ekki makkolo ere an ti waaku makkolo k'Inda k'Olibiye an di-diige, an d'ingile ki Zeruzalem kono to makkolo gette dokki ye ti Zeruzalem me, suma kubbaara soo.

¹³An iiney Zeruzalem maṅ, an di-gili biino ere t'awwa t'ekki bakatú aame an d'ogiyso daayum. Aame geṅ kane Piyer, Zaṅ, Zak, Andire, Pilip, Toma, Bartelemi, Matiye, Zak ulo k'Alpe, Simo wede addí wehini kono siidadí me, wo Ziid ulo Zak.

¹⁴Kane pay onamaṅ kaṅ soo, daayum an ton-diyo Raa ti erayi doṅ oṅgo, ti Mariyam mekk'Isa wo ti zemba k'Isa pây.

Beeriyó Matiyas a oldé Ziidas

¹⁵Adda k'onniytagi geṅ, onniyo soo Piyer y'a t'iiziga a daana zemba kane suma meeda uto ada sire an t'ugiyé geṅṅo, wo y'an di ruute, y'ede:

¹⁶⁻¹⁷«Zemba ki nuṅ, kun suune Ziidas yoṅ ti diine kine, wo naabadí ede ere yi naabiya aa kine in naabiya te. K'ita maṅ y'a t'ize wede k'oogumso a doṅ ki seedu k'Isa. Ono geṅ Unde Kamileṅ ti'ni ruute ti kaaga adda mattup ki Raa, ti bize Dawut a tukki Ziidas me, geṅ a-t'iide.

¹⁸Iṅkino maṅ ti soṅko ere an i ele ki dimme gette, y'a t'iwila doome. Wo kaciṅ wede geṅ y'a iire t'addí a siido adda doome geṅ me, addí a fitte iṅṅi k'addí a t'uddite pay ti paate.

¹⁹Rabila gette doṅ siido Zeruzalem pay an di-t'illiga, wo geṅ iṅkino doome Ziidas y'iwila geṅ an di y' waaku ti onamaṅ “Akil Damma”, i-kaza “doome an iwila ti puuzo wede.”

²⁰Ono eṅ nebi Dawut yi riije ti kaaga adda mattup ki Soom, y'ede: “Boozí a kila bulgo, wenda a lekka umbo.” Wo yi riije soṅ, y'ede: “Ume naabadí wenda doolo y'a t'amba.”

²¹⁻²²Iṅkino maṅ i dehu wedusu y'a-t'ette ti kine, y'a t'ise wede kazita ki rabila ki baldiya Galmeega Isa. Wedusu geṅ y'aase ti diine kane doṅ izire ti kine onniyo ti onniyo aame Galmeega Isa y'izire adda siido ti kine, t'ume Zaṅ yi ti y' zuyye batem bini onniyo ere Raa y'a y'umbe ti diine kine, y'a iṅgile k'awwa ki kandaane.»

²³Aame geṅ an di biire doṅ sire, Yusup wede Barsabas sundí soo Zistus, kane ti Matiyas.

²⁴Iṅkino maṅ an tunde Raa, an'de: «Galmeega, kee ki suune adde duwo pay, iṅkino ki beero soo ti diine doṅ sire eṅṅo,

²⁵kono y'a t'ambe naabo doṅ zina k'Isa a oldé ki Ziidas, kono yo Ziidas geṅ ume naabadí yi iili, yi t'iide k'ume wede aa addí i dehu i-d'iide untadí.»

²⁶Iṅkino maṅ an t'ize teltel muntelliyo, maṅ i-t'iire a Matiyas, geṅ yoṅ y'a di giyy'e ti kane doṅ zina doṅ koomat makumu soo geṅṅo.

Naabo doŋ zina 2

Aaniya k'Unde Kamilen

- ¹Aame onniyo tarnaape ki Pantekot t'iina toŋ maŋ, kane doŋ i ziipe addaŋ a Isa geŋ pay an lekkiyo umayaŋ soo.
- ²A kaamiki an ollige maŋ tarkuuse aa ki maaye baadaŋ i-d'eegu ti kandaane, iide'ŋ i-t'ûune adda boy wede kane adda geŋno.
- ³Aame geŋ an wolliyo munda aa ilze k'uwo iide a t'îhinte, wede soŋ i di ziipe tuddí tuddí.
- ⁴Kane pay addaŋ a ûune t'Unde Kamilen, inŋkino an d'iise orbe t'ono doŋ doolo, wede tuuku toŋ yi d'orbe t'ono doŋ aa Unde Raa ti ele ele.
- ⁵Wo aame geŋ a Zeruzalem i d'ede Yawudiyagi doŋ i seedu urzi Raazaŋ zakidí, an iido ti siidiyagi doŋ adda duniya pay.
- ⁶A onamaŋ doŋ geŋ kane doŋ duuru an d'ukke, an iide, an ziida giggeraŋ kono wede tuuku toŋ yi d'ollige ono t'onamí t'onamí.
- ⁷Wo kane doŋ duuru an di roote munda an ki suune ye, an di wolliyo beesel, wo an'de: «Kane doŋ i rootiso eŋ, kane pay miŋ ti siido Galile ye ko?»
- ⁸De mummino kane duwo eŋ wede tuuku toŋ yi d'orbe ti ono kine me?
- ⁹Kine doŋ iido ti siidiyagi doŋ ki Partiya, ki Meediya, ki Elam, ki Mezapotami, ki Ziide, ki Kapados, ki Pontus, ki Aazi,
- ¹⁰ki Pirizi, ki Pampili, ki Misir, ki Sireŋ adda siido Libi, doŋ soŋ an iido ti Room,
- ¹¹ti siido Kiret, wo ti siido k'Arabi. Doŋ soŋ Yawudiyagi, doŋ oŋgo Yawudiyagi ye an ti t'ize tuddaŋ Yawudiyagi pay miŋ, kane ay di'n ollige an d'orbe t'onamey t'onamey me. De geŋ munda k'armika Raa ye ko?»
- ¹²Kane pay eedaŋ t'a digge, an di roote munda an ki suune ye, an di rootiyo ti tuddaŋ, an'de: «De geŋ i-kaza moo me?»
- ¹³Wo oŋgoŋ an di'n okko maade, an'de: «Kane eŋ an t'iibo toote.»

Ono Piyer a daana doŋ duuru

- ¹⁴Inŋkino maŋ Piyer ti kane doŋ zina doŋ koomat makumu soo geŋ an t'iiziga, wo y'a ruute ti golla awwa, y'ede: «Kune pay Yawudiyagi wo kune doŋ pay iido ki Zeruzalem, kun t'ohinto kuwwagaŋ a ono doŋ ni roota, kono kun di suune munda wede ize.
- ¹⁵Kun'de doŋ eŋ an t'iibo, maŋ an ki t'iibo ye, ume ti soohe botto.

16-17 Wo ankeŋ ono ɗoŋ Raa yi ruute ti kaaga ti bize nebi Zowel a-t'iide, y'ede: "A onniytagi ɗoŋ ettiyo k'ita geŋ, Undó n'a ti teepa ekki ɗuwo pay. Inŋiŋuŋ kuuli erayi an di rootita ono ɗoŋ n'agisa. Inŋi obilagi ti konazi an d'etta munda aa suniye, wo gôldalguŋ an t'oona suniye.

18 Eyye, ki kotto onniytagi geŋ, a ɗoŋ naabadó kuuli erayi pây, n'an di teepa Undó wo an di rootita ono ɗoŋ n'agisa.

19 N'aasa sulɗi ɗoŋ i ceeriyo eego awwa a kandaane, wo a ɗandi a siido sulɗi ɗoŋ i-kaza munda, an di wolla puuzo, uwwo wo dondari ki saa.

20 Peedo ti-t'etta ume a t'isa zimolo, tere a t'isa aa puuzo. Aame sulɗi geŋ an t'ingila maŋ, onniyo Galmeega Raa t'a aana, onniyo ere meeda ki dary'ika Raa gette.

21 Wo aame geŋ wede tuuku y'iila ti suma Galmeega Raa maŋ, yoŋ y'a y'utta."»

22 Piyer y'an di ruute sey, y'ede: «Kune ɗoŋ k'Izirayel no, kun ollo munda wede n'un di roote: Isa wede ti geeger Nazaret geŋ, t'urzi yode Raa y'a ize sulɗi k'armika wo sulɗi ɗoŋ i ceeriyo eego a diinaguŋ, wo kune batum kun'ni suune. Inŋino maŋ Raa y'un gize kereŋ i y'igibo yode.

23 Yode wede geŋ un y'ele a beyguŋ Raa batum aa yoŋ yi dihe, wo aa munda wede y'ilke ti poone y'aasa. Inŋino maŋ kun an di y'ele a bey ɗoŋ i ki suune Raa ye, an ti y' tiike ekk'undumu wede zaapu t'ekki bakadí kaŋ tontilko, an di y'iide.

24 Wo ɗe Raa y'a ti y' bilɗe, y'a y'udɗe ti dabar ere k'unto te, kono unto i-k'ede toogo ye a tukk'Isa me.

25 Dawut toŋ yi ruute ti kaaga a tukki yoŋ me, y'ede: "Yo Galmeega daayum ni yi wolliyo ɗaanadó, n'a k'orgide ye kono yoŋ daayum a sirpadó.

26 Kono kamo nuŋ ulbó uŋse, wo ilzó y'a t'imme t'uŋsuwo, wo ni zaapu elkisadó aame n'inda toŋ, nuŋ Raa yi ti n' balɗa.

27 Nuŋ ni suune kee Galmeegó ki ki n'oola adda diine ɗoŋ unto ye, ki k'oola tudde ki wedizá kamileŋ a ki ruuma adda muuzo ye.

28 Kee urziyagi ɗoŋ o-do t'ettye k'ume lekkiyo k'o ni gize, ulbó uŋse kono kee daayum ti nuŋ."»

29 Piyer y'an di ruute sey, y'ede: «Kun ollo zembá ki nuŋ, nuŋ oo d'ede urzi n'un di rooto kereŋ a urzi ki mugiyiŋ Dawut me. Yoŋ y'inda, an di y'ele adda muuzo, wo muuzadí toŋ maŋ ankeŋno tod'te di kine.

30 Yo Dawut geŋ yoŋ nebi, wo yi suune Raa geŋ y'a ti nîime tuddí a ɗaana yode, y'a ruute, y'ede: "Mozikadá gette ni di t'ela a ulo ti diine k'inŋi ɗoŋ ki biza bumbizá."

³¹Dawut geɗ yi zuune ki poone Almasi Raa yi biire yi balɗa me, geɗ y'a ruute, y'ede: "Yoŋ an ki y'iili adda diine ɗoŋ unto ye, wo tuddí i ki ruume adda muuzo ye."»

³²Piyer y'a ruute sey, y'ede: «Wede n'a ruute geɗ yoŋ Isa, kaye pay ay di y' wulle Raa y'a ti y' bilde.

³³Raa y'a y'umbe k'awwa ki kandaane y'a lekkey a ammidadí, wo a Isa Meega Raa yi-d'ele Unde Kamileŋ ere yi ruute y'in di t'ela. Inŋkino maŋ yo Isa y'in d'elo Unde Kamileŋ a kine aa kun wolliyo wo kun ollige aŋkeŋŋo.

³⁴Wo yo Dawut geɗ yode batum k'awwa ki kandaane yi ki gili ye, wo toŋ y'a ruute, y'ede: "Galmeega Raa yi di ruute a Galmeegó, y'ede: K'edi ki-koono a ammidadó kino,

³⁵bini ɗoŋ k'aduzá n'an isa aa munda ki bita ti ɗandí zoŋɗá."

³⁶Inŋkino maŋ kune ɗoŋ k'Izirayel pay kun suuno ki kotto, Isa wede kun ti y' tiike ekk'undumu wede zaapu t'ekki bakadí kaŋ tontilko geɗ, Raa yi y'ize Galmeega wo Almasi Raa yi biire.»

Ɗoŋ dupu aɗo an ziipe addaŋ a Isa

³⁷Aame kane ɗuwo an illiga inŋkino maŋ addaŋ a iile wiic, wo an tunde Piyer ti ɗoŋ zina k'Isa oŋgo, an'de: «De ay d'ise mummino, zemba ki nuŋ?»

³⁸Maŋ Piyer y'an di ruute, y'ede: «Kun ti kama lekkiyaguŋ wo wede tuuku toŋ yi suyyo batem ti suma k'Isa Almasi, kono kun t'oona tambobino k'oldfikaguŋ. Inŋkino maŋ Raa y'un t'ela Unde Kamileŋ,

³⁹kono ono ɗoŋ Raa yi ruute y'aasa eŋ a kune, a inŋniguŋ, wo a ɗoŋ dokki, a ɗoŋ pay ɗoŋ Galmeega Raaziŋ yi'ni waaka.»

⁴⁰Piyer geɗ y'an di ruutite ono baadaŋ sey kono an t'eele kooke, an d'ambe, wo y'an di ruute, y'ede: «Kun t'adɗo ti diine ɗoŋ i t'udɗe t'urzi wede ɗerec ki Raa geɗ me, wo kun t'oona uttiyo.»

⁴¹Ɗoŋ umbe a ono Piyer geɗ an ti'n zuyye batem, wo a onniyo gette kane suma dupu aɗo an a-ti giyy'e ti zemba ɗoŋ i ziipe addaŋ a Isa.

Lekkiyo ɗoŋ ki poone an ziipe addaŋ a Isa

⁴²Kane pay kaŋ soo an d'ollige dooyiso ere ɗoŋ zina k'Isa an'ni dooyiso, an di lekkiyo kettiyo kaŋ soo, ombadaŋ kaŋ soo, wo daayum an tonɗiyo Raa kaŋ soo.

⁴³Kane ɗoŋ duuru pay an lekkiyo t'orgiso a Raa, kono kane ɗoŋ zina geɗ ti toogo ere ki Raa an d'isiyto sulɗi baadaŋ ɗoŋ i ceeriyo eego ti sulɗi k'armika.

⁴⁴Kane ɗoŋ pay i ziipe addaŋ a Isa, an lekkiyo kaŋ soo, maaladaŋ toŋ kaŋ soo.

⁴⁵An owile doome koo boy koo maŋ, soŋko gette an di-dokkide diinayaŋ pay, a wede tuuku toŋ a attidizí attidizí.

⁴⁶Kane pay addaŋ soo, onniyo ti onniyo an d'ettiyo booro Boy Raa, ombadaŋ kaŋ soo ti uŋsuwo wo ti tassuwa adda boydizaŋ me.

⁴⁷Daayum an tamma Raa wo a lekkiyadaŋ gette duwo pay an di'n geyyiso. Wo onniyo ti onniyo Galmeega yi'n aagulu ti duwo doŋ an ooniyo urzi k'uttiyo.

Naabo doŋ zina 3

Piyer ti Zaŋ wo wede zoŋdí unto

¹Onniyo soo Piyer kane ti Zaŋ an t'ette tonduyo a booro Boy Raa a peedo t'ibbira, peedo ere aa daayum an tonduyo Raa.

²Wo goppon a sirpa ki biza Boy Raa wede an yi waaku biza majjaane geŋ, an d'umbo wedusu zoŋdí unto t'ume k'ehiyadí to, daayum an ti y' zaapu aŋgeŋno, yi d'ahultu munda a bey doŋ ettiyo ki booro Boy Raa.

³Aame wede geŋ yi wulle Piyer kane ti Zaŋ an'te booro Boy Raa maŋ, y'a iise ahulu munda a beezaŋ.

⁴Aame an illiga iŋkino maŋ, Piyer kane ti Zaŋ geŋ an di y' wolleyo tebeŋ, wo Piyer y'ede: «K'ayni wolle!»

⁵Aame geŋ wede y'an iise wolleyo, kono y'elkiyo yi-t'oono munda ti beezaŋ.

⁶Maŋ Piyer yi di ruute, y'ede: «Nuŋ o k'ede soŋko ye, dap ye, wo munda wede o d'ede n'a-d'elo, ti suma ere ki Isa Almasi wede ti geeger Nazaret, ki t'oozo wo k'a oziro.»

⁷Maŋ Piyer y'a igibe beezí wede k'ammade, y'a di y' ziidá, y'a y'iiziga kaŋ ôhire. A kaamiki wede'ŋ dondali ti zoŋdí a t'ize toogo.

⁸Wede geŋ y'a ilde k'awwa y'a t'ihira, wo y'a iise sooru, yi-t'iide ti kane k'adda booro Boy Raa, yi sooru, yi lohito, yi tamma Raa.

⁹Wo yoŋ wede geŋ duwo pay an di y' wulle yi sooru wo yi tamma Raa.

¹⁰Aame duwo geŋ an yi wulle wo an yi zuune yoŋ wede i konso daayum a biza Boy Raa wede an yi waaku biza majjaane yi d'ahultu geŋno maŋ, an ziidá giggiraŋ ti orgiso a munda wede i iide a wede geŋno.

Ono Piyer a booro Boy Raa

¹¹Wo wede geŋ Piyer ti Zaŋ y'an k'eeziyo ye. Iŋkino maŋ doŋ duuru pay an d'iide k'ume kane kaŋ okko, k'adda daabe wede an yi waaku daabe ki Salamoŋ, kono kane an ziidá giggiraŋ.

12Aame Piyer yi wulle ɗuwo iido tuddaŋ maŋ, y'an di ruute y'ede: «Kune ɗoŋ k'Izirayel no, kun seedu gaggirguŋ moo me, kun ay di'n wolliso iŋkino me? Kun elkiyo wede uune bee yi sooru eŋ ti toogo kaye ko kunuŋ, kun elkiyo kaye ki diine a urzi Raazey me ko? Aha, iŋkino ye.

13Raa k'Ibirayim, k'Isaaka wo ki Yakup, yoŋ geŋ miŋ Raa moŋgidagiŋ, yi-d'ele gooliko a Isa wede naabadí. Yode wede kune batum kun an di y'ele a deero Romen. Aame mozigo Pilat yi dihe yi-d'eeze kono yo yi zuune yi k'ize munda ye toŋ, kune kun di giigira.

14Yode wede kamileŋ wo ki diine a ɗaana Raa geŋ kun di y' giigira, wo kun di dihe kun i d'ize beeko a wede tōwwo ɗoŋ.

15Iŋkino maŋ wede i d'eliyo lekkiyo a ɗuwo geŋ, kun an di y'ele a ɗuwo, an di y'iide. Wo Raa y'a ti y' bilde ti diine ɗoŋ unto me, kaye ay di y' wulle.

16Wo wede eŋ kun yi suune wo kun yi wolliyo, munda wede ize a ɗaanaguŋ. I ele beeko te toogo ere ki suma k'Isa t'urzi zaapu k'adde a yode, y'uune beeko pay ette t'urzi zaapu k'adde a Isa, aa kune pay kun wolliyo eŋŋo.

17Wo aŋkeŋ zembá ki nuŋ, ni suune aame kune wo ti deeruguŋ pay Isa kun di y' giigira geŋ, munda wede kun isiyo kun ki y' suune ye.

18Geŋ iŋkino a-t'iide a ono ɗoŋ Raa yi ruute ti kaaga ti bize nebiyagi pay, y'ede: “Almasi Raa yi biire, y'a dabira.”

19Aŋkeŋ kun ti kama lekkiyaguŋ, kun ti kami ki tukki Raa kono y'un di-booya oldikaguŋ.

20Iŋkino maŋ Galmeega Raa y'un t'ela puukiyo, wo y'un ti y' t'igibo Almasi Raa yi biire a kune, yoŋ Isa.

21Wo aŋkeŋŋo Almasi y'a-lekko a kandaane bini onniyo ere sulɗi pay a t'isa aware, aa Raa y'a ruute ti kaaga ti bize nebiyagi ɗoŋ kamileŋ.

22Muusa y'a ruute ti kaaga, y'ede: “Galmeega Raaguŋ y'un d'oodiba nebi aa nuuno ti diine zembaguŋ, wo kune kun d'olliga sulɗi ɗoŋ pay y'un rootita geŋ me.”

23Wo soŋ y'ede, aame wede tuuku yi-tuuga k'ollige k'ono nebi geŋŋo maŋ, y'a dagga, yode geŋ yi k'isa ti diine ɗoŋ Raa ye.

24Wo nebiyagi pay iise ti Samiyel a iide soŋ k'ita bakadí bakadí geŋ, an ruutite wo an gizite a sulɗi ɗoŋ isiyo a onniyagi ɗoŋ aŋkeŋŋo geŋ me.

25Zembá ki nuŋ, ono ɗoŋ nebiyagi an ruutite pay geŋ a kune, wo taasua ere Raa yi gitte ti moŋgidagiŋ gette kune adda, aame yi ruute a Ibirayim, y'ede: “Ita ɗuwo pay a siido an t'oona beeko t'urzi k'iŋŋizá.”

²⁶Geɗ ki poone a kune Raa y’igibo wede naabadí me, kono y’un di zaape beeko wo tuuku toɗ y’a ti y’ kimo ti naabadí ere oldo gette.»

Naabo ɗoɗ zina 4

Piyer ti Zaɗ a ɗaana deero booro Yawudiyagi

¹Aame Piyer ti Zaɗ an an ti rootiyto a ɗoɗ duuru geɗ, kane ɗoɗ sedefe, goole ɗoɗ boohiyo Boy Raa ti Saduseyeɗ miibi an d’iina aame kane.

²Kane an di-gulkuwe baadaɗ aame an wulle ɗoɗ zina sire an dooyiso ɗoɗ duuru wo an an kazita, an’de Isa yi-bilde, wo ɗoɗ i t’inda toɗ an di balɗa kay.

³Inkino maɗ Piyer ti Zaɗ an ti’n zidde, an di’n ibi ɗaɗgay bini ki soggo, kono peedo t’ingile baa.

⁴Aame geɗ ti diine ɗoɗ illiga ono ki Piyer ti Zaɗ geɗ, ɗoɗ baadaɗ an d’umbe, wo ti ɗoɗ i ziipe addaɗ a Isa an aa di giyye, kane ɗuwo ette suma dupu paat.

⁵Soggo maɗ kane deero ɗoɗ sedefe, ɗoɗ i dokkiyo Yawudiyagi wo ɗoɗ suuniyo k’ogoro an t’ugiye pay a geeger ki Zeruzalem.

⁶A ogiysadaɗ gette i d’ede kane Anne mozigo goole ɗoɗ sedefe ti ɗoɗ boozí pay, Kayip, Zaɗ wo Alegzandire.

⁷Piyer ti Zaɗ t’adda ɗaɗgay an di’n uɗɗo, an d’an t’iide diinayaɗ wo an di’n tunde, an’de: «Wede eɗ kun i ele beeko ti toogo ere tuuku te, wo ti suma k’aaye?»

⁸Aame geɗ Piyer yoɗ addiɗ ûune ti Unde Kamileɗ wo y’an di ruute, y’ede:

⁹«Kune deero ɗoɗ sedefe wo ɗoɗ i dokkiyo ɗoɗziɗ, aɗki kun ayni wiiko ki ɗaanaguɗ eɗ, kun dehu kun ɗekke booro a eedey kono ay ize beehiye a wede zoɗɗi unto, wo soɗ kun dehu kun di suune t’urzi mummino y’utte t’eenizí me.

¹⁰Inkino maɗ kune deero siido ti ɗoɗ k’Izirayel pay, munda eɗ kun yi suuno koɗuwo: wede kun wolliyo yi t’ihira a ɗaanaguɗ eɗ, y’uune bee ti toogo ki suma ere k’Isa Almasi wede ti geeger Nazaret, yode wede kun ti y’ tiike ekk’undumu wede zaapu t’ekki bakadi kaɗ tontilko, wo Raa y’a ti y’ bilde ti diine ɗoɗ unto me.

¹¹Aakede an riije ti kaaga adda mattup ki Raa, Isa yoɗ aa mukkolo ere kune ɗoɗ k’oozige boy kun di zidde mentú, tode gettiyo a t’ize mukkolo ere majjaanawa a jiire k’oozige boy te.

¹²Inkino maɗ n’un di rooto Isa ɗaɗɗal urzi k’uttiyo me, kono adda duniya pay ette Raa yi k’eele ye suma ti doolo in di’n utta kine ɗuwo me.»

13Aame geŋ kane deero an wulle Piyer ti Zaŋ an rootiyo onamaŋ daa k’orgiso maŋ, an ziida giggiraŋ kono kane doŋ i ki duuye tunda ye, kane miŋ doŋ kino baa. Wo kane deero geŋ an suune an izire t’Isa me.

14Wo aakede an wolliyo wede uune bee a sirpadaŋ geŋ, urzi an an di roote munda a kane umbo.

15Inkino maŋ an an d’ele urzi an t’adde t’adda boy me. Aame kane an t’udde maŋ, kane deero booro Yawudiyagi an di-ruute diinayaŋ,

16an’de: «A doŋ eŋ in an d’isa mummino me? Derec, Piyer ti Zaŋ an ize munda k’armika geŋ, doŋ Zeruzalem pay an y’illiga, kine in k’aane in ki niike ye.

17Wo kono rabila gette a ki teepa a duwo pay ye geŋ, in an ondirfo ki kossiyadaŋ, kono suma k’Isa pidpidin an ki roota ye baa a wede tuuku toŋ maŋ.»

18Saŋ maŋ Piyer ti Zaŋ an di’n wiike, wo an an di ruute, an’de: «Ti aŋki kun ôhor, suma k’Isa kun kizita ye, wo kun dooya wenda ye baa.»

19Maŋ Piyer ti Zaŋ an an di’n gime onamaŋ, an’de: «A suuno kune batum munda wede ki diine a daana Raa me, ay d’ambe ono kune kunuŋ, ono Raa ko?

20Ki kaye maŋ ay k’anniga ye ti rootiyto a munda wede ay wulle wo ay illiga me.»

21Maŋ kane deero geŋ an an d’undirde ki kossiyadaŋ sey, wo an an d’iize. An an d’ise ulsu an k’uune ye, kono duwo pay geŋ an tamma Raa a munda ize geŋ me.

22Yoŋ wede uune beeko t’urzi munda k’armika geŋ, ozzinayi ette suma k’ada pide ti makumu.

Tondiyo Raa ki doŋ i ziipe addaŋ a Isa

23Aame Piyer ti Zaŋ ti daŋgay an an iize maŋ, an d’ingile an d’uuney zembadaŋ, an an t’ide taaya pay a munda wede deero doŋ sedeke ti doŋ i dokkiyo Yawudiyagi an an ruutite me.

24Aame doŋ i ziipe addaŋ a Isa geŋ an illiga ono ki Piyer ti Zaŋ geŋno maŋ, pay onamaŋ kaŋ soo an tunde Raa, an’de: «Galmegey, kee wede k’ikkima kandaane ti siido wo bar, ti suldi doŋ pay adda.

25Kee wede ki ele Unde Kamileŋ a Dawut wede naabadá, Unde gette ti di gize, y’a ruute, y’ede: “Ki moo me doŋ siidiyagi pay an ahutu bokimo me? Ki moo me ita duwo pay an tôwwo onamaŋ ki bita me?

26Kane mozagi a siido pay an t’ikkima tuddaŋ ki arka, wo deero boha bumbiyagi an t’ugiye ki deyyiso ki Galmeega Raa wo ti Almasi Raa yi biire.”

²⁷Eyye, ono geŋ derec, Erod ti Pons Pilat an t'ukkiy'e a geeger ettiyo, ti kane doŋ Yawudiyagi ti doŋ Yawudiyagi ye, an di kiigira wede naabadá, Isa wede kamileŋ ki biire.

²⁸Iŋkino maŋ munda wede ki dihe ti poone geŋ, an t'ize pay t'urzi toogadá, aa kee ki dihe.

²⁹Wo aŋken Galmeega, kee ki wollo an ay ondirso ki kossiyadey, kaye doŋ naabadá kee k'ay eli toogadá ay di kizite onamá daa k'orgiso.

³⁰K'ay eli toogadá kono ay an t'ele beeko a duwo, wo ay d'ise suldi k'armika ti suldi doŋ i ceeriyo eego ti suma wede naabadá, Isa wede kamileŋ.»

³¹Aame kane an diŋge ti ton-diyo Raa maŋ, ume wede an d'ugiyi ki ton-diyo geŋ y'a iise ŋoŋŋirso. Wo Raa yi di'n ũune t'Unde Kamileŋ pay, maŋ an d'iise kazita k'ono Raa daa k'orgiso.

Lekkiyo ki doŋ i ziipe addaŋ a Isa

³²Doŋ i ziipe addaŋ a Isa pay geŋ elkisadaŋ kaŋ soo, ti diinayaŋ wenda soo toŋ y'a roote eŋ ki nuuno umbo, pay maaladaŋ an t'obe ume soo.

³³Kane doŋ zina k'Isa an kazita ti toogo baadaŋ rabila k'Isa te, an d'eesiyo: «Yoŋ Galmeega Isa yi-bilde, kaye ay yi wulle.» Wo kane pay geŋ Raa y'an di ziipe beeko baadaŋ.

³⁴Ti diinayaŋ wenda soo toŋ munda i-baate umbo. Doŋ an d'ede dombi ise boydi toŋ an owile maŋ, soŋko gette an d'ettiyo,

³⁵wo an an d'eliyo a bey doŋ zina k'Isa, maŋ kane geŋ an an di-dokkide, soŋko gette a wede tuuku toŋ a attidizi attidizi.

³⁶Ti diine doŋ geŋ i d'ede wede sundi Yusup yoŋ ti biza bumbu Lebi, wo kane doŋ zina k'Isa an di y' waaku Barnabas suma gette i-kaza «wede k'eliyo kooke», yoŋ an y'ehe a siido Siipire.

³⁷Yoŋ wede geŋ i-d'ede doome wo y'a t'iwila, y'a t'umbo soŋko y'an d'iido, y'an d'ele a bey doŋ zina k'Isa.

Naabo doŋ zina 5

Ananias ti Sapira

¹Wo i d'ede wedusu sundi Ananias ti eddi Sapira, doomizaŋ an t'iwila.

²Kane geŋ an ti gitte onamaŋ kaŋ soo, soŋko y'a-diikida sire, ere soo a yode wo soo y'a t'umbe, y'an d'iide y'an d'eliyo a bey doŋ zina k'Isa.

³Maṅ Piyer yi di ruute, y'ede: «Ki moo me Ananiyas ki-d'iili addá a Meeda siitandani ti-t'iide me, wo ki moo me ki lohito ono a Unde Kamilen, k'a t'uuyo soṅko doomizá soo a kee me?

⁴Wo doome doomizá, aame ki ki t'owila ye wo ki t'iwila toṅ maṅ, soṅko gette k'a ti naabe aa addá i dehu. Wo de ki moo me ki d'isiyo inṅkino me? Naabadá k'ize gette a duwo ye, k'ize ulsu a Raa.»

⁵Aame Ananiyas y'illiga ono geṅṅo maṅ, y'a iidfiba, y'a iire tul, y'a inda. Wo kane doṅ pay illiga geṅ orgiso t'anni ziida baadaṅ.

⁶Inṅkino maṅ obilagi an t'iiziga, an di ṅilpe, an iide, an t'elo adda muuzo.

⁷Saṅ an likke bini maṅ, eddí ti-t'udfo daa suuniyo munda wede ize.

⁸Aame t'iina maṅ, Piyer y'a ti tunde, y'ede: «M'o ki ti rooti do, ettiṅ soṅko ere pay kun iwila doomugun ko?» Maṅ tod' t'a ruute, t'ede: «Eyye, ettiṅ soṅko tode.»

⁹Inṅkino maṅ Piyer yi di ruute, y'ede: «Mummino me koṅ ti kulayí kun di-gitte onamgun kaṅ soo, kun di naame Unde Galmeega me? M'ollo, doṅ iide ottibe kulayí an ti gimo kane a biza bumbu geṅṅo, an ki ti'n amba an t'ottibo kay.»

¹⁰A kaamiki t'a iidfiba, t'a iire a zoṅ ki Piyer, t'a inda. Aame obilagi an ti gimo ti ottibe ki kulatú maṅ, an t'uuna t'inda. An t'umbe, an a-t'ittibo a sirpa kulatú.

¹¹A armika gette doṅ pay ogiyso ti suma k'Isa wo doṅ pay illiga toṅ maṅ, orgiso t'anni ziida baadaṅ.

Doṅ zina k'Isa ti doṅ k'eeni

¹²Doṅ zina k'Isa an d'izite suldi k'armika ti suldi doṅ i ceeriyo eego baadaṅ a diine doṅ duuru me. Kane doṅ i ziipe addaṅ a Isa geṅ pay kaṅ soo, an t'ogiyso adda daabe goole wede an yi waaku daabe Salamoṅ.

¹³Kane doṅ i ki ziipe addaṅ a Isa ye geṅ, wenda ti doolo a roote taaya key'iso ti kane umbo. Wo toṅ kane doṅ duuru geṅ an di'n tamma baadaṅ.

¹⁴Wo onniyo ti onniyo doṅ baadaṅ erayi kuuli an d'aagulu k'aagulu, an di zaapu addaṅ a Galmeega, an a-ti key'iso ti kane.

¹⁵Ti suldi k'armika doṅ an isiyto geṅ, doṅ k'eeni an ti'n sokiyo biza k'urzi ti zaadagi, oṅgoṅ a raṅgayi, kono aame Piyer y'udfa wo undisadi ti butta tuuku ti diinayaṅ maṅ, y'a t'oona bee.

¹⁶Ti geegiryagi sunni doṅ goppon ti Zeruzalem toṅ, doṅ baadaṅ an di zikito doṅ k'eeni, oṅgoṅ siitandani an ti'n ukkite maadagi, wo kane pay geṅ an d'uune bee.

Doṅ zina k'Isa adda dangay

17 Injino maɲ mozigo goole ɗoɲ sedefe ti ɗoɲ itadí, kane geɲ ti diine deero siido an'ni waaku soɲ Saduseyeɲ, kolbiso t'a jiiire eedaɲ, an dehu ɗoɲ zina k'Isa an di'n dabire.

18 Aame geɲ an ti'n zidde, an di'n ibi ɗaɲgay a ɗaana ki ɗoɲ pay.

19 Wo a diddo kotto maɲ, Galmeega Raa yi d'igibe maaleeka y'a t'ihinte boha ɗaɲgay me, ɗoɲ zina k'Isa y'an uɗde wo y'an di ruute, y'ede:

20 «Kun eɲgilo k'adda booro Boy Raa, kun an kazitoy a ɗuwo taaya ki sulɗi pay i d'eliyo lekkiyo ere aware gettiyo.»

21 Injino maɲ onamí an d'illiga, soggo ti soohe walak an d'ingile k'adda booro Boy Raa, an d'iise dooyiso ɗuwo. Wo yo mozigo goole ɗoɲ sedefe ti ɗoɲ k'itadí, an di wiiko deero booro Yawudiyagi an t'ugiye, kane ɗoɲ wolliyo k'ono k'adda siido k'Izirayel. Maɲ an d'igibe ɗoɲ i boohiyo Boy Raa an di waaku ɗoɲ zina k'Isa adda ɗaɲgay.

22 Wo aame ɗoɲ an igibe an iide maɲ, ɗoɲ zina k'Isa umbo adda ɗaɲgay me. Maɲ an di-gimo k'ume ɗoɲ i'n igibe, an an t'iide taaya a munda wede kane an wullo,

23 an'de: «Kaye ay iide, ay uuney boha ɗaɲgay appiyta beberec, wo ɗoɲ boohiyo toɲ kane ede. Wo aame an ay t'ihinte boha maɲ, kane ɗoɲ zina k'Isa umbo adda ɗaɲgay me.»

24 Aame goole ɗoɲ boohiyo Boy Raa ti deero ɗoɲ sedefe an illiga injino maɲ, an di roote munda an ki suune ye a munda wede ize a tukki ɗoɲ zina geɲ me, wo an tondiso tondiso ti tuddaɲ baa, ɗe aasey moo me, moo me.

25 Saɲ maɲ i d'ede wedusu y'a iido ti rabila, y'an di ruute, y'ede: «Kun ollo kay, ɗoɲ kun ti'n ibi adda ɗaɲgay geɲ, aɲkeɲ kane adda booro Boy Raa an dooyiso ɗuwo.»

26 Injino maɲ kesiko goole ɗoɲ i boohiyo Boy Raa y'a iide ti ɗuwo itadí kono ɗoɲ zina k'Isa y'an ti'n waako, wo an an k'izo ooɲe ye kono an orgiso ɗuwo an ti'n kakkita.

Ɗoɲ zina k'Isa a ɗaana ɗoɲ booro

27 Aame kane ɗoɲ zina k'Isa geɲ ti Boy Raa an ti'n wiiko, an d'an t'iide ki ɗaana deero Yawudiyagi maɲ, mozigo goole ɗoɲ sedefe y'an iise tondiso,

28 y'ede: «Kaye ay un ruute, kun ôhor, ti suma k'Isa kun dooya wenda ye. Wo aɲkeɲ kun wollo, kun ize eɲ moo me, ɗoɲ siido Zeruzalem pay kun an ti gizite, kun dehu puuzo wede eɲ t'a oope eedey.»

29 Maɲ Piyer ti ɗoɲ zina k'Isa oɲgoɲ an di ruute, an'de: «Kaye ay d'ise ki poone munda wede Raa yi dehu, saɲ wede ki ɗuwo kollo.

- 30** Kune Isa kun ti y' tiike ekk'undumu, kun di y'ïide, wo Raa wede ki mongidagin y'a ti y' bilde ti diine don unto me.
- 31** Raa y'a y'umbe a ammidadi, y'a ti y' ziipe Mozigo wo Wede k'Uttiyo kono y'an di kize urzi a don k'Izirayel, an di kime lekkiyadañ wo an t'oone tambobino k'oldikadañ.
- 32** Wo suldi ize geñ kaye ay wulle wo ay illiga, kaye ti Unde Kamilen ere Raa y'an ele a don i ollige onami ton mañ.»
- 33** Aame kane don geñ an illiga ono geñno mañ, an di-gulkuwe baadañ, an dehu an ti'n t'ïide don zina k'Isa geñ me.
- 34** Wo de a diine deero Yawudiyagi geñ i d'ede wedusu yoñ Pariziyen sundi Gamaliyel, yoñ wede dooyiso k'oogoro Yawudiyagi, wo don pay an yi suune yoñ wede beehiye. Yoñ y'a t'iiziga a diinayañ wo y'an di ruute, y'ede: «Kun ollo, ki poone n'a roote geñ don en kun ti'n addo.»
- 35** Aame an ti'n udfde mañ, y'an di ruute a don booro, y'ede: «Zemba ki nuñ don k'Izirayel, kun elko do munda wede kun dehu kun an d'ise a don en me.
- 36** Kun elke munda dokki ye, i d'ede wedusu sundi Tedas y'a-t'ize tuddi wede suma, yi d'irga duwo a itadi suma meeda pide. Wo yode geñ an di y'ïide, mañ donzi an di-tiipe wo munda geñ a-ti dinge injkino.
- 37** Aame yode geñ yi t'ingile mañ, i d'ize wede ti doolo sundi Ziidas, yode geñ ti siido Galile. Aame deero Romeñ an iiziga kaza duwo geñ, y'a t'udfde ki balda wo don baadañ an di y' diine, wo yode ton an di y'ïide kay, wo donzi an di-tiipe.
- 38** Wo ankeñ n'un di rooto, kun t'ele eggun ye a don en me, kun oolo an d'engile, aame suldizañ don an isiyo, wo onamañ an kazita en ettiyo t'urzi duwo mañ, sañ a ôhira.
- 39** Wo aame mundañ an isiyo en ki Raa kotto mañ, kun k'aana ôhiradañ ye kino me, para mañ koo kun deyyiso Raa batum mañ.» Injino mañ kane don booro an d'umbe a ono Gamaliyel.
- 40** Don zina k'Isa geñ an an di'n gime, an an di'n ele a bey don boohiyo Boy Raa, an di'n gusse ti dalyagi. Sañ deero an an di ruute, an'de: «Kun ôhor, ti suma k'Isa kun kizita ye baa.» Mañ an an d'iize.
- 41** Don zina k'Isa an t'udfde ti diine deero Yawudiyagi t'ulbe unse, kono Raa yi'ni wulle kane an t'ïide an dabire kono an umbe a suma k'Almasi.
- 42** Wo ti tarkuuse a eedañ geñno ton, onniyo ti onniyo adda booro Boy Raa, adda boydizañ daayum an kazita, an dooyiso duwo a urzi Rabila Majjaanawa k'Isa, yoñ Almasi Raa yi biire.

Naabo ɗoŋ zina 6

Beeriyɔ ɗoŋ dokkide k'ombo

¹A onniytagi geŋ sanalliyagi k'Isa an d'aagulu k'aagulu, wo kane Yawudiyagi ɗoŋ orbe ono Girek geŋ an kulkiso ti Yawudiyagi ɗoŋ orbe ono ɗoŋ k'Eber, kono mandayɗazaŋ ɗoŋ orbe Girek geŋ a dokkide k'ombo ere daayum daayum gette, an an k'eliyo ye.

²Aame kane ɗoŋ zina koomat makumu sire an illiga iŋkino maŋ, an di'n ugiye sanalliyagi k'Isa pay, maŋ an an di ruute, an'de: «Derec ye, kaye ay d'ooli ti kazita k'ono Raa a ɗuwo, ay t'ette dokkide k'ombo sey me.»

³Geŋ iŋkino zemba ki nuŋ, kune batum kun beero ti diinaguŋ ɗoŋ sarat, ɗuwo ɗoŋ sudaŋ ti m̄olo ki beehiye, ɔniyo t'Unde Kamileŋ wo ti suuniyo k'ono, wo naabo ette ay an t'ela a kane.

⁴Iŋkino maŋ kaye ay ele tuddey pay a urzi tonɗiyo Raa, wo a naabo kazita k'onamí a ɗuwo.

⁵A onamaŋ geŋ kane zemba pay an d'umbe eego, maŋ an di biire Etiyeŋ wede i ziipe addí pay a Raa wo ɔniyo t'Unde Kamileŋ. An di biire sey Pilip, Pirokor, Nikanor, Timoŋ, Parmenas wo Nikolas wede ti geeger ki Antiyos, yoŋ Yawudusu ye wo y'a-t'ize tuddí Yawudusu.

⁶Maŋ kane geŋ, zemba an an d'an t'iide ki ɗaana ɗoŋ zina k'Isa, an di tunde Raa, an an di-ziipe bey ki beeko.

⁷Iŋkino maŋ ono Raa geŋ adda siido Zeruzalem a-tiipe, ɗuwo an di'n zuune, sanalliyagi k'Isa geŋ an d'aagulu k'aagulu, wo ɗoŋ seɗeke Yawudiyagi baadaŋ an di ziipe addaŋ a Isa pây.

Seedu k'Etiyeŋ

⁸Etiyeŋ geŋ Raa yi di y'ûune ti beeko, wo yi-d'ele toogo k'isiyo sulɗi k'armika baadaŋ ti sulɗi ɗoŋ i ceeriyo eego a diine ɗoŋ duuru.

⁹Wo i d'ede kuuli miibi an guune jikisi ti yode. Ti diinayaŋ ɗoŋ oŋgoŋ Yawudiyagi ɗoŋ ti geeger Sireŋ wo ti Alegzandire, kane geŋ ti diine ɗoŋ adda ɓoy wede Yawudiyagi ge dooyiso an yi waaku «ɓoy ɓulagi an an iize», wo ɗoŋ oŋgoŋ Yawudiyagi ɗoŋ ki siido Silisi ti Aazi. Kane pay an d'iise niikiyto ti Etiyeŋ.

¹⁰Wo ɗe an ki d'iine kersiyadí ye a suuniyo k'ono ere Unde Kamileŋ ti ele geŋ me.

¹¹Iŋkino maŋ kane geŋ an d'iwila ɗuwo kono an di roote: «Kaye ay y'illiga yi ruute ono ɗoŋ ki kalɗa k'oogoro Muusa ti suma Raa.»

¹²A ɗoŋ duuru an an t'elite ono wo a ɗoŋ i dokkiyo Yawudiyagi ti ɗoŋ suuniyo k'oogoro Yawudiyagi pây, wo kane ɗoŋ pay geŋ an d'iiziga tukki Etiyeŋ, an di y'ziida an di-t'iide ki ɗaana deero booro Yawudiyagi.

¹³Wo a ɗaana kane geŋ an di wiike ɗoŋ lohito k'ono pay, an'de: «Wede eŋ daayum yi kalɗa Boy Raa wo oogoro Muusa,

¹⁴kono ay y'illiga yi ruute, Isa wede ti geeger Nazaret geŋ y'a-kossita ti Boy Raa wo dooyiso ere Muusa y'in ele gette y'a ti-kima ti doolo.»

¹⁵Aame geŋ ɗoŋ duuru pay i-guune adda boy goole ki booro geŋ, an di y' wolliso Etiyeŋ tebeŋ, wo ume k'edayi i-tooriyo aa ume k'eda maaleeka.

Naabo ɗoŋ zina 7

Etiyeŋ a ɗaana ɗoŋ booro

¹Inkino maŋ mozigo goole ɗoŋ sedeke y'a tunde Etiyeŋ, y'ede: «Onamaŋ an rootiyo a tukki kee geŋ ɗerec ko?»

²Etiyeŋ yi di'n gime onamí, y'ede: «Maawi ki nuŋ, zamba ki nuŋ, kun ollo bee. Aame Ibirayim yi lekkiyo botto a siido k'ehiyadí sundutú Mezapotami, wo ki poone y'a eŋgila ki geeger ki Araŋ geŋ, Raa goole a jiire yi di gize tuddí,

³wo yi di ruute, y'ede: “Ki t'oozo ki oolo siidadá, wo ɗoŋ boozá k'a eŋgilo ki siido ere saŋ maŋ n'a di kizey.”

⁴Inkino maŋ Ibirayim y'a t'iiziga, y'a t'udde ti siido Kalde, y'a ingile yi lekkiyo a geeger ki Araŋ. Wo bini meegí y'inda maŋ, saŋ Raa y'a-di t'iido ki siido ere aŋkeŋ kun di lekkiyo aŋkenno ettiyo.

⁵Wo ɗe Raa yi di ruute munda wede yi di t'ela, y'ede: “Siido ette n'a-t'ela a kee wo k'eda k'inñizá, an di lekka adda.” Wo aame geŋ Raa yi-k'ele ume boolon suma y'a-koone toŋ umbo a siido ette, wo ki sirwe ulo k'addí toŋ umbo Raa yi-k'ele ye.

⁶Maŋ Raa yi ruute sey, y'ede: “Ita k'inñizá an di lekka a siido torgagi, an di'n isa bulagi, an di'n dabira ozzinagi meeda pide.

⁷Wo kane ɗuwo ɗoŋ i'n isa bulagi geŋ, nuŋ Raa n'a ɗekka booro a eedaŋ. Wo saŋ kane ita k'inñizá geŋ t'umayaŋ an t'oozigo, an t'etto kenno, an oo d'ottila.”

⁸Aame Raa y'a ti ɗiŋge onamí inkino maŋ, y'a gitte taasawa ti Ibirayim, wo munda wede i-kaza taasawa geŋ, walɗu ponde. Inkino maŋ Ibirayim a ulí Isaaka yi di wilɗa ponde, aame yi y'ehe i fiide onniyo gessire maŋ. Inkino kay Isaaka yi di wilɗa ponde a ulí Yakup, wo Yakup y'an di wilɗite ponde a inñizí kane koomat makumu sire moŋgidagiŋ geŋno.

- ⁹Moŋgidagiŋ inŋi Yakup geŋ an gulbika ti leemadaŋ Yusup, an di y'iwila aa bule, wo doŋ i y'iwila an di-t'iide siido Misir. Wo Raa daayum ti yode,
- ¹⁰dabaradí yi di ti buuye pay. Yi d'ele suuniyo k'ono, lekkiyadí yi di ti t'ize uŋse a daana Parahoŋ mozigo ki siido Misir. Inŋino maŋ Parahoŋ y'a ti y' ziipe wede goole ki siido Misir, wo boozí toŋ yi-d'iili a beezí pây.
- ¹¹Bini maŋ i d'ize mosogo baadaŋ adda siido Misir pay, wo a siido Kanahaŋ pây. Duwo an di dibire baadaŋ, wo moŋgidagiŋ munda an t'oomi toŋ umbo.
- ¹²Aame Yakup y'illigo a Misir ombo ede maŋ, y'a igibe moŋgidagiŋ an an d'owilo, gette ettiyadaŋ ere ki poone.
- ¹³Aame yi'n igibe ki sirwe sey maŋ, Yusup y'an t'iidíba itadí a zembadí an di y' zuune. Wo Parahoŋ toŋ ita maawi Yusup a Kanahaŋ y'a ti zuune pây.
- ¹⁴Inŋino maŋ Yusup y'a igibe, y'a-waako meegí Yakup ti doŋ boozí pay, kane ada sarat makumu paat.
- ¹⁵Aame Yakup y'illiga maŋ, y'a t'iiziga ti doŋ boozí pay, y'a inŋile Misir an di likko bini maŋ, y'a inda ti inŋizí pay kane doŋ moŋgidagiŋ me.
- ¹⁶Wo nundanzaŋ an di ziko ki Sisem, an t'ittiba adda muuzo ere Ibirayim y'iwila ti soŋko a bey k'inŋi k'Amor a Sisem.
- ¹⁷Ozzinagi ti ozzinagi maŋ doŋziŋ an d'iigila baadaŋ a siido Misir me, wo peedo toŋ t'iide ere Raa y'a-ti dange ono doŋ yi ruute y'aasa a Ibirayim.
- ¹⁸Saŋ maŋ i-gili mozigo ti doolo a Misir me, wo yoŋ geŋ yi ki suune ye urzi Yusup me.
- ¹⁹Mozigo geŋ doŋziŋ yi ti'n digge, wo moŋgidagiŋ y'anni dibire, yi'n isiyo ki toogo inŋizaŋ an d'ooliyo an t'unto.
- ²⁰Aame geŋ Muusa an ti y'ehe, yoŋ ulo demileŋ, majjaane a daana Raa, an di y' mudde kaŋ ombide tere ado adda boy meegí.
- ²¹Aame an k'aane ombidayí ye maŋ, an t'umbe, an di ziipo paate, wo saŋ uto Parahoŋ t'a y'uune, t'a t'umbe a tode, t'a yi mudde aa ulutú.
- ²²Muusa geŋ an ti y' duuye a suuniyo ere pay ki doŋ Misir. Y'a t'ize wede i suune rootiyo k'ono wo toogo a naabo pây.
- ²³Muusa i iide ozzine ada pide maŋ, i-d'iide elkiyo y'a ette, y'a wollo zembadí doŋ k'Izirayel.
- ²⁴Maŋ y'a inŋile, y'iide'ŋ yi wolliyo wede Misir yi isiyo ulsu a wede soo ti diine zembadí, maŋ y'a-y'uube, wo yi di ti duuze, wede Misir geŋ y'a y'iide.

- 25**Y'ize in̄kino geŋ y'elkiyo zembadí d̄oŋ k'Izirayel an d'elka Raa yi dehu y'an utte t'urzi yode, kaciŋ umbo an ki zuune ye.
- 26**San̄ soggo sey maŋ, yi d'uune d̄oŋ k'Izirayel sire an d̄eyyiso, wo yi dehu y'a ti'n t'okkiy'e an di lekke ti toose. In̄kino maŋ y'an di ruute, y'ede: "Zemba ki nuŋ, kune'ŋ zemba ye ko? De ki moo me kun isiyo ulsu ti tudduguŋ me?"
- 27**Wo wede i isiyo ulsu a leemadí geŋ y'a gibira Muusa, wo y'ede: "Kee i ki ziipe mozigo wo wede d̄ekkiyo booro a tukki kaye wee wee?"
- 28**Kunuŋ ki dehu k'a ni t'íde aa loho k'íide wede Misir ko?"
- 29**Aame Muusa y'illiga in̄kino maŋ, ti siido Misir y'a t'umbe, y'a in̄gile ki siido Madiyan, yi lekkiyo an̄geŋŋo, a siido gette yi d'ehe in̄ni kuuli sire.
- 30**Adda siido gette Muusa yi likke ozzine ada pide. San̄ onniyo soo maŋ yoŋ adda balda goppon̄ ti mukkolo sundutú Sinayi, maaleeka ki Raa yi di gize tuddí adda beyga k'undumu oggiyo uwo dala dala.
- 31**A munda k'armika Muusa yi wulle geŋ, y'a ziiida giggirí. Wo y'a d'íide goppon̄, y'a wolle koduwo, y'a iide maŋ y'ollige golla Galmeega Raa, t'ede:
- 32**"Nuŋ Raa ki mon̄gidagá, Raa k'Ibirayim, k'Isaaka wo ki Yakup." Muusa orgiso t'a yi ziiida baadaŋ, y'a iise ŋoŋŋirso, yi k'aane yi k'ambe edayí, y'a ki wolle munda geŋŋo ye.
- 33**In̄kino maŋ Galmeega yi di ruute, y'ede: "Tobiyagá ki t'od̄dipo kono ume wede kee k'ohire eŋ, yoŋ kamileŋ ki nuŋ Galmeega.
- 34**Derec, ni wulle dabar ki d̄oŋzó a siido Misir te, n'illiga soopiytadaŋ te, wo nuŋ n'íido'ŋ kono n'an adde. An̄keŋ k'edi, n'a-k'agiba ki siido Misir."»
- 35**San̄ Etiyeŋ y'a ruute sey, y'ede: «Yode Muusa wede d̄oŋ k'Izirayel an di y'giigira, an'de: "Kee wee wee i ki ziipe mozigo, wo wede d̄ekkiyo booro me?" Geŋ san̄ Raa batum y'a y'igibe, y'a t'ize mozigayaŋ, wo y'a t'ize wede k'ad̄diyadaŋ. Raa yi y'igibe t'urzi maaleeka wede an ikkima adda k'undumu gozzibor geŋŋo.
- 36**Yode Muusa geŋ y'an uddo d̄oŋ k'Izirayel ti siido Misir, t'urzi k'isiyo suldi d̄oŋ i ceeriyo eego ti suldi k'armika adda siido Misir batum, wo soŋ aame kane an doopide Bar Teezowo, wo aame kane adda balda ozzine ada pide.
- 37**Yode Muusa sey y'an di ruute a d̄oŋ k'Izirayel, y'ede: "Raa yi d'ad̄da ti diine zembaguŋ nebi aa nuuno."
- 38**Wo aame d̄oŋ k'Izirayel an t'ugiy'e a balda toŋ maŋ, yode Muusa sey a guune a diine mon̄gidagiŋ ti maaleeka me, yode geŋ yi di rootiyo a Muusa t'ekki mukkolo Sinayi. In̄kino yode Muusa sey yi-t'ollige ono Raa d̄oŋ i d'eliyo lekkiyo, y'in d'ettiyo y'in di kaza.

³⁹Wo moŋgidagiŋ an ki d'illiga ye onamí me, an di y' giigira, wo adda k'addaŋ an dehu an di-kime ki siido Misir.

⁴⁰An i-di ruute a Aron, an'de: "K'in okkoŋ raayagi a ozira a daanadiŋ, kono in ki suune ye munda i iide a yode Muusa wede y'in di'n udfo ti siido Misir me."

⁴¹Inkino maŋ a onniytagi geŋ an d'ikkima ulo buru go longusizaŋ, maŋ an i d'ele sedeke a yode geŋ me, ulbaŋ uŋse an d'ize tarnaape a naabo ere an ize ti beezaŋ gette.

⁴²Wo Raa y'an gime dar y'an di'n ili, an d'ottilso a moldali a kandaane, aa an riije ti kaaga adda mattup ki nebiyagi, an'de: "Kune doŋ k'Izirayel no, geŋ a nuuno dey ko kun izite sedeke ki seydi wo sendikagi doŋ oŋgo kun izite, aame kune adda balda ozzine ada pide geŋ me? Aha, a nuuno ye.

⁴³Kune kun zirke boy golmodo ki raayusu sundí Molok, wo ti mooliso ere ki raa wede sundí Repan. Kane suldi geŋ kun ikkima ti beyguŋ kono kun an d'ottilo. Inkino maŋ nuŋ n'un ti'n limma bini siido Babiloon, wo ti Babiloon geŋ ki daana sey."»

⁴⁴Etiyeŋ y'a ruute sey, y'ede: «Adda balda geŋ moŋgidagiŋ an d'ede Boy Raa wede an ikkima ki golmodo, i-boohiyo suldi doŋ ki taasua ere Raa yi gitte ti doŋzi. Boy geŋ Muusa y'a t'ikkima aa Raa yi ruute y'aase. Y'a t'ikkima a-t'iide a munda wede yi wulle i-iide aa suniye.

⁴⁵K'ita maŋ moŋgidagiŋ an an d'ili Boy Raa wede an ikkima ki golmodo geŋ a inŋizaŋ, an t'umbo ti kane aame geŋ Zozuwe wede dokkiyadaŋ, y'an d'an d'aaho ki siido ere ita doŋtu Raa yi'n ilmi ti daanadaŋ. Geŋ inkino Boy Raa geŋ y'a likke adda siido gettiyo bini moziko ki Dawut.

⁴⁶Dawut y'a uune beeko ti Raa, maŋ Dawut y'a tunde Raa, yi d'ooziga boy a Raa ki Yakup.

⁴⁷Wo miŋ a ki t'ize ye, a t'iiziga Boy Raa ulí Salamoŋ.

⁴⁸Wo Raa goole a jire pay geŋ, yoŋ yi ki lekkiyo adda boy wede duwo an oozige ye, aa Raa yi ruute ti kaaga ti bize nebi soo:

⁴⁹"Galmeega y'ede: Kandaane aa ume wede ni-konso, ni lekkiyo wo siido aa ume wede ni d'obe zoŋdo ni puukiyo. De kune boy miŋ wede tuuku me, kun o ooziga, wo aame tuuku n'a lekka adda me?

⁵⁰Suldi pay eŋ i zippe nuŋ ye ko?"»

⁵¹Etiyeŋ y'an di ruute doŋ booro sey, y'ede: «Kune doŋ i koogire Raa, kune doŋ sukkiya kun ki ziipe adduguŋ a Raa ye, kun t'udde aa maawuguŋ koyok, daayum kun koogire Unde Kamileŋ.

⁵²Ti kaaga maawugun nebiyagi pay an di'n dibire, wo an di'n îide kane donj i gizite ti poone aaniya k'Almasi yonj ki diine genj me. Wo aame onniyo t'îide manj, yode tonj kun di y' giigira, kun di y'îide.

⁵³Raa y'un d'ele oogiradí t'urzi maaleekiyagi, wo kune kun a-ki t'izire eego ye.»

Tôwwo k'Etijen

⁵⁴Aame donj booro an illiga Etijen yi ruute injkino manj, an di-gulkuwe baadanj, an d'ahutu bokimo.

⁵⁵Wo yo Etijen ôoniyo ti Unde Kamilenj y'a t'umbe edayí k'awwa ki kandaane manj, y'a wulle toore daryíka Raa wo Isa yi t'îhira a ammade Raa.

⁵⁶Y'a ruute, y'ede: «Kun ollo kay, ni wolliyo kandaane i t'ihina wo yonj wede an y'ehe aa ulo wede genj yi t'îhira a ammade Raa.»

⁵⁷Kane an illiga injkino manj an zidde dolle baadanj, kuwwaganj an aa ti nijy'ite, kono an k'olliga onamí ye. Manj an d'iziga pay kanj soo ki tuddí.

⁵⁸An di y' ziida t'adda geeger, an di y'udde paate, an di y'iise kakkisa ti mongali ki tôwwadí. Kane donj i wulle wo illiga genj, kallaganj deero an t'idcipe, an t'ibi sirpa k'ulo obulsu sundí Sool.

⁵⁹Aame an yi kakkisa genj, Etijen yi tonniyo Raa, y'ede: «Galmeega Isa, ki t'ambo undó.»

⁶⁰Sanj y'a iire ti zibbaní, wo y'a idili ti golla awwa, y'ede: «Galmeega, a oldikadanj ette k'an t'iso tambobino.» Aame y'a ti ruute injkino manj, y'a-t'ihe.

Naabo donj zina 8

¹aWo Sool onamanj soo ti donj îide Etijen me.

Sool ti donj ogiyso ti suma k'Isa

¹bA onniyo gettiyo batum duwo an di'n iise dabirsa baadanj ki donj ogiyso ti suma k'Isa a Zeruzalem. Kane pay genj an di-tiipe k'adda siido Ziide ti Samari, a Zeruzalem i d'uupe donj zina k'Isa siidanj.

²Donj i seedu urzi Raa zakidí genj an t'ittiba Etijen me, wo an d'îile baadanj a untadí gette.

³Wo ki yode Sool manj yi dehu y'an ise umbo donj ogiyso ti suma k'Isa me, yi d'ettiyo boy ti boy, yi di'n dehu yi ti'n seedu kuuli erayi, yi ti'n obe dangay.

Pilip yo a Samari

⁴Kane donj i-tiipe genj, an d'ettiyo borko ti borko an di kazita Rabila Majjaanawa.

- ⁵Geŋ iŋkino Pilip y'a t'iide k'adda geeger meeda ki siido Samari, y'a iise kazita rabila k'Almasi Raa yi biire a doŋ siido gettiyo.
- ⁶Kane doŋ siido gette pay an zaapu kuudaŋ tak a ono doŋ Pilip y'an kazita geŋ me, kono an illiga wo an wolliyo t'edayaŋ suldi k'armika doŋ y'isiyto geŋ me.
- ⁷Iŋkino maŋ siitandani an t'uddite ti tukki doŋ k'eeni baadaŋ ti dollite ere ti golla awwa. Wo doŋ baadaŋ ruŋguyun, oŋgoŋ an denkiso, pay an d'uune bee.
- ⁸Iŋkino maŋ doŋ geeger pay gette ulbaŋ uŋse baadaŋ.
- ⁹Aame geŋ i d'ede wedusu adda geeger gette sundi Simo, yoŋ kombide ti kaagine wo a doŋ siido Samari geŋ y'an d'isiyto suldi k'armika, kane pay an seedu giggeraŋ. Y'a-t'ize tuddi aa wede i-d'ede toogo.
- ¹⁰Kane duwo pay iise ti inŋisi bini doŋ deero geŋ, an di y' daaniya telele, wo an d'eesiyo: «Wede eŋ i-d'ede toogo Raa, ere an ti waaku “toogo a jiiire baadaŋ” gettiyo.»
- ¹¹Ti kaagine Simo ti kombidikadi gette, yi d'isiyto suldi k'armika duwo an seedu giggeraŋ, iŋkino an di y' daaniya telele.
- ¹²Wo aŋkeŋ Pilip y'iide y'an gizite Rabila Majjaanawa ki Moziko Raa wo ki suma k'Isa Almasi. Iŋkino maŋ erayi kuuli pay an d'umbe wo an ti'n zuyye batem.
- ¹³Aame geŋ yode Simo batum toŋ, y'a ziipe addi a Isa wo an ti y' zuyye batem, y'a ziiida ita Pilip. Wo aame yi wulle suldi k'armika baadaŋ ti suldi doŋ i ceeriyo eego doŋ Pilip y'isiyto geŋno maŋ, y'a ziiida giggeri.
- ¹⁴Aame kane doŋ zina k'Isa a Zeruzalem an illiga doŋ siido Samari an'ni ziiida ono Raa bey sire maŋ, an an d'igibe Piyer ti Zaŋ.
- ¹⁵Aame an iiney a Samari maŋ, an tunde Raa a kane Samariten doŋ i ziipe addaŋ a Isa kono Raa y'an t'ele Unde Kamilen.
- ¹⁶Wo aame geŋ Raa yi-k'ele Undi ye botto a wenda me, an'ni suyyiso batem ti suma Galmeega Isa danŋal.
- ¹⁷Iŋkino maŋ Piyer ti Zaŋ an an di ziipe bey a eedaŋ wo an d'uune Unde Kamilen.
- ¹⁸Aame Simo yi wulle Unde Raa ti diigo a tukki doŋ geŋ t'urzi doŋ zina k'Isa an an ti ziipe bezaŋ a eedaŋ maŋ, yi dehu y'an t'ele soŋko a Piyer ti Zaŋ me.
- ¹⁹Wo y'an di ruute, y'ede: «Toogo gette kun o eeli kay kono n'a zaape bey a tukki duwo, an t'oone Unde Kamilen.»

20Maṅ Piyer yi di ruute, y'ede: «Kee ti soṅkadá pay Raa y'unni dagga, kono k'elkiyo ti soṅkadá gette k'aane ki t'owila munda wede Raa y'eliyo ti mozuwo me.

21Adda naabadey ette kee adda ye, aggadá umbo ti kaye me, kono a daana Raa biza k'ulbá ki diine ye.

22Ki-kama lekkiyadá, naabadá ere oldo gette ki t'oolo, wo k'a tondo Raa koo y'ay t'isa tambobino maṅ a elkisadá ere oldo gette.

23Nuṅ ni wolliyo maṅ kee addá i-k'aadumu a suldi eṅ me, wo kee bule k'oldiko.»

24Iṅkino maṅ Simo y'an di ruute, y'ede: «I tondo Galmeega kune batum kono nuṅ me, kono munda wede kun rootiyo geṅ oo ki d'aana ye.»

25Saṅ maṅ Piyer ti Zaṅ geṅ an an t'íide taaya a duwo, a munda wede kane an wulle a urzi k'Isa, wo an di gizite ono Galmeega. Saṅ maṅ an di-gime ki Zeruzalem, a kamadaṅ geṅ a urzi an di gizite Rabila Majjaanawa a borkiyagi baadaṅ ki siido Samari.

Pilip ti wede ti siido k'Etioyopi

26Saṅ maaleeka ki Galmeega Raa yi di ruute a Pilip, y'ede: «Ki t'oozo, k'odo k'urzi wede ki dandí, urzi wede ti Zeruzalem i d'ambu geeger Gaza, urzi geṅ yoṅ t'adda balda.»

27Iṅkino maṅ kesiko Pilip y'a t'íiziga, y'a iṅgile, yi sooru sooru. A sooruzí gette yi wolliyo bibiraw wedusu a daanadí. Wede'ṅ geṅ yoṅ wede goole wo kokkiso ti siido k'Etioyopi, yi naabiya ti Kandas mohita k'Etioyopi, wede y'eeriyo korbite tode, yi t'íide Zeruzalem ottilso a Raa.

28Konso adda puusadí yi-kime ki siidadí, wo yi gariya mattup ki nebi Ezayi.

29Unde Raa ti di ruute a Pilip, t'ede: «K'a naara, ki y'oonoy wede puus geṅ me.»

30Maṅ Pilip y'a-niire, y'íide'ṅ y'a yi ziidá wede suma adda puusadí geṅ me, y'ollige yi gariya mattup ki nebi Ezayi, maṅ y'a yi tunde, y'ede: «Ki gariya geṅ, munda ki yi suuniyo dey ko?»

31Wede yi di'n gime onamí, y'ede: «De n'a suune mummino, wenda y'a ki'n ziipe urzi ye maṅ?» Maṅ wede yi di ruute Pilip, y'ede: «K'edi, k'a ti koli adda puus, k'a-koono a sirpa nuuno.»

32Eṅṅo ume wede yi gariya an riine ti kaaga adda mattup ki Raa me: «Yoṅ aa damu wede an arkudu ki t'ôwwo, wo aa ulo ki damu wede an dekkiso ilalí wo yi ki m'olo ye, iṅkino kay yode toṅ bizí yi k'ihina ye.

33An di-d'ele sukuyagi, derec ki yode an i-ki t'ele ye, wee wee a roota suma k'iṅṅizí me, lekkiyadí a siido an i-ti dikke.»

³⁴Wede suma geɲ y'a tunde Pilip, y'ede: «Kee k'ollo do, nebi yi rootiyo iŋkino t'aaye ti yode batum kunuɲ, ti wenda doolo ko?»

³⁵Iŋkino maɲ Pilip y'a t'ihina bizi, wo t'urzi gariya mattup gette yi di gizite Rabila Majjaanawa k'Isa.

³⁶An iide kee maɲ, an d'uune ahu. A ume geɲ wede suma y'a ruute, y'ede: «Ki wollo kay eɲ ahu, de moo sey aa biite k'a ti'n suyye batem me?»

[³⁷Pilip yi di ruute, y'ede: «Aame kee ki ziipe adda'ŋ pay a Isa maɲ, n'a ki ti suyye batem.» Maɲ wede yi di'n gime onami, y'ede: «N'umbe, Isa Almasi yoɲ Ulo Raa.»]

³⁸Iŋkino maɲ Pilip yi di ruute a wede tuuliyi, y'ede: «Puusada ki-t'ohor.» Maɲ Pilip kane ti wede suma an di-diiige t'ekki puus me, an di-diiige k'adda k'ahu, Pilip y'a ti y' zuyye batem.

³⁹Aame an t'ufde t'adda k'ahu maɲ, Unde Galmeega t'a ti y' nukkiide Pilip me. Wo yo wede suma geɲ yi ki y' wulle ye baa, iŋkino y'a iŋgile ki daanadi ti unsuwo.

⁴⁰Wo yo Pilip yi woliyo'ŋ yo a Azot, maɲ yi d'ettiyo geeger ti geeger, yi kazita Rabila Majjaanawa adda geegiryagi pay bini y'a d'iiney Sezare.

Naabo doɲ zina 9

Sool ti Isa

¹Wo aame geɲ Sool yi dehu daayum y'a dabire wo y'a t'ide sanalliyagi ki Galmeega. Iŋkino maɲ y'a iide, y'a uuney mozigo goole doɲ sefeke

²kono yi di t'ele mattup. Wo ti mattup gette y'a t'ooney deero boydi doɲ Yawudiyagi ge dooyiso a Damas, wo aame doɲ i daaniya urzi wede aware ki Galmeega kuuli ti erayi ede maɲ, y'a ti'n sedfo y'an d'an t'etto ki Zeruzalem, an di'n obey dangay.

³Aame yi uune mattup maɲ, y'a iŋgile ki Damas. Y'izire kee y'iiney gopponɲ ti geeger maɲ, a kaamiki i diigo toore ti kandaane, wiliɲ a tuure a tukki yode.

⁴Y'a iire a siido wo y'ollige golla ti rootiyo, t'ede: «Sool, Sool, de moo me ki ni dabirsa me?»

⁵Maɲ Sool y'a tunde, y'ede: «Galmeega, de kee wee wee?» Maɲ golla gette t'a ruute, t'ede: «Nuɲ Isa wede kee ki di y' dabirsa.

⁶Wo ki t'oozo, k'engilo k'adda geeger, anɲen an aa di kizey munda wede Raa yi dehu k'aasey me.»

⁷Wo kane donj ti Sool soo geŋ an t'ihira, munda an di roote an ki suune ye, orgiso t'anni ziida kono golla an di-t'ollige wo wenda an ki y' wolloyo ye.

⁸Maŋ Sool y'a t'iiziga, edayí kargigal wo i ki wolloyo ye. Aame geŋ donj iide ti yode an i ziida beezí, an ti y' dukke k'adda geeger Damas.

⁹Onniyo afo Sool edayí i ki wolloyo ye, wo yi lekkiyo daa k'ombo daa sobo.

Sool edayí i t'ihina

¹⁰A Damas geŋ i d'ede wedusu sundí Ananiyas, yode geŋ sanallusu k'Isa. I-d'iide munda aa suniye Galmeega yi di gize tuddí, wo y'a yi wiike, y'ede: «Ananiyas!» Maŋ Ananiyas yi di'n gime onamí, y'ede: «Galmeegó, nuŋ enno n'ollige.»

¹¹Galmeega yi di ruute, y'ede: «Ki t'oozo, k'odo k'adfo ti urzi wede an yi waaku urzi delele, ki t'odoy adda boy Ziidas, k'a tondoy wede ede sundí Sool ki Tarsi. Ankenno yi tondiyo Raa,

¹²wo adda munda i-iide aa suniye geŋ y'a wulle wedusu sundí Ananiyas, yoŋ yi-t'iide di yode, yi di ziipe beezí a edayí, maŋ edayí a t'ihina.»

¹³Wo Ananiyas yi di'n gime onamí, y'ede: «Galmeegó, wede eŋ rabiladí ni t'illiga, donj baadaŋ an ruute a suldi donj ulpi pay y'isiyo a donzá a Zeruzalem me.

¹⁴Wo deero donj sedeke an i ele mattup y'a-sedde donj i tondiyo ti suma kee a enno, geŋ inŋino y'iido kenno me.»

¹⁵Wo de Galmeega yi di ruute, y'ede: «K'odo, ki y'oonoy wede geŋ me, kono nuŋ ni y' biire, n'a-y'isa wede a kiza sundó a duwo donj Yawudiyagi ye, a mozagaŋ wo a donj k'Izirayel.

¹⁶Wo nuŋ batum ni di kizita suldi donj pay y'a dabira kono sundó.»

¹⁷Inŋino maŋ Ananiyas y'a t'iiziga y'a inŋile, y'iiney maŋ yi-t'iide adda boy Ziidas, Sool toŋ adda. Y'iide'ŋ yi di ziipe beezí a yode wo yi di ruute, y'ede: «Sool leema ki nuŋ, Galmeega i n'igibo me, yode Isa wede y'a di gize tuddí aame kee a urzi k'ettiyo kenno, yi n'igibo ki tukki kee kono edayá a wolle sey, wo Raa yi-ki ti k'ône t'Unde Kamileŋ.»

¹⁸A kaamiki gaŋgiragi aa ki puuni a iise soldite ti edayí, maŋ edayí a iise wolliso sey. Y'a t'iiziga, wo Ananiyas y'a ti y' zuyye batem.

¹⁹Saŋ yi d'iimi, toogadí t'a iido.

Sool yo a Damas

Sool y'a likke onniyto miibi ti sanalliyagi k'Isa a Damas me.

²⁰Wo tiŋ geŋ miŋ y'a iise kazita baa adda boydi donj Yawudiyagi ge dooyiso, yi d'eesiyo: «Isa yoŋ Ulo Raa.»

21Kane ɗoŋ pay i y'ollige geŋ an ziida giggeraŋ, wo an di rootiyo diinayaŋ, an'de: «Eŋ miŋ yo wede i-dabirsa baadaŋ kane ɗoŋ i tonɗiyo ti suma k'Isa a Zeruzalem ye ko? Wo ettiyadi kenno ette y'iido'ŋ toc miŋ sedɗuzaŋ, wo y'an di'n t'eley bey deero ɗoŋ sefeke ye ko?»

22Yo Sool a kazita k'onami geŋ, i di t'ele toogo yi kazita i ceeriyo ki ceeriyo t'addi pay, y'an di rootiyo kereŋ Isa yoŋ Almasi Raa yi biire. Inkiŋo kane Yawudiyagi ɗoŋ i lekkiyo a Damas geŋ, an i di roote munda an ki suune ye.

23Saŋ bini maŋ kane Yawudiyagi geŋ, kaŋ soo an di-ruute ti diinayaŋ ki t'owwadi Sool me.

24Inkiŋo a rootiyadaŋ gette wedusu yi di gize a Sool me, kono kane Yawudiyagi an t'ikkima tuddaŋ, an di boohiyo boha bumbiyagi geeger onnu wo diddo kono Sool y'udfa maŋ ki t'owwadi.

25Inkiŋo maŋ onniyo soo a diddo, kane sanalliyagi Sool an di-t'iide, an ti y' ziipe adda gedde, an ti y' zuuye ti waaya moŋgali ti nee.

Sool yo a Zeruzalem

26Saŋ ti Damas geŋ Sool y'a iiney Zeruzalem. Aame y'iiney maŋ, y'a dihe y'a di key'ye ti sanalliyagi k'Isa. Wo kane pay an orgiso a yoŋ me, kono an k'ambu ye ki kotto yi t'ize sanallusu k'Isa me.

27Inkiŋo maŋ Barnabas y'a iyye, y'a ti y' wiike, wo y'a-di t'iide k'ume ɗoŋ zina k'Isa. Aame geŋ y'an t'iide taaya mummino Sool yi wullo Galmeega aame yo a urzi ki Damas me, mummino Galmeega yi ruutito me, wo soŋ mummino Sool yi gizito ti suma k'Isa daa k'orgiso a Damas me.

28Inkiŋo maŋ t'ume geŋno Sool y'a-t'iide ti kane a Zeruzalem, an d'ambu kenno kenno kaŋ soo wo yi kazita ti suma Galmeega daa k'orgiso.

29A kane Yawudiyagi ɗoŋ orbe ono Girek toŋ y'an di kazita wo yi niikiyto pay ti kane me, wo kane an di dihe urzi ki t'owwadi.

30Aame kane zamba ɗoŋ i ziipe addaŋ a Isa geŋ an illiga inkiŋo maŋ, Sool an di d'ingile ki geeger Sezare, wo an ti y' diipida y'a ingile ki geeger Tarsi.

31Inkiŋo maŋ kane ɗoŋ ogiyso ti suma k'Isa a siido Ziide, a siido Galile wo a siido Samari pay geŋ, an di lekkiyo ti toose. Kane an t'ize ɗoŋ toogo a urzi Raa, an di lekkiyo ti ottilso a Galmeega, wo Unde Kamilen ti di'n noogiyo an d'aagulu k'aagulu.

Piyer ti Ene

32Aame geŋ Piyer daayum yi sooru adda siido pay, yi d'ambu kenno kenno. Onniyo soo maŋ y'a t'iide wolliyo ki ɗoŋ ki Raa i lekkiyo a geeger Lidda.

³³A ume geŋ i d'ede wedusu sundí Ene yoŋ ruŋguyun, ozzine gessire yi lekkiyo moone ekk'ongali. Aame Piyer y'iiney a ume geŋno maŋ, wede geŋ yi y'uuney,

³⁴wo yi di ruute, y'ede: «Ene, Isa Almasi y'a ele bee. Ki t'oozo'ŋ, kee batum ki t'olbo suldí moonizá me.» A kaamiki Ene y'a t'iizi, y'a t'ihira.

³⁵Aame kane doŋ pay a geeger Lidda wo a bere ki siido Saron geŋ an wulle iŋkino maŋ, an di-gime lekkiyadaŋ a urzi Galmeega.

Piyer ti Tabita

³⁶I d'ede erewo adda geeger Zoppa tod'te sanallawa k'Isa, sundutú Tabita (i-kaza Dorkas t'ono Girek). Tode gette a duwo t'an isiyo beehiye, doŋ umbadaŋ toŋ t'an d'eeliyo munda me.

³⁷Aame Piyer yoŋ daayum a geeger Lidda geŋ, Tabita gette ti t'iire eeni wo t'a inda. T'inda maŋ an ti-zuyye, nuune an ti y' gili biino ere t'awwa t'ekki bakatú, an ti y' duwwe.

³⁸Lidda gette goppon ti Zoppa me, kane sanalliyagi k'Isa a Zoppa an illiga Piyer yoŋ angeŋno maŋ, an d'igibe kuuli sire an i di ruuto, an'de: «Leema ki nuŋ k'ayn'olliga maŋ, k'edi kesiko, in t'ette di kaye.»

³⁹Piyer y'a t'iiziga, kesiko y'a iŋgile ti kane. Aame y'iiney maŋ, kane an di ti gili biino ere t'awwa t'ekki bakatú. Kane mandaydayi pay an di y'uuna ti zumari a edayaŋ, wo an i di kazita kallagi doŋ Tabita ti giniti aame t'a t'inda botto.

⁴⁰Piyer y'an di ruute a duwo an t'adde t'adda boy. An t'udde maŋ, yo y'a-dikke, y'a iise ton-diyo Raa. Saŋ maŋ y'a-gime edayí k'ume nuune, wo y'a ruute, y'ede: «Tabita koŋ mi t'oozo'ŋ.» Maŋ t'a t'ihina edatú, wo aame ti wulle Piyer maŋ, t'aguune.

⁴¹Piyer yi ziida beytú t'a-t'iiziga, maŋ mandaydayi ti doŋ ki Raa ongoŋ y'anni wiiko, wo y'an ti-gize an di wulle tod' ti lekkiyo zeere.

⁴²Iŋkino maŋ doŋ pay adda geeger ki Zoppa an d'illiga rabila gette, wo doŋ baadaŋ an di ziipe addaŋ a Galmeega.

⁴³Wo a Zoppa geŋ Piyer y'aa likke onniyto baadaŋ di wede k'odfige golmidagi sundí Simo.

Naabo doŋ zina 10

Korney ti Piyer

¹I d'ede wedusu sundí Korney, yi lekkiyo a geeger Sezare. Yoŋ goole ki asigiryagi meeda ki Romen, ti diine k'asigiryagi meeda zoot an'ni waaku sundaŋ «Italiyeŋ».

²Wede geŋ yoŋ yi seedu urzi Raazí zakidí, yode ti doŋ adda boozí pay an ottilso a Raa. Yawudiyagi doŋ an k'ede munda ye toŋ y'an d'isiyo beehiye, wo yi tondiyo Raa daayum.

³Inkino maŋ onniyo soo a peedo lohe Korney i-d'iido munda aa suniye. Y'a yi wulle kereŋ maaleeka Raa me yi d'iidiba itadí, yi d'ettiyo di yode wo y'a yi wiike, y'ede: «Korney!»

⁴Wo yoŋ yi di y' wolliso maaleeka tebeŋ, maŋ orgiso t'a yi ziida wo yi di ruute, y'ede: «Galmeega, de moo me?» Maaleeka yi di ruute, y'ede: «Kee tondiyadá Raa y'illiga ti beehiyko ere k'isiyo a duwo te, inkino yoŋ yi ki k'elkiyo.

⁵Wo aŋkeŋ ki agiba duwo an d'ette ki Zoppa, an di waako wede soo sundí Simo, sundí soo te Piyer, y'a etto.

⁶Yo wede geŋ torgusu yi lekkiyo di wede sundí Simo kay, wede k'odige golmidagi, boozí a biza bar.»

⁷Aame maaleeka wede i ruute a Korney geŋ y'ingile maŋ, Korney yi wiiko doŋ sire ti diine doŋ naabadí, wo asugursu soo wede i seedu urzi Raazí zakidí, ti diine k'asigiryagí.

⁸Korney y'an t'iide taaya a munda wede ize, saŋ y'an igibe ki Zoppa.

⁹Inkino maŋ kane an d'ingile, soggo toŋ kane daayum a urzi goppon an a-t'ette ki Zoppa, wo peedo t'ize diine. Inkino a peedo gettiyo batum, Piyer y'a-ti gili t'ekki boy t'awwa, y'a tonde Raa.

¹⁰Aame geŋ mosogo t'a yi ziida, yi dehu yi d'oomi. Koore an i-d'isa ombó geŋ, i-d'iido munda aa suniye,

¹¹wo yi wolliyo'ŋ kandaane a t'ihina wo munda aa boojo goole kettiso a bohaní pide, i-deegu ki siido aa dara.

¹²Wo adda k'addí i d'ede ita seydi doŋ zoŋdaŋ pide pide, ita seydi doŋ i morkimso a siido wo ita k'embi doŋ oppiyo a kandaane pây.

¹³Aame geŋ y'a illi golla ti di ruute, t'ede: «Piyer, ki t'oozo'ŋ! Seydi eŋ ki soddo, k'a t'ôodo, k'a t'aada.»

¹⁴Wo Piyer y'a ruute, y'ede: «Galmeegó aha! Nuŋ munda wede k'ombó ulu, yoŋ ganigi a daanadá geŋ kaŋ soo toŋ ni k'iimi ye.»

¹⁵Maŋ golla gette ki sirwe sey Piyer y'a t'illiga, t'ede: «Munda wede Raa y'ede yo eŋ kamileŋ geŋ, ki k'elke aa munda k'ombó ulu ye.»

¹⁶Golla gette Piyer y'a t'illiga ti rootiyo onamtú miŋ kane deŋ taŋ ado, saŋ a kaamiki munda geŋ a-gili ki kandaane.

17Piyer geŋ y'a ziida giggirí a munda wede i-iide aa suniye, wo munda i-kaza yi ki y' suuniyo ye geŋ me. Koore geŋ kane duwo doŋ Korney yi'n igibe geŋ, boy Simo an di y' dihite, an y'uune, aŋkeŋ kane a biza bumbu.

18Kane an di wiike doŋ boy, an iido maŋ an di'n tunde, an'de: «Simo wede an yi waaku soŋ Piyer geŋ, yoŋ a enno ko?»

19Piyer geŋ yoŋ daayum y'elkiso a munda wede i-iide aa suniye genno, aame Unde Raa ti rootiyo, t'ede: «K'ollo, i d'ede doŋ ado an ki dehu toŋ maŋ.

20Ki t'oozo'ŋ, ki ti deego, k'eŋgilo ti kane daa k'orgiso, kono duwo eŋ i'n igibo nuuno.»

21Iŋkino maŋ Piyer yi-ti diigo, y'an di'n uuney kane duwo geŋ me, wo y'an di ruute, y'ede: «Eŋ miŋ nuŋ wede kun dehu. Ki moo me kun n'iido me?»

22Maŋ an i di'n gime onamí, an'de: «Kaye eŋ ayn'igibo Korney, yode wede goole k'asigiryagi meeda ki Romeŋ, yoŋ wede ki diine y'ottilso a Raa, wo kane Yawudiyagi pay an yi giyye. Yoŋ maaleeka Raa yi ruuto, kee k'a ette di yode kono ki di rootey ono y'a-k'olligey.»

23Iŋkino maŋ duwo geŋ Piyer y'a ti'n wiike k'adda boy, an d'inne di yode. Ti soggatú maŋ kane duwo geŋ an t'iiziga ti Piyer an d'iŋgile kaŋ soo. Wo zemba miibi an ziipe addaŋ a Isa ki Zoppa, an aa di'n igibo.

24Saŋ onniyo ki daana maŋ Piyer ti kane duwo geŋ an d'iiney Sezare. Koore geŋ yo Korney y'a t'ugiye doŋ boozí ti laŋziyagi doŋ kuc an di'n delliyo.

25Aame Piyer y'iiney wo y'ette k'adda boy maŋ, Korney y'a iide y'a y'ikkimo, y'a iire a zoŋdí kono yi-d'ottille.

26Maŋ Piyer yi di ruute, y'ede: «Aha, ki t'oozo'ŋ!» Wo yi ziida beezí, y'a y'iiziga, y'ede: «Nuŋ wede tudde aa kee pây.»

27Maŋ Piyer yi pelkiyo ti Korney, y'a-t'iide k'adda boy. A ume geŋ yi wolliyo doŋ baadaŋ i t'ugiye a daanadí.

28Y'an di ruute, y'ede: «Kune kun ti suune oogoro Yawudiyagi te, urzi ti k'ele ye a Yawudusu y'a ette boy wede Yawudusu ye, y'a lekke ti yode me. Wo de nuŋ Raa y'o ruute kereŋ, kofuwo ye a daanadí wede tuuku toŋ n'a yi wolle yoŋ ganigi wo ulsu me.

29Geŋ iŋkino, aame kun iide kun ni wiiko geŋ, ni ki ruuto ye munda me wo n'a iŋgilo miŋ ti kune baa. Aŋkeŋ ni dehu n'a suune, ki moo me kun ni wiiko n'a iido me.»

30Maṅ Korney yi di ruute, y'ede: «I d'ede onniyo aḍo, a peeḍo ere ki lohe gettiyo batum, ni tonḍiyo Raa adda ɓoozó. A kaamiki geṅ miṅ wedusu ti kallagí i ralita wic wic yi-t'ôhire a ɗaanadó,

31wo y'o di rootiyo: “Korney, kee tonḍiyadá Raa y'illiga, wo y'elkiyo a beehiyko ere kee k'isiyo a ɗoṅ an k'ede munda ye me.

32Aṅkeṅ ki agiba ɗuwo an d'ette ki Zoppa, an di waako wede soo sundí Simo, sundí soo te Piyer, y'a etto. Yo wede geṅ torgusu yi lekkiyo di wede sundí Simo kay, wede k'odige golmidagi, ɓoozí a biza bar.”

33Aame geṅ kesiko ni d'igibe ɗuwo ki tuddá, wo kee k'aaze adde koɗuwo k'a iido. Wo aṅkeṅ kaye pay eṅṅo a ɗaana Raa kono ay d'olliga sulɗi ɗoṅ pay Galmeega y'a ruuto k'ay di roote.»

Ono Piyer adda ɓoy Korney

34Iṅkino maṅ Piyer y'a iise kazita k'ono, y'ede: «Aṅkeṅṅo ni suune ki kotto Raa geṅ y'inni wolliyo kine ɗuwo pay eṅ miṅ kaṅ soo.

35Ti ita ɗuwo pay, wede tuuku y'ottilso a Raa wo y'isiyo munda ki diine maṅ, yoṅ geṅ lekkiyadí i di t'ise uṅse a Raa me.

36A ɗoṅ k'Izirayel Raa y'igibo onamí, Rabila Majjaanawa ere ki toose t'urzi k'Isa Almasi, yode wede Galmee'ki ɗuwo pay.

37Kune kun suune Zaṅ yi kazita a ɗuwo, y'ede: “Kun ti suyyo batem”, wo soṅ munda wede iina ki poone a siido Galile wo adda siido Ziide pay.

38Wo kun suune mummino Raa yi biiro Isa wede ti geeger Nazaret, yode wede yi-d'ele Unde Kamileṅ ti toogo ere yi d'isiyo armika me. Isa geṅ y'an izire omagi pay, a ɗuwo y'an d'isiyo beehiye, kane ɗoṅ an d'ede toogo Meeda siitandani a eedaṅ toṅ y'an d'eliyo bee kono Raa ti yode.

39Wo kaye ay wulle t'edayey sulɗi ɗoṅ pay Isa y'ize adda siido Yawudiyagi wo a Zeruzalem me. Yoṅ geṅ deero Yawudiyagi an ti y' tiike ekk'undumu, an di y'iide.

40Saṅ onniyo sire k'aduwe maṅ Raa y'a ti y' bilde ti diine ɗoṅ unto, wo yi d'ele urzi y'an di gize tuddí.

41A baldiyadí gette i y' wulle Yawudiyagi pay ye, i y' wulle kaye ɗoṅ Raa yi biire ti poone kono ay di roota taayadí, kaye ɗoṅ ay d'iimi wo ay d'iibe ti yode aame Raa yi ti y' bilde ti diine ɗoṅ unto geṅ me.

42Saṅ Isa y'ay ruute ay di kizite Rabila Majjaanawa a kane Yawudiyagi wo ay di roote Isa yoṅ wede Raa yi biire y'a ɗekka booro a tukki ɗoṅ zeere wo ɗoṅ i t'inda pây.

⁴³Kane nebiyagi pay an rootiyo ti yode Isa, an'de: “Wede tuuku yi ziipa addí a yode maṅ, y’a t’oona tambobino k’oldikadí t’urzi toogo ere ki sundí.”»

Unde Kamileṅ ti doṅ Yawudiyagi ye

⁴⁴Aame Piyer y’an kazita botto geṅ, a kaamiki Unde Kamileṅ t’a dīigo a tukki kane doṅ pay ollige onamí geṅṅo.

⁴⁵Maṅ kane Yawudiyagi doṅ i ziipe addaṅ a Isa iido ti Piyer geṅ an ziida giggeraṅ, wo an di zuune kane doṅ Yawudiyagi ye toṅ, Unde Kamileṅ ere Raa y’elo gette ti dīige a tukki kane pay.

⁴⁶Kane Yawudiyagi geṅ an ollige doṅ Yawudiyagi ye toṅ, an orbe t’ono doṅ doolo wo an tamma taṅ miibi Raa yoṅ goole a jire me. Inḱino Piyer y’a ruute, y’ede:

⁴⁷«Aṅkeṅ kane dūwo eṅ an uune Unde Kamileṅ aakede kaye, geṅ ay k’aane ay gi di-tooge ye an di suyve batem t’ahu me.»

⁴⁸Maṅ Piyer y’an di ruute, y’ede: «Dūwo eṅ kun ti’n suyvo batem ti suma k’Isa Almasi.» Inḱino maṅ Piyer an di y’ tunde y’a lekke onniyto miibi ti kane.

Naabo doṅ zina 11

Ono Piyer a daana zemba a Zeruzalem

¹Doṅ zina k’Isa ti zemba doṅ i ziipe addaṅ a Isa a siido Ziide geṅ, an illiga kane doṅ Yawudiyagi ye toṅ ono Raa an uune.

²Wo aame Piyer yi-gime ki Zeruzalem maṅ, kane Yawudiyagi doṅ i ziipe addaṅ a Isa an di y’irba,

³wo an i ruute, an'de: «Ki moo me kee k’ize inḱino, ki-t’iide di doṅ i ki waldu ponde ye wo k’a iimo ti kane me!»

⁴Inḱino maṅ Piyer y’an d’iise tōwwo taaya, yi-t’iise t’ume k’eesiyo soo ti soo a munda wede ize.

⁵Y’an di ruute, y’ede: «Aame nuṅ a geeger ki Zoppa ni tonḱiyo Raa geṅ, munda o d’iido aa suniye. Ni wolliyō’ṅ munda i deegu ti Raa ki tuddó, yode geṅ yi deey’iso aa bojo goole kettiso a bohaní pide, munda geṅ yi deegu ti kandaane bini a iina aame sirpadó.

⁶Wo ni wolliyō tebeṅ k’adda k’adde munda geṅṅo, n’a wulle seyḱi booze, seyḱi balda, seyḱi doṅ i morkimso a siido wo embi doṅ oppiyso a kandaane pây.

⁷Maṅ n’ollige golla t’o-di ruute, t’ede: “Piyer, ki t’oozo’ṅ! Seyḱi eṅ ki soḱḱo, k’a t’ôodo, k’a t’aada.”

⁸Wo n'a ruute, n'ede: "Galmeegó ato! Nuṅ munda wede k'ombo ulu, yoṅ ganigi a daanadá geṅ kaṅ soo toṅ ni k'iimi ye."

⁹Golla gette n'a t'illiga ki sirwe ti kandaane, t'ede: "Munda wede Raa y'ede yo eṅ kamileṅ geṅ, ki k'elke aa munda wede k'ombo ulu ye."

¹⁰Golla gette t'a ruute ruute taṅ aḍo, saṅ a kaamiki munda geṅ a-gili ki kandaane sey.

¹¹Kaciṅ aame geṅ miṅ a kaamiki ḍoṅ aḍo an o igibo ti Sezare, an iido an di n'uuna adda boy wede kaye'ṅ adda.

¹²Unde Kamileṅ t'o di ruute n'a iṅgile ti kane daa k'orgiso. Kane zemba ḍoṅ zoot i ziipe addaṅ a Isa ni wiiko keṅṅo geṅ, an di n'igibo a Sezare, wo nuṅ ti kane pay ay t'iide k'adda boy Korney.

¹³Yoṅ y'ay t'iide taaya mummino maaleeka y'iide k'adda boozí y'a yi wulle, wo yo maaleeka yi di ruute, y'ede: "Ki agiba ḍuwo ki geeger Zoppa, an di waako Simo wede sundí soo an yi waaku Piyer, y'a etto.

¹⁴Yoṅ y'a di roota ono a urzi wede saṅ kun t'ooney uttiyo, kee ti ḍoṅ boozá pay."

¹⁵Aame Korney y'a ti ḍiṅge taayadí wo n'a t'eeese tōwwo taayadó botto geṅ, Unde Kamileṅ t'a ḍiige a tuddaṅ aa ti ḍiige a tukki kaye t'ume k'eesiyo.

¹⁶Iṅkino maṅ n'a ilke a ono Galmeega yi ruute, y'ede: "Zaṅ ḍuwo yi'ni zuyyite batem t'ahu, wo ḍe kune'ṅ Raa y'un ti'n suyya batem t'Unde Kamileṅ."

¹⁷Ni wulle kane toṅ Raa y'an ele Undí aa y'ay ele a kaye, aame ay ziipe addey a Galmeega Isa Almasi. Iṅkino maṅ, nuṅ wee wee n'a aane n'a t'eegire Raa a munda yi dehu y'aase me?»

¹⁸Saṅ ono geṅ ḍuwo an ti'n illiga maṅ, kane pay an d'inniga wo an d'iise tamma Raa, an'de: «Ki kotto Raa a ḍoṅ Yawudiyagi ye toṅ, urzi y'an ele an di-kime lekkiyadaṅ wo an t'oona lekkiyo ere ki kotto.»

Ḍoṅ ogiyo ti suma k'Isa a Antiyos

¹⁹Aame Etiyeṅ an y'iide maṅ, an d'iise dabirsa ḍoṅ i ziipe addaṅ a Isa. Iṅkino maṅ kane geṅ an di-tiipite ki siidiyagi doolo. Ḍoṅ oṅgo ti diinayaṅ an d'iṅgile ki siido Pinisi, ki siido Siipire, wo ki geeger k'Antiyos, wo an di kazita ono Raa a ḍoṅ Yawudiyagi ḍaṅṅal.

²⁰Aame geṅ ḍoṅ miibi ti diine kane ḍoṅ i ziipe addaṅ a Isa iido ti Siipire wo ti siido Sireṅ geṅ, an d'iṅgile ki Antiyos, wo an di gizite kay Rabila Majjaanawa ki Galmeega Isa a ḍoṅ Yawudiyagi ye.

²¹Toogo Galmeega ti kane, iṅkino ḍoṅ baadaṅ an di-gime lekkiyadaṅ, wo an di ziipe addaṅ a Galmeega.

²²Doŋ ogiyso ti suma k'Isa a Zeruzalem geŋ rabila gette an t'iire kuudaŋ, maŋ an d'igibe Barnabas ki Antiyos kono y'a ette y'a wollo.

²³⁻²⁴Barnabas geŋ yoŋ wede beehiye, yi ziipe addí pay a Isa wo addiŋ ôoniyo ti Unde Kamileŋ. Aame y'iiney a Antiyos wo yi wulle doŋ i ziipe addaŋ a Isa geŋ Raa y'an ti ziipe beeko maŋ, ulbí i-d'ize uŋse baadaŋ, wo y'an d'eele kooke pay kono an di lekke kettiyo ti Galmeega. Wo aame geŋ doŋ baadaŋ an a-ti giyy'e ti Galmeega.

²⁵Saŋ maŋ Barnabas y'a iŋgile ki Tarsi kono y'a waako Sool.

²⁶Aame yi y'uuno maŋ, y'a ti y' wiiko an t'iido k'Antiyos. Maŋ kane sirwaŋ ozzine an di y'iidfiba ti doŋ ogiyso ti suma k'Isa aŋgeŋŋo, wo an di duuye doŋ baadaŋ a urzi zaapu k'addaŋ a Isa. Geŋ a Antiyos geŋŋo sanalliyagi k'Isa an di'n wiike waaku ere ki poone «doŋ k'Almasi».

Zemba doŋ a Antiyos ti zemba doŋ a Ziide

²⁷Aame geŋ i d'ede nebiyagi an d'iigo ti Zeruzalem an t'iide ki Antiyos.

²⁸Nebi soo ti diinayaŋ sundí Agabus, Unde Raa ti di ruute adda k'addí, y'a t'iiziga y'a ruute, y'ede: «Saŋ i d'isa mosogo baadaŋ adda siidiyagi doŋ pay doŋ Romeŋ ge dokkiyo.» Wo kun suune mosogo gette ize aame Kilood yoŋ mozigo goole ki Romeŋ.

²⁹Aame kane sanalliyagi k'Isa an illiga iŋkino maŋ, an di dihe an tusse munda wede tuuku toŋ a toogadí, an di-t'igibe ki noogiyo zemba i lekkiyo a siido Ziide.

³⁰Iŋkino maŋ an tusse, an an d'ele a bey Barnabas ti Sool, an d'iide an an d'ele a bey doŋ dokkiyo ki zemba doŋ a Ziide.

Naabo doŋ zina 12

Unto ki Zak, wo Piyer adda daŋgay

¹Aame geŋ mozigo Erod y'a iise dabirsa zemba oŋgoŋ ti diine doŋ ogiyso ti suma k'Isa.

²Y'an d'ele urzi a asigiryagi, Zak leema Zaŋ an di y'iide ti seebir.

³Wo aame Erod yi wulle a Yawudiyagi an t'ize uŋse maŋ, y'an d'ele urzi Piyer toŋ an ti y' seedo a onniytagi doŋ ki tarnaape wede an d'ombo mappa daa k'orme.

⁴Aame an ti y' ziido maŋ, an di y'ele adda daŋgay, wo Erod y'a-ti zippe asigiryagi koomat makumu zoot, y'a ti'n dikkida omagi pide, an di y' boohe. Yi dehu y'a dekka booradí a daana duwo pay aame tarnaape Pak ki Yawudiyagi yi t'iŋgila maŋ.

⁵Inkino maŋ Piyer yi lekkiyo daŋgay wo kane doŋ ogiyo ti suma k'Isa geŋ an tonduyo Raa daa puukiyo wo t'addaŋ pay kono yode.

Adfiya Piyer ti daŋgay

⁶A diddo ere soggo Erod y'a deŋka booro ki Piyer a daana duwo pay gette, Piyer geŋ yi moone a diine k'asigiryagi sire, beyd'ŋ kettiso ti ziŋziri sire, wo a biza daŋgay ummey asigiryagi sey an boohiyo.

⁷A kaamiki maaleeka ki Galmeega Raa y'a diige adda daŋgay, biino ere Piyer adda gette a-tuure kereŋ. Maŋ maaleeka y'a yi butte Piyer a sirpadí kono y'a t'inne, wo yi di ruute, y'ede: «Kesiko ki t'oozo!» Maŋ ziŋziri ti beydí a tiipe.

⁸San maaleeka yi di ruute, y'ede: «Ki-ketto tooná wo ki t'osso tobiyagá.» Piyer y'a t'ize aa maaleeka yi ruute, wo yi di ruute sey, y'ede: «Ki t'osso kallayá goole wo k'a ni daani.»

⁹Inkino maŋ Piyer y'a diine maaleeka, t'adda daŋgay y'a t'udde, wo a elkiyadi yi ki zuune ye munda wede maaleeka y'isiyo geŋ derec me, y'elkiyo i-iido munda aa suniye.

¹⁰An t'udde t'ume k'asigiryagi doŋ ki poone, ti doŋ ki sirwe toŋ an a-t'udde pây, an d'iiney a biza wede ki maala k'a-t'adde k'adda geeger. Biza geŋ a t'ihina siidí a daanadaŋ me, wo an t'udde maŋ an d'izire kaŋ soo a urzi, saŋ a kaamiki nokkot maaleeka yi y'iili Piyer me.

¹¹Inkino maŋ Piyer eedí t'a iido, y'a yi zuune munda wede i-iido me, wo y'a ruute, y'ede: «Aŋkeŋ ni zuune baa geŋ derec, Galmeega Raa y'igibo maaleeka y'a-n'udde ti bey k'Erod wo ti munda wede ulsu Yawudiyagi an dehu an oo d'ise me.»

¹²Aame yi zuune inkino maŋ, y'a ingile ki boy k'erewo sundutú Mariyam mekki Zaŋ, sundí soo Markus. Adda boy geŋ doŋ baadaŋ an t'ugiyee an tonduyo Raa.

¹³Piyer y'iide'ŋ yi koppiyo biza yi-t'ette, wo i d'ede ere naabo sundutú Rood, t'a iido t'a-t'ihina biza.

¹⁴Aame t'illiga'ŋ golla ki Piyer t'a ti zuune, wo tod'te ulbutú a ûune t'uŋsuwo baadaŋ. Inkino maŋ t'a-t'ihina biza umbo, t'a-gime kaŋ okko, t'an di ruuto, t'ede: «Piyer yo enno a biza.»

¹⁵Kane an i-di ruute, an'de: «Koŋ mi t'okko maade ko?» Wo de tod' t'a ruute, t'ede: «Ki kotto yo a biza.» Inkino maŋ kane an di ruute, an'de: «Geŋ maaleekayi koo maŋ.»

¹⁶Inkino yo Piyer geŋ yi koppiyo biza pi bini an d'iido, an i-t'ihina. An yi wulle maŋ, an ziida giggiraŋ.

17Maɗ y'an d'ize likuw ti beezí kono an d'anniga, wo y'an t'íide taaya mummino Galmeega yi-y'udfo ti dangay me. Y'an di ruute sey, y'ede: «A Zak wo a zamba ongo toɗ, kun an t'ôodoy taaya.» Saɗ t'ume kane y'aa t'udfo, y'a ingile k'ume doolo.

18Ume i t'umpile maɗ asigiryagi an woliyo Piyer umbo, undaɗ a t'udfo, an d'iise tondiso, an'de: «De Piyer a y'ihe moo me?»

19Mozigo Erod y'a igibe duwo ki dehuzí, wo an ki y'uuno ye. Maɗ y'anni wiike kane asigiryagi doɗ i yi boohiyo me, y'anni tundite ti kulkuwo, y'ede: «De Piyer kun i ize mummino!» Inkiɗo maɗ y'an di ruute a asigiryagi doolo an ti'n ôodo. Saɗ maɗ Erod y'a t'iiziga ti siido Ziide, y'a-lekko a geeger Sezare onniyto miibi.

Unto ki mozigo Erod

20Inkiɗo maɗ kane doɗ geegiryagi Tir ti Sidon geɗ, an ooniyo ombo ti siido ki mozigo Erod, wo aame geɗ yoɗ yi ti gulkuwe baadaɗ ti kane doɗ siido geɗ me. Maɗ kane doɗ pay geɗ an t'íide onamaɗ kaɗ soo, an t'oone urzi ki toose ti Erod. Maɗ an d'uuney wede soo sundí Bilastus, yoɗ geɗ wede boohiyo biino mozigo. Kane an iide an ti y' niyy'a, y'an d'an t'ette k'ume mozigo Erod.

21Inkiɗo maɗ Erod y'an d'ele onniyo, wo aame onniyo gette t'iina maɗ yi-t'usse kallayí ki moziko, y'a-guune kaakido booro, y'a iise rootiyto a daana duwo pay.

22Doɗ ollige geɗ an d'iise dollite, an'de: «Enno eɗ i rootiyto wedusu ye, eɗ raayusu!»

23Aame Erod y'illiga ono duwo geɗno maɗ, ulbí unse tuddí y'a ti-gili, tamma gette yi-k'iili a Raa ye. Inkiɗo maɗ a kaamiki, maaleeka ki Galmeega Raa y'a yi diiɗe ti eeni, ondirɗagi adda k'addí an di y'iimi, y'a inda.

24Tiɗ geɗ ono Raa i-teepiyo ki daana ki daana, wo doɗ baadaɗ an di ziipe addaɗ a Isa.

25Aame Pool ti Barnabas a zina ere an an igibe ki noogiyo duwo a Zeruzalem an aa ti-d'iɗge maɗ, an a-ti y' wiike ti kane Zaɗ wede sundí soo Markus, an di-gime ki Antiyos.

Naabo doɗ zina 13

Barnabas ti Sool wo doɗ dokkiyo a Antiyos

1T'adda diine doɗ ogiyso ti suma k'Isa a Antiyos geɗ, i d'ede nebiyagi wo doɗ dooyiso: Barnabas, Simeyon an yi waaku sundí soo Bakulu, Lisiyus ti siido Sireɗ, Manayen wede an iiziga kaɗ soo ti Erod wede mozigo a siido Galile, wo Sool.

²Onniyo soo, an t'ugiyee an ottilso a Galmeega wo an di lekkiyo daa k'ombo, aame geŋ Unde Kamileŋ t'an di ruute, t'ede: «Barnabas ti Sool geŋ kun oo ti'n ooyo siidaŋ ki naabo ere nuŋ ni'ni wiike.»

³Iŋkino maŋ aame an ti likke daa k'ombo wo an tunde Raa geŋ, zamba an an di ziipe beeko wo an di'n iili Barnabas ti Sool, an d'iŋgile.

Barnabas ti Sool a Siipire

⁴Iŋkino maŋ Barnabas ti Sool Unde Kamileŋ ti'n agisa naabo geŋ, an d'iŋgile an t'iide ki geeger Selusi. Tiŋ geŋ an d'uune tooko, an di-gili an d'iŋgile ki Siipire, siido ere a diine k'ahu.

⁵An iiney a geeger Salamin a Siipire maŋ, an d'iise kazita k'ono Raa adda boydi doŋ Yawudiyagi ge dooyiso. Aame geŋ Zaŋ Markus toŋ yoŋ ti kane y'an di'n noogiyo.

⁶Aame an ti diipida siido Siipire maŋ, an d'iiney geeger Papos. A ume geŋ an d'ikkima ti Yawudusu soo sundi Bar-Zezu, yode geŋ kombide, yi ti t'isiyo tuddi aa nebi,

⁷yoŋ yi lekkiyo a sirpa goole ki Romeŋ adda siido gettiyo. Wede goole siido geŋ sundi Serziyus Poolus, yoŋ wede eedi soodo a elkiso. Yode geŋ y'anni wiike Barnabas kane ti Sool di yode kono yi dehu y'a olliga ono Raa.

⁸Wo kombide geŋ sundi soo t'ono Girek an yi waaku Elimas geŋ, y'an di-tuuge a Barnabas ti Sool me kono yi ki dehu ye goole siido y'a zaape addi a Isa me.

⁹Iŋkino maŋ Unde Kamileŋ ti-t'ũune adda k'adde Sool sundi soo Pool, yi di y' wolleyo wede'ŋ geŋ yerere adda k'edayi,

¹⁰wo yi di ruute, y'ede: «Kee wede adda ũune ti metiŋko wo ti bundiko! Kee ulo Meeda siitandani! Kee adu ki suldi doŋ pay ki diine, ki dehu daayum urziyagi doŋ delele ki Galmeega ki di ti'n lette.

¹¹Wo aŋkeŋ k'ollo, Galmeega y'a ki daaŋa, k'a koosa suma k'onniyo miibi toore peedo ki ki y' wolla ye.» A kaamiki y'a-guuse, yoŋ aa adda zimolo, yi-kama keŋŋo keŋŋo yi dehu wenda yi seeda a beezi y'a ti y' dokke.

¹²Aame goole siido geŋ yi wulle munda wede i iina a Elimas geŋŋo maŋ, y'a ziipe addi a Galmeega kono dooyiso gette i y' ziida baadaŋ.

Pool a Antiyos siido Pizidi

¹³Wo Pool ti doŋ a itadi an t'iiziga ti Papos, an di-gili adda tooko, an d'iŋgile ki geeger Perz a siido Pampili, wo aame an iiney maŋ Zaŋ Markus yi'n iili, y'a-gime ki Zeruzalem.

14Maṅ ti Perz geṅ kane an t'iiziga, an d'iṅgile ki geeger k'Antiyos siido Pizidi. An iiney Antiyos geṅ, a onniyo ere ki puukiyo Yawudiyagi an t'iide adda ɓoy wede Yawudiyagi ge dooyiso, an di-gundite.

15Aame kane ɗuwo geṅ an gire adda mattup k'oogoro Muusa ti ono ɗoṅ ki nebiyagi maṅ, ɗoṅ deero ki ɓoy geṅ an an di ruute, an'de: «Zemba ki nuṅ, aame un ede ono ki kooke a ɗuwo eṅṅo maṅ, kun an eelo.»

16Iṅkino maṅ Pool y'a t'iiziga, y'an d'ize likuw ti beezí kono an d'anniga, maṅ y'a ruute, y'ede: «Kune ɗoṅ k'Izirayel, wo kune ɗoṅ Yawudiyagi ye ɗoṅ ottilso a Raa, kun n'ollo.

17Raa wede ki kine ɗoṅ k'Izirayel y'a biire moṅgidagiṅ. Y'an iigila aame kane an lekkiyo a siido Misir, saṅ ti toogadí y'an uɗɗo ti siido gette.

18Adda k'ozzine ette suma k'ada piɗe, Raa y'anni muɗɗe adda balɗa me.

19Saṅ maṅ ita ɗuwo sarat adda siido Kanahaṅ gette Raa y'a-t'uute, y'an d'ele siido kane gette aa korbite a ɗoṅzí.

20Sulɗi pay geṅ i t'iṅgile a iide ozzine suma meeda piɗe uto ada paat. Maṅ Raa yi biire ɗoṅ dekkiyo booro a ekki moṅgidagiṅ, an di wolliyo onamaṅ bini nebi Samiyel.

21Aame Samiyel yoṅ nebi geṅ, moṅgidagiṅ an tunde Raa y'an t'eele mozigo. Maṅ Raa y'an d'eele Sayul ulo Kis ti biza bumbu Benzamen, y'iimi mozikadí ozzinagi ada piɗe.

22Saṅ maṅ Raa y'a ti ɗiige Sayul me, y'a di ziipe Dawut mozigo me, yoṅ geṅ wede Raa y'a ruute sundí, y'ede: “Ni uune Dawut ulo Zeese, yoṅ geṅ wede aa addó i dehu, y'aasa naabo ere pay aa ni dehu.”

23Ti ita k'iṅṅi Dawut geṅ Raa yi d'iidiba wede soo sundí Isa, yoṅ Wede k'Uttiyo ki ɗoṅ k'Izirayel. Geṅ iṅkino Raa y'a-ti ɗiṅge ono ɗoṅ yi ruute y'aasa me.

24Ki poone Isa y'a aana geṅ, Zaṅ Batis y'a iido y'a gizite a ɗoṅ k'Izirayel pay kono an di-kime lekkiyadaṅ wo y'a ti'n suyye batem.

25Aame Zaṅ yi zuune naabadí gopponṅ ti ɗaṅga maṅ, y'a ruute, y'ede: “Kune kun elkiyo nuṅ wee wee? Nuṅ Almasi wede kun delliyo geṅṅo ye. Wo ɗe wede ettiyo k'itadó geṅ, yoṅ nuṅ batum ni k'iide n'a ki t'eeze sibe tobiyagí ye.”

26Zemba ki nuṅ, kune ɗoṅ ti ita k'iṅṅi k'Ibirayim wo kune ɗoṅ ottilso a Raa, ono ɗoṅ k'uttiyo eṅ Raa yi'n elo a kine.

27Aame Isa y'iina maṅ, ɗoṅ Zeruzalem ti deerizaṅ an ki y' zuune ye Isa wede Raa y'igibo me, wo ono nebiyagi ɗoṅ an gariya daayum a onniyo ere ki

puukiyadiŋ geŋŋo toŋ, itadaŋ an ki'n zuune ye. Wo de an d'ize kono booro t'a yi ziida ki tōwwo, a-t'iide a ono nebiyagi an ruute ti kaaga.

28Kane dūwo geŋ munda wede an t'oone a tukki yode a t'ide ki tōwwadi umbo, wo toŋ maŋ an di tunde Pilat y'a t'ele urzi ki tōwwadi.

29Inkino a munda wede kane an ize geŋ a-t'iide a ono doŋ pay an riije ti kaaga adda mattup ki Raa a tukki yode, maŋ kane Yawudiyagi an ti y' diige t'ekk'undumu me, wo an di y'eele adda muuzo.

30Wo de Raa y'a ti y' bilde ti diine doŋ unto me.

31San maŋ y'an di gize tuddi taŋ baadaŋ a eŋŋo eŋŋo, a doŋzi doŋ an gilo kaŋ soo ti siido Galile ki Zeruzalem, wo aŋkeŋ kane geŋ an di rootiyo taayadi a daana Yawudiyagi pay.

32-33Inkino maŋ ono doŋ Raa yi ruute y'aasa a moŋgidagiŋ ti kaaga geŋ, aŋkeŋ y'a ti'n diŋge a kine inŋizaŋ, aame Isa yi ti y' bilde ti diine doŋ unto geŋ me. Wo aŋkeŋ Rabila Majjaanawa gette kaye batum ay iido, ay un di kizite. Raa y'ize inkino aa an riije ti kaaga adda mattup ki Soom sire, an'de: "Kee ulo nuŋ me, wo ti aŋki dūwo an di suune nuŋ Meegá."

34Wo Raa yi ruute ti kaaga, yoŋ y'a ti y' balda ti diine doŋ unto kono y'a ki ruuma ye. Geŋ Raa yi ruute inkino, y'ede: "N'un di zaapa beeko ere kamileŋ wo suldi doŋ derec ni ruute ni-t'ela a Dawut."

35Kono kamo Dawut y'a ruute sey adda mattup ti doolo, y'ede: "Ki oola tudde ki wediza kamileŋ i-ruuma adda muuzo ye."

36Wo Dawut yoŋ a koduwadi y'a niibe naabo Raa wo saŋ y'a inda, an di y'ele adda muuzo aame moŋgidagi, wo tuddi a ruume.

37Wo yode wede Raa y'a ti y' bilde ti diine doŋ unto geŋ, tuddi i ki ruume adda muuzo ye.

38-39Zemba ki nuŋ, ni dehu kun di suune, t'urzi k'Isa an un di kazita kun d'ooniyo tambobino k'oldikaguŋ. Wo t'urzi yode, wede tuuku yi ziipe addi a yode maŋ, yoŋ geŋ Raa yi y' woliyo ki diine a daanadi me. Derec, oogoro Muusa ti k'iine t'un gi di'n ize doŋ ki diine a daana Raa ye.

40Inkino kun koono mentikagi, kono un ki d'aana ye munda wede nebiyagi an riije ti kaaga, an'de:

41"Kun ollo bee kune doŋ okko maade Raa geŋ, kun soodo giggirguŋ wo kun di nokkido, kono a lekkiyaguŋ ette ni d'isa munda wede kun d'addira, wo munda geŋ aame wenda y'un ruuta toŋ maŋ, kun k'amba ye."»

⁴²Aame Pool ti Barnabas an adfiya ti boy wede Yawudiyagi ge dooyiso geɗ, kane doŋ duuru an di'n tunde, an'de: «Soŋŋo a onniyo ere ki puukiyo kun di kami, kun ay kizita sey ono eɗ me.»

⁴³Aame ti ogiyo an ti tiipe maɗ, doŋ baadaɗ Yawudiyagi, ti doŋ Yawudiyagi ye an ti t'ize tuddaɗ Yawudiyagi an d'ottilso a Raa pây, an di diine Pool kane ti Barnabas. Kane geɗ an an di kazita ono Raa, wo an an d'eliyo kooke an di lekke ki diine a urzi beeko ere ki Raa.

Pool ti Barnabas wo doŋ Yawudiyagi ye

⁴⁴Onniyo ere ki puukiyo Yawudiyagi t'iina maɗ, doŋ baadaɗ ti diine doŋ adda geeger gette an t'ugiye, an d'ollige ono Galmeega doŋ Pool ti Barnabas an kazita.

⁴⁵Wo aame kane Yawudiyagi an wulle doŋ duuru geɗŋŋo maɗ, kolbiso t'a jiire eedaɗ, an d'iise kaldita Pool an'de, onamí yi rootiyo geɗ lohito.

⁴⁶Inkino maɗ Pool ti Barnabas an an di ruute daa k'orgiso, an'de: «Ki kotto, ki poone'ŋ a kune Yawudiyagi ay un di kizite ono Raa me. Wo de kune kun ti-tuuge k'ollige k'ono Raa geɗ, aa kune batum kun dikke booro a eggɗ, lekkiyo ere ki daayum kun ki ti t'oono ye. Inkino kaye ay d'ambe ki tukki doŋ Yawudiyagi ye,

⁴⁷kono eɗŋŋo munda wede Galmeega y'ay ruute ay d'ise me, y'ede: "Nuɗ ni ki ziipe aa toore ki ita duwo pay, kono k'an d'etta t'uttiyo ere ki Raa bini daɗɗu siido pay."»

⁴⁸Aame kane doŋ Yawudiyagi ye an illiga ono geɗŋŋo maɗ, an tamma Raa wo an di ruute, an'de: «Ono Galmeega eɗ unse baadaɗ.» Wo kane doŋ pay Raa yi biire an t'oono lekkiyo ere ki daayum geɗ, an di ziipe addaɗ a Isa.

⁴⁹Inkino maɗ ono Galmeega a-tiipe adda siido gette pay.

⁵⁰Wo kane Yawudiyagi geɗ an an t'elite ono a erayi doŋ sundaɗ ti molo wo an ottilso a Raa, ti doŋ deero adda geeger. Kane pay geɗ an an t'elite ono a doŋ duuru, an di dibire Pool ti Barnabas, wo ti siidadaɗ an di'n ilmi.

⁵¹Kane sire geɗ odde zoɗɗaɗ an an ti y' tuttige, wo an d'ingile ki geeger k'Ikoniyon.

⁵²Wo kane sanalliyagi k'Isa a Antiyos siido Pizidi geɗ, an di lekkiyo addaɗ onniyo t'Unde Kamileɗ wo ulbaɗ unse.

Naabo doŋ zina 14

Pool ti Barnabas a Ikoniyon

¹Aame Pool ti Barnabas an iiney a Ikoniyon maɗ, an d'ingile an t'iide adda boy wede Yawudiyagi ge dooyiso, aa an d'izo a Antiyos. Aame an iise kazita k'ono Raa geɗ, Yawudiyagi baadaɗ ti doŋ Yawudiyagi ye an di ziipe addaɗ a Isa.

²Wo de kane Yawudiyagi don i-tuuge ki zaapu k'addan a Isa gen, an an t'elite ono a kane don Yawudiyagi ye kono an di-kime elkisadan, an di kulkuwe ti kane zamba genno.

³Wo ton man Pool ti Barnabas an di likke onniyo baadan adda geeger gette. An di gizite ono Raa t'adde soo, orgiso adda k'addan umbo kono Galmeega ti kane. Wo yon y'an d'eliyo toogo k'isiyo suldi k'armika ti suldi don i ceeriyo eego, i-kaza onaman a urzi beeko Galmeega gen derec.

⁴Kane don geeger an t'ihinte omagi sire, don son a ita Yawudiyagi, wo don son a ita don zina k'Isa.

⁵San kane Yawudiyagi miibi ti don Yawudiyagi ye wo ti deerizan, an di ruute an an d'ise ulsu a don zina k'Isa, an ti'n kakkite ti mongali an ti'n t'ide.

⁶Wo aame Pool kane ti Barnabas an illiga inkinon man, an t'umbe an d'umbe k'urzi Listire ti Derbe, geegiryagi ki siido Likayuni, ti illiyagi don i ti-duule.

⁷Aame an ibey a siido gettiyo man, angenno ton an d'iise kazita Rabila Majjaanawa.

Pool ti Barnabas a siido Listire

⁸A geeger ki Listire gette i d'ede wedusu zonadi unto t'ume an ti y'ehe too, kan soo ton umbo yi k'izire ye.

⁹Onniyo soo Pool yi kazita ono Raa man, yo wede gen yi d'ollige. Pool yi di y'wolliyon teben, man y'a zuune wede gen yi ziipe addi, yi dehu y'a utte t'eenizi me.

¹⁰Inkinon man Pool yi di ruute ti golla awwa, y'ede: «Ki t'oozo, ki t'ohor kan ohire!» Wede y'a ilde k'awwa, y'a t'hira, y'a iise sooru.

¹¹Aame kane don duuru an wulle munda wede Pool y'ize genno man, an d'iise dollite t'ono ki Likayuni, an'de: «Raayagi an t'umbo tukki duwo, an di-diigo diinayin!»

¹²Inkinon man Barnabas an i-d'ele suma ki raazan Zewus, wo Pool an i-d'ele suma ki raazan Ermes kono yon wede k'eesiyo k'ono.

¹³Boy raayusu Zewus gen yon a biza geeger. Inkinon man wede sedeke ki Zewus gen y'iide'n, yi zidde bungari, y'an d'izite dogoro ki bobbo k'inda, wo y'an d'an t'iide ki biza boy genno, kono yi dehu ti kane don duuru gen an an d'ise sedeke akka Pool ti Barnabas.

¹⁴Wo aame kane don zina sire gen an illiga inkinon man, addan a k'ize unse ye, kallagan an di zittite, man an d'ukke an t'iide diine don duuru genno, an di dollite, an'de:

15«Wayya, kune duwo en, kun isiyo inkiino moo me? Kaye miñ duwo aa kune pay! Kaye ay un kazita urzi Rabila Majjaanawa kono longayi don ki bita geñ kun di'n ooli, wo kun di-kimo ki tukki Raa zeere, wede ikkima kandaane ti siido wo bar, ti suldi don adda pay.

16Ti kaaga Raa y'an iili duwo adda siidiyagi pay, don tuuku ton an adfiya urzizañ k'eedañ k'eedañ.

17Wo ton mañ y'an di kaza daayum a duwo yon Raa wede beehiye, ti kandaane y'un d'eliyo mizzi, y'un d'eliyo suldi don ki derku, kun d'aydu aame onniyo ti towwo mañ. Eyye, yon y'un d'eliyo omba baadañ wo addugon y'un di'n onniyo t'unusuwo.»

18Ti onamañ geñno ton, ti onne baadañ Pool ti Barnabas an d'iine don duuru an di'n ihira t'isiyo sedeke a kane me.

19Sañ mañ kane Yawudiyagi ti Antiyos siido Pizidi wo ti Ikoniyon an d'iina a Listire, an di'n irga don duuru ki tukki kane. Inkiino mañ Pool an ti y' gikkite ti mongali ki towwadi, sañ an t'irga t'adda geeger ki paate, an elkiyo y'inda.

20Wo kane sanalliyagi geñ an di-t'ugiye a eedi, sañ Pool y'a t'iiziga, y'a-gime k'adda geeger gettiyo. Soggo mañ ti Barnabas an d'ingile ki geeger Derbe.

Pool ti Barnabas a Antiyos siido Siiri

21Pool ti Barnabas an iiney a Derbe mañ, an di gizite Rabila Majjaanawa wo don baadañ an di ziipe adda a Isa, an t'ize sanalliyagi. Sañ mañ an di-gime k'adda geegiryagi ki Listire, Ikoniyon wo Antiyos siido Pizidi.

22Adda geeger son an an d'eeliyo kooke kooke a sanalliyagi me, an di seeda zakidi a urzi zaapu k'adda a Isa, an d'eesiyo: «In t'ona dabar baadañ doo miñ, in t'etta ki Moziko Raa kollo.»

23Wo t'adda diine don ogiyo ti suma k'Isa geñ a ume son an di beeriyo don dokkiyo dokkiyo, wo aame geñ an dilekkiyo onniyo muno daa k'omba ti tonniyo Raa, sañ kane zamba geñ an i-di'n ele a bey Galmeega wede an ziipe adda kono y'anni boohe.

24Sañ mañ Pool ti Barnabas an d'ingile an di diipida ki Pizidi, an d'ingile ki siido Pampili.

25An di gizite ono Raa a geeger ki Perz, sañ mañ an di-diiige ki biza bar ki geeger k'Atali.

26Tiñ geñ an di-gili adda tooko, an di-gimo ki Antiyos siido Siiri, ume wede ti poone zamba an an di'n ele kane a beeko ere ki Raa, a naabo ere an d'ise wo ankeñ an ti dinge.

²⁷Aame an iiney a Antiyos maɲ, an di'n ugiye doɲ ogiyso ti suma k'Isa geɲ pay, wo an an t'ɛide taaya a munda wede Raa y'ize t'urzi kane, wo soɲ mummino Raa y'ize y'an t'ihina urzi a kane doɲ Yawudiyagi ye toɲ, an ziipe addaɲ a Isa me.

²⁸Aame geɲ Pool ti Barnabas an di likke onniyto baadaɲ ti sanalliyagi me.

Naabo doɲ zina 15

Ogiyso meeda a Zeruzalem

¹I d'ede doɲ ede kane a siido Ziide, an d'ingile ki Antiyos an di dooyiso zemba, an'de: «Kune kun ki ti wilda ponde aa oogoro Muusa ti ki rootiyo ye maɲ, Raa y'un ki'n utta ye.»

²Wo Pool ti Barnabas an ki d'iyye ye a onamaɲ geɲ me, an di niikite baadaɲ ti kane me. Injino maɲ an di dihe Pool ti Barnabas an di-kili Zeruzalem ti zemba oɲgo kono an di wollo ono geɲ ti doɲ zina k'Isa wo ti doɲ dokkiyo.

³Injino maɲ doɲ ogiyso ti suma k'Isa a Antiyos an an d'eele munda ki torguwadaɲ me, wo an di'n igibe an d'ingile. An di diipida ki siido Pinisi wo ki siido Samari, a ume geɲ an an t'ɛide taaya mummino doɲ Yawudiyagi ye an di ziipe addaɲ a Isa me, wo kane zemba pay geɲ addaɲ a uune t'unɲsuwo.

⁴Aame kane an iiney Zeruzalem maɲ, doɲ ogiyso ti suma k'Isa, doɲ zina k'Isa wo doɲ dokkiyo pay geɲ, an di'n ziida bey sire. Wo Pool ti Barnabas an an t'ɛide taaya a suldi doɲ pay Raa y'ize t'urzi kane.

⁵Wo doɲ ede ti diine Pariziyen doɲ i ziipe addaɲ a Isa geɲ, an t'iiziga an d'iise rootiyo, an'de: «Doɲ Yawudiyagi ye an ziipe addaɲ a Isa geɲ i dehu an di walda ponde, wo kun an di roote an di daane oogoro Muusa.»

⁶Injino maɲ kane doɲ zina k'Isa ti doɲ dokkiyo an t'ugiye kono an di wolle urzi k'ono geɲɲo.

⁷Aame an niikite kee maɲ, Piyer y'a t'iiziga y'an di ruute, y'ede: «Zemba ki nuɲ, kun suune nuɲ Raa yi ni biire ti diine kune ti kaagine, kono n'an di kizite Rabila Majjaanawa a doɲ Yawudiyagi ye, kono ono eɲ an di'n olliga wo an zaape addaɲ a Isa.

⁸Wo yo Raa yoɲ wede yi suune adde duwo pay, geɲ y'an di gize kono kane toɲ yi'ni dehu y'an t'ele Unde Kamilen aa y'in ele a kine kay.

⁹Raa y'inni wolleiyo kine ti kane pay miɲ kaɲ soo: kono kane an ziipe addaɲ a Isa, Raa yi'n ize addaɲ kamilen a daanadi me.

¹⁰Wo aɲkeɲ moo me kun dehu kun di lette adde Raa, kun an di zaape attidi ki daaniya k'oogoro Muusa a ekki sanalliyagi k'Isa me, attidi wede moɲgidagin toɲ an k'iine sarkiya ye, wo kine toɲ maɲ in k'aane ye kay?

11Aha, i k'ise ye in̄kino me. In ambo miñ t'urzi beeko ere ki Galmeega Isa kine Yawudiyagi in uune uttiyo, wo a kane toñ in̄kino pây.»

12Aame kane ñoñ duuru pay geñ an illiga in̄kino mañ, an d'inda kuy, wo an d'ollige Pool ti Barnabas an tôwwo taaya a suldi k'armika ti suldi ñoñ i ceeriyo eego Raa y'ize t'urzi kane a diine ñoñ Yawudiyagi ye.

13Aame onamañ i ñiñge mañ, Zak y'a iise rootiyo, y'ede: «Zemba ki nuñ, kun ollo kay!

14Simo y'in ruute mummino t'ume k'eesiyo Raa y'a buuhe ñoñ Yawudiyagi ye me, kono yi-beere ti diine kane an t'ise ñoñ ti suma yode.

15Wo ono nebiyagi toñ a-t'iide a suldi geñño, kono ono eñ an riñe ti kaaga adda mattup ki Raa, an'de:

16“Galmeega y'ede: Sañ mañ nuñ n'a kimo n'a y'ooziga boy Dawut wede iire me, suldi pay i litte geñ n'an okkima n'a y'ooziga a umayí.

17In̄kino mañ ñoñ pay ti doolo toñ an di deha nuñ Galmeega, eyye ita ñoñ siido pay ni wiiko an t'isa ñoñzó. Eñño ono ñoñ Galmeega yi ruute me.

18Suldi geñ yoñ y'an ti'n gize t'ume ti kaaga too.”»

19Zak y'a ruute sey, y'ede: «Eñño munda wede ni woliyo beehiye me, in an ki t'ise ye morkolo morkiy'e a kane ñoñ Yawudiyagi ye i-gime ki tukki Raa.

20Wo in an raaña mattup kono in an di roote, an k'aadi ye sey wede an eliyo sedefe a longayi me, kono a ñaana Raa yoñ ganigi, boliyo toñ ulu an d'ooli, an k'aadi ye sey wede ki seysu inda puuzadí ti k'udde ye me, ise puuzo toñ ulu an k'oomi ye.

21In an raaña in̄kino kono ti kaagine ñuwo an kazita urzi k'oogoro Muusa adda geegiryagi pay, wo an gariyta adda boydi ñoñ in di dooyiso a onniytagi ñoñ ki puukiyadiñ me.»

Mattup a zemba ñoñ Yawudiyagi ye

22In̄kino mañ ñoñ zina k'Isa, ñoñ dokkiyo ti ñoñ pay ogiyo ti suma k'Isa, kañ soo an di biire ti diinayañ ñuwo an ti'n t'igibe a ita Pool ti Barnabas ki Antiyos siido Siiri. Mañ an t'iidiba Ziid sundí soo Barsabas, wo Silas, kane geñ ñoñ suma, zemba pay an'ni suune.

23An an d'ele mattup gette a beezañ, wo adda mattup an riñe, an'de: «Kaye ñoñ zina k'Isa, ñoñ dokkiyo ti zemba pay ay un t'ize toose a kune zemba ñoñ Yawudiyagi ye i lekkiyo a geeger k'Antiyos, a siido Siiri wo a siido Silisi.

²⁴Ay illiga ɗoŋ ede ti diinayey, an t'iide di kune. Kane ɗoŋ geŋ an un ti-digge eggun te, wo an un di'n ele adda k'elkiso ti onamaŋ geŋ me, biza k'ulbugun a-gime. Wo ɗe kaye ay an ki ruute ye an d'ise inŋino me.

²⁵Inŋino maŋ kaye pay ay di ruute kaŋ soo ay biire ɗuwo ay di'n t'igibe ki tukki kune a ita zamba ɗoŋ ki geyyiso Barnabas ti Pool,

²⁶kane ɗoŋ ele tuddaŋ k'unto toŋ maŋ kono an daaniya suma Galmeegiŋ Isa Almasi.

²⁷Inŋino ay un t'igibe Ziid ti Silas, an un di rootey ti bizaŋ munda wede ay un riije adda mattup ette.

²⁸Geŋ inŋino t'urzi k'Unde Kamilen, kaye batum ay un ki zaape attidi ti doolo ye, wo kun daano munda wede ay un riije adda mattup:

²⁹Sey wede an eliyu sedefe a longayi kun aadi ye, puuzo toŋ ulu kun oomi ye, sey wede ki seysu inda puuzadi ti k'udde ye kun aadi ye, ise boliyo toŋ ulu kun d'ooli. Aame suldi pay geŋ kun iila maŋ, a kune beehiye. Kaye zembagun a enno ay un t'ize toose baadaŋ.»

³⁰Mattup gette an an d'ele a ɗoŋ an biire, maŋ kane an d'ingile ki Antiyos. An iiney maŋ an di'n ugiye ɗoŋ i ziipe addaŋ a Isa geŋ pay, mattup gette an an d'ele.

³¹Aame mattup gette an ti gire maŋ, onamtú geŋ zamba an d'eele kooke wo ulbaŋ an t'ize unse baadaŋ.

³²Ziid ti Silas geŋ kane nebiyagi, a zamba an an d'eele kooke t'urzi baadaŋ kono an di koone zakidi a urzi zaapu k'addaŋ a Isa.

³³An di likke onniyto baadaŋ anŋeŋ me, saŋ maŋ zamba an di'n igibo wo an di ruute, an'de: «Kun di-kama ti toose k'ume ɗoŋ un igibo me.»

[³⁴Wo Silas geŋ i-di t'ize unse, y'a lekke me.]

³⁵Aame geŋ Pool ti Barnabas an d'uupo a Antiyos, ti zamba baadaŋ ongo an di dooyiso wo an di kazita Rabila Majjaanawa a urzi k'ono Galmeega.

Âhuntu ki Pool ti Barnabas

³⁶Onniyto miibi k'ita maŋ Pool yi di ruute Barnabas, y'ede: «In ti kime k'ita, in di wollo zamba adda geegiryagi pay ɗoŋ in an gizito ono Galmeega, an isiyo mummino koo maŋ a urzi Raazaŋ me.»

³⁷Barnabas yi dehu y'a di waake Zaŋ wede sundi soo Markus ti kane.

³⁸Wo ɗe ki Pool maŋ yi ki dehu Zaŋ yi k'ette ye ti kane me, kono yoŋ ti siido Pampili y'an di'n iilo, a naabadaŋ y'an ki'n nuugo ye.

³⁹A ume geɗ geɗ niikiytadaɗ t'a guune zakidí, iŋkino an a-t'íhinte. Barnabas y'a wiike Markus an di-gili adda tooko, an d'íngile ki siido Siipire.

⁴⁰Wo Pool y'a-wiike Silas, maɗ zamba an tunde Galmeega kono beekadí t'a koone kane, saɗ an d'íngile.

⁴¹Pool y'an izire siido Siiri ti Silisi pay, y'an d'eeliyo kooke a doɗ ogiysito ti suma k'Isa a ume tuuku toɗ maɗ.

Naabo doɗ zina 16

Pool y'a-ti wiike Timote ti kane

¹Saɗ maɗ Pool y'a t'iide Derbe wo soɗ ki Listire. A ume geɗ i d'ede sanallusu k'Isa sundí Timote, meedí tod'te Yawudowo ti ziipe addutú a Isa, wo meegí yoɗ Girek.

²Yo Timote zamba doɗ i lekkiyo a Listire ti Ikoniyoɗ an yi tamma.

³Pool yi dehu y'a ti y' waake ti yode. Iŋkino maɗ yi di wilda ponde kono Yawudiyagi doɗ i lekkiyo a siidiyagi geɗ geɗ an zuune pay meegí yoɗ Girek me.

⁴Aame Timote yi-ti wilda ponde maɗ, an d'ettiyo geeger ti geeger, an an di kazita a zamba doɗ i ziipe addaɗ a Isa, munda wede kane doɗ zina k'Isa ti doɗ dokkiyo a Zeruzalem an dihe, wo kane an an di rootiyo an d'ozire eego a munda geɗ me.

⁵Wo kane doɗ ogiysito ti suma k'Isa geɗ an d'ooniyo toogo baadaɗ a urzi zaapu k'adde a Isa me, wo onniyo ti onniyo an d'aagulu k'aagulu.

Pool i iide munda aa suniye

⁶Saɗ maɗ tiɗ geɗ an dehu an t'ette ki siido k'Aazi an kizitey ono Raa, miɗ Unde Kamileɗ t'an t'iigire k'ettiyo me. Iŋkino an d'íngile, an di diipida siido Pirizi ti Galat.

⁷Aame an iiney goppon ti siido Mizi maɗ, an dehu an t'ette siido Bitini, wo ki ume geɗ toɗ Unde k'Isa t'an di-tuuge k'ettiyo me.

⁸Iŋkino maɗ siido Mizi an ti diipida, an d'íngile ki biza bar ki geeger Tirowas.

⁹An di-diiige aɗgeɗ, a diddo maɗ Pool i-d'iide munda aa suniye, yi wolliyo wedusu ti siido Maseduwan yi t'íhira a daanadí wo yi di y' tonduyo t'obe bey, y'ede: «Ki ti doopidi t'ɗɗo ki siido Maseduwan, k'ay di-noogey kotok!»

¹⁰Aame Pool yi wulle munda wede i-iide aa suniye geɗ maɗ, kesiko kaye ay dihe urzi k'ettiyo ki Maseduwan kono kaye ay zuune Raa y'ayni waaku ay di kizitey Rabila Majjaanawa a doɗ siido gettiyo.

Pool yo a geeger ki Pilip

11Ti Tirowas geɗ ay d'uune tooko ay di-gili, ay d'ingile delele ki siido ere a diine k'ahu sundutú Samotiras, wo soggo maɗ ay d'iiney a biza bar ki geeger Nayapoli.

12Ti Nayapoli ay d'ingile ki Pilip, tod'te geeger meeda ki siido Maseduwan, don Romenɗ baadaɗ an lekkiyo adda. Adda geeger gette ay di likke onniyo.

13A onniyo ere ki puukiyo Yawudiyagi maɗ t'adda geeger ay t'udde, ay d'ingile biza k'ooye, ay elkiyo ay t'ooney ume Yawudiyagi ge d'ogiyso ki ton-diyo Raa. A ume geɗ ay d'uuney erayi an t'ugiyee, kaye tonɗ ay di gundite ti kane wo ay an di gizite ono Raa.

14Erewo soo ti diinayaɗ sundutú Lidi, tod'te ti geeger Tiyatir, tod' t'isiyo suuk ki juwa zooyatú ooɗe wo tod' t'ottilso a Raa. T'ay di'n ollige kofec kofec wo Galmeega yi-d'ize adda k'addutú, ono Pool geɗ itadaɗ t'anni zuune, t'a ziipe addutú a Isa.

15Saɗ tod' t'a-zuyye batem ti don boytú pay, maɗ t'ay di'n wiike kino, t'ede: «Aame kun zuune nuɗ ni ziipe addó a Galmeega ki kotto maɗ, kun t'edi kun lekka di nuuno.» Wo tod' t'a ziida zakidi, ay d'iyye.

Pool ti Silas adda dangay a Pilip

16Onniyo soo ay t'ette k'ume ton-diyo Raa maɗ, i d'ede uto koɗso bulowo t'ay di'n uuna, tode gette i-d'ede siitan ettú ti di kazita suldi don etto. A munda wede t'an oodibe ita a duwo geɗ, galmaawutú an d'ooniyo soɗko baadaɗ.

17T'a iise daaniya Pool ti kaye, ti rootiyo ti golla awwa, ti d'eesiyo: «Don eɗ kane don naabo ki Raa goole a jiiere pay! An un kaza urzi wede Raa yi dehu y'un di'n utte.»

18Onniyo baadaɗ tod'tiɗ a ita kane, maɗ onniyo soo Pool addi a-tiire, y'a-gime k'ita wo yi-di ruute a siitan ere a ekki erewo gette, y'ede: «Ti suma ere k'Isa Almasi ni di rooto, mi t'addo t'ekk'erewo te!» A kaamiki siitan t'a t'udde t'ekk'erewo te.

19Aame galmaawutú an wolliyo munda wede an ziipe elkiyadaɗ ekki tode an k'ooniyo ye baa maɗ, an ti'n zidde Pool ti Silas, an d'an t'iide ki bere don duuru a daana don booro.

20An d'an t'iide k'ume don deero booro Romenɗ, an di ruute, an'de: «Kane duwo eɗ Yawudiyagi wo an ti lettiyo siidadey.

21An dooyiso urzi k'oogiradaɗ, suldi don kaye Romenɗ ay k'ede urzi ay ki d'oyye, ay ki daane ye.»

²²Wo kane don duuru pay i t'ugiyee gen an d'iizi gulkuwo ti Pool wo Silas, wo kane deero booro Romeŋ an an di ruute, an'de: «Kallagan kun t'oddiwo wo kun'ni kosso ti karre.»

²³Aame an ti'n girpipe maŋ, an di'n ibi dangay, wo an i-di ruute a wede boohiyo don dangay, an'de: «Don en ki'ni booho koduwo.»

²⁴Aame wede boohiyo an i ti ruute inkiŋ maŋ, kane gen y'an d'an t'iide k'adda dangay ere k'adda wo zondaŋ yi-t'ele adda poole.

Wede boohiyo don dangay yi ziipe addi a Isa

²⁵A diddo meeda maŋ Pool ti Silas an tondiwo Raa, an d'oro an tamma Raa, wo don dangay ti doolo an di'n ollige.

²⁶A kaamiki, siido t'a iise nonjirso, mongali don k'eesiyo boy dangay a nonjire, wo boha bindani pay ton a kaamiki a t'ihinte waŋ waŋ, wo zinziri a zon don dangay pay a-dimbe.

²⁷Maŋ wede boohiyo gen y'a iddira, y'a t'inne, yi wolliyo boha ohinte waŋ waŋ, y'elkiyo don dangay an t'umbe. Inkiŋ maŋ y'aa t'iidiba seebir, yi dehu y'a-kiira tuddi.

²⁸Wo Pool y'a idili ti golla awwa, y'ede: «Ay! K'oolo, ki k'iira tudda ye. Kaye pay ede.»

²⁹Inkiŋ maŋ wede gen y'a tunde, y'ede: «Kun oo k'eeli bingee do.» An i eelo maŋ, kesiko yi-t'iide k'adda, yi nonjirso burbur, y'a iire a zon ki Pool ti Silas.

³⁰San maŋ t'adda dangay y'an di'n ude wo y'anni tunde, y'ede: «Kune'ŋ, n'aase mummino n'a t'oone uttiyo te?»

³¹Kane an i-di ruute, an'de: «Ki zaapo adda a Galmeega Isa wo k'a t'ona uttiyo, kee ti don boozá pay.»

³²Maŋ an i-di gizite ono Galmeega a yode wo a don adda boozí pay.

³³A peedo gettiyo batum a diddo meeda, wede boohiyo y'a ti'n wiike y'an t'upile kundayzaŋ, maŋ a kaamiki an ti y' zuyye batem, yode ti don adda boozí pay.

³⁴San maŋ Pool ti Silas y'an d'an d'aahe boozí y'an d'eele ombo, wo yon ulbi unse baadaŋ ti don boozí pay kono an ziipe addaŋ a Raa.

³⁵Wo aame ume i t'umpile maŋ, deero booro Romeŋ an d'igibo guumiyagi an i-di ruute wede boohiyo, an'de: «Ti dangay k'an adde Pool ti Silas me.»

³⁶Maŋ wede boohiyo y'a iide yi di ruute a Pool, y'ede: «K'ollo, deero booro an igibo an'de, n'un ti'n addo. Anken kun t'addo, kun engilo ti toose.»

³⁷Wo Pool y'an di ruute guumiyagi, y'ede: «An ay di'n gusse a daana duwo pay daa k'ollige k'onamey miŋ, para maŋ kaye'ŋ don ti siido Romeŋ. An ay di'n ibi

daŋgay, wo aŋkeŋ an dehu an ay d’eeze kaŋ ombide maŋ, i k’ise ye. Injino maŋ edi kane batum an ay di’n adɗa.»

³⁸Maŋ guumiyagi an iide’ŋ, an an di ruute a deero booro injino. Aame an zuune kaciŋ Pool ti Silas kane ɗoŋ ti siido Romeŋ too maŋ, orgiso t’anni ziida.

³⁹Injino kane batum an d’iide an an t’ize tambobino, maŋ ti daŋgay an di’n uɗɗe wo an an di ruute, an’de: «T’adda geeger kun t’adɗo.»

⁴⁰Aame ti daŋgay an t’uɗɗe maŋ, Pool ti Silas an t’iide ki boy Lidi, a ume geŋ an ti’n wulle zemba ɗoŋ i ziipe addaŋ a Isa wo an an d’eele kooke, saŋ an t’iiziga an d’iŋgile.

Naabo ɗoŋ zina 17

Pool ti Silas a geeger Tessaloni

¹Pool ti Silas an iŋgile ti geeger Pilip maŋ, an t’uɗɗe ti geeger k’Ampipoli ti Apoloni. Maŋ an d’iiney a geeger Tessaloni, a ume geŋ i d’ede boy wede Yawudiyagi ge dooyiso.

²Wo Pool aa yi d’isiyo daayum, y’a t’iide k’adda boy geŋno. Adda suuk aɗo geŋ a onniyo ere ki puukiyo Yawudiyagi maŋ, an di niikutu ti kane ɗoŋ adda a urzi k’ono ɗoŋ an riije ti kaaga adda mattup ki Raa.

³Pool y’an di kazita y’an di sekiŋso kereŋ, yi d’eesiyo: «Mattup ki Raa ti ruute, i dehu Almasi y’a dabira, y’a t’inda, wo y’a-balɗa ti diine ɗoŋ unto me. Wo Almasi Raa yi biire geŋ, yoŋ Isa wede n’un kazita.»

⁴I d’ede Yawudiyagi oŋgo ono geŋ an’ni ziida, an a-t’iide a ita Pool ti Silas. Wo ɗoŋ Girek baadaŋ an ottilso a Raa, ti erayi baadaŋ ɗoŋ sundaŋ ti m’olo toŋ maŋ, an a-t’iide ti kane.

⁵Wo ɗe kane Yawudiyagi ɗoŋ i ki ziipe addaŋ a Isa ye, an di gulbike baadaŋ. Injino maŋ an iide’ŋ an di wiiko ɗoŋ bita i ɗerilsito a urziyagi geŋ, an d’iide baadaŋ, an an t’elite ono an d’iise tarkuuse. Saŋ an t’iide ki boy Zason kono Pool ti Silas an ti’n seɗɗe, an an di’n t’ette ki ɗaana ɗoŋ duuru.

⁶Wo ɗe an ki’n uune ye, injino maŋ an di ziida Zason ti zemba miibi ɗoŋ i ziipe addaŋ a Isa. An d’an t’iide ɗaana ɗoŋ deero ki geeger, wo an d’iise ɗollite, an’de: «Kane ɗuwo eŋ ɗoŋ duniya pay an ti’n digge, aŋkeŋ an iina di kine!

⁷Zason y’a ti’n ziida di yode, wo kane ɗoŋ pay geŋ an ki dehu an ki daane oogoro ki mozigo goole ki Romeŋ ye, an’de i d’ede mozigo goole ti doolo ede, sundi Isa.»

⁸Aame ɗoŋ duuru ti ɗoŋ deero ki geeger an illiga ono geŋno maŋ, addaŋ a litte.

⁹Inkino maɗ kane ɗoɗ deero geɗ an di tunde munda, maɗ Zason ti zamba oɗo an d'iidi bezaɗ an an d'ele ɗoo miɗ, an an d'iize kollo.

Pool ti Silas a geeger Beere

¹⁰A didɗo maɗ kesiko zamba an di'n unzile Pool ti Silas me, an d'ingile ki geeger Beere. Aame an iiney maɗ an t'iide k'adda boy wede Yawudiyagi ge dooyiso.

¹¹Kane Yawudiyagi ɗoɗ a Beere geɗ elkisadaɗ ede a jire ɗoɗ a Tessaloni, an d'ollige Rabila Majjaanawa t'adde soo. Onniyo ti onniyo an di gariya ono ɗoɗ an riine ti kaaga adda mattup ki Raa, kono an dehu an di suune ono Pool yi rootiyo geɗ ɗerec kunuɗ, mummino me.

¹²Doɗ baadaɗ ti diinayaɗ an di ziipe addaɗ a Isa, wo erayi ɗoɗ Girek sundaɗ ti moolo ti kuuli baadaɗ paɗ, an di ziipe addaɗ a Isa.

¹³Wo ɗe aame Yawudiyagi ɗoɗ ki Tessaloni an illiga Pool yi kazita ono Raa a geeger Beere maɗ, an d'iido an an t'elite ono a ɗoɗ duuru, an d'iise tarkuuse aɗgeɗɗo toɗ maɗ.

¹⁴Kesiko zamba ɗoɗ i ziipe addaɗ a Isa an di y'igibe Pool ki biza bar, wo Silas ti Timote an d'uupe a Beere.

¹⁵Zamba ɗoɗ iide agisa ki Pool geɗ, an aa y'igibo bini geeger ki Aten. Wo aame an iiney maɗ, y'an di ruute a ɗoɗ k'agisadi, y'ede: «Aame kun ti gima maɗ, kun an di rootoy aɗ kaɗ Silas ti Timote geɗ, kesiko an di'n t'ona a eɗɗo.» Maɗ kane an di-gime ki Beere.

Pool yo a geeger ki Aten

¹⁶Aame Pool yi delliyo Silas ti Timote a Aten geɗ, yi woliyo maɗ geeger gette i t'uune ti loɗgayi ɗaɗɗal, maɗ i ki d'ize unse ye, addi a litte.

¹⁷Inkino maɗ yi d'ettiyo k'adda boy wede Yawudiyagi ge dooyiso, an di niikiyto ti Yawudiyagi wo ti ɗoɗ Yawudiyagi ye an ottilso a Raa. Wo a bere ɗoɗ duuru toɗ, an di niikiyto daayum ti ɗuwo ɗoɗ i lekkiyo aɗgeɗɗo.

¹⁸A ume geɗ i d'ede ɗoɗ ede kane ɗoɗ suuniyo k'ono, oɗo an daaniya ita wede suuniyo k'ono sundi Epikuris, oɗo a ita wede suuniyo k'ono sundi Zeno, an di niikiyto ti Pool. Wo yo yi kazita Rabila Majjaanawa k'Isa wo a urzi baldiyadi. Aame ɗuwo an illiga inkino maɗ, ɗoɗ oɗo an di ruute, an'de: «Yi bakkiya toɗ moo me?» Wo ɗoɗ oɗo an'de: «Yi kazita ono raayagi ɗoɗ a siido kine ye.»

¹⁹Inkino maɗ an ti y' wiike an di-t'iide k'ekki makkolo ere daayum ɗoɗ deero siido an towwo onamaɗ, wo an di ruute, an'de: «Urzi k'onama ki dooyiso aware eɗ, kaye ay di suune itadaɗ ko?»

²⁰Kee k'ay kazita suldi ɗoɗ ay ki'n suune ye, wo aɗkeɗ ay dehu ay di suune koduwo i-kaza munda me.»

- 21**An rootiyo inƙino kono ɗoŋ geeger k'Aten pay ti torgagi ɗoŋ i lekkiyo adda siido toŋ, an lekkiyo ti tōwwo taaya ɗaŋŋal wo a ollige ki rabila ere aware.
- 22**Inƙino maŋ Pool y'a t'iiziga a ɗaana deero ɗoŋ siido, wo y'an di ruute y'ede: «Kune ɗoŋ geeger k'Aten no, a sulɗi pay geŋ ni wolliyo maŋ kun seedu zakidi miŋ a urzi raayaguŋ.
- 23**Aame ni sooru adda geegirguŋ ette ni wolliyo sulɗi baadaŋ aa raayaguŋ ɗoŋ kun d'ottilso eego, wo ni wulle ume sedefe soo geŋ raaniya eego'ŋ: "Ki raayusu wede in ki y' suune ye." Inƙino maŋ kun ollo, nuŋ n'un di kaza ono ki raayusu wede kun i-d'ottilso wo kun ki y' suune ye eŋŋo.
- 24**Raa wede ikkima duniya ti sulɗi pay ɗoŋ adda geŋ, yoŋ Galmeega ki kandaane ti siido. Yoŋ yi ki lekkiyo ye adda boyɗi ɗoŋ ɗuwo an okkime ti bezaŋ me.
- 25**Wo yi ki dehu ɗuwo an i gi di naabe ɗo ye, yoŋ munda tuuku toŋ yi ki dehu ye, kono yode ɗaŋŋal wede in eliyu puukiyo ere in di lekkiyo ti sulɗi ɗoŋ pay me.
- 26**Wo yoŋ Raa yi d'ikkima wedusu soo, wo t'urzi yode geŋ ita ɗuwo pay ette t'a iido kono an di lekke a siido pay. Ozzine y'a ti y' ɗikkida, wo y'an t'ihinte y'irwagi ki siidiyagi ɗoŋ an di lekka.
- 27**Raa y'ize inƙino kono ɗuwo an di y' dehe, kaŋ totirso toŋ maŋ an di y' t'oone, kono geŋ ki kotto yoŋ dokki ye ti wede tuuku ti diinayiŋ me.
- 28**Geŋ ono eŋ in suune: "T'urzi yode kine in di puukiyo, in di sooru, wo in di lekkiyo." Aakede ɗoŋ suuniyo k'ono oŋgo ti diinaguŋ toŋ an'de: "Kine in iido ti Raa."
- 29**Inƙino aa kine in iido ti Raa geŋ, in ki d'elke Raa aa yoŋ longusu wede ɗuwo an okkime ki dap, ki maala gurus ise ki moŋgali ti tirdikadaŋ geŋŋo ye.
- 30**Aha inƙino ye, ti kaaga ɗuwo Raa an ki y' suune ye, wo y'a dihe yi-ki ti'n t'ele ɗaŋgay ye. Wo aŋkeŋ yi waaku ɗuwo pay t'ume tuuku toŋ maŋ an di-kime lekkiyadaŋ.
- 31**Geŋ Raa yi biire onniyo soo y'a-ɗekka booro a ɗoŋ duniya pay, wo y'isiyo inƙino t'urzi wede ede yi biire a ɗekka booro ere ki diine me. Yoŋ geŋ wede y'a ti y' bilɗe ti diine ɗoŋ unto, geŋ munda wede i-kaza yode geŋ wede Raa yi y' biire.»
- 32**Aame ɗoŋ i t'ugiye geŋ an illiga Pool yi ruute a urzi k'unto ti baldiya maŋ, ɗoŋ oŋgo an d'iise okko maadayi wo ɗoŋ oŋgo an i di ruute, an'de: «Kaye ay dehu soŋŋo maŋ onamaŋ geŋ ay di'n olliga ki koɗuwo kollo.»
- 33**Inƙino maŋ Pool ɗoŋ i t'ugiye yi'n iili, y'a inƙile.

³⁴Wo don ongo an aa t'iide ti yode, an di ziipe addan a Isa. Ti diinayan Denis, yon wede ti diine deero siido, wo erewo sundutu Damaris, wo don ti doolo ton ede.

Naabo don zina 18

Pool yo a geeger Korent

¹San man Pool ti Aten y'a t'iiziga, y'a t'iide geeger Korent.

²A Korent gen yi d'uune Yawudusu sundi Akilas an y'ehe a siido Pontus, wo y'aaniya ti siido k'Itali kane ti eddi sundutu Pirusil, kono Kilood mozigo goole ki Romen yi d'ize oogoro a Yawudiyagi pay an t'adde ti geeger Room te. Man Pool y'a-ti giyye ti kane.

³Wo yon naabadi aa ki Akilas gen, yi lekkiyo ti kane an di naabiya yeppiyo tanda ki bindani ti kane kan soo.

⁴Daayum a onniyo ere ki puukiyo Yawudiyagi man, Pool yi-t'ettiyo yi kazita adda boy wede Yawudiyagi ge dooyiso, yi niikiyo ti Yawudiyagi wo ti don Girek, wo yi dehu an di-kimo a urzi k'ono Raa.

⁵Aame Silas ti Timote an iina ti Maseduwan man, Pool y'a ili peedadi pay a kazita k'ono Raa, y'an di kazita a Yawudiyagi, y'ede Isa yon Almasi Raa yi biire.

⁶Wo kane Yawudiyagi an di-tuuge, an d'iise kalditadi. Inkin man Pool y'a-rittige kallagi wo y'an di ruute, y'ede: «Nun sibe ti gollado ni ti y' dikke puuzagun t'ooa a eggun, nun adda ye. Ti anki en nun ni t'ette ki tukki don Yawudiyagi ye.»

⁷Man Pool ti ume gen y'a t'udde, y'a t'iide di wede sundi Titiyus Zistus, yon gen y'ottilso a Raa, boozita ita waaya ti boy wede Yawudiyagi ge dooyiso me.

⁸Aame gen goole boy wede Yawudiyagi ge dooyiso, sundi Kirusipus, y'a ziipe addi a Galmeega ti don boozita pay. Don geeger Korent don illiga ono Pool ton, baadan an di ziipe addan a Isa wo an di zuyye batem.

⁹Onniyo soo a diddo man Pool i-d'iido munda aa suniye, wo Galmeega yi di ruute, y'ede: «Kee k'orgide ye a don en me, ki kazita ono Raa me k'anniga ye.

¹⁰Nun ti kee, wenda soo ton y'a-ga da botta ye k'isiyo k'ulso me, kono adda geeger ette nun donzo'ng baadan.»

¹¹Inkin man Pool y'a likke adda geeger Korent ozzine ti tere zoot, y'a duuyite ono Raa a don pay.

Pool a daana goole siido Galiyon

¹²Aame Galiyoŋ yoŋ Romenŋ goole siido ki Akayi geŋ, kane Yawudiyagi an di gitte onamaŋ kaŋ soo an di seeda Pool. An yi ziida maŋ, an di-t'iide k'ume deero booro,

¹³wo an di ruute, an'de: «Wede eŋ yi ti'n argu duwo an d'ottila a Raa t'urzi wede ti doolo aa ki oogoro ti ki rootiyo ye.»

¹⁴Para'ŋ Pool yi dehu y'a t'ihina bizi y'a roote, miŋ Galiyoŋ y'an di ruute, y'ede: «Kune Yawudiyagi no, aame wede eŋ y'ize munda wede ulsu, koo ise yi ti daggiya duwo maŋ, kesiko booro n'un t'ise.

¹⁵Wo de kun niikiyto a urzi dooyiso, a sumbiyagi duwo wo a urzi k'oogiragun maŋ, geŋ a wollo kune baa, nuŋ ni k'aane ni ki koone booro ki suldi geŋno ye.»

¹⁶Wo t'ume booro Galiyoŋ y'an di'n igibe.

¹⁷Inkino maŋ kane doŋ duuru geŋ, goole boy wede Yawudiyagi ge dooyiso sundi Susten, an di y' ziida, an di y' gusse a daana doŋ booro, wo de Galiyoŋ y'a t'iidiba eedi.

Kama ki Pool k'Antiyos siido Siiri

¹⁸Pool y'a likke onniyto baadaŋ sey a Korent me, saŋ zamba yi'n iili, y'a t'iide biza bar ki geeger Saŋkire, an a-giy'ye ti Pirisil wo Akilas. A ume geŋ eedi y'a-guuke, kono yi ruute yi-d'isa munda a Raa wo ankeŋ y'a ti dinge baa. Saŋ an digili adda tooko, an d'engile ki siido Siiri.

¹⁹An iiney a geeger k'Epez maŋ, Pirisil ti Akilas Pool yi'n iili angenno, wo yoŋ y'a t'iide k'adda boy wede Yawudiyagi ge dooyiso, an di niikiyto ti kane Yawudiyagi.

²⁰Kane an di y' tunde y'a-lekke ti kane, miŋ yoŋ y'ede: «Aha, nuŋ ni ki lekka ye.»

²¹Wo y'an di'n iili, y'a ruute y'ede: «Raa yi dehu maŋ, saŋ n'a kimo.» Wo y'a ingile k'Epez ti tooko.

²²Aame Pool y'iiney a geeger Sezare maŋ, y'a t'iide ki poone ki Zeruzalem y'a t'eeso doŋ ogiyo ti suma k'Isa, saŋ y'a-diige ki geeger k'Antiyos siido Siiri.

²³A Antiyos yi likke onniyto miibi, saŋ y'a-gime yi t'udde ti siido Galat, y'a tukey siido Pirizi, y'an d'eelite kooke a kane pay sanalliyagi k'Isa.

Apolos a geeger k'Epez ti Korent

²⁴A ume geŋ i d'ede Yawudusu sundi Apolos, yoŋ an y'ehe a geeger k'Alegzandiri, y'a iina Epez. Yoŋ ono doŋ an riŋe ti kaaga adda mattup ki Raa, yi'ni suune koduwo wo yi rootiyo beehiye.

²⁵A urzi Galmeega geŋ duwo an yi duuye baadaŋ, yi kazita t'adde soo, yi dooyiso ti derec a urzi k'Isa me, wo yi suune suyiyo batem ere ki Zaŋ danŋal.

²⁶Adda boy wede Yawudiyagi ge dooyiso, yi kazita daa k'orgiso ono Raa me. Wo aame Pirisil ti Akilas an y'illiga maṅ, an ti y' wiike ti kane, an i-di gizite koduwo d'erec ki Raa te.

²⁷Saṅ maṅ Apolos y'a dihe y'a t'ette ki siido k'Akayi, iṅkino maṅ zemba an i-d'eele kooke, wo an an di riṅe mattup a sanalliyagi k'Isa a siido k'Akayi kono an di y' seeda bey sire. Aame y'iiney a ummey maṅ, an t'ize beehiye baadaṅ a kane doṅ i ziipe addaṅ a Isa t'urzi beeko ere ki Raa me.

²⁸Ti Yawudiyagi an di niikiyto, y'an di gize kereṅ t'urzi k'ono doṅ an riṅe ti kaaga adda mattup ki Raa: Isa yoṅ Almasi Raa yi biire. Iṅkino maṅ a elkisadaṅ gette y'an di ruute a daana duwo pay, y'ede: «Kune kun digge.»

Naabo doṅ zina 19

Kama ki Pool ki Epez

¹Aame Apolos yo a Korent geṅ, Pool yi-t'udde ti siido k'Aazi ere adda moṅgali, y'a iiney Epez. Aṅgeṅ an d'ikkima ti sanalliyagi k'Isa oṅgoṅ,

²wo y'anni tunde, y'ede: «Aame kun ziipe addugunṅ a Isa geṅ, Unde Kamileṅ kun uune dey ko?» Maṅ kane an di'n gime onamí, an'de: «Kaye ay k'illiga ye Unde Kamileṅ ede toṅ maṅ.»

³Iṅkino maṅ Pool y'anni tunde, y'ede: «Suyyiso batem ere tuuku kun uune te?» Kane an di'n gime onamí, an'de: «Ay uune suyiso batem t'urzi dooyiso ere ki Zaṅ.»

⁴Pool y'an di ruute, y'ede: «Ti kaaga Zaṅ yi zuyye batem doṅ k'Izirayel kono a kize an di-kime lekkiyadaṅ, wo soṅ y'an di rootiyo an zaapo addaṅ a wede etto k'itadí, yoṅ Isa.»

⁵Aame an illiga iṅkino maṅ, an di zuyye batem ti suma Galmeega Isa.

⁶Pool y'an di ziipe bey a eedaṅ, wo an d'uune Unde Kamileṅ. Iṅkino maṅ an d'iise orbe t'ono doṅ doolo, wo an di rootiyo ono doṅ Raa y'igibo.

⁷Kane pay doṅ i zuyye batem geṅ kuuli suma koomat makumu sire.

⁸Adda tere ado geṅ, daayum Pool yi-t'ettiyo k'adda boy wede Yawudiyagi ge dooyiso, yi rootiso daa k'orgiso. Yi kazita urzi Moziko Raa, yi dehu y'an ti'n kimo k'urzi geṅṅo doṅ i y'ollige me.

⁹Wo de Yawudiyagi oṅgo an ki dehu an ki y'olliga ye, an di-tuuge ki zaapu k'addaṅ a Isa me, a dooyisadí ere a urzi Galmeega gette an di y'okko maade a daana duwo pay. Iṅkino maṅ Pool y'an di'n iili, y'a wiike kane sanalliyagi k'Isa, yi di'n dooyiso daayum adda boy ki lokkon ki wede soo sundí Tiranus.

¹⁰Geɗ y'anni duuye ozzine sire, iŋkino maɗ kane pay doŋ siido k'Aazi, Yawudiyagi ti doŋ Yawudiyagi ye, an d'illiga ono Galmeega me.

Iɗɗi Seba kane sarat

¹¹Raa yi d'isiyo sulɗi k'armika doŋ k'a seeda gaggirá t'urzi Pool.

¹²Iɗkino maɗ an d'ambu kalle koo ise buude koo maɗ i butte tukki Pool, saɗ an'tiyo an an bottiyo a tukki doŋ k'eeni, maɗ kane geɗ an d'ooniyo bee, wo kane siitandani toŋ an t'adɗiya ti eedaɗ me.

¹³A ume geɗ i d'ede Yawudiyagi an sooru ti zindaɗ an d'ettiyo ume ti ume, an di lommite siitandani ti tukki doŋ k'eeni. Iɗkino an di'n nîime lommite ti suma Galmeega Isa pay, a siitandani wede tuuku toŋ yi d'eesiyo: «Ti suma k'Isa wede Pool yi-kazita, ni rootiyo kun t'adɗo!»

¹⁴Doŋ isiyo iɗkino geɗ kane iɗɗi sarat ki Seba, yoŋ Yawudusu ti diine deero doŋ seɗeke.

¹⁵Onniyo soo siitan t'an di ruute, t'ede: «Isa ni y' suune, wo Pool toŋ ni y' suune, wo ɗe kune miɗ kune aɗ wee wee?»

¹⁶Wo wede i-d'ede siitan a eedí geɗ y'a t'iiziga, y'anni zikke, y'iide y'an ti'n tiiza pay kono yoŋ yi jiire kane, y'an d'ize ulsu, an d'ukkite bontiliɗ t'adda ɓoozí me, tuddaɗ kundayi jerem.

¹⁷A munda wede ize geɗ, doŋ pay k'Epez, Yawudiyagi ti doŋ Yawudiyagi ye an illiga maɗ, orgiso t'anni ziida pay wo an d'imme gooliko ere ki suma Galmeega Isa.

¹⁸Doŋ baadaɗ ti diine doŋ i ziipe addaɗ a Isa an d'ettiyo an t'oodibe addaɗ, wo an tondiyo tambobino a ɗaana duwo pay a oldikadaɗ ere an ize gette.

¹⁹Wo ti diine doŋ i sokiyo d'indoriyo geɗ, doŋ baadaɗ an di ziki mattupiyagi ki d'indoriyagaɗ, an t'igge a ɗaana duwo pay. An di-gize zooye mattupiyagi geɗ suma tamma dupu ada paat.

²⁰Geɗ iɗkino ti toogo ere ki Galmeega, ono Raa i d'ettiyo ɗaana ki ɗaana ti toogo ere i ceeriyo baadaɗ.

Tarkuuse baadaɗ a Epez

²¹Aame sulɗi geɗ i t'ingile maɗ, Pool t'urzi k'Unde Raa y'a dihe y'a t'ette Zeruzalem, wo ki poone y'a adɗe ti siido Maseduwan, y'a t'ookey Akayi. Wo y'a ruute, y'ede: «N'iiney Zeruzalem maɗ, i dehu n'a aaney a geeger Room pây.»

²²Iɗkino maɗ yi d'igibe ki ɗaanadí doŋ noogiyadí sire, Timote ti Erasta an d'ingile ki Maseduwan, wo yode batum y'a likke onniyo miibi a siido k'Aazi me.

²³Aame geɗ doŋ k'Epez an d'iiziga tarkuuse baadaɗ ki kulkuwo a urzi Galmeega.

24A ume geɗ i d'ede wede sundí Demetirus, yoŋ wede naabo maala yi d'okkimte boydi sunni sunni ki maala gurus, i deey'iso boy wede goole ki raayawa sundutú Artemis, doŋ pay an d'ottilso. Inkiŋo maŋ Demetirus ti doŋ naabadí an d'ooniyo soŋko baadaŋ ti naabadaŋ gette.

25Onniyo soo y'an ugiye doŋ naabadí ti doŋ an naabiya kaŋ soo geɗ, y'an di ruute, y'ede: «Laŋziyagi ki nuŋ, kun suune kine in t'ize doŋ bey miŋ ti naabadiŋ ettiyo.

26Wo aŋkeŋ kun ollige wo kun wolliyo munda wede isiyo eŋ me. Yo Pool geɗ doŋ baadaŋ yi'n ti'n kama k'urzi yode, y'an di rootiyo, y'ede: "Raayagi doŋ duwo an okkime ti beezaŋ geɗ, kane raayagi ye." Y'isiyo inkiŋo a enno daŋŋal ye, wo a omagi baadaŋ ki siido k'Aazi pay.

27Naabo yode gette t'iida ki daana maŋ, duwo an di-kiigira naabadiŋ te, wo naabo kine daŋŋal ye, an di kiigira boy raayawa ere meeda sundutú Artemis, a t'isa aa munda ki bita. Inkiŋo maŋ meedikatú t'a dagga, tod'te raayawa ere duwo pay adda siido k'Aazi an i-d'ottilso, wo adda duniya pay ette.»

28Aame kane doŋ naabo pay an illiga ono doŋ Demetirus yi ruute geŋno maŋ, an di kulkuwe, an d'iise dollite, an'de: «Raayawa Artemis ki doŋ k'Epez, tod'te meeda!»

29Taŋ booloŋ maŋ doŋ duuru eedaŋ t'a iide, kane doŋ geeger pay geɗ an di gulkuwe, wo an ti'n zidde Gayus ti Aristarko me, kane ti Maseduwan, an iido ti Pool kaŋ soo. An d'an t'iide ki bere doŋ duuru.

30Inkiŋo maŋ Pool yi dehu y'a ette ki daana doŋ duuru y'a rootey ono, wo kane sanalliyagi k'Isa an i di-tuuge.

31Wo kane laŋziyagi Pool geɗ, doŋ deero ki naabiyagi adda siido k'Aazi toŋ, an i-d'igibo a yode an'de, y'etta ye ki bere doŋ duuru me.

32A ume geɗ a iizi tarkuuse baadaŋ sey adda diine doŋ duuru me, doŋ oŋgo an dollite keŋno, doŋ soŋ an dollite k'ummey, wo doŋ oŋgo baadaŋ urzi an ugiye ki munda toŋ an ki suune ye.

33Inkiŋo maŋ i d'ede wede sundí Alegzandire, yo kane Yawudiyagi oŋgoŋ an di y' ŋaay'u ki daana y'a roote ono a duwo, wo doŋ oŋgo ti diine doŋ duuru an i di t'iide taaya a urzi k'ono geŋno. Inkiŋo y'an d'ize likuw ti beezí, yi dehu y'an di roote a doŋ duuru geɗ me.

34Wo de aame kane doŋ k'Epez geɗ an zuune Alegzandire Yawudusu maŋ, an d'iise dollite pay onamaŋ kaŋ soo suma peedo sire, an'de: «Raayawa Artemis ki doŋ k'Epez, tod'te meeda!»

35An idilti kee maŋ, i d'ede wedusu yoŋ wede raaniya ki suldi pay adda geeger geɗ, y'a iine y'an inniga, wo y'an di ruute, y'ede: «Kune doŋ k'Epez geɗ, duwo

pay an suune kine don geeger k'Epez, kine don boohiyo boy k'Artemis tod'te meeda, wo ki mokkilsatú ere iiro ti kandaane.

³⁶Geñ wenda soo toñ a niike umbo, inkiño mañ kun t'asso wo kun t'elko koduwo a munda wede kun dehu kun d'ise me.

³⁷Duwo eñ kun ti'n zidfo kenno, an un k'uugiro munda t'adda boy raayawa ye, wo an ki gildite raayawa kine ye.

³⁸Wo aame Demetirus ti don an naabiya kañ soo geñ an d'ede ono a tukki wenda mañ, onniyo booro ede, an d'ette k'ume don dekkiyo booro, an an di t'ide taaya.

³⁹Wo un d'ede munda ti doolo toñ mañ, an di tonde don duuru don i woliyo urzi k'oogoro, an di'n okkima ono me.

⁴⁰Aame kun k'ooli ye mañ, in t'oono ono, Romeñ an t'eesa kine in kulkiso ti kane a ogiyo ere anki ette. Inkiño a ogiysadiñ ette urzi in ki t'oono ye, in an di roota adda a-t'assa me.» Aame wede geñ y'a ti dinge onamí mañ, y'an di ruute a don duuru, y'ede: «Kun ti teepo.»

Naabo don zina 20

Pool yo a Maseduwan wo a siido Gires

¹Aame don k'Epez kulkuwadañ i t'isse mañ, Pool sanalliyagi k'Isa y'an ugiye y'an d'eele kooke. Mañ y'an t'ize toose, yi'n iili, y'a ingile ki siido Maseduwan.

²Aame yi doopide Maseduwan geñ, sanalliyagi don y'ooniyo a daanadí, y'an d'eeliyo kooke baadañ. Sañ y'a iiney a siido Gires,

³añgeñ y'a likke tere ado. Sañ mañ y'a dihe yi di kili adda tooko, y'a engile ki siido Siiri, wo mañ y'a illiga kane Yawudiyagi an i-t'ikke a urzi. Inkiño mañ y'a dihe y'a-tooye y'a adde ti Maseduwan.

⁴Kane don a itadí geñ, kane Sopater ulo ki Pirus ti geeger Beere, Aristarko wo Segondus ti geeger Tessaloni, Gayus ti geeger Derbe, wo Timote, Tisik wo Tiropim kane ado geñ ti siido k'Aazi.

⁵Kane geñ an ay d'uugume, an d'ingile an ay di'n delley a geeger Tirowas.

Pool yo a geeger Tirowas

⁶Wo kaye'ñ tarnaape mappa daa k'orme ay d'ize a geeger Pilip. Aame onniyo tarnaape mappa daa k'orme ti t'ingile mañ, ay di gili adda tooko, ti geeger Pilip ay d'ingile. Onniyo paat ki daana mañ, sañ donzey ay di'n uuney a Tirowas, añgeñ ay d'ize onniyo sarat.

⁷A onniyo ere ki puukiyo Yawudiyagi a tukki lohe maṅ, ay t’ugiye ay d’iimi kaṅ soo mappa wede i-kaza tudde k’Isa me. Wo kono soggo yo Pool y’engila geṅ, y’an di gizite ono a zemba, y’a gizite bini diddo meeda.

⁸Adda biino ere t’awwa t’ekki bakatú kaye ay t’ugiye geṅ, lampiyagi baadaṅ oyyisito.

⁹Aame geṅ i d’ede ulo sundí Itus yi-guune a pineetir, y’ollige Pool yi kazita. Wo yo Pool geṅ yi k’ôhire ye, yi kazita yi kazita, maṅ ulo geṅ edayí i ziiḍa moone, y’a udige kuy. Inḱino t’awwa ti boy wede k’aduwe geṅ yi-t’uubo, y’a iire siido. Wo i d’ede wede ede yi y’iiziga maṅ, y’inda.

¹⁰Inḱino maṅ kesiko Pool yi-ti diige, y’a iide k’ume k’ulo geṅno, y’aa d’uttile y’a ti y’ ziiḍa giggirí, wo y’a ruute, y’ede: «Ulbuguṅ un t’oode ye, ulo’ṅ puukiyadí to ede.»

¹¹Saṅ maṅ Pool y’a-gili k’awwa k’umayí, y’a t’umbe mappa, y’an di burkite an t’iimi, wo Pool y’a iise kazita sey bini ume y’a t’umpile. Saṅ maṅ y’a inḱile.

¹²Wo yo obulsu geṅ aame an ti y’umbe zeere yi biygile maṅ, an di y’igibe a boozí, wo kane duwo pay geṅ addaṅ a t’udige kollo.

Pool ti Tirowas y’ambe ki Mile

¹³Saṅ maṅ kaye ay yi-d’uugume a Pool me, ay di-gili adda tooko, ay d’inḱile ki geeger k’Assos, ume ay di y’ delley aa yoṅ yi dihe, kono yi dehu y’a ozire ti zoṅdí.

¹⁴Geṅ a Assos Pool y’ay di’n uuney, maṅ pay kaṅ soo ay di-gili adda tooko, ay d’inḱile geeger Mitilen.

¹⁵Ti Mitilen ay d’inḱile, soggo ay d’iiney a siido ere a diine k’ahu sundutú Kiyos. Onniyo sirwe maṅ ay d’iiney a siido ere a diine k’ahu sey sundutú Samos, wo onniyo k’aduwe ay d’iiney a geeger ki Mile.

¹⁶Urzi k’Epez ay d’iili, ay d’inḱile t’urzizey kono Pool yi ki dehu yi k’ôhira a Epez, kono yi gi di t’ôssa a siido k’Aazi ye. Yi dehu y’a aaney kesiko a Zeruzalem, y’a d’aaney a tarnaape Pantekot ki Yawudiyagi.

Toose ki Pool a doṅ dokkiyo ti Epez

¹⁷Aame ay iiney a Mile maṅ, Pool yi d’igibe wedusu ki Epez y’an di kizo a doṅ dokkiyo doṅ ogiyo ti suma k’Isa, y’ede: «Kun’do, kun di t’oona a Mile.»

¹⁸Aame doṅ dokkiyo an iina a sirpadí maṅ, Pool y’an di ruute, y’ede: «Kun ollo, kune kun ti suune lekkiyo ere ki nuuno te, kono nuṅ ni likke a diinaguṅ ti onniyo ere ki poone n’iina adda siido k’Aazi me.

¹⁹Nuṅ ni niibe a Galmeega a diinaguṅ me ti ottilso baadaṅ, ti môolo wo ti dabar ere ki Yawudiyagi kane an o koniyo eego.

- 20** Kun suune nuɲ n'un ti gizite, wo n'un ti'n duuye pay, munda umbo n'un k'ingga ye, wede aase beehiye a kune me, ise a daana duwo pay, ise adda boydugun toɲ maɲ.
- 21** Nuɲ n'an gizite a Yawudiyagi wo a doɲ Yawudiyagi ye, an di-kime lekkiyadaɲ a daana Raa wo an zaape addaɲ a Galmeegiɲ Isa Almasi.
- 22** Wo aɲkeɲ n'engile ki Zeruzalem, kono nuɲ i ni dokkiyo Unde Kamileɲ ni d'oyyiso, wo ni ki suune ye munda wede a ummey o aaney a eedó me.
- 23** Wo adda geegiryagi doɲ pay n'ettiyo geɲ, Unde Kamileɲ t'o kaza daɲgay ti dabar baadaɲ an ni delliyo.
- 24** Wo nuɲ lekkiyadó a duniya ette i ki n'ooɲiso ye. Munda wede i n'ooɲiso'ɲ, naabo ere Galmeega Isa y'o ele gettiyo, n'a ti naabe bini daɲgutú: n'a kizite urzi Rabila Majjaanawa, mummino i-kaza Raa yoɲ wede beeko me.
- 25** Derec, kun suune ni likke a diine kune pay, n'un di gizite urzi Moziko Raa, wo ti aɲki ki daana eɲ nuɲ ni-suune kun ki n' wolla ye baa.
- 26** Kono kamo kun ollo koduwo ti aɲki n'un di rooto, aame wede yi digga t'urzi Raazí maɲ, nuɲ adda ye,
- 27** kono n'un ti gizite pay munda wede Raa y'ilke ti poone y'aasa me, munda umbo n'un k'ingga ye.
- 28** Inɲkino maɲ kun koonaa mentikagi a urzi lekkiyaguɲ, wo a tukki toráo pay ere ki Raa ogiyso ti suma k'Isa. Tode gette Unde Kamileɲ t'un t'ele kun di'n dokke, kun t'elso aa dambami doɲ Raa y'iwila t'urzi puuzo k'Ulí Isa.
- 29** Nuɲ ni suune, aame n'un iza umbo maɲ doɲ ulpi an t'etta diinaguɲ, an un d'isa ulsu aa sullibagi an t'ettiyo adda diine toráo.
- 30** Wo doɲ oɲgo ti diinaguɲ toɲ an di dooya rabila ere k'a t'eese derec, an di rooɲa adde sanalliyagi oɲgo, an di'n daana.
- 31** Inɲkino maɲ kun lekko zeere, wo kun elko: aame nuɲ di kune adda k'ozzine ado geɲ, didáo wo oɲnu n'a-t'íile toɲ ni k'iili ye, wede tuuku ti diinaguɲ t'eeliyo kooke me.
- 32** Wo aɲkeɲ nuɲ n'un di'n oolo a bey Raa, wo a onamí doɲ a urzi beekadí. Kane ono Raa geɲ an un di'n isa doɲ toogo a urzi zaapu k'adduguɲ a Isa, wo t'urzi k'ono Raa kun t'ooney suldí doɲ Raa yi boohiyo a doɲzí pay.
- 33** Nuɲ ni ki ziipe ye addó a maala gurus, a dap, ise a kalle wenda soo toɲ maɲ.
- 34** Kune batum kun suune, nuɲ ni niibe ti beezó, ni d'ooniyo munda a lekkiyadó te wo ti doɲ pay a itadó.

³⁵A suldi donj pay n'ize geŋ, n'un gizite beehiye in di naabe in di nooge donj an k'ede munda ye, wo in elko a ono donj Galmeega Isa yi ruute, y'ede: "Uŋsuwo baadaŋ a jiire a wede y'eliyo munda, ti wede an i eliyo munda."»

³⁶Aame Pool y'a ti diŋge onamí maŋ, y'a dikke ti kane pay wo y'a tunde Raa.

³⁷Iŋkino maŋ kane pay an d'iise mōolo, wo wede tuuku toŋ yi di y' seedu giggeri yop, yi-d'eeziyo d'eeziyo kono an ki t'ikkima ye baa.

³⁸Kane an t'ize sommagi dondonj a onamí donj yi ruute, y'ede: «Ti aŋki ki daana eŋ, nuŋ kun ki n' wolla ye baa» geŋ me. Saŋ maŋ an aa di y'igibe bini y'a di-gili adda tooko.

Naabo donj zina 21

Kama ki Pool ki Zeruzalem

¹Aame zamba ay'n iilo maŋ, ti tooko ay d'iŋgile delele ki geeger Kos. Soggo maŋ ay d'iŋgile ay d'iiney a geeger Rood, wo tiŋ geŋ ay di dŋige biza bar ki geeger Patara.

²Aŋgeŋ ay d'uune tooko ti doolo t'ambe ki siido Pinisi, ay di-gili adda tooko gettiyo, ay d'iŋgile.

³A eŋgilsadey gette, siido ere a diine k'ahu sundutú Siipire gette, ay di wulle ki kese beezey geelo, iŋkino maŋ ay d'iŋgile ki siido Siiri. Ay iiney a geeger Tir maŋ, ay di dŋige kono an di-deggite suldi suuk donj adda tooko aŋgeŋno.

⁴A ume geŋ ay d'uune sanalliyagi, ay di likke ti kane onniyo sarat. Unde Kamilen t'an di gize a munda wede i-aaney a Pool a Zeruzalem me, iŋkino maŋ a Pool an i di ruute, an'de: «Kee k'ette ye ki Zeruzalem me.»

⁵Aame ŋide onniyo sarat maŋ ay t'iiziga, wo zamba ti erayzaŋ ti iŋnizaŋ pay an ay di'n igibe bini ay t'udde ti geeger. Maŋ ay d'iiney biza bar, aŋgeŋ ay t'uttile ay tunde Raa.

⁶Saŋ ay a-ti zidde bey ti tuddey, maŋ ay di-gili adda tooko, wo kane an di-gime ki boydizaŋ.

⁷Kaye torguwadey ere adda k'ahu ti Tir ay a-ti diŋge a geeger Petolmayi. Aŋgeŋ zamba ay di'n iisite, wo di kane ay d'inne onniyo soo.

⁸Soggo maŋ ay d'iŋgile, ay d'iiney a geeger Sezare, aŋgeŋ ay t'iide a boy ki Pilip wede kazita Rabila Majjaanawa, ay di dŋige di yode, ay di likke aŋgeŋno. Yode wede ti diine donj sarat an biire a Zeruzalem.

⁹Yo wede geŋ i-d'ede iŋni konazi pide, kane geŋ an rootiyto ono donj Raa y'agisa.

¹⁰Aŋgeŋ ay likke onniyto baadaŋ, maŋ nebi sundí Agabus y'a d'iina ti siido Ziide.

11Y'iido y'ay di'n uuna, y'a t'umbe ser wede ki Pool geɗ, y'a-gitte zoŋ ti bey ki yode batum, wo y'a ruute, y'ede: «Enno ono doŋ Unde Kamileŋ ti rootiyo: Wede ser eŋ, Yawudiyagi an ti y' kettey kino a Zeruzalem me, wo an an di y' t'eley a bey doŋ Yawudiyagi ye.»

12Aame kaye ti zamba doŋ a Sezare pay ay illiga iŋkino maŋ, ay yi d'obe bey a Pool kono ki Zeruzalem y'a k'ette ye.

13Iŋkino Pool y'a ruute, y'ede: «Ki moo me kun mōolo me, geɗ kun oo ti dekkiyo biza k'ulbó? Nuŋ n'iyye ki kettisadó daŋŋal ye, wo soŋ n'iyye n'a t'indey a Zeruzalem kono suma Galmeega Isa geɗ me.»

14Kaye onamey yi-tuuge geɗ, iŋkino maŋ ay gi di gidɗima ye, wo ay'de: «Galmeega yi t'iso munda wede yi dehu me.»

15Aame ay inne onniyo miibi a Sezare maŋ, ay t'ikkima tuddey, ay t'iizigo ay digili ki Zeruzalem.

16Sanalliyagi miibi ti Sezare an ayn'igibe, an ay di'n t'iide di wede sundí Nanson, yoŋ ti siido Siipire, ti diine doŋ ti poone i ziipe addaŋ a Isa too. Geɗ di yode ay di d'iige, ay d'inne me.

Pool di Zak a Zeruzalem

17Aame ay iiney a Zeruzalem geɗ, zamba an ay di'n ziida t'ulbe uŋse.

18Wo soggo maŋ Pool ti kaye pây ay t'iide wolleyo Zak a boozí, wo di yode geɗ ay di'n uune kane pay doŋ dokkiyo ki doŋ ogiyo ti suma k'Isa an t'ugiye.

19Aame ay ti'n iisite maŋ, Pool y'an t'iide taaya soo soo a suldi doŋ pay Raa y'ize t'urzi naabo yode a diine doŋ Yawudiyagi ye.

20Aame an t'illiga onamí maŋ, kane pay an d'imme Raa. Saŋ an i di ruute a Pool, an'de: «Leemadey, kee ki wollo do, Yawudiyagi dupiyagi miibi doŋ i ziipe addaŋ a Isa wo i seedu zakidi a urzi k'oogoro Muusa me.

21Kaciŋ kane an illiga oniyapi a tukki kee me, an'de kee ki kazita a Yawudiyagi pay doŋ i lekkiyo a diine doŋ Yawudiyagi ye, an d'ooli urzi k'oogoro Muusa me. Kee k'ede ponde a iŋnizaŋ an ki walda ye, wo urzi k'oogoro Yawudiyagi an ki daane ye.

22Ankeŋ in d'ise mummino? Derec, daa niiku kane an d'olliga kee a enno me.

23Iŋkino maŋ munda wede ay a roota geɗ, k'a t'iso. I d'ede a eŋ kuuli kane pide an ruute an i-d'isa munda a Raa.

24K'a t'odo k'ume k'aade ti kane, tuddugun kun ti t'isoy kamileŋ a daana Raa, wo k'an d'eloy soŋkadaŋ ere ki sedeke te, kono an di kōokey eedaŋ. Iŋkino maŋ

duwo pay an suuna ono don pay an rootiyo a tukki kee geɗ derec ye, wo kee toɗ lekkiyadá a-t'ette a urzi k'oogoro Muusa kay.

²⁵Wo kane Yawudiyagi ye don an ziipe addaɗ a Isa geɗ, ay an riije mattup a munda wede ay dehu me: an ki d'aadi ye sey wede an eliyo sedeke a longayi me, puuzo toɗ ulu an k'oomi ye, sey wede ki seysu inda puuzadí ti k'udde ye an k'aadi ye, ise boliyo toɗ ulu an d'ooli.»

²⁶Inkino Pool y'a iyye a onamaɗ, soggo maɗ kane kuuli pide geɗ y'a ti'n wiike, an t'iide k'ume k'aade kono an ti t'iso tuddaɗ kamileɗ a daana Raa. Maɗ yi-t'iide booro Boy Raa, y'an di rooto don sedeke onniyo ere tuddaɗ t'a t'isa kamileɗ a daana Raa t'a daɗga, wo wede tuuku toɗ y'a t'ela sedikadí sedikadí me.

Seedu ki Pool a Boy Raa

²⁷A daɗgu k'onniyo sarat geɗ Pool yo a booro Boy Raa, wo kane Yawudiyagi don iido ti siido k'Aazi an di y' wulle, maɗ an an t'elite ono a don duuru pay, wo Pool an di y' ziida.

²⁸An d'iise dollite, an'de: «Kun okki kune don k'Izirayel geɗ me! Enno wedusu wede i kazita munda wede ulsu me, a ume tuuku wo a wede tuuku toɗ maɗ, a tukki kine Yawudiyagi, a tukk'oogoro Muusa wo a tukki boy enno. Wo aɗkeɗ don Yawudiyagi ye toɗ y'an d'an t'iido ki Boy Raa enno, inkino ume kamileɗ eɗ an ti y'ize ganigi a daana Raa me.»

²⁹Kane an rootiyo inkino kono an wullo Tiropim k'Epez ti Pool adda geeger gettiyo, an elkiyo Pool yi ti y'ele adda booro Boy Raa.

³⁰Adda geeger pay gette don an d'iise tarkuuse gordon, don t'ume tuuku toɗ an d'okko k'adda, Pool duwo an di y' ziida an di y'udde t'adda booro Boy Raa me, wo kesiko boha an a-t'ippite.

³¹An dehu an di y' t'iide, maɗ don soɗ an d'ukke an i-di gizo a goole k'asigiryagi meeda zoot ki Romeɗ, an'de: «Don pay ki Zeruzalem an isiyo tarkuuse.»

³²Kesiko yo goole geɗ yi wiiko deero k'asigiryagi ti doolo, ti asigiryagi a itadaɗ an d'ukko k'ume don duuru. Aame an wulle goole k'asigiryagi pay wo ti asigiryagi a itadí maɗ, Pool an di y'iili ti kossiyadí me.

³³Inkino maɗ goole k'asigiryagi pay y'aa d'iide sirpa Pool, y'a yi ziida wo y'an di ruute a asigiryagi an ti y' kettito ti ziɗziri sire, wo y'a tunde, y'ede: «Wede eɗ yoɗ wee wee, wo y'ize moo me?»

³⁴Wo de adda diine don duuru geɗ wede tuuku toɗ yi dollite k'eedí, k'eedí. Wo goole k'asigiryagi pay geɗ yi-ki t'ollige ye munda an rootiyo me, kono tarkuuse baadaɗ. Inkino y'an di ruute a asigiryagi, Pool an di-t'odo k'adda boy wede zakidí.

³⁵Aame Pool y'iiney a biza boy aame koliyto mañ, kane asigiryagi an a-ti y'umbe kono doñ duuru an dehu an i-d'ise ulsu.

³⁶Wo kane doñ duuru pay geñ an yi daaniya ti dollite, an'de: «Ki y'ôodo! Ki y'ôodo!»

Pool a daana doñ duuru

³⁷Aame Pool an dehu an ti y' t'ele adda boy wede zakidi geñ, yi di ruute a goole k'asigiryagi pay, y'ede: «Tambobino doo, n'a-d'eege bizó kay ko?» Mañ yo goole geñ y'a yi tunde, y'ede: «Ono Girek ki suune ko?»

³⁸Kee ti siido Misir ye ko? Kee wede goppo goppon eñ ki t'udde balda ti doñ dupu pide a itadá, kee ye ko?»

³⁹Pool yi di ruute, y'ede: «Nuñ Yawudusu an ehe a Tarsi siido Silisi, nuñ wede ti siido ki geeger ere i-d'ede suma. K'o t'ele urzi mañ, n'an di roote a doñ duuru.»

⁴⁰Inkino mañ goole k'asigiryagi pay yi-d'ele urzi. Pool y'a t'ihira a ume koliyto, y'an d'ize likuw ti beezí kono duwo an d'anniga. Doñ pay an d'inniga, mañ Pool y'an d'iise rootiyo t'ono doñ k'Eber, y'ede:

Naabo doñ zina 22

¹«Maawi ki nuñ, zemba ki nuñ, anken kun ollo munda wede n'a roote me, kono tuddó geñ bizó n'a ti y' d'eege kay.»

²Aame an illiga Pool y'an rootiyo t'ono doñ k'Eber mañ, an d'inda kuy. Inkino mañ yo Pool y'a ruute, y'ede:

³«Nuñ Yawudusu an n'ehe a geeger Tarsi siido Silisi, n'ihira a Zeruzalem enno, wo wede i ni duuye Gamaliyel, y'a ni duuye mummino n'a daane koduwo urzi k'oogoro mongidagin me. Kono kamo urzi Raa n'a yi ziida zakidi baadañ aa kune anki pay.

⁴Doñ i daaniya urzi Galmeega n'anni dibire bini ongon an t'inda, kuuli erayi ni-ti'n kettiso, ni-ti'n obe adda dangay.

⁵Mozigo goole doñ sefeke ti doñ i dokkiyo Yawudiyagi pay, kane batum toñ an di roote derec onamó ni rootiyo eñ me, kono o ele mattup kane a zemba Yawudiyagi doñ a geeger Damas me. Wo n'a ingile Damas kono n'a-sefdo doñ i ziipe addañ a Isa a ummey, n'an d'an t'etto ki Zeruzalem kono n'anni dabire.»

Mummino Isa yi wiike Pool me

⁶«Nuñ n'a ingile wo a urzi peedo t'ize diine n'iina goppon ki Damas mañ, a kaamiki ni woliyo toore baadañ ti kandaane a diigo wiliñ a tuure a tuddó.

⁷N'a iire tul a siido wo n'a illiga golla t'o rootiyo, t'ede: "Sool, Sool, de moo me ki ni dabirsa me?"

⁸Mañ n'a tunde, n'ede: "Galmeega, de kee wee wee?" Injino mañ golla t'a ruute, t'ede: "Nuñ Isa wede ti geeger Nazaret, wede kee ki dabirsa."

⁹Kane don ti nuñ geñ toore an di y' wulle, wo golla ere o rootiyo gette an ki ti t'illiga ye.

¹⁰Injino mañ n'a tunde, n'ede: "Galmeega n'aase mummino?" Wo Galmeega y'o di ruute, y'ede: "Ki t'oozo k'engilo Damas, wo angeñ an a di kizey munda wede Raa yi dehu k'aasey me."

¹¹Wo ni ki wolliyo ye, kono toore geñ o d'ibbira edayó. Injino mañ don ti nuñ geñ an oo ziida beezó, an di n'irkide, an o di-t'iide ki Damas.

¹²Angeñ i d'ede wede sundi Ananiyas, yon geñ yi seedu zakidi a urzi k'oogoro Muusa me, Yawudiyagi pay adda Damas geñ an yi tamma.

¹³Yo y'a iido y'a n'uuna, wo y'o di ruute, y'ede: "Sool leema ki nuñ, edaya i t'ohon!" Wo a kaamiki edayó a t'hina ni wolliyo, wo Ananiyas n'a yi wulle kereñ.

¹⁴Wo y'o di ruute sey, y'ede: "Raa ki mongidagin yi ki biire ti kaagine too kono k'a suuna munda wede yon yi dehu, k'a wolle yode danjal wede ki diine me, wo k'a olliga ono don adfiya ti bizi.

¹⁵Geñ kee k'a kizita taayadi a duwo pay, a munda wede ki wulle wo k'illiga.

¹⁶Wo ankeñ ki delliso moo sey me? Ki t'oozo, an ki ti suygo batem wo ki tondo suma Galmeega, y'a di booye oldikada."»

Zina Pool di don Yawudiyagi ye

¹⁷«Sañ mañ n'a-gime ki Zeruzalem. Onniyo soo mañ ni-t'iide adda Boy Raa ni tonديو Raa, aame geñ o d'iide munda aa suniye,

¹⁸Galmeega n'a yi wulle, wo y'o di ruute, y'ede: "Kesiko ki t'adfo ti Zeruzalem me, kono don siido en an k'oyya ye taayada ere k'an kizita a urzi nuñ me."

¹⁹Nuñ ni di ruute, n'ede: "Galmeeki nuñ, kane ton an suune ni sooru k'adda boydi don Yawudiyagi ge dooyiso min, kono ay ti'n sedu don i ziipe adda a kee, ay di'n kossiyto, ay di'n obe adda dangay.

²⁰Wo aame an iide Etiyen wede kazita taayada ton, nuñ ede, nuñ ton adda a munda wede ize geñ me, nuñ wede boohiyo kallagi ki don i t'iide towwadi."

²¹Mañ Galmeega y'o di ruute, y'ede: "Ton mañ k'engilo, ni k'agisa ki dokki ki tukki don kane Yawudiyagi ye."»

Pool ti goole k'asigiryagi Romen

²²Kane ðoŋ duuru geŋ an di y’ollige Pool me bini a onamí ðoŋ k’ita geŋno maŋ, aame geŋ an d’iise ðollite, an’de: «Wede eŋ kun y’ôodo! Kun y’ôodo! Kun y’oola yi lekka ye a siido ette!»

²³Wo an di ðollite ki ðollite, kallagaŋ an t’iddipe, an d’oggiso siido i d’oozige odde k’awwa.

²⁴Iŋkino maŋ goole k’asigiryagi Romeŋ y’an di ruute a asigiryagi, y’ede: «Wede eŋ kun ti y’elo adda boy wede zakidi wo kun ti y’ ðekkito ti karre, kono y’a roota ono ðoŋ ðerec. Ni dehu n’a suune ki moo me ðuwo an ðollite a tukki yode me.»

²⁵Aame an y’iise kettiso ki ðekkisadí ti karre maŋ, Pool yi di ruute a goole k’asigiryagi meeda a sirpadí, y’ede: «Oogoro t’ele urzi ko a wede ti siido Romeŋ kun di y’ ðekkite ti karre, daa k’ollige bizí me?»

²⁶Aame goole k’asigiryagi meeda geŋ y’illiga iŋkino maŋ, y’a iide, yi di gize a goole k’asigiryagi pay, y’ede: «K’a elko ðo a naabo ere k’isiyo ette, kono wede eŋ yoŋ wede ti siido Romeŋ.»

²⁷Iŋkino maŋ goole k’asigiryagi pay geŋ y’a iide k’ume Pool, wo y’a yi tunde, y’ede: «Kee ti siido Romeŋ kotto ko, k’o ki ti rooti ðo?» Pool y’a ruute, y’ede: «Eyye, nuŋ ti siido Romeŋ.»

²⁸Iŋkino goole k’asigiryagi pay yi di ruute, y’ede: «Nuŋ n’a ele soŋko baadaŋ ðoo miŋ n’a t’ize wede ti siido Romeŋ kollo.» Pool yi di ruute, y’ede: «Nuŋ t’ume an n’ehe miŋ wede ti siido Romeŋ too.»

²⁹Kesiko kane ðoŋ an di y’ kosse geŋ an di lidde ti tuddí me, wo yo goole k’asigiryagi pay toŋ orgiso t’a yi ziida, kono yi ti gittite Pool ti ziŋziri, wo aŋkeŋ yi zuune kaciŋ yoŋ ti siido Romeŋ.

Pool a ðaana ðoŋ deero

³⁰Goole k’asigiryagi pay geŋ yi dehu y’a suune urzi wede ðerec, munda wede Yawudiyagi an sakiysa Pool. Iŋkino maŋ soggo y’an di ruute a deero ðoŋ sedeke wo a deero booro Yawudiyagi pay an di-t’ogiye. Saŋ Pool ziŋziri an i di t’iize, an di-y’uddo, an di-t’iide ki ðaanadaŋ.

Naabo ðoŋ zina 23

¹Aame Pool y’iina a ðaana kane deero Yawudiyagi maŋ, yi di’n wolliyó tebeŋ adda k’edayan, wo y’an di ruute, y’ede: «Zemba ki nuŋ, nuŋ daayum a sooruzó ere a ðaana Raa gette a elkisadó ni suune munda k’ulsuko a tuddó umbo.»

²Maŋ mozigo goole ðoŋ sedeke sundí Ananiyas y’an di ruute a ðoŋ a sirpa Pool, y’ede: «Kun i-ti y’ daana bizí me.»

³Inkino maŋ Pool yi di ruute, y'ede: «Kee toŋ Raa y'a ki daaŋa, kee wede aa waaya lee an aa t'ele buuye tuware, a t'ihina saŋ t'a oora. Kee ki-guune k'a deŋka booro a eedó a urzi k'oogoro, kaciŋ a urzi k'oogoro ye a doŋzá k'an di rootiyo ki kossiyadó.»

⁴Kane doŋ a sirpa Pool an i di ruute, an'de: «Kee mozigo goole doŋ sedefe ke ki Raa miŋ ki di y' kaldá!»

⁵Pool y'an di ruute, y'ede: «Zemba ki nuŋ, ni ki suune ye yoŋ mozigo goole doŋ sedefe me, kono ni suune ono eŋ an riŋe ti kaaga adda mattup ki Raa, an'de: «Wede goole ki siidadá ki ki y' kilde ye.»»

⁶Pool yi suune kane deero Yawudiyagi geŋ itadaŋ Saduseyeŋ wo soŋ Pariziyen. Inkino maŋ y'a idili a daanadaŋ, y'ede: «Zemba ki nuŋ, nuŋ Pariziyen, maawó toŋ Pariziyen, kono kamo ni zaapu elkisadó onniyo soo Raa y'a baldá doŋ i t'inda, geŋ kono k'inkino an dekkiyo booro a eedó me.»

⁷Aame kane Pariziyen ti Saduseyeŋ an illiga yi ruute inkino maŋ, an d'iiziga niikiyo ti tuddaŋ, wo a ogiysadaŋ gette an t'ihinte.

⁸Inkino maŋ kane Saduseyeŋ an rootiyo doŋ i t'inda geŋ an ki ti baldá ye, maaleekiyagi ti undiyagi toŋ umbo, wo ki kane Pariziyen an ambu baldiya ede, wo maaleekiyagi ti undiyagi toŋ ede.

⁹Inkino maŋ an di niikite ti tuddaŋ bini a t'iiziga tarkuuse baadaŋ, wo doŋ suuniyo k'oogoro oŋgo ti diine Pariziyen geŋ an d'iiziga, an di niikiyo ki toogo, an'de: «Kaye munda ulsu a tukki wede eŋ ay k'uune ye, naabadí ette ise unde koo maaleeka gi-ruute koo maŋ.»

¹⁰Niikiyadaŋ ti koliyo ti koliyo bini goole k'asigiryagi pay toŋ i di t'ele orgiso, y'elkiyo Pool an ti y' sittita. Inkino maŋ y'an di ruute a asigiryagi, y'ede: «Kun ti y' deegi, wede eŋ kun ti y'adfo ti diine deero Yawudiyagi me, ti beezaŋ kun ti y'oobo, kun di-t'odo k'adda boy wede zakifi.»

¹¹A didfo gette Galmeega y'a gize tuddí a Pool, yi di ruute, y'ede: «K'ombon, a Zeruzalem eŋ taayadó k'an ti gize, wo i dehu a geeger ki Room toŋ k'an di kizey kay.»

Koniyo k'eego ki tówwo Pool

¹²Soggo ti soohe maŋ Yawudiyagi oŋgo an t'ugiye kaŋ ombide, an a-ti nîime tuddaŋ a daana Raa, an'de: «Ay k'ooma ye, ay ki siba ye aame Pool ay ki y'ida ye maŋ.»

¹³Doŋ i nîime tuddaŋ inkino kane kuuli ada pide ti makumu.

¹⁴Wo kane an d'ingile, an d'uuney deero don sedeke ti don i dokkiyo Yawudiyagi, wo an di ruute, an'de: «Kaye ay ele tuddey ay a-ti nîime tuddey ti suma Raa, aame ay-iima wo ay-iiba ki poone Pool ay ki y'îida ye maŋ, a golladey.

¹⁵Inkino maŋ kune ti kane deero booro Yawudiyagi pay kaŋ soo, k'un tondo goole k'asigiryagi pay y'un di y'adfo Pool ki daanaguŋ sey, aa kun dehu kun di wolle onamí ki koduwo geŋ me. Kaye batum ay t'ikkima tuddey, ay di y' t'îda ki poone y'a aana ume kune geŋ me.»

¹⁶Wo ulo bilzi ki teema Pool geŋ, onamaŋ y'a illiga an koniyo eego a tukki Pool me. Kesiko y'a ukke k'adda boy wede zakidí. Y'iiney maŋ yi di ruute a Pool ono don y'illigo me.

¹⁷Inkino maŋ Pool yi wiike wede soo ti diine deero k'asigiryagi, wo yi di ruute, y'ede: «Ulo bilzi eŋ ki di t'odo k'ume goole k'asigiryagi pay, i-d'ede ono yi di rootey.»

¹⁸Goole k'asigiryagi geŋ bilzi y'a di-t'iide k'ume goolayaŋ, wo yi di ruute, y'ede: «Wede daŋgay Pool y'a ni wiike, wo y'ede bilzi eŋ n'a di-t'edi k'ume kee kono i-d'ede ono y'a-di roote.»

¹⁹Yo goole k'asigiryagi pay geŋ bilzi yi ziida a beezí, wo an aa d'irga siidaŋ. Maŋ y'a yi tunde, y'ede: «Ki dehu k'o di roote moo me?»

²⁰Inkino maŋ bilzi yi di ruute, y'ede: «Kane Yawudiyagi onamaŋ an ti'n îide, an'de soggo maŋ an gi di tonda Pool k'an di y'adfa, k'an di y' t'ela k'ume deero Yawudiyagi sey, aa an dehu an di wolley onamí ki koduwo.

²¹Wo kee k'amba ye onamaŋ me, kono kane kuuli ada pide ti makumu geŋ ti diinayaŋ don soŋ an t'ombidey, an di y' delley. Kane an ele tuddaŋ an a-ti nîime an k'ooma ye, an ki siba ye daa Pool an ki y'îida ye maŋ. Tuddaŋ an t'ikkima an delliyo miŋ, kee k'an t'ele urzi k'an di y'adfo baa.»

²²Aame goole k'asigiryagi pay geŋ yi t'illiga inkino maŋ, a bilzi'ŋ yi di ruute, y'ede: «A wenda soo toŋ ki rootey ye ono don k'o d'iido eŋ me, wo aŋkeŋ k'engilo baa.»

Engilso ki Pool a didfo ki Sezare

²³San maŋ goole k'asigiryagi pay geŋ yi wiike don sire ti diine deero k'asigiryagi, y'an di ruute, y'ede: «Kun waako asigiryagi meeda sire, asigiryagi ti punzigi ada sarat, wo asigiryagi don ti aryagi meeda sire, kun t'okkoŋ tudduguŋ, kun d'engila ki Sezare a didfo duwo an t'iima maŋ.

²⁴Wo kun aa wollo punzigi a Pool y'a kila, kun di y' boohoy y'a d'aaney ti toose a ume Peelikis goole siido me.»

²⁵Inkino maŋ yi di riije mattup a Peelikis, y'ede:

²⁶«Mattup ette a-raañiya nuñ Kilood Liziyas, a kee Peelikis wede suma, goole siido. Ki poone n'a-t'ize toose.

²⁷Wede n'a y'agisa eñ, kane Yawudiyagi an di y' ziidfa, an dehu an di y' t'ide. Wo aame ni zuune yoñ ti siido Romeñ mañ, ti asigiryagó n'a ukke, n'a-y'uddo ti beezañ me.

²⁸Wo ni dehu n'a suune munda wede Yawudiyagi an yi sakiysa ki moo me mañ, iñkino n'a-di t'iide k'ume ñoñ deero booro Yawudiyagi.

²⁹Mañ n'a zuune Yawudiyagi an yi sakiysa a urzi k'oogiradañ, wo ñe a urzi k'oogoro Romeñ geñ munda ulsu yi k'ize ye i di t'ide k'unto ise ki ñaŋgay toñ mañ.

³⁰Wo an oo ti gize kane Yawudiyagi an ti gitte onamañ an koniyo eego a tukki yode geñ me, iñkino mañ kesiko n'a-di y'igibe. Wo a ñoñ i yi sakiysa'ñ n'an di ruute, n'ede: «Kun'do, kun di wolloy onamguñ a ñaanadá.»»

³¹Iñkino mañ kane asigiryagi an t'ize munda wede goolayañ y'an ruute me, an ti y' wiike Pool an di t'iide, an d'iiney geeger Antipatiris.

³²Soggo mañ kane asigiryagi ñoñ ti zoññañ an di-gime k'umayañ ki Zeruzalem, wo kane ti punzigi an d'iñgile ki ñaanadañ ti Pool me.

³³Aame kane asigiryagi ti punzigi geñ an iiney a Sezare mañ, an i d'ele mattup gette a goole siido gettiyo, wo an i-di y'ele Pool a beezí.

³⁴Goole siido geñ y'a wulle mattup gette, wo y'a tunde Pool, y'ede: «Kee a siido tuuku an ki k'ehe me?» Pool y'a ruute, y'ede: «Nuñ ti siido Silisi.» Aame yo yi zuune Pool ti Silisi mañ, yi di ruute, y'ede:

³⁵«Aame ñoñ i ki sakiysa an iina mañ, n'a ki tondita kollo.» Wo y'an di ruute a asigiryagi, Pool an di y' boohe adda boy mozigo Erod.

Naabo ñoñ zina 24

Pool a ñaana Peelikis

¹Aame Pool yi ize onniyo paat a Sezare mañ, mozigo goole ñoñ sefeke Ananiyas ti ñoñ i dokkiyo Yawudiyagi miibi, an aa wiiko wede k'ooniyo sundí Tertilus. Kane pay an d'iina, an t'iide ñaana Peelikis goole siido, an i-di t'iide taaya a munda wede an sakiysa Pool.

²Goole siido y'a igibe an di wiiko Pool, wo aame y'iina mañ Tertilus y'a iise pettiyo bizí, y'ede: «Kee wede suma, goole siido, ti beeko ere ki kee kaye ay lekkiyo adda siido pay ti toose, wo t'urzi suuniyo ki dokkiyo ñoñzá ay wolleyo suldi ñoñ beehiye pay k'ikkimta me.

³A suldi don pay ay ooniyo inkino gen, a peedo tuuku ise a ume muno ton man, kaye sundá ay gi di seddiyo ye.

⁴Nun ni ki ti t'osse ye, inkino man ti beeko ere ki kee, ni dehu k'ay di'n olliga ki peedo boolon danjal.

⁵Kaye ay yi wulle man wede en yon ulsu zimolo, y'ay ti'n daggiya kaye Yawudiyagi pay adda duniya me. Wo yon goole ki don i daaniya Isa wede ti geeger Nazaret.

⁶Y'a dihe Boy kamilen ki Raa ton y'a ti y' lette, y'a y'ise ganigi. Inkino ay di y' ziida, [ay di dihe ay t'ise booro a urzi k'oogiradey,

⁷wo goole k'asigiryagi pay sundi Liziyas y'a ukko, ti toogo baadan y'a y'uube ti beezey me.

⁸San man Liziyas y'an di ruute, y'ede: "Kun'do, kun di wolley onamgun a daana kee goole siido." Inkino man kee batum, aame ki y'iisa tondiso man, k'a suuna munda wede ay yi sakiysa derec, gen onamo inkino.»

⁹Kane Yawudiyagi gen onaman ti Tertilus soo, an'de: «Eyye, onami yi ruute gen derec.»

Ono Pool a daana Peelikis

¹⁰Inkino man goole siido y'a ize likuw ti beezi a Pool kono y'a roote, man yon y'a t'ihina bizi, y'a ruute, y'ede: «Nun ni suune kee wede dekkiyo booro ki siidadey iide ozzinagi baadan, inkino man a onamo don n'a-deege bizo a daana kee en, nun ni zaapo addo a kee.

¹¹Kee batum ki wollo kay, onniyo koomat makumu sire ton i k'iide ye, ni gili Zeruzalem ki ottilso a Raa me.

¹²Adda booro Boy Raa wenda soo ton yi ki n'uuney, ni ki niikiyto ti wede tuuku ise n'an k'eliyto ono a don duuru ye, wo gen adda boydi don Yawudiyagi ge dooyiso, ise a omagi doolo adda geeger ton man.

¹³Wo kane don en, ankenno munda wede an ni sakiysa, an k'aane an ki ti y' roote derec ye.

¹⁴Wo munda wede n'a roote a daanada t'addo pay enno: Nun ni naabiya a Raa wede ki mongidagey a urzi wede aware. Ki kane Yawudiyagi an'de urzi gen derec ye, wo de nun n'umbe a suldi don pay an riije ti kaaga adda mattup k'oogoro Muusa ti don ki nebiyagi.

¹⁵Wo nun ton ni zaapu elkisado a Raa, aa kane Yawudiyagi batum an zaapu elkisadan, kono kane don ki diine wo don ki diine ye pay, an di balda ti unto a onniyo k'ita man.

16Kono kamo ni d'eliyo tuddó, kono daayum a elkisadó ni suune munda k'ulsuko a tuddó umbo a daana Raa wo a daana duwo me.

17Ozzinagi baadaŋ nuŋ umbo, iŋkino n'a-gimo ki Zeruzalem n'an d'iido ti soŋko ki noogiyo a doŋ siidadó doŋ weedayaŋ umbo, wo ni-d'ise sendikagi a Raa.

18Geŋ iŋkino n'iide k'adda booro Boy Raa, an di n'uuney aame ni t'ize aade ere kee wede k'a t'ise kamileŋ a daana Raa, duwo ti nuuno umbo, wo munda ki tarkuuse toŋ umbo.

19Wo de i n'uuney kane Yawudiyagi miibi ti siido k'Aazi. Kane ede a daanada maŋ, a-di roote kane munda wede n'ize ulsu aame an d'ede rootiyo a tukki nuuno maŋ, miŋ kane umbo.

20Wo iŋkino toŋ, kane doŋ a eŋŋo eŋ an rooto dimme wede tuuku n'ize aame an dikke booro a eedó a daana deero booro Yawudiyagi me.

21Wo ni suune n'ize munda soo daŋŋal, ni ruute ti golla awwa a daana kane, n'ede: "Nuŋ n'elkiyo baldiya ki doŋ i t'inda ede, kono kamo aŋki an d'o t'iido booro ki daana kune me."»

22Peelikis geŋ yoŋ y'a zuune kereŋ onamaŋ a urzi k'Isa Almasi me, maŋ booro y'a t'ihira k'onniyo doolo, wo y'an di ruute, y'ede: «Kun dello, aame Liziyas y'iido maŋ, n'un di wolla onamguŋ kollo.»

23Yi di ruute a goole k'asigiryagi, y'ede: «Ki y' booho Pool adda daŋgay, ki-d'oolo urzi booloŋ a munda wede yi dehu y'aase, wo a laŋziyagi toŋ k'an oolo urzi an d'ette an ti y' wolle.»

Pool ozzine sire adda daŋgay

24Onniyo miibi k'ita maŋ, Peelikis ti eddí Dirusil, tod'te Yawudowo, an d'iide k'ume Pool. Maŋ Peelikis y'a yi wiiko, kono yi dehu y'a y'olliga a urzi zaapu k'adde a Isa Almasi.

25Maŋ Pool y'a iise kazita mummino kee wede k'a lekke ki diine, tuddá k'a ti seeda, wo mummino onniyo k'ita Raa y'a dekkekey booro a tukki duwo pay me. Iŋkino Peelikis i-di t'ele orgiso, yi di ruute, y'ede: «Aŋkeŋ k'eŋgilo, aame onniyo ni ki diha maŋ, n'a ki waaka kollo.»

26Y'elkiyo soŋ Pool yi di t'eela soŋko, iŋkino yi di y' waaku daayum an di pelkiyo ti yode.

27Ozzine sire geŋ i-t'iŋgile iŋkino, maŋ Peelikis an ti y' bilke ti Porsiyus Pestus. Wo yode Peelikis geŋ yi dehu Yawudiyagi ulbaŋ an d'ise uŋse, maŋ Pool y'a y'iili adda daŋgay.

Naabo doŋ zina 25

Pool a daana Pestus

¹Aame Pestus y'iina a siido gettiyo maŋ yi d'ize onniyo ado, maŋ y'a-gili ti Sezare ki Zeruzalem.

²Deero doŋ sedefe ti deero Yawudiyagi geŋ an d'iide, an i di t'iide taaya a tukki Pool, an di y' tunde wo an di kodfime, an'de:

³«K'ay ise beeko maŋ, Pool k'a-di t'etto ki Zeruzalem.» Wo kane Yawudiyagi an t'ikkima tuddaŋ kono an di y' t'ida urzi.

⁴Wo Pestus y'an di ruute, y'ede: «Pool yoŋ adda daŋgay a Sezare, saŋ maŋ nuŋ batum ni-kima k'ummey me.»

⁵Wo y'a ruute sey, y'ede: «Doŋ deero ti diinaguŋ an di-deega ti nuuno ki Sezare, wo aame munda wede Pool y'ize ulsu geŋ, on o-di t'iidey taaya.»

⁶Pestus yi d'izo onniyo gessire koo koomat daŋ daŋŋal a Zeruzalem me, saŋ y'a-gime ki Sezare. Ti soggatú maŋ y'a-guune a ume k'isiyo booro, wo y'an di ruute an di wiiko Pool.

⁷Aame Pool y'iina maŋ kane Yawudiyagi doŋ iido ti Zeruzalem an di ti duule, an d'orbite ono baadaŋ wo ulpi siidaŋ a tukki Pool me, ono doŋ an orbite geŋ an k'aane an ki ti'n roote derec ye.

⁸Wo Pool k'oodibe k'eedí, y'ede: «Nuŋ ni k'ize ye munda ulsu a urzi k'oogoro Yawudiyagi, a urzi Boy Raa, ise a mozigo goole ki Romeŋ toŋ maŋ.»

⁹Yode Pestus geŋ yi dehu Yawudiyagi ulbaŋ an d'ise uŋse, iŋkino maŋ y'a tunde Pool, y'ede: «Kunuŋ ki dehu k'a ette Zeruzalem, in t'isey booro k'onamá a daanadó a ummey ko?»

¹⁰Pool yi di'n gime onamí, y'ede: «Aha, nuŋ ettiŋ booro ere aa a daana mozigo goole ki Romeŋ, onamó kun ti'n wollo a enno. Nuŋ munda ulsu a Yawudiyagi n'an k'ize ye, aa kee batum ki suune.

¹¹Wo aame ki kotto ni suune ni t'ize oldiko wo ni t'ize munda o t'iide k'unto maŋ, ni ki-tooge ye n'a t'inda. Wo de aame munda wede an ni sakiysa eŋ derec ye maŋ, wenda wede i-t'oone urzi an di'n t'ele a bey kane umbo. Nuŋ booradó ette a aaney di mozigo goole ki Romeŋ.»

¹²Iŋkino maŋ aame Pestus an ti ruute ti doŋ i-d'eliyo kooke maŋ, yi di ruute, y'ede: «Kee k'unte suma mozigo goole ki Romeŋ geŋ, k'a eŋgila ki daana yode mozigo goole ki Romeŋ.»

Pool a daana Pestus ti Agiripa

- 13** Onniyo miibi k'ita maṅ, mozigo Agiripa ti teemadí Berenis an d'iina a Sezare, an i-di t'iso toose a Pestus.
- 14** An likke onniyto baadaṅ aṅgeṅṅo, aame geṅ Pestus yi di t'îide taaya a mozigo kono Pool geṅ me, y'ede: «A eṅ i d'ede wedusu Peelikis yi iili adda daṅgay.
- 15** Aame n'iide Zeruzalem geṅ, deero doṅ sedeke ti doṅ i dokkiyo Yawudiyagi an d'ede ono ti yode, wo an di n' tunde an'de, ni rooto yo eṅ booro ti y' ziida.
- 16** Wo n'an di ruute, n'ede: “Kaye Romeṅ ay k'isiyo ye iṅkino me, daa ki wede an i-gi d'iide k'ume booro yi ki dūige bizí a daana ki doṅ i yi sakiysa ye me.”
- 17** Iṅkino maṅ kane an t'iido keṅṅo ki sirpadó, wo soggo maṅ kesiko n'a-guune a ume booro wo n'an di ruute Pool an di y' wiiko ki daanadó.
- 18** Wo kane doṅ an yi sakiysa geṅ an iina maṅ, an ki ruute ye a suldi doṅ ooṅe aa nuṅ n'elkiyo y'ize me.
- 19** An d'ede niikiyto daṅṅal ti yode a urzi daaniya Raazaṅ, wo a tukki wede soo sundí Isa yoṅ geṅ y'inda wo Pool y'ede yoṅ zeere.
- 20** Wo nuṅ ni ki suune ye urzi dekkiyo booro a ono geṅ me. Iṅkino maṅ n'a tunde Pool y'a ette Zeruzalem, an t'isey booradaṅ a ummey a onamaṅ geṅ me.
- 21** Wo Pool y'a-tuuge, y'a dihe y'a t'ette ki daana mozigo goole ki Romeṅ, yode a wolley onamaṅ me. Iṅkino maṅ n'an di ruute a asigiryagi an di y' boohe a daṅgay bini onniyo ere n'a ti y' t'igiba k'ume mozigo goole ki Romeṅ.»
- 22** Agiripa yi di ruute a Pestus, y'ede: «Nuṅ batum ni dehu wede geṅ n'a y'olliga.» Pestus yi di ruute, y'ede: «Soggo k'a y'olliga.»
- 23** Iṅkino maṅ ti soggatú mozigo Agiripa ti teemadí Berenis an t'usso kallagi moziko, an t'iide ti deero k'asigiryagi wo deero siido adda biino ere k'ogiyso. Maṅ Pestus y'an di ruute doṅzí, Pool an di y' wiiko.
- 24** Aame geṅ Pestus y'a ruute, y'ede: «Mozigo Agiripa wo kune doṅ pay ti kaye, kun wollo wede eṅ, kane Yawudiyagi pay an d'iido an o di ruute ono a eedí. An di n'uuney a Zeruzalem, wo an d'iido keṅṅo pay, an doṅlita wede eṅ i-k'ede urzi y'a ki lekke zeere ye baa.
- 25** Wo ki nuṅ, ni k'uune ye munda wede ulsu y'ize i-di t'îide k'unto me, wo de yode batum y'ede onamaṅ eṅ an i deṅgey mozigo goole ki Romeṅ. Iṅkino maṅ ni dihe n'a ti y' t'igibe k'ummey ki daana yode.
- 26** A tukki yode eṅ ono doṅ ni di raaje a mozigo goole ki Romeṅ ni ki'n suune ye. Kono kamo n'a di-t'iido ki daana kune, wo toc miṅ ki daana kee mozigo Agiripa. Kun ti y' tundita maṅ, koo ni-t'oono ono doṅ n'aana ni di raaja a yode me.

²⁷Derec ye, k'a t'igibe wede daŋgay ki Room daa ki suuniyo munda wede ulsu y'ize me.»

Naabo doŋ zina 26

Ono Pool a daana k'Agiripa

¹Aame geŋ Agiripa yi di ruute a Pool, y'ede: «Ki rooto, ki-dēego bizá.» Inŋkino maŋ Pool y'a umbe beezí, wo y'a iise dēegu bizí, y'ede:

²«Mozigo Agiripa, aŋki nuŋ ulbó uŋse n'aane n'a roote ono doŋ n'a-dēege bizó a daana kee, a sulđi pay doŋ zembadó Yawudiyagi an ni sakiysa,

³kono kee ki y' suune kođuwo pay urzi k'oogoro Yawudiyagi ti niikiyadaŋ te. Inŋkino n'a ki tonde, ono doŋ ni roota eŋ ki'n olliga maŋ.

⁴Kane Yawudiyagi pay an ti suune lekkiyadó ere ni likke t'ume nuŋ obulsu a daana doŋzó a Zeruzalem me.

⁵An ni suune ti kaagine to, lekkiyadó ni likke a urzi wede ki Pariziyen, urzi wede ooŋe baadaŋ ki sooru a urzi k'oogiradey me, kane batum an t'eesse derec aame an dehu maŋ.

⁶Wo aŋkeŋ an dēkkiyo booro a eedó kono ni zaapu elkisadó a ono doŋ Raa y'a ruute y'an t'ela a moŋgidagiŋ.

⁷Kane boha bumbiyagi koomat makumu sire ki doŋzó geŋ, an zaapu elkisadaŋ an di wolla daŋgiya ki sulđi doŋ Raa y'an ruute t'urzi naabo an isiyo daayum oŋŋu wo diddo a yode. Mozigo Agiripa, nuŋ toŋ ni zaapu elkisadó inŋkino, geŋŋo munda wede kane Yawudiyagi an ni sakiysa me.

⁸Ki moo me kune Yawudiyagi kun elkiyo munda geŋ i ki t'ise ye, Raa y'a balda doŋ unto me?

⁹Para'ŋ nuŋ toŋ maŋ n'ilke doŋ umbe a suma k'Isa wede ti geeger Nazaret geŋ, t'urzi tuuku toŋ maŋ n'aana ni'ni dēyya.

¹⁰Geŋ naabo gette a Zeruzalem n'a-t'ize. T'urzi toogo ere n'uune ti deero doŋ sedeke, doŋ ki Raa baadaŋ n'a ti'n zidde daŋgay, wo aame an dehu tōwwadaŋ toŋ ni d'oyyiso.

¹¹Daayum ni d'ettiyo k'ume soo me soo me, k'adda boyđi doŋ Yawudiyagi ge dooyiso, kane ni di'n dabirsa kono ni dehu ki toogo an di kilde suma k'Isa. Kono kane geŋ n'a t'ize aa gede maade, an t'ombiyo geegiryagi ki siido doolo toŋ ni di'n daaniya.

Taaya Pool mummino y'a ziipe addí a Isa me

¹²Geŋ iŋkino onniyo soo n’iŋgile ki Damas ti toogo wo ti urzi naabo ere deero doŋ sedefe an o ele.

¹³K’ollo kay mozigo Agiripa, aame nuŋ a urzi wo peedo t’ize diine geŋ, ni woliyo toore wiliŋ i diigo ti kandaane, a jiiire toore peedo, a diige tuddó wo a tukki doŋ a itadó pây.

¹⁴Kaye pay geŋ a t’ibi ramama a siido, wo n’ollige golla ti rootiyo ti ono doŋ k’Eber, t’ede: “Sool, Sool de moo me ki ni dabirsa me? Kee ki k’aana ye, kee’ŋ aa buru a bey galmeegí yi yi kossiyo.”

¹⁵Maŋ n’a tunde, n’ede: “Galmeega, de kee wee wee?” Wo yo Galmeega y’a ruute, y’ede: “Nuŋ Isa, wede kee ki yi dabirsa.

¹⁶Wo aŋkeŋ ki t’oozo, ki t’ôhor. Nuŋ n’a-gize tuddó kono ni ki biire k’a t’ise wede naabadó, wo k’a rootita a duwo mummino ki ni wulle aŋkeŋno, wo a suldi doŋ ki wolla n’a kizita sey me.

¹⁷Aŋkeŋ n’a ki ti-k’adfa ti bey doŋzá Yawudiyagi wo ti bey doŋ kane Yawudiyagi ye. Ni-k’agisa ki tukki kane Yawudiyagi ye,

¹⁸kono k’an di t’ihiney edayaŋ, t’adda zimolo an t’adfo k’ume toore, wo ti moziko Meeda siitandani an t’etto k’ume Moziko Raa. Aame an ziipa addaŋ a nuŋ maŋ, an t’oona tambobino k’oldikadaŋ, wo an t’oona aggadaŋ t’adda suldi doŋ Raa yi boohiyo a doŋzí.”

Ono Pool a urzi naabadí

¹⁹Iŋkino maŋ mozigo Agiripa k’ollo bee, a munda wede o iido aa suniye ti kandaane geŋ, n’a ki tuuge ye.

²⁰Wo ki poone n’a iise kazita a doŋ Damas ti doŋ Zeruzalem, wo soŋ a omagi pay ki siido Ziide, wo saŋ a doŋ oŋgo ki siidiyagi doŋ kane Yawudiyagi ye. N’an gizite an di-kime lekkiyadaŋ, an di-kime ki tukki Raa, wo an di lekke lekkiyo ere i-kaza kane an ti-gime ki tukki Raa ki kotto.

²¹Geŋ iŋkino kane Yawudiyagi an ni ziida adda Boy Raa, wo an dihe an di n’ t’ide me.

²²Wo Raa y’a ni buuhe bini aŋki, wo daayum ni kazita taayadí a doŋ pay sunni deero. Onamó ni rootiyo miŋ, kane doŋ nebiyagi ti Muusa an ruutite a munda wede saŋ a aana geŋno, munda ti doolo n’a ki rootiyo ye.

²³Ni rootiyo miŋ: Almasi Raa yi biire geŋ, y’a dibire wo y’a bilde ki poone ti diine doŋ unto me, wo y’an di kizite urzi toore wede k’uttiyo a doŋziŋ Yawudiyagi wo a doŋ Yawudiyagi ye.»

Ono Pool a Agiripa y’a zaape addí a Isa

²⁴Aame Pool yi-dfiige bizí in̄kino maṅ, Pestus y'a idili, y'ede: «Pool kee ki t'ukke maade! Ki duuye baadaṅ duuru, aṅkeṅ kee ki t'okko maade!»

²⁵Pool yi di'n gime onamí, y'ede: «Pestus kee wede suma, goole ki siido, k'ollo. Nuṅ ki maade ye, onamó ni rootiyo eṅ d'erec wo a urzizaṅ.

²⁶A daana mozigo Agiripa eṅ n'a roote onamó daa k'orgiso, kono suldi ize geṅ yoṅ yi suune soo soo. Nuṅ ni suune munda soo i-dande umbo, kono suldi ize geṅ kaṅ ombide ye.

²⁷Mozigo Agiripa, k'umbe koo a ono doṅ nebiyagi an ruute me? Nuṅ ni suune kee k'umbe a ono geṅ me.»

²⁸Agiripa yi di ruute a Pool, y'ede: «Kee k'elkiyo miṅ a kaamiki eṅ n'a zaape addó a Isa ko?»

²⁹Maṅ Pool yi di ruute, y'ede: «Ise aṅkeṅno k'ita toṅ maṅ, nuṅ ni ton-diyo Raa, a zaape adde a Isa kee daṅṅal ye, wo kune doṅ pay aṅki kun n'ollige eṅno, kun t'ise aa nuuno wo ti ziṅziri kino ye!»

³⁰In̄kino maṅ mozigo Agiripa y'a t'iizi, goole siido y'a-t'iizi, wo Berenis ti doṅ pay ugiye an a-t'issige.

³¹Wo aame kane geṅ an t'irga maṅ, an di ruute tuddaṅ, an'de: «Wede eṅ oldiko ere i di t'ide k'unto, ise ki daṅgay toṅ, umbo yi k'ize ye.»

³²Wo Agiripa yi di ruute a Pestus, y'ede: «Para maṅ wede eṅ aṅki in i-d'eeze, aame yi ki ruute booradí t'a aaney di mozigo goole ki Romeṅ ye maṅ.»

Naabo doṅ zina 27

Agisa Pool ki Room

¹Duwo an di dihe onniyo ere ay di-kila adda tooko, ay d'eṅgila ki siido k'Itali. Aame geṅ Pool ti doṅ daṅgay oṅgo an i-di'n ele a Ziiliyus goole k'asigiryagi meeda, ti diine k'asigiryagi meeda zoot an'ni waaku sundaṅ «asigiryagi ki mozigo goole ki Romeṅ.»

²Ay di-gili adda tooko ki siido k'Adiramit t'ambe geegiryagi doṅ a zeṅge ki siido k'Aazi, wo ay d'iṅgile, Aristarko ti geeger Tessaloni siido Maseduwan ti kaye.

³Soggo maṅ ay d'iiney a Sidon, wo Ziiliyus geṅ yoṅ beehiye ti Pool me, aame geṅ yi-d'iili urzi y'a ette y'a wollo laṅziyagi, kono yi seedo munda wede yi dehu.

⁴Saṅ tiṅ geṅ ay d'iṅgile, ay d'umbe ki kese ere maaye baata ki siido ere a diine k'ahu sundutú Siipire, kono maaye a giggirey duuru.

⁵Ay di diipida bar ere goppon ti siido Silisi ti Pampili, wo ay d'iiney a geeger Mina siido Liizi.

⁶A ume geŋ goole k'asigiryagi yi d'uune tooko ti geeger k'Alegzandiri t'ambe k'Itali, wo y'ay ti'n gili adda.

⁷Ay d'ettiyo booloŋ ti booloŋ, ay d'ize onniyto baadaŋ, ay t'ize ooŋe baadaŋ bini ay d'iiney geeger Sined. Wo de t'urzi geŋ ay k'aaney dokki ye kono maaye baadaŋ, maŋ ay t'udde goppoŋ ti siido sundutú Kap Salmone, ay d'iŋgile ki zeŋge wede maayayí baata ki siido ere a diine k'ahu sundutú Kiret.

⁸Ay d'ettiyo ti ooŋe baadaŋ ay seedu ita zeŋge zeŋge, wo ay d'iiney ume wede an yi waaku Zeŋge Majjaane, goppoŋ ti geeger Laze.

⁹Ay d'ize onniyto baadaŋ doo miŋ ay d'iiney a ume geŋ me, wo aŋgeŋ ume a t'ize ulsu baadaŋ sey k'eŋgilso me, kono onniyo tarnaape ki lekkiyo daa k'ombo i t'iŋgile. Inkiŋo maŋ Pool y'an di tuuke kuudaŋ doŋ naabo adda tooko me, y'an di ruute, y'ede:

¹⁰«Laŋziyagi ki nuŋ, ni wolliyoy'ŋ torguwo ette in t'isa ooŋe, tooko ti suldi suuk adda pay a latta wo kine toŋ maŋ in di-t'inda, tooko daŋŋal ye.»

¹¹Wo goole k'asigiryagi geŋ yi zaapu addí baadaŋ a ono wede tuuliyoy tooko ti wede tooko batum, a ono Pool yi-ki zaapu addí ye.

¹²Wo soŋ zeŋge wede geŋ yoŋ majjaane ye ki lekkiyo a ume reele me, kono kamo doŋ baadaŋ an dehu ti tookiyagaŋ urzi ede maŋ, tiŋ geŋ an d'eŋgile an d'aaney geeger Peeniks zeŋge ki siido Kiret. Zeŋge geŋ yoŋ ki d'andí ki kese peedo k'ooriyo, wo k'awwa ki kese peedo k'ooriyo. Geŋ aŋgeŋno an di dihe an di lekkey ume reele me.

Ursiŋo adda bar

¹³Maŋ i d'iiziga maaye yi baahu pelele ti d'andí wo kane an elkiyo torguwadaŋ an eŋgila. Geŋ maala ere i seedu tooko an ti-t'umbo t'adda k'ahu me, wo an d'iŋgile an seedu ita zeŋge ki siido Kiret.

¹⁴Wo saŋ maŋ taŋ booloŋ i d'iizigo maaye baadaŋ sundí Erakiloŋ t'adda moŋgali ki siido ere a diine k'ahu gettiyo.

¹⁵Tooko yi-di d'iŋgile ay k'aaniya girpiyatú ye kono maaye a giggirey, ay yi d'iili tuddey a maaye y'ay di'n dokkiyo adda bar baa.

¹⁶Ay d'udde ti d'andí siido neŋko ere a diine k'ahu sundutú Koda, ay d'iigire booloŋ ti maaye me. Aame geŋ ay d'ize ki toogo bini tooko neŋko ki naakiwsa tudde ay d'iine girpiyatú.

¹⁷Kane doŋ naabo adda tooko an a-t'irgo tooko ere neŋko an a-ti gili, wo tooko ere meeda an ti-gittite ti sibbani ki seedutú. An orgiso t'a k'ooro adda dolso ere ki zeŋge ki siido Libi ye, inkiŋo maŋ alboy an di-d'iggite wo an i-d'iili tuddaŋ a maaye, yi di'n dokkiyo.

18Ursiño gette t'ay di'n tindiwe baadañ bini soggo, mañ kane ñoñ naabo adda tooko an d'iise sebbiso suldi suuk t'adda tooko k'adda bar.

19Wo onniyo k'aduwe mañ suldi ñoñ an boohiyo k'okkime tooko, kane pây an aa di-zibbite ti bezañ.

20Onniyto baadañ ise peedo, ise moldali ay ki'n wolliyo ye, ursiño gette t'a guune zakidi ti suutinso ki suutinso, wo kaye pay wede tuuku y'a elke ay d'utta umbo.

21Ñoñ pay adda tooko geñ, onniyto baadañ wenda soo toñ yi t'eele munda a bizí umbo. Injino mañ Pool y'a t'ihira a ñaanaña, wo y'an di ruute, y'ede: «Lañziyagi ki nuñ, añki kun illigo onamó, in likko a Kiret mañ, dabar ti daggiya suldi kino i k'ise ye.

22Wo añkeñ n'un di rooto, kun ombon! Wenda soo toñ ti diinagun i ki t'inda ye, i dagga tooko sittú.

23A diddo ette maaleeka ki Raa wede ni-daaniya wo ni-naabiya geñ, y'a iido sirpadó,

24wo y'o di ruute, y'ede: "Pool kee k'orgide ye, kee k'a ettey ki ñaana mozigo goole ki Romen. Wo Raa beekadi a eeda gette, ñoñ pay adda tooko ti kee eñ y'an utta."

25Injino mañ lañziyagi ki nuñ, kun ombon kono ni zaapu addó a Raa, onamí ñoñ y'o ruute eñ a-t'etta.

26Wo kine in'te eñ, in di gohey a zeñge siido soo ere a diine k'ahu.»

27A diddadey ere ki koomat makumu pide toñ, ursiño t'ay di'n d'engilso daayum ki daggiya adda bar sundutú Mediterane. A diddo meeda mañ, ñoñ naabo tooko an owwiyo ay iina goppon ki siido.

28Mañ an zidde sibe ti maala eego, wo an di zuune sohirko k'ahu kayya ada g'ado makumu sarat, wo ki ñaana boolon mañ an di-zidde sey, mañ sohirko k'ahu a t'irga kayya ada sire makumu gessire.

29Mañ an d'urgide koo ise mongali tunda mañ tooko t'a goha. Injino mañ an di gikkite maldali pide deero kettiso ti sibbani a ume k'ita tooko kono t'a-dirse, wo an di delliyo ume a t'ompila, wo ume y'an k'ompilso kesiko ye.

30Aame geñ kane ñoñ naabo tooko an dehu an t'oodi eedañ, tooko an d'ooli mentú. An d'isiyo aa an kakkisa maldali deero ñoñ i seedu tooko a ñaanaña geñ, an ti-diiige tooko ñeñko ki naakiwsa tudde adda k'ahu.

31Wo Pool yi di ruute a goole k'asigiryagi Romen ti asigiryagi, y'ede: «Kane ñoñ eñ an ki likka adda tooko ye mañ, kune kun k'utta ye.»

32 Inġino maṅ kane asigiryagi an di-dfikkite sibbani doṅ i seedu tooko ṅeṅko ki naakiwsa tudde geṅ me, an di-t'iili t'a iire.

33 Ki poone ume y'a ompila geṅ, Pool y'an di ruute a doṅ pay an oomo munda, y'ede: «Kun ollo, aṅki eṅ un d'ede onniyo koomat makumu pide kun lekkiyo adda k'elkiso wo mosogo, daa k'ombo.

34 Inġino maṅ n'un di rooto, wede tuuku toṅ yi oomo munda booloṅ, kono geṅ koḍuwo un t'eele toogo kono kun d'utta. Wo ililso k'eego soo ki wede tuuku toṅ i ki dagga ye.»

35 Aame Pool yi ruute inġino maṅ, y'a t'umbe mappa, y'a ruute koḍuwo a Raa a ḍaana ḍuwo pay, saṅ y'a burkita wo y'a iise ombo.

36 Inġino maṅ kane pay geṅ an d'imbiṅa, an d'iise ombo kay.

37 Adda tooko'ṅ kaye meeda sire uto ada sarat makumu zoot.

38 Aame an t'iimi an isse maṅ, geme t'adda tooko an di zibbite adda bar, kono tooko aa d'ise soodo.

Lattiya tooko adda k'ahu

39 Ume i t'umpile maṅ, siido gette doṅ naabo tooko an gi di zuune ye, wo an di wulle ume dolso ti paate a biza zenḡe, maṅ an dihe tooko an di-t'ette k'ume dolso an iina maṅ.

40 Maldali deero doṅ i seedu tooko an t'ippirte wo an d'iili adda bar, sibbani doṅ an gittite inda doṅ i dokkiyo tooko an t'iizite. Maṅ an di gitte alboy aame ḍaana tooko kono maaye yi di'n ṅaay'u k'ume dolso.

41 Wo an iide'ṅ, an t'iire adda dolso ere a diine bar, tooko a ti ziida. Ume ḍaanatú i-t'iide adda dolso ti k'aane ti k'eṅgile ye, wo ume k'itatú bar t'okko baadaṅ geṅ a dihima.

42 Kane asigiryagi geṅ an dehu doṅ daṅgay an ti'n t'ide, kono koo tuuku yi suune ahu maṅ, y'utta'ṅ iye.

43 Wo yo goole k'asigiryagi Romenḡ geṅ yi dehu y'a utte Pool, inġino maṅ y'an di-tuuge ki t'ôwwadaṅ me. Y'an di ruute a kane doṅ i suune ahu'ṅ an t'ofo ki poone, an di-dooḡo ti nee a siido.

44 Doṅ soṅ an di'n diiko, wede tuuku y'a ti soodo a sarpaṅje, ise a key'ali k'inda tooko toṅ maṅ. Wo geṅ inġino, pay an t'ibi ahu, an di dippida pay ti bee a siido me.

Naabo doṅ zina 28

Pool yo a siido sundutú Malt

- ¹Aame ay ti diipida ay utte mañ, siido ere a diine k'ahu gette ay d'illiga kacin sundutú Malt.
- ²Kane don siido gette an ay di'n ziida ti geyyiso baadan. Angeñ mizzi ton y'a d'iise koppiyo wo ume reele geñ, an ay di mudde uwo gidi gidi, an'de: «Kun'di kun ti kooka pay.»
- ³Pool y'a-ziki keyyami y'a d'ibi uwo, wo a wehinko gette makike t'adda y'a uddo, y'a y'ihida beezí.
- ⁴Aame kane don siido gette an wulle makike yi t'irbe bey Pool mañ, an d'iise rootiso ti tuddan, an'de: «Wede en wede towwo duwo kotto, kono booro ki Raa ti ki dehu y'a ki lekke ye, t'adda bar yi y'uddo ton mañ.»
- ⁵Wo Pool y'a rittige makike k'adda k'uwo, wo i ki y'aadumu ye.
- ⁶Kane don ongo an delliyo, an wolla ooziga woogo, y'oodiba y'ooro tul y'inda woogo. Aame an likke kee wo an wulle munda boolon ton k'aadumu umbo mañ, an di-gime elkiyadan, an'de: «Yo en raayusu.»
- ⁷Ume geñ yon goppon ti dombi ki wede goole ki poone ki siido ere a diine k'ahu gettiyo, yon sundí Pibiliyus. Yode geñ y'ay di'n ziida ti geyyiso baadan, wo ay d'ize onniyo ado a boozí me.
- ⁸Meeki Pibiliyus geñ yon eeni ekk'onjali, i-di d'orbiyto wo yi dara puuzo. Pool y'a iide y'a ti y' wullo, yi-tunde Raa, mañ yi ziipe beezí a tuddí wo yi-d'ele beeko.
- ⁹Sañ mañ don k'eeni ki siido gette an d'iidito pay, wo y'an d'ele beeko pây.
- ¹⁰A kaye geñ don siido gette an ay d'uttile baadan, wo a onniyo k'engilsadey ton an ay d'eele suldi baadan don ay dehu ki toruwadey me.

Aaniya ki Pool a geeger Room

- ¹¹A ume geñ i d'ede tooko sundutú «Raayagi Roono» t'iido ti geeger k'Alegzandiri, tode gette ume reele ti ti y'ingile a zenje siido ere a diine k'ahu ettiyo. Iide tere ado mañ, ay di-gili adda ay d'ingile.
- ¹²Ay d'iiney geeger sundutú Sirakuz, aame geñ ay d'ize onniyo ado.
- ¹³Tin geñ ay ziida ita zenje zenje, ay d'iiney geeger sundutú Reggiyo. Soggo mañ maaye ti dandi y'a iise baahu, onniyo sire ay d'iiney a geeger sundutú Puzole.
- ¹⁴A geeger gette ay d'uune zamba don i ziipe addan a Isa, an ay di'n dihe ay d'ize onniyo sarat ti kane. Geñ inkino sañ ay d'ingile ki Room.

¹⁵Kane zemba ti Room geɗ an d'illiga rabiladey te, wo an d'iido okkimayey an d'iina a ume sundí «Suuk ki Appiyus» wo a ume sundí «Ume Moone Afo ki Torgagi». Aame Pool yi'ni wulle maɗ, y'a ruute koduwo a Raa wo ii d'eele kooke.

¹⁶Aame ay iiney Room maɗ, an i-d'ele urzi a Pool y'a lekke siidí ti asigursu soo ki boohiyadí.

Pool yi kazita ono Raa a Room

¹⁷Íide onniyo afo maɗ, Pool y'a wiike deero Yawudiyagi doɗ a geeger Room ki di yode. Aame an t'ugiye maɗ, y'an di ruute, y'ede: «Kune zemba kuuli, nuɗ munda ulsu a doɗziɗ ni k'ize ye, ise a urzi k'oogoro moɗgidagiɗ toɗ ni k'ize ye, wo toɗ a Zeruzalem an di n' ziida daɗgay, an an di n' ele a bey Romeɗ.

¹⁸Kane Romeɗ an di n' tundite, saɗ an dihe an oo d'eeze kono munda n'ize ulsu o di t'íde k'unto an k'uune ye.

¹⁹Wo kane Yawudiyagi an di-tuuge, iɗkino maɗ nuɗ toɗ n'a ruute n'ede, booradó i ti daɗgey mozigo goole ki Romeɗ, aɗkeɗ o k'ede elkiyo n'a ki kiigira doɗzó Yawudiyagi ye.

²⁰Geɗ kono k'iɗkino n'a dihe n'un di'n t'ikkima, n'un di roote me. Iɗkino maɗ ni sarkiya ziɗziri ette kono ki wede kane doɗ k'Izirayel an zaapu elkisadaɗ.»

²¹Kane doɗ i t'ugiye geɗ an i-di ruute, an'de: «Kaye mattup ti siido Ziide soo toɗ ay k'uune ye a tukki kee me, wo leema soo toɗ t'ummey i k'iido ye, y'ay di-t'íde taaya, ise y'ay di roote k'ulsu kee me.

²²Wo beehiye ay dehu ay ki-ti k'olliga munda wede k'elkiyo k'a roota me, kono kaye ay suune a munda wede k'a seedu zakidí geɗ, aame tuuku toɗ duwo an ki dehu ye.»

²³An d'ele onniyo ere an di t'ikkima ti Pool kaɗ soo, wo a onniyo gette an d'iide baadaɗ a jiire, an di y'uuney Pool a ume wede yi-lekkiyo. Ti soohe bini lohe Pool y'an di kazita a urzi Moziko Raa, yi dehu y'an ti'n tooye k'urzi taaya k'Isa. Y'an kazita iɗkino t'urzi mattup k'oogoro Muusa ti doɗ ki nebiyagi.

²⁴Doɗ oɗgo an d'umbe a onamí doɗ yi ruutite, wo doɗ soɗ an di-tuuge k'ambu me.

²⁵A teepiyadaɗ gette an di-tiipe onamaɗ i-ki t'iide kaɗ soo ye, maɗ Pool y'an di ruute miɗ kino daɗɗal, y'ede: «Unde Kamileɗ ti ruute d'erec a moɗgidaguɗ t'urzi nebi Ezayi,

²⁶t'ede: "K'odo k'ume duwo eɗ k'an di rootoy, k'ede: Kune kun d'olliga kereɗ, wo ono itadaɗ kun ki ti suuna ye, kun di wolla kereɗ, wo munda kun ki y' wolla ye.

27Derec, duwo eŋ kuwwagaŋ an a-ti ŋiy'ye danƙila kono a k'olliga ye, edayaŋ an a-t'ippe kono a ki wolle ye, wo an t'ize tuusiyagi kono ono itadaŋ an gi di'n suune ye. An ize iŋkino kono an ki dehu ye an di-kimo ki tukki nuŋ Raa, n'an t'ele beeko me."»

28Wo Pool y'an di ruute sey, y'ede: «Kun ollo koƙuwo, rabila ere k'uttiyo ki Raa ette an t'elo a ɗoŋ Yawudiyagi ye, wo kane an di-t'olliga.»

29Aame Pool y'a ti ruute iŋkino maŋ, Yawudiyagi an d'iŋgile an di niikutu tarkat tarkat ti tuddaŋ.

30Pool y'a likke ozzine sire a ɓoozɪ weɗe y'a ele soŋko geŋ me, ɗoŋ pay ettiyo wollisaɗi geŋ yi di'n seɗu bey sire.

31Yi kazita urzi Moziko Raa, wo yi dooyiso urzi Galmeega Isa Almasi daa k'orgiso wo daa morkiy'e munda.

Romeŋ

Romeŋ 1

Toose ki Pool

¹Mattup ette i raaniya nuŋ Pool wede naabo k'Isa Almasi. Raa yi ni wiike n'a t'ize wede zina k'Isa, wo yi n'uuye kese kono n'a kizite Rabila Majjaanawa ki Raa.

²Rabila Majjaanawa ette Raa yi ruute y'an t'ela a duwo pay t'urzi nebiyagi an ti riije ti kaaga adda mattupadi.

³⁻⁴Rabila ette tod'te a tukk'Ulí, Galmeegiŋ Isa Almasi. A urzi tudde geŋ, yoŋ y'udfo ti biza bumbu mozigo Dawut. Wo a urzi k'Unde Kamileŋ, Raa ti toogadi y'a ti y' gize Isa yoŋ Ulí, aame yi ti y' bilde ti diine doŋ unto geŋ me.

⁵T'urzi yode ay d'uune beeko ay t'ize doŋ zina k'Isa, kono ay kizite onami a doŋ Yawudiyagi ye pay, ay an ti'n zaape urzi an zaape addaŋ a Isa, an d'olliga onami wo an d'ozire eego. Injino maŋ i di t'ele suma a yode me.

⁶Kune toŋ ti diine kane doŋ Isa Almasi yi wiike geŋno, kun t'ize doŋzi.

⁷Nuŋ ni raaniya a kune zemba pay doŋ Raa yi giyye baadaŋ a geeger ki Room, kune doŋ Raa y'unni wiike kun t'ize doŋzi. Geŋ beeko ti toose ki Meegiŋ Raa ti Galmeega Isa Almasi i koonaa egguŋ.

Pool ti zemba doŋ a geeger ki Room

⁸Ki poone'ŋ, n'a roote koduwo a Raa t'urzi k'Isa Almasi a tukki kune pay, kono adda siidiyagi pay eŋ duwo an rootiyo ki beehiye a urzi zaapu k'adduguŋ a Isa me.

⁹⁻¹⁰Raa wede ni-naabiya ti addo pay a urzi kazita Rabila Majjaanawa a tukk'Ulí geŋ, yoŋ yi suune ono doŋ ni rootiyo eŋ derec me. Aame tuuku ni tonديو Raa maŋ, daayum sunduguŋ ni gi di sedfiyo ye. Wo adda tonديو gette ni tonديو Raa daayum yi dehu maŋ, y'o di t'ihina urzi n'a ette n'un ti'n wollo.

¹¹Injino ki kotto nuŋ mosogo kune baadaŋ, ni dehu n'a ette n'un ti'n wollo, n'un d'ette ti munda wede Unde Kamileŋ t'o ele, kono un t'eley toogo a urzi zaapu k'adduguŋ a Isa.

¹²Wo soŋ aame n'iiney di kune maŋ, in t'ooney toogo ti tuddiŋ, nuŋ ni t'ooney toogo t'urzi zaapu k'adduguŋ a Isa wo kune toŋ kun t'ooney toogo t'urzi zaapu k'addo a Isa kay.

¹³Zemba ki nuŋ, ni dehu kun di suune, nuŋ taŋ baadaŋ n'a dihe urzi n'a ette di kune, wo de Raa y'o ki ti ziki aryago ye bini aŋki. Ni dihe n'a ette di kune kono

naabadó t'aase ti daakatú, aakede naabadó ere n'izo a diine don Yawudiyagi ye adda siidiyagi ongo.

14Nun naabadó n'a ette ki tukki don pay, ise don edayan ohine, don edayan daa k'ohine, ise don i duuye, don i ki duuye ye ton man.

15Kono kamo, gen a kune don i lekkiyo a geeger Room ton, ni dehu n'a ette n'un di kizitey urzi Rabila Majjaanawa.

Rabila Majjaanawa i-d'ede toogo

16Nun o k'ede sukiyagi ye a Rabila Majjaanawa te, kono tod'te toogo Raa, wo urzi k'uttiyo a wede tuuku yi ziipe addi a Isa man, ki poone i t'illiga kane Yawudiyagi, wo kane don Yawudiyagi ye.

17Inkino man Rabila Majjaanawa gette ti'n t'oodibe ita mummino duwo Raa yi di'n isiyo ki diine a daanadi me. Gen t'urzi zaapu k'addan a yode danjal, wo tode zaapu k'adde a Raa gettin ide baa. Gen a-t'ide a ono don an riije ti kaaga adda mattup ki Raa, an'de: «Wede Raa yi yi woliyo ki diine a daanadi gen, yon y'a lekka t'urzi zaapu k'adde a yode.»

Oldiko duwo

18Wo gen Raa t'awwa ti kandaane yi deegu kulkuwadi a tukki don pay isiyo oldiko ere tuuku ti yode wo a don isiyo suldi pay ki diine ye, ti naabadan gette kane derec ki Raa an i t'eegirso ti-ki t'adfiya ye.

19Ki too man suldi don duwo an aane an di suune a tukki Raa gen, a kane suldi gen kere, kono Raa y'an ti'n gize.

20Toogo Raa i lekkiyo ki daayum, wo Raa batum yon mummino, ki ki ti y' wolle ye. Wo de t'ume Raa y'ikkima duniya bini anki ton man, kane suldi don in ki'n woliyo ye gen, kane duwo don eedan soodo a elkiso, an aane an di'n suune t'urzi suldi don y'ikkima genno. Inkino man kane duwo gen, a daana Raa ono don an di roote k'oodibe k'eedan umbo.

21Kane an suune adda k'addan Raa yon ede, wo de an gi di y' tamma ye, wo an ki rootiyo ye koduwo a yode Raa me, ki too man an di t'imme min yode Raa. Wo kacin kane a elkisadan ere daa k'urzutu gette a ti'n lidde, wo t'elkisadan ere umbo gette an di lekkiyo adda zimolo.

22An elkiyo kane an d'ede suuniyo k'ono, kacin an t'ize maadagi.

23Ki too man an di t'imme goaliko Raa yode wede i k'unto ye, wo min a olde yode an d'ikkimta longayi don i deeyiso aa wedusu i d'unto, aa embi, aa seydi don zondan pide pide, wo aa seydi don i morkimso a siido.

24Kono k'inkino Raa y'an iili kono an d'ise suldi pitiiko don tuddan ti dehu genno, gen an ti lattiya tuddan ti suldi sukiyagi don an isiyo gen me.

²⁵Kane d'erec ki Raa an d'iili, wo a olde tode an di daaniya urzi lohito k'ono. An d'ottilso wo an di naabiya a suldi don Raa y'ikkima, wo a yode batum wede ikkima suldi pay gen, an i-ki d'ottilso ye wo an i-ki naabiya ye, ki too man duwo an di y' t'imme ki daayum! Eyye.

²⁶Kono kamo Raa y'an iili kono an di naapu, an d'isiyo suldi sukiyagi. Kane erayi ki moone ti kuuli aa Raa yi dehu an d'iili, wo an di moonite ti tuddan, gen munda wede Raa yi ki dehu ye.

²⁷Kane kuuli ton inkinno kay, ki moone t'erayi aa Raa yi dehu an d'iili, wo tuddan t'an d'an t'umbe berber ki moonite ti tuddan, an d'isiyo suldi sukiyagi. Inkinno a sooruzan ere oldo gette, an d'ooniyo dangay ere d'erec a naabadan.

²⁸Wo kane duwo an di-tuuge an di suune Raa me, gen Raa y'an iili adda k'elkisanan ere oldo gettiyo, inkinno an d'isiyo suldi don k'isiyo ye.

²⁹Kane addan i-t'uune t'ita suldi pay don ki diine ye. An d'isiyo ulsu mirsi, an d'okkiso a suldi pay, kane bundifi, addan an zaapu baadan a suldi duwo, an t'owwo duwo mirsi, an di dehu ono k'ulpi, an daggiya duwo ti metinno, an d'isiyo suldi don ulpi k'a ki wolle ye, wo an di rootiyto ono butte a tukki duwo.

³⁰An dekkiyo duwo, kane adu ki Raa, an kaldita duwo, an di koliyo tuddan, an tamma tuddan t'ono bizaan, elkisanan tin ki dehutu k'urzi k'isiyo k'oldiko ere aware aware, wo k'ollige k'ono maawan an di-toogiyo.

³¹Kane gen an t'isiyo aa don elkisanan umbo, an a-ki ti sooru ye a onaman don an rootiyto me, geyyiso tudde an k'ede ye, wo an ki wolliyo sommagi duwo ye.

³²Ki kotto kane an'ni suune ono don d'erec ki Raa yi ruute, y'ede kane don isiyo suldi don ulpi inkinno gen, an iide k'unto. Ton man kane suldi gen an ki'n ooliyo ye, wo tin genno ton kane an an tettiso bey a don isiyo suldi inkinno gen me.

Romeɗ 2

Booro ki Raa

¹Inkinno kee k'ise wede tuuku ton, ki dekkiyo booro a tukki don ongo man, a daana Raa ono don k'a rootey k'oodibe k'eeda umbo, kono aame ki dekkiyo booro a tukki don ongo wo kee ton k'isiyo aa ki kane kay man, gen kee batum booro ti ki ziida.

²Wo kine in suune Raa gen, yon yi dekkiyo booro a urzi wede d'erec a tukki kane don isiyo suldi don ulpi inkinno gen me.

³Kee wede ki dekkiyo booro a tukki kane don isiyo suldi don ulpi inkinno, wo kee batum k'isiyo aa ki kane kay man, k'elkiyo min ti booro Raa k'a t'alda ko?

⁴Raa geŋ yoŋ beehiye baadaŋ, yoŋ i-d'ede ombiŋe wo wasigale, kunuŋ kane suldi geŋ ki ti'n isiyo ki bita ko? Ki too maŋ beehiyko Raa gette, tod' t'a-di d'ette k'urzi wede k'a-kime lekkiyadá.

⁵Wo kee ki'n ize addá zakidi, ki ki dehu k'a ki-kime lekkiyadá ye geŋ, kee k'okumso kulkuwo Raa baadaŋ a eedá, k'onniyo ere kulkuwadí ti deega geŋ me. Onniyo gette Raa y'a deŋka booro ere derec ki diine a tukki duwo pay.

⁶A wede tuuku toŋ a onniyo gette Raa yi di t'eley munda wede derec a naabadí naabadí.

⁷A kane doŋ i dehu urzi k'isiyo beehiyko kono an t'oona gooliko ti Raa, suma, wo lekkiyo ere ki ki t'inda ye gette, a kane geŋno Raa y'an t'ela lekkiyo ere ki daayum.

⁸Wo de a doŋ i ti toogiyo a derec ki Raa, an k'ollige onamí ye wo an d'isiyo suldi doŋ ki diine ye geŋ, a tukki kane geŋno Raa y'a kulkuwa baadaŋ wo booradí t'a deega me.

⁹Kane doŋ pay isiyo ulsu geŋ an t'oona dabar t'ulbe k'oodiyo baadaŋ. Booro gette ti seeda kane Yawudiyagi doŋ illiga ki poone, wo kane doŋ Yawudiyagi ye pây.

¹⁰Wo de a wede tuuku isiyo beehiyko geŋ, y'a t'oona gooliko ti Raa, suma wo toose, suldi geŋ y'an t'ela a kane Yawudiyagi doŋ illiga ki poone, wo a kane doŋ Yawudiyagi ye pây,

¹¹kono Raa duwo yi'ni wolliyo pay miŋ kaŋ soo.

¹²Kane doŋ pay ize oldiko wo oogoro Muusa an ki ti zuune ye geŋ, an a di t'inda oogoro gette ti ki'n seeda ye. Wo kane doŋ pay oogoro Muusa an ti suune wo an d'isiyo oldiko geŋ, Raa y'a deŋka booro eedaŋ t'urzi k'oogoro gette.

¹³Derec, duwo Raa yi'ni wolliyo ki diine a daanadí, kane doŋ ollige oogoro Muusa geŋno ye. Wo de yoŋ yi wolliyo ki diine a daanadí, kane doŋ a seedu oogoro wo a ti sooru eego.

¹⁴Kane doŋ Yawudiyagi ye geŋ oogoro Muusa an ki ti suune ye, wo t'eedaŋ geŋ miŋ an d'isiyo munda wede aa oogoro ti rootiyo an d'isiyo aa oogoro adda k'addaŋ, wo kaciŋ an ki ti suune ye.

¹⁵An isiyo iŋkino geŋ, an kaza naabo k'oogoro Muusa, Raa y'an ti riŋe a biza k'ulbaŋ. Geŋ elkisadaŋ ere an di suuniyo munda eŋ beehiye eŋ ulsu gette, t'an kaza iŋkino, wo soŋ elkisadaŋ t'an di'n noogiyo a munda wede beehiye an dehu an d'ise, wo ti di'n naakiwsa a munda wede ulsu an dehu an d'ise me.

16Geŋ iŋkino suldi pay geŋ itadaŋ a t'adfa kereŋ a onniyo booro Raa ere yi deŋka t'urzi k'Isa Almasi a suldi doŋ ombide a urzi lekkiyo duwo gette. Geŋ i rootiyo Rabila Majjaanawa ere ni kazita.

Yawudiyagi ti oogoro Muusa

17Wo kune kun'de kune Yawudiyagi, kun zaapu adduguŋ a urzi k'oogoro Muusa, wo kun koliyo tudduguŋ kun d'eesiyo Raa kun yi suune.

18Kune kun suune munda wede Raa yi dehu duwo an d'ise me, t'urzi k'oogoro geŋ kun aane kun di beere munda wede beehiye kono tod' t'un ti'n duuye.

19Kun elkiyo'ŋ kune doŋ i dokkiyo doŋ koŋzayi a urzi Raa, kun elkiyo kune toore ki doŋ i lekkiyo adda zimolo.

20Kun elkiyo'ŋ kune doŋ dooyiso ki doŋ i ki suune munda ye, wo soŋ kun elkiyo kune doŋ dooyiso k'inni. Kun elkiyo iŋkino kono kun'de adda k'oogoro Muusa gette, un d'ede suuniyo a suldi pay wo a derec ki Raa pay.

21Kun ollo, kune kun di dooyiso doŋ oŋgoŋ, wo de ki moo me tudduguŋ batum kun ki ti dooyiso ye me? Kun di kazita a duwo oogire ulu, wo de ki moo me kun d'oogire me?

22A duwo kun di kazita moone t'ere bakada ise ti kule bakatu ulu, wo de ki moo me kune kun di moonite me? Loŋgayi kun azzuru, wo de ki moo me suldi doŋ adda boozan kun t'oogire me?

23Kun koliyo tudduguŋ, kun'de oogoro Muusa kun ti suune, wo kun a-ti doopide a oogoro gette, iŋkino kun ti lattiya suma Raa.

24Ono eŋ an riije ti kaaga adda mattup ki Raa, an'de: «Kono a lekkiyaguŋ ere oldo gette, doŋ Yawudiyagi ye an di kalda suma Raa.»

25Ki kotto, aame oogoro Muusa kun a ti sooru eego maŋ, waldu ponde gette a kune beehiye, wo de kune doŋ i wilda ponde toŋ, a oogoro Muusa kun a ti doopide maŋ, egguŋ aa doŋ i ki wilda ponde ye.

26Wo de aame wede yoŋ daa waldu ponde wo urziyagi k'oogoro Muusa y'a ti sooru eego maŋ, geŋ ki kotto Raa y'a yi wolla a daanadi aakede wede i wilda ponde.

27Wede a urzi tudde daa waldu ponde wo yi sooru a oogoro Muusa maŋ, yoŋ y'a deŋka booro egguŋ kono kune un d'ede mattup k'oogoro Muusa ti urzi waldu ponde, wo kun a-ti doopide.

28Yawudusu toc miŋ wee wee? Kunuŋ yode wede duwo an yi wolliyo y'isiyo suldi doŋ Yawudiyagi ge d'isiyo ko? Kunuŋ wede i wilda ponde a urzi tudde ko? Aha!

²⁹Wo ɗe Yawudusu wede toc miɗ, yoŋ adda k'addi, wo walɗu ponde ere ki kotto gette, tod'te ere adda k'adde, tod' t'ettiyo t'urzi k'Unde Raa, t'urzi k'oogoro ere Muusa yi riije ye. Wedusu geɗ y'ooniyo tamma ti Raa, ti ɗuwo ye.

Romeɗ 3

Raa yoŋ daayum ki diine

¹Inkino maɗ Yawudusu miɗ yi jiire ɗuwo taɗ me? Walɗu ponde tiɗ ɗaakatú moo me?

²Beehiykadaɗ tod'te baadaɗ t'urzi tuuku toɗ maɗ. Ki poone'ɗ Raa y'an ele onamí a bey kane Yawudiyagi.

³Ki kotto Yawudiyagi oŋgoɗ ono Raa an gi di'n ziidá zakidí ye. Wo an ize inkino maɗ, geɗ Raa onamí y'a ki'n seedá zakidí ye ko?

⁴Aha, inkino ye! Kine in suune Raa geɗ yi rootiyo ono ɗoɗ ɗerec, wo ɗuwo pay geɗ ɗoɗ lohito k'ono. Derec, ono eɗ an riije ti kaaga adda mattup ki Raa, an'de: «Kee Raa aame ki rootiyo maɗ, i dehu ɗuwo an gi di suune kee ki diine, wo aame ɗuwo an ɗekkiyo booro eedá toɗ, kee booro ti ki seedu ye.»

⁵Doɗ oŋgoɗ an rootiyo, an'de: «Munda wede in isiyo ki diine ye geɗ, a-noogiyo ɗuwo an di suuniyo Raa yoŋ ki diine.» Wo ɗe geɗ ɗerec maɗ, kine in t'eese moo me? In di roote miɗ, Raa yoŋ ki diine ye ko, aame kulkuwadí ti ɗeegu a tukki kine geɗ me? Ni rootiyo inkino aa ɗoɗ tudde ge rootiyo.

⁶Aha, inkino ye! Derec, Raa yoŋ ki diine, wo aame yoŋ ki diine ye maɗ, ɗe geɗ mummino Raa y'a ɗekka booro a tukki ɗuwo pay me?

⁷Doɗ oŋgo soɗ an rootiyo, an'de: «De aame t'urzi lohito k'onamó geɗ, ɗuwo an di wolliyó kereɗ a jiire ɗerec ki Raa wo i-d'eliyo tamma baadaɗ, ɗe ki moo me booro ti di'n seedu kono n'ize oldíko me?»

⁸Wo inkino maɗ, ki moo me in ki rootiyo ye, «In iso ulsuko kono beehiyko t'aasa baadaɗ» me? Doɗ oŋgoɗ an di rootiyo ono ulpi a tukki nuuno an'de, i rootiyo inkino nuuno batum. Kane ɗoɗ geɗ, ɗerec booro Raa t'anni seedá.

Wede ki diine umbo

⁹Wo ɗe kine Yawudiyagi miɗ, in jiire kane ɗoɗ oŋgoɗ ko? Aha, in ki'n jiire ye! Nuɗ n'un ti gize baa, kane Yawudiyagi ti ɗoɗ Yawudiyagi ye pay kaɗ soo an i dokkiyo oldíko.

¹⁰Ono eɗ an riije ti kaaga adda mattup ki Raa, an'de: «Wenda ki diine a ɗaana Raa umbo, ise soo toɗ maɗ.

¹¹Wenda a suune ɗerec ki Raa umbo, ise wenda soo toɗ umbo a dehe Raa me.

12Kane pay an t'udde t'urzi wede derec ki Raa, pay kaŋ soo an d'isiyo ulsu mirsi, wenda aase munda wede beehiye umbo, ise soo toŋ maŋ.

13Bizaŋ ôoniyo ti suldi doŋ ulpi aakede suldi doŋ adda muuzo ohine, ti ilzaŋ an di daggiya duwo ti metiŋko. T'adda bizaŋ i d'adfiya ono doŋ ulpi aakede naawa makike.

14Ti bohanaŋ i d'adfiya ono doŋ ki duudfiyo ti dekkiso kadigi.

15Zoŋdaŋ soodo k'ettiyo ki tôwwo duwo.

16K'ume tuuku an'tiyo geŋ miŋ, an di lattiya lekkiyo duwo wo an di'n eliyo adda lekkiyo ere ooŋe.

17Wo urzi toose an ki y' suune ye.

18A lekkiyadaŋ gette a Raa an i-k'orgiso ye.»

19Wo aŋkeŋ kine in suune, suldi doŋ pay oogoro Raa ti rootiyo geŋ, ti rootiyo a kane doŋ pay ti'ni dokkiyo geŋŋo, iŋkino wede tuuku toŋ yi ki t'ihina bizi ye, wo doŋ duniya pay an di suune kereŋ kane doŋ k'oldiko a daana Raa me.

20Geŋ kono k'iŋkino wenda soo toŋ umbo, Raa y'a y'ise ki diine a daanadi t'urzi daaniya k'oogoro me, oogoro gette tod' t'eliyo urzi daŋŋal duwo an di suuniyo oldiko ere an ize.

Urzi wede Raa yi d'uttiyo duwo

21Wo aŋkeŋŋo kine duwo pay Raa y'in di'n isiyo ki diine a daanadi, t'urzi doolo daa k'oogoro Muusa. Yo urzi, an in ti y' gize kereŋ adda mattup k'oogoro Muusa ti ono doŋ ki nebiyagi an riine ti kaaga.

22Raa yi di'n isiyo duwo ki diine a daanadi t'urzi zaapu k'adde a Isa Almasi. Urzi geŋ, yoŋ yi y'ihina a kane doŋ pay i ziipe addaŋ a Almasi, kono ise Yawudusu, Yawudusu ye toŋ, âhuntu tudde umbo.

23Duwo pay miŋ an t'ize oldiko, iŋkino an di lidde ti Raa wo ti goolikadi te.

24Wo Raa ti beekadi gette, duwo y'an ize doŋ ki diine a daanadi ki waawiye, t'urzi k'Isa Almasi yoŋ y'an udde t'adda k'oldiko.

25-26Yoŋ geŋ Raa y'elo sedeke, y'a inda puuzadi t'a ibi ki booyiso k'oldiko ki doŋ pay i ziipe addaŋ a yode. Raa y'ize iŋkino, kono yi dehu y'a kize daayum yoŋ ki diine. Yoŋ ki diine ti kaaga to, duwo an ize oldiko toŋ, y'a imbiŋa yi-ki ti'n ele daŋgay ye. Wo aŋkeŋŋo yoŋ daayum ki diine, yi dehu y'a kize yoŋ ki diine, wo y'an ise ki diine a daanadi kane doŋ i ziipe addaŋ a Isa me.

27Iŋkino maŋ munda ede sey ko, wede kine in di kili tuddiŋ me? Aha, umbo baa. De ki moo me? In ki kili tuddiŋ iŋkino ye kono Raa y'in ti'n ize doŋ ki diine a daanadi t'urzi zaapu k'addiŋ a Isa, t'urzi daaniya k'oogoro ye.

²⁸Eyye, kine in suune, kane duwo Raa y'an di'n isiyo don ki diine a daanadi t'urzi zaapu k'addan a Isa, t'urzi daaniya k'oogoro ye.

²⁹Raa geɗ, yoɗ Raa ki Yawudiyagi danɗal ko? Kunuɗ don Yawudiyagi ye pay ton Raazan ko? Eyye, don Yawudiyagi ye ton Raazan pay,

³⁰kono Raa miɗ yoɗ soo danɗal. Y'an isa kane Yawudiyagi ki diine a daanadi t'urzi zaapu k'addan a yode, wo kane don Yawudiyagi ye ton inkinno t'urzi zaapu k'addan a yode kay.

³¹Inkinno maɗ, aame kine in zaapu addin a Isa geɗ, i-kaza oogoro in ti towwo ko? Aha, inkinno ye. Ki too maɗ t'urzi zaapu k'addin a yode geɗ, oogoro itatu i-t'adfiya kereɗ.

Romeɗ 4

Ibirayim meeki don pay i ziipe addan a Raa

¹Wo anken kine in di roote moo me a tukki mugiyin Ibirayim me? Yoɗ wede tudde geɗ yi d'uune moo me?

²Aame Ibirayim Raa yi y' wulle yoɗ ki diine a daanadi kono y'ize naabo ere beehiye maɗ, geɗ i-d'ede urzi y'a kili tuddi. Wo de a daana Raa inkinno ye.

³Ono en an riine ti kaaga adda mattup ki Raa a tukk'Ibirayim, an'de: «Yi ziipe addi a Raa, inkinno Raa y'a yi wulle yoɗ ki diine a daanadi me.»

⁴Kine in suune aame wede yi niibe maɗ, y'a t'one ranɗadi. Wo ranɗadi gette duwo an gi di wolle aa an i ize beeko ye, wo an di wolle aa munda wede i dehu an i di y' t'ele.

⁵Wo de aame wede yi ki niibe ye, wo yi ziipe addi a Raa wede don k'oldiko y'anni woliyo kane ki diine a daanadi me maɗ, yoɗ geɗ Raa yi woliyo wede ki diine a daanadi t'urzi zaapu k'addi a yode geɗ me.

⁶Geɗ inkinno ti kaaga ton Dawut y'a ure a urzi k'unusuwo ki wede Raa yi y' wulle yoɗ ki diine a daanadi, daa ki naabadi ere y'ize, y'ede:

⁷«Unusuwo a kane don Raa y'an t'ize tambobino a doopidadan ere a urzi k'oogoro, wo y'an di buuye oldikadan.

⁸Unusuwo a wede oldikadi Galmeega Raa yi ki ti kaza ye baa.»

⁹Unusuwo gette Raa yi t'elo a kane don i waldu ponde danɗal kunuɗ, a kane don i ki waldu ponde ye pay ko? Kine in rootiyo, in'de: «Ibirayim y'a ziipe addi a Raa, inkinno maɗ Raa y'a yi wulle yoɗ ki diine a daanadi me.»

¹⁰Aame Ibirayim Raa yi y' wulle yoɗ ki diine a daanadi geɗ, yi wilda ponde kunuɗ daa waldu ko? Aha! Ponde yi ki wilda ye, saɗ y'a wilda kollo.

11Ki poone Ibirayim y'a walda ponde botto geɗ miɗ, Raa y'a yi wulle yoŋ ki diine a daanadí, kono yi ziipe addí a yode. Saɗ maɗ Raa yi di ruute y'a wilda ponde, waldu ponde gette munda wede i-kaza Raa yi y' wulle yoŋ wede ki diine a daanadí t'urzi zaapu k'addí a yode. T'urzi geɗ Ibirayim y'a t'ize meeki doŋ pay i ziipe addaɗ a Raa, ise doŋ i ki waldu ponde ye toŋ maɗ, kane geɗ Raa y'an di'n wulle doŋ ki diine a daanadí me.

12Ibirayim y'a t'ize meeki doŋ pay i waldu ponde, geɗ ni rootiyo ti kane doŋ i wilda ponde, wo soŋ an ambu zina ki meegiɗ Ibirayim yoŋ yi ziipe addí a Raa ki poone y'a walda ponde geɗ me.

Urzi zaapu k'adde k'Ibirayim a Raa

13Ti kaaga Raa yi di ruute a Ibirayim yi di t'ela duniya ette a yode wo k'eda k'innizí. Wo yi ruute inkiɗo a Ibirayim kono yi diine oogoro ko? Aha, yi ruute inkiɗo kono yi y' wulle yoŋ wede ki diine a daanadí t'urzi zaapu k'addí a yode.

14Aame suldi doŋ Raa yi ruute y'an t'ela geɗ, kane ki doŋ i daaniya urzi k'oogoro Raa daɗɗal maɗ, urzi zaapu k'adde a Raa geɗ ki bita, wo ono doŋ Raa yi ruute y'aasa geɗɗo toŋ derec i ki lekka ye.

15Derec, urzi k'oogoro geɗ i-deegu kulkuwo Raa a tukki duwo, wo aame oogoro umbo maɗ, doopide a urzi k'oogoro toŋ umbo kay.

16Geɗ kono k'inkino t'urzi zaapu k'adde a yode in t'oono suldi doŋ Raa yi ruute y'in t'ela, kono yi dehu in di suune kereɗ y'in eliyo ti beekadí. Inkiɗo maɗ ono doŋ Raa yi ruute y'aasa geɗ, derec i lekkiyo a kane pay ita k'inni k'Ibirayim. Ono eɗ derec i lekkiyo a doŋ i daaniya oogoro Muusa daɗɗal ye, wo a doŋ pay i ziipe addaɗ a Raa aakede Ibirayim, yoŋ meeki kine pay.

17Derec, ono eɗ an riine ti kaaga adda mattup ki Raa a tukk'Ibirayim, an'de: «Kee n'a ki ti k'ize mugiye k'ita duwo adda siidiyagi baadaɗ.» Ibirayim geɗ yoŋ meegiɗ a daana Raa, kono yi ziipe addí a yode wede doŋ unto y'an d'eliyo lekkiyo, wo munda wede umbo toŋ yi rootiyo i-t'isiyo.

18Ibirayim munda wede yi zaapu elkisadí geɗ yi ki y' ooniyo ye toŋ, yi zaapu elkisadí eego. Y'a ziipe addí a Raa, inkiɗo maɗ Raa y'a y'ize mugiye k'ita duwo adda siidiyagi baadaɗ, geɗ a-t'iide a ono doŋ an riine ti kaaga adda mattup ki Raa, an'de: «Geɗ ita k'innizá toŋ aasa baadaɗ inkiɗo.»

19Aame Raa yi ruute inkiɗo geɗ, Ibirayim ozzinagí ette suma meeda. Yoŋ yi suune tuddí t'urme yi t'aaha k'unto, wo eddí Sara toŋ ti k'aane ti ki t'ehe ye, wo toŋ maɗ yi k'ormiyo ye, yi seedu zakidí a urzi zaapu k'addí a Raa me.

20Ibirayim i-k'ede niiku adda k'addí ye, kono yi suune munda wede Raa yi ruute yi-t'ela geɗ yi y' t'oono. Inkiɗo maɗ t'urzi zaapu k'addí a Raa geɗ yi d'uune toogo wo y'a imme Raazí.

²¹Derec yoŋ y'iyye t'addí pay, Raa i-d'ede toogo yi-t'isa munda wede yi ruute yi-d'isa me.

²²Kono kamo t'urzi geŋ Ibirayim Raa y'a yi wulle yoŋ wede ki diine a daanadí me.

²³Wo de ono eŋ an riije ti kaaga adda mattup ki Raa, an'de: «Ibirayim Raa y'a yi wulle wede ki diine a daanadí» geŋ, an riije a tukki yode daŋŋal ye,

²⁴wo a tukki kine pay, kine toŋ Raa y'in di'n wolla doŋ ki diine a daanadí, kono in ziipe addiŋ a yode wede a bilde Galmeeŋiŋ Isa ti diine doŋ unto.

²⁵Yo Isa, Raa y'an di y'ele a bey duwo, an di y'ide kono k'oldikadiŋ, wo y'a ti y' bilde kono y'in di'n ise doŋ ki diine a daanadí.

Romeŋ 5

Lekkiyo ti toose ti Raa

¹Geŋ iŋkino, t'urzi zaapu k'addiŋ a Isa geŋ, kine Raa y'in di'n ize doŋ ki diine a daanadí. Wo aŋkenŋo kine ti Raa in lekkiyo ti toose t'urzi Galmeeŋiŋ Isa Almasi.

²T'urzi zaapu k'adde a Isa geŋ, yoŋ y'in d'ihina urzi in di lekkiyo zakidi adda beeko Raa, wo kine ulbiŋ in d'ise uŋse kono in zaapu elkisadiŋ in t'oona gooliko ti Raa.

³Wo beehiye a jiire'ŋ, kine in iido dabar toŋ maŋ ulbiŋ in iso uŋse, kono in suune in dabirsa maŋ, geŋ in t'isa doŋ a seedu zakidi t'ombiŋe.

⁴Kine in seedu zakidi t'ombiŋe maŋ, geŋ in t'isa doŋ a seedu zakidi a naabo Raa, aame in iido suldi doŋ ooŋe toŋ maŋ. Kine in seedu zakidi a naabo Raa maŋ, geŋ in t'isa doŋ i zaapu elkisadaŋ a Raa.

⁵Aame in zaapu elkisadiŋ a Raa maŋ, zaapu k'elkiso gette t'in ki ti'n t'ela sukiyagi ye, kono Raa geyyisadi y'in ti tiipe adda k'addiŋ t'urzi k'Unde Kamileŋ ere y'in ele.

⁶Derec, ti kaaga kine in k'ede toogo ye in t'adde t'adda k'oldiko me. Wo onniyo ere Raa y'ele gette ide kotto maŋ, Almasi Raa yi biire y'a iido, y'a inda kono doŋ k'oldiko.

⁷Geŋ ooŋe a wede y'a oyye y'a t'inda a olde wede ki diine me. Koo wede y'a oyye y'a t'inda a olde ki wede isiyo beehiye.

⁸Wo tiŋ geŋŋo toŋ, Raa geŋ y'in t'iidiba ita yoŋ y'inni giyye, y'a igibo Almasi y'a inda kono kine aame kine in lekkiyo botto adda k'oldiko geŋ me.

⁹Derec, aŋkenŋo t'urzi puuzo k'Isa, Raa y'in di'n ize doŋ ki diine a daanadí, geŋ iŋkino kay in suune yoŋ y'in di'n utta ti booro Raa te.

10Derec, kine ti kaaga adu ti Raa me, wo de Raa y'in ti'n gimo in t'ukkiye ti yode t'urzi k'unto k'Ulí. Wo y'in ti'n gimo in t'ukkiye ti yode geɲ, geɲ iŋkino kay in suune Raa y'in di'n utta t'urzi k'Ulí kono yoɲ yi bilde ti diine doɲ unto me.

11Wo beehiye a jiiɛ'e, kine ulbiɲ in d'ise unse ti Raa t'urzi Galmeegiɲ Isa Almasi, yode wede aŋkenɲo y'in ti'n gimo in t'ukkiye ti Raa.

Adum ti Almasi

12T'urzi wedusu soo sundí Adum oldíko ti t'iido adda duniya, wo t'urzi k'oldíko gette unto ti-t'iido duniya. Iŋkino maɲ unto t'a ziida duwo pay, kono duwo pay miɲ an t'ize oldíko.

13Ki poone Raa yi di t'ela oogiradí a Muusa geɲ, oldíko tod'te ede too adda duniya me. Wo aame oogoro umbo geɲ, duwo oldíkadaɲ Raa yi ki ti kaza ye.

14Wo de toɲ maɲ, iise ti Adum bini Muusa geɲ unto i-d'ede toogo too ekki duwo me. Unto gette t'a ziida kane doɲ ize oldíko ti doolo ti ere ki Adum, yoɲ y'ize a munda wede Raa yi ruute k'isa ye toɲ maɲ. Adum geɲ yoɲ undiso ki wede a etto.

15Wo de oldíko ere Adum y'ize ti munda wede Raa y'in elo ti beekadí geɲ, a ki t'iide soo ye. Derec, t'urzi k'oldíko wede soo daɲɲal doɲ baadaɲ an t'inda. Geɲ iŋkino kay in suune, beeko ere Raa y'elo t'urzi wede soo, Isa Almasi gette, Raa y'a ti tiipe ekki doɲ baadaɲ daa dooziyo.

16Wo soɲ munda wede Raa y'eliyo wo ti oldíko ki wede soo y'ize gette, a ki t'ette soo ye. T'urzi k'oldíko ki wede soo y'ize gette, duwo pay booro Raa t'anni ziida. Wo ise a oldíko ere baadaɲ duwo an ize gettiyo toɲ, munda wede Raa y'eliyo ti beekadí geɲ, y'an ize doɲ ki diine a daanadí me.

17Derec, t'urzi wede soo, t'urzi k'oldíko yode soo daɲɲal, unto i-d'ede toogo ekki duwo pay. Geɲ iŋkino in suune, t'urzi wede soo Isa Almasi, kane doɲ ooniyo beeko Raa ere y'eliyo daa dooziyo wo yi di'n isiyo doɲ ki diine a daanadí geɲ, an di lekkey an d'oomey moziko ti yode kaɲ soo.

18Geɲ iŋkino ki daɲɲu, t'urzi k'oldíko wede soo, Adum, booro Raa t'a ziida duwo pay. Geɲ iŋkino kay t'urzi naabo ere ki diine ki wede soo, Isa Almasi, Raa y'aane y'an ise duwo pay ki diine a daanadí, wo t'urzi geɲ an t'oone lekkiyo ere ki daayum.

19Geɲ kun wollo, t'urzi wede soo y'a ti diipida ono Raa, duwo baadaɲ an t'iire adda k'oldíko. Geɲ iŋkino kay t'urzi wede soo y'illiga ono Raa, duwo baadaɲ Raa y'an di'n ize doɲ ki diine a daanadí.

20Raa y'a elo oogoro, wo oldíko t'a t'ize baadaɲ, wo de aame oldíko ti t'ize baadaɲ maɲ, beeko Raa t'a t'ize baadaɲ a jiiɛ'e sey.

21Ti kaaga oldfiko i-d'ede toogo ekki kine duwo t'in di'n tôwwo. Injino kay ankenno beeko Raa i-d'ede toogo t'in di'n isiyo kine duwo ki diine a daanadi, injino in t'ooney lekkiyo ere ki daayum t'urzi Galmeegiñ Isa Almasi.

Romeñ 6

Unto wo lekkiyo kañ soo t'Almasi

1Ankeñ kine in di roote moo me? In di lekke kettiyo t'oldfiko kono beeko Raa t'a t'ise baadañ ko?

2Aha, injino ye! Kine a daana k'oldfiko tuddiñ aa unto, de mummino in di lekke adda k'oldfiko sey me?

3Kune un dunde ko? Kine don pay an in ti zuyye batem geñ, in aa ti gitte kañ soo ti Isa Almasi me, wo t'urzi suyyiso batem geñ, kine in aa ti gitte kañ soo ti yode a untadi.

4Injino mañ t'urzi suyyiso batem geñ, aakede kine an in ti'n ittiba kañ soo ti Almasi a untadi. Geñ aakede Almasi yi bilde ti diine don unto t'urzi toogo ere ki gooliko Meegiñ Raa geñ, injino kine ton in di lekke lekkiyo ere aware aa ki yode kay.

5Aame kine in aa ti gitte biñ ti yode kañ soo a urzi k'untadi mañ, geñ derec a baldiyadi ton, kine kettiyo kañ soo ti yode.

6Ono eñ kun ollo koduwo, aame Isa Almasi an ti y' tiike ekk'undumu wede zaapu t'ekki bakadi kañ tontilko geñ, lekkiyadiñ ere ti poone adda k'oldfiko gette an ti-tiike ti yode Almasi, injino mañ tuddiñ ere k'oldfiko gette Raa y'a ti jiiere toogatu a t'ize umbo, geñ kine bulagi k'oldfiko ye baa.

7Derec, wede y'inda geñ yi t'ufde t'adda k'oldfiko me.

8Wo de aame kine in t'inda ti Almasi kañ soo mañ, geñ in ambo in di lekkey zeere kay ti yode me.

9Kine in suune'ñ, Almasi t'ume yi bilde ti diine don unto geñ ki sirwe yi ki t'inda ye, kono unto i-k'ede toogo ye baa a tukki yode me.

10Almasi untadi ere y'inda kañ soo gettiñ mok baa a t'iide, wo untadi gette t'oldfiko t'a ti'n diikida. Ankenno yon zeere, yi lekkiyo ki Raa.

11Geñ injino kay kun ti wollo tuddugun aa unto a daana k'oldfiko me, wo a daana Raa tuddugun kun ti wollo aa zeere kono kun lekkiyo kettiyo kañ soo t'Isa Almasi.

12Injino mañ kun i oola urzi a oldfiko ti t'oona toogo a tuddugun ere k'unto ye, wo kun gi di daane suldi don ulpi tuddugun ti dehu geñno ye.

¹³Kun oola mokugun tuuku ton y'isa naabo ere k'oldiko ye, aa arku k'isiyo munda wede ki diine ye. Wo gen kun i elo tuddugun a Raa aakede don i bilde ti diine don unto anken an lekkiyo zeere, wo kun elo mokugun tuuku ton ki naabo Raa aa arku wede k'isiyo munda wede ki diine.

¹⁴Gen oldiko i-k'ede toogo a tukki kune ye, kono kune un ki'n dokkiyo oogoro ye, unni dokkiyo beeko Raa.

Kine bulagi k'aaye?

¹⁵Ki kotto kine in ki'n dokkiyo oogoro ye, wo inni dokkiyo beeko Raa man, gen i-kaza in d'ise oldiko baa ko? Aha, inkino ye!

¹⁶Kune kun suune, aame kun ele tuddugun a wede kun i di naabe man, kun d'olliga onami, kun t'ise bulagi ki wede kun ollige onami genno. Aame oldiko i-ede toogo ekki kune man, kune bulagutu wo un d'etta unto, wo aame ollige k'ono Raa gette i-d'ede toogo ekki kune man, kune bulagutu wo Raa y'un di'n isa don ki diine a daanadi.

¹⁷Wo in rooto koduwo a Raa, kono ti kaaga kune bulagi k'oldiko, wo de ankenno dooyiso ere an unni duuye gette kun illiga, kun d'umbe t'addugun pay wo kun sooru eego.

¹⁸Kune Raa y'un ti'n udde t'adda k'oldiko me, wo kun t'ize bulagi kono kun d'ise munda wede ki diine aa yi dehu.

¹⁹Onamo ni rootiyo en a suuniyo ere ki don tudde, kono suldi itadan kun ki ti suuniyo koduwo ye. Gen ti kaaga kun ti t'ele tuddugun pay adda buliko k'isiyo suldi pitiiko, ti doopide ere kun a ti doopide a urzi k'oogoro un ti'n lediyo ti daana Raa. Wo ankenno kun ti-t'iso tuddugun bulowo k'isiyo naabo ere ki diine kono y'un di'n isa don ooyiso kese a yode.

²⁰Ti kaaga aame kune bulagi k'oldiko gen, kune'n seegun ye a naabo ere ki diine aa Raa yi dehu te.

²¹Aame kun izite suldi don ankenno un t'ize sukuyagi gen, kun d'uune moo me? Ki kotto kane suldi gen, a duwo an di'n t'etta k'ume k'unto.

²²Wo de ankenno Raa y'un ti'n udde t'adda k'oldiko me, kun t'ize bulagi yode, kun d'isiyo naabo ere beehiye aa yon yi dehu, inkino y'un di'n uuye kese a yode, gen a duwo an di'n t'etta k'ume lekkiyo ere ki daayum.

²³Derec, oldiko gette ranntatu unto, wo de munda wede Raa y'eliyo ki waawiye gen lekkiyo ere ki daayum, kono y'in ti'n gitte kan soo ti Galmeegin Isa Almasi.

Rome 7

Oogoro i-k'ede toogo ekki kine ye

¹Zemba ki nuɗ, ki kotto ono ɗoɗ ni roota eɗ, kune kun'ni suune adda k'addugun, kono urzi k'oogoro kun yi suune: Oogoro gette i-d'ede toogo ekki wedusu'ŋ aame yoɗ zeere ɗaɗɗal.

²Inkino maɗ erewo ti ziida kule geɗ, tod'te kettiyo a kulatú t'urzi k'oogoro aame yi lekkiyo zeere geɗ me. Wo ɗe aame kulatú y'inda maɗ, oogoro seedu gette ti ki ti seeda ye baa, tod'te ettú toore.

³Wo aame kulatú yoɗ zeere yi k'inda ye wo ti y'iili, ti ziida kule doolo maɗ, geɗ an di waaka ere ti moone ti kule bakatú. Wo ɗe aame kulatú y'inda maɗ, tod'te ettú toore, t'aane t'a seeda kule doolo, oogoro ti ki ti seeda ye, geɗ an gi di wolla ere i moone ti kule bakatú ye.

⁴Geɗ inkino kay zemba ki nuɗ, kune eggun aa unto a ɗaana k'oogoro me, kono t'urzi tudde k'Almasi y'ele ki sedeke gette, aa kun t'inda kaɗ soo ti yode. Inkino maɗ kine in t'ize ɗoɗ k'Almasi wede i-bilde ti diine ɗoɗ unto, kono naabadiɗ t'aase ti ɗaakatú a Raa me.

⁵Derec, ti kaaga kine in likke lekkiyo ere aa tudde ti dehu, aame geɗ sulɗi ɗoɗ in d'eliyo liikiwe ki ɗaapu an d'ooniyo toogo t'urzi k'oogoro an di naabiya adda tuddiɗ, inkino in d'ettiyo unto.

⁶Ti kaaga oogoro t'in ti'n ziida aakede ɗoɗ ɗaɗɗay, wo aɗkenno kine a ɗaanatú aa ɗoɗ unto kono Raa y'in ti'n uɗɗe ti toogatú me. Inkino maɗ in naabo a Raa t'urzi wede aware Unde Kamilen t'inni dokkiyo, wo in ki'n dokkiyo urzi wede mazzini k'oogoro Muusa geɗno ye baa.

Oogoro ti oldiko

⁷Inkino maɗ kine in t'eese moo me, oogoro gette tod'te oldiko ko? Aha, inkino ye! Wo ɗe ni zuune oldiko t'urzi k'oogoro. Aɗki oogoro ti ki ruute «zaapu k'adde a munda wedusu ulu» ye maɗ, nuɗ zaapu k'adde a munda wede gette ni ki ti suune ye.

⁸Wo t'urzi k'oogoro geɗ oldiko ti d'uune urzi ti nuɗ, inkino ni zaapu addó a sulɗi ɗuwo ɗoɗ tuuku toɗ maɗ. Derec, daa k'oogoro maɗ, oldiko gette ettú aa munda unto.

⁹Ti kaaga aame oogoro ni ki ti zuune ye geɗ, ni lekkiyo aa addó i dehu, wo ɗe aame oogoro ni ti zuune maɗ, oldiko t'a jiiire eedó,

¹⁰wo nuɗ aa n'inda: Oogoro ere Raa y'elo kono ɗuwo t'an d'an t'ette k'ume lekkiyo geɗ, a nuɗ o-t'ize urzi k'unto.

¹¹Inkino t'urzi k'oogoro geɗ, oldiko ti d'uune urzi t'a ti n' mibilde, wo t'urzi tode gette o d'iide unto.

¹²Geŋ iŋkino oogoro Raa gette tode batum kamileŋ, wo urziyagutú toŋ kane kamileŋ, ki diine wo beehiye.

¹³Iŋkino maŋ munda wede beehiye geŋ, a nuŋ o-t'ise urzi k'untadó ko? Aha, iŋkino ye! I n'íide'ŋ oldíko. Geŋ t'urzi k'oogoro ere beehiye gette, oldíko ti d'uune urzi ki tówwadó. Iŋkino maŋ in suuno oldíko tod'tiŋ ki kotto oldíko, wo t'urzi k'oogoro geŋ oldíko itatú a t'udde kereŋ, tod'tiŋ oldó a jiire pay.

Oldíko ti jiire ekki duwo

¹⁴Ki kotto kine in suune oogoro gette t'ettiyo t'urzi k'Unde Raa, wo de nuŋ wede tudde eŋ, n'a t'ize bule k'oldíko.

¹⁵Geŋ munda wede n'isiyo, ni ki y' suuniyo ye. Iŋkino munda wede ni dehu n'aase geŋ, ni ki ti y'isiyo ye, wo de ni-t'isiyo munda wede n'azzuru.

¹⁶Wo aame munda wede ni ki y' dehu ye geŋ ni ti y'isiyo maŋ, geŋ i-kaza oogoro gette ni ti suune adda k'addó tod'te beehiye.

¹⁷Geŋ isiyo iŋkino nuuno ye, isiyo'ŋ oldíko ere i lekkiyo adda k'addó.

¹⁸Derec, ni suune munda wede beehiye geŋ yi ki lekkiyo ye adda k'adde nuŋ wede tudde eŋ me. Ki kotto nuŋ o d'ede mosogo k'isiyo munda wede beehiye, wo toogadó umbo ni k'aaniya ni ki ti y'isiyo ye.

¹⁹Iŋkino maŋ munda wede beehiye ni dehu n'aase geŋ, ni ki ti y'isiyo ye, wo ni-t'isiyo munda wede ulsu ni ki dehu ye.

²⁰Wo aame munda wede ni ki y' dehu ye geŋ ni ti y'isiyo maŋ, geŋ isiyo nuuno ye, isiyo oldíko ere i lekkiyo adda k'addó.

²¹Iŋkino maŋ, nuŋ ni dehu n'aase munda wede beehiye, wo de adda k'addó ni d'owwiyo munda i ni dokkiyo ede, ni d'isiyo miŋ munda wede ulsu daŋŋal.

²²Ki kotto nuŋ batum adda k'addó geŋ, ulbó o isiyo uŋse'ŋ ki daaniya k'oogoro Raa,

²³wo de ni d'owwiyo adda tuddó munda i ni dokkiyo ede, yi deyyiso ti oogoro Raa ere nuŋ n'iyye elkisadó pay eego. Munda wede i ni dokkiyo adda k'addó geŋ, yi-ti n' gitte miŋ k'isiyo k'oldíko.

²⁴Wayya nuŋ eŋ, sommagi o di-t'iide! Wee wee a n'adfa ti tuddó ere o d'etta unto ette?

²⁵Geŋ in rooto koduwo a Raa t'urzi Galmeegiŋ Isa Almasi! Iŋkino maŋ t'elkisadó pay nuŋ n'a iyye n'a t'ize bule k'oogoro Raa, wo a urzi tudde ni t'ize bule ki munda wede i ni dokkiyo adda k'addó k'isiyo k'oldíko geŋno.

Romeŋ 8

Lekkiyo ti toogo ere k'Unde Kamilen

- ¹Inkino maɲ aɲkenno eɲ, doɲ i lekkiyo kettiyo kaɲ soo t'Isa Almasi geɲ, booro Raa ti ki'n seeda ye baa.
- ²Derec, wede yi lekkiyo kettiyo kaɲ soo t'Isa Almasi maɲ, munda wede i yi dokkiyo geɲ, Unde Kamilen ere ti d'eliyo lekkiyo. Tode gette t'a y'udde ti munda wede i yi dokkiyo k'isiyo k'oldiko wo ti unto.
- ³Munda wede oogoro Muusa ti k'iine ti ki y'ize ye kono kine doɲ tudde in k'ede toogo in ki d'ozire a urzi genno ye geɲ, Raa y'a y'ize. Inkino maɲ y'a igibo Ulí y'a iido ti tudde ere aa ki kine doɲ k'oldiko kono y'in di'n adde t'adda k'oldiko, tiɲ geɲ oldiko ere duwo an isiyo y'a-t'iide mentú.
- ⁴Y'ize inkino kono munda wede ki diine oogoro ti dehu geɲ a t'ise ekki kine, kono in gi di lekke aa tudde ti dehu ye, wo in di lekke aa Unde Kamilen ti dehu.
- ⁵Inkino maɲ kane doɲ i lekkiyo aa tudde ti dehu geɲ, elkiyadaɲ a suldi doɲ tudde ti dehu. Wo kane doɲ i lekkiyo aa Unde Raa ti dehu geɲ, elkiyadaɲ a suldi doɲ Unde Kamilen ti dehu kay.
- ⁶Aame wede y'elkiyo a suldi doɲ tudde ti dehu wo yi daaniya maɲ, y'ette k'ume k'unto, wo de wede y'elkiyo a suldi doɲ Unde Kamilen ti dehu wo yi daaniya maɲ, y'ette k'ume lekkiyo wo ti toose.
- ⁷Suldi doɲ pay ulpi tudde ti dehu geɲ, kane adu ki Raa, kono tudde gette ti di-toogiyo ki daaniya k'urzi k'oogoro Raa me, umbo ti k'aaniya ye.
- ⁸Kane doɲ i lekkiyo aa tudde ti dehu geɲ, kane an k'aane an ki t'ise ye munda wede Raa ulbí i-d'ise unse me.
- ⁹Wo de kune, kun ki lekkiyo aa tudde ti dehu ye, kun lekkiyo aa Unde Raa ti dehu, kono Unde Raa tod' ti lekkiyo adda k'addugun. Aame wede i-k'ede Unde k'Almasi adda k'addí ye maɲ, yoɲ ki Almasi ye.
- ¹⁰Aame Almasi adda k'addugun maɲ, ki kotto tuddugun t'a t'inda kono k'oldiko me, wo Unde Raa ere adda k'addugun t'un d'eliyo lekkiyo, kono Raa y'un ti'n ize doɲ ki diine a daanadí.
- ¹¹Wo aame Unde ki wede a bilde Isa ti diine doɲ unto gette tod'te adda k'addugun maɲ, yode wede a bilde Isa Almasi ti diine doɲ unto geɲ, yi-t'ele lekkiyo a tuddugun ere k'unto gette t'urzi k'Unde Raa ere i lekkiyo adda k'addugun.
- ¹²Geɲ inkino maɲ zemba ki nuɲ, kine in d'ede see ki lekkiyo ere aa Raa yi dehu, wo de seeziɲ a urzi tuddiɲ ti dehu ye, inkino in gi di lekke aa tuddiɲ ti dehu ye.
- ¹³Aame kun lekkiyo aa tudde ti dehu maɲ, kun di t'inda. Wo de aame t'urzi k'Unde Raa suldi doɲ ulpi tudde ti dehu geɲ kun'n iila maɲ, kun di lekka.

14Derec, kane donj i ni dokkiyo Unde Raa geɗ, kane inɗi Raa.

15Kune Unde Raa kun uune geɗ, t'un gi di'n ise bulagi wo kun ki d'orgide ye. Wo de tode Unde Raa gette t'un di'n ize kun t'ize inɗi Raa ki kotto, t'urzi geɗ in di y' waaku «Abba!» I-kaza Meegó.

16Tode Unde Raa batum t'in d'isiyo adda k'addiɗ in di suuniyo ki kotto kine inɗi Raa.

17Derec, kine inɗi Raa geɗ, in t'ooney aggadiɗ t'adda suldi pay donj i-d'ede in t'ooney t'Almasi kaɗ soo, kono aame kine in dabirsa aa yoɗ yi dibire maɗ, geɗ in t'ooney daryika ti yode kaɗ soo.

Daryika ere ki daana

18Nuɗ ni suune adda k'addó, dabar ere in dabirsa aɗkenno ette, tod'te aa munda ki bita a daana daryika Raa ere y'in kizey a kandaane gette.

19Kane suldi donj pay Raa y'ikkima geɗ, an delliyo gottitoɗ, woogo me Raa y'a ti'n kiza inɗizi kereɗ, kane aɗ wee wee.

20Kane suldi donj pay Raa y'ikkima geɗ, an t'iire a bey toogo ere t'an gi di'n t'etta ki tunda ye. Kane suldi geɗ i ki dihe kane batum ye, wo de in ele k'adda toogo gette yode Raa batum. Wo toɗ maɗ kane suldi geɗ an zaapu elkiyadaɗ a Raa,

21kono onniyo soo kane suldi pay geɗ Raa y'an adda t'adda toogo ere ki lattiya ti-ti'n isiyo bulagi geɗ me. Inkiɗo maɗ an t'isa eedaɗ toore, wo daryika ere inɗi Raa an t'ooney gette kane toɗ adda kay.

22Kine in suune, suldi donj pay Raa y'ikkima geɗ, aɗkenno an dawilsa botto aa erewo addutu i t'umbe k'ehiyo.

23I ki dawilsa kane suldi geɗo daɗɗal ye, kine pay donj uune Unde Kamileɗ aa barta ere ki poone ki suldi donj Raa yi ruute y'in t'ela geɗ me, kine in dawilsa adda k'addiɗ, koore in delliyo onniyo ere tuddiɗ Raa y'a-t'adda t'adda dabar ere k'oldiko, in t'isa inɗizi a-t'etta a munda wede yi dehu.

24Derec, kine in uune uttiyo wo in zaapu elkisadiɗ eego botto. Wo aame suldi donj in zaapu elkisadiɗ eego in'ni wulla maɗ, geɗ zaapu k'elkisadiɗ eego umbo baa. Inkiɗo suldi in'ni wolliyo geɗ in di zaape elkisadiɗ eego sey ko?

25Wo aame in zaapu elkisadiɗ a munda wede in ki y' wolliyo ye maɗ, geɗ in di y' delle ti ombiɗe.

26Geɗ inkiɗo kay, Unde Raa toɗ t'in di'n noogiyo, kono kine toogadiɗ baata a urzi Raa me. Urzi tonɗiyo Raa wede beehiye toɗ in ki y' suune ye, wo tode Unde Kamileɗ batum ti-tonɗiyo Raa kono kine, ti-dakiysa ti ono donj ki k'aane ki ki ti'n roote ye.

27Raa geŋ yi y' wolleyo munda wede a biza k'ulbe wedusu me, wo munda wede Unde Kamileŋ ti dehu t'a tonde geŋ yoŋ yi y' suune. Derec, Unde gette ti tonديو Raa kono kine doŋzi aa yoŋ yi dehu.

28Kine in suune Raa yi naabiya a suldi pay ki beehiyko kane doŋ i yi geyyiso, kane geŋ yi'ni wiike kono a-t'ette a munda wede yoŋ yi dihe ti poone.

29Kane doŋ Raa yi'ni zuune kane ki yode ti poone too geŋ, yoŋ yi dihe ti poone too y'an ise an di deeye Ulí, kono yoŋ geŋ y'a t'isa goole ki zamba baadaŋ.

30Kane doŋ Raa yi'ni dihe ti poone too geŋ, y'a-ti'n wiike pây. Kane yi ti'n wiike geŋ, y'an di'n ize doŋ ki diine a daanadí. Wo kane yi'n ize doŋ ki diine a daanadí geŋ, an d'uune dary'ikadí pây.

Geyyiso Raa tod'te meeda

31Kine in di roote moo sey a ceere me? Aame Raa yoŋ ki kine maŋ, wee wee aasa adu ti kine in di'n ceera me?

32Raa geŋ Ulí k'aggadí toŋ yi ki ti y' lidde ye ti dabar te, wo yi y'elo sedeke ki kine duwo pay, inŋino maŋ ki kotto ti Ulí geŋ suldi pay yi'n t'ela ti mozuwo.

33Wee wee a sakiya doŋ Raa yi biire me? Wenda soo toŋ umbo, kono kane Raa yi'n ize doŋ ki diine a daanadí me.

34Wee wee a roota kane booro ti'ni ziida me? Wenda soo toŋ umbo, kono Isa Almasi yoŋ y'inda, wo beehiye a jire sey y'a bilde ti diine doŋ unto y'a-gili k'awwa, ankeŋ yi lekkiyo a ammade Raa wo yi tonديو Raa kono kine.

35Moo me in ti'n deŋka ti geyyiso ere k'Almasi te? Dabar kunuŋ, ulbe k'oodiyo baadaŋ kunuŋ, dabar ere t'urzi duwo kunuŋ, mosogo kunuŋ, lekkiyo bey sok sokeŋ kunuŋ, lekkiyo ere aa a biza zire kunuŋ, unto ere a bey duwo ko? Kane geŋ an in ki ti'n deŋka ye ti geyyiso ere k'Almasi te.

36Geŋ a-t'iide a ono doŋ an riŋe ti kaaga adda mattup ki Raa, an'de: «Kono ki kee Raa geŋ, kaye duwo an ay di'n tôwwo daayum. Kaye an ay di'n wolleyo aa dambami ki waldufu.»

37Wo de ti suldi doŋ pay in aaniya geŋŋo toŋ, kine in t'umbe eego a jire t'urzi yode wede inni giyye.

38-39Eyye, nuŋ ni suune adda k'addó, munda soo toŋ umbo in ti'n deŋka ti geyyiso Raa te: ise in t'inda, ise in lekkiyo zeere, ise maaleekiyagi, ise doŋ doolo an d'ede urzi ki dokkiyo wo an d'ede toogo, ise suldi doŋ ankeŋŋo, ise suldi doŋ etto k'ita, ise suldi doŋ an d'ede toogo a kandaane, ise suldi doŋ ti dandi siido, ise munda ti doolo Raa y'ikkima toŋ maŋ. Geŋ munda umbo wede a aana in ti'n deŋka ti geyyiso Raa, wede in iidiba ita t'urzi Galmeegiŋ Isa Almasi me.

Romeŋ 9

Raa ti doŋ yi biire

¹Ono ni rootiyo eŋ kane derec, ni ki lohito ye kono nuŋ ni lekkiyo kettiyo kaŋ soo t'Almasi. Elkisadó ere ki suuniyo munda eŋ beehiye eŋ ulsu gette, i ti dokkiyo Unde Kamileŋ t'o di kaza ono doŋ ni rootiyo kane derec.

²Nuŋ o-t'ize sommagi dondoŋ wo addó i n'aadumu daayum.

³Derec, aame i-t'ise maŋ, nuŋ batum Raa yi ti'n duudo, n'a-ledde t'Almasi kono zembadó Yawudiyagi an d'utte, kane doŋzó a urzi tudde me.

⁴Kane doŋ k'Izirayel geŋ Raa y'anni biire kono an t'ize inŋizí, y'an di gize toore goolikadí, y'a-gittite taasawa ti kane, y'an d'ele oogiradí, y'an d'ele urzi an i-d'ottile, y'an di ruute suldi doŋ y'an t'ela,

⁵wo kane an uddo ti biza bumbu moŋgidagaŋ doŋ sudaŋ t'a îile. Wo Almasi Raa yi biire a urzi tudde y'uddo ti biza bumbu kane, yode wede t'ekki suldi pay, geŋ in amma Raa ki daayum! Eyye.

⁶Geŋ i-kaza ono doŋ Raa yi ruute geŋ i ki t'ingile ki bita ye, kono kane doŋ ti biza bumbu k'Izirayel pay geŋ, kane pay doŋ Raa doŋ ki kotto ye.

⁷Raa yi di ruute a Ibirayim y'a t'oona ita k'inŋi, doŋ a t'isa inŋi Raa ki kotto. Aame yi ruute inŋino geŋ, yi ki ruute ti ita k'inŋi k'Ibirayim pay ye, kono Raa yi ruute ti kaaga a Ibirayim, y'ede: «Geŋ t'ita k'inŋi k'Isaaka duwo an di'n waaka ita k'inŋizá.»

⁸Geŋ i-kaza inŋi k'Ibirayim doŋ an ehe a urzi tudde geŋ, kane pay inŋi Raa ki kotto ye, ita k'inŋi k'Ibirayim ki kotto kane doŋ an ehe a-t'iide a ono doŋ Raa yi ruute y'aasa.

⁹Eŋno ono doŋ Raa yi ruute y'aasa me, y'ede: «Nuŋ konno ume kino sey geŋ n'a kimo di kee, wo aame ni kimo geŋ eddá Saara t'ulo a beytú baa.»

¹⁰Wo geŋno daŋŋal ye, in elko soŋ a Rebeka tod' t'ehe inŋi rooŋo kuuli meegaŋ yoŋ mugiyiŋ Isaaka.

¹¹⁻¹³Kane inŋi adda k'adde meedaŋ botto geŋ, an k'ize munda k'ulsu ye, ki beehiye ye. Wo toŋ maŋ Raa yi di ruute a Isaaka, y'ede: «Wede goole y'a t'isa wede naabo ki leemadí neŋku.» Geŋ a-t'iide a ono an riŋe ti kaaga adda mattup ki Raa, an'de: «Nuŋ Raa n'a giyye Yakup, wo Ezayu n'a ti y' lidde.» Raa y'ize inŋino kono munda wede yi dehu geŋ a t'ise. Yoŋ yi beeriyo duwo aa addí i dehu, t'urzi naabadaŋ ye wo de t'urzi yode Raa siidí i'ni waaku duwo me.

¹⁴Inŋino maŋ kine in t'eese moo me? Raa geŋ y'isiyo munda wede ki diine ye ko? Aha, inŋino ye!

15Yon̄ yi ruute ti kaaga a Muusa, y'ede: «Ni-d'ise adde koduwo a wede tuuku ni dehu ni d'ise adde koduwo, wo n'a wolle sommagi ki wede tuuku ni dehu n'a wolle sommagi.»

16In̄kino maṅ kane suldi geṅ an ettiyo t'urzi munda wede duwo an dehu ye, t'urzi toogadaṅ ye, wo de an ettiyo t'urzi k'adde koduwo ki Raa siidi.

17Geṅ in̄kino an riine ti kaaga adda mattup ki Raa ono don̄ Raa yi ruute a Parahon̄ mozigo ki siido Misir, y'ede: «Kee ni ki biire mozigo wo eeda n'a-ti t'ize zakidi miṅ, kono t'urzi kee duwo an di suuna toogadó wo an di kazita sundó adda siido pay.»

18In̄kino maṅ Raa geṅ, a wede tuuku yi dehu yi-d'ise adde koduwo maṅ, yi-d'isiyo, wo a wede tuuku yi dehu y'a y'ise eedi zakidi maṅ, yi di y'isiyo.

Raa geṅ yon̄ aakede wede k'aabuđu

19Wo de suldi Raa yi ti'n isiyo in̄kino maṅ, koo wenda y'o di roote, y'a t'ese: «Ki moo me a duwo yi d'eesiyo an isiyo ulsu me? De wee wee a aane a-tooge a munda wede yi dehu y'aase me?»

20Kee wedusu miṅ wee wee, k'a niike Raa me? Kunuṅ munda aabuđu geṅ, y'aane yi roote koo a wede i y'iibida, y'a t'ese: «Ki moo me ki n'iibida kino me?»

21Wede k'aabuđu geṅ y'aane yi d'aabida munda wede aa addi i dehu ti lee wede luttio geṅ me. Ti lee wede yi lutte geṅ miṅ yi d'aabida ooko majjaanawa k'eliyo munda a don̄ suma, wo son̄ yi d'aabida ooko ki naabo adda boy ere daayum.

22In̄kino maṅ Raa y'a dihe y'an di kize kulkuwadi a duwo wo an di suune toogadi. Geṅṅo ton̄ yon̄ yi di'n sarkiya t'ombine, kane don̄ iide kulkuwadi t'a deege eedaṅ geṅ me, kane geṅ ki daggiya goppon̄.

23Wo de a don̄ on̄go son̄ y'an d'ize adde koduwo, y'a dihe y'an di kize laale wede baadaṅ ki daryikadi. Kane geṅ don̄ Raa yi'n ikkima ki poone too an d'etta ki daryikadi.

24Kine ton̄ adda, kine don̄ Raa yi wiike t'adda diine don̄ Yawudiyagi dan̄ṅal ye, t'adda diine don̄ Yawudiyagi ye pay.

25Geṅ derec ono don̄ Raa yi ruute ti kaaga adda mattup ki nebi Oze, y'ede: «Kane don̄ ti poone don̄zó ye geṅ, n'an di'n waaka don̄zó. Wo kane don̄ ki geyyisadó ye geṅ, n'an di'n waaka don̄ ki geyyisadó.

26Wo a ume wede n'an di ruute, n'ede: “Kune don̄zó ye” geṅ, an̄geṅṅo batum an di'n waaka in̄ni Raa zeere.»

27Nebi Ezayi ton̄ y'a gizite a tukki don̄ k'Izirayel, yi d'eesiyo: «Ise don̄ k'Izirayel kane baadaṅ aa dolso a biza bar ton̄ maṅ, i d'utta don̄ miibi dan̄ṅal ti diinayan̄ me.

²⁸Derec, ono don Galmeega Raa yi ruute geɗ, kesiko y'an isa pay a siido me.»

²⁹Suldi geɗ a-t'iide a ono don Ezayi y'a ruute ti kaaga, y'ede: «Aame Galmeega Raa Goole k'arka geɗ, y'in ki guute ita k'inni miibi ye maɗ, aɗki in t'ize aakede don ki geeger Sodom, in di deeye aa don ki geeger Gomor Raa yi'n uute.»

Don k'Izirayel an ti tuuge ki zaapu k'addan a Raa

³⁰Inkino maɗ kine in t'eese moo me? Kane don Yawudiyagi ye, an ki dehu an ki t'ise don ki diine a daana Raa ye ton, kane Raa y'anni wulle don ki diine a daanadi t'urzi zaapu k'adde a yode.

³¹Wo de kane don k'Izirayel an dehu an t'ise don ki diine a daana Raa t'urzi daaniya k'oogoro geɗ, an a biite a urzi soorutu me.

³²An aa biite kono kane an ki dihe an t'ise don ki diine a daana Raa t'urzi zaapu k'adde a yode ye, an elkiyo an t'isa t'urzi naabadaɗ. Kane geɗ an di guhe ekki wede aa makkolo ere k'eliyo morkiy'e a duwo.

³³Ono en an riije ti kaaga adda mattup ki Raa, an'de: «Kun wollo a geeger ki Siyon gette, ni ziipe wedusu aa makkolo k'eliyo morkiy'e a duwo, makkolo ere ki-t'oore. Wo wede yi ziipa addi a yode maɗ, yi-ki seeda sukiyagi ye.»

Romeɗ 10

Yawudiyagi ti don Yawudiyagi ye Galmeega miɗ soo

¹Zemba ki nuɗ, munda wede ni dehu t'addo pay, wo ni tondiyo Raa kono kane Yawudiyagi geɗ, Raa y'an di'n utte.

²Derec, nuɗ Pool en ersado ti wulle, kane wehini a naabo ere an isiyo a urzi Raa gette, wo de naabo ere wehini gette an isiyo daa suuniyo k'urzi wede derec.

³Kane urzi wede Raa yi-ti'n isiyo duwo ki diine a daanadi geɗ itadi an ki y' zuune ye, wo an di dehu an di daane urzi wede kane batum an ziipe. Inkino maɗ urzi wede Raa yi-ti'n isiyo duwo ki diine a daanadi geɗ, an d'iili.

⁴Aame Almasi y'iido ki duniya geɗ, oogoro Muusa y'a-ti t'iide a urzutú. Inkino maɗ don pay i ziipe addan a Almasi geɗ, Raa y'anni wolliyo kane don ki diine a daanadi me.

Raa y'utta wede tuuku ele addi a Galmeega Isa

⁵Yode Muusa batum ton y'a riije ti kaaga a urzi wede duwo an t'ise ki diine a daana Raa t'urzi daaniya k'oogoro, y'ede: «Wede y'a t'izira a urziyagi k'oogoro pay geɗno maɗ, t'urzi geɗ y'a lekka.»

⁶Wo de enno ono don mattup ki Raa ti rootiyo a urzi wede duwo Raa yi-ti'n isiyo don ki diine a daanadi t'urzi zaapu k'adde a yode me, t'ede: «Kee adda k'adda k'elke ye: Wee wee a kila ki kandaane me?» Geɗ i-kaza ki deegu k'Almasi me.

⁷Wo soŋ kee k'elke ye: «Wee wee a etta k'ume beyyagi ge lekkiyo me?» Geŋ i-kaza ki koliyo k'Almasi ti diine doŋ unto me.

⁸Inkino maŋ enno ono doŋ an riije ti kaaga adda mattup ki Raa a urzi wede duwo yi-ti'n isiyo ki diine a daanadí me: «Ono Raa geŋ kane goppon ti kee, a biza wo adda k'addá.» Kun ollo, eŋ ono ki zaapu k'adde a Raa ay kazita a duwo me.

⁹Geŋ inkino aame ki ruuta kereŋ a daana duwo Isa yoŋ Galmeega, wo k'umba adda k'addá yoŋ Raa yi ti y' bilde ti diine doŋ unto maŋ, Raa y'a k'utta.

¹⁰Aame wede yi ziipa addí a Isa maŋ, Raa y'a yi wolla yoŋ ki diine a daanadí me, wo aame wede ti bizí yi ruuta kereŋ a daana duwo Isa yoŋ Galmeega maŋ, Raa y'a y'utta.

¹¹Ono eŋ an riije ti kaaga adda mattup ki Raa, an'de: «Wede tuuku yi ziipe addí a yode maŋ, yi-ki seeda sukiyagi ye.»

¹²Inkino maŋ ise Yawudiyagi, doŋ Yawudiyagi ye toŋ, kane miŋ pay kaŋ soo, Galmeegaŋ miŋ soo, y'an d'isiyo beehiyko a kane doŋ pay i waaku sundí.

¹³Ono eŋ an riije ti kaaga adda mattup ki Raa, an'de: «Wede tuuku yi wiika suma Galmeega Raa maŋ, y'a y'utta.»

¹⁴Wo de kaŋ mummino an di waake sundí daa ki an ki ziipe addaŋ a yode ye me? Wo de kaŋ mummino an di zaape addaŋ a yode daa ki an k'illiga rabiladí ye me? Wo de kaŋ mummino an d'olliga rabiladí daa ki wenda yi ki gizite ye maŋ?

¹⁵Wo de kaŋ mummino an di kizite daa ki an k'igibe wenda ye maŋ? Eŋ ono doŋ an riije ti kaaga adda mattup ki Raa, an'de: «Duwo ulbaŋ unse aame an woliyo doŋ kazita Rabila Majjaanawa an'tiyo maŋ.»

¹⁶Wo ti diine kane doŋ illiga geŋ, pay an ki d'umbe ye a Rabila Majjaanawa gette. Geŋ derec, nebi Ezayi y'a ruute ti kaaga, y'ede: «Galmeega Raa, wee wee a umbe a ono doŋ ay an gizite geŋ me?»

¹⁷Geŋ inkino wede y'a zaape addí a Almasi t'urzi k'ollige rabila ere an gizite gettiyo. Wo to rabila gettiŋ ono k'Almasi.

¹⁸Inkino maŋ ni ton-diyo n'ede, rabila gettiŋ Yawudiyagi an ki t'illiga ye ko? Aha, an t'illiga! Eŋ ono doŋ an riije ti kaaga adda mattup ki Raa, an'de: «Golla doŋ kazita gette doŋ adda siidiyagi pay an di t'illiga, wo onamaŋ a-tiipe bini ita Raa.»

¹⁹Nuŋ ni ton-diyo sey n'ede, doŋ k'Izirayel miŋ ono geŋ itadaŋ an ki'n zuune ye ko? Wo eŋ ono doŋ Raa yi ti'n ruute too ti kaaga ti bize Muusa, y'ede: «Kune doŋzó n'un di'n isa kun di kolbika ti doŋ kane doŋzó ye. N'un t'ela ooniso kun di kulkuwa ti ita duwo doŋ elkisadaŋ umbo.»

²⁰Wo nebi Ezayi y'a ruute ti kaaga daa k'orgiso ono don Raa yi ruute, y'ede: «Nuñ a n'uune don i ki n' dehu ye, wo n'an di gize tuddó a kane don i ki n' ton-di-yo munda ye.»

²¹Wo de Raa y'a ruute sey a tukki don k'Izirayel, y'ede: «Daayum n'alliya beezó ki tukki kane don eedañ zakidi wo an o ti tuuge.»

Romeñ 11

Don k'Izirayel Raa yi ki'n giigira ye

¹Inkino mañ nuñ ni ton-di-yo: Don k'Izirayel geñ Raa y'anni giigira ko? Aha, ki kotto y'an ki'n giigira ye, kono nuñ batum miñ ti siido k'Izirayel, t'ita k'inñi k'Ibirayim wo ti biza bumbu Benzamen.

²Raa donz'í don yi biire ti poone geñ, yi ki'n giigira ye. Ki kotto kun suune ono don an riine ti kaaga adda mattup ki Raa, a ume wede Eli yi m'olo yi sakiysa a Raa kono k'oldiko ki don k'Izirayel, y'ede:

³«Galmeega Raa, nebiyagá'ñ an ti'n iide wo ume sendikagá an di gussite, a guute miñ nuñ siidó, wo an dehu an aa di n' t'ide.»

⁴Wo de Raa yi di'n gime onamí y'ede moo me? Yoñ y'ede: «A nuñ ni buuhe kuuli dupu sarat an daaniya nuuno, kane geñ an ki dikke ye zibbañ a daana raazañ Baal me.»

⁵Ki kine don ankenno toñ inkino, i guute don miibi Raa yi biire t'urzi beekadí me.

⁶Kane geñ Raa yi'ni biire t'urzi beekadí, t'urzi naabadañ ye. Wo de aame yi'ni biire t'urzi naabadañ mañ, geñ beeko Raa gette tod'te beeko ye, kono an uune t'urzi naabadañ.

⁷Inkino kine in t'eese moo me? In t'eese kane don k'Izirayel munda wede an dehu geñ an ki y'uune ye, wo de kane don miibi Raa yi biire geñ an di y'uune. Wo kane don uupe pay geñ Raa y'an di'n ize addañ zakidi.

⁸Enj ono don an riine ti kaaga adda mattup ki Raa, an'de: «Raa y'an di'n ize tuusiyagi a urzi k'elkiso, y'an t'ippe a edayañ kono an ki wolle ye, wo kuwwagañ y'an di njiy'e dan-kila kono an ki d'olliga ye, bini anki toñ an lekkiyo inkino.»

⁹Mozigo Dawut toñ y'a ruute a don k'olmidayí, y'ede: «Ombadañ ere an isiyo aa an ekkiyo ikka a duwo gette an an-kilo, i t'iso aa zelwe ki sedduzañ, an t'oore adda k'oldiko, an t'oone dan-gay.

¹⁰Geñ Raa edayañ y'an t'appa kono an gi di wolle ye, y'anni dabi-ro kono an di lekke daayum nukkiyo.»

11 Inƙino maɗ ni tonɗiyo sey, aame ɗoɗ k'Iziryayel an ele morkiy'e a urzi Raa an t'iire geɗ, ki ɗaanadaɗ ko? Aha, ki ɗaanadaɗ ye! Wo ɗe t'urzi doopidadaɗ ere a urzi Raa gette, kane ɗoɗ Yawudiyagi ye an d'uune urzi k'uttiyo. Raa y'ize inƙino kono a t'ooziga kolbiso ɗoɗ k'Iziryayel.

12 T'urzi doopide ki ɗoɗ k'Iziryayel a urzi Raa geɗ, ɗoɗ adda duniya pay an d'uune beehiyko ere baadaɗ ki Raa, wo t'urzi soldite ki ɗoɗ k'Iziryayel a urzi Raa geɗ, kane ɗoɗ Yawudiyagi ye toɗ an d'uune beehiyko ere baadaɗ ki Raa pay. Inƙino a onniyo ere kane Yawudiyagi pay an ti gimo k'urzi k'uttiyo maɗ, beehiyko ere Raa y'an isa gette baadaɗ a ceera ki ɗoɗ oɗgo.

Uttiyo ki ɗoɗ Yawudiyagi ye

13 Aɗkeɗ onamó ni rootiyo eɗ a kune ɗoɗ Yawudiyagi ye. Nuɗ weɗe zina k'Isa yi n'igibo ki tukki ɗoɗ Yawudiyagi ye, n'a kize naabo ere Raa y'o ele ette tod'te meeda.

14 Inƙino maɗ n'elkiyo koo t'urzi naabadó ette, a t'ooziga kolbiso ki zembadó Yawudiyagi an di kimo ki tukki Raa kono ɗoɗ miibi ti diinayaɗ an d'utta.

15 Aame Raa yi'n uuye ɗoɗ k'Iziryayel a kese geɗ, ɗoɗ duniya y'a ti'n gimo an t'ukkiye ti yode. Inƙino maɗ ɗoɗ k'Iziryayel yi ti'n wiika ki sirpadí sey maɗ, geɗ aasa mummino? Ki kotto onniyo gette a t'isa aa ɗoɗ i t'inda an ti bilde!

16 Aame mappa kun iidiba ki poone geɗ kun i ele a Raa maɗ, weɗe pay a guute geɗ miɗ ki yode pây. Wo aame sonɗayi k'undumu geɗ ki Raa maɗ, layɗayi geɗ miɗ kane ki yode pây.

17 Yawudiyagi geɗ kane aakede undumu boy sundí olibiye layɗayi oɗgoɗ an di ɗikkite. Wo kee weɗe Yawudusu ye geɗ, kee aakede undumu balɗa sundí olibiye, an aa ki ti-k'iite a olde ki layɗayi k'undumu boy weɗe sundí olibiye geɗno. Wo aɗkeɗ kee toɗ k'oobo uɗu k'undumu ɗoɗ aɗɗiya t'adda sonɗayi geɗno.

18 Kono kamo kee weɗe aakede layisa an iite aatiya geɗ, ki kili tuddá ye a ɗaana layɗayi ɗoɗ an di ɗikkite me. Wo kee mummino ki-koliyo tuddá me? Ki too maɗ sonɗayi an k'ooniyo toogo ti layɗayi ye, wo ɗe layɗayi ooniyo toogo ti sonɗayi me.

19 Ki too maɗ k'a root'e'ɗ: «Layɗayi geɗ Raa yi ti'n ɗikkite kono a olde kane y'a-t'iite nuuno.»

20 Geɗ ɗerec! Kane Raa yi ti'n ɗikkite kono an ki ziipe addaɗ a yode ye. Wo kee'ɗ ume geɗ ki y'uune kono ki ziipe addá a yode. Inƙino maɗ ki kili tuddá ye, ki too maɗ k'a lekke t'orgiso a Raa.

²¹Ni rootiyo in̄kino kono aame kane Yawudiyagi ɗoŋ aakede layɗayi k'undumu ɓoy toŋ Raa yi ki'n iili ye maŋ, geŋ kee toŋ ki koona metike kono Raa yi ki k'oola ye kay.

²²Ki suuno Raa geŋ yoŋ beehiye wo wehini pây: Yoŋ wehini ti kane ɗoŋ i t'iire, wo beehiye ti kee aame ki lekkiyo daayum adda beehiykadí ɗo, para maŋ kee toŋ t'umayá Raa y'a ki ti ɗekka mendá kay.

²³Wo aame onniyo soo kane Yawudiyagi geŋ an ti gima lekkiyadaŋ wo an ziipa addaŋ a Isa maŋ, Raa y'a-ti'n t'aata ekk'undumzaŋ wede ti poone, kono yoŋ i-d'ede toogo y'a-ti'n t'aate ti doolo ekk'undumzaŋ sey.

²⁴Derec, kee wede Yawudusu ye geŋ, kee'ŋ aakede layisa k'undumu balɗa sundí olibiye ere Raa yi ti ɗikke wo y'a-t'iite a olde ki layisa k'undumu ɓoy, para maŋ kee umayá ye. Wo ki Yawudiyagi i-k'oone ye a jiire sey kane aakede layɗayi k'undumu wede ki ɓoy geŋ, Raa y'aana y'a ti'n t'aata ekk'undumzaŋ wede y'anni ɗikkite.

Uttiyo ki ɗoŋ k'Izirayel

²⁵Zemba ki nuŋ, ni dehu kun di y' suune munda wede ombide ki Raa me, kono kun ki d'elke adda k'addugun̄ kune ɗoŋ suuniyo k'ono ye: ɗoŋ k'Izirayel ongoŋ, an di lekka addaŋ daayum zakidí ti Raa, bini kane ɗoŋ pay Yawudiyagi ye Raa yi biire geŋ an t'oona uttiyo.

²⁶Wo geŋ a t'isa in̄kino ɗoo miŋ, saŋ ɗoŋ k'Izirayel pay Raa y'an di'n utta kollo, geŋ a-t'etta a ono ɗoŋ an riige ti kaaga adda mattup ki Raa, an'de: «Wede i d'adɗiya ɗuwo t'adda k'oldiko geŋ y'a etto ti geeger Siyoŋ, y'iido'ŋ y'a-booya oldiko k'ita k'in̄ni Yakup.

²⁷Kun ollo gettiyo taasuwadó ere ni ketta ti kane, a onniyo ere n'an booya oldikadaŋ te.»

²⁸Kane Yawudiyagi geŋ an di-tuuge k'ambu a Rabila Majjaanawa k'Isa te, in̄kino an t'ize adu ki Raa, wo geŋ a kune ɗoŋ Yawudiyagi ye un t'ize beehiye. Wo ki too maŋ kane geŋ Raa yi'ni biire kono an t'ise ɗoŋzí, kane daayum yi'ni giyye kono a taasua ere yi gitte ti kaaga ti moŋgidagaŋ.

²⁹Ki kotto munda wede Raa y'eliyo geŋ yi ki ti y' seeda sey ye baa, wo kane ɗoŋ yi wiike geŋ bizí yi ki y' kama ye.

³⁰Ti kaaga kune ɗoŋ Yawudiyagi ye kun di tuuge ono Raa kun k'illiga ye, wo aŋken̄no Raa y'un d'ize adde koɗuwo kono Yawudiyagi an di-tuuge k'ollige k'onamí me.

³¹Geŋ ki kane Yawudiyagi toŋ in̄kino, aŋken̄no an ti tuuge k'ollige k'ono Raa me, tiŋ geŋ kune ɗoŋ Yawudiyagi ye Raa y'un d'ize adde koɗuwo. In̄kino maŋ aŋken̄no kane toŋ Raa y'an d'isiyo adde koɗuwo kay.

³²Derec, Raa geŋ y'a ize a ɗuwo pay an di-tooge k'ollige k'onamí. Y'ize iŋkino kono y'an d'ise adde koɗuwo a ɗuwo pay.

³³Ki kotto maŋ, wee wee a aane a-d'ooze laale ki Raa me! Suuniyo k'onamí ti elkisadí gette, kane a jiire sulɗi pay! Wenda soo toŋ umbo a aane a suune ita k'ono ɗoŋ Raa yi dehu y'aase munda me! Wo wee wee a aane a suune naabo ere Raa yi dehu y'aase te!

³⁴Geŋ ono ɗoŋ an riije ti kaaga adda mattup ki Raa, an'de: «Wee wee i zuune elkiso Galmeega Raa te? Wee wee i eele kooke me?»

³⁵Wee wee ki poone i-eele munda a Raa, kono saŋ yi di y' kima me?»

³⁶Sulɗi pay geŋ ikkima yode Raa, kane pay an d'ôhire a umayaŋ t'urzi yode wo kane'ŋ pay ki yode. Geŋ tamma ti koonaa a yode Raa ki daayum! Eyye.

Romeŋ 12

Lekkiyo ere aware a urzi k'Almasi

¹Zemba ki nuŋ, kun wollo Raa y'ize adde koɗuwo a kine, iŋkino maŋ a sulɗi pay geŋ n'un d'eelo kooke kono kune batum kun di t'ele tuddugun a Raa, aa seɗeke zeere, ooyiso kese a yode, ulbí i-d'ise unse. Geŋno urzi wede ki kotto kun d'ise k'ottilso a Raa me.

²Kun daane lekkiyo ere ki ɗoŋ duniya aŋkeŋno ye, wo ki too maŋ kun i d'ooli urzi a Raa y'un ti'n kima, y'isa iŋkino t'urzi k'elkiso ere aware y'un eliyó. Iŋkino maŋ kun di suuna munda wede Raa yi dehu: munda wede beehiye, munda wede ulbí i-d'ise unse, wo munda wede i-k'ede baatiya ye.

³Nuŋ Raa y'o ele beekadí, iŋkino maŋ a wede tuuku ti diinagun ni di roote, n'a t'eese: Yi kili tuddí y'elke yoŋ yi jiire ye, ki too maŋ yoŋ neŋku, wo y'elko a yode batum ki kotto yoŋ a ume too me? Wo wede tuuku y'ise iŋkino geŋ, y'iso a toogo k'urzi zaapu k'addí ere Raa yi ele ele.

⁴Wede geŋ tuddí tiŋ soo wo mokiyagutú baadaŋ, kane pay geŋ wede tuuku toŋ ti naabadí naabadí.

⁵Geŋ iŋkino kay, kine baadaŋ toŋ a urzi lekkiyo kettiyo kaŋ soo t'Almasi, kine aa tudde soo. Kine pay kettiyo kaŋ soo aa mokiyagi ɗoŋ ki tudde, wo wede tuuku toŋ ti naabadí naabadí.

⁶Wo kine in uune sulɗi ɗoŋ Unde Kamileŋ ti'n ele in di naabe eego, t'urzi beeko Raa wede tuuku toŋ yi d'uune munda siidí siidí aa Raa yi dehu. A wede soŋ ki rootiyto k'ono ɗoŋ Raa y'agisa maŋ, yi'ni rooto a-t'ette a urzi zaapu k'adde ki kine pay.

- ⁷A wede soŋ ki noogiyo ɗuwo maŋ, y’anni noogo. A wede soŋ ki dooyiso ɗuwo maŋ, y’anni dooyo.
- ⁸A wede soŋ k’eliyo kooke a ɗuwo maŋ, y’an elo. A wede soŋ k’eliyo sulɗi a ɗuwo maŋ, y’an elo ti mozuwo. A wede soŋ ki dokkiyo ɗuwo maŋ, y’anni d’okko a urzutú. A wede soŋ k’isiyo k’adde koduwo a ɗuwo maŋ, y’an iso ti uŋsuwo.
- ⁹Kun geyyo tuddugun t’adde soo. Munda ulsu kun y’azzar kun ti ledɗo, wo kun soodo zakidi k’isiyo munda wede beehiye.
- ¹⁰Kun geyyo tuddugun t’adde soo aakede zemba, wede tuuku toŋ yi t’iso ki poone a urzi k’ottilso ti tuddugun me.
- ¹¹Kun soodo zakidi a urzi Galmeega me. Kun t’ise ɗoŋ golguwo ye, kun naabo a Galmeega t’adde soo.
- ¹²Kune ulbugun un iso uŋse a munda wede kun zaapu elkisagun eego. Aame kune adda dabar toŋ, kun ombon, wo kun soodo zakidi bini ɗangu a urzi tonɗiyo Raa me.
- ¹³Doŋ ki Raa ɗoŋ i dehu ki noogiyadaŋ geŋ, kun’ni noogo, wo ɗuwo kun’ni soodo daayum bey sire.
- ¹⁴Kun tondo Raa y’an di zaape beeko a ɗoŋ unni dabirsa, kun an zaapo beeko, kun’ni duude ye.
- ¹⁵Kun iso uŋsuwo ti kane ɗoŋ adda k’uŋsuwo, kun ôolo ti kane ɗoŋ i môolo.
- ¹⁶Kun lekko t’ollige k’ono tuddugun. Kun oyyo naabo ere tuuku toŋ kun ti t’iso, ise ŋeŋko too maŋ. Kun elke kune ɗoŋ suuniyo k’ono ye.
- ¹⁷Aame bakadá y’a ize ulsu maŋ, ki ti-kime ti ulsuko ye. Adda k’addugun kun deho munda wede k’isiyo beehiye a eda ɗuwo pay.
- ¹⁸Aame urzi ede wo kun aane maŋ, kun lekko ti toose ti ɗuwo pay.
- ¹⁹Zemba ki nuŋ kune ɗoŋ ki geyyiso, munda wede ulsu ɗuwo an un isiyo geŋ, an ti y’ dooze kune batum ye, kun oolo kulkuwo Raa t’a ɗeege a eedaŋ. Derec, ono eŋ i ruute Galmeega Raa, aa an riŋe ti kaaga adda mattup ki Raa, an’de: «Kun oolo, nuuno an ti dooza me, a wede tuuku toŋ ɗangayadí i-ti t’ela nuuno a munda wede y’ize me.»
- ²⁰Wo ɗe soŋ an’de: «Aame aduzá geŋ yoŋ mosogo maŋ, ombó ki eelo, aame yoŋ ôrme maŋ, ahu ki eelo, kono aame k’iza iŋkino maŋ, aakede ki ziki rididi k’uwo ki t’ibi eedí, geŋ yi seeda sukiyagi.»
- ²¹Ki oola urzi a oldiko ti ceera eedá ye, wo ɗe ki ti ceero t’isiyo beehiyko.

Romeŋ 13

Ki koliyo ye t'ekki deero k'akuuma me

- ¹Wede tuuku toŋ yi kili ye t'ekki deero k'akuuma doŋ an d'ede urzi ki dokkiyo me, kono urzi wede ki dokkiyo geŋ an ele Raa, wo kane doŋ i naabiya a urzi geŋ i'ni zippe yode.
- ²Inkino wede yi takirsa ti deero k'akuuma geŋ, yi takirsa a munda wede Raa yi dehu. Doŋ i takirsa ti kane geŋ, kane batum an waaku booro t'a deege a eedaŋ.
- ³Kane doŋ isiyo beehiyko an k'ede orgiso ye a deero doŋ booro me, wo de a orgide kane doŋ isiyo ulsu. Kune'ŋ kun dehu kun an ki d'orgide a deero k'akuuma ye maŋ, kun iso beehiye kono an un di'n t'imma.
- ⁴Derec, deero k'akuuma geŋ kane duwo doŋ i naabiya ki Raa, an unni zaapu a urzi kono kun d'ise beehiye. Wo de aame kun isiyo ulsu maŋ, kun an orgido, kono kane geŋ an d'ede toogo duwo an ti'n t'ele daŋgay, wo geŋ ki bita ye. Aame an isiyo inkino geŋ an naabiya ki Raa, an kaza kulkuwo Raa a tukki doŋ isiyo suldi doŋ ulpi.
- ⁵Kono kamo i dehu in ki kili ye t'ekki deero k'akuuma me. In ise inkino kono in t'alda ti daŋgay daŋŋal ye, wo de soŋ elkisadiŋ ere in di suuniyo munda eŋ beehiye eŋ ulsu gettiyo t'in kaza urzi geŋ yoŋ beehiye.
- ⁶Geŋ kono k'inkino kun eliyo jibaaye me, kono doŋ i sedfu jibaaye'ŋ naabo gette an t'ele Raa an di naabe ki diine a urzutú.
- ⁷A wede tuuku toŋ munda wede i dehu kun i di t'ele geŋ, kun i elo: ise jibaaye, patanti ki suldi, ottilso wo eliyo suma, a wede tuuku toŋ kun i elo munda wede i dehu kun i di t'ele me.

Geyyiso tudde

- ⁸See ki wenda oppa eggun ye, aa gooto a eggun see wede ki geyyiso tudde daŋŋal. Wede yi geyyiso duwo geŋ, y'a t'izire pay ekk'oogoro Muusa te.
- ⁹Ki kotto urziyagi k'oogoro an rootiyo, an'de: «Ki moone t'ere bakada ise ti kule bakatu ulu, ki towwo wedusu mirsi ulu, k'oogire ulu, ki zaapu k'adde a munda wede ulu.» Kane urziyagi enno ti doŋ ongo pay geŋ miŋ, a-t'iide miŋ a urzi k'oogoro soo, wede y'ede: «Ki geyyo bakada aa ki geyyiso tudda batum.»
- ¹⁰Wede i-d'ede geyyiso geŋ yi k'ise ulsuko a bakadi ye. Inkino maŋ wede i-d'ede geyyiso geŋ oogoro Muusa pay y'a ti dinge.

Kun t'okkon tudugun

- ¹¹Kun koono mentikagi a ono doŋ kun illiga kono kun suune ankenno kine a ume muno me. Peedo t'iide kun t'onno ti moone me. Ankenno uttiyo ere Raa y'in di'n utta in t'adfa t'adda duniya ette, tod'te goppon a jire ti kine me, ti onniyo ere in ziipe addiŋ a Isa geŋ me.

¹²Didfo t'engilso, ume yi t'ompilso. Injino maŋ naabo ere oldo in isiyo adda zimolo gette in di sebbo daariŋ, wo in t'osso suldi k'arka doŋ ki toore Raa.

¹³In oziro ki diine aakede doŋ i sooru a oŋnu. In ti ledfo ti suldi doŋ aakede: sobito ti ombito i-t'eliyo isiyo suldi doŋ kaca kaca a ceere eediŋ, ti suldi doŋ ulpi tudde ti dehu, ti boliyo, wo ti ono k'ulpi ti kolbisito me.

¹⁴Wo de kun t'osso suldi doŋ pay Galmeegiŋ Isa Almasi y'in elo, kun i ooli urzi a tuddugun ye kun d'ise suldi doŋ ulpi aa tod' ti dehu me.

Romeŋ 14

Ki dekke booro ekki leemada ye

¹Wede toogadi baata a urzi zaapu k'adde a Isa'ŋ kun yi soodo bey sire, kun yi niike ye a munda wede y'elkiyo beehiye geŋ me.

²Aakede wede i-dirse a urzi zaapu k'addi a Isa'ŋ y'aane y'a oomi suldi pay, wo de wede toogadi baata a urzi zaapu k'addi a Isa'ŋ y'a oomi puutagi danjal.

³Wede y'ombo suldi pay geŋ y'a ki ti y' t'idfa ye wede aadumu sey me, wo wede yi k'aadumu sey ye geŋ, yi ki dekke booro ye ekki wede ombo suldi pay me, kono yode toŋ Raa yi y' ziida bey sire kay.

⁴Kee wee wee ki dekkiyo booro ekki wede naabo ki wede doolo me? Y'aa seedu zakidi koo, y'aa ki seedu ye koo, geŋ a wolle galmeegi. Wo yoŋ y'a-seeda zakidi, kono Galmeega i-d'ede togo ki noogiyadi.

⁵Wede soŋ y'elkiyo onniytagi oŋgo an jiire eebaŋ, wo ki wede soŋ y'elkiyo kane onniytagi pay miŋ kaŋ soo. I dehu wede tuuku toŋ y'a oyye adda k'addi munda wede y'elkiyo geŋ beehiye.

⁶Wede y'elkiyo onniytagi oŋgo an jiire eebaŋ geŋ, y'isiyo injino kono yi eliyo suma a Galmeega. Wede y'ombo suldi pay geŋ, y'isiyo injino kono yi eliyo suma a Galmeega, kono yi rootiyo koduwo a Raa kono k'ombo gette. Wede yi k'ombo suldi oŋgo ye geŋ, y'isiyo injino kono yi eliyo suma a Galmeega, kono yode toŋ yi rootiyo koduwo a Raa kono k'ombo gette.

⁷Injino maŋ ti diinayiŋ wenda soo toŋ umbo y'a lekke ti siidi me, wo wenda soo toŋ umbo y'a t'inda ti siidi me.

⁸Aame kine in lekkiyo zeere maŋ, in lekkiyo t'urzi Galmeega, wo aame in unto maŋ, in unto t'urzi Galmeega. Injino maŋ ise in lekkiyo zeere, ise in ti t'inda toŋ, kine ki Galmeega.

⁹Derec, Almasi y'a inda wo y'a bilde ti diine doŋ unto, kono y'a t'ise Galmeeki doŋ unto wo ki doŋ zeere.

10Wo de kee ki moo me ki dekkiyo booro ekki leemadá me? Wo ki moo me kee ki ti y'odde leemadá me? Ki kotto kine pay miñ in etta k'ume booro Raa y'a dekkekey booro a eediñ.

11Ono eñ an riije ti kaaga adda mattup ki Raa, an'de: «Nuñ Galmeega Raa zeere n'a-ti nâame ti tuddó: kane duwo pay an dikka a daanadó wo kane pay an t'imma nuñ Raa.»

12Inkino mañ wede tuuku toñ ti diinayiñ y'a t'idey taaya a daana Raa a suldi don pay y'ize.

Leemadá ki ti y' t'ele adda k'oldiko ye

13Inkino mañ in oolo ki dekkiyo booro ti tuddiñ me. Wo de ki too mañ kun ti wollo munda wede kun isiyo geñ, i-t'isa mokololo morkiye a leema yi t'ora adda k'oldiko ye.

14Derec, nuñ Galmeega Isa y'o ti gize ni suune adda k'addó, munda wede ganigi ti siidi a daana Raa umbo, wo aame wede y'elkiyo munda eñ a daana Raa ganigi mañ, geñ miñ munda geñ a yode i-t'ize ganigi a daana Raa me.

15Aame t'urzi munda wede kee k'ombo geñ i-t'isa ulsu a leemadá mañ, geñ i-kaza ki ki sooru a urzi geyyiso ye. Kono k'ombo daññal geñ, i ki dehu leemadá wede Almasi y'inda kono yode'ñ k'a ki y' dagge ye.

16Munda wede kun elkiyo a kune beehiye geñ, a don ongon an ki-t'ise urzi an ki di roote munda geñ ulsu ye.

17Derec, lekkiyadiñ ere a Moziko Raa, tod'te a urzi k'ombito ti sobito ye, wo de tod'te lekkiyo ere ki diine, ti toose wo ti unsuwo, kane geñ suldi don Unde Kamilen t'in ele.

18Wede i naabiya k'Almasi inkino geñ, Raa ulbi unse ti yode me wo duwo toñ an yi wolliyo yon beehiye.

19Inkino mañ in deho munda wede in t'ela toose ti duwo pay, wo in di t'ihira kan soo a urzi zaapu k'addiñ a Isa.

20Kono k'ombo daññal geñ, naabo Raa ki ti latte ye. Derec, ombó tuuku toñ tod'te kamilen a daana Raa me, wo de aame t'urzi munda wede kee k'ombo geñ don ongon an t'etta adda k'oldiko mañ, beehiye ye, k'oolo.

21Beehiye'ñ, suldi don pay i t'eliyo leema adda k'oldiko geñ kun oolo, ise aadumu sey, ise sobo toote, ise munda tuuku toñ mañ.

22Munda wede k'elkiyo a kee beehiye a urzi zaapu k'addá a Isa geñ, ki y' booho adda k'addá i y' suune kee ti Raa. Unsuwo a wede addi i ki dekkiyo booro ye a munda wede y'ilke beehiye geñ me.

²³Wo de wede y'ombo wo i-d'ede niiku adda k'addí mañ, yoñ geñ booro Raa ti y' ziiɗa, kono munda wede y'isiyo geñ a ki t'iide ye a munda wede y'elkiyo beehiye a ɗaana Raa me. Wo ɗerec, sulɗi ɗoñ pay in isiyo wo a ki t'ettiyo ye a munda wede in elkiyo beehiye a ɗaana Raa geñ, oldfiko.

Romeñ 15

Sarkiya zemba ɗoñ toogadañ baata

¹Kine ɗoñ i-dirse a urzi zaapu k'adde a Isa geñ, i dehu in di'n sarke zemba ɗoñ toogadañ baata a urzi zaapu k'adde geñ me. Kine in gi di dehe munda wede ulbiñ in d'ise uñse ɗaɗɗal ye.

²I dehu wede tuuku toñ ti diinayiñ yi deho isiyo ki munda wede bakadí ulbí i-d'ise uñse ki beehiyko yode, kono y'a t'ihira a urzi k'eliyo k'adde a Isa.

³Derec, Almasi geñ yi ki dihe munda wede ulbí i-d'ise uñse a yode ɗaɗɗal ye. Wo de geñ, aa ono ɗoñ an riije ti kaaga adda mattup ki Raa, an'de: «Kaldita ere ɗuwo an gildite kee Raa gette o-t'iire eedó.»

⁴Derec, munda wede an riije pay ti kaaga adda mattup ki Raa geñ, an yi riije kono in di'n dooye. Injino mañ t'urzi k'ono eñ in d'ooniyo kooke wo in di seeda zakidi, kono in di zaapu elkisadiñ a Raa.

⁵Nuñ ni tonɗiyo Raa wede in d'eliyo kooke wo toogo in di seeda zakidi geñ, y'un ti'n iso ɗoñ onamguñ i-t'ette kañ soo. Geñ munda wede Isa Almasi yi dehu.

⁶Injino geñ kune pay t'adde soo wo aa ti golla wede soo, kun di t'imme Raa Meeki Galmeegiñ Isa Almasi.

Rabila Majjaanawa a ɗuwo pay

⁷Injino mañ, zemba'ñ kun'ni soodo bey sire, aakede Almasi y'unni ziiɗa. Kun iso injino kono a t'ele tamma a Raa.

⁸Geñ n'un di rooto ki kotto, Raa yoñ yi seedu zakidi a munda wede yi ruute y'aasa me. Kono kamo Almasi geñ y'iido'ñ y'a t'ize wede naabo ki Yawudiyagi, kono y'a-ti ɗaɗɗe sulɗi ɗoñ Raa yi ruute ti kaaga y'aasa a moɗgidagañ.

⁹Wo soñ ɗoñ Yawudiyagi ye toñ, an di t'imme Raa kono y'an ize adde koduwo, geñ aa ono ɗoñ an riije ti kaaga adda mattup ki Raa, an'de: «Kono kamo nuñ n'a ki t'imma adda diine ɗoñ Yawudiyagi ye, wo n'a ôora ti sundá a di t'ela suma.»

¹⁰Wo soñ an di ruute sey, an'de: «Kune ɗoñ Yawudiyagi ye kun iso uñsuwo ti kane ɗoñ ki Raa.»

¹¹Wo soñ an'de: «Kune ɗoñ pay Yawudiyagi ye kun amma Galmeega Raa, kune ita ɗuwo pay kun y'amma.»

¹²Nebi Ezayi toŋ y'a ruute, y'ede: «I d'adda wede t'ita k'inŋi Zeese, yoŋ y'iido y'a dokka kane doŋ Yawudiyagi ye, wo kane geŋ an di zaapa elkisadaŋ a yode.»

¹³Nuŋ ni tonɗiyo Raa wede eliyo toogo kun di zaapu elkisaguŋ a yode geŋ, y'un ti'n ôono ti unŋsuwo wo ti toose a urzi zaapu k'adduguŋ a Isa. Inŋkino maŋ kun zaapo elkisaguŋ daayum a yode t'urzi toogo k'Unde Kamileŋ.

Pool yi rootiyo a urzi naabadí

¹⁴Zemba ki nuŋ, ni suune adda k'addó kune batum kun dehu daayum kun d'ise munda wede beehiye. Sulɗi doŋ i dehu kun di'n suune geŋ, kun'ni suune pay, wo kun aane wede tuuku toŋ bakadí y'a-ti y' zaape urzi urzi.

¹⁵Ki too maŋ ki sulɗi doŋ oŋgoŋ adda mattup ette, n'un irba daa k'orgiso, kono un ki danɗe ye a munda wede an unni duuye me. Ni riije inŋkino kono Raa y'o ele beekadí,

¹⁶n'a t'ize wede naabo k'Isa Almasi ki kane doŋ Yawudiyagi ye. N'a iili tuddó pay a naabo ki kazita Rabila Majjaanawa ki Raa, kono kane doŋ Yawudiyagi ye an t'ise aakede seɗeɗe ere Raa ulbí i-d'ise unŋse, ooyiso kese a yode t'urzi k'Unde Kamileŋ.

¹⁷Inŋkino maŋ, a lekkiyadó ere kettiyo kaŋ soo t'Isa Almasi gette, nuŋ ulbó unŋse a naabo ere n'isiyo ki Raa te.

¹⁸Ise o d'ede ono ki rootiyo toŋ ni k'aane ni ki roote ye, wo aame ni roote maŋ, n'a roote a munda wede Almasi y'ize t'urzi nuuno ɗaŋŋal, kono n'a ti'n waako kane doŋ Yawudiyagi ye an d'olliga ono Raa wo an d'ozire eego. Y'ize inŋkino t'urzi k'ono doŋ ni gizite wo t'urzi sulɗi doŋ n'ize,

¹⁹t'urzi toogo sulɗi k'armika i-kaza Raa toogo, t'urzi sulɗi doŋ i ceeriyo eego, wo t'urzi toogo k'Unde Kamileŋ. Geŋ inŋkino Rabila Majjaanawa k'Almasi n'a-gizite a omagi pay, iise ti Zeruzalem bini n'a iiney siido k'Iliri.

²⁰Wo ɗe munda wede ni dihe, n'a kizite Rabila Majjaanawa a omagi doŋ ɗuwo an k'illiga suma k'Almasi ye ɓotto, kono a naabadó ere ki kazita k'ono ette, n'a ki kizite a ume wede wedusu doolo yi gizite ye.

²¹N'ize inŋkino a-t'ette a ono doŋ an riije ti kaaga adda mattup ki Raa, an'de: «A kane doŋ an an ki ruute munda a tukki yode ye geŋ, an di y' wolla, wo a kane doŋ i-k'illiga ɗuwo an ki tôwwa taaya a tukki yode ye geŋ, ita k'ono an di'n suuna.»

Pool yi dehu y'etta Room

²²Geŋ munda wede taŋ baadaŋ a-n'iigire n'a ette di kune me.

²³Wo ɗe ankeŋŋo, nuŋ naabadó n'a ti ɗiŋge adda siidiyagi eŋ me. Îide ozzinagi baadaŋ nuŋ mosogo kune, wo n'a dihe n'a ette n'un ti'n wollo,

24wo n'etta di kune aame n'amba ki siido k'Españ. Nuñ n'elkiyo ni-t'âhiney n'un ti'n wolley, n'a lekkey onniyto miibi ti kune wo mosogo ki kune t'a diigey booloñ mañ, ni t'ooney zaada doo miñ, n'a ingiley kollo.

25Wo de ankeñño n'ambe ki Zeruzalem a naabo ere ki noogiyo doñ ki Raa doñ a ummey.

26Ni dehu kun di suune zemba doñ i ziipe addaṅ a Isa a siido Maseduwan ti Akayi geñ, an dihe t'uñsuwo aggaṅ an d'ele a kane doñ ki Raa doñ an k'ede munda ye a Zeruzalem.

27Naabo ere ki tussiyo gette i dihe kane batum, wo ki kotto geñ munda wede an an t'ele. Kane Yawudiyagi doñ i ziipe addaṅ a Isa geñ an di dikkiḍa maaladaṅ ere a urzi k'Unde Raa gette ti kane doñ Yawudiyagi ye kañ soo, iñkino mañ kane doñ Yawudiyagi ye toñ maaladaṅ an di dokkiḍa ti kane kay.

28Aame naabo tussiyo a ti diñgey wo soñko ere an tusse gette n'an eley a beezañ mañ, n'a eñgiley ki siido k'Españ ni-t'âhiney ti di kune.

29Wo nuñ ni suune, aame n'etta di kune geñ n'etta ti beeko ere pay k'Almasi a eedó.

30Wo de zemba ki nuñ, eñño munda wede n'un t'eele kooke me t'urzi Galmeegiñ Isa Almasi wo t'urzi geyyiso ere Unde Kamileñ t'in eliyo: Kun deyyo ti nuuno kañ soo adda tondiyaguñ ere kun tondiyoo Raa kono nuñ gette.

31Kun tondo Raa kono n'a t'aldey ti bey doñ i ki ziipe addaṅ a Isa ye a siido Ziide, wo soñ munda wede n'amba a beezó ki noogiyo doñ ki Raa a Zeruzalem geñ, an di y' seedey bey sire.

32Iñkino n'a aaney ti uñsuwo baadaṅ di kune me, aame Raa yi dihey mañ, n'a-puukey booloñ ti kune.

33Geñ Raa wede i d'eliyo toose yi koono ti kune pay! Eyye.

Romeñ 16

Toose ki Pool

1Nuñ n'un di rooto a urzi teemadiñ sundutú Peebe, tod'te diyakones t'a seedu zakidi a naabatú ere a diine doñ ogiyo ti suma k'Isa a geeger Sañkire.

2Kun ti soodo bey sire ti suma Galmeega aakede doñ ki Raa an d'isiyo ti tuddaṅ. Kun ti noogo a munda wede tuuku ti dehu ti bey kune me, kono tod' ti nuuge doñ baadaṅ wo nuñ batum toñ ti ni nuuge.

3Kun an t'iso toose a Pisisil ti Akilas kane doñ ay naabiya kañ soo a urzi k'Isa Almasi me.

⁴Kane an d'iyye an t'umbe puuzadaŋ kono nuŋ n'a utte. Naabadaŋ ere an ize gette i rootiyo koduwo nuuno daŋŋal ye, doŋ pay ogiysito ti suma k'Isa kane Yawudiyagi ye toŋ, an rootiyo koduwo kay.

⁵Kun an t'iso toose pay a doŋ ogiysito ti suma k'Isa di Pirisil ti Akilas. Kun i t'iso toose a Epaynat leemadó wede ki geyyiso, yode wede ele addí a Almasi ki poone a siidó k'Aazi.

⁶Kun i-t'iso toose a Mariyam tod' ti ziiy'e baadaŋ a naabo kono kune me.

⁷Kun an t'iso toose a Andirinus ti Ziniyas, kane geŋ taasiyagó, wo an ayni zidde daŋgay kaŋ soo ti nuŋ me. Kane geŋ doŋ zina k'Almasi doŋ an d'ede suma, wo an ziipe addaŋ a Almasi ki poone ti nuuno.

⁸Kun i-t'iso toose a Ampiliyatus, leemadó wede ki geyyiso a urzi lekkiyo kettiyo kaŋ soo ti Galmeega.

⁹Kun i-t'iso toose a Irben wede ay naabiya kaŋ soo a urzi k'Almasi, wo soŋ a Stasis leemadó wede ki geyyiso.

¹⁰Kun i-t'iso toose a Apeles, yode wede doŋ pay an wulle yi ziida zakidi a naabadí ere a urzi k'Almasi. Kun an t'iso toose a doŋ boy ki Aristobul.

¹¹Kun i-t'iso toose a taasizó Erodiyoy. Kun an t'iso toose a doŋ i lekkiyo kettiyo kaŋ soo ti Galmeega adda boy ki Narsis.

¹²Kun an t'iso toose a Tiripen ti Tiripoz, kane geŋ erayi doŋ i ziiy'e baadaŋ a naabo Galmeega me. Kun i-t'iso toose a Perizid teema ere ki geyyiso, tode toŋ ti ziiy'e baadaŋ pay a naabo Galmeega me.

¹³Kun i-t'iso toose a Ripis, yode wede Galmeega yi biire, wo a meedí, tod'te a nuŋ aakede meedó kay.

¹⁴Kun an t'iso toose a Asenikirit, Pelegoy, Ermes, Patirobas, Ermas wo soŋ a zemba doŋ i ziipe addaŋ a Isa ti kane.

¹⁵Kun an t'iso toose a Pilolog kane ti Zili, Neere ti teemadí Olimpas, wo doŋ ki Raa pay doŋ ti kane.

¹⁶Kun t'eesitoy tuddugoy, kaŋ bey sire sire aakede zemba. Doŋ ogiysito ti suma k'Almasi a omagi pay geŋ an un t'ize toose.

Pool yi daŋgu onamí

¹⁷Zemba ki nuŋ, eŋŋo munda wede n'un t'eele kooke me: Kun koona mentikagi ti doŋ i dehu âhuntu duwo. Kane geŋ mokoloko morkiy'e a kane doŋ i ziipe addaŋ a Isa, wo an di ledđiyo ti dooyiso ere kun uune gette. Kun ti ledđo ti tuddaŋ me,

¹⁸kono kane ɗuwo geɗ an ki naabiya ki Galmeegiɗ Almasi ye, wo ɗe raazaɗ miɗ addaɗ, kane geɗ an ti'n daggiya ɗoɗ tasse t'ono ɗoɗ uɗse ki bizaɗ wo t'ono ɗoɗ k'ombo bize ekki ɗuwo.

¹⁹Duwo pay an suune kun ollige ono Galmeega wo kun sooru eego me. Inkiɗo maɗ nuɗ ulbo uɗse ti kune me, wo ɗe ni dehu kun t'ise ɗoɗ an d'ede suuniyo k'ono, kono kun d'ise munda wede beehiye, kun aa ki ti y' keyye ye ti munda wede ulsu me.

²⁰Taɗ booloɗ, Raa wede i d'eliyo toose geɗ, Meeda siitandani y'a ti ɗoguma ti ɗandi zoɗɗoɗ. Geɗ beeko ki Galmeegiɗ Isa ti koonaa eggoo!

²¹Timote wede ay naabiya kaɗ soo toɗ y'un t'ize toose, wo kane taasiyagoo Lisiyus, Zason wo Sosipater an un t'ize toose paɗ.

²²Wo nuɗ Tertiyus i raaniya ono ɗoɗ Pool yi ruute adda mattup ette, n'un t'ize toose ti suma Galmeega wede in ti'n gitte kaɗ soo.

²³Gayus, wede ni lekkiyo di yode geɗ, y'un t'ize toose. Kane pay ɗoɗ ogiyo ti suma k'Isa a enno en, an ogiyo di yode. Erasta wede yeeriyo korbite ki geeger ette, y'un t'ize toose ti leemadiɗ Karitus paɗ.

[²⁴Geɗ beeko ki Galmeegiɗ Isa Almasi ti koonaa eggoo pay! Eyye.]

Tamma a Raa soo ɗaɗɗal

²⁵In amma Raa, yoɗ i d'ede toogo y'un di'n isa zakidi a urzi zaapu k'addugoo a Isa, geɗ aakede Rabila Majjaanawa ere ni kazita a tukk'Isa Almasi ti rootiyo. Wo t'urzi Rabila Majjaanawa geɗ Raa y'a t'iidiba ita ki munda wede t'ume k'eesiyo duniya i lekkiyo ombide a ɗuwo pay.

²⁶Wo ɗe aɗkenno munda wede ombide geɗ Raa yi t'iidiba itadi kereɗ a ita ɗuwo pay, t'urzi k'ono ɗoɗ nebiyagi an riine ti kaaga adda mattup ki Raa. Raa i lekkiyo ki daayum geɗ y'a ruute munda wede ay d'ise'ɗ, ay an ti'n zaape ɗuwo a urzi an zaape addaɗ a Isa, an d'olliga onami wo an d'ozire eego.

²⁷Geɗ tamma t'a koone a Raa, yode ɗaɗɗal i-d'ede suuniyo k'ono! In y'amma t'urzi k'Isa Almasi ki daayum! Eyye.

1 Korent

1 Korent 1

Toose ki Pool

¹Mattup ette i raaniya nuɗ Pool, nuɗ wede Raa yi ni wiike n'a t'ize wede zina k'Isa Almasi, aa Raa yi dehu. Ay raaniya ti leema Susten,

²a kane doɗ ki Raa ogiyso ti suma k'Isa a geeger Korent, kane doɗ Raa yi'ni wiike an t'ize doɗzi, y'an uuye kese a yode t'urzi lekkiyo kettiyo kaɗ soo t'Isa Almasi, wo ti kane doɗ pay i waaku suma Galmeegiɗ Isa Almasi, a ume tuuku toɗ maɗ, yoɗ Galmeegaɗ wo Galmeegiɗ paɗ.

³Geɗ beeko ti toose ki Meegiɗ Raa ti Galmeega Isa Almasi i koonaa eggun.

Beehiyko a doɗ geeger Korent

⁴Kono kune geɗ nuɗ daa puukiyo ni rootiyo koduwo a Raa a urzi beeko ere y'un ele t'urzi k'Isa Almasi.

⁵Derec, kune kun lekkiyo kettiyo kaɗ soo t'Almasi geɗ, a kune Raa y'un ele laale ki suldi pay, aakede urzi kazita k'ono wo ita suuniyo pay.

⁶Geɗ ki kotto, aame ay un gizite rabila ere k'Almasi, kun di-ziida zakidi adda k'addugun.

⁷Inkino maɗ ankeɗno munda wede Raa y'eliyo ti beekadi'ɗ, a kune soo toɗ un ki biite ye, kune doɗ i delliyo onniyo ere Galmeegiɗ Isa Almasi y'a kiza tuddi a duwo pay geɗ me.

⁸Geɗ yode y'un di'n isa doɗ i seedu zakidi bini dangu. Inkino maɗ, a onniyo ere ki Galmeegiɗ Isa Almasi yi kimo'ɗ, wenda soo toɗ yi k'aana yi ki zaapa ono eggun ye.

⁹Geɗ derec, Raa y'unni wiike kun di lekke kettiyo kaɗ soo ti Ulí Galmeegiɗ Isa Almasi, yoɗ yi seedu zakidi a munda wede yi ruute y'aasa me.

Âhuntu tudde ki doɗ ogiyso ti suma k'Isa

¹⁰Zemba ki nuɗ, enno munda wede n'un t'eele kooke ti suma Galmeegiɗ Isa Almasi me: Kun t'okkiyo kaɗ soo, tuddugun kun ti t'ahinte ye, kun t'iso addugun soo, elkisagun toɗ soo.

¹¹Zemba ki nuɗ, ni rootiyo inkino kono duwo an iido ti daɗ Kilowe an o di ruute, kun orbite ono k'ulpi ti tuddugun.

¹²Geɗ enno munda wede ni dehu n'a roote me: Kune ti diinagun wede tuuku toɗ yi rootiyo, yi d'eesiyo: «Nuɗ ki Pool», wede soɗ «Nuɗ ki Apolos», wede soɗ «Nuɗ ki Piyer» wo wede soɗ «Nuɗ ki Almasi».

13Mundá wede kun isiyo geɗ, aa Almasi tuddí dokkide. Kun oo ki ti rooti fɔo, an tiike kono kune ekk'undumu wede zaapu t'ekki bakadí kaɗ tontilko, nuɗ Pool ko? Kunuɗ an unni zuyye batem ti suma nuɗ Pool ko?

14Nuɗ ni rootiyo koduwo a Raa kono ti diinaguɗ wenda soo toɗ ni ki zuyye batem ye, daa ki Kirisipus ti Gayus ye maɗ.

15Iɗkino maɗ wenda soo toɗ umbo aane a roote an yi zuyye batem ti suma nuɗ Pool me.

16Wayya, nuɗ o dunde, ni zuyye batem soɗ Stepanas ti ɗoɗ ɓoozí, wo ni k'elkiyo ye baa wenda ti doolo wede ni y' zuyye batem sey me.

17Kun suune Almasi yi n'igibo, ɗuwo n'a ki'n suyyite batem ye, wo ɗe n'an di kizite Rabila Majjaanawa. Wo ni ki kazita'ɗ ono ɗoɗ uɗse, kono ɗuwo an gi di'n wolle nuɗ aa wede suuniyo k'ono ye, para maɗ unto ere k'Almasi ekk'undumu wede zaapu t'ekki bakadí kaɗ tontilko gette, a t'isa aa mundá ki bita.

Almasi, toogo Raa wo suuniyo k'ono ere ki Raa

18Ono ɗoɗ in kazita a tukk'Almasi y'inda ekk'undumu wede zaapu t'ekki bakadí kaɗ tontilko geɗ, a kane ɗoɗ i lekkiyo a urzi daggiya, ono geɗ an ollige'ɗ aa ono ɗoɗ maadagi, wo ɗe a kine ɗoɗ Raa y'in utte, ono geɗ in di'n ollige, kane toogo ki Raa batum.

19Derec, ono eɗ an riije ti kaaga adda mattup ki Raa, an'de: «Kane ɗoɗ an elkiyo an d'ede suuniyo k'ono, suuniyo k'onamaɗ gette n'an ti dagga, kane ɗoɗ eedaɗ soodo a elkiso, elkisadaɗ soodo gette n'an ti t'isa ki bita.»

20Iɗkino maɗ kane ɗoɗ suuniyo k'ono eɗ, an di roote moo sey me? Ɗoɗ suuniyo k'oogoro Muusa eɗ, an di roote moo sey me? Ɗoɗ niikiyto k'ono k'ozzinagi ɗoɗ aɗkeɗɗo eɗ, an di roote moo sey me? Derec, suuniyo k'ono ere adda duniya ette, Raa yi-t'ize aa suuniyo ɗoɗ maadagi.

21Ki kotto kane ɗoɗ duniya ti suuniyo k'ono ere k'aggadaɗ, an k'iine an ki ti zuune ye suuniyo k'ono ere ki Raa te. Iɗkino maɗ Raa ulbí i-d'ize uɗse y'an di'n utte kane ɗoɗ i ziipe addaɗ a yode t'urzi kazita k'ono ɗoɗ ɗuwo an elkiyo ono ɗoɗ maadagi geɗ me.

22Kane Yawudiyagi an dehu an di wolle sulɗi k'armika a kize onamiɗ in kazita derec, wo kane Girek an dehu urzi suuniyo k'ono.

23Wo ɗe kaye ay kazita Almasi an ti y' tiike ekk'undumu wede zaapu t'ekki bakadí kaɗ tontilko, wo a kane Yawudiyagi ono geɗ an t'ize aa morkkolo morkiy'e. Wo a kane ɗoɗ Yawudiyagi ye an elkiyo ono ɗoɗ maadagi.

24Wo ɗe ki kane ɗoɗ Raa yi wiike, ise Yawudiyagi ise Yawudiyagi ye toɗ, an suune yo Almasi toogo Raa wo suuniyo k'ono ere ki Raa.

²⁵Mundá wede Raa y'isiyo wo dúwo an elkiyo yoŋ ki maade geŋ, maadikadí gette ti jiiere suuniyo k'ono ere ki kane, wo mundá wede dúwo an elkiyo Raa toogadí baata geŋ, toogadí gette ti jiiere ere ki kane.

Mundá wede Raa yi biire

²⁶Zemba ki nuŋ, kun wollo kay, ti diine kune doŋ Raa yi wiike'ŋ, a eda dúwo kune aŋ wee wee, doŋ suuniyo k'ono baata, doŋ toogo baata, wo doŋ adda boozan sudaŋ ti môolo baata.

²⁷Wo de Raa yi biire mundá wede aa ki maade a eda doŋ duniya, kono y'an di'n t'ele sukiyagi a kane doŋ an elkiyo an d'ede suuniyo k'ono. Raa yi biire mundá wede toogadí baata a eda doŋ duniya, kono y'an di'n t'ele sukiyagi a kane doŋ an elkiyo an d'ede toogo.

²⁸Raa yi biire mundá wede a eda doŋ duniya yoŋ ki bita, dúwo an di y' koogire wo an di y' woliyo t'umbo soo geŋ, kono y'a latte mundá wede dúwo an yi woliyo beehiye i-d'ede suma.

²⁹Raa y'ize iŋkino kono wede tudde soo toŋ umbo a kili tuddí a daanadí me.

³⁰Yoŋ y'un ti'n gitte kaŋ soo ti Isa Almasi. Wo yo Almasi geŋ, y'a t'ize a kine urzi suuniyo k'ono ettiyo ti Raa. T'urzi k'Almasi Raa y'in di'n isiyo doŋ ki diine a daanadí, y'in di'n ooyiso kese a yode, wo y'in di'n addiya t'adda k'oldiko.

³¹Geŋ ono eŋ an riŋe ti kaaga adda mattup ki Raa, an'de: «Wede yi dehu yi t'imme tuddí maŋ, y'amma tuddí a mundá wede Galmeega Raa y'ize.»

1 Korent 2

Kazita a urzi k'unto k'Almasi

¹Ki nuuno zemba ki nuŋ, ti poone n'iide di kune kono n'un di gize mundá wede ombide ki Raa. Aame geŋ n'un ki ruutite ono doŋ a ki jiiere egguŋ ye, wo soŋ n'un ki ruutite ti suuniyo k'ono ere ettiyo t'urzi dúwo ye.

²Nuŋ, di kune n'a dihe t'addó pay miŋ, n'un kizite rabila k'Isa Almasi, Almasi an tiike ekk'undumu wede zaapu t'ekki bakadí kaŋ tontilko daŋŋal.

³Kono kamo aame nuŋ batum di kune geŋ, toogadó baata, o d'ede orgiso baadaŋ wo ni ŋoŋŋirso.

⁴Dooyisadó ti ono doŋ n'un gizite geŋ, kane'ŋ mundá a ti'n t'okkiy'e ti suuniyo k'ono ere ettiyo t'urzi dúwo kun d'oyye eego umbo. Wo de kane ono geŋ toogo ere k'Unde Raa t'un ti'n gize kereŋ.

⁵Iŋkino maŋ zaapu k'adduguŋ a Isa gette, ti ki konso ekki suuniyo k'ono ere ettiyo t'urzi dúwo ye, wo de ti konso a toogo Raa.

Suuniyo k'ono ere ki Raa

⁶Derec, kaye ay anni dooyiso urzi suuniyo k'ono soo in̄kino a don̄ i-dirse a urzi zaapu k'addan̄ a Isa. Wo de ay an ki'n dooyiso suuniyo k'ono ere ettiyo ti don̄ duniya ye, suuniyo k'ono ere ki mozagi don̄ ki duniya ye, kane gen̄ san̄ an t'isa ki bita.

⁷Wo de kaye ay anni dooyiso suuniyo k'ono ere ki Raa ombide, wo tod' ti lekkiyo ombide a duwo me. Tode gette Raa yi ti biire ti poone a kine, ti poone y'a okkima duniya botto too, kono y'in di'n t'etta k'adda dary'ikadi.

⁸Ti diine mozagi don̄ ki duniya gen̄, suuniyo k'ono gette wenda soo ton̄ umbo i ti suune me. Aame an ti suune kotto man̄, Galmeega yon̄ goole a jire pay gen̄ an ki y' taake ye ekk'undumu wede zaapu t'ekki bakadi kan̄ tontilko me.

⁹Wo de ono en̄ an riije ti kaaga adda mattup ki Raa, an'de: «Munda wede ersa ti ki y' wulle ye, kuude yi ki y'illiga ye, wo munda wede wedusu yi k'ilke eego ye gen̄, kane Raa yi'n ikkima a don̄ i y' giyye.»

¹⁰Wo gen̄ a kine t'urzi k'Unde Kamilen̄, Raa y'in t'iidiba ita ki suldi don̄ ombide gen̄ me. Derec, Unde Kamilen̄ gette suldi pay ti'ni suune, ise suldi don̄ ombide ki Raa adda k'addi ton̄ man̄.

¹¹Wee wee t'adda diine duwo en̄, aane a suune munda wede adda k'adde bakadi me, daa ki unde ere adda k'addi ye man̄? In̄kino kay munda wede adda k'adde Raa, wenda soo ton̄ umbo a yi suune me, daa ki Unde Raa ye man̄.

¹²Ki kine in k'uune unde ere ki duniya ye, wo de in uune Unde ere ettiyo ti Raa, kono in di suune suldi don̄ pay Raa y'in eliyo t'urzi beekadi.

¹³Wo ekki suldi gen̄, ay ki rootiyo'ŋ t'ono don̄ ettiyo t'urzi suuniyo k'ono ere ki duwo ge dooyiso ye, wo de ay rootiyo t'ono don̄ Unde Raa t'ayni dooyiso. Gen̄ in̄kino ay di kazita suldi don̄ derec ettiyo t'urzi k'Unde Raa, a kane don̄ an d'ede Unde gettiyo.

¹⁴Wede y'elkiyo a urzi tudde dan̄nal gen̄, yi k'ambe ye a suldi don̄ ettiyo t'urzi k'Unde Raa me. Kane gen̄ a yode aa ono don̄ maadagi, yon̄ yi k'aane itadan̄ yi ki ti suune ye, kono suldi gen̄ t'urzi k'Unde Raa dan̄nal wede y'aane y'anni suune me.

¹⁵Wo de wede i-d'ede Unde Raa gen̄, suldi pay y'aane y'an ozire, wo ki yode batum wenda soo ton̄ umbo a aane a dekke booro eedi me.

¹⁶Ono en̄ an riije ti kaaga adda mattup ki Raa, an'de: «Wee wee aane a suune elkiyo ki Galmeega Raa te? Wee wee aane a yi dooye me?» Wo de kine'ŋ, in d'ede elkiyo ere k'Almasi gette adda k'addin̄.

1 Korent 3

Don̄ i ki dirse ye a urzi zaapu k'addan̄ a Isa

¹Ki nuṅ maṅ, zemba ki nuṅ, aame n'iide di kune geṅ n'un ki ruutite aakede a ḍoṅ an d'ede Unde Raa ye. Wo ḍe n'un ruutite aakede a ḍoṅ i lekkiyo aa tuddaṅ ti dehu, kono kune aa inṅi sunṅi a urzi lekkiyo kettiyo kaṅ soo t'Isa Almasi me.

²Ono ḍoṅ n'un gizite geṅ aa n'un ele uḍu kun d'iibe, ombo ere zakidi ye, kono ombo gette kun ki ti-t'oomi ye. Wo ḍe aṅkenṅo toṅ kun k'aane kun ki ti-t'oomi ye,

³kono kune'ṅ lekkiyaguṅ daayum aa tudde ti dehu. Ni rootiyo inṅino kono a diinaguṅ un d'ede kolbiso wo niikiyto, geṅ i-kaza kune'ṅ lekkiyaguṅ aa tudde ti dehu. Ki kotto, kune'ṅ sooruguṅ pay gette aa ki ḍoṅ tudde ḍaṅṅal.

⁴Wo aame ti diinaguṅ wede soṅ yi d'eesiyo: «Nuṅ ki Pool», wo wede soṅ: «Nuṅ ki Apolos» maṅ, geṅ kun rootiyo aa ḍoṅ tudde ge rootiyo ḍaṅṅal.

Tudduguṅ Boy Raa

⁵Kun di niikiyto a tukki nuṅ Pool ti Apolos miṅ, kaye moo baadi me? Kaye miṅ ḍoṅ naabo Raa ḍaṅṅal, wo t'urzi kaye kun di ziipe adduguṅ a Isa. Kaye wede tuuku toṅ y'ize naabo ere a-t'ette a munda wede Galmeega yi ele.

⁶Aakede iido ki poone nuṅ Pool n'a-giira buzu, saṅ Apolos y'a d'ibiti ahu, wo ḍe Raa siidi a y'udde buzu wo yi d'ohire me.

⁷Inṅino wede i giira ti wede ibiti ahu geṅ, kane sundaṅ umbo, wo ḍe suma ki Raa wede buzu yi-ti y'adfiya wo yi d'ohire.

⁸Wede i giira ti wede ibiti ahu geṅ, kane kaṅ soo wede a ceere bakadi umbo. A wede tuuku toṅ Raa yi di t'ela raṅṅadi a naabadi ere y'ize.

⁹Ni rootiyo inṅino kono kaye ay naabiya kaṅ soo naabo Raa te, wo kune doome Raa. Wo soṅ kune boy wede Raa y'oozige.

¹⁰Raa a beekadi y'o d'ele urzi k'isiyo naabo di kune aakede wede y'ilke wo y'a-riike ita boy, geṅ nuṅ n'a-ziipe ita boy te, wo wede doolo yi d'oozige eego. Wo ḍe wede tuuku oozige geṅ, yi koona metike a urzi k'oozigayi geṅ me.

¹¹Derec, Isa Almasi Raa y'a ti y' ziipe aakede ita boy wede soo ḍaṅṅal, inṅino wenda soo toṅ umbo a aane i-zaape ita boy ti doolo me.

¹²Ekk'ita boy gette ḍoṅ oṅgo an d'oozige ti suldi ḍoṅ aakede: dap, maala gurus, ise moṅgali ḍoṅ majjandani, ḍoṅ oṅgo ti inda, ti seemi ise ti bulgo.

¹³A onniyo ere Raa yi dekka booro gette, naabo wede tuuku toṅ itatu a t'adfa kereṅ. Derec, onniyo gette naabo wede tuuku toṅ Raa yi-ti t'ela adda k'uwwu y'a ti naama. Inṅino wede tuuku toṅ y'a-wolla naabadi oldo kunuṅ, beehiye koo maṅ?

¹⁴Aame wede yi niibe wo naabadí gette uwwo ti ki t'igga ye maṅ, yoṅ geṅ y'a t'oona raṅṅadí.

¹⁵Wo de aame wede naabadí i t'igga maṅ, yi ki t'oona ye raṅṅadí te. Yode batum Raa y'a y'utta, wo geṅ aakede an y'irgo ti biza k'uwwo.

¹⁶Ki kotto kun suune kune 'Boy Raa, wo Unde Raa ti lekkiyo adda k'addugun.

¹⁷Aame wede yi litta 'Boy Raa maṅ, yode toṅ Raa y'a ti y' latta. Derec, 'Boy Raa geṅ yoṅ kamilen, wo 'Boy Raa miṅ yoṅ kune batum.

Kune ki Almasi

¹⁸Kune'ṅ wenda soo toṅ y'oola elkisadí ti ti y' dagga ye. Aame wede ti diinagun y'elkiyo yoṅ i-d'ede suuniyo k'ono a urzi lekkiyo doṅ duniya maṅ, yi t'iso aa ki maade kono y'a t'isa wede i-d'ede suuniyo k'ono ki kotto.

¹⁹Derec, suuniyo k'ono ere ettiyo ti doṅ duniya gette, a daana Raa tod'te aa munda ki maade, kono ono eṅ an riṅe ti kaaga adda mattup ki Raa, an'de: «Duwo doṅ an elkiyo an d'ede suuniyo k'ono geṅ, Raa yi-ti'n seddu t'urzi metiṅkadaṅ.»

²⁰Wo soṅ an riṅe, an'de: «Galmeega Raa yi ti suune elkiyo ki kane doṅ an elkiyo an d'ede suuniyo k'ono gette, yi suune tod'te ki bita.»

²¹Kono k'iṅkino geṅ, wenda soo toṅ tuddí yi kili ye t'urzi wedusu me. Derec, suldi pay geṅ kane ki kune,

²²ise nuṅ Pool, Apolos wo Piyer, ise duniya, lekkiyo wo unto, ise suldi doṅ aṅkenṅo wo suldi doṅ etto k'ita toṅ maṅ. Kane pay geṅ miṅ ki kune.

²³Wo de kune ki Almasi, wo Almasi yoṅ ki Raa.

1 Korent 4

Galmeega danṅal i deka booro me

¹Iṅkino maṅ i dehu kaye'ṅ duwo an ay di'n wolle doṅ naabo k'Almasi, wo doṅ i yeeriyo suldi doṅ ombide ki Raa.

²Wede yeeriyo geṅ, i dehu y'a t'ise wede i seedu zakidi a urzi naabadí.

³Ki nuuno, ise i dekke booro a eedó kune, ise doṅ dekkiyo booro toṅ maṅ, nuṅ i ki n'aadumu ye. Wo de nuṅ batum ni ki dekke booro a eedó ye.

⁴Ki kotto nuṅ munda wede k'oldiko a eedó ni ki suune ye, wo de geṅṅo toṅ i-ki kaza nuṅ ki diine a daana Raa ye. Wede i deka booro eedó'ṅ yode Galmeega.

⁵Kono k'iṅkino geṅ wede tuuku toṅ kun dekke booro eedí ye, ki poone onniyatú t'a aana, onniyo ere Galmeega y'a kimo y'a t'oodiba ita ki suldi doṅ aṅkenṅo i lekkiyo ombide adda zimolo, wo elkiyo duwo ere adda k'addaṅ toṅ y'a ti waara

pây. Injino maŋ onniyo gette wede tuuku toŋ Raa y'a yi t'imma a naabadí ere y'ize te.

Koliyo tudde ki zemba doŋ a Korent

⁶Zemba ki nuŋ, ni rootiyo injino a tukki nuuno batum ti Apolos kono un di'n dooye. Nuŋ ni dehu kun di wolle urzi lekkiyadey, wo t'urzi geŋ kun di suune ita k'ono doŋ duwo an rootiyo, an'de: «Kun ti doopida y'irwe ye, kun lekko a ono doŋ an riije geŋno.» Injino maŋ wenda soo toŋ ti diinaguŋ yi kila tuddí yi t'eesa, yi t'umbe yode eŋno wo yo eŋ mendí me.

⁷Wee wee a ruute kee ki jiire doŋ oŋgo me? Ki kotto, suldi pay doŋ a-d'ede geŋ a ele Raa. Wo de a ele Raa maŋ, ki moo me ki-koliyo tuddá aakede a-k'ele Raa ye me?

⁸Aŋkeŋ kun elkiyo suldi doŋ pay adduguŋ i dehu kun uune baa! Kun t'ize doŋ laale baa! Kun t'ize mozagi baa, wo de kaye'ŋ, ay ki t'ize ye! Kune kun t'ize mozagi ki kotto maŋ, geŋ beehiye, injino kaye toŋ ay d'ooma moziko ti kune kay!

⁹Wo geŋ nuŋ n'elkiyo kaye doŋ zina k'Isa eŋ Raa y'ay ti'n ziipe doŋ k'ita ti duwo pay. Kaye aa doŋ booro ti'ni ziida ki tôwwo a daana doŋ duniya, kono an ay di'n udde a bere doŋ duuru, an ay di'n okko maade a daanadaŋ wo a daana maaleekiyagi pây.

¹⁰Kaye doŋ maadagi kono k'Almasi me, wo de kune doŋ suuniyo k'ono a urzi lekkiyo kettiyo kaŋ soo ti Almasi. Kaye toogadey baata, wo de kune doŋ toogo. Kune'ŋ an un d'eliyo suma, wo de kaye an ay di'n wolliyo aa doŋ bita!

¹¹Bini aŋki toŋ kaye daayum mosogo wo ôrme, ossiyo toŋ ay baatiya, an ay d'isiyo ulsu, ay d'ambu k'ume soo me soo me,

¹²ay d'oodibe yeebadey a naabo ti beezey doo miŋ ay d'ombo kollo. Duwo an ayni kaldita toŋ, ay tondiyo Raa y'an di-zaape beeko. Duwo an ayni dabirsa a urzi k'Isa toŋ, ay d'ombiŋe.

¹³Duwo an ay rootiyo ono doŋ ulpi toŋ, kaye ay an di-kama onamaŋ ti golla ere tasse. Bini aŋki toŋ kaye duwo an ayni wolliyo aa disse ki doŋ duniya, aa ganigi wede doŋ duniya pay an y'azzuru.

Geyyiso Pool a doŋ ki Korent

¹⁴Nuŋ ni raaniya ono eŋ, kono n'un gi di'n t'ele sukuyagi ye. Wo de ni raaniya kono n'un di-tooke kuuduguŋ, aakede kune inŋizó doŋ ni giyye baadaŋ.

¹⁵Ise un d'ede doŋ dokkiyo a urzi lekkiyo kettiyo kaŋ soo t'Almasi geŋ kane dupiyagi toŋ maŋ, meege k'ehiyaguŋ miŋ soo. Geŋ nuŋ ni t'ize aa meeguguŋ kono kun uune ehiyo ere aware a urzi lekkiyo kettiyo kaŋ soo t'Isa Almasi, t'urzi Rabila Majjaanawa n'un gizite.

¹⁶Inkino maɗ, n'un di rooto ti obe bey, kun ambo zindó.

¹⁷Geɗ kono k'in kino, n'un t'igibe Timote yoɗ aa ulo k'addó wede ki geyyiso, yi seedu zakidí a naabadí ere a urzi Galmeega te. Yoɗ y'un di'n dooyey sey a suldí dɔɗ i dokkiyo nuɗ Pool a urzi lekkiyadó ere kettiyo kaɗ soo t'Almasi, geɗ munda wede ni-dooyiso dúwo a ume tuuku toɗ maɗ, a diine dɔɗ pay ogiysito ti suma k'Isa.

¹⁸Dɔɗ oɗɗoɗ ti diinaguɗ an elkiyo ni ki kima ye baa di kune me, inkino an di koliyo tuddaɗ.

¹⁹Wo de aame Galmeega yi diha maɗ, ni kima di kune goppon. Aame n'iiney maɗ, kane dɔɗ i koliyo tuddaɗ geɗ ni'ni suuney a ono dɔɗ addey ti bizaɗ ye, wo de a toogo ere an d'ede.

²⁰Ni rootiyo inkino kono lekkiyo wede a urzi Moziko Raa gette, tod'te i ki kaza'ɗ t'ono dɔɗ addiya ti bizí ye, wo de i kaza'ɗ toogo ki naabo ere y'isiyo.

²¹Inkino maɗ kun dehu moo me? Kun dehu n'a odo di kune miɗ ti dalka kunuɗ, n'a odo ti geyyiso wo ti adde tasse ko?

1 Korent 5

Lekkiyo ere oldo a diine dɔɗ ogiyo ti suma k'Isa

¹Kaye ay d'ollige a ume tuuku toɗ dúwo an rootiyo, dɔɗ oɗɗoɗ ti diinaguɗ an isiyo boliyo, wo boliyo ere an isiyo gette kane dɔɗ i ki suune Raa soo daɗɗal ye toɗ an k'ise inkino ye, kono i d'ede wede soo y'isiyo boliyo t'ere meegí.

²Wo kune'ɗ kun di koliyo tudduguɗ! Ki too maɗ kun d'ôole môle a oldiko gette, wo wede y'isiyo boliyo ere inkino gette ti diinaguɗ kun ti y' limmi.

³Derec ki nuuno maɗ, ki tudde nuɗ dokki ti kune me, wo toɗ elkisadó daayum ti kune, wo nuɗ booro ni-ti dikke a tukki wede isiyo inkino geɗ me, aakede nuɗ a diinaguɗ.

⁴Kun t'ogiyoy kaɗ soo, wo nuɗ elkisadó ti kune. Geɗ ti suma wo toogo ki Galmeegiɗ Isa Almasi,

⁵wede inkino geɗ kun y'oolo a bey Meeda siitandani kono t'a t'ide tuddí ere k'oldiko gettiyo, wo de undí t'a utta a onniyo kama Galmeega Isa te.

⁶Beehiye ye kun di kili tudduguɗ me! Ki kotto ono eɗ kun'ni suune: «Orme boolon daɗɗal geɗ miɗ, gododo baadaɗ yi-ti t'oozige pay.»

⁷Inkino maɗ oldiko aa orme mazzini a diinaguɗ gette kun ti t'addo mentú, kono kun t'isa aa gododo aware daa k'orme. Wo derec, kun t'ize aa gododo daa k'orme t'urzi k'unto k'Almasi, yode wede aakede ulo damu an wilda ki sedefe a tarnaape Pak ki Yawudiyagi.

⁸Inkino tarnaape Pak geŋ in iso, wo in iso ti mappa daa k'orme, a kize in isiyo t'addiŋ soo wo t'ono doŋ d'erec. Wo de tarnaape geŋ in k'ise ti mappa wede an ize t'orme mazzini ye, a kize in k'isiyo'ŋ ti bundiko wo ti suldi doŋ ulpi in isiyo mirsi geŋŋo ye.

⁹Adda mattupadó ere n'un riije ti poone gette, ni ruute, n'ede: «Kun lekke kaŋ soo ye ti doŋ isiyo boliyo me.»

¹⁰Onamó eŋ ni ki rootiyo'ŋ a tukki kane doŋ pay isiyo boliyo adda duniya ye, a tukki kane doŋ pay okkiso a suldi pay ye, a tukki kane doŋ pay oogire ye, a tukki kane doŋ pay i daaniya loŋgayi ye. Wo de inkino ye maŋ, i dehu kun t'adde t'adda duniya me!

¹¹Aha, nuŋ n'un riije kun ki lekke kaŋ soo ye ti wede y'ede, yoŋ leema a urzi k'Almasi wo yi d'isiyo boliyo, yi d'okkiso a suldi pay, yi daaniya loŋgayi, yi kaldita duwo, yi sobo i ceeriyo eego, wo y'oogire ti metiŋko. Wede isiyo inkino geŋ, ombo toŋ kun oomi ye ti yode me.

¹²⁻¹³Inkino maŋ kane doŋ i ki ziipe addaŋ a Isa ye geŋ, i deŋka booro eedaŋ nuuno ye. Kane geŋ i deŋka booro eedaŋ Raa. Wo doŋ i ziipe addaŋ a Isa geŋ, kune i deŋko booro eedaŋ me, kono ono eŋ an riije ti kaaga adda mattup ki Raa, an'de: «Wede isiyo ulsu geŋ, ti diinaguŋ kun ti y'olmu.»

1 Korent 6

Tôwwo k'ono ki doŋ i ziipe addaŋ a Isa

¹A diinaguŋ aame wede i-d'ede ono ti leema maŋ, ki moo me kun d'oyyiso daa k'orgiso kun d'eŋgilso ki daana doŋ i ki suune Raa ye, an un d'isiyo booraguŋ te? Ki too maŋ kun t'ette ki daana doŋ ki Raa un d'ise booraguŋ te.

²Ki kotto i deŋka booro a ekki doŋ duniya kune doŋ ki Raa. Kune kun ki suune ye ko? Wo aame i deŋka booro a ekki doŋ duniya kune maŋ, wo de mummino ono doŋ i k'oone ye toŋ, ti diinaguŋ kun ki d'aaniya ye, dekkiyo booradaŋ me.

³Kun suune maaleekiyagi toŋ kine i deŋka booro eedaŋ me. Geŋ inkino in aane a ceere in deŋke booro k'ono doŋ a lekkiyadiŋ ere a duniya te.

⁴Wo aame un aaniya ono a diinaguŋ maŋ, kun d'ettiyo ki daana doŋ dekkiyo booro, kane geŋ doŋ ogiyso ti suma k'Isa an'ni wolliyo aa doŋ bita!

⁵Nuŋ ni rootiyo inkino geŋ, sukiyagi a kune. Ti diinaguŋ wenda soo toŋ umbo ko, i-d'ede suuniyo k'ono y'a aane y'a deŋke booro zembadi me? Aha, ede!

⁶Beehiye ye, leema ti leema an d'ede ono wo an d'ise booro a daana doŋ i ki ziipe addaŋ a Isa ye me!

⁷Derec, aame ti diinaguñ kun isiyto bordfari mañ, geñ miñ i-kaza kun t'iire baa a urzi Raa me. Beehiye a kune'ñ, leema y'un ise munda wede ki diine ye toñ kun d'ombiña, ise y'a-t'oobe sulfuguñ toñ, bee miñ kun koone booro a ñaana ñuwo.

⁸Wo ñe kune, isiyto suldi ñoñ ki diine ye me, kun t'oobiyto suldi ki ñoñ ongoñ, wo kane'ñ geñ miñ zembaguñ ñoñ i ziipe addañ a Isa.

⁹Ki kotto kun suune, ñoñ isiyto munda wede ki diine ye geñ, an k'etta ye ki Moziko Raa te. Kune'ñ wenda soo toñ y'oola elkisadi ti ti y' dagga ye: Ñoñ isiyto boliyo, ñoñ ottilso a longayi, ñoñ i moonite t'erayi ise ti kuuli k'eebañ, ñoñ i ti t'isiyo tuddañ aa erayi, kuuli ñoñ i moonite ti tuddañ,

¹⁰Ñoñ k'oogire, ñoñ okkiso a suldi pay, ñoñ i sobo i ceeriyo eego, ñoñ i kaldita ñuwo, wo ñoñ oogire ñuwo ti metiñko, kane geñ an k'etta ye ki Moziko Raa te.

¹¹Ti poone ñoñ ongo ti diinaguñ, gettiñ lekkiyadañ. Wo ñe ankeñño kune Raa y'un t'upile oldikaguñ, y'un di'n uuye kese a yode, wo y'un di'n ize ñoñ ki diine a ñaanadi ti suma Galmeega Isa Almasi wo t'urzi k'Unde Raa.

Tudde tod'te boy k'Unde Kamilen

¹²Ñoñ ongoñ an rootiyo, an'de: «Nuñ o d'ede urzi k'isiyo munda tuuku toñ mañ.» Derec in kino, wo ñe kane suldi geñ pay beehiye ye a nuñ me. «Nuñ o d'ede urzi k'isiyo munda tuuku toñ mañ.» Derec in kino, wo ñe nuñ ni ki dehu n'a ki t'ise bule ki munda tuuku toñ mañ ye.

¹³Soñ an rootiyo, an'de: «Ombo tod'te k'adda k'adde, wo adde ki sarkiya k'ombo.» Eyye derec in kino, wo kane geñ sirwañ pay onniyo soo Raa y'an isa umbo. Wo ñe tudde gette Raa yi t'ikkima k'isiyo boliyo ye. Ki too mañ tudde gette ki yode Galmeega, wo Galmeega toñ, yoñ ki tode tudde.

¹⁴Raa yi ti y' bilde Galmeega Isa ti diine ñoñ unto geñ, kine toñ ti toogadi y'in ti'n balda kay.

¹⁵Ki kotto kun suune, tudduguñ gette tod'te aakede moke ki tudde k'Almasi. In kino mañ, beehiye ye n'a t'ambe moke ki tudde k'Almasi, n'a-ti y' t'okkiye ti tudde k'erewo ere ooniyo ombo bittu t'itatú, a t'ise moke ki tuddutu me.

¹⁶Geñ ki kotto, kun suune wede y'a t'ukkiye ti erewo ere ooniyo ombo bittu t'itatú mañ, yode ti tode geñ an t'ize tudde soo, kono ono eñ an riñe ti kaaga adda mattup ki Raa, an'de: «Kane sire geñ an t'isa tudde soo.»

¹⁷Wo ñe wede y'a t'ukkiye ti Galmeega mañ, yode geñ a urzi k'Unde an t'ize aa wedusu soo.

¹⁸In kino mañ kun ti ledfo dokki t'urzi boliyo me. Oldiko ere pay ti doolo wede y'isiyo gette, tod'te adda tudde ye. Wo ñe wede y'isiyo boliyo geñ y'isiyo oldiko a tuddi batum.

¹⁹Ki kotto kun suune, tuddugun gette tod'te boy k'Unde Kamilen, tode Unde gette Raa y'un t'ele ti lekkiyo adda k'addugun. Tuddugun gette ki kune ye.

²⁰Kune Raa y'un iwila ti zooye wede oone, geɗ geɗ kune ki yode. Inkinno maɗ Raa kun y'amma ti tuddugun gette.

1 Korent 7

Kama k'ono a urzi seedu

¹A urzi k'onamgun don kun ni tunde adda mattupagun geɗ, anken beehiye kule y'a-seeda tuddi yi ki dehe ye erewo te.

²Wo de, min wede tuuku ton yi-ki t'etta a isiyo boliyo ye geɗ, beehiye yi-seeda erewo wo erewo ton ti-seeda kule.

³Kule geɗ ki moone ti eddi yi-ki tooge ye, wo tode erewo ton inkinno, a kulatu ti-ki tooge ye kay.

⁴Erewo gette ti ki roote ye tuddutu ki tode danjal me, kono tuddutu ki kulatu pay. Wo kule ton inkinno yi ki roote ye tuddi ki yode danjal me, kono tuddi ki eddi pay.

⁵Inkinno kune'ɗ, wede tuuku ton tuddi yi-ti tooga ye a bakadi me, wo de ise maɗ, kun ti dekke ti tuddugun geɗ k'onniyo miibi aame kun a ti gitte onamgun danjal kono kun di tonde Raa. Wo saɗ kun di-kime a lekkiyagun ere daayum, para maɗ tuddugun kun ki ti seeda ye, kun t'ora bey Meeda siitandani t'un di'n naama daggiya.

⁶Ono don ni rootiyo en, n'un ki'n isiyo ki toogo ye, wo de n'un kaza urzi kun di lekke beehiye.

⁷Ki nun maɗ, munda wede beehiye'ɗ duwo pay an di lekke daa seddu aa nuuno. Wo de wede tuuku ton Raa yi-d'ele munda siidi siidi, wede son yi-d'ele munda kino, a wede son yi-d'ele munda kino.

⁸Anken, ni rootiyo a kane don i ki zidde ye botto ti don mandaydayi, beehiye an di lekke daa seddu aa nuuno Pool.

⁹Wo de tudaɗ an k'aane an ki ti seeda ye maɗ, an soddo. Beehiye an sedde min, tudaɗ t'an d'an t'ambe an t'ette naapu.

¹⁰⁻¹¹Enno munda wede ni rootiyo kane don i zidde an d'ise me, i rootiyo nuuno ye, i rootiyo Galmeega: I dehu kule geɗ eddi yi ki ti peere ye, wo erewo ton kulatu ti ki y'ooli ye. Wo aame kulatu ti y'iili maɗ, t'a lekko daa seddu, ise maɗ an t'okkiyo ti kulatu t'a-kama.

12A kane don ongo, ono en i rootiyo nuuno, i rootiyo Galmeega ye: Aame leema yi ziipe addi a Isa, wo eddi ti ki ziipe addutu a Isa ye wo ti dehu ti lekke ti yode man, i dehu y'a ki ti peere ye.

13Geŋ inŋkino kay, aame erewo ti ziipe addutu a Isa, wo kulatu yi ki ziipe addi a Isa ye wo yi dehu yi lekke ti tode man, i dehu t'a ki y'ooli ye.

14Ni rootiyo inŋkino kono kule wede i ki ziipe addi a Isa ye geŋ, yoŋ goppon ti Raa t'urzi zaapu k'adde ki eddi. Ki erewo ere i ki ziipe addutu a Isa ye toŋ inŋkino, tod'te goppon ti Raa t'urzi zaapu k'adde ki kulatu. Para man, inŋigun geŋ kane dokki ti Raa, wo de ki kotto man kane goppon ti Raa me.

15Wo de aame kane don i ki ziipe addan a Isa ye geŋ, an dehu an di-teepe ti kane don i ziipe addan a Isa ise erewo ise kule man, urzi ede. Aame geŋ kane zamba don i ziipe addan a Isa ise kule erewo geŋ, eedan toore, kono Raa y'unni wiike kun di lekke ti toose.

16Koŋ erewo no, mi suune ko, koo Raa y'utta kulayi t'urzi koŋ me? Wo kee kule no, ki suune ko, koo Raa y'utta edda t'urzi kee me?

Konso a lekkiyo ere Galmeega y'eliyo

17Inŋkino man adda k'ono don pay en, munda wede a jiiere enno: Kune'ŋ wede tuuku toŋ yi koonaa a lekkiyadi ere Galmeega yi ele, ti poone san Raa y'a ti y' wiike. Geŋ munda wede ni rootiyo adda diine don pay ogiysito ti suma k'Isa an d'ise.

18Wede'ŋ ponde yi wilda ti poone, san Raa y'a ti y' wiike man, geŋ yi-t'ise tuddi aa wede pondayi daa waldu ye. Wo wede daa waldu ponde ti poone, san Raa y'a ti y' wiike man, geŋ yi dehe waldu ponde ye.

19Ise wede'ŋ yi wilda ponde, yi ki wilda ye toŋ, adda geŋ munda a di y' nooge umbo, i jiiere in d'ozire ekki suldi don Raa yi'n rootiyo in d'ise.

20I dehu wede tuuku toŋ yi koonaa a lekkiyadi ere ti poone, san Raa y'a ti y' wiike.

21T'ume Raa y'a ki waaka botto geŋ kee bule man, ulba a-t'oodde ye. Wo de aame urzi k'a t'adde edda ti buliko ede man, geŋ beehiye ki t'addo.

22Derec, bule wede Galmeega yi y' wiike geŋ, yi t'ize eddi toore a urzi Galmeega me. Geŋ inŋkino kay, wede eddi toore Galmeega yi y' wiike geŋ, yoŋ yi t'ize bule ki Almasi.

23Raa y'un iwila ti zooye wede oone, geŋ kune ki yode, inŋkino man kun t'ise bulagi duwo ye.

24Zamba ki nun, i dehu wede tuuku toŋ a daana Raa yi koonaa a lekkiyadi ere ti poone, san Raa y'a ti y' wiike.

Kooke a don i ki zidde ye

²⁵A urzi kane donj i ki zidde ye, ono enj i rootiyo Galmeega ye, i rootiyo nuuno a elkiyadó, nuñ wede Galmeega y’o ize adde koduwo. Injino duwo an zaape adda a nuuno.

²⁶Kun ollo ettiyo elkiyadó te: A ulbe k’oodiyo wede ankenno baadañ enj, beehiye a kune wede tuuku tonj, yi koonaa a lekkiyadi aa ere ti poone.

²⁷Kee’ñ a-d’ede erewo mañ, ki ti peera ye, wo erowo a-k’ede ye mañ, ki deha seedu ye.

²⁸Wo de aame ki ziida tonj mañ, ki k’ize oldiko ye, wo aame uto konso ti ziida tonj mañ, ti k’ize oldiko ye. Wo derec, kane donj i zidde genj dabaradañ baadañ a lekkiyadañ te, wo nuñ ni dehu n’un ti’n ledde ti dabar gette.

²⁹Kun ollo zamba ki nuñ, enno munda wede ni rootiyo me: Onniyo kama Galmeega gopponj. Injino t’ankenno kane donj an d’ede erayi genj, an lekko aakede donj an k’ede erayi ye.

³⁰Donj adda moolo genj, an lekko aakede kane adda moolo ye. Donj isiyo unsuwo genj, an lekko aakede kane adda k’unusuwo ye. Donj owilte suldi genj, an lekko aakede an k’ede suldi ye.

³¹Wo donj i lekkiyo beehiye ti maala duniya tonj, an lekko aakede an ki lekkiyo beehiye ti maala duniya ye, kono duniya ere in ti wolliyo ankenno ette, tod’ t’engilso.

³²Nuñ ni dehu kun di lekke daa k’ulbe k’oodiyo. Wede yi ki ziida erowo ye genj, elkisadi a naabo Galmeega, yi dehu y’aase munda wede Galmeega ulbi i-d’ise unse.

³³Wo de wede i ziida erowo genj, yonj elkisadi a suldi duniya, yi dehu y’aase munda wede eddi ulbutu i-d’ise unse,

³⁴Injino elkisadi i-t’isiyo sire. Wo ki erayi tonj injino, erowo daa kule ise uto konso tonj, tod’te elkisatu a naabo Galmeega, kono ti dehu tuddutu wo elkisatu gette a lekke ooyiso kese a yode. Wo de erowo ere i ziida kule gette, tod’te elkisatu a suldi duniya, ti dehu t’aase munda wede kulatu ulbi i-d’ise unse.

³⁵Ni rootiyo injino beehiye a kune, n’un ki doddiyo sibe a gollagun ye, wo de ni dehu kun d’ise munda wede beehiye a jire wo kun di lekke kettiyo ti Galmeega daa k’elkiso a munda doolo.

Ono a obilagi ti konazi donj ibire

³⁶Obulsu genj, ere k’ebirayi yi ti giyye baadañ wo y’owwiyo tuddi yi ki ti-seeda ye, yi t’isa munda ki sukiyagi ti tode, wo yi ti seeda mañ, genj y’iso aa addi i dehu. Kane sirwanj genj beehiye an di-seeda, injino obulsu genj yi ki t’ize oldiko ye.

³⁷Wo ɗe aame obulsu geɗ yi dihe adda k'addí wenda yi ki y'ize ki tooge ye, tuddí yi ti ziida, wo ere k'ebirayí gette yi ki ti seeda ye maɗ, yi ki ti t'udige ye, iɗkino geɗ y'ize beehiye yi ki ti ziida ye toɗ maɗ.

³⁸Iɗkino maɗ wede ere k'ebirayí yi ti ziida geɗ y'ize beehiye, wo wede yi ki ti ziida ye geɗno toɗ y'ize beehiye a jiire.

Ono a mandaydayi

³⁹Erewo gette tod'te kettiyo a kulatú aame yoɗ yi lekkiyo zeere geɗ me. Wo y'inda ɗoo miɗ, tod'te ettú toore t'aane t'a seeda kule wede aa addutú i dehu, wo ɗe i dehu kule ti seeda geɗ yoɗ yi ziipe addí a Galmeega Isa ɗo.

⁴⁰Ki too maɗ a elkiyadó, uɗsuwatú baadaɗ a ceere t'a lekke sittú me. Wo nuɗ toɗ n'elkiyo ono ni rootiyo eɗ i ni dokkiyo Unde Raa.

1 Korent 8

Sey wede an eliyó sedefe a loɗgayi

¹A urzi sey wede an eliyó sedefe a loɗgayi geɗ, aɗkenɗ n'un di-kama onamguɗ, ɗerec kune kun'de: «Kine pay in d'ede suuniyo.» Wo suuniyo gette t'in di'n eliyó a koliyo tudde, wo ɗe geyyiso tudde gette t'in di'n noogiyo in d'ohire a urzi zaapu k'addiɗ a Isa.

²Wede y'elkiyo yi suune munda maɗ, munda geɗ yi ki y' zuune a urzutú ye botto.

³Wo ɗe wede yi geyyiso Raa maɗ, yode Raa toɗ yi y' suune.

⁴Iɗkino maɗ sey wede an eliyó sedefe a loɗgayi geɗ, k'aadumu ko? Derec, kine in suune kane loɗgayi geɗ i ki kaza munda wede ɗerec ye adda duniya me, wo ede Raa yoɗ soo ɗaɗɗal.

⁵Derec, ɗoɗ oɗoɗ an'de raayagi ede a kandaane wo a siido me. Ki kotto ki kane'ɗ raayagi baadaɗ wo galmaawi toɗ baadaɗ.

⁶Ise iɗkino toɗ, ki kine Raa soo ɗaɗɗal, yoɗ Meega y'ikkima sulɗi pay, wo kine pay ki yode. Galmeega soo ɗaɗɗal, yoɗ Isa Almasi, t'urzi yode Raa y'a t'ikkima sulɗi pay, wo t'urzi yode kine in di lekkiyo.

⁷Wo ɗe ti diine zamba geɗ, kane pay an k'ede suuniyo gettiyo ye. ɗoɗ oɗoɗ ti diinaguɗ an ti d'iile ottilso a loɗgayi. Wo aɗkenɗno an ziipe addaɗ a Isa toɗ, aame an aadumu sey wede an ele sedefe maɗ, an elkiyo ki kotto sey geɗ an ele sedefe a loɗgayi. Wo kane elkisadaɗ ere an di suune munda eɗ beehiye eɗ ulsu gette toogatú baata, iɗkino maɗ an d'owwiyo an t'ize ganigi a ɗaana Raa me.

⁸Ombo gette t'in gi di'n t'etta gopponɗ ti Raa ye. Aame in k'ombo ye toɗ in ki t'ise ɗoɗ k'ita ye, wo aame in ombo toɗ in ki'n aagila ti munda ye.

⁹Kune eggun toore, un d'ede urzi kun d'ise munda wede kun dehu. Wo de kun koona mentikagi a munda wede kun isa, kono zamba don kane toogadan baata a urzi zaapu k'addan a Isa gen, an ki-t'ora adda k'oldiko ye.

¹⁰Aakede i d'ede wedusu yon toogadi baata a urzi zaapu k'addi a Isa, wo yi wolliyo kee wede a-d'ede suuniyo gen ki-guune a biza boy longusu k'aadumu sey man, gen aase mummino me? Koo kono kee gen, yode wede elkiyadi ere y'a suune munda en beehiye en ulsu gette toogatu baata, gen y'a t'ese y'aadi kay sey wede an ele sedeke a longayi gen me.

¹¹Inkino man, kono suuniyada gette, leema wede toogadi baata a urzi zaapu k'addi a Isa gen yi-t'oore y'a dagge, yon leema wede Almasi y'inda kono yode gen me.

¹²Gen inkino kun isiyo oldiko a zembagun, wo kun an t'eeliyo kuuno a elkisadan ere toogatu baata an di suune munda en beehiye en ulsu gette. Inkino man oldiko kun isiyo gette a yode Almasi batum.

¹³Kono kamo a tukkombo danjal leemado ni-ti y' t'ele adda k'oldiko man, ti anki en sey sedeke ni k'aadima ye baa kono ni-ki ti y' t'ele leemado adda k'oldiko ye.

1 Korent 9

Wede zina k'Isa i-d'ede urzi y'a t'oone aggadi

¹Ki kotto, nun o d'ede urzi n'aase munda wede aa addo i dehu. Ki kotto nun wede zina k'Isa, wo Galmeegin Isa ton ni y' wulle t'edayo. Ki kotto kune batum gen, kun ziipe addugun a Isa t'urzi naabo ere n'ize ki Galmeega.

²Ki don ongon an ki n' wolliyo nun wede zina k'Isa ye ton, ki kotto a kune'n nun wede zina k'Isa. Kono kun lekkiyo kettiyo kan soo ti Galmeega gen, kune batum munda wede i-kaza ki kotto nun wede zina k'Isa.

³Enno ono don n'a oodiba eedo a daana don i zaapu ono a eedo me:

⁴Ki kotto, a naabo ere ay isiyo ette, kaye ay d'ede urzi ay d'oomi wo ay di sibe ti bey don ay an naabiya.

⁵Ki torguwadey ay d'ede urzi ay di waake erewo ere i ziipe addutu a Isa ay d'ozire soo, aa don zina k'Isa ongo, zamba Galmeega Isa, wo Piyer ge d'isiyo.

⁶Ki kotto, nun ti Barnabas ton, ay d'ede urzi ay t'oone ombo ti beygun. Kaye sirwey danjal ye a naabe ti beezey me.

⁷Kun illiga ko, wede'n y'isiyo naabo k'asigar wo munda an i-ki t'ele ye me? Kunun wee wee doo min yi-t'aate jineene wo innitu y'a k'oomi ye me? Kunun

wee wee doo miŋ y'a else moode wo udu y'a ki sibe ye me? Aha, wenda inƙino umbo!

⁸Ono doŋ ni rootiyo eŋ, a urzi lekkiyo doŋ tudde daŋŋal ye, oogoro Muusa toŋ ti rootiyo inƙino.

⁹Geŋ ono eŋ an riije ti kaaga adda mattup k'oogoro Muusa, an'de: «Aame buru yi sara mudu kaŋ oŋy'ilse maŋ, bizí ki ti t'ele baara ye.» Kunuŋ ono eŋ i-kaza Raa y'elkiyo a buŋgari daŋŋal ko?

¹⁰Ki kotto, ono eŋ Raa yi rootiyo kono kaye dee da? Eyye, ono eŋ an riije kono kaye. Derec, wede yi derku'ŋ yi zaapu elkisadí y'a t'oona munda, wo wede yi sara mudu'ŋ yi zaapu elkisadí y'a t'oona aggaadí.

¹¹T'urzi kaye kun d'uune suldi doŋ beehiye ettiyo t'urzi k'Unde Kamileŋ adda k'adduguŋ. Inƙino maŋ, i ceeriyo egguŋ koo kaye ay t'oone agga t'adda maalaguŋ me?

¹²Aame doŋ oŋgoŋ an d'ede urzi an d'ooniyo agga ti beyguŋ inƙino maŋ, geŋ kaye toŋ ay d'ede urzi ay t'oone a ceere kane. Wo kaye ti urzi wede ay d'ede geŋno toŋ, munda ti beyguŋ ki toogo ay ki tunde ye. Wo de ay d'imbiŋa a suldi doŋ pay ay iido a eedey geŋ me, kono a ki-t'ise makkolo morkiye a urzi Rabila Majjaanawa k'Almasi ye.

¹³Ki kotto kun suune, doŋ i naabiya adda Boy Raa geŋ, an t'oone ombadaŋ ti suldi doŋ adda Boy Raa, wo doŋ i naabiya a ume sedeke geŋ, an t'oone aggadaŋ ti suldi doŋ an eliyo ki sedeke.

¹⁴Geŋ inƙino kay, Galmeega y'a ruute, y'ede: Doŋ i kazita Rabila Majjaanawa geŋ, an t'oone suldi lekkiyadaŋ t'urzi Rabila Majjaanawa.

¹⁵Ki too maŋ nuŋ o d'ede urzi n'a tonde munda ti beyguŋ, wo de ni ki tunde ye. Ni raaniya inƙino kono ni ki dehu n'a ki t'oone munda ti beyguŋ ye. N'inda bee miŋ n'a tonde! Wenda soo toŋ umbo a aane o di latte urzi k'unŋsuwo ere o d'ede ette!

¹⁶Kazita Rabila Majjaanawa ette, a nuŋ o ki-t'ise urzi tamma tuddó ye, kono tode gette naabo ere Raa y'o ruute i dehu n'aase, wo dabar a nuŋ aame Rabila Maajjaanawa ni ki ti gizita ye maŋ.

¹⁷Wo aame naabo ette i ti dihe nuŋ ti siidó maŋ, geŋ o d'ede urzi an o t'ele raŋŋadó, wo de urzi yeeriyo eŋ o y'ele a beezó Raa geŋ, nuŋ o d'ede attidi ni ki t'alda ye.

¹⁸Inƙino maŋ a naabo ette raŋŋadó moo me? Raŋŋadó tiŋ ni kazita Rabila Majjaanawa ki waawiye daa ki tondiyo munda, ise o d'ede urzi n'a tonde munda kono ni kazita Rabila Majjaanawa toŋ maŋ.

Raayika Pool a urzi kazita Rabila Majjaanawa

¹⁹Derec, nuɲ o d'ede urzi n'aase munda wede aa addó i dehu, nuɲ bule ki wenda ye, wo toɲ n'a-t'ize tuddó aa bule ki ɗuwo pay, kono ɗoɲ baadaɲ an d'ette tukk'Isa.

²⁰Aame nuɲ a diine Yawudiyagi geɲ, n'a likke aa ki kane Yawudiyagi, kono an d'ette tukk'Isa. A diine kane ɗoɲ i'ni dokkiyo oogoro Muusa geɲ, nuɲ toɲ n'a likke aa i ni dokkiyo oogoro Muusa, kono kane ɗoɲ i'ni dokkiyo oogoro Muusa geɲ an d'ette tukk'Isa, ise nuɲ i ki n' dokkiyo oogoro Muusa ye toɲ maɲ.

²¹Inkino kay, ti kane ɗoɲ i ki suune oogoro Muusa ye geɲ, n'a likke aa oogoro gette ni ki ti suune ye, kono kane ɗoɲ i ki suune oogoro Muusa ye geɲ an d'ette tukk'Isa. Geɲ i-kaza t'urzi k'oogoro Raa ni ki t'udde ye, kono nuɲ ni daaniya urzi k'oogoro k'Almasi.

²²A diine kane ɗoɲ toogadaɲ baata a urzi zaapu k'addaɲ a Isa geɲ, nuɲ toɲ ni-ti t'isiyo tuddó toogatu baata aa ki kane, kono an d'ette tukk'Isa an di t'ihira a urzi zaapu k'addaɲ. A ɗoɲ pay, urzi ɗoɲ tuuku toɲ ni-ti y'isiyo kono ɗoɲ oɲgoɲ ti diinayaɲ mummino toɲ a t'oone uttiyo.

²³N'isiyo pay miɲ kono Rabila Majjaanawa, inkino munda wede beehiye Raa yi ruute y'in t'eley t'urzi tode geɲ, nuɲ toɲ n'a t'ooney aggadó.

²⁴Ki kotto kun suune, ɗoɲ obe dalala a bere k'okko geɲ an okko pay, wo de soo ɗaɲɲal i-t'ambu zooye k'okko me, geɲ kun okko aa ki yode, kono kun t'amba zooye.

²⁵Inkino maɲ kane pay ɗoɲ obe dalala, ɗoɲ i ɗuɲkiyo wo moo moo geɲ, tuddaɲ an ti-dabirsa baadaɲ. Wo an isiyo inkino kono an d'ooniyo kadumul ki wede i jiire, wo kadumul gette saɲ i-ti lattiya. Wo de kine, a urzi k'Almasi in obe dalala kono in t'oona kadumul ki wede i jiire, ere a lekka ki daayum.

²⁶Kono kamo nuɲ Pool eɲ n'okko, wo ni k'okko aa edayó n'a t'ippe ye. Ni ɗeyyiso n'a t'ooney kadumul geɲ, ni ki gohiso kutuba a ume waawiye ye.

²⁷Nuɲ tuddó ni-ti dabirsa baadaɲ wo ni-ti seedu aa bule. Aame ni k'isiyo inkino ye maɲ, nuɲ wede i kazita Rabila Majjaanawa a ɗuwo eɲ, an di n' adɗa.

1 Korent 10

Doɲ k'Izirayel adda balda

¹Zemba ki nuɲ, ni dehu kun a d'elke a sulɗi ɗoɲ an iide a moɲgidagey Yawudiyagi ti kaaga. Kane pay Raa y'an da t'an diibe dondirso ti di'n dokkiyo, wo pay an diipida bar Teezewo.

²Adda dondirso wo adda bar Teezewo gette, kane geɲ miɲ pay aa an ti zuyye batem wo an a ti gitte ti Muusa kaɲ soo.

- ³Kane pay an d'iimi ombadaŋ tiŋ soo ere a urzi k'Unde.
- ⁴Wo kane pay an d'iibe sobadaŋ tiŋ soo ere a urzi k'Unde. Derec, a urzi k'Unde kane an iibe ahu doŋ uɗɗe t'adda zumbulu wede a urzi k'Unde. Zumbulu geŋ yoŋ ti kane yi di'n daaniya, wo geŋ miŋ yoŋ Almasi.
- ⁵Iŋkino toŋ, pay an t'ize sulɗi doŋ Raa ulbí i-ki d'ize uŋse ye. Kono k'iŋkino an t'indita adda balɗa, a guute miibi ɗaŋŋal doŋ i k'ize oldfiko ye me.
- ⁶Sulɗi doŋ an iido a kane geŋ, a kine aakede urzi in di wolle in ki d'ise oldfiko ye. Iŋkino kine in k'ooli tuddiŋ k'isiyo sulɗi doŋ ulpi tudde ti dehu, aa kane g'aaze ti kaaga geŋŋo ye.
- ⁷A loŋgayi kun otille ye, aa doŋ oŋgo ti diinayaŋ g'aaze me. Derec, ono eŋ an riine ti kaaga adda mattup ki Raa, an'de: «Duwo an di-guune ombo ti sobo, saŋ maŋ an t'iiziga ommire, wo an d'isiyo sulɗi pitiŋko.»
- ⁸Kine in ooli tuddiŋ a isiyo boliyo ye, aa doŋ oŋgo ti diinayaŋ g'aaze ti kaaga geŋ me, iŋkino adda k'onniyo soo ɗaŋŋal doŋ dupu ada sire makumu aɗo an t'inda.
- ⁹Kine pidipidiŋ Galmeege in yi naame ye, aa doŋ oŋgo ti diinayaŋ g'aaze ti kaaga wo kane mimbayi an di'n ihite an t'inda.
- ¹⁰Ki ɗaŋgu kun gurgire ye, aa doŋ oŋgo ti diinayaŋ ga gurgire ti kaaga a tukki Galmeege Raa, wo kane geŋ maaleeka wede ki lattiya y'iido y'an fiide.
- ¹¹Sulɗi doŋ iido a kane geŋ, a kine aakede urzi in di wolle in ki d'ise oldfiko ye. Iŋkino an ti'n riine adda mattup ki Raa, kono an in di'n zaape a urzi, kine doŋ i lekkiyo a onniytagi doŋ k'ita eŋ me.
- ¹²Geŋ iŋkino wede y'elkiyo yoŋ toogo a urzi zaapu k'addi a Isa maŋ, yi koona metike yi t'ooro ye.
- ¹³Naamiya daggiya ere kun ooniyo gette, tod'tiŋ aa ere ɗuwo pay an ooniyo gettiyo. Raa yoŋ yi seedu zakidi a munda wede yi ruute y'aasa, iŋkino y'un ki'n oola adda naamiya daggiya i ki ceera eggun ye. Wo ɗe aame un iido naamiya daggiya toŋ, Raa y'un t'ela toogo kun d'ombiŋa wo soŋ urzi kun t'adɗa.

Kun otille a loŋgayi ye

- ¹⁴Kono kamo zemba ki nuŋ kune doŋ ki geyyiso, kun ti ledɗo dokki t'urzi loŋgayi me.
- ¹⁵Nuŋ, n'un rootiyo aakede a ɗuwo doŋ an d'ede suuniyo k'ono. Iŋkino a onamo ni rootiyo eŋ, a suuno kune batum.
- ¹⁶Ki kotto kop wede ti sobo adda in di rootiyo koduwo a Raa in di sobo kaŋ soo geŋ, y'in ti'n kettiyo kaŋ soo ti puuzo k'Almasi te. Wo soŋ mappa wede in di borkiso in t'ombo kaŋ soo geŋ, y'in ti'n kettiyo kaŋ soo ti tudde k'Almasi me.

¹⁷Derec, i d'ede mappa soo, wo ise kine baadaŋ toŋ, geŋ in t'ize aa tudde soo, kono kine pay in dokkide miŋ mappa soo geŋŋo.

¹⁸Kun elko doŋ k'Izirayel geŋ, doŋ aadumu sey wede an eliyo sedefe a Raa a ume sedefe geŋ, ki kotto an di lekkiyo kettiyo kaŋ soo ti Raa, yode wede an i ize ume sedefe geŋŋo.

¹⁹Iŋkino maŋ, nuŋ n'a roote moo me? N'a t'eese sey wede an ele sedefe a loŋgayi, ti loŋgayi batum miŋ, kane'ŋ ki bita ye ko?

²⁰Eyye, kane'ŋ ki bita! Wo de sendikagi doŋ ki doŋ i ki suune Raa ye an eliyo geŋ, an eliyo a siitandani, a Raa ye. Iŋkino maŋ, nuŋ ni ki dehu ye kun a di kette kaŋ soo ti siitandani me.

²¹Kune kun k'aane kun ki sibe kop sire ye, kop ki Galmeega wo kop ki siitandani me. Ombo sire kun k'aane kun ki dokkida ye, ombo ki Galmeega wo ombo ki siitandani te.

²²Kunuŋ in dehu in t'ooziga kolbiso Galmeega ko? In elkiyo miŋ kine toogo in jiire yode ko? Aha, iŋkino ye.

Kun iso pay a urzi wede a t'ele tamma a Raa

²³Doŋ oŋgoŋ an rootiyo, an'de: «Urzi ede k'isiyo munda tuuku toŋ maŋ.» Derec iŋkino, wo de kane suldi geŋ pay beehiye ye. «Urzi ede k'isiyo munda tuuku toŋ maŋ.» Derec iŋkino, wo de suldi pay geŋ a ki nooge ye k'a t'ihira a urzi zaapu k'adde a Isa me.

²⁴Geŋ wenda soo toŋ yi deha munda wede k'aggadi daŋŋal ye, wo de wede tuuku toŋ yi deho bakadi yi-t'oone kay.

²⁵Suldi doŋ pay kun owile a suuk geŋ, kun iwilo'ŋ kun oomo, daa tondiyo eŋ sey an ele a loŋgayi koo me, kono elkiyaguŋ ere kun di suuniyo munda eŋ beehiye eŋ ulsu gette a ki t'ise sire ye.

²⁶Ni rootiyo iŋkino kono ono eŋ an riŋe ti kaaga adda mattup ki Raa, an'de: «Siido ti suldi pay eego geŋ, kane ki Galmeega Raa.»

²⁷Aakede wede yi ki ziipe addi a Isa ye geŋ y'unni wiike ombo di yode, wo kun iyye kun ette maŋ, munda wede y'un ele geŋ kun oomo, daa tondiyo eŋ sey an ele a loŋgayi koo me. Iŋkino elkiyaguŋ ere kun di suuniyo munda eŋ beehiye eŋ ulsu gette a ki t'ise sire ye.

²⁸Wo de aame wede doolo y'un ruuta: «Sey eŋ an ele sedefe a loŋgayi» maŋ, kono ki wede un gize geŋ kun aadima ye, wo soŋ kono ki elkiyo ere ki suuniyo munda eŋ beehiye eŋ ulsu gette a ki t'ise sire ye.

²⁹Aame ni rootiyo «ki elkiyo ere ki suuniyo munda eŋ beehiye eŋ ulsu» maŋ, ni ki rootiyo ti elkiyaguŋ ere kun di suuniyo munda eŋ beehiye eŋ ulsu gettiyo ye,

wo de ni rootiyo ti ere ki wede un gize genno. Wo de nuŋ wede o d'ede urzi n'aase munda aa addó i dehu miŋ, ki moo me elkiyo ere ki suuniyo munda eŋ beehiye eŋ ulsu ki wede doolo gette t'a dekke booro eedó me?

³⁰Aame a ombo ni rootiyo koduwo a Raa maŋ, wo ki moo me wenda y'a roote ulsu a tukki nuuno, kono k'ombo ere ni ruute koduwo a Raa te?

³¹Inkino maŋ ise kun ombo, ise kun sobo wo ise kun ise munda tuuku toŋ maŋ, kun iso pay a urzi wede a t'ele tamma a Raa.

³²A lekkiyagun gette, kun isa ye munda wede wenda yi-t'oore adda k'oldiko me, ise a Yawudiyagi, ise a Yawudiyagi ye, wo a doŋ ki Raa ogyiso ti suma k'Isa toŋ maŋ.

³³Geŋ inkino nuŋ batum ni dehu duwo pay ulbaŋ an d'ise unse a suldi doŋ pay n'isiyo geŋ me. Ni ki dehu munda k'aggadó dfaŋŋal ye, wo de ni dehu munda wede aase beehiye a doŋ baadaŋ kono Raa y'an di'n utte.

1 Korent 11

¹Kun ambo zindó, aakede nuŋ batum n'ambu zina k'Almasi.

Lekkiyo kuuli ti erayi a diine doŋ ogyiso ti suma k'Isa

²Aŋkeŋ n'unni tamma kono kune'ŋ daayum kun elkiyo a nuuno, wo dooyiso ere n'unni duuye gette kun ti boohiyo.

³Wo de ni dehu kun di suune ita munda enno: Almasi geŋ yoŋ t'ekki kule tuuku toŋ maŋ, kule geŋ yoŋ t'ekk'erewo, wo Raa geŋ yoŋ t'ekk'Almasi.

⁴Inkino aame kule yi ton-diyo Raa, ise yi rootiyto ono doŋ Raa y'agisa wo eedí tuuniyo maŋ, geŋ yi-di d'eliyo sukiyagi a Almasi wede t'eedí me.

⁵Wo de aame erewo tuuku ti ton-diyo Raa, ise ti rootiyto ono doŋ Raa y'agisa wo ettú tuuniyo ye maŋ, geŋ ti-di d'eliyo sukiyagi a kulatú me, tode gette aakede erewo ettú kôokiyo.

⁶Aame erewo ti ki dehu ettú t'a ki ti diibe ye maŋ, geŋ t'a kôoko! Wo de aame erewo ilaltú dekkiso ise ettú kôokiyo geŋ a tode sukiyagi maŋ, t'a di diibo munda!

⁷Kule geŋ aame yi ton-diyo Raa ise yi rootiyto ono doŋ Raa y'agisa maŋ, i ki dehu eedí y'a gi di diibe ye, kono kule geŋ Raa yi y'ikkima yi deeyiso a yode wo yoŋ i-kaza majjaanika Raa. Wo de to erewo gette tod'te i-kaza majjaanika kule.

⁸Derec, Raa y'ikkima kule y'iidiba sirpa k'erewo ye, wo de erewo Raa yi t'ikkima y'iidiba sirpa kule.

⁹Wo kule geŋ Raa yi y'ikkima k'erewo ye, wo de erewo te Raa yi t'ikkima ki kule.

10 Injino maŋ, kono maaleekiyagi geŋ erewo ettú t'a di diibe, a kize tod'te ti dandi doŋ t'ettú.

11 Wo injino toŋ a urzi Galmeega, erewo daa kule ti k'ise ede ye, wo kule toŋ daa k'erewo yi k'ise ede ye.

12 Derec, erewo gette Raa yi t'ikkima y'iidiba sirpa kule, wo de yo kule toŋ i y'ehiyo erewo, wo kane pay geŋ miŋ an ettiyo ti Raa.

13 Kune batum kun elko, beehiye koo erewo t'a tonde Raa ettú daa diibiyo me?

14 Aame tuuku toŋ ki kotto, duwo an suune kule geŋ yi k'ooli ilali soŋnirti ye, para maŋ a yoŋ sukiyagi.

15 Wo de Raa yi ele ilali soŋnirti a erowo geŋ yi ele majjaanika, kono ilali soŋnirti geŋ kane aa munda ki diibiyo k'ettú.

16 Aame wede yi rootiyo a urzi eŋ yi k'iyye ye maŋ, nuŋ ni di roote munda soo, kaye'ŋ urzi ti doolo ay ki suune ye, ise doŋ ki Raa ogiysito ti suma k'Isa a ume doolo toŋ maŋ.

Ombo Galmeega

17 Ono geŋ n'a ti'n dinge injino. Wo de i d'ede munda soo injino wede n'un ki'n t'imme ye, ogiysitaguŋ gette t'un ki'n noogiyo ye kun di t'ihira a urzi zaapu k'adduguŋ a Isa me, wo de t'un d'isiyo munda wede ulsu.

18 Munda wede n'a roote ki poone'ŋ, duwo an o di ruute, an'de: aame kun t'ogiyso ti suma k'Isa geŋ, a diinaguŋ un d'ede ahuntu tudde. Wo nuŋ toŋ n'umbe ono geŋ aase derec ede.

19 Derec, i dehu ahuntu tudde a diinaguŋ aase ede, kono tiŋ geŋ duwo an di'n suune kereŋ kane doŋ a diinaguŋ i seedu zakidi a urzi zaapu k'addaŋ a Isa me.

20 Wo de aame kun t'ogiyso geŋ, kun elkiyo'ŋ kun ombo ombo Galmeega wo de injino ye,

21 kono aame kun ti konso ombo geŋ, wede tuuku toŋ yi naariya ombo k'umpadi ere y'umbo, injino doŋ oŋgo an di lekkiyo mosogo wo doŋ oŋgo an di sobo i ceeriyo eedaŋ.

22 Wo aame kun ettiyo ombo wo ti sobo danŋal maŋ, kun oomo wo kun oobo a boyduguŋ! Geŋ doŋ ki Raa ogiyso ti suma k'Isa kun'ni wolliyo aa munda bita, wo kun d'an d'eliyo sukiyagi a doŋ an k'ede munda ye. De geŋ n'un di roote moo me? De n'un di'n t'imme sey ko? Aha! N'un ki'n t'imme ye baa a urzi geŋ me!

23 Injino maŋ kun ollo, ettiyo dooyiso ere nuŋ n'uune ti bey Galmeega wo n'un ti'n duuye te: Adda diddo ere Galmeega Isa an an di y'ele a bey doŋ k'olmidayi gette, y'a t'umbe mappa,

²⁴y'a ruute koduwo a Raa kono k'ombo gette, maŋ y'a burke wo y'a ruute, y'ede: Ette tuddó tod'te ki kune, kun d'iso iŋkino kono kun d'elka a nuuno.

²⁵Aame an t'iimi maŋ, ki kop ti sobo adda toŋ iŋkino, y'a t'umbe wo y'a ruute, y'ede: Kop ti sobo adda ette, tod'te taasawa ere aware Raa yi gitte ti duwo t'urzi puuzadó. Aame tuuku kun siba, sobo ere adda kop ettiyo maŋ, kun d'iso kino kono kun d'elka a nuuno.

²⁶Iŋkino maŋ aame tuuku kun iima mappa eŋŋo wo kun iiba sobo ere adda kop ettiyo maŋ, geŋ aa kun kazita urzi k'unto Galmeega bini kamadí.

²⁷Kono k'iŋkino geŋ wede y'ooma mappa wo y'iiba sobo ere adda kop ki Galmeega daa k'urzutú maŋ, yoŋ geŋ booro ti y' ziida kono yi-t'ize tudde wo puuzo ki Galmeega ki bita.

²⁸Iŋkino wede tuuku toŋ yode batum yi t'elkito urzi lekkiyadi doo miŋ, saŋ y'a oomo mappa wo y'a oobo sobo ere adda kop kollo.

²⁹Ki kotto, wede y'ombo wo yi sobo daa ki suuniyo k'ita tudde Galmeega geŋ, yode batum yi ti t'eliyo tuddí adda booro aame y'ombo wo yi sobo geŋ me.

³⁰Geŋ kono k'iŋkino doŋ baadaŋ ti diinaguŋ an d'uune eeni, doŋ oŋgoŋ mokiyaŋ toogadaŋ baata wo doŋ oŋgoŋ an t'inda.

³¹Aame kine batum urzi lekkiyadiŋ in ti y'elkiso doo miŋ, saŋ in d'ombo kollo maŋ, Galmeega yi ki deŋka booro eediŋ ye.

³²Wo de Galmeega yi deŋkiyo booro eediŋ kono yi'n di'n deeziyo. Iŋkino maŋ a onniyo booro Raa gette, kine booro t'in ki'n seeda ye wo kane doŋ duniya t'anni seeda.

³³Iŋkino maŋ zemba ki nuŋ, aame kun t'ugiye kun ombo ombo Galmeega maŋ, kun dello tudduguŋ.

³⁴Aame wede mosogo ti y' ziida maŋ, yi t'oomi boozí, kono ogiysitaŋ gette t'un ki ti'n t'ele adda booro Raa ye. Wo ki tondisaŋ ere oŋgo kun riŋe adda mattupaŋ gette, aame n'iiney di kune maŋ, n'un ti'n zaapey urzi kollo.

1 Korent 12

Suldi doŋ Unde Kamileŋ t'eliyo a duwo

¹Zemba ki nuŋ, a urzi suldi doŋ Unde Kamileŋ t'eliyo geŋ, aŋkeŋ ni dehu kun di suune kereŋ.

²Kune'ŋ, ti kaaga Raa soo daŋŋal kun ki y' zuune ye botto. Kun suune, aame geŋ an un di'n irga ki tukki loŋgayi doŋ i k'orbe ye, kono a toogadaŋ kun k'iine kun ki ti tuuge ye.

³Kono kamo n'un di rooto, aame wede yi rootiyto ono don ettiyo t'urzi k'Unde Raa man, yode gen yi k'aane yi ki roote ye, y'a t'eeese: «Isa'n Raa yi ti y' duudo me.» Wo wenda soo ton umbo aane a roote, a t'eeese: «Isa yon Galmeega me» daa ki Unde Kamilen ti ki y' dokkiyo ye man.

⁴Suldi don Unde Kamilen t'eliyo ti beekatu a duwo gen, itadan siidan siidan. Wo de suldi pay gen, eliyon min to Unde soo gettiyo.

⁵Naabiyagi don Galmeega y'eliyo a duwo gen, kane itadan siidan siidan, wo de in naabiya pay min ki Galmeega soo genno.

⁶Naabo ere tuuku Raa y'eliyo a duwo gette itatu sittu sittu, wo de Raa min yon soo, gen yode yi-ti'n isiyon duwo pay an d'aaniya an t'isiyon naabo pay gette.

⁷A wede tuuku ton Unde Raa ti-d'eliyo munda, i-kaza tod'te adda k'addi. Munda gen yon ki noogiyon zemba pay.

⁸A son Unde Kamilen ti-d'eliyo suuniyo k'ono a ono don y'an rootiyto a duwo gen me, a wede son ti-d'eliyo suuniyo ki suldi don ki Raa a ono don y'an rootiyto a duwo gen me, wo gen min ettiyo t'urzi k'Unde soo gettiyo pay.

⁹A wede son Unde soo gettiyo ti-d'eliyo munda ki zaapu k'adde a Isa zakidi, wo a wede son Unde soo danjal gettin ti-d'eliyo munda k'eliyon beeko a don k'eeni.

¹⁰A wede son k'isiyon suldi k'armika, wo a wede son ki rootiyto k'ono don Raa y'agisa. A wede son ki suuniyo k'ita k'undiyagi, yode en onami ettiyo t'urzi k'Unde Raa, wo yode en onami ettiyo t'urzi Meeda siitandani. A wede son k'orbe t'ono don doolo, wo a wede son ki kama k'ono genno.

¹¹Wo de Unde tin tod'te soo wo tode batum eliyon suldi pay gen me. A wede tuuku ton ti-d'eliyo munda siidi siidi aa tod' ti dehu.

Don pay i ziipe addan a Isa'n kane tudde k'Almasi

¹²Kine in suune tudde wede gette tod'tin soo, wo mokiyaqutu baadan. Wo de mokiyaquta baadan ton, tudde tin soo. Gen ki don kettiyo kan soo t'Almasi ton kane aa tudde gettiyo.

¹³Derec kine pay, ise Yawudiyagi, Yawudiyagi ye, ise bulagi, bulagi ye ton man, kine Raa y'in ti'n zuyye batem, y'in ti'n gitte kan soo t'Unde Kamilen soo gettiyo, wo in t'ize tudde soo. Wo kine pay Raa y'in di'n une addin t'Unde soo gettiyo.

¹⁴Tudde wede gette mokutu soo danjal ye, wo de mokiyaqutu baadan.

¹⁵Aakede zina t'a roote, t'a t'eeese: «Nun te bey ye gen, inkino ni k'ise moke ki tudde ye.» Ise t'a roote inkino ton, tod'te daayum moke ki tudde.

¹⁶Son aakede kuude y'a roote, y'a t'eeese: «Nun ersa ye gen, inkino ni k'ise moke ki tudde ye.» Ise yi roote inkino ton, yon daayum moke ki tudde.

- 17** Aame tudde pay tod'te ersa maṅ, in d'olliga ti moo me? Aame tudde pay tod'te kuude maṅ, in d'eede ti moo me?
- 18** Wo de Raa yi ziipe moke tuuku ekki tudde geṅ aa yoṅ yi dihe.
- 19** Aame mokiyaḡi pay geṅ i t'ize moke soo maṅ, geṅ tudde a too me?
- 20** Inḡkino maṅ, mokiyaḡi baadaṅ wo i-t'isiyo tudde soo.
- 21** Geṅ derec, ersa ti k'aane ti ki roote ye a bey, t'a t'eese: «Kee ni ki dehu ye me.» Ise eego toṅ ti k'aane t'an ki roote ye a zoṅ, t'a t'eese: «Kune n'un ki'n dehu ye me.»
- 22** Wo de ki too maṅ, mokiyaḡi tudde doṅ in elkiyo an k'aane an ki nooge munda ye geṅṅo toṅ, tudde daa kane ti k'aane ye.
- 23** Mokiyaḡi doṅ in an k'eliyo suma ye geṅ, kane'ṅ in di'n boohiyo beehiye a jiiire. Mokiyaḡi doṅ i dehu duwo an ki'n wolle ye kono sukियाḡi geṅ, in di'n mulpiyto a jiiire.
- 24** Mokiyaḡi tudde doṅ ki wolliyo sukियाḡi ye geṅ, kane'ṅ i ki dehu in gi di'n mulpite inḡkino ye. Wo de Raa y'ikkima tudde'ṅ kono t'urzi geṅ mokiyaḡi doṅ in an k'eliyo suma ye geṅ, an d'ooniyo suma beehiye a jiiire.
- 25** Y'ize inḡkino kono mokiyaḡi tudde an ki t'âhinte ye, wo de a lekkiyadaṅ an d'elke ti tuddaṅ.
- 26** Aame moke soo yi dabirsa maṅ, kane pay geṅ miṅ an dabirsa ti yode. Aame moke soo y'uune tamma maṅ, kane pay geṅ miṅ an isiyo unṡuwo ti yode.
- 27** Wo ki kotto kune'ṅ tudde k'Almasi, wo wede tuuku toṅ moke ki tudde yode.
- 28** Inḡkino maṅ adda diine doṅ ogiyso ti suma k'Isa geṅ, ki poone Raa yi ziipe doṅ zina k'Isa, ki sirwe nebiyaḡi, k'aduwe doṅ dooyiso duwo. Saṅ maṅ doṅ Unde Kamileṅ t'an ele munda k'isiyo suldi k'armika, k'eliyo beeko a doṅ k'eeni, ki noogiyo duwo, ki dokkiyo duwo, wo k'orbe t'ono doṅ doolo.
- 29** Ki kotto kane pay geṅ doṅ zina k'Isa ye, kane pay nebiyaḡi ye, kane pay an ki dooyiso duwo ye. Kane pay an k'isiyo suldi k'armika ye,
- 30** kane pay Unde Kamileṅ t'an k'ele ye munda k'eliyo beeko a doṅ k'eeni me. Kane pay an ki t'ise doṅ orbe t'ono doṅ doolo ye, kane pay an ki t'ise doṅ kama k'ono doṅ doolo ye.
- 31** Inḡkino maṅ wede tuuku toṅ ti diinagunṅ yi deho munda wede beehiye Unde Kamileṅ t'eliyo. Wo de aṅkeṅ urzi wede beehiye a jiiire pay n'un di y' kaza.

1 Korent 13

Geyyiso ti jiiire suldi pay

- ¹Kun ollo, aase n'a orba t'ono don doolo ise ono maaleekiyagi ton, wo de o k'ede geyyiso ye man, gen nuñ aakede maala ti moolo ise aa sukulmo t'isiyo tarkuuse ki bita.
- ²Aase nuñ Unde Kamileñ tod' t'ele munda ki rootiyto k'ono don Raa y'agisa, ise n'a suune ita suldi ombide pay, ise o d'ede suuniyo ki suldi pay, wo ise urzi zaapu k'addo a Isa y'aase zakidi i jire pay, n'aane ni di roote a tokomo t'en mi-deeto, ton t'a-deete, wo de o k'ede geyyiso ye man, gen nuñ aa munda ki bita.
- ³Wo aame n'a-dokkida laalayó pay a don an k'ede munda ye, ise ni-ti t'ele tuddo adda k'uwwu n'a t'ogge ton, wo de o k'ede geyyiso ye man, a ki n' nooge ti munda ye.
- ⁴Wede i-d'ede geyyiso gen, yon y'a ombina wo duwo y'an d'ise beehiye. Yi ki kolbike ye, yi ki makile ye, wo yi ki kili tuddi ye.
- ⁵Wede i-d'ede geyyiso gen, yi k'isiyo suldi sukiyagi ye, yi ki wolliyo munda k'aggadi danjal ye, yi ki kulkiso ye, wo yi ki seedu maake ye.
- ⁶Wede i-d'ede geyyiso gen, ulbi i-k'isiyo unse ye a suldi don duwo an isiyo ki diine ye gen me, wo de ulbi i isiyo unse a suldi don derec.
- ⁷Wede i-d'ede geyyiso gen, yon y'isiyo tambobino a suldi pay, a suldi pay yi zaapu addi a Isa, a suldi pay yi zaapu elkisadi a Raa, wo yi d'ombine a suldi pay.
- ⁸Geyyiso gette tod'te ti ki danga ye. Wo munda wede Unde Kamileñ t'eliyo ki rootiyto k'ono don Raa y'agisa'n, onniyo soo y'a ohira. Munda k'orbe t'ono don doolo ton, y'a danga. Wo suuniyo suldi don ki Raa ki rootiyto a duwo ton, t'a ohira.
- ⁹Derec, kine suuniyadiñ t'a biite, wo ono don Raa y'agisa ton, a rootiytadan in a beetiyo.
- ¹⁰Wo de suldi pay a t'ida a munda wede Raa yi dehu'n, munda wede a-biite a t'isa umbo.
- ¹¹Kun ollo, aame nuñ ulo nenku, ni rootiyto ki nenkuwo, elkisado ki nenkuwo wo suuniyado ton ki nenkuwo. Wo de aame ni t'ize goole man, suldi nenkuwo n'a iili.
- ¹²Ankenno kine suldi in ki'n wolliyo kereñ ye, in'ni wolliyo aa adda kaynaana mazzini, wo de san man suldi in di'n wolley kereñ a daanadiñ. Ankenno suuniyado t'a biite, wo de san man Raa n'a yi suuney kereñ aa yon yi ni zuune.
- ¹³Wo de anken i d'ede suldi ado, kane an lekkiyo ki daayum: zaapu k'adde a Isa, zaapu k'elkiso, wo geyyiso. Wo de ti diine suldi ado gen, geyyiso t'a jire.

1 Korent 14

Rootiyto k'ono don Raa y'agisa ti orbe t'ono don doolo

- ¹Inkino mañ ki poone'η, kun deho urzi geyyiso duwo. Wo kun deho soñ suldi don Unde Raa t'eliyo, wo a jiiire'η munda ki rootiyto k'ono don Raa y'agisa.
- ²Ki wede orbe t'ono don doolo'η, y'orbe a Raa, a duwo ye. Ono geñ wenda soo toñ umbo a suune itadañ me, wo t'urzi k'Unde Kamileñ yi d'orbe ono don ombide ettiyo ti Raa.
- ³Wo de ki wede i rootiyto ono don Raa y'agisa'η, yi rootiyto a duwo: y'a-ti'n zaapu a urzi an di t'ihira a urzi zaapu k'addañ a Isa, y'an d'eeliyo kooke wo y'an di'n selliyo.
- ⁴Wede y'orbe t'ono don doolo'η, yode batum a t'ihira a urzi zaapu k'addi a Isa me, wo de wede yi rootiyto ono don Raa y'agisa'η, yi noogiyo don pay ogiyo ti suma k'Isa an di t'ihira a urzi zaapu k'addañ a Isa.
- ⁵Ki nuñ mañ, beehiye ni dehu kune pay kun d'orba t'ono don doolo, wo de ni dehu a jiiire kun di rootite'η ono don Raa y'agisa. Wede yi rootiyto ono don Raa y'agisa'η, yi jiiire wede orbe t'ono don doolo, wo aame ise y'orbe t'ono don doolo mañ, i dehu wedusu y'a ti'n kime ono geñ ti onamguñ, kono don pay ogiyo ti suma k'Isa an di t'ihira a urzi zaapu k'addañ a Isa.
- ⁶Wo ankeñ zamba ki nuñ, kun ollo, aakede n'a ette di kune wo n'un d'orba t'ono don doolo mañ, un ki'n nooge ti munda ye. Ki too mañ i dehu n'un d'orba ono don un di kize munda wede Raa y'oodibe ita, ise suuniyo, ise ono don Raa y'agisa, ise dooyiso toñ mañ. Para mañ un ki'n nooge ti munda ye.
- ⁷Geñ inkino kay ki suldi k'otoro don aakede siraro ti kundiñe me. Wo aame kane geñ mooladañ si-siidañ ye mañ, k'a suune mummino, eñ an baahu siraro wo eñ an ondige kundiñe me?
- ⁸Wo aame bunno ti moolo'η duwo an k'ollige kereñ ye mañ, wee wee a okkima tuddi k'arka me?
- ⁹A kune toñ inkino kay, aame onamguñ kun rootiyto kereñ ye mañ, mummino duwo an di suune itadañ me? Inkino mañ kun orbe a maaye.
- ¹⁰Ki kotto adda duniya ette ita k'ono baadañ, wo de don tuuku toñ an suune onamañ onamañ.
- ¹¹Wo aame wede y'o orbe onami ni ki'n suune ye mañ, nuñ a daana yode aa torgusu, wo yode toñ a daana nuñ aa torgusu.

12Geɗ ki kune toɗ iŋkino. Kun dehu t'addugun pay suldi don Unde Raa t'eliyo, wo kun deho sey a ceere suldi don a nooge don ogiyo ti suma k'Isa an di t'ihira a urzi zaapu k'addan a Isa me.

13Kono kamo wede orbe t'ono don doolo'ŋ i dehu y'a tonde Raa, kono Unde Raa ti di t'ele munda ki kama k'ono geɗno pay.

14Aame ni ton-diyo Raa t'ono don doolo man, o eliyo ono don ni-ton-diyo geɗ Unde Kamilen, wo de to eedo soodo a elkiso ti ki naabiya ye.

15Iŋkino n'aase mummino me? N'a tonde Raa t'ono don ettiyo t'urzi k'Unde Kamilen, wo son n'a tonde t'eedo soodo a elkiso t'ono don duwo an'ni suune. N'a oore t'ono don ettiyo t'urzi k'Unde Kamilen, wo son n'a oore t'eedo soodo a elkiso t'ono don duwo an'ni suune.

16Aame ki rootiyo koduwo a Raa t'ono don ettiyo t'urzi k'Unde Kamilen danjal man, mummino wede kino baa y'ollige, y'aane y'a roote «Eyye» a onama don ki rootiyo koduwo a Raa me? Yi k'aane yi ki roote ye, kono ono don ki rootiyo geɗ yi ki'n suune ye.

17Derec, onama don ki rootiyo koduwo a Raa geɗ kane beehiye baadan, wo de leemada a ki y' noogiyo ye y'a t'ihira a urzi zaapu k'addi a Isa me.

18Nun n'a t'ese koduwo a Raa kono n'orbe t'ono don doolo baadan i jire kune pay.

19Wo de a diine don ogiyo ti suma k'Isa, ni dehu a jire t'eedo soodo a elkiso ni rootite ono paat danjal don duwo an'ni suune, kono an di'n dooye eego bee miŋ, n'a orba baadan t'ono don doolo duwo an ki'n suune ye.

20Zemba ki nun, a urzi k'elkiso kun t'ise aa inni sunni ye. Eyye, a urzi k'isiyo k'oldiko kun t'iso aa inni sunni, wo de a urzi k'elkiso kun t'iso don i-dirse.

21Ono en an riije ti kaaga adda mattup k'oogoro Muusa, an'de: «Galmeega Raa y'ede: A don k'Izirayel en n'an rootita t'urzi duwo don orbe t'ono don doolo. N'an rootita ti bize torgagi, wo n'iza iŋkino toɗ, nun Raa an ki n' olliga ye.»

22Iŋkino man munda wede Unde Kamilen t'eliyo k'orbe t'ono don doolo'ŋ, yon geɗ munda i-kaza toogo Raa a kane don i ki ziipe addan a Isa ye, wo a kane don i ziipe addan a Isa, i ki kaza munda ye. Wo de munda wede Unde Kamilen t'eliyo ki rootiyto k'ono don Raa y'agisa'ŋ, yon geɗ munda i-kaza toogo Raa a kane don i ziipe addan a Isa, wo a kane don i ki ziipe addan a Isa ye, i ki kaza munda ye.

23Kun ollo, aakede kune don ogiyo ti suma k'Isa kun t'ugiye pay kan soo wo kune pay kun orbe t'ono don doolo, wo wede i ki ziipe addi a Isa ye, ise wede kino baa yi t'iide diinagun y'illiga man, ki kotto y'a t'ese kune don maadagi.

24Wo de soŋ aakede kune pay kun rootiyto ono doŋ Raa y'agisa, wo wede i ki ziipe addí a Isa ye, ise wede kino baa yi t'iide diinaguŋ y'illiga maŋ, onamguŋ geŋ a yi seeda wo y'a suune lekkiyadí oldo a daana Raa me.

25Inkino munda wede ombide adda k'addí yi y'udde kereŋ, y'a t'ottile zumayí a siido, y'a t'imme Raa wo y'a t'eese: «Ki kotto Raa yoŋ a diinaguŋ.»

Suldi t'urzizaŋ a diine doŋ ogiyso ti suma k'Isa me

26Inkino maŋ zamba ki nuŋ, aame kun t'ugiya kaŋ soo maŋ, kun d'isa mummino me? Ti diinaguŋ wede soŋ y'a ambe ôoro, soŋ y'a t'ele dooyiso k'ono Raa, ise y'un kize munda wede Raa y'iidiba ita, wede soŋ y'un d'orba t'ono doŋ doolo, wo soŋ y'un ti'n kime t'ono doŋ kun d'orbe geŋŋo. Pay kun ise geŋ, i dehu a nooge zamba an di t'ihira a urzi zaapu k'addaŋ a Isa.

27Aame kun dehu kun d'orba t'ono doŋ doolo maŋ, i dehu doŋ sire, baadaŋ doŋ ado a orba me, soŋ k'ita bakadí bakadí, wo i dehu wedusu y'a ti'n kime ono doŋ an orbe geŋ me.

28Aame wenda ki kama k'ono geŋ umbo maŋ, leema wede orbe a daana doŋ ogiyso ti suma k'Isa geŋ y'anna, y'orbu adda k'addí wo a Raa.

29Ki kane nebiyagi'ŋ, i dehu a rootite doŋ sire umbo'ŋ doŋ ado, wo doŋ soŋ an d'olliga wo an di wolle.

30Wo de aame wede doolo ti diinaguŋ y'uune ono doŋ Raa yi-iidiba ita maŋ, i dehu wede i rootiyto geŋ y'a anniga.

31Kune pay kun aane kun di rootite ono doŋ Raa y'agisa me, wo i dehu wede soŋ k'ita bakadí bakadí, kono duwo pay an t'oone dooyiso wo kooke.

32Kane nebiyagi'ŋ, tuddaŋ an ti seedu wo ono doŋ Raa y'agisa an di'n rootiyo a urzizaŋ.

33Ni rootiyo inkino, kono Raa yi ki dehu ye suldi doŋ a urzizaŋ ye me, wo de yoŋ Raa ki toose. Geŋ aakede doŋ ki Raa pay ogiysito ti suma k'Isa ge d'isiyo.

34Adda diine doŋ i t'ugiye geŋ, erayi an anna. Kane an k'ede urzi ki rootiyto ye, an ki-kili t'ekki kuuli ye, geŋ aa an riije ti kaaga adda mattup k'oogoro Muusa.

35Aame erayi an dehu an di suune ita k'ono doŋ an illiga maŋ, geŋ an tondoy kuulizaŋ a boy, kono sukiyagi erewo t'a t'ooziga t'a rootite adda diine doŋ i t'ugiye ti suma k'Isa me.

36Kun elkiyo'ŋ ono Raa an iise ki poone ti di kune ko? Wo kun elkiyo'ŋ uune ono Raa kune sigguŋ ko? Aha inkino ye!

³⁷Aame wede y'elkiyo yoŋ nebi, ise y'elkiyo yoŋ i-d'ede munda ti doolo Unde Kamilen t'eliyo toŋ maŋ, i dehu y'a suune adda k'addi ono doŋ n'un raaniya enno toŋ, kane suldi doŋ Galmeega yi dehu kun d'ise.

³⁸Wo de aame ono eŋ wede yi'ni koogire maŋ, yode toŋ Raa y'a yi kiigira kay.

³⁹Iŋkino maŋ zemba ki nuŋ, kun deho t'addugun pay kun t'iso doŋ rootiyto k'ono doŋ Raa y'agisa. Wo kun an t'eegire ye a doŋ orbe t'ono doŋ doolo me.

⁴⁰Wo de aame kun t'ugiye maŋ, suldi pay kun ti'n iso a urzizaŋ daa tarkuuse.

1 Korent 15

Baldiya k'Almasi ti diine doŋ unto

¹Zemba ki nuŋ, aŋken ni dehu n'un di-doole sey a Rabila Majjaanawa ere n'un gizite te. Tode gette kun illiga wo kun a seedu zakidi eego,

²wo t'urzi tode kun d'utta, aame kun a ziida zakidi a ono doŋ n'un gizite maŋ. Wo kun a ki ziida ye maŋ, urzi zaapu k'addugun a Isa geŋ ki bita.

³Munda wede ki poone a jiire, nuŋ n'unni duuye dooyiso ere nuŋ batum an ni duuye: Almasi y'inda k'oldikadiŋ, geŋ a-t'iide a ono doŋ an riine ti kaaga adda mattup ki Raa.

⁴Yoŋ an di y'eele adda muuzo, saŋ onniyo sire k'aduwe maŋ Raa y'a ti y' bilde, geŋ a-t'iide a ono doŋ an riine ti kaaga adda mattup ki Raa.

⁵Aame yi bilde maŋ yi di gize tuddi a Piyer, saŋ a doŋ zina doŋ koomat makumu sire.

⁶Saŋ y'an di gize tuddi a zemba i ziipe addaŋ a Isa kane meeda paat t'uto, an t'ugiye ume soo. Doŋ baadaŋ ti diinayaŋ an lekkiyo zeere botto, wo doŋ miibi i t'inda me.

⁷Saŋ yi di gize tuddi a Zak wo a doŋ zindi pay.

⁸Saŋ k'ita ti kane pay geŋ, a nuŋ Pool toŋ y'o di gize tuddi, nuŋ wede aa an buuye booyiso.

⁹Derec, ti diine doŋ zina k'Isa pay, neŋku a jiire miŋ nuuno. Nuŋ ni k'iide ye an di'n waake wede zina k'Isa me, kono doŋ ki Raa ogiysito ti suma k'Isa ni'ni dibire baadaŋ.

¹⁰Wo de ti beeko ere ki Raa, yoŋ y'a n'ize aa kun ni woliyo enno, wo beeko ere y'o ele gette a ki t'iiziga ki bita ye. Wo de n'a niibe n'a jiire kane doŋ zina k'Isa pay. Naabo gette n'ize ti toogado ye, wo de n'ize ti beeko Raa ere a eedo.

¹¹Iŋkino maŋ ise nuuno ise doŋ zina k'Isa ongoŋ, geŋno ono doŋ kaye ay kazita, wo a kane geŋno kun d'umbe me.

Baldiya ki don i t'inda

- ¹²Kaye ay kazita Almasi, yon Raa yi ti y' bilde ti diine don unto, wo de mummino don ongo ti diinagun an di rootiyo don i t'inda baldiyadan umbo me?
- ¹³Aame don i t'inda baldiyadan umbo man, Almasi ton Raa yi ki ti y' bilde ye ti diine don unto me.
- ¹⁴Wo aame Almasi Raa yi ki ti y' bilde ye ti diine don unto me man, ono don ay kazita en ki bita, wo kune ton kun ziipe addugun ki bita.
- ¹⁵Wo aame don i t'inda Raa yi ki ti'n balda ye'n derec man, gen i-kaza Almasi Raa yi ki ti y' bilde ye ti diine don unto me. De inkino man kaye don i kazita ono Raa en ay kazita butte, wo kaye ono don ay gizite a duwo, Almasi yi bilde ti diine don unto ton butte.
- ¹⁶Aame don i t'inda Raa yi ki ti'n balda ye man, gen i-kaza Almasi ton Raa yi ki ti y' bilde ye ti diine don unto me.
- ¹⁷Wo aame Almasi ti diine don unto Raa yi ki ti y' bilde ye man, gen kun ziipe addugun a Isa ki bita, wo kun lekkiyo daayum adda k'oldfiko botto.
- ¹⁸Inkino kane don i ziipe addan a Almasi wo i t'inda'n, an digge.
- ¹⁹Aame kine in ziipe elkisadin a Almasi kono y'in di'n nooge a lekkiyadin ere a duniya ettiyo danjal man, gen kine lekkiyadin sommagi i jiiere don pay.
- ²⁰Wo de ki kotto man, Almasi Raa yi ti y' bilde ti diine don unto me. Yon wede ki poone Raa yi ti y' bilde ti diine don unto, kono in di kize don doolo i t'inda'n Raa y'an ti'n balda kay.
- ²¹Derec, in suune unto ti t'iido duniya t'urzi wedusu, gen inkino baldiya ki don i t'inda ton t'iido t'urzi wedusu.
- ²²Kine duwo pay in t'unto, kono in uddo t'urzi mugiyin Adum. Gen inkino kay, don i lekkiyo kettiyo kan soo t'Almasi, Raa y'a ti'n balda.
- ²³Wo de Almasi t'onniyo baldiyadi yon Raa yi ti y' bilde ki poone. Wo kane don ki yode Almasi ton t'onniyo baldiyadan, kane ton Raa y'a ti'n balda a onniyo ere Almasi yi kimo gette.
- ²⁴Aame gen kane don pay an d'ede urzi ki dokkiyo, don pay an d'ede toogo, wo don pay an d'ede moziko gen, Almasi y'an ti latta, wo san yi di t'ela moziko a Meegi Raa. Gen inkino duniya t'a danga.
- ²⁵Derec, i dehu Almasi y'a oomi moziko bini onniyo ere Raa yi di'n isa don k'aduzi aa munda ki bita ti dandi zonfi.
- ²⁶Adu wede k'ita Raa y'a yi t'ida, tod'te unto.

27 Ono eŋ an riine ti kaaga adda mattup ki Raa, an'de: «Raa y'a ti y' ziipe goole t'ekki suldi pay.» Wo de a ume wede an'de «t'ekki suldi pay» geŋ, kun suuno Raa adda suldi geŋŋo ye, kono yode i-ele suldi pay a Almasi me.

28 Aame Raa yi ti y' ziipa Almasi t'ekki suldi pay maŋ, yode Almasi batum yi-d'ottila a Meegí Raa. Inŋino maŋ Raa siidí a ooma moziko t'ekki suldi pay me.

29 Anŋeŋ kun elko a kane doŋ i suyyiso batem, ti suma ki doŋ i t'inda. An elkiyo an t'oona moo me? Aame ki kotto doŋ i t'inda Raa y'an ki ti'n balda ye maŋ, ki moo me an suyyiso batem a suma kane me?

30 Wo ki moo me kaye batum, daayum ay lekkiyo lekkiyo ere aa a biza zire te?

31 Zemba ki nuŋ, derec nuŋ onniyo ti onniyo n'ambu puuzadó, wo ki kotto, kono kune geŋ nuŋ ulbó uŋse kono kun lekkiyo kettiyo kaŋ soo ti Galmeeŋiŋ Isa Almasi.

32 A geeger k'Epez, doŋ baadaŋ an o-di t'iiziga nuŋ n'a niikiwe tuddó aa ni deyyiso ti seydi balda. Aame n'ize inŋino a urzi lekkiyo ere a duniya daŋŋal maŋ, a nuŋ daakatú moo me? Aame doŋ i t'inda Raa y'an ki ti'n balda ye maŋ, kine in iso aakede doŋ oŋgo an rootiyo, an'de: «In oomo, in oobo, kono soggo in ti t'inda.»

33 Kune'ŋ wenda soo toŋ y'oola elkisadí ti ti y' dagga ye. Kun suuno ono doŋ oŋgo an rootiyo, an'de: «Wede i sooru ti wede k'oogire geŋ, yode toŋ wede k'oogire kay.»

34 Elkisagaŋ ere oldo kun t'oolo, kun ti kami k'urzi wede derec, wo kun ise oldiko ye. Derec, doŋ oŋgo ti diinagaŋ Raa an ki y' suune ye botto, wo ni rootiyo inŋino sukiyagi a kune.

Tudde ki doŋ Raa yi ti'n balda

35 Wo de wenda y'a tonde, y'a t'eese: «Doŋ i t'inda an di balda kaŋ mummino me, wo ti tudde ere tuuku te?»

36 Kee wede elkisadá umbo! Buzu wede ki korso'ŋ i-ti ruumiyo doo miŋ, i t'adfiya i-lekkiyo zeere kollo.

37 Aame ki korso geŋ ki ki korso koy'ile ye a t'adfa me, ki korso inŋi, ise mudu ise moo toŋ maŋ.

38 Aame ki ti giira maŋ, Raa yi-d'eliyo tudde i-t'adfiya soole aa yi dehu, maŋ a buzu tuuku toŋ yi-d'eliyo koy'ilayí koy'ilayí.

39 Suldi doŋ pay i puukiyo'ŋ, wede soŋ tuddí sittú sittú. Tudde ki duwo sittú, ki seydi sittú, ki embi sittú, wo ki puuni toŋ sittú.

- 40 I d'ede tudde ki suldi don a kandaane, wo tudde ki suldi don a siido. Wo suldi don a kandaane gen, majjaanika ki tuddaṅ sittú ti don a siido me.
- 41 Majjaanika peedo sittú, majjaanika tere sittú, majjaanika moldali sittú, ise moldali ti tuddaṅ toṅ majjaanikadaṅ sittú sittú.
- 42 Gen aasa inḱino kay, baldiya ki don i t'inda me. Tudde ere in t'ottibe a siido tod'te i-ti ruumiyo, wo tudde ere i-baldá tod'te i ki ruumiyo ye.
- 43 Tudde ere in t'ottibe a siido tod'te ki bita, wo de aame Raa yi ti baldá gen, t'a t'isa majjaanawa. Tudde ere in t'ottibe a siido tod'te toogatu umbo, wo de aame Raa yi ti baldá gen, ti-t'ona toogo baadaṅ
- 44 Tudde ere in t'ottibe a siido tod'tiṅ tudde ere in di lekkiyo duniya daṅṅal, wo de aame Raa yi ti baldá gen, t'a lekka ti toogo k'Unde Kamilen. Inḱino maṅ i d'ede tudde ere in di lekkiyo a duniya daṅṅal, wo i d'ede soṅ tudde ere in di lekka ti toogo k'Unde Kamilen.
- 45 Ono en an riṅge ti kaaga adda mattup ki Raa, an'de: «Wedusu wede ki poone, yoṅ wede tudde sundí Adum, Raa yi-d'ele puukiyo.» Wo de Adum wede k'ita, yoṅ Unde y'an d'eliyo lekkiyo a duwo.
- 46 Iido ki poone'ṅ tudde ere i ki lekkiyo ti toogo k'Unde Kamilen ye, iido'ṅ tudde ere ki lekkiyo a duniya daṅṅal, wo saṅ tudde ere i lekkiyo ti toogo k'Unde Kamilen t'a iido k'ita.
- 47 Wedusu wede ki poone yoṅ ki siido, Raa yi y'iibida ti odde siido. Wo de wedusu wede ki sirwe yoṅ y'iido ti kandaane.
- 48 Duwo don pay a siido en, an deeyiso Adum kono yoṅ Raa yi y'iibida ki odde siido. Wo kane don pay a kandaane gen, an deeyiso Almasi kono yoṅ y'iido ti kandaane.
- 49 Wo ankenno kine in deeyiso wedusu wede Raa y'iibida ti odde siido, gen saṅ inḱino kay in deey'a wedusu wede iido ti kandaane.
- 50 Kun ollo zemba ki nuṅ, enno munda wede ni rootiyo me: Wedusu ti tuddí ere ette, yi ki t'ette ye adda Moziko Raa te, wo tudde ere a-ruuma gette, tudde ere i ki ruumiyo ye, ti ki ti t'ooney ye.
- 51 Anken kun ollo, n'un t'oodo ita a munda wede ombide ki Raa: Kine in ki ti t'inda pay ye, wo de pay tuddiṅ Raa y'a ti-kima.
- 52 Eyye, parre wede ki daṅgu y'a ôola, wo aame y'ila maṅ, a kaamiki aa wedusu y'igge edayí ribiṅ gen, kane don i t'inda Raa y'a ti'n baldá ti tudde ere i ki ruumiyo ye, wo pay kine don zeere tuddiṅ Raa y'a ti-kima.

⁵³Inkino maŋ tuddiŋ ere a-ruuma ette, i dehu t'a-t'osse tudde ere i ki ruumiyo ye t'eego, wo tuddiŋ ere k'unto ette, i dehu t'a-t'osse tudde ere i k'unto ye t'eego.

⁵⁴Aame tuddiŋ ere a-ruuma ette ti t'ussa tudde ere i ki ruumiyo ye, wo tuddiŋ ere a t'inda ette ti t'ussa tudde ere i k'unto ye maŋ, geŋ a-t'etta a ono doŋ an riŋe ti kaaga adda mattup ki Raa, an'de: «Unto umbo baa, Raa yi ti jiire.»

⁵⁵Wo soŋ an riŋe, an'de: «Koŋ unto no, toogadí ere mi ceeriyo too te? Koŋ unto no, arkuzí wede mi tôwwo dúwo too me?»

⁵⁶Kine in suune arku wede unto ti-tôwwo dúwo'ŋ, oldíko, wo oldíko t'ooniyo toogo t'urzi k'oogoro Muusa.

⁵⁷Ankeŋ in rooto koduwo a Raa, kono kine in jiire t'urzi Galmeegiŋ Isa Almasi.

⁵⁸Inkino maŋ zemba ki nuŋ kune doŋ ki geyyiso, kun a soodo zakidí, munda y'un ti'n lekída ye a urzi zaapu k'adduguŋ a Isa me, wo a urzi naabo Galmeega'ŋ un d'odo ki daana. Kun suune oodíbe yeebaguŋ a urzi Galmeega, ti ki t'ingila ki bita ye.

1 Korent 16

Tussiyo a doŋ ogiyo ti suma k'Isa a Zeruzalem

¹A urzi tussiyo ere kun di nooge doŋ ki Raa a geeger Zeruzalem geŋ, ni dehu n'un di roote'ŋ, kune toŋ kun daano urzi wede n'an ruute a doŋ ogiysito ti suma k'Isa a siido Galat an isiyo.

²Ki naabo tussiyo gette kun della aaniyadó do ye, wo daayum a onniyo dumas maŋ, wede tuuku ti diinaguŋ soŋkadí y'uune adda suuk, yi d'addo a toogadí y'a-zaapo zaapo.

³Aame n'iiney di kune maŋ, doŋ kun biire n'an di'n t'igibey ki Zeruzalem ti mattupiyagi a beezaŋ i-kaza kane a urzi Raazaŋ, an an d'ettey ti munda wede kun tusse me.

⁴Aame i dehu nuŋ batum toŋ n'a ette kay maŋ, ay t'ettey kaŋ soo.

Pool yi dehu yi torguwa

⁵Inkino maŋ ni-t'adda ti siido Maseduwan doo miŋ, n'a ettey di kune kollo, kono ni dihe ni-t'adda'ŋ ti siido gettiyo.

⁶Aame n'iiney di kune maŋ, ni d'isey onniyto miibi, wo ni wulley muno maŋ, ume reele n'a y'oodibey di kune. Inkino maŋ kun o t'eley munda n'a seedey urzizó.

⁷A ettiyadó ere ette, ni ki dehu n'a k'eŋgiley kaŋ ôhire ye. Aame Galmeega yi dehu maŋ, n'elkiyo ni-lekkey onniyto miibi di kune, saŋ n'a eŋgiley kollo.

- ⁸Wo aṅkenṅo n'a lekke a geeger k'Epez poone bini tarnaape ki Pantekot,
⁹kono Galmeega y'o t'ihina urzi goole k'isiyo naabo ere ti ḍaakatú, ise ḍoṅ k'olmidáyó baadaṅ toṅ maṅ.
¹⁰Aame Timote y'iiney di kune maṅ, kun iso t'urzi tuuku toṅ y'a lekke daa k'orgiso a diinaguṅ me, kono yoṅ yi naabiya ki Galmeega aa nuuno kay.
¹¹Iṅkino maṅ wenda soo toṅ ti diinaguṅ yi y' kiigira ye. Wo ḍe kun a yi noogo ti munda y'a-kimo ti toose k'ume nuṅ me, ay yi delliso ti zemba y'ay di'n t'oona.
¹²A urzi leemadiṅ Apolos, nuṅ taṅ baadaṅ ni-d'eele kooke y'a ette di kune ti zemba, wo ḍe yoṅ y'ede, aṅkenṅo yi k'aane yi k'ette ye, saṅ yi uuna urzi y'a etta kollo.

Toose ti ono ḍoṅ ki ḍaṅgu

- ¹³Kun lekko zeere, kun sooḍo zakidi a urzi zaapu k'adduguṅ a Isa, kun orgide ye, kun ôhor toogo.
¹⁴Sulḍi ḍoṅ pay kun ise, kun iso ti geyyiso.
¹⁵Kune kun suune a siido k'Akayi, Stepanas ti ḍoṅ boozí kane'ṅ ḍoṅ ki poone i ziipe addaṅ a Isa, wo an d'ele tuddaṅ ki naabo kono an di nooge ḍoṅ ki Raa. Iṅkino maṅ zemba ki nuṅ, n'un di rooto, eṅṅo munda wede kun d'ise me:
¹⁶Duwo ḍoṅ i naabiya iṅkino geṅ, kun ollo onamaṅ, wo soṅ a wede tuuku yi naabiya wo y'oodibe yeebadí aa kane geṅ me.
¹⁷Nuṅ ulbó uṅse a aaniya zembaguṅ ḍoṅ Stepanas, Portunatus wo Akaykus geṅ me. Para maṅ nuṅ mosogo kune, wo aame an iina geṅ, an o-t'îide mosigadó ere a tukki kune te.
¹⁸A aaniya kane geṅ, nuṅ addó a t'udige, wo kune toṅ adduguṅ i t'udige. Kun suuno ḍoṅ iṅkino geṅ, kun'ni sooḍo bey sire.
¹⁹Ḍoṅ ogiysito ti suma k'Isa a siido k'Aazi an un t'ize toose. Akilas ti Pirisil wo ti ḍoṅ ogiysito ti suma k'Isa, ogiysito di kane toṅ, an un t'ize toose baadaṅ ti suma Galmeega.
²⁰Zemba pay ḍoṅ a eṅṅo an un t'ize toose. Kun t'eesito tudduguṅ kaṅ bey sire sire aakede zemba.
²¹Ono ḍoṅ ki toose eṅ i raaniya nuṅ Pool ti beezó.
²²Aame wede yi ki giyya Galmeega ye maṅ, geṅ duudiyo Raa t'a koona eedí. Galmeega, k'edi!
²³Geṅ beeko ki Galmeega Isa ti koona egguṅ.
²⁴Nuṅ n'unni giyye pay kono kine in lekkiyo pay kettiyo kaṅ soo t'Isa Almasi.

2 Korent

2 Korent 1

Toose ki Pool

¹Mattup ette i raaniya nuŋ Pool wede zina k’Isa Almasi, aa Raa yi dehu, wo ti leema Timote, a kane doŋ ki Raa ogiyo ti suma k’Isa a geeger Korent wo a doŋ ki Raa pay adda siido k’Akayi pay.

²Geŋ beeko ti toose ki Meegiŋ Raa wo ti Galmeega Isa Almasi i koonaa eggun.

Urzi selliyo duwo

³In amma Raa, Meeki Galmeegiŋ Isa Almasi, yoŋ Meege wede i d’isiyo adde koduwo, yoŋ Raa, yi selliyo duwo aame tuuku toŋ maŋ.

⁴Adda dabaradiŋ pay y’in ti’n selliyo, wo t’urzi selliyo ere kine batum in ooniyo ti yode gette, kine toŋ in aane in di selle doŋ pay adda dabar ere tuuku toŋ maŋ.

⁵Inkino maŋ kine in d’ooniyo dabar baadaŋ kono k’Almasi me, wo geŋ inkino kay t’urzi k’Almasi in d’ooniyo selliyo baadaŋ.

⁶Aame kaye ay dabirsa maŋ, geŋ kono kune kun t’oone selliyo wo kun d’utte. Wo aame ay uune selliyo maŋ, geŋ kono kune toŋ kun t’oone selliyo, ere un di’n ise kun d’ombiŋa a dabar ere aa kaye ay dabirsa.

⁷Kaye zaapu k’elkisadey a kune ay di seedu zakidi, kono kune kun a ti gitte kaŋ soo adda dabaradey geŋ, kune toŋ kun t’oona selliyo aa ki kaye kay.

⁸Inkino maŋ zemba ki nuŋ, kaye ay dehu munda eŋ kun di y’ suune, adda siido k’Aazi ay d’uune dabar baadaŋ a jiiire eedey, ay d’ilke ay ki lekka zeere ye.

⁹Derec, kaye ay d’ilke adda k’addey aa booro t’ayni ziiɗa k’unto. Geŋ a t’ize inkino, kono ay ki ziipe addey a kaye batum ye, wo de ay di ziipe addey a Raa yoŋ yi balɗiya doŋ unto.

¹⁰Geŋ yode wede ay ti’n uɗɗo ti dabar ere k’unto kino ette, wo y’ay ti’n adɗa sey. Eyye, kaye ay ziipe elkisadey a yode ki ɗaana toŋ, y’ay ti’n adɗa sey.

¹¹Wo kune toŋ kun ayni noogiyo adda tonɗiyaguŋ a Raa kono kaye me. Geŋ t’urzi tonɗiyo Raa ki doŋ baadaŋ, kaye ay t’oona beekadi, wo doŋ baadaŋ an di roota koduwo a Raa kono kaye.

Munda wede Pool yi k’iide Korent ye

¹²Derec, munda wede kaye ulbey ay isiyo unse, wo elkisadey ere ay di suuniyo munda eŋ beehiye eŋ ulsu t’ay kaza: Kaye ay izire a ɗaana doŋ duniya, wo ay

izire in̄kino toc miṅ a ḍaana kune, ti tassuwa wo t'adde soo geṅ iido ti Raa. Wo ay izire ti suuniyo k'ono ere ki ḍoṅ tudde ye, wo ḍe ti beeko ere ki Raa.

13-14 In̄kino maṅ adda mattupiyagey ḍoṅ kaye ay un raan̄iyta munda doolo umbo, kane miṅ ono ḍoṅ kun gariya wo kun di suuniyo itadaṅ geṅṅo ḍaṅṅal. Wo adda k'onamey geṅ, munda soo ede aṅken̄ṅo itadí kun ki ti zuune kereṅ ye, wo ḍe nuṅ ni zaapu elkisadó a kune, kono saṅ itadí kun di suuna kereṅ. Eṅṅo munda me: a onniyo kama Galmeega Isa, kaye ulbey aasa uṅse ti kune, geṅ kune toṅ ulbuguṅ aasa uṅse ti kaye kay.

15 Nuṅ sulḍi geṅ ni'ni zuune adda k'addó, in̄kino maṅ n'a dihe ki poone n'a ette n'un ti'n wolley wo n'un di zaapey beeko ki sirwe sey.

16 Saṅ ti di kune geṅ n'a eṅgiley ki siido Maseduwan, wo ti siido Maseduwan n'a kimey di kune sey, kono kun o t'eeley zaada n'a seedey urzi torguwadó ki siido Ziide.

17 Aame ni dihe n'aase in̄kino'ṅ, ni ki t'ilke kofuwo ye ko? Geṅ o di gaagiya a munda soo aa ḍoṅ tudde ge d'isiyo, in̄kino n'a roote «eyye» wo saṅ «aha» sirwaṅ pay ko?

18 Raa batum yi suune ono ḍoṅ ay un rootiyo geṅ ḍerec, ay ki rootiyo «eyye» wo saṅ «aha» sirwaṅ pay ye.

19 Isa Almasi Ulo Raa, nuṅ Pool ti Silas wo Timote ay gizite rabiladí di kune geṅ, yode batum yi k'iido'ṅ ti elkiyo sire ye, yi ki ruute «eyye» wo saṅ «aha» sirwaṅ pay ye. Wo ḍe yoṅ y'iido'ṅ a munda soo «eyye» ḍaṅṅal.

20 In̄kino maṅ Isa yoṅ «Eyye» ki Raa, a sulḍi pay ḍoṅ yi ruute y'aasa me. Kono kamo t'urzi yode Isa in di rootiyo «Eyye» a Raa, wo in di y' tamma.

21 Geṅ yode Raa batum kaye ti kune y'in d'eliyo toogo a urzi lekkiyo kettiyo kaṅ soo t'Almasi, wo y'inni biire.

22 Yoṅ y'in di'n iigire t'Unde Kamileṅ, i-kaza kine ki yode, tod'te y'in t'ele adda k'addiṅ, gette barta ere ki poone ki sulḍi ḍoṅ Raa y'in boohiyo saṅ y'in t'ela.

23 Nuṅ eṅ, ni lohito ono maṅ, Raa y'ollige wo yi n'ôodo: Nuṅ ni ki gime ki Korent ye, kono ni ki dihe ye un t'isey ooṅe me.

24 Kaye ay ki dehu ay un gi di'n dokke ki toogo ye a urzi zaapu k'adduguṅ a Isa me, kono kun seedu zakidi a urzi geṅ me wo, ḍe ay dehu ay un di'n nooge kun di lekke t'uṅsuwo.

2 Korent 2

1 Ki nuuno maṅ, ni t'ilkite'ṅ di kune ni k'iide ye bee, kono n'un ki ti'n t'eley kun ki t'isey sommagi dondoṅ sey ye.

²Aame n'un ti'n eley kun t'izey sommagi dondonɔ maɲ, t'aaye sey me n'aasey uɲsuwo te? Para maɲ ti yode wede ni ti y'ele y'a t'ize sommagi dondonɔ geɲɲo.

³Aame n'iiney di kune maɲ, ni ki dehu donɔ onɔgo ti diinaguɲ an ki ti n' t'eley n'a ki t'isey sommagi dondonɔ ye, ki too maɲ ti kane geɲɲo ay isey uɲsuwo te. Geɲ kono k'inɔkino n'un di riije mattup gette. Nuɲ ni suune adda k'addó, aame nuɲ ulbó uɲse maɲ, kune pay toɲ ulbuguɲ uɲse.

⁴Eyye, nuɲ n'un riije t'ulbe k'oodiyo baadaɲ, biza k'ulbó i zehiso wo ti zumari edayó, wo de n'un riije kono n'un ki ti'n t'ele kun ki t'ise sommagi dondonɔ ye, wo kun di suune nuɲ o d'ede geyyiso baadaɲ a kune me.

Tambobino a wede ize ulsu

⁵Aame wenda ti diinaguɲ yi t'ela duwo an t'iza sommagi dondonɔ maɲ, geɲ y'ele nuuno daɲɲal ye, wo y'ele kune pay. Wo de ono geɲ in ti'n aagila baadaɲ ye.

⁶Ki wede inɔkino geɲ daɲɲay ere donɔ baadaɲ ti diinaguɲ an i ele gettiɲ, iide baa.

⁷Wo de aɲkenɲ kun i t'iso tambobino wo kun i eelo kooke, para maɲ y'a t'isa sommagi dondonɔ a ceera eedí.

⁸Inɔkino maɲ, n'un di rooto munda wede kun d'ise, kun iso beehiyko kono y'a suune kune kun yi geyyiso.

⁹Nuɲ n'un riije mattup gette kono ni dihe n'un ti'n naame wo n'a suuna ki kotto onamó pay kun ollige maɲ.

¹⁰A wede'ɲ kun i t'isiyo tambobino maɲ, nuɲ toɲ ni-t'ise tambobino kay. Aame nuɲ n'isiyo tambobino geɲ, n'isiyo a munda ede do'ɲ kollo, wo n'isiyo kono kune, wo a daana k'Almasi.

¹¹Nuɲ n'ize inɔkino kono Meeda siitandani ti-ki t'oone urzi t'in gi di'n ceere ye, kono kine in ti suune raayikatú te.

Pool a geeger Tirowas

¹²Nuɲ n'a inɲile ki geeger Tirowas kono n'a kizitey Rabila Majjaanawa k'Almasi, wo aame n'iiney maɲ n'a uwwe Galmeega y'o t'ihina urzi n'a kizite.

¹³Wo de nuɲ ulbó o d'uude baadaɲ kono leemadó Tit ni ki y'uuney ye. Inɔkino maɲ donɔ Tirowas ni'n iili, n'a inɲile ki siido Maseduwan.

Isa Almasi y'a jiire

¹⁴In rooto koduwo a Raa, kono daayum y'in di'n t'ettiyo k'adda diine donɔ an enɲile duy, pay kaɲ soo in tamma Almasi yi jiire. Wo t'urzi kine Raa yi d'isiyo a ume tuuku toɲ Almasi duwo an di y' suuniyo, geɲ aakede egey donɔ eediyadaɲ uɲse i-ti teepiyo a ume pay.

¹⁵Derec, kine aakede egey don eediyaɗan unse Almasi yi-d'eliyo a Raa, wo eediyo ere unse gette, i-ti teepiyo a tukki don a urzi k'uttiyo wo a tukki don i t'umbe urzi daggiya pay.

¹⁶A don soo eediyo gette tod'te eediyo ere k'unto, t'an d'an t'etta k'ume k'unto, a don ongo eediyo gette tod'te eediyo ere ki lekkiyo, t'an d'an t'etta k'ume lekkiyo ere ki daayum. Inkinoo wee wee a aane a t'ise naabo ere ette?

¹⁷Kaye aakede don ongo ge d'isiyo suuk t'ono Raa geɗɗo ye, kaye ay rootiyo ono don derec ki Raa, t'adde soo wo a daanadi, kono ay lekkiyo kettiyo kan soo t'Almasi.

2 Korent 3

Don naabo a urzi taasuwa ere aware

¹Kaye batum ay di dehe ay t'imme tuddey, ay t'eese kaye ay jiiere ko? Kunuɗ i dehu mattup ay un d'ette a kize kaye don zina k'Isa, aa don ongo ge d'isiyo ko? Kunuɗ ay ambe tunda man, i dehu ay tonde mattup ti beyguɗ ko? Aha, inkinoo ye!

²Geɗ kune batum aakede mattupadey, raaniya a biza k'ulbey, duwo pay an ti suune wo an di gare.

³Eyye, geɗ kereɗ kune aakede mattup ere Almasi batum yi riine y'ay d'ele beezey ay i di naabe. Mattup gette yon yi riine ti buuye ye, wo de yi riine t'urzi k'Unde Raa zeere. Tode gette yi riine ekki pakirtagi monjali ye, wo de yi ti riine a biza k'ulbuguɗ.

⁴Kaye ay rootiyo inkinoo kono ay ziipe addey a Raa t'urzi k'Almasi.

⁵Geɗ derec kaye ay suune, ti toogo k'aggadey ay ki t'iide ye k'isiyo naabo ette. Wo de naabo ette ay ti-t'isiyo ti toogo ere Raa y'ay eliyo.

⁶Geɗ yode Raa y'ay di'n ize don aane i t'ise naabo a urzi taasuwa ere aware, ti k'ettiyo t'urzi k'oogoro Muusa ere yi riine gettiyo ye, wo de t'ettiyo t'urzi k'Unde Kamileɗ. Derec, to oogoro ere yi riine ti kaaga gette duwo t'an d'an t'etta k'ume k'unto, wo de Unde Kamileɗ t'in di'n t'etta k'ume lekkiyo ere ki daayum.

⁷To oogoro gette Muusa yi ti riine ti kaaga ti aryagi raaniya eego pakirtagi monjali, wo aame y'ize inkinoo geɗ duwo an di wulle toore ki gooliko Raa. Wo toore gooliko'ɗ a-tuure ume k'eda Muusa, don k'Izirayel an k'iine wolliyo yerere adda k'edayi ye, kono i tooriyo baadaɗ, kaciɗ yo toore geɗ ki peedo booluɗ. Aame oogoro ere t'an d'an t'ettiyo duwo k'ume k'unto gette, toore ki gooliko Raa t'an yi gize inkinoo man,

⁸geɗ ki kotto naabo k'Unde Kamileɗ meedikatu t'aasa a ceera sey.

⁹Derec, naabo k'oogoro ere duwo booro ti di'n seedu gette tod'te meedikatú a jiire mañ, geñ ki kotto naabo k'Unde Kamilen ere ti di'n isiyo duwo ki diine a daana Raa gette, tod'te meedikatú a jiire sey.

¹⁰Inkino a daana meedikatú ere a jiire ette, gooliko ere a tuure ti kaaga gette, tooratú a nokkida.

¹¹Aame munda wede sañ yi-t'engila, goolikadí a jiire mañ, ki kotto munda wede a lekka ki daayum geñ, goolikadí t'aasa meeda a ceera sey.

¹²Kaye ay zaapu elkisadey a suldi geñno, inkino ay rootiyto ono Raa kereñ daa k'orgiso.

¹³Kaye ay k'isiyo aa ki Muusa ye. Yoñ ume k'edayí y'a-ti diibiyo buude, kono doñ k'Izirayel an ki wolle nokkiso ki toore wede a ume k'edayí geñno ye.

¹⁴Wo de kane eedañ ere soodo a elkiso a t'ippe, bini añkenno toñ aame an gariya mattup ki taasua ere mazzini mañ, munda aa buude yi lekkiyo diibiyo a eedañ ere soodo k'elkiso gette daa k'ambuzí. Yi t'isa umbo aame an likka kettiyo kañ soo t'Almasi do.

¹⁵Geñ inkino bini añki, daayum aame tuuku doñ k'Izirayel an gariya mattup ki oogoro Muusa mañ, munda aa buude y'an di diibiyo a eedañ ere soodo a elkiso.

¹⁶Wo de aame wede yi ti kama ki tukki Galmeega doo miñ, buude'ñ yi-ti y'ambu kollo.

¹⁷Kun ollo, Galmeega yoñ Unde, wo a ume Unde Galmeega ede geñ, duwo eedañ toore.

¹⁸Kine doñ pay ume k'edayiñ daa diibu ti buude geñ, toore ki gooliko Galmeega yi-tooriyo a tuddiñ, aakede adda kaynaaṅa. Inkino mañ, Galmeega yoñ Unde geñ lekkiyadiñ yi-ti kama, in di deey'iso aa yode ti gooliko ere meeda i ceeriyo ki ceeriyo.

2 Korent 4

Doñ zina k'lsa an dabirsa aa ki yode

¹Kaye Raa y'ay d'ize adde koduwo naabo ette y'ay di t'ele a beezey, inkino mañ kaye tuddey a ki rurrige ye.

²Suldi doñ ki sukuyagi duwo an isiyo kañ ombide geñ, kaye adda ye. Kaye duwo ay ki'n ombo ti metiñko ye, wo ono Raa ay ki ti'n kama ti dergilagi ye. Wo de kaye batum ay rootiyo ono doñ derec a daana Raa, inkino doñ pay elkisadañ t'an di kize onamey derec.

³Wo aame Rabila Majjaanawa ere ay kazita ette a doñ ongo ti lekkiyo diibiyo mañ, geñ ti lekkiyo diibiyo a kane doñ i t'umbe urzi daggiya.

⁴Kane an di tuuge zaapu k'addaŋ a Isa, kono Meeda siitandani i dokkiyo duniya gette, t'an t'ippe a eedaŋ ere soodo a elkiso te. Inŋkino maŋ toore wede ki Rabila Majjaanawa an ki y' woliyo ye, yode wede i-kaza gooliko k'Almasi, yoŋ miŋ Raa koyok.

⁵Ono doŋ ay kazita eŋ, ay kazita a tukki kaye batum ye, wo de ay kazita a tukk'Isa Almasi yoŋ Galmeega, wo ki too maŋ kaye batum ay rootiyo, kaye doŋ naabagun a urzi k'Isa me.

⁶Raa yi ruute ti kaaga, y'ede: «I iso toore a toore adda zimolo.» Geŋ yode Raa geŋno batum y'a-tuure biza k'ulbey ti toorayí, y'ize inŋkino kono yi dehu ay di wolle toore goolikadí i tooriyo a ume k'eda k'Almasi.

⁷Wo de kaye doŋ i sarkiya laale ki Raa adda k'addey eŋ, kaye aakede toolo lee toogadey umbo. Inŋkino maŋ in suune kereŋ toogo ere a jiire eego kino ette, ettiyo ti Raa, ti kaye ye.

⁸Kaye t'ume tuuku toŋ ay d'ettiyo suldi doŋ ooŋe ay di'n ŋery'iso, wo de an ay gi di'n ceeriyo ye, kaye ulbey ay d'oodiyo baadaŋ, wo de eedey i-ki daggiya ye.

⁹Duwo an ay di'n lommitte, wo de Raa y'ay ki'n ooliyo ye, kaye an di daŋy'isa siido, wo de an ay ki ti'n tôwwo ye.

¹⁰Kaye daayum ay d'owwiyo a tuddey unto t'ayni dooliyo aa ti duule Isa, inŋkino maŋ lekkiyo k'Isa toŋ duwo an aane an di wolle kereŋ adda tuddey me.

¹¹Wo de daayum kaye doŋ i lekkiyo zeere eŋ, duwo an dehu an ay ti'n t'ide kono ay daaniya Isa. Inŋkino maŋ lekkiyo k'Isa toŋ duwo an di wolle kereŋ adda tuddey ere k'unto ette.

¹²Inŋkino kaye daayum lekkiyadey aa a biza zire, wo tiŋ geŋ kune kun d'ooniyo lekkiyo ere ki daayum.

¹³An riine ti kaaga adda mattup ki Raa, an'de: «Nuŋ n'ele addó a Raa, kono kamo n'a gizite onamí me.» Kaye toŋ, urzi zaapu k'addey a Raa inŋkino kay, geŋ ay zaapu addey a yode, kono kamo kaye ay di kazita onamí me.

¹⁴Eyye, kaye ay suune Raa wede a bilde Galmeega Isa ti diine doŋ unto geŋ, y'ay ti'n balda kay aa y'a bilde Isa, wo kaye ti kune y'in di'n t'etta pay ki daanadí.

¹⁵Suldi doŋ pay ay aaniya, ay d'ombiŋe geŋ, kono un di'n nooge. Inŋkino maŋ beeko Raa t'aasa baadaŋ a eggun, wo daayum kun d'aagila k'aagulu, kun di roota koduwo a Raa wo kun di y' t'imma pay kaŋ soo.

Lekkiyo a urzi zaapu k'adde a Isa

¹⁶Kono kamo kaye tuddey a ki rurrige ye. Wo aame ise tuddey ette booloŋ ti booloŋ toogatú i daŋgiya toŋ, adda k'addey onniyo ti onniyo Raa y'ay d'eliyo toogo.

¹⁷Dabar ay ooniyo ankeṅṅo ette, tod'te soodo wo ki peedo booloṅ, wo de t'in di'n isiyo kine doṅ a t'oono dary'ika ere meeda ki Galmeega wenda yi ki ti dooze ye, dary'ika gette tod' ti lekkiyo ki daayum wo ti jiiere dabaradey taṅ baadaṅ.

¹⁸Inkino maṅ kaye ersadey ekki suldi doṅ ay'ni wolliyo geṅṅo ye, wo de ersadey ekki suldi doṅ ay ki'n wolliyo ye. Suldi doṅ ay'ni wolliyo geṅ, kane an t'engila, wo de doṅ ay ki'n wolliyo ye geṅ, kane an di lekka ki daayum.

2 Korent 5

¹Derec, tuddiṅ in di lekkiyo a siido ette, tod'te aakede daabe saṅ onniyo soo a latta. Wo de kine in suune aame in t'inda maṅ, a kandaane Raa y'in t'eeley tudde ti doolo ere a lekkey ki daayum, tod'te i t'ikkima Raa, bey wedusu ye.

²Wo ankeṅ a siido ette kine in dawilsa, in di dehu t'addiṅ pay, Raa y'in t'osse tudde ere ti kandaane, t'ekki tudde ere a siido ettiyo, geṅ aakede wede y'a t'ossiyo kalle t'ekki bakadi.

³Inkino maṅ tuddiṅ Raa yi-ti t'ossey in ki lekkey bontiliṅ ye.

⁴Ankeṅṅo kine in lekkiyo ti tuddiṅ ere aa daabe ette, in di dawilsa aakede in sarkiya attidi baadaṅ. Derec, kine in ki dehu in ki t'inda ye, wo de in di dehu in a-t'osse t'eego'ṅ tudde ere ti kandaane, geṅ inkino tudde ere a lekka ki daayum t'a dagga tudde ere k'unto.

⁵Geṅ yode Raa batum inni biire kono onniyo soo in di lekkey ti tuddiṅ ere a kandaane gette, inkino y'in d'ele Unde Kamileṅ adda k'addiṅ, gette barta ere ki poone ki suldi doṅ y'in boohiyo saṅ y'in t'ela.

⁶Inkino maṅ kine in di lekke daayum tuddiṅ i-ki rorrige ye, wo in di suune aame in lekkiyo ti tuddiṅ ettiyo baa geṅ, kine dokki t'ume lekkiyadiṅ ti Galmeega me.

⁷Derec, in sooru t'urzi zaapu k'adde a Isa, in ki sooru t'urzi munda wede in wolliyo t'edayiṅ ye.

⁸Eyye, kine in di lekke daayum tuddiṅ i-ki rorrige ye, wo munda wede in di dehe a ceere, tuddiṅ ette in di t'ooli in t'ette in di lekkey a sirpa Galmeega.

⁹Inkino ise in lekkiyo ti tuddiṅ ettiyo, ise in ti t'inda toṅ maṅ, in dehe a jiiere munda wede Galmeega ulbi i-d'ise uṅse.

¹⁰Derec, i dehu kine pay in t'etta k'ume booro k'Almasi, y'a dekkey booro eediṅ. Inkino maṅ wede tuuku toṅ y'a t'ooney munda wede Raa yi-t'eley a naabadi ere y'ize a lekkiyadi a duniya, ise ki beehiyko ise k'ulsuko toṅ maṅ.

In ti kami in t'okkiyo ti Raa

¹¹Kaye ay suune Galmeega yi dekka booro eediṅ, inkino maṅ ay d'orgiso a yode. Geṅ kono kamo ay d'isiyo t'urzi tuuku toṅ duwo an di suune adda k'addaṅ

onamey derec. Raa toŋ y'ayni suune kereŋ, wo n'elkiyo kune toŋ, adda k'addugun kun ayni suune kereŋ.

¹²Ay ki dehu ay ki kize tuddey sey ye a ɗaana kune me, wo ɗe ay dehu ay un di kize urzi wede ulbugun aase unse ti kaye. Inkiyo maŋ kun d'aana kun an di-kima ono ki ɗoŋ i rootiyo k'ulsuko a tukki kaye. Kane geŋ an koliyo tuddaŋ a sulɗi ɗoŋ an wolliyo t'edayaŋ, a sulɗi ɗoŋ adda k'adde ye.

¹³Doŋ oŋgo an'de, eedey i digge. Wo eedey i digge ki kotto maŋ, geŋ a Raa, wo ɗe kaye mentikagi maŋ, geŋ a kune.

¹⁴Kaye naabo ere ay isiyo ette ayni dokkiyo geyyiso ere k'Almasi, kono ay suune adda k'addey wede soo y'a inda kono ɗuwo pay, geŋ inkiyo aakede ɗuwo pay an t'inda ti yode a ɗaana Raa me.

¹⁵Yoŋ y'inda ki ɗuwo pay, kono ɗoŋ i lekkiyo zeere geŋ, an ki lekke lekkiyo ere k'aggadaŋ ye, wo ɗe an di lekke lekkiyo ere ki yode Almasi, y'a inda wo y'a bilɗe kono kane.

¹⁶Geŋ inkiyo ti aŋki, kaye wenda soo toŋ umbo ay di y' wolle a urzi tudde me. Derec aame ti kaaga Almasi ay yi wulle aa wede tudde toŋ maŋ, aŋkenno yoŋ ay ki y' wolliyo inkiyo ye baa.

¹⁷Aame wede yi lekkiyo kettiyo kaŋ soo t'Almasi maŋ, yode batum yi t'ize wede aware. Lekkiyadi ere mazzini ti t'ingile, wo aŋkenno y'a lekke lekkiyo ere aware baa.

¹⁸Sulɗi pay geŋ isiyo Raa, yoŋ y'in ti'n gimo in t'ukkiye ti yode t'urzi k'Almasi, wo y'ay d'ele attidi ki naabo kazita a ɗuwo an di-kimo an di t'okkiye ti yode.

¹⁹Geŋ derec, Raa t'urzi k'Almasi ɗuwo y'a ti'n gimo an t'ukkiye ti yode. Wo yoŋ a doopidadaŋ ere an a ti diipida a urzizi gette yi ki ti kaza ye baa, wo a kaye y'ay d'ele naabo kazita a ɗuwo an di-kimo an di t'okkiye ti yode.

²⁰Inkiyo maŋ kaye aakede bize k'Almasi y'ayn'igibo, geŋ aakede yode Raa batum y'unni waaku t'urzi kaye. Inkiyo kun ollo, ti suma k'Almasi ay un obe bey, kun oyyo kun ti kami kun t'okkiyo ti Raa!

²¹Almasi geŋ yoŋ oldiko yi k'ize ye, wo ɗe Raa y'a y'ize y'a t'umbe oldiko kine, kono t'urzi yode kine in t'ise ɗoŋ ki diine a ɗaana Raa.

2 Korent 6

¹Kaye ay naabiya ti Raa kaŋ soo, inkiyo ay un t'eele kooke'ŋ: beeko ere kun uune ti Raa gette, kun ti t'ise ki bita ye.

²Derec, ono eŋ Raa yi ruute ti kaaga, y'ede: «A onniyo ere n'a gize beekadó, nuŋ mooladá n'a illiga, wo a onniyo k'uttiyo, nuŋ n'a gi di nuuge.» Zemba ki nuŋ kun

ollo, onniyo ere k'uttiyo Raa yi ti ruute gette, anki t'iina baa. Tode gettiŋ onniyo ere ki beeko Raa.

³Kaye a wenda soo toŋ ay ki dehu ye, ay yi-di t'ise mukkolo morkiy'e a urzi Raa me, kono t'urzi tuuku toŋ duwo an ki t'ooone munda k'ulsuko adda naabadey ye.

⁴Wo de ay di dehu aame i isiyo munda toŋ ay kaza tuddey a duwo kaye doŋ naabo Raa ki kotto, ay d'ombiŋe baadaŋ a suldi doŋ aakede: Dabar, eedey ay ki t'ooniyo ye, wo ulbe k'oodiyo baadaŋ geŋ me.

⁵Duwo an ay di'n gussite, an ay di'n ibi adda dangay, an d'oozige kulkuwo ki tuddey, ay d'ombiŋe a ormiyo naabo, wo onniyo muno moone umbo, addey guguba.

⁶Ay kaza tuddey kaye doŋ naabo Raa t'urzi lekkiyadey ere kamileŋ, t'urzi suuniyadey, t'urzi k'ombiŋadey, t'urzi beehiykadey, t'urzi naabo k'Unde Kamileŋ, t'urzi geyyisadey ere t'adde soo,

⁷t'urzi kazita k'ono doŋ derec wo t'urzi toogo Raa. Kaye suldi k'arkadey, lekkiyo ere ki diine a daana Raa, tode gette aakede arku a bey k'ammade ki sakka wo dargine a bey geelo ki naakiwsa.

⁸Doŋ ongoŋ an ay d'eliyo suma, doŋ soŋ an ay di'n koogire. Doŋ ongoŋ an rootiyo sundey k'ulsuko, doŋ soŋ ki beehiyko. Duwo an ay di'n wolliyo kaye aa doŋ lohito k'ono, kaciŋ ay rootiyo ono doŋ derec.

⁹An d'isiyo aa an ay ki'n suune ye, kaciŋ an ayni suune beehiye. An ay di'n wolliyo kaye aa doŋ unto, kaciŋ ay lekkiyo zeere. Duwo an ay di'n dabirsa, wo de an ay ki ti'n t'owwo ye.

¹⁰An d'isiyo ay t'ise sommagi dondoŋ, wo de kaye daayum ulbey unse. Duwo an ay di'n wolliyo aa ay k'ede munda ye, kaciŋ doŋ baadaŋ ay an di'n isiyo ki laale. An elkiyo munda ay k'ede ye, kaciŋ suldi pay ay d'ede.

¹¹A kune zembadey doŋ a Korent, kaye addey ay un ti'n iidiba kereŋ, ay unni geyyiso baadaŋ.

¹²Kaye ay unni giyye baadaŋ, wo de kune ay ki'n giyye ye me.

¹³Iŋkino maŋ ono doŋ n'un orbe eŋ aa meege y'an orbe a inŋizí, kune toŋ kun ayni geyyo aakede kaye ay unni geyyiso.

Kine boy wede ki Raa zeere

¹⁴Kune ti doŋ i ki ziipe addaŋ a Isa ye geŋ, kun ti dodde talgagun soo ye. Munda ede koo a-kette kaŋ soo munda wede ki diine aa Raa yi dehu ti munda wede ulsu me? Aha, munda umbo! Munda ede koo a-kette kaŋ soo aŋ toore ti zimolo me? Aha, munda umbo!

¹⁵Almasi ti Meeda siitandani, onamaŋ ette kaŋ soo ko? Aha, i k'ette ye! Munda ede ko a t'okkiye wede i ziipe addi a Isa ti wede i ki ziipe addi a Isa ye me? Aha, munda umbo!

¹⁶Munda ede ko a t'okkiye Boy Raa ti loŋgayi me? Aha, munda umbo! Derec kine eŋ, kine boy wede ki Raa zeere, geŋ aa ono doŋ Raa y'a ruute ti kaaga, y'ede: «Nuŋ n'a lekka adda diinayaŋ wo n'a ozira ti kane, nuŋ n'a t'isa Raazaŋ wo kane an t'isa doŋzó.»

¹⁷Kono kamo Galmeega Raa y'a ruute, y'ede: «Kune ti diinayaŋ kun t'addo kun t'argu sigguŋ! Munda wede un di'n isa ganigi a daana nuŋ Raa, kun botta ye, wo nuŋ n'un di'n seeda bey sire.»

¹⁸Galmeega Raa toogo i jiiire pay y'a ruute sey, y'ede: «Nuŋ n'a t'isa Meeguguŋ, wo kune, kun t'isa inŋizó kuuli wo erayi.»

2 Korent 7

¹Zemba ki nuŋ kune doŋ ki geyyiso, suldi doŋ Raa yi ruute y'aasa geŋ, derec kane an lekkiyo a kine. Kono kamo kine batum addiŋ in ti'n iso kamileŋ ti suldi doŋ i-ti'n isiyo tudde ti biza k'ulbe ganigi geŋ me, wo in soodo zakidi in t'iso doŋ ooyiso kese a Raa wo t'orgiso a yode.

Uŋsuwo ki Pool a tukki doŋ Korent

²Kun ayni geyyo, kono kaye a wenda soo toŋ ulsu ay i-k'ize ye, wenda soo toŋ ay ki digge ye, wo wenda soo toŋ ay ki mibilde ye kono ay t'ambe mundazi me.

³Ni rootiyo inŋkino kono booro t'un gi di'n seeda ye. Geŋ aa n'a ruute ti poone: kune ay un elkiyo daayum adda k'addey, kine kettiyo kaŋ soo ise in lekkiyo zeere, ise in ti t'inda toŋ maŋ.

⁴Nuŋ ni ziipe addo pay a kune, ulbo o-t'ize uŋse baadaŋ ti kune me, nuŋ a ti n' zille, wo ulbo a uune t'uŋsuwo adda dabaradey ere pay gettiyo toŋ maŋ.

⁵Inŋkino maŋ aame ay iina a siido Maseduwan toŋ, kaye ay ki ti buuke ye, wo de ita dabar ere tuuku toŋ ay di-t'uune: t'eŋ duwo an ay di'n t'iiziga, wo adda k'addey ay d'ede ulbe k'oodiyo.

⁶Wo de Raa, yoŋ yi selliyo doŋ tuddaŋ i ti rorriso geŋ, y'ay ti'n zille ti aaniya Tit.

⁷Wo ay uune selliyo ti aaniyadi danŋal ye, wo de t'urzi kooke wede kun i elo pay. Wo soŋ y'ay t'iide taaya y'ede, kune mosogo nuŋ Pool kun dehu kun ti n' wolle, a molaguŋ ere kun ile, a urzi wede kune wehini ki naakiwsado me, geŋ kono k'inŋkino ulbo o-t'ize uŋse baadaŋ sey.

⁸Aame a mattup ere n'un riije gette kun t'ize sommagi dondoŋ maŋ, nuŋ toŋ o t'ize attidi. Wo aŋkenŋo nuŋ o ki t'ize attidi ye, kono sommagugun a mattup gette ki peedo booloŋ.

⁹Wo aŋkenŋo nuŋ ulbó o isiyo uŋse a sommagi dondoŋ ki kune geŋŋo ye, wo de o isiyo uŋse kono sommagugun geŋ un di'n ize kun di gime lekkiyagun. Kane sommagi geŋ iido ti Raa, iŋkino kaye munda k'ulsuko soo toŋ ay un k'ize ye.

¹⁰Ki kotto sommagi dondoŋ doŋ ettiyo t'urzi Raa geŋ, i d'eliyo urzi kama lekkiyo, t'urzi geŋ kine in d'ooniyo uttiyo, geŋ in ki t'ise attidi ye. Wo de sommagi dondoŋ doŋ ettiyo t'urzi duniya ette, a-d'ette unto.

¹¹Aŋken kun ki wollo do, suldi doŋ kun uune aame dangu t'urzi sommagi dondoŋ doŋ ettiyo t'urzi Raa geŋ me. Eyye, kane geŋ an un di'n ize doŋ addaŋ soo k'isiyo munda wede Raa yi dehu, soŋ kun t'ize doŋ seegun ye ti wede isiyo oldiko me, soŋ kun di kulkiso a munda wede ulsu, soŋ un t'eliyo orgiso a munda ulsu kun d'ise me, soŋ un t'eliyo mosogo ki wollisadó, soŋ k'un t'ize doŋ wehini a urzi zaapu k'addugun a Isa, wo soŋ k'un d'uune urzi wede wedusu yi t'isiyo oldiko maŋ kun di y'eliyo dangay. Geŋ t'urzi tuuku toŋ kune batum kun gize ti suldi ulpi geŋ kune adda ye.

¹²Iŋkino maŋ, n'un riije mattup gette kono ni dihe n'un di kize a daana Raa, kune doŋ wehini a urzi geyyisadey me. Wo de ni ki riije kono yo wede ize ulsu ye wo kono wede an i ize ulsu ye.

¹³Kono kamo ti naabagun gette kaye ay d'uune toogo baadaŋ. Wo ay uune toogo ti naabagun dangal ye, ulbey ay d'ize uŋse a jire kono ay wulle Tit batum ulbí uŋse baadaŋ ti kune me. Aŋken addi i t'udige baa kono kune pay geŋ me.

¹⁴Derec, a daana Tit geŋ nuŋ ulbó oo d'ize uŋse kono kune geŋ me, wo de geŋ nuŋ oo k'ede sukiyagi ye baa. Kaye daayum derec ay un ti ruute, wo aŋken munda wede a yi ruute Tit a tukki kune geŋ, yoŋ ki kotto derec.

¹⁵Tit geŋ y'un elkiyo adda k'addi kono kune pay onami kun'n illiga, wo kun di y'ziida bey sire ti ottilso wo ti orgiso a Raa. Kono kamo y'un di'n geyyiso baadaŋ a jire ere ti poone.

¹⁶Nuŋ ulbó uŋse kono a suldi pay, n'aane n'a zaape addo a kune.

2 Korent 8

Eliyo kooke a urzi tussiyó

¹Zemba ki nuŋ, kaye ay dehu kun di suune beeko ere Raa y'an ele a kane doŋ ogiysito ti suma k'Isa a siido Maseduwan.

- ²Kane geɲ an d'uune naamiya t'urzi dabar ere baadaɲ, wo de toɲ an di lekkiyo daayum ulbaɲ unse. Wo kane munda an k'ede ye an daayisa baadaɲ toɲ, kane wasigale an d'ele suldi baadaɲ a urzi naabo Raa me.
- ³A urzi tussiyo geɲ, wede tuuku toɲ y'ele munda a toogadi toogadi, wo doɲ ongo an ele a jiire toogadaɲ sey, nuɲ Pool eɲ ersado ti wulle, geɲ wenda soo toɲ an ki y'ize ye ki toogo me.
- ⁴Kane an di-giddima baadaɲ ti obe bey, ay d'ise beeko maɲ an di nooge a naabo tussiyo a doɲ ki Raa a siido Ziide.
- ⁵Inkino maɲ a naabo gette ki poone an d'ele tuddaɲ batum a Galmeega, saɲ a daana kaye aa Raa yi dehu. Geɲ a jiire munda wede ay elkiyo an aane an d'ise.
- ⁶Kono k'inkino Tit geɲ kaye ay di giddima kono naabo tussiyo ere y'iiso di kune doɲ Korent gette, y'a kime y'a-ti daɲgo ti beehiyko.
- ⁷Kune ki laale a suldi pay, aakede: Urzi zaapu k'adde a Isa, urzi rootiyo k'ono, urzi suuniyo suldi pay doɲ ki Raa, urzi k'isiyo naabo Raa t'adde soo, wo urzi geyyiso ere kun uune ti kaye. Inkino maɲ a urzi tussiyo toɲ, kun kaza kune ki laale wo ay dehu kun t'ise doɲ wasigale.
- ⁸Onamo ni rootiyo eɲ, n'un ki'n isiyo ki toogo ye, wo de n'un towwo taaya ki zamba doɲ a Maseduwan an ize naabo Raa t'adde soo, geɲ kune toɲ kun di kize geyyisagun ekki duwo t'adde soo.
- ⁹Kune kun ti suune beeko ere Galmeegin Isa Almasi y'eliyo ti mozuwo te. Yoɲ ki laale, wo de kono kune y'a iyee y'a-t'ize tuddi wede i-k'ede munda ye, inkino t'urzi geɲ y'un di'n ize kune ki laale.
- ¹⁰Kun ollo, n'un d'elo elkiyado a urzi tussiyo gette: beehiye a kune kun di seeda zakidi bini daɲgu, kono t'obonoɲ naabo gette i t'ilke wo iise ki poone toɲ kune.
- ¹¹Ankenɲ naabo gette kun a ti daɲgo. Wo kun ti daɲgo t'adde soo, wede soɲ a toogadi toogadi, aakede kun ilke t'ume k'eesiyo.
- ¹²Aame in eliyo munda t'adde soo maɲ, Raa toɲ ulbi unse a munda wede in eliyo me, wo mundaziɲ umbo maɲ Raa toɲ yi ki tondiyo ye.
- ¹³Kaye ay ki dehu ye doɲ ongo an t'ooone eedaɲ, wo kune kun t'ette adda dabar me. Wo de ay dehu kun t'ise pay miɲ kaɲ soo wede tuuku toɲ i ki baate ye.
- ¹⁴Ankenno kune adda darna geɲ, kun d'ette noogiyo kane doɲ an biite. Saɲ aame onniyo soo kune un biita wo kane adda darna maɲ, an d'etta noogiyagun kay. Inkino maɲ kun di lekka pay miɲ kaɲ soo wede tuuku toɲ i ki baate ye.
- ¹⁵Ono eɲ an riije ti kaaga adda mattup ki Raa, an'de: «Wede yi ziki baadaɲ toɲ, i k'oope ye, wo wede yi ziki baata toɲ, i ki beete ye.»

Tit ti doɲ an naabiya kaɲ soo

¹⁶Kaye ay di roote koduwo a Raa, yi-d'ize adda k'adde Tit yi dehu t'adde soo y'un di'n noogey aa ki kaye.

¹⁷Tit geɗ kaye ay yi tunde maɗ, y'a iyye y'a t'ette di kune me, wo yoɗ miɗ y'ele tuddi ki poone too, wenda yi ki y'ize ki toogo ye, y'a t'iiziga y'a engile di kune.

¹⁸Kaye ay a-t'igibe ti yode leema wede doɗ pay ogiyo ti suma k'Isa an yi tamma a urzi naabadí ere ki kazita Rabila Majjaanawa.

¹⁹Wo k'inkino daɗɗal ye, doɗ pay ogiyo ti suma k'Isa an yi biire ay torguwe kaɗ soo, kono ay a-ti daɗɗey naabo ere ki tussio. Naabo gette kaye ay isio kono a t'ele tamma a yode Galmeega batum. Inkiyo maɗ duwo pay an di suune kaye ay naabiya t'adde soo.

²⁰Kay ay d'ede attidi a urzi y'eeriyo soɗko ere baadaɗ duwo an tusse ette, inkino ay konso jep, kono duwo an ki roota munda k'ulsuko a tukki kaye ye.

²¹Kaye ay dehu ay ki d'ise beehiye a daana Raa daɗɗal ye, wo de a daana duwo pay.

²²Ti kane zamba sire geɗ, ay a-t'igibe leemadey soo inkino, wede taɗ baadaɗ a naabo tuuku toɗ ay ti y' wulle yoɗ yi dehu t'adde soo y'a nooge doɗ ongo. Wo aɗkeɗɗo toɗ yi dehu y'aase inkino sey a ceere kono yi ziipe addi pay a kune.

²³Tit geɗ, yoɗ wede ay sooru soo wo ay naabiya toɗ kaɗ soo ki noogiyagun. Wo ki zamba doɗ ti yode geɗ, i'n igibe zamba doɗ pay ogiyo ti suma k'Isa, wo naabadaɗ ere an isio gette, i d'eliyo tamma a Almasi.

²⁴Kane geɗ kun'ni soodo bey sire, kono a kize ki kotto kun'ni giyye. Inkiyo maɗ doɗ pay ogiyo ti suma k'Isa geɗ, an di suuna adda k'addaɗ munda wede ay ruute a tukki kune geɗ d'erec.

2 Korent 9

Raa yi giyye wede eliyo t'ulbe unse

¹A urzi tussio ki noogio doɗ ki Raa a siido Ziide geɗ, ki too maɗ n'un ki raaje ye baa,

²kono ni suune kun dehu kun nooge t'adde soo me. Inkiyo kune n'un di'n imme a daana zamba doɗ a siido Maseduwan, wo n'an di ruute, n'ede: «A urzi tussio geɗ, zamba doɗ a siido k'Akayi toɗ an t'ikkima tuddaɗ t'obonon too.» Aame doɗ Maseduwan an illiga kun iiziga wehini a urzi tussio maɗ, doɗ baadaɗ ogiyo ti suma k'Isa an d'eele toogo.

³Wo aɗkeɗ zamba ado en n'anni t'igibe k'ume kune kono a urzi tussio kun t'okkimey tuddugun beehiye, aa n'a ruute a doɗ ongon. Wo geɗ nuɗ n'un di'n imme, ni ki dehu n'a ki t'ise wede lohito k'ono ye.

⁴Wo nuŋ orgisadó, aame doŋ miibi ti siido Maseduwan etta di kune ti nuuno geŋ ay un ki'n uuney tuddugun okkime ye maŋ, kaye ay seedey sukuyagi kono ay ziipe addey a kune, wo kune toŋ kun seedey sukuyagi kay.

⁵Inkino maŋ n'a t'ilke n'a tunde zemba ado enno an ay d'oogume di kune, an a-ti danŋey tussiyo ere kun ruute kun t'ela ti mozuwo. Geŋ aame n'iiney maŋ, tussiyo ettú t'îide, wo a kizey kun ele t'adde soo, t'adde sire ye.

⁶Kune ono eŋ kun'ni suuno koduwo, wede yi giira baata maŋ, y'a t'ayda toŋ baata kay, wo wede yi giira baadaŋ maŋ, y'a t'ayda toŋ baadaŋ kay.

⁷Geŋ wede tuuku toŋ y'elo aa y'ilke adda k'addí, t'adde sire ye, wo aa an ki y'ize ki toogo ye, kono Raa yi geyyiso wede y'eliyo ti ulbe unse.

⁸Raa geŋ yoŋ i-d'ede toogo y'un di'n oone t'ita beeko ere tuuku toŋ maŋ, kono suldi doŋ pay daayum kun dehu ki lekkiyagun geŋ, kun di'n t'oon baadaŋ sey a oopita, inkino kun t'ela k'isiyo naabo ere pay beehiye.

⁹Ono eŋ an riine ti kaaga adda mattup ki Raa, an'de: «Yoŋ suldi y'a-dikkida, y'an d'ele ti mozuwo a doŋ an k'ede munda ye, Munda wede y'isiyo ki diine a duwo geŋ, yoŋ i lekkiyo ki daayum.»

¹⁰Eliyo buzu korso ti ombo a wedusu Raa, geŋ y'un t'ela kay buzu korso me, y'un di y'aagila wo munda wede kun isiyo ki diine a duwo geŋ y'un di y'aagila k'aagulu.

¹¹Kune Raa y'un di'n isa ki laale a suldi doŋ pay beehiye, wo kun di koon daayum wasigale. Inkino maŋ doŋ baadaŋ an di roota koduwo a Raa a munda wede ay an d'etta geŋ me.

¹²Derec, naabo tussiyo ere kun isiyo gette a ki t'îda mosogo doŋ ki Raa a siido Ziide danŋal ye, wo soŋ doŋ baadaŋ an di roota koduwo a Raa.

¹³Duwo an wulla'ŋ naabo gette beehiye, inkino maŋ doŋ baadaŋ an t'imma Raa a ollige k'ono ere un d'ede kono kun seedu zakidi a urzi Rabila Majjaanawa k'Almasi. Wo an t'imma Raa sey kono kune wasigale, aggagun kun d'ele a zemba doŋ a siido Ziide wo ti doŋ pay.

¹⁴Kane zemba geŋ an tonda Raa kono kune, wo t'urzi geŋ a kiza an unni giyye baadaŋ, kono a beeko ere baadaŋ a jiiere Raa y'un ele gettiyo.

¹⁵Geŋ in rooto koduwo a Raa a suldi doŋ y'in eliyo in k'elkiyo eego ye geŋ me.

2 Korent 10

Pool yi naakiwsa naabadi

- ¹Ki nuɲ Pool eɲ, n'un di'n tondo ti tassuwa wo ti beehiyko ere ettiyo t'urzi k'Almasi. Doɲ oɲgo an di rootiyo an'de, aame nuɲ a diinaguɲ maɲ nuɲ tasse, wo de dokki ti kune maɲ wehini.
- ²Geɲ nuɲ n'un di'n tondo ti obe bey: Kun ti kama lekkiyaguɲ, para maɲ aame n'iida di kune sey maɲ, n'a kooney wehini a umayó. Wo de doɲ oɲgo an elkiyo kaye ay sooru a urzi tudde. Inkiɲo maɲ a kane doɲ geɲ, nuɲ wehinkadó n'an ti-kizey.
- ³Derec kaye doɲ tudde, wo de ay ki deyyiso aa ki doɲ tudde ye.
- ⁴Adda deyyisadey gette aryagi doɲ ay di deyyiso, itadaɲ a urzi tudde ye. Wo de kane ita toogadaɲ t'ettiyo ti Raa kono i-ti dambu suldi doɲ pay i ti-toogiyo a Raa. Kaye ay di lattiya elkiyo ere oldo,
- ⁵wo toogo ere pay ki doɲ i koliyo tuddaɲ an an t'eegirso a duwo an di suune Raa. Kaye ay an kazita a duwo kono an di-kime elkisadaɲ ere oldo gettiyo wo an d'olliga ono doɲ k'Almasi wo an d'ozire eego.
- ⁶Aame kun t'iza doɲ ollige ono wo kun a ti sooru eego aa Raa yi dehu maɲ, kaye tuddey okkime wede tuuku y'a ti doopide onamey geɲ, ay ti'n t'ela daɲgay.
- ⁷Kune'ɲ suldi kun'ni wolliyo a edaguɲ daɲɲal. Aame wede yi zuune adda k'addi yoɲ k'Almasi maɲ, geɲ yi suuno kaye toɲ k'Almasi aa yode.
- ⁸Kaye Galmeega y'ay ele urzi ki noogiyaguɲ kun di t'ihira a urzi zaapu k'adduguɲ a Isa, ki daggiyaguɲ ye. Geɲ koo kun elkiyo ni tamma tuddó baadaɲ toɲ, wo de a nuɲ o k'isa sukiyagi ye.
- ⁹Geɲ ni ki dehu n'un gi di t'ele orgiso ye, t'urzi mattupiyagó doɲ n'un raaniya eɲ me,
- ¹⁰kono doɲ oɲgo an rootiyo, an'de: «Mattupiyagi yi raaniya geɲ onamaɲ zakidi wo wehini, wo de aame yoɲ a diinayey maɲ, toogadi baata wo onami toɲ ki bita.»
- ¹¹Wede yi rootiyo inkiɲo geɲ, yi suuno munda soo adda k'addi: Aame kaye dokki ti kune maɲ, mattupiyagey ay un raaniya geɲ onamaɲ wehini, wo aame kaye a diinaguɲ toɲ naabadey wehini inkiɲo.
- ¹²Doɲ oɲgo an tamma tuddaɲ ti siidaɲ, wo kaye ay ki dehu ay ki'n dooze ye, wo ay ki'n deey'e ye. Kane geɲ an tamma tuddaɲ ti siidaɲ, wo geɲ an ti-t'ize tuddaɲ aa munda dooziyo wo ki deey'iso ti doɲ oɲgo. An isiyo inkiɲo geɲ, kane aa doɲ elkisadaɲ umbo.
- ¹³Wo ki kaye ay ki t'imme tuddey ay gi di-doopida ti y'irwe wede Raa y'ay riike geɲno ye. Aame Raa y'ay di'n t'iide di kune geɲ, y'ay di riike y'irwe a ume wede ki naabadey, wo ay di naabiya adda.

¹⁴Wo a ume geɲ, kaye ti y'irwayey ay gi di diipida ye. Iney ki poone di kune kaye, ay un di gizite Rabila Majjaanawa k'Almasi me.

¹⁵Kaye ay ki t'imme tuddey ye ekki naabo ki doɲ doolo g'ize te. Wo de ay zaape elkisadey a kune kun di t'ihira a urzi zaapu k'addugun a Isa, inkiyo naabadey ere a diinagun gette t'a aagila k'aagulu adda k'ume wede Raa y'ay riike me.

¹⁶Geɲ inkiyo san ay di doopida ki siidiyagi doɲ dokki ti di kune, ay an di kizitey Rabila Majjaanawa. Kaye ay ki dehu ay ki naabe adda k'ume wede doɲ doolo gi niibe ye, wo ay ki dehu ay ki t'imme tuddey a naabadaɲ ye.

¹⁷Ono eɲ an riije ti kaaga adda mattup ki Raa, an'de: «Wede yi dehu yi t'imme tuddi maɲ, y'amma tuddi a munda wede Galmeega Raa y'ize.»

¹⁸Wee wee, wede naabo beehiye me? Wede naabo beehiye'ɲ yoɲ wede Galmeega batum yi yi tamma, yode wede yi tamma tuddi ti siidi ye.

2 Korent 11

Pool ti doɲ k'olmidayi

¹Nun ni dehu kun aa d'ombina, kono ankenno n'orbe aakede nun ki maade. Eyye, kun ambo ombine ti nun me.

²Derec, nun n'okkiso a kune me, wo okkisado t'ettiyo ti Raa, kono kune eggun seedu, ni dehu kun di lekke kamileɲ, inkiyo n'un di'n t'etta k'ume yode soo danjal Almasi, aakede uto konso an i-d'ette a kulatu.

³Wo de kun elko a taaya ki meediɲ Awa tod'te miipo t'a ti mibilde t'urzi metinkatu. Inkiyo maɲ nun n'orgiso kono elkisagun t'a t'isa oldo, t'un ti'n ledfa dokki ti lekkiyo ere t'adde soo a urzi k'Almasi te.

⁴Ni rootiyo inkiyo kono aame wede tuuku y'ettiyo y'un kazita urzi k'Isa ti doolo, ti wede kaye ay un ki gizite ye, ise kun ooniyo unde ti doolo ti ere kun uune ti poone gettiyo ye, ise an un kazita rabila ti doolo ti Rabila Majjaanawa ere kun uune ti poone gettiyo ye toɲ maɲ, kun d'ombine baadaɲ ti kane me.

⁵Kane doɲ kun rootiyo kun'de, kane doɲ zina k'Isa i jiire geɲ, nun n'elkiyo kane geɲ an ki n' ceere ti munda ye.

⁶Derec, a rootiyo k'ono suuniyado t'ise baata toɲ, wo de a urzi suuniyo Raa geɲ a ki'n baate ye. Kaye suuniyadey t'urzi tuuku toɲ, daayum ay un ti gizite kereɲ.

⁷Aame n'un gizite urzi Rabila Majjaanawa ki Raa geɲ, n'un gizite ki waawiye, n'a-t'ize tuddo nenku kono kune sundugun t'a ole. Geɲ n'ize inkiyo oldiko ko?

⁸Nun n'a iyye doɲ ogiysito ti suma k'Isa a ume doolo an di n' nuugo ti sonko, geɲ aakede ni ziko maaladaɲ kono ki noogiyagun.

⁹Aame nuɗ di kune geɗ, munda tuuku toɗ ni dihe a urzi lekkiyadó, a wenda soo toɗ ni ki guune attidi ye, kono zamba doɗ iido ti siido Maseduwan geɗ, munda wede oo biite an o ele pây. Wo a suldi pay tuddó n'a ti ziida n'un k'ele attidi ye, wo daayum tuddó ni ti seeda inkinno.

¹⁰Geɗ inkinno nuɗ ulbó uɗse. Ni rootiyo ti derec ere k'Almasi oo d'ede: Adda siido k'Akayi, n'aasa t'urzi tuuku toɗ, wenda soo toɗ umbo a aana oo di latta uɗsuwo ere oo d'ede te.

¹¹Ki moo me ni rootiyo inkinno me? Kun elkiyo n'un ki'n giyye ye ko? Aha, Raa yi suune n'unni giyye me!

¹²Munda wede n'isiyo ankeɗno eɗ, ki daana toɗ n'isa inkinno kono n'an di t'ippa a bize ki doɗ i koliyo tuddaɗ an'de, kane ti kaye naabadey kaɗ soo geɗ me.

¹³Kane geɗ an ti-t'isiyo tuddaɗ aa doɗ zina k'Almasi, doɗ daggiya duwo, tuddaɗ an ti-t'ombide an t'isiyo aa doɗ zina k'Almasi.

¹⁴Geɗ munda ki seedu giggire umbo, kono tode Meeda siitandani batum toɗ tuddutu ti-ti t'ombide ti-t'isiyo aa maaleeka wede ki toore.

¹⁵Geɗ i k'oone ye, kane doɗ naabatú toɗ tuddaɗ an ti-t'ombide an t'isiyo aa kane doɗ naabo Raa ki diine. Wo de kane geɗ a onniyo dangu an t'ooney munda wede a naabadaɗ.

Ombiɗe Pool a dabar

¹⁶Kun ollo, n'un di-doolo sey, wenda soo toɗ ti diinaguɗ y'elke ye nuɗ ki maade me. Wo de aame kun elkiyo nuɗ ki maade maɗ, geɗ kun d'oyyo n'a orba aa ki maade, kono nuɗ toɗ ni-t'imme tuddó booloɗ.

¹⁷Ono doɗ ni rootita eɗ, ni rootita aa Galmeega yi dehu ye, wo de ni rootita aa nuɗ ki maade kono ni suune adda k'addó, o d'ede urzi n'a t'imme tuddó.

¹⁸Doɗ baadaɗ an tamma tuddaɗ a suldi doɗ a urzi tudde, inkinno maɗ nuɗ toɗ n'a t'imme tuddó kay.

¹⁹Kune doɗ kun'de un d'ede elkiyo baadaɗ geɗ, kun d'oyyiso t'adduguɗ pay kun d'ombiɗe a kane doɗ elkiyadaɗ umbo.

²⁰Kune kun d'oyyiso a doɗ zina i jire geɗ an un di'n isiyo aa bulagi, an un di'n oobiyo ti metiɗko, sulduɗuɗ an t'oogire pay, an di koliyo t'eggun, an un di'n dang'isa a tobbiɗaguɗ, wo a suldi pay geɗno toɗ kun d'ombiɗe.

²¹Geɗ munda wede kane an un ize maɗ, kaye toogadey baata inkinno ay un k'ize ye. Wo geɗ tambobino, sukiyagi a kaye! Kun ollo, ankeɗno n'a orba aa nuɗ ki maade, wo wede yi tamma tuddi a munda tuuku maɗ, nuɗ toɗ n'aane n'a t'imme tuddó eego kay.

22An rootiyo kane donj k'Eber manj, nuñ toñ Eber! An rootiyo kane Izirayel manj, nuñ toñ Izirayel! An rootiyo kane ti biza bumbu k'Ibirayim manj, nuñ toñ ti biza bumbu k'Ibirayim.

23An rootiyo kane donj naabo k'Almasi manj, nuñ miñ wede naabo k'Almasi i jiire kane, iñkino n'a orba aa eedó i-dikke baa. A naabo gette n'iidi yeebadó i jiire kane, an ni zidde dangay tañ baadañ i jiire kane, an ni gussite tañ baadañ i jiire kane, wo ni likke aa a biza zire k'unto tañ baadañ i jiire kane.

24Yawudiyagi an di n' gussite tañ paat, kossiyo soo marpa ada g'ado makumu gessat, gessat.

25Donj Romenj an di n' gusse ti dalka tañ ado, wo duwo an di n' gikkite ti monjali ki towwadó kanj soo. A torquwadó geñ, tañ ado tooko ay di lattiya adda k'ahu ahu, wo i d'ize onniyo soo n'a likke t'ekki bar diddo wo onnu.

26A torquwadó ere tañ baadañ gette, n'a uune dabar aa nuñ a biza zire t'urzi k'oydayi g'ay t'oniyo, wo t'urzi donj dekkiyo k'urzi, n'a uune dabar aa nuñ a biza zire t'urzi donjzó Yawudiyagi, wo t'urzi donj Yawudiyagi ye, n'a uune dabar aa nuñ a biza zire t'urzi donj adda geegiryagi, wo adda balda, n'a uune dabar aa nuñ a biza zire ekki bar, wo a daana donj an ti-t'isiyo tuddañ aa zemba a urzi k'Isa.

27N'a uwwe ormiyo wo oodibe yeebe a urzi naabo, onniyo muno moone umbo, n'a uwwe mosogo wo orme, onniyo muno addó guguba, kallagó baata wo reele yi di n' tówwo.

28Suldi doolo ede ni k'aane ni ki ti'n deepe pay ye, wo a nuñ munda wede beehiye a jiire, onniyo ti onniyo nuñ ulbó o d'oodiyo a tukki donj pay ogiysito ti suma k'Isa me.

29Aame wede yonj toogadi baata manj, nuñ toñ ni d'owwiyo toogadó baata kay, wo aame wede yi t'isiyo oldiko manj, nuñ addó i n'aadumu.

30Ise i dehu ki tamma tudde manj, n'a t'imme tuddó a toogadó ere baata gettiyo.

31Tamma ti koonna ki daayum a Raa Meeki Galmeega Isa, yonj yi suune ni ki lohito ono ye me.

32Aame nuñ a geeger Damas geñ, goole siido wede mozigo Aretas yi ziipe'ñ, yi d'ibi asigiryagi a boha bumbiyagi ki geeger gette ki seeduzó.

33Wo de zemba an ti n' ziipe adda gedde, an ti n' zuuye ti nee ti buldo waaya monjali, wo ni di t'unzile a goole siido geñ me.

2 Korent 12

Raa yi iidiba ita a Pool

¹Inkino i dehu'ŋ n'a t'imme tuddó ko? Aha, a ki nooge ti munda ye! Wo de toŋ n'a roote a suldi doŋ o iido aa suniye wo Galmeega y'o di t'iidiba ita.

²Nuŋ ni suune wedusu soo inkino, yi lekkiyo kettiyo kaŋ soo t'Almasi, onniyo soo Raa y'a y'umbe k'awwa ki kandaane wede k'aduwe, t'ume geŋ iide ozzine koomat makumu pide. Raa yi y'umbe miŋ ti tuddí gettiyo koo, i iide munda aa suniye koo maŋ, ni ki suune ye, i suune Raa siidí.

³⁻⁴Derec, ni suune wede geŋ, Raa yi y'umbe ki jenne. Wo de yi y'umbe miŋ ti tuddí gettiyo koo, i iide munda aa suniye koo maŋ, ni ki suune ye, i suune Raa siidí. Wo a ume geŋ yi d'illigo ono doŋ wede tudde soo toŋ yi k'aane yi ki ti'n roote ye, kono a wede'ŋ urzi umbo y'anni roote me.

⁵Geŋ ni t'imme tuddó kono wede'ŋ geŋŋo. Wo de ki nuuno k'aggadó, n'a t'imme tuddó a toogadó ere baata gettiyo daŋŋal.

⁶Aame ni dehu ni t'imme tuddó maŋ, n'a k'orba aa ki maade ye, kono ni rootita derec daŋŋal. Wo de ni ki tamma tuddó ye ni-ti seedu, kono ni dehu duwo an di wolle munda wede n'isiyo wo munda wede an ollige ni rootiyo daŋŋal, munda ti doolo umbo.

⁷Suldi doŋ Raa y'o t'iidiba ita geŋ, kane suldi doŋ i ceeriyo eego. Inkino, kono n'a ki kili tuddó ti suldi geŋŋo ye, geŋ Raa y'o d'ele munda aa kuuno a tuddó i di n' dabirsa. Geŋ aakede wede zina Meeda siitandani ti y'igibo y'a ni dabire kono o-t'eegire n'a ki kili tuddó ye.

⁸A dabaradó gette n'a tunde Galmeega taŋ afo, kono y'o-ti ledde ti tuddó me.

⁹Wo Galmeega y'o di ruute, y'ede: «A kee'ŋ beekadó gettiŋ a iide baa. Kono nuŋ toogadó ti kee, aame kee toogadá baata geŋ me.» Geŋ nuŋ ulbó unse n'a t'imme tuddó a toogadó baata gette, kono toogo k'Almasi t'a koone eedó.

¹⁰Kono kamo nuŋ ulbó o d'isiyo unse, a toogadó baata gette, ise duwo an ni kaldita, ise an ni koddite, ise an ni dabirsa, wo ise an oo oodiyo ulbó baadaŋ toŋ maŋ, kono ni daaniya Almasi geŋ me. Eyye, aame nuŋ toogo baata toŋ, a ume geŋ n'a d'ooniyo toogo.

Ulbe k'oodiyo Pool a doŋ Korent

¹¹Kun wollo ankeŋ ni t'ize aa ki maade, wo de kun n'ize ki toogo n'a t'ize ki maade me, ki too maŋ nuŋ a ni naakiwe kune. Ise duwo an rootiyo nuŋ ki bita toŋ, kane doŋ kun'de doŋ zina k'Almasi i jiire geŋ, nuŋ n'elkiyo kane an ki n' jiire ti munda ye.

¹²Suldi doŋ ize di kune i-kaza nuŋ wede zina k'Isa geŋ, kun wulle: N'a imbiŋa a munda wede ooŋe tuuku toŋ maŋ, wo kun wulle suldi k'armika doŋ i-kaza Raa toogo wo suldi doŋ i ceeriyo eego me.

¹³Kunuŋ n'un biite a moo me a beehiyko ere n'ize a doŋ ogiysito ti suma k'Isa a omagi doolo me? Munda umbo. Para maŋ ede munda soo: Ni ki guune attidi kune ye. N'ize iŋkino ki diine ye maŋ, kun oo t'iso tambobino!

¹⁴Ankeŋ kun ollo, ni kime di kune sey k'aduwe, wo n'a ki kooney a attidi kune ye, kono ni ki dehey maalaguŋ ye, wo de ni dehey kune batum. Kune kun suune inŋi geŋ an k'okumso suldi a maawaŋ ye, wo de maawi okumso suldi a inŋizaŋ me.

¹⁵Ki nuŋ, ulbó unse n'a dagge suldzíó ise tuddó batum kono kune geŋ me. Derec, geŋ nuŋ n'unni geyyiso baadaŋ, wo ki moo me geyyisaguŋ a tukki nuŋ baata me?

¹⁶Derec kun suune, n'un ki t'ize attidi kune ye, wo de doŋ soŋ an'de, nuŋ metike n'un ti'n iimi ti metiŋko.

¹⁷Kun t'elko do kunuŋ, ti diine doŋ n'un ikkipe geŋ, t'urzi wede soo n'un ti'n iimi ti metiŋko ko?

¹⁸Nuŋ ni di gidfima a Tit y'a ette di kune wo n'a-t'igibe ti yode leema wede kune batum kun yi suune. Kunuŋ Tit geŋ y'un ti'n iimi ti metiŋko ko? Aha, kun suune geŋ derec ye! Wo kun suune nuŋ ti Tit geŋ, ay izire soo wo elkisadey toŋ soo.

¹⁹Ti kaagine kun elkiyo koo ay okkime bizey a daana kune me koo maŋ? Aha, iŋkino ye! Onamey eŋ, ay rootiyo a daana Raa kono ay lekkiyo kettiyo kaŋ soo t'Almasi. Wo zemba ki nuŋ kune doŋ ki geyyiso, ay isiyo pay geŋ kun di t'ihira a urzi zaapu k'adduguŋ a Isa.

²⁰Nuŋ n'orgiso a aaniyadó di kune geŋ, kune n'un ki'n t'ooney aa addó i dehu ye, wo nuŋ kun gi di n' wolley aa adduguŋ i dehu ye. Nuŋ n'orgiso n'iidey di kune, ni t'ooney suldi doŋ aakede: Orbe k'ono k'ulpi ti tudduguŋ, kolbiso, kulkiso i ceeriyo eego, elkiyo ere bakadá k'a ti y' kime k'ita, dekkiyo k'ita duwo, lattiya suma duwo, koliyo tudde, wo isiyo suldi doŋ a urzizaŋ ye pay geŋ me.

²¹Nuŋ n'orgiso soŋ a ettiyadó ere soŋŋo gette, koo Raa yi-ti n' t'eley adda sukiyagi a daana kune me koo maŋ. Nuŋ n'orgiso koo ni-t'ooney doŋ baadaŋ an lekkiyo daayum adda k'oldiko aakede an ize ti poone koo maŋ, wo an ki ti gime lekkiyadaŋ ye botto, an lekkiyo a lekkiyadaŋ ere k'isiyo suldi pitiŋko, boliyo, wo an ti-t'eliyo tuddaŋ k'isiyo suldi doŋ ulpi. Wo geŋ n'a ôoley a tukki kane geŋ me.

2 Korent 13

Toose ti aapuđu ki daŋgu

¹Nuŋ ni kime di kune eŋ k'aduwe. A suldi pay geŋ wedusu booro ti y' seeda'ŋ, i dehu doŋ sire t'ado i wulle wo illiga munda geŋŋo doo miŋ kollo.

²A ettiyadó ere ki sirwe di kune gette, a doŋ ize oldíko ti poone wo a doŋ ongo pay geŋ n'an ti ruuto, wo de aŋkeŋ nuŋ dokki ti kune toŋ n'a-ti doole sey: Aame soŋŋo n'iida wollyaguŋ maŋ, n'a kooney wehini ti doŋ pay isiyo oldíko.

³N'aasey iŋkino kono kun dehu kun di suune munda a kize, ki kotto Almasi yi rootiyo ti bizó. Wo kun di suuney Almasi yoŋ toogadí baata ye a daanaguŋ me, wo de yoŋ toogadí a diinaguŋ y'un ti kaza.

⁴Derec, Almasi yoŋ a urzi tudde toogadí baata, duwo an ti y' tiike ekk'undumu wede zaapu t'ekki bakadí kaŋ tontilko, wo aŋkeŋ yi lekkiyo zeere t'urzi toogo Raa. Wo kaye toŋ toogadey baata aa ki yode kono ay lekkiyo kettiyo kaŋ soo ti yode. Wo de ti yode ay di lekkey zeere a diinaguŋ t'urzi toogo Raa.

⁵Kune batum kun t'elkito, wo kun ti wollo kune'ŋ ki kotto a urzi zaapu k'adduguŋ a Isa dey ko? Kunuŋ kun ki suune ye ko Isa Almasi yi lekkiyo adda k'adduguŋ me? Para maŋ duwo an k'aana an ki ti'n wolla ye suldi doŋ i-kaza, kune kun seedu zakidi a urzi zaapu k'adde a Isa me.

⁶Wo de n'elkiyo kun suune, kaye ay un ti gize ay seedu zakidi a urzi zaapu k'adde a k'Isa me.

⁷Kaye ay ton-diyo Raa kono munda ulsu soo toŋ kun ki d'ise ye. Ay rootiyo iŋkino, kono ay ki dehu ay ki kize tuddey kaye ki diine ye, wo de ay dehu kun d'ise daayum beehiyko, ise duwo an rootiyo ay ki seedu zakidi a urzi zaapu k'adde a Isa ye toŋ maŋ.

⁸Ki kotto kaye ay k'aane ay i ki t'eegire ye a derec ki Raa te, wo de ay di nooge noogiyo derec ki Raa te.

⁹Aame tuuku kune'ŋ toogo wo kaye toogadey baata toŋ, ulbey i d'isiyo unse. Geŋ munda wede kaye ay ton-diyo Raa, kono y'un di'n oodibe delele a urzi zaapu k'adduguŋ a Isa.

¹⁰Kono kamo aŋkeŋŋo nuŋ dokki ti kune, geŋ n'un di raaniya mattup ettiyo, kono saŋ onniyo ere n'iiney di kune maŋ, kun ti gime lekkiyaguŋ wo n'un ki d'isey wehini ye a urzi toogo ere Galmeega y'o ele gette, y'o ele urzi ki noogiyaguŋ kun di t'ihira a urzi zaapu k'adde a Isa, ki daggiyaguŋ ye.

¹¹Iŋkino ki daŋgu zamba ki nuŋ, kun lekko t'un-suwo, kun i oolo tudduguŋ a Raa y'un di'n oodiba delele, kun elo kooke ti tudduguŋ, kun lekko onamguŋ soo, wo kun lekko ti toose, iŋkino Raa wede ki geyyiso wo ki toose geŋ y'a koona ti kune.

¹²Kun t'eesito tudduguŋ kaŋ bey sire sire aa zamba, wo doŋ ki Raa pay a enno, an un t'ize toose.

¹³Beeko ki Galmeega Isa Almasi, geyyiso ere ki Raa, wo lekkiyo ere kettiyo kaŋ soo in d'ede t'urzi k'Unde Kamilen gette i koona ti kune pay.

Galat

Galat 1

Toose ki Pool a doŋ Galat

¹⁻²Mattup ette i raaniya nuŋ Pool wede zina k'Isa, ti zemba pay i ziipe addaŋ a Isa doŋ ti nuŋ, ay un t'ize toose a kune doŋ ogiysito ti suma k'Isa a siido Galat. Naabo ette ni t'uune t'urzi duwo ye, i n'igibo wedusu ye ni d'isiyo me, oo t'elo Isa Almasi ti Meega Raa wede a bilde Almasi ti diine doŋ unto.

³Geŋ beeko ti toose ki Meegiŋ Raa ti Galmeege Isa Almasi i koonaa eggun.

⁴Yode wede y'a iili tuddi, y'a inda k'oldikadiŋ, wo y'in di'n udfde ti suldi doŋ ulpi ki duniya. Y'ize iŋkino aa Meegiŋ Raa yi dehu.

⁵Tamma t'a koone a yode ki daayum! Eyye.

Rabila Majjaanawa soo danjal

⁶Nuŋ n'a ziiida giggiró kono Raa wede unni wiike ti beeko ere k'Almasi kun d'iili, kesiko kun di-gime k'ume rabila majjaanawa ere ti doolo,

⁷kaciŋ rabila majjaanawa ti doolo umbo. Wo doŋ ede an isiyo an un ti'n dagge, Rabila Majjaanawa ere k'Almasi an dehu an ti-kime ti doolo.

⁸Iŋkino maŋ ise kaye batum, wenda ti doolo, ise maaleeka ti kandaane toŋ maŋ, y'un gizita rabila majjaanawa ti doolo aa ere ay un ki gizite ye maŋ, yode geŋ duudiyo Raa t'a koonaa eedi!

⁹Kaye ay un ruute ti poone, aŋkeŋ n'a-di doole sey, aame wenda y'un gizita rabila majjaanawa ere ti doolo aa ere kun uune ti kaye ye maŋ, yode geŋ duudiyo Raa t'a koonaa eedi!

¹⁰Wo kune kun elkiyo ni riije iŋkino kono duwo an di n' t'imma ko? Aha, iŋkino ye! Ni dehu a ni t'imme Raa. Kun elkiyo miŋ, nuŋ ni dehu n'a t'ise wede beehiye a eda duwo ko? Aha, iŋkino ye! Aame ni dehu n'a t'ise beehiye a eda duwo sey maŋ, ni ki t'ise wede naabo k'Almasi ye.

Pool yi t'ize wede zina k'Isa

¹¹Zemba ki nuŋ, ni dehu n'un di roote: Rabila Majjaanawa ere n'un gizite gette, ni k'illiga ti bize wedusu ye,

¹²wo wenda y'o ki gizite ye, yi ki n' duuye ye. Tode gette Isa Almasi batum y'o iidiiba ita.

¹³Wo kune kun ti suune lekkiyadó ere ti kaaga te, aame nuŋ ni daaniya urzi k'oogoro Yawudiyagi me. Nuŋ doŋ ki Raa ogiysito ti suma k'Isa n'anni dibire baadaŋ wo ni dehu n'an uute.

14Wo t'adda diine daamayó Yawudiyagi, nuñ n'aa di jiiire ki daaniya k'oogoro me, n'a ziiida zakidí t'addó pay a oogoro monjidagó te.

15Wo kaciñ Raa yi ni biire t'ume t'adda k'adde meedó to, y'o d'ele beekadí y'a ti n' wiike kono ni-di naabe.

16Aame onniyo ere Raa yi dihe t'iina mañ, Ulí y'o di y' gize n'a yi zuune, kono n'an di kizite rabiladí a ñoñ Yawudiyagi ye. Aame geñ ni ki tunde wede tudde ye,

17ki Zeruzalem toñ ni k'iide ye, n'a wollo ñoñ zina k'Isa ñoñ ti poone ti nuñ me. Tiñ geñ miñ n'a iñgile baa, n'a iñgile siido k'Arabi, sañ n'a-gimo ki geeger Damas.

18Îide ozzine ađo mañ, n'aa t'iide Zeruzalem kono ay di suuno tuddey ti Piyer. Ni likko ti yode suuk sire,

19wo wede zina k'Isa Almasi ti doolo n'aa ki wullo ye, ni wullo Zak leema Galmeega ñaṅṅal.

20Ono ñoñ n'un raaniya eñ, ki kotto lohito ye, Raa toñ yi suune.

21Sañ mañ ti Zeruzalem n'a iñgile ki siido Siiri ti Silisi.

22Zemba ñoñ ogiysito ti suma k'Almasi a siido Ziide toñ, t'ersadañ an ki n' wulle ye.

23An ollige miñ ñuwo an rootiyo a tukki nuñ, an'de: «Wede in di'n dibire ginno, aṅkeñ yi-gime, yi kazita Rabila Majjaanawa a urzi zaapu k'adde a Isa, ere ti poone yi ki dehu yi ki t'olliga ye geṅṅo.»

24Aame an illiga iñkino mañ, an tamma Raa kono nuuno.

Galat 2

Pool ti ñoñ naabo k'Almasi ongoñ

1Aame îide ozzine koomat makumu piđe mañ, n'a gime ki Zeruzalem sey kaye ti Barnabas, wo n'aa di wiike Tit pây.

2Nuñ n'iide kono Raa y'o ruute n'a ette. Aame ay iiney mañ, n'an ugiye deero ki ñoñ ogiyo ti suma k'Isa siidey, mañ n'an t'iide taaya a urzi Rabila Majjaanawa ere ni kazita a ñoñ Yawudiyagi ye. N'a t'ize iñkino kono ni ki dehu naabo ere n'ize wo ere n'isiyo ette, i-ki t'eñgile ki bita ye.

3Tit wede iide ti nuñ geñ yoñ Girek, wo kane deero geñ an ki y'ize ki toogo ye y'a walda ponde me.

4Wo ñe i d'ede zemba ñoñ an'de kane an ziipe addaṅ a Isa, kaciñ an ki ziipe addaṅ ye, an dehu Tit y'a walda ponde. An t'iide diinayey aa ñoñ woliyo k'itadey, an dehu an ay ti'n dagge, kaye ñoñ eedey toore me. Ay t'ize eedey toore

geŋ t'urzi k'Isa Almasi, wo kane an dehu an ay ti'n kime k'adda buliko ere a urzi k'oogoro Muusa sey.

⁵A doŋ geŋ kaye ay an di-tuuge, urzi booloŋ toŋ ay an k'iili ye, kono kaye ay dehu derec ki Rabila Majjaanawa gette t'a lekke a diinaguŋ.

⁶Wo kane doŋ geŋ a eda duwo kane deero toŋ — a nuŋ deerikadaŋ ere ti poone gette ki bita, kono Raa y'inni wolliyo kine pay miŋ kaŋ soo — kane doŋ a eda duwo kane deero geŋ, a nuŋ munda an ki ruute ye ti doolo me.

⁷Wo kaciŋ an wulle maŋ an zuune, derec Raa y'o ele a beezó naabo kazita Rabila Majjaanawa a doŋ Yawudiyagi ye, aakede Raa yi ele a bey Piyer naabo ki kazita a Yawudiyagi.

⁸Derec, Piyer Raa yi y'ize wede zina k'Isa y'a-y'igibe ki tukki Yawudiyagi, iŋkino nuŋ toŋ Raa y'an ize wede zina k'Isa y'an-igibe ki tukki doŋ Yawudiyagi ye.

⁹Zaŋ, Zak wo Piyer geŋ, duwo an'ni suune kane deero ki doŋ ogiyso ti suma k'Isa. Kane geŋ an zuune naabo gette ki kotto Raa y'o ele ti beekadí. Ay di-gitte onamey kaŋ soo, wo ay a-ti zidde bey ki toose, i-kaza ay lekkiyo kettiyo kaŋ soo. Iŋkino maŋ nuŋ ti Barnabas ay d'iŋgile ki tukki doŋ Yawudiyagi ye, wo kane aŋ Piyer an d'iŋgile ki tukki Yawudiyagi.

¹⁰Wo an ay di ruute an'de ay a d'elkoy a doŋ an k'ede munda ye, wo nuŋ gettiŋ naabadó ere n'isiyo t'adde soo to.

Pool y'aapuđu Piyer

¹¹Onniyo Piyer y'iide ki geeger k'Antiyos siido Siiri geŋ, y'aaze munda wede ulsu, iŋkino n'a y'iipide a daana doŋ pay i t'ugiye.

¹²Zak geŋ yi d'igibo zembá, wo ki poone an d'aana geŋ Piyer yi d'ombo kaŋ soo ti zembá doŋ Yawudiyagi ye me. Wo aame zembá geŋ an iina maŋ, Piyer y'aa t'irga ombo ti kane y'a iili, kono y'orgiso a zembá Yawudiyagi.

¹³Maŋ kane Yawudiyagi oŋgo toŋ bizaŋ a t'ize sire sire aa ki Piyer. Iŋkino maŋ yode Barnabas toŋ yi wulle naabadaŋ ere an ize gettiyo maŋ, y'a-t'ize aa kane.

¹⁴Aame ni wulle naabadaŋ a ki t'iide a derec ere ki Rabila Majjaanawa ye maŋ, n'a t'iiziga, n'a t'ihira a daana doŋ pay, wo ni di ruute Piyer, n'ede: «Kee Yawudusu, wo aŋkenno lekkiyadá aa ki doŋ Yawudiyagi ye, ki ki lekkiyo ye aa ki doŋ Yawudiyagi me. De mummino ki dehu k'a ti'n kime ki toogo zembá doŋ Yawudiyagi ye, an di lekke aa ki Yawudiyagi doo miŋ kollo me?»

¹⁵Kaye ay suune Yawudiyagi miŋ kaye! Kaye soo ye ti doŋ Yawudiyagi ye, doŋ ay'ni waaku doŋ k'oldiko me!

¹⁶Ki too maŋ in i suune duwo Raa y'anni wolliyo ki diine a daanadí t'urzi daaniya k'oogoro Muusa ye, wo de y'anni wolliyo ki diine a daanadí t'urzi zaapu

k'adde a Isa Almasi ɗaɗɗal. Wo kaye toɗ ay ziipe addey a Isa Almasi, kono Raa y'ay di'n wolle ki diine a ɗaanadi t'urzi zaapu k'adde a Almasi, t'urzi daaniya k'oogoro Muusa ye. Derec, wenda soo toɗ umbo Raa y'a yi wolle ki diine a ɗaanadi t'urzi daaniya k'oogoro Muusa me.

¹⁷Kaye Yawudiyagi toɗ maɗ ay dehu Raa y'ay di'n wolle ki diine a ɗaanadi t'urzi beeko k'Almasi. Wo ɗe ay ize iɗkino toɗ ɗuwo an ayni wolliyo kaye ɗoɗ k'oldiko aa kane ɗoɗ Yawudiyagi ye maɗ, geɗ Almasi yoɗ wede naabo a urzi k'oldiko ko? Aha, iɗkino ye!

¹⁸Aame urzi k'oogoro Muusa ni y'iili wo k'ita maɗ n'a-kime k'addaga maɗ, geɗ ni t'ize wede a ti diipida a urzi k'oogoro geɗɗo.

¹⁹Nuɗ a oogoro gette aa n'inda kono tode batum ti n'iide, wo aɗkeɗ ni dehu n'a lekke ki Raa. Aame Almasi y'inda ekk'undumu wede zaapu t'ekki bakadi kaɗ tontilko geɗ, aa n'inda ti yode kaɗ soo.

²⁰Lekkiyadɔ ette i lekkiyo nuuno ye, i lekkiyo Almasi adda k'addɔ me. Lekkiyadɔ a duniya ette ni lekkiyo t'urzi zaapu k'adde a Ulo Raa wede yi ni giyye, yode batum y'a inda kono nuɗ.

²¹Iɗkino maɗ beeko Raa ni k'ooli ye. Wo aame t'urzi k'oogoro ɗoo miɗ k'a t'ise ki diine a ɗaana Raa maɗ, geɗ aakede Almasi y'inda ki bita.

Galat 3

Mummino kun uune Unde Kamileɗ me?

¹Kune ɗoɗ siido Galat no, kune'ɗ elkiyagun umbo! Wee wee un ti'n digge me? Para maɗ taaya k'Isa Almasi an ti y' tiike ekk'undumu wede zaapu t'ekki bakadi kaɗ tontilko an un ti ruute a ɗaanagun, kun illiga kereɗ.

²Iɗkino maɗ ni dehu n'un di'n tonde a munda soo: Unde Kamileɗ Raa y'un ele gette kono kun diine urzi k'oogoro Yawudiyagi kunun, kun illiga Rabila Majjaanawa wo kun d'umbe ko?

³A munda geɗ kune elkisagun umbo me? Ki poone kun iise t'urzi k'Unde Kamileɗ, wo aɗkeɗ kun dehu kun a-ti ɗaɗge t'urzi munda wede tudde ti dehu.

⁴Kune kun elkiyo miɗ beeko ere kun uune pay ti Raa gette, tod'te ki bita ko? Aha, ki bita ye!

⁵Kun ollo kay, aame Raa y'un ele Unde Kamileɗ wo y'aaze suldi k'armika a diinagun geɗ, y'isiyo kono kun daaniya urzi k'oogoro kunun, kun illiga Rabila Majjaanawa wo kun d'umbe ko?

Raa yi ziipe beeko a Ibirayim

⁶An riije ti kaaga adda mattup ki Raa a tukk' Ibirayim, an'de: «Yi ziipe addí a Raa, in̄kino Raa y'a yi wulle yoŋ ki diine a d̄aanadí.»

⁷Kun ollo ono en̄no: d̄oŋ i ziipe addaŋ a Raa d̄aŋŋal ita k'in̄ni k'Ibirayim me.

⁸Ti kaaga Raa yi-ti gize rabila majjaanawa gette a Ibirayim, y'ede: «Ita d̄uwo pay an t'oonaa beeko t'urzi kee.» Geŋ in̄kino an riije ti kaaga adda mattup ki Raa, d̄oŋ Yawudiyagi ye toŋ Raa y'an isa ki diine a d̄aanadí t'urzi zaapu k'addaŋ a yode.

⁹In̄kino maŋ d̄oŋ i ziipe addaŋ a Raa geŋ an uune beeko p̄ây aa k'Ibirayim wede yi ziipe addí a Raa.

¹⁰Wo d̄oŋ pay i daaniya urzi k'oogoro Yawudiyagi geŋ duudiyoo Raa a eedaŋ, kono ono eŋ an riije ti kaaga adda mattup ki Raa, an'de: «Duudiyoo Raa a wede soo daayum y'a ki ti sooru ye a suldí pay d̄oŋ an riije adda mattup k'oogoro Muusa me.»

¹¹Kine in'ni suune ono geŋ kereŋ, wede y'a t'ise ki diine a d̄aana Raa t'urzi k'oogoro umbo, kono ono eŋ an riije ti kaaga adda mattup ki Raa, an'de: «Wede Raa yi yi wolliyoo ki diine a d̄aanadí geŋ, yoŋ y'a lekka t'urzi zaapu k'adde a yode.»

¹²Derec, urzi k'oogoro ti wede ki zaapu k'adde a Raa soo ye. Wo d̄e ki oogoro'ŋ, wede y'a t'izira a urziyagi k'oogoro pay geŋno maŋ, t'urzi geŋ y'a lekka.

¹³Para maŋ kono k'oogoro Muusa gette kine duudiyoo Raa a eediŋ, in̄kino maŋ Isa Almasi batum y'a iido, y'a t'umbe duudiyoo kine wo i-d'uupe eedí, in̄kino y'in di'n ud̄de ti duudiyoo gette. Geŋ ono eŋ an riije ti kaaga adda mattup ki Raa, an'de: «Wede tuuku an ti y' dod̄d̄iyoo ekk'undumu geŋ, duudiyoo Raa a eedí.»

¹⁴Geŋ a t'ize in̄kino kono t'urzi Isa Almasi, beeko ere Raa yi ruute yi t'ela a Ibirayim a-teepe a d̄oŋ Yawudiyagi ye pay. Geŋ kine toŋ t'urzi zaapu k'adde a Isa in d'uune Unde Kamileŋ ere Raa yi ruute y'in t'ela te.

Oogoro ti ono d̄oŋ Raa yi ruute y'aasa

¹⁵Zemba ki nuŋ, n'un di rooto munda wede a urzi lekkiyadiŋ ere aŋken̄no: Aame wede yi t'aahe k'unto geŋ, onamí d̄oŋ yi riije a urzi dokkide laalayí, wenda yi k'aane yi ki ti'n latte ye, wo y'a k'on̄ke munda ti doolo ye.

¹⁶Geŋ in̄kino ki ono d̄oŋ Raa yi ruute y'aasa a Ibirayim wo k'eda k'in̄nizí toŋ maŋ. Ti kaaga adda mattup ki Raa, an ki riije ye «a tukk'ita k'in̄nizí pay», aakede a kane baadaŋ geŋ me. Wo d̄e an riije «a tukk'ulo soo t'ita k'in̄nizá», geŋ i-kaza ti uloo wede soo, yoŋ Almasi.

¹⁷Onamó en̄no d̄oŋ ni dehu n'a roote me: Ki poone Raa yi gitte taasawa ti Ibirayim t'urzutú. Saŋ iide ozzine meeda pide uto ada g'ado maŋ, Raa yi-

d'ele oogoro a Muusa. Injino maŋ oogoro gette ti k'aane ti ki t'ide taasuwa gettiyo ye, para maŋ ono doŋ Raa yi ruute y'aasa geŋ a t'isa ki bita.

¹⁸Wo aame suldi doŋ Raa yi boohiyo a doŋzi geŋ ki'ni t'oone t'urzi k'oogoro maŋ, geŋ i-kaza suldi'ŋ ki'ni t'oone t'urzi k'ono doŋ Raa yi ruute y'aasa ye. Wo ki too maŋ, Raa yi-ziipe beeko a Ibirayim t'urzi k'ono doŋ yi ruute y'aasa.

¹⁹De injino maŋ, ki moo me Raa y'a elo oogoro a Yawudiyagi me? Oogoro gette Raa yi t'ele kono t'in di kize doopidadiŋ ere a urzizi, bini aaniya k'ulo ti biza bumbu k'Ibirayim wede Raa yi ruute y'a yi t'igibo. Oogoro gette yi t'ele ti bize maaleekiyagi, wo wede i konso diinayaŋ y'an di ruute.

²⁰Wo aame munda ki wede soo maŋ, geŋ i ki dehu wede y'a ki koone a diine ye. Raa yoŋ soo daŋŋal wo y'aane.

²¹Geŋ i-kaza oogoro gette dokki ko ti ono doŋ Raa yi ruute y'aasa me? Aha, dokki ye! Aame oogoro gette Raa yi t'ele t'an t'ele lekkiyo a duwo maŋ, geŋ wede y'a aane y'a t'ise ki diine a daana Raa t'urzi k'oogoro me.

²²Derec, an riije ti kaaga adda mattup ki Raa, doŋ a duniya pay eŋ adda k'oldiko, injino Raa y'a elo munda wede yi ruute y'an t'ela a kane doŋ i ziipe addaŋ a Isa Almasi t'urzi zaapu k'adde a yode.

²³Ki poone urzi zaapu k'adde a Isa y'a aana geŋ, kine daŋgay a urzi k'oogoro bini onniyo ere Raa yi'n t'iidiba ita a urzi zaapu k'adde a Isa.

²⁴Injino maŋ oogoro gette t'a guune ere boohiyadiŋ, bini aaniya k'Almasi, kono t'urzi zaapu k'adde a Raa y'in di'n isa doŋ ki diine a daanadi.

²⁵Ankeŋ onniyo ki zaapu k'adde a Almasi t'iina geŋ, kine ti dandi k'oogoro ye baa.

Inni Raa

²⁶Derec, t'urzi zaapu k'adde a Isa Almasi wo ti lekkiyo ere kettiyo kaŋ soo ti yode geŋ, kune pay kun t'ize inni Raa.

²⁷Injino maŋ kune pay kun ti zuyye batem geŋ kun aa ti gitte kaŋ soo t'Almasi, kun t'usse Almasi.

²⁸Geŋ ahuntu tudde umbo: Eŋ Yawudusu eŋ Yawudusu ye, eŋ bule eŋ bule ye, eŋ kule ette erewo umbo. Kine pay miŋ soo in lekkiyo kettiyo kaŋ soo t'Isa Almasi.

²⁹Aame kune ki Almasi maŋ, geŋ kune ita k'inni k'Ibirayim, wo kune i koono a suldi doŋ Raa yi boohiyo a doŋzi, a-t'etta a ono doŋ yi ruute y'aasa me.

Galat 4

¹⁻²Ono ni dehu n'a roote enno: Ulo wede i koonaa a korbite meegí geɗ, aame yoŋ ulo botto, lekkiyadií aa bule a daana doŋ i yi dokkiyo wo i y'eeriyo korbite meegí me, ise korbite pay geɗ saŋ ki yode toŋ maŋ. Wo yi d'ollige onamaŋ bini onniyo ere meegí yi ruute a t'ída.

³Kine toŋ iŋkino kay, aame kine aa inŋi botto geɗ, in lekkiyo adda buliko k'undiyagi doŋ toogo i-dokkiyo duniya.

⁴Wo aame onniyo ere Raa yi ruute t'íide maŋ, y'a t'igibo Ulí an di y'ehe adda duniya t'urzi k'erewo, wo i di y' dokkiyo oogoro Yawudiyagi,

⁵kono y'in di'n adde kine doŋ adda daŋgay in i dokkiyo oogoro gettiyo, wo y'in di'n ise inŋi Raa.

⁶Ki kotto kune kun t'ize inŋizí, iŋkino Raa y'a igibo Unde k'Ulí ti-t'íide adda k'adde kine pay, ti-dolle: «Abba!» I-kaza Meegó.

⁷Iŋkino aŋkenno kee bule ye baa, kee uló geɗ, suldi doŋ Raa yi boohiyo a doŋzí, kee toŋ adda t'urzi beekadií.

Pool ulbí oodiyo a tukki doŋ Galat

⁸Ti kaaga Raa soo daŋŋal kun ki y' zuune ye geɗ, kun di lekkiyo adda buliko ere ki raayagi doŋ ki kotto kane ki bita.

⁹Wo aŋkenno Raa kun yi zuune, wo ay di roote yoŋ y'unni zuune ti poone too. Wo de mummino kun di-kime ki tukki undiyagi doŋ ki bita toogadaŋ baata i-dokkiyo duniya, wo kun t'ise bulagi sey me?

¹⁰Kun di daaniya ita suldi doŋ aakede: onniyo k'oholo, aagulu tere, teddari tarnaapagi, wo tarnaapagi doŋ adda k'ozzinagi.

¹¹Nuŋ ulbó oodiyo a kune, kono a naabo ere n'ize pay a diinaguŋ gette a t'isa ki bita.

¹²Zemba ki nuŋ, n'un di'n tondo ti obe bey, kun lekko aa ki nuuno, kono nuŋ ni t'ize aa kune. Kune munda ulsu soo toŋ kun o k'ize ye.

¹³Kun elko, aame nuŋ tuddó eeni geŋno n'un gizite Rabila Majjaanawa ki poone me.

¹⁴Ki too maŋ kune a tuddó gette kun di n' kiigira kun ti n' kime, wo iŋkino kun ki d'ize ye. Wo de kun di n' ziida bey sire aakede maaleeka Raa wo aa Isa Almasi batum.

¹⁵Aame geɗ ulbuguŋ unse baadaŋ, aakede i t'ise maŋ edaguŋ toŋ, kun t'odfipe kun o t'ele. Wo de ki moo me aŋkenno iŋkino ye me?

¹⁶Wo aŋkeŋ n'a t'ize wede k'aduguŋ kono ni rootiyo ono doŋ derec ko?

¹⁷Kun ollo, kane an un ti'n argu k'urzi wede ti doolo geɗ, an dehu kun an di'n daane wo de kane elkisadaɗ oldo. An dehu an un di'n arga ti tuddó, wo a t'ise kane batum doɗ kune kun di daane me.

¹⁸Enno munda wede beehiye me, suldi doɗ beehiye'ɗ i dehu kun seeda daayum zakidi eego, aame nuɗ a diinaguɗ doo ye.

¹⁹Inni ki nuɗ, kono kune geɗ addó i ni kakkisa aa n'un ti'n t'ehe sey, wo addó a ni kadiwa daayum bini kune kun t'isa zakidi aa yode Almasi.

²⁰Ki too maɗ nuɗ ni dehu n'a ette ki tudduguɗ, n'un di roote ono doɗ ni dehu n'a roote kun d'olliga golladó. Wo ankeɗ, kono kune geɗ munda n'a t'ise ni ki suune ye.

Saara ti Agar

²¹Kun oo ki ti rooti doo, kune doɗ kun dehu un di'n dokke oogoro do geɗ, oogoro gette ti rootiyo munda kun suuniyo dey ko?

²²Derec, ono eɗ an riije ti kaaga adda mattup ki Raa, an'de: «Ibirayim i-d'ede inni sire, uli soɗ ki eddi ere bulowo, wo soɗ ki eddi ere uto siido.»

²³Ulo bulowo geɗ ti y'ehe a urzi tudde, wo de ulo ki ere uto siido inkiyo ye, ti y'ehe a-t'iide a ono doɗ Raa yi ruute y'aasa.

²⁴T'urzi k'erayi sire eɗ Raa yi dehu y'a roote munda. Agar ti Saara, kane geɗ i-kaza ita taasuwa sire doɗ Raa yi gitte ti duwo. Bulowo Agar gette i-kaza taasuwa ere Raa yi gitte ti Muusa ekki makkolo sundutu Sinayi, innitú kane bulagi.

²⁵Agar gette aa makkolo Sinayi a siido k'Arabi, wo tode gette aa geeger Zeruzalem ankenno. Kane doɗ pay i lekkiyo adda geɗ, kane bulagi k'oogoro.

²⁶Wo Saara gette aa Zeruzalem ki Raa t'awwa, tod'te uto siido, wo tode meediɗ te.

²⁷Ono eɗ an riije ti kaaga adda mattup ki Raa, an'de: «Koɗ ere karta mi k'ehiyo ye, ulbi i iso unse! Koɗ ere dabar k'ehiyo mi k'uwwa ye, mi yililo! Derec, inni ki ere an t'iili sittu an d'aagila baadaɗ a ceera inni ki ere kulatu a daanatu.»

²⁸Zemba ki nuɗ, kune aa Isaaka ti kaaga, kun t'ize inni doɗ a ehiyo ere a-t'iide a ono doɗ Raa yi ruute y'aasa.

²⁹Derec, ti kaaga ulo bulowo an y'ehe a urzi tudde geɗ, yi d'okko maade k'ulo wede Saara ti y'ehe t'urzi k'Unde Raa. Geɗ ankenno toɗ, kine inkiyo kay.

³⁰Wo k'a elko a ono doɗ an riije ti kaaga adda mattup ki Raa, an'de: «Bulowo ki-t'olmu ti ulutu me, kono boy meega i k'ooma yode ye, ooma ulo wede k'uto siido.»

³¹Inkino maɗ zamba ki nuɗ, aɗkenno kine inɗi bulowo ye, wo de kine inɗi k'uto siido.

Galat 5

Almasi y'in ti'n ize eediɗ toore

¹Kine Almasi y'in ti'n uɗde t'adda buliko k'oogoro tod'te aa sibe a golladiɗ, kono kine ki kotto in di lekke eediɗ toore. Inkino maɗ kun a soodo zakidi, kun ti kima k'adda sibe genno ye baa.

²Kun ollo koduwo, un rootiyo eɗ nuɗ Pool: aame kun dehu kun di walda ponde doo maɗ, geɗ aakede Almasi y'ize naabadí pay gette, a kune ki bita.

³Wo nuɗ n'un di rooto sey wede tuuku yi wilda ponde aakede oogoro Yawudiyagi ti rootiyo maɗ, y'a-t'oziro eego pay urziyagi k'oogoro me.

⁴Kune doɗ kun elkiyo t'urzi daaniya k'oogoro, Raa y'un di'n wolla doɗ ki diine a daanadí maɗ, geɗ kune kun ti lidde ti Almasi wo dokki ti beeko Raa te.

⁵Wo kaye, ay ziipe elkisadey a Raa, yoɗ y'ay di'n isa doɗ ki diine a daanadí. Geɗ munda wede kaye ay delliyo ti toogo k'Unde Kamileɗ tod' ti naabiya t'urzi zaapu k'adde a Isa.

⁶Ki wede i lekkiyo kettiyo kaɗ soo t'Isa Almasi geɗ, ise yi walda ponde, yi ki walda ye toɗ, a ki y' nooge ti munda ye, i jiiere zaapu k'adde a Raa ere ti naabatú a urzi geyyiso.

⁷Ti poone kun okko beehiye a urzi k'Almasi me. Wo de aɗken un fhira wee wee, y'un t'iigire ki daaniya k'ono doɗ derec ki Raa me?

⁸Inkino maɗ wede un fhira geɗ, onamí i k'iido'ɗ ti Raa wede unni wiike genno ye.

⁹Geɗ aakede duwo an rootiyo, orme booloɗ daɗɗal geɗ miɗ gododo baadaɗ yi-ti t'oozige pay.

¹⁰Nuɗ ni ziipe addó a Galmeega kono kune y'un ki'n oola, kun ki t'amba urzi doolo ye. Wo de wede lattiya diinaguɗ geɗ, y'aase tuuku toɗ maɗ, booro Raa t'a yi seeda.

¹¹Zamba ki nuɗ, ki nuuno aame ni kazita a duwo waldu ponde beehiye maɗ, inkino ki moo me an ni dabirsa me? Aame ni kazita inkino maɗ, unto k'Almasi ekk'undumu wede zaapu t'ekki bakadí kaɗ tontilko gette ki bita, a duwo a ki t'ise morkolo morkiye ye.

¹²Doɗ lattiya diinaguɗ geɗ, an wolliyo urzi waldu ponde beehiye maɗ de, an ti dekkó ti dussimayi pay.

Tudde wo Unde Raa

¹³Zemba ki nuɗ, kune Raa y'un ti'n wiike kun di lekke eggun toore, wo kune eggun toore geɗ un ki t'ise urzi k'isiyo suldi don ulpi tudde ti dehu ye. Ki too maɗ t'urzi geyyiso kun naabo ti tuddugun.

¹⁴Derec, to oogoro pay gette a-t'iide miɗ a ono soo, ono don an'de: «Ki geyyo bakadaa aa ki geyyiso tudda batum.»

¹⁵Wo de aame kun isiyo aa seydi balda an t'ahutu tuddan wo an a-t'aadumu maɗ, geɗ kun koono mentikagi, para'ɗ kun di latta lekkiyagun.

¹⁶Kono kamo n'un di rooto, kun i oolo tuddugun a Unde Raa t'un di'n dokke, inkiyo kun ki d'isa ye suldi don ulpi tudde ti dehu me.

¹⁷Derec, suldi don tudde ti dehu geɗ, i k'ettiyo soo ye ti suldi don Unde Raa ti dehu me. Wo suldi don Unde Raa ti dehu geɗ, i k'ettiyo soo ye ti suldi don tudde ti dehu me. Kane sire geɗ aakede an gede t'awili, inkiyo kun k'aane kun ki t'ise ye munda wede kun dehu kun d'ise me.

¹⁸Wo de aame unni dokkiyo Unde Raa maɗ, geɗ kune bulagi k'oogoro Yawudiyagi ye baa.

¹⁹In'ni suune suldi don tudde ti dehu t'aase me, aakede: boliyo, pitiniko, naapu,

²⁰daaniya longayi, kombidiko, koogire tudde, ono k'ulpi, kolbiso, kulkiso i ceeriyo eego, kama tudde k'ita, niikiyo wo ahuntu tudde,

²¹zaapu k'adde a munda wedusu, sobito ti ombito i ceeriyo eego i-t'eliyo isiyo suldi don kaca kaca, wo suldi ti doolo ton ede i'ni deeyiso me. Nuɗ n'un di rooto aakede n'a ruute ki poone, don isiyo inkiyo geɗ an k'etta ye ki Moziko Raa te.

²²Wo ettiyo naabo ere Unde Raa t'isiyo adda k'adde wedusu me: geyyiso, unsuwo, toose, ombine, beehiyko, seedu zakidi a munda,

²³adde tasse, wede y'a seeda tuddi. Oogoro ti ki rootiyo k'ulsuko ye a tukki suldi geɗ me.

²⁴Kane don ki Isa Almasi, suldi don ulpi tudde ti dehu wo ti naapu geɗ, aa an ti'n tiike kan soo ti yode ekk'undumu wede zaapu t'ekki bakadi kan tontilko.

²⁵Kine in uune lekkiyo t'urzi k'Unde Raa, inkiyo in i oolo tuddin a Unde Raa t'in di'n dokke.

²⁶In ki kili tuddin ye, essiyo ti tuddin ton ulu, wo in zaape addin ye a munda bakadin me.

Galat 6

Sarkiya k'attifi ti tudde

- ¹Zemba ki nuɲ, aame kun wulle wede y'a ti diipida urzi Raa maɲ, kune doɲ un ede Unde Raa geɲ kun ti y' kami k'urzi wede ki diine, wo kun i rooto ti golla ere tasse. Ni rootiyo eɲ a kune wede y'ette kama bakadí geɲ, y'a elko tuddí kono yode toɲ y'a-ki t'ooro adda naamiya daggiya aa ki bakadí ye.
- ²Kun noogo tudduguɲ a sarkiya k'attidi wede un d'ede. Kun isiyo inɲkino maɲ, geɲ kun a ti sooru a oogoro k'Almasi.
- ³Aame wede y'elkiyo yoɲ wedusu duuru wo kaciɲ yoɲ ki bita maɲ, geɲ yi ti daggiya tuddí batum.
- ⁴Inɲkino wede tuuku toɲ yi wollo naabo k'aggadí. Inɲkino adda naabadí gette, munda ulbí i-d'ise uɲse ede maɲ, y'iso a naabo k'aggadí, y'a ki dooze ti naabo doɲ doolo ye.
- ⁵Derec, wede tuuku toɲ yi t'ídey taaya naabadí k'eedí k'eedí a daana Raa me.
- ⁶Wede uune dooyiso a urzi k'ono Raa geɲ, suldi doɲ i-d'ede y'a t'ele a nooge wede i ele dooyiso geɲno.
- ⁷Kun ollo, kune'ɲ wenda soo toɲ y'oola elkisadí ti ti y' dagga ye, okko maade Raa umbo. Buzu wede ki giira geɲ, k'a t'ayda miɲ yode.
- ⁸Geɲ inɲkino kay wede y'ooliyo tuddí k'isiyo suldi doɲ ulpi tudde ti dehu geɲ, y'a t'oono munda wede tudde t'eliyo, wo tod' t'eliyo unto. Wo wede y'ooliyo tuddí a naabo ere Unde Raa ti dehu geɲ, y'a t'oono munda wede Unde Raa t'eliyo, wo tod' t'eliyo lekkiyo ere ki daayum.
- ⁹Inɲkino maɲ in iso daayum beehiyo, in t'orme ye. Derec, onniyo ere Raa y'ele gette t'iina maɲ, aggadiɲ in di-t'ooney, aame in k'urma ye maɲ.
- ¹⁰Anɲkeɲno peedo to ede botto t'a ki t'iire ye geɲ, in iso beehiye a doɲ pay, wo a jiire a zemba doɲ i ziipe addaɲ a Isa.

Ono doɲ ki dangu

- ¹¹Kun wollo raaniya ere deero ette, i riine nuɲ Pool batum ti beezó.
- ¹²Kane doɲ an un isiyo ki toogo kun di walda ponde do geɲ, kane an dehu majjaanika a daana duwo, kono munda wede an dehu'ɲ duwo an gi di'n dabire ye a urzi k'unto k'Isa Almasi ekk'undumu wede zaapu t'ekki bakadí kaɲ tontilko me.
- ¹³Kane doɲ i wilda ponde toɲ a urzi k'oogoro an aa ki ti sooru eego ye, wo de an dehu kune kun di walda ponde kono an di t'imme tuddaɲ kune ti kane.
- ¹⁴Ki nuuno, ulbó o k'isiyo uɲse a munda doolo ye, o isiyo uɲse a unto ki Galmeegiɲ Isa Almasi ekk'undumu wede zaapu t'ekki bakadí kaɲ tontilko

ɗaŋŋal. Injino maŋ t'urzi k'unto k'Isa ekk'undumu, sulɗi duniya a nuŋ o-t'ize aa munda ki bita, wo nuŋ toŋ n'a t'ize aa wede unto a sulɗi duniya me.

¹⁵Injino maŋ ise wede i wilda ponde, i ki wilda ponde ye toŋ, i k'ise munda ye. Munda wede a jiiire, wedusu Raa yi y'ize aware.

¹⁶A kane ɗoŋ i daaniya ita k'ono eŋŋo, wo ti kane ɗoŋ k'Izirayel ki Raa pây geŋ, toose ti isiyo k'adde koɗuwo ere ki Raa i koonaa eedaŋ.

¹⁷Ti aŋki eŋ, wenda soo toŋ y'o roota munda ulsu ye baa, kono malkuwagi a tuddó eŋ ki bita ye, i-kaza nuŋ a Isa Almasi.

¹⁸Injino maŋ zamba ki nuŋ, beeko ki Galmeegiŋ Isa Almasi ti lekko ti kune pay. Eyye.

Epez

Epez 1

Toose ki Pool

- ¹Mattup ette i raaniya nuŋ Pool wede zina k'Isa Almasi, aa Raa yi dehu, a kune doŋ ki Raa a Epez wo kun seedu zakidí a urzi lekkiyo kettiyo kaŋ soo t'Isa Almasi.
- ²Geŋ beeko ti toose ki Meegiŋ Raa wo ti Galmeega Isa Almasi i koonaa egguŋ.
- ³In amma Raa, Meeki Galmeegiŋ Isa Almasi, y'in d'ele beeko ere pay iido ti kandaane t'urzi k'Unde Raa kono kine in lekkiyo kettiyo kaŋ soo t'Almasi.
- ⁴T'urzi k'Almasi Raa y'inni biire a yode ti poone t'ume y'a okkima duniya botto too, kono in di lekke doŋ kamileŋ, daa k'oldíko munda a edayí me.
- ⁵Ti geyyisadí Raa yi dihe ti poone too y'in di'n ise inŋizí t'urzi k'Isa Almasi. Geŋ a beehiykadí yi dihe y'in di'n ise inŋino me,
- ⁶kono in di t'imme goolikadí ere meeda, wo beekadí ere y'in elo ti mozuwo kono in lekkiyo kettiyo kaŋ soo ti Ulí yoŋ yi y' giyye baadaŋ.
- ⁷Raa y'in ti'n udde t'adda k'oldíko ti puuzo ere k'unto k'Ulí, in d'uune tambobino a doopidadiŋ ere in aa ti diipida a urzizí. Geŋ Raa yi dehu y'in di k'ize laale wede baadaŋ ki beekadí.
- ⁸Raa ti beekadí ere daa dooziyo gette, y'in d'elo suuniyo k'ono wo ti eego soodo a elkiso pay,
- ⁹kono in di suune munda wede ti kaaga ombide geŋŋo, munda wede yi dihe y'aase ti poone t'urzi k'Isa Almasi.
- ¹⁰Aame onniyo t'íida maŋ, y'a-t'ogiya suldí doŋ pay y'ikkima, ise a kandaane ise a siido toŋ, a t'isa mozigo soo yode Isa Almasi, gettiyo elkisadí te.
- ¹¹Raa y'isiyo suldí pay aa addí i dehu, inŋino maŋ y'inni biire aa yi dihe ti poone too in t'ise doŋzí, kono kine'ŋ in lekkiyo kettiyo kaŋ soo t'Almasi geŋ, aggadiŋ toŋ ede a suldí doŋ Raa yi ruute y'in t'ela me.
- ¹²Y'ize inŋino kono kine doŋ ki poone in ziipe elkisadiŋ a Almasi geŋ, in di t'imme goolikadí ere meeda.
- ¹³Kune toŋ kun ziipe adduguŋ a Almasi aame kun illiga ono doŋ d'erec, Rabila Majjaanawa ere un d'ele uttiyo. Inŋino maŋ Raa y'un d'ele Unde Kamileŋ ere yi ruute ti kaaga y'an t'ela doŋzí. Tode gette munda wede y'un di'n iigire, i-kaza kune ki yode,

¹⁴gette barta ere ki poone ki suldi don Raay'in boohiyo san y'in t'ela. Suldi gen in t'oonaaame addiyadiŋ t'adda k'oldiko t'a t'iida a munda wede Raay'i dehu maŋ. Inŋkino gen in di y' t'imma kono goolikadi.

Tondiyo Raay'ere ki Pool

¹⁵Ti suldi pay gen, nuŋ n'a illiga soŋ a lekkiyaguŋ ere kun zaapu adduguŋ a Galmeega Isa, wo kun'ni geyyiso don pay ki Raay' me,

¹⁶Inŋkino ni rootiyo koduwo a Raay' daa puukiyo kono kune, a tondiyado a Raay' gette sunduguŋ ni gi di seddiyo ye.

¹⁷Ni tondiyo Raay' wede ki Galmeegiŋ Isa Almasi, yoŋ gen Meega goole a jiiere, kono y'un t'eele suuniyo k'ono ettiyo t'urzi k'Unde Kamileŋ t'un di y' kiza, kun di y' suuna koduwo Raay' me.

¹⁸Ni tondiyo Raay' sey y'un t'ohon biza k'ulbuguŋ kono kun di suune a zaapu k'elkiso ere tuuku yoŋ y'unni wiike te, wo soŋ kun di suune laale wede baadaŋ ki goolikadi yi boohiyo a donzi.

¹⁹Wo ni tondiyo Raay' soŋ kune kun di suune toogadi taŋ miibi meeda t'a jiiere suldi pay, wo mummino ti naabiya a tukki kine don i ziipe addiŋ a yode me. To toogo gettiŋ ere Raay' in di gize tuddi a kine,

²⁰wo ere a niibe a tukk'Isa Almasi, aame yi ti y' bilde ti diine don unto, y'a ti y' guune a ammidadi a mozikadi a kandaane.

²¹Inŋkino maŋ y'a ti y' ziipe goole t'ekki don pay an d'ede urzi ki dokkiyo, t'ekki don pay deero, t'ekki don pay an d'ede toogo, t'ekki mozagi pay, wo t'ekki wede tuuku sundi ti molo don adda duniya ankenno ise ere ki daana toŋ maŋ.

²²Raay' yi di'n ele suldi pay a beezi wo yoŋ t'eedaŋ. Wo y'a ti y' ziipe goole t'ekki don pay ogiyso ti sundi.

²³Kane gen tudde k'Almasi, suldi don pay adda k'addi wo a tuddi gen a tukki kane toŋ ede, yode wede suldi don pay adda k'adde wo a tudde Raay' gen a tukki yode toŋ ede kay.

Epez 2

Uttiyo t'urzi beeko

¹Kune'ŋ ti kaaga egguŋ aa unto a daana Raay' me kono kun aa ti diipida a urzizi, wo kono k'oldikaguŋ gettiyo.

²Kune ti kaaga kun likke adda k'oldiko, kun diine urzi lekkiyo duniya, kun diine ita Mohita i lekkiyo a diine kandaane ti siido, tode siitan ti naabiya ankenno adda k'adde don i-ti toogiyo a yode Raay'.

³Kine pay enno toŋ ti poone kine aa kane, in likke a lekkiyo ere oldo aa tuddiŋ ti dihe, in d'ize munda wede aa addiŋ i dihe a elkiso ere oldo gettiyo. Derec, kine t'ume k'ehiyadiŋ too miŋ kine doŋ ulpi, booro Raa t'inni ziida aa kane oŋgo pay.

⁴Wo de Raa yoŋ ôoniyo t'isiyo k'adde koduwo, iŋkino maŋ kine y'in di'n giyye baadaŋ,

⁵kine doŋ ti kaaga aa unto a daanadi kono in aa ti diipida a urzizi geŋ, Raa y'in d'ele lekkiyo t'urzi k'Isa Almasi. Geŋ ti beekadi Raa y'un di'n utte me.

⁶Kine Raa y'in ti'n bilde ti yode Almasi soo, wo y'in ti'n guune a kandaane a sirpadi kono in lekkiyo kettiyo kaŋ soo t'Isa Almasi.

⁷Raa y'in di gize beehiykadí t'urzi k'Isa Almasi, kono yi dihe y'a kize a duwo k'ozzinagi doŋ ki daana ki daayum, laale wede i jiire ki beekadi me.

⁸Derec, ti beeko ere ki Raa wo t'urzi zaapu k'adduguŋ a yode geŋ, kun d'uune uttiyo. Kane suldi pay geŋ un ele Raa, ti toogo kune ye.

⁹Uttiyo gette kun t'uune kun ki niibe munda ye, geŋ un k'ede urzi ki koliyo tudduguŋ ye.

¹⁰Derec, kine naabo yode, y'in ikkima kono in di lekke kettiyo kaŋ soo t'Isa Almasi, in di naabe naabo ere beehiye Raa y'ilke ti poone kine in d'ozire eego.

Kine pay kaŋ soo a urzi k'Almasi me

¹¹Kono kamo kune doŋ t'ume k'ehiyaguŋ miŋ Yawudiyagi ye, an unni waaku doŋ daa waldu ponde, wo kane Yawudiyagi an di'n waaku doŋ i waldu ponde, ki too maŋ waldu ponde ere an waldu gette, tod'te an isiyo a urzi tudde.

¹²Kun elko, ti kaaga kune dokki t'Almasi me, kune'ŋ doŋ ti paate, doŋ siido k'Izirayel ye. Taasuwa ere Raa yi gitte ti doŋzi wo munda wede yi ruute y'an t'ela geŋ, kune adda ye. Kun likke adda duniya munda wede kun di zaape elkisaguŋ eego umbo, kune Raa kun ki y' zuune ye.

¹³Ti kaaga kune dokki ti Raa me, wo aŋkenno kune goppon ti yode kono kun lekkiyo kettiyo kaŋ soo t'Isa Almasi, yode wede puuzadi t'ibi kono kune.

¹⁴Yode Almasi y'in d'iido toose, kono ti kaaga Yawudiyagi ti doŋ Yawudiyagi ye geŋ, kane ahuntu si-siidaŋ. Wo yoŋ y'in di'n ukkiye, olmide tudde a diinayiŋ aa waaya, t'urzi k'unto yode waaya gette y'a-dihima mentu, y'in di'n ukkiye kaŋ soo.

¹⁵Oogoro Yawudiyagi ti suldi doŋ an isiyo pay adda geŋ, y'an ize mendaŋ. Y'ize iŋkino kono yi dehu Yawudiyagi ti doŋ Yawudiyagi ye geŋ, y'an ise ita duwo soo. Kane kettiyo ti yode geŋ, an t'ize soo baa ita duwo aware. Geŋ iŋkino y'an d'ele toose.

16T'urzi k'untadí ekk'undumu wede zaapu t'ekki bakadí kaṅ tontilko geṅ, ita doṅ sire gette y'a ti'n gimo an t'ukkiye an t'ize tudde soo, wo pay an t'ize taasa ti Raa. Inṅkino maṅ olmidé tudde a t'ize umbo y'a-t'íide.

17Geṅ Almasi y'iido k'adda duniya y'un di gizite Rabila Majjaanawa ki toose a kune doṅ dokki i ki suune Raa soo daṅṅal ye, wo a Yawudiyagi doṅ gopponṅ ti yode Raa pây.

18T'urzi k'Almasi, kine pay Yawudiyagi ti doṅ Yawudiyagi ye, in d'ede urzi in d'ette ki sirpa Meega Raa ti toogo k'Unde Kamileṅ ere soo gettiyo.

19Inṅkino maṅ kune doṅ Yawudiyagi ye toṅ maṅ, kune torgagi ye, doṅ ti paate ye. Wo kune'ṅ ti doṅ ki Raa kaṅ soo, kune doṅ ti biza bumbu Raa aa oṅgo pây.

20Kune'ṅ moṅgali k'oozige boy, doṅ zina k'Isa ti nebiyagi moṅgali ki zaapu k'ita boy, wo yode Isa Almasi batum makkolo ere majjaanawa a jiiire k'oozige boy.

21T'urzi yode boy yi-lekkiyo zakidí, yi koliyo k'awwa kono a t'ise boy kamileṅ ki Galmeega Raa.

22Geṅ t'urzi lekkiyo kettiyo kaṅ soo t'Almasi geṅ, kune toṅ kun t'ize moṅgali k'oozige boy. Inṅkino maṅ ti doṅ oṅgo i ziipe addaṅ a Isa, kun t'ize boy wede Raa yi-lekkiyo adda, t'urzi k'Undí.

Epez 3

Pool yi kazita ono Raa a doṅ Yawudiyagi ye

1Kono kamo aame nuṅ Pool eṅ n'elkiyo a naabo ere Meega Raa y'ize gettiyo maṅ, ni di y' tonḍiyo, nuṅ an ni ziiḍa daṅgay miṅ kono ni gizite rabila k'Isa Almasi a kune doṅ Yawudiyagi ye geṅṅo.

2Kune kun suune, wo kun illiga naabo ere Raa y'o ele t'urzi beekadí, n'aase kono ki noogiyaguṅ.

3Elkiso ere ti kaaga Raa yi t'iili ombidé adda k'addí gette, aṅkeṅ y'o ti-gize n'a ti zuune, aakede n'un riije booloṅ eṅṅo.

4Aame kun garey geṅ, kun di suuney, nuṅ munda wede ombidé Raa y'a t'iidíba ita t'urzi k'Almasi geṅ ni y' zuune.

5Inṅkino maṅ munda wede ombidé geṅ ti kaaga a ḍuwo Raa y'an k'iidíba ita ye, wo aṅkeṅṅo y'an t'iidíba ita t'urzi k'Unde Kamileṅ a doṅ zindí ti nebiyagi kane doṅ kamileṅ.

6Munda wede ombidé geṅ: T'urzi Rabila Majjaanawa, kane doṅ Yawudiyagi ye toṅ aggadaṅ ede an t'oona kaṅ soo ti doṅ Yawudiyagi, a suldí doṅ Raa yi boohiyo a doṅzí me. Kane an t'ize tudde soo, wo kane toṅ adda a munda wede Raa yi ruute y'aasa t'urzi k'Isa Almasi geṅ me.

⁷T'urzi munda wede Raa y'o ele ti beekadí n'a t'ize wede naabo ki kazita Rabila Majjaanawa a duwo. Y'ize in̄kino ti toogadí ere baadaŋ a jiire.

⁸Nuŋ wede ɲeŋku a jiire ti diine doŋ pay ki Raa, wo toŋ maŋ y'o d'ele beekadí n'a kizite rabila a urzi laale ki beehiykadí ere baadaŋ a jiire ettiyo t'urzi k'Almasi, a doŋ Yawudiyagi ye.

⁹Soŋ y'o d'ele urzi n'an di kize a duwo pay, mummino munda wede ti kaaga ombide geŋ Raa yi-ti y'isiyo kereŋ me. Yoŋ Raa wede ikkima suldi pay, munda geŋ ti kaaga y'a y'iili ombide.

¹⁰Y'ize in̄kino kono aŋkeŋŋo yi dehu y'an di kize a kane doŋ pay an d'ede urzi ki dokkiyo wo a doŋ pay an d'ede toogo a kandaane, an di suune t'urzi doŋ pay ogiyso ti suma k'Isa, taŋ miibi yoŋ Raa i-d'ede suuniyo k'ono urzutú baadaŋ baadaŋ me.

¹¹Suldi pay geŋ a-t'iide a munda wede Raa y'ilke ti poone y'a okkima duniya botto wo a lekka ki daayum, geŋ y'a y'ize t'urzi Galmeegiŋ Isa Almasi.

¹²Kine in ziipe addiŋ a Isa wo in t'ize ti yode tudde soo geŋ, in d'ede urzi in d'ette ki daana Raa daa k'orgiso.

¹³In̄kino maŋ n'un di rooto, a dabaradó ette kune adduguŋ i-latte ye. Nuŋ ni dabirsa maŋ kune ulbuguŋ un iso uŋse, wo t'urzi tode gette kun t'oona dary'ika.

Geyyiso ere k'Isa Almasi

¹⁴⁻¹⁵Aame n'elkiyo a naabo ere Meega Raa y'ize gettiyo maŋ, ni-t'ottilso a daana Raa wo ni di y' tamma kono yoŋ Meeki doŋ pay a kandaane wo a siido, undaŋ a beezí.

¹⁶Geŋ ni ton-diyo Raa, kono t'urzi laale wede baadaŋ ki goolikadí, y'un eelo toogo adda k'adduguŋ t'urzi toogo k'Unde Kamilen.

¹⁷Nuŋ ni ton-diyo soŋ kono Almasi y'a lekke adda k'adduguŋ t'urzi zaapu k'adde a yode. Aame geŋ kune zakidi adda geyyiso aa undumu sondayz'í i ti diige, soŋ aa boy wede itadí zakidi.

¹⁸In̄kino maŋ kune ti doŋ ki Raa oŋgo pay un d'ede toogo kun di suune, taŋ miibi Almasi y'inni giyye me. K'a ette k'ume tuuku, k'a-kili k'awwa, ki-ti deege d'andí siido toŋ maŋ, geyyisadí tod'te daayum ede.

¹⁹Nuŋ ni ton-diyo kono kun di suune geyyiso k'Almasi ere in k'aaniya in ki suuniyo urzutú pay ye gettiyo. In̄kino maŋ adduguŋ i-t'ôona ti laale wede pay ki Raa.

²⁰In amma Raa, wede i-d'ede toogo y'aane y'a ise baadaŋ a ceere suldi pay doŋ in ton-diyo koo in elkiyo toŋ maŋ. Y'isiyo in̄kino t'urzi toogo ere yi d'isiyo a tukki kine.

²¹Doŋ pay ogiyso ti suma k'Isa an di y' t'imme t'urzi k'Isa Almasi. Tamma a yode ki daayum, wo k'eda k'inŋi! Eyye.

Epez 4

Lekkiyo kettiyo kaŋ soo ki doŋ ogiyso ti suma k'Isa

¹Inkino maŋ a sulđi pay geŋ, nuŋ an ni ziida daŋgay kono ni gizite rabila ki Galmeega Isa, n'un d'eelo kooke: kune Raa y'un ti'n wiike kun t'ize doŋzi geŋ, kun di lekko ki diine a urzizi.

²A lekkiyagun gette kun t'iso doŋ i ki koliyo tuddaŋ ye, kun koono doŋ tasse wo doŋ an d'ede ombiŋe ki daayum. Ise wede tuuku ti lekkiyadi lekkiyadi toŋ kun soodo tuddugun ti geyyiso.

³Unde Raa t'un ti'n ukkiye, inkino maŋ t'urzi tuuku kun deho urzi lekkiyo kettiyo kaŋ soo ti toose, ere t'un ti'n gitte ti tuddugun.

⁴Kine doŋ i ziipe addiŋ a Isa geŋ kine aa tudde soo, Unde Raa toŋ soo, inkino kay Raa y'unni wiike in di zaape elkisadiŋ a munda wede soo.

⁵Galmeega Isa miŋ yoŋ soo, urzi zaapu k'adde a yode soo, wo urzi suyyiso batem toŋ soo.

⁶Wo Raa yoŋ soo, Meeki doŋ pay, yoŋ t'ekki sulđi pay wo ti sulđi pay geŋ yi d'isiyo naabadi, yoŋ aame tuuku toŋ ede.

⁷Wo a kine'ŋ, wede tuuku toŋ Unde Kamileŋ ti-d'ele munda siidi siidi, a toogo ere Almasi yi ele ele.

⁸Ono eŋ an riŋe ti kaaga adda mattup ki Raa, an'de: «Aame yi-gili k'awwa geŋ, doŋ k'olmidayi y'anni jire, y'a ti'n zidde bulagi, wo a duwo y'an d'ize beeko.»

⁹Wo geŋ, yi-gili miŋ, i-kaza moo me? Para maŋ ki poone'ŋ yi diige ti dandi siido me?

¹⁰Wede i diige ti dandi siido miŋ, yoŋ miŋ yode wede i-gili k'awwa ki kandaane, kono sulđi pay yi-ti'n done.

¹¹Wo a duwo t'urzi k'Unde Kamileŋ y'an d'ele sulđi an di naabe eego: ongo y'an ize doŋ zina k'Isa, ongon nebiyagi, ongon doŋ kazita Rabila Majjaanawa, ongon doŋ dokkiyo wo ongo soŋ doŋ dooyiso duwo.

¹²Y'ize inkino kono doŋ pay ki Raa an t'ise doŋ aane i t'ise naabo ere Raa y'an ele, kono kine'ŋ tudde k'Almasi, in di t'ihira a urzi k'Isa me.

¹³T'urzi geŋ kine pay in t'isa kettiyo kaŋ soo a urzi zaapu k'addiŋ a Isa, wo ti suuniyo k'Ulo Raa. In t'isa doŋ i-dirse wo doŋ ki diine kamileŋ, aa yode Almasi yoŋ ki diine kamileŋ.

¹⁴Doŋ daggiya ɗuwo ti mentikadaŋ an in ki ti'n mabilda ye t'urzi dooyisadaŋ ere oldo gette. Inkiŋo maŋ in ki-t'isa aa doŋ i baakiyisa, aa inŋi sunŋi bormo t'a ki sika ye, koo ise aa puutagi ursiŋo t'a ki sika ye.

¹⁵Ki too maŋ kine in di roote ono doŋ ɗerec wo ti geyyiso tuddiŋ. Inkiŋo t'urzi tuuku toŋ kine in di t'ihira a urzi k'Almasi me, yoŋ goole ki doŋ pay ogiyo ti suma yode.

¹⁶Almasi geŋ kine y'in di'n ukkiye kaŋ soo, aa tukki wedusu ti lekkiyo kaŋ soo, mokiyagutu kettiso a okilagi pay. Aame mokiyagi tudde geŋ kane zeere wo an naabiya pay beehiye maŋ, tudde gette ti d'ohire wo ti-t'isiyo toogo. Geŋ kine doŋ i ziipe addiŋ a Isa toŋ inkiŋo, aame in geyyiso tuddiŋ pay wo wede tuuku naabadi yi ti-t'isiyo beehiye maŋ, geŋ kine in di t'ihira ti toogo ere ki Almasi.

Lekkiyo ere ki diine a urzi k'Almasi

¹⁷Kun ollo koduwo, ono doŋ ni rootiyo ti suma Galmeega: Kune kun ki d'ozire aa doŋ i ki suune Raa soo ɗaŋŋal ye ye, kane elkiyadaŋ daayum a sulɗi doŋ ki bita.

¹⁸Kane daayum elkiyadaŋ umbo an di lekkiyo adda zimolo, lekkiyo ere a urzi Raa an ki ti t'oona ye, kono addaŋ i t'ize zakidi wo urzi Raa an ki y' suune ye.

¹⁹Kane geŋ munda wede an isiyo an ki y' suune ye, an ti t'ele tuddaŋ k'isiyo sulɗi doŋ ulpi, an d'isiyto sulɗi pitinŋo a ɗaana ɗuwo pay.

²⁰Wo kune'ŋ, aame kun zuune Almasi geŋ an un ki'n duuye kun ki d'ozire inkiŋo ye.

²¹Ki kotto, kune kun illiga taayadi te, kune doŋ kun aa ti gitte t'Isa kaŋ soo geŋ, ɗerec ere ki yode an un ti'n duuye.

²²Inkiŋo maŋ lekkiyaguŋ ere ti kaaga kun ti koogor, lekkiyo ere oldo kun t'oolo kono tod'te ti-ti daggiya t'urzi sulɗi doŋ ulpi tudde ti dehu an un ti'n mabilsa.

²³I dehu kun i d'ooli tudduguŋ a Raa, y'un di'n ise aware t'urzi k'Unde Kamileŋ ere un di-kima egguŋ ere soodo a elkiso gettiyo.

²⁴Kun t'ambo lekkiyo ere aware, tod'te Raa y'ize i ɗeey'iso aa ki yode. Geŋ kun d'oziro aa yoŋ yi dehu a urzi ki diine kamileŋ, aa ɗerec ki Raa t'inni dooyiso.

²⁵Inkiŋo maŋ lohito k'ono kun di sebbo darguŋ, wede tuuku a bakadi yi rooto ono doŋ ɗerec kono kine kettiyo kaŋ soo.

²⁶Aame kun ti gulkuwe toŋ maŋ kun isa oldiko ye, wo kun lekka ti kulkuwaguŋ bini peedo t'a t'ooro ye,

²⁷kun i oola urzi a Meeda siitandani t'un ti'n mabilda ye.

²⁸Wo wede y'oogire toŋ y'oolo urzi k'oogire me. Ki too maŋ beehiye y'a naabe ti beezí a lekkiyadi te, y'a nooge doŋ an k'ede munda ye.

²⁹Ti biziguŋ adde ono doŋ ulpi ye, wo de kun rooto ono doŋ unse aane a nooge zemba an di t'ihira a urzi zaapu k'adde a Isa, wo aane aase beehiye a kane doŋ un ollige geŋ me.

³⁰Unde Kamileŋ kun ti-kulkuwe ye, tod'te munda wede Raa y'un di'n iigire, i-kaza kune ki yode, bini onniyo ere k'addiyaguŋ t'adda k'oldiko a t'ida a munda wede Raa yi dehu me.

³¹Suldi doŋ pay ulpi geŋ kun ti'n adfo dokki t'adda k'adduguŋ me, suldi doŋ aakede: dekkiso kadfigi, essiyo, kulkuwo, okko maade ti kaldita pay. Wo ita bundiko ere tuuku toŋ kun oolo.

³²Kun t'iso doŋ beehiye wo kun wollo sommagi tudduguŋ, kun iso tambobino ti tudduguŋ aa Raa y'un ize tambobino t'urzi k'Isa Almasi.

Epez 5

Lekkiyo adda toore

¹Ankenŋo kun t'ize inŋi Raa doŋ yi giyye baadaŋ geŋ, kune kun ambo zindí.

²A lekkiyaguŋ gette kun geyyo daayum zemba, aa Almasi yode batum yi'n gize urzi geyyiso, y'a inda kono kine, yi-d'iili tuddí a Raa ki sedeke ere unse aa yode Raa yi dihe.

³Ankeŋ kune doŋ ki Raa geŋ, suldi doŋ ulpi aakede: boliyo, isiyo suldi pitiŋko, okkiso a suldi pay, kane geŋ kun ise ye, sundaŋ toŋ kun roote ye a diinaguŋ me.

⁴A diinaguŋ beehiye ye kun di pelke t'ono borsale, t'ono doŋ daa k'elkisaŋ wo t'ono doŋ k'okko maade me. Ki too maŋ beehiye'ŋ kun di roote'ŋ koduwo a Raa.

⁵Kun suuno koduwo: Kane doŋ boliyo, doŋ isiyo suldi pitiŋko wo doŋ okkiso a suldi pay geŋ, aggadaŋ umbo a suldi doŋ Raa yi boohiyo a doŋzí adda moziko k'Almasi ti yode me. Suldi doŋ kee k'okkiso eego geŋ, i t'ize longayzá i jiiire Raa.

⁶Geŋ wenda soo toŋ y'un ti'n dagga ye t'ono doŋ ki bita geŋ me, kono kulkuwo ki Raa ti-deegu a tukki doŋ i-ti toogiyo a yode.

⁷Kun t'ise onamguŋ soo ye ti doŋ inŋino geŋ me.

⁸Ti kaaga kun lekkiyo adda zimolo, wo ankeŋ kun lekkiyo kettiyo kaŋ soo ti Galmeega geŋ, kune'ŋ adda toore. Inŋino maŋ kun oziro aa doŋ i sooru adda toore,

⁹kono wede yi sooru adda toore geŋ y'aase naabadí pay majjaanawa, ki diine wo derec.

- ¹⁰Kun deho munda wede beehiye Galmeega ulbí i-d'ise unse.
- ¹¹Kun aa ti key'ye ye ti don isiyo naabo ere adda zimolo aa ki k'aagila ti munda ye gette, ki too mañ naabadañ kun an ti waare.
- ¹²Naabadañ ere ombide an isiyo gette ki rootiyo sukiyagi.
- ¹³Wo de naabadañ ere a zimolo gette i wiira mañ, kane añ wenda kun di'n suuna kollo.
- ¹⁴Munda wede itadí i t'adfiya geñ yoñ aa a onnu. Kono kamo an di rootiyo, an'de: «Kee wede ki moone geñ, ki t'onno ti moone me. T'adda diine don unto, ki t'onno, mañ toore k'Almasi y'a toora eedá.»
- ¹⁵Inkino mañ kun koonaa mentikagi a lekkiyaguñ te. Kun t'ise don elkisadañ umbo ye, wo kun t'iso don mentikagi.
- ¹⁶A onniytagi ankenno en oldiko ti t'ize baadañ, wo kine peedo tod'te ede geñ in iso daayum naabo ere beehiye.
- ¹⁷Inkino mañ kun t'ise aa don i ki suune munda ye ye, wo de kun suuno munda wede Galmeega Raa yi dehu kun d'ise.
- ¹⁸Kun ti-t'ise tudduguñ kaca kaca ti toote ye, yode geñ y'a ki dagge, ki too mañ kun lekko daayum ôoniyo t'Unde Raa.
- ¹⁹Kun elo kooke ti tudduguñ t'urzi k'ordari don ki tamma Raa, ti ordari don k'ono Raa wo ti don ettiyo t'urzi k'Unde Raa. Kun ôoro a Galmeega wo kun y'amma t'adduguñ pay.
- ²⁰Daayum kun rooto koduwo a Meega Raa ti suma Galmeegiñ Isa Almasi, a suldi don pay y'isiyo.

Erayi ti kuulizañ

- ²¹Kune'ñ wede tuuku toñ yi kili t'ekki bakadí ye, kono geñ kun ottilso a Almasi.
- ²²Ni rootiyo a kune erayi, kun kili t'ekki kuuluguñ ye, geñ beehiye aakede kun ki koliyo t'ekki Galmeega Isa ye.
- ²³Derec, yo kule geñ yoñ goole t'ekk'eddi, aa Almasi yoñ goole t'ekki don ogiyo ti suma yode, kane geñ tuddi, wo yoñ Wede k'Uttiyadañ.
- ²⁴Aa don ogiyo ti suma k'Isa an ki koliyo t'ekk'Almasi ye geñ, kane erayi toñ a suldi pay an ki kili t'ekki kuulizañ ye.
- ²⁵Ni rootiyo a kune kuuli, kun geyyo erayguñ aa Almasi yi giyye don ogiyo ti suma yode: y'a iyye y'a ele tuddi, y'a inda kono kane.
- ²⁶Y'ize inkino kono yi dehu kane pay geñ y'an ise don kamileñ t'urzi k'onamí wo t'urzi k'ahu, mañ yi di'n kiza a Raa kane don kamileñ a daanadí me.

²⁷Isa yi dehu don pay ogiyso ti suma yode geɗ y'a ti'n t'ogiya a daanadi ti majjaanikadaɗ pay, don kamileɗ, wenda soo ton yi k'aana y'an ki zaapa ono eedaɗ ye, sole soleɗ daa malkuwe, daa k'oldiko munda.

²⁸Geɗ inkiɗo kay, kune kuuli kun di geyye erayguɗ, aa kun geyyiso tudduguɗ batum. Wede yi geyyiso eddi man, geɗ yi geyyiso tuddi batum.

²⁹Wede a kiigira tuddi umbo, ki too man yi di t'ele omb'o wo y'a t'okkima, aakede Almasi y'an isiyo a don pay ogiyso ti suma yode.

³⁰Ki kotto kine mokiyagi ki tudde yode.

³¹Ono en an riije ti kaaga adda mattup ki Raa, an'de: «Kono kamo kule yi d'oola meegi ti meedi, y'a di ketta biɗ ti eddi. Kane sire geɗ an t'isa tudde soo.»

³²Kane ono geɗ deere wo derec ombide, wo nuɗ ni rootiyo inkiɗo a tuk'Almasi ti don pay ogiyso ti suma yode.

³³Wo geɗ kune'ɗa wede tuuku ton y'a geyye eddi aa tuddi batum, wo erewo ton t'a olliga ono kulatu kay.

Epez 6

Inni ti maawan

¹Ni rootiyo a kune inni, kun ollo ono ki maawuguɗ, inkiɗo geɗ derec aa Galmeega yi dehu.

²Urzi k'oogoro soo, y'ede: «Ki elo suma a meega ti meeda.» En urzi k'oogoro wede ki poone kettiyo ti munda wede Raa yi ruute y'aasa.

³Munda wede Raa yi ruute'ɗa: «Wede y'ollige ono maawi geɗ, y'a lekka ti unsuwo wo ozzinagi baadaɗ a duniyadi me.»

⁴Ni rootiyo a kune maawi, inniɗo kun ti'n kulkuwe ye, wo kun'ni dooyo, kun aa t'in zaapo a urzi wede beehiye ettiyo ti Galmeega.

Bulagi ti galmaawan

⁵Ni rootiyo a kune bulagi, a galmaawuguɗ a siido en kun ollo onaman daa koliyo tudduguɗ, ti ottilso wo t'adde soo, aakede kun i naabiya a Isa Almasi.

⁶Kun naabe beehiye'ɗa a daanadaɗ doo ye, kono an un di'n t'imme me. Kun suune kune'ɗa bulagi k'Almasi, geɗ kun naabo t'adduguɗ pay aa Raa yi dehu.

⁷Kun naabo a daanadaɗ t'adduguɗ pay aa kun naabiya a Galmeega batum, a duwo ye.

⁸Kun suune ise wede bule, bule ye ton man, wede tuuku ton Galmeega yi-t'ela munda a naabadi ere beehiye y'ize.

⁹Wo kune galmaawi ki bulagi, a bulagugun toŋ kun an iso beehiye aa kane an un isiyo kay. Kun an ise ulsu ye. Kun suune kune ti bulagugun pay miŋ Galmeegugun soo a kandaane, yode geŋ y'inni wolliyo kine duwo pay miŋ kaŋ soo.

Suldi k'arka ki doŋ i ziipe addaŋ a Isa

¹⁰Ki daŋgiya ni dehu n'un di roote'ŋ, kun deho toogo t'urzi Galmeega wede i-d'ede toogo baadaŋ a jiire.

¹¹Kun ti soko suldi k'arka pay doŋ Raa y'un eliyo a beygun kono kun d'ohira toogo aame Meeda siitandani t'iiziga mabilsagun maŋ.

¹²Deyyiso ere in deyye te, ti doŋ tudde aa kine ye, in deyye ti doŋ aakede: doŋ an d'ede urzi ki dokkiyo, doŋ deero wo ti mozagi doŋ adda duniya ere ki zimolo, wo in deyye soŋ ti siitandani i lekkiyo a kandaane.

¹³Inkino maŋ kun ti soko pay suldi k'arka doŋ Raa y'un eliyo a beygun, kono onniyo ere oldo t'iina maŋ, kun d'ohira toogo a wede etto deyyisagun, kun deyya bini kun di y' ceera, wo kun di seeda daayum zakidi.

¹⁴Kun t'ohor kaŋ ohire, a toonugun kun ti ketto kaykisa, tode gette aa derec ere un d'ede a urzi Raa. Kun t'osso saapa, tode gette aa soorugun ere ki diine.

¹⁵Kun t'osso tobiyagi a zoŋgun, kane geŋ aa toogo k'ettiyo ki kazita Rabila Majjaanawa ere ki toose.

¹⁶Daayum kun zaapo addugun a Raa, kono to zaapu k'adde gette tod'te a kune'ŋ aa dargine i-t'eegirso leny'agi bizaŋ uwwo bila bila doŋ Mohita k'oldiko t'akkisa ki tuddugun.

¹⁷Eggun kun t'osso kakkile maala, yode geŋ aa Raa y'un utte, wo kun aa t'ambo soŋ kasigara ere Unde Raa t'un ele, tode gette aa Ono Raa doŋ a bizigun.

¹⁸A suldi pay geŋ aame ize munda toŋ maŋ, kun tondo Raa t'urzi k'Undi. Kun tondo, kun sappa bere, kun koono mentikagi, kun t'orme ye. Kun tondo ki doŋ ki Raa pay.

¹⁹A nuŋ Pool toŋ maŋ kun tondo Raa kono y'o t'elo onami, aame ni t'ihina bizo geŋ n'a roote kereŋ daa k'orgiso Rabila Majjaanawa ere y'o iidiba ita ette.

²⁰Ankenno nuŋ adda daŋgay toŋ, kono Rabila Majjaanawa ette nuŋ aa bize k'Isa Almasi. Inkino kun tondo Raa kono n'a roote kereŋ daa k'orgiso aakede Raa yi dehu.

Toose ki daŋgu

²¹Nuŋ ni dehu n'a t'igibe Tisik, leemadey wede ki geyyiso, yoŋ yi seedu zakidi a naabo Galmeega geŋ, rabilado pay y'un di-t'eley.

²²Iḡkino maḡ nuḡ ni y'agisa toc miḡ, kono y'un di kizey mummino ay lekkiyo me wo y'un di-tassey adduḡuḡ.

²³A kune zamba pay geḡ Meega Raa ti Galmeegiḡ Isa Almasi an un elo toose, wo geyyiso, un di'n nooge a zaapu k'adduḡuḡ a Raa.

²⁴Geḡ beeko Raa ti koonaa ti doḡ pay i geyyiso Galmeegiḡ Isa Almasi, ti geyyiso ere i ki deegu ye.

Pilip

Pilip 1

Toose ki Pool

¹Mattup ette i raaniya nuɗ Pool kaye ti Timote, ɗoɗ naabo k'Isa Almasi, a kune pay ɗoɗ ki Raa i lekkiyo kettiyo kaɗ soo t'Isa Almasi a geeger Pilip, ti ɗoɗ dokkiyaguɗ wo ti diyakire.

²Geɗ beeko ti toose ki Meegiɗ Raa wo ti Galmeega Isa Almasi i koonaa egguɗ.

Pool yi tondiyo Raa kono ɗoɗ ki Pilip

³Aame tuuku o elkiyo adda k'addó kono kune maɗ, ni rootiyo koɗuwo a Raazó.

⁴Daayum adda tondiyadó a Raa kono kune pay gette, ni tondiyo t'unɗuwo

⁵kono kun ayni nuuge a urzi kazita Rabila Majjaanawa, kun iise ti onniyo ere ki poone bini aɗkenɗo geɗ me.

⁶Nuɗ ni suune munda soo adda k'addó: Raa wede iise naabo ere beehiye adda k'adduguɗ geɗ, y'a di-t'etta ki ɗaana bini ɗaɗgiyatú ti beehiye a onniyo ere k'aaniya k'Isa Almasi.

⁷Wo geɗ ɗerec beehiye iɗkino nuɗ ni d'elkiyo a kune pay. Iɗkino maɗ nuɗ n'unni geyyiso baadaɗ adda k'addó, kono beeko ere Raa y'o ize ette a kine pay kaɗ soo, ise aɗkenɗo nuɗ adda ɗaɗgay, ise an ni wiike a ɗaana ɗoɗ booro toɗ n'a naakiwe Rabila Majjaanawa gette, n'an di kize tod'te ɗerec.

⁸A rootiyadó ette ɗerec ki kotto, Raa toɗ yi suune, nuɗ n'unni geyyiso pay aa Isa Almasi y'unni geyyiso baadaɗ.

⁹Wo kun ollo eɗɗo munda wede ni tondiyo Raa adda k'addó me: geyyisaguɗ t'a t'ihira a ceere ki ceeriyo, wo kun di suune munda wede eɗ ulsu eɗ beehiye,

¹⁰kono kun d'aane kun di suune munda wede beehiye. Iɗkino onniyo ere k'Isa Almasi t'iina maɗ, kun t'isa ɗoɗ kamileɗ, ɗuwo an k'amba sunduguɗ k'ulsuko ye.

¹¹Wo kun t'isa ɗoɗ addaɗ ûune ti naabo ere ki diine iido t'urzi k'Isa Almasi, iɗkino a t'ela suma wo tamma a Raa.

Pool adda ɗaɗgay toɗ ono Raa an k'ihira ye

¹²Zemba ki nuɗ, ni dehu kune kun di suune, a munda wede o iido eɗ a t'ize beehiye, ki kotto a nuuge naabo ere ki Rabila Majjaanawa t'a iɗgile ki ɗaana.

¹³Kono iɗkino ɗoɗ pay, ise ɗoɗ pay adda boy mozigo goole, wo ise ɗoɗ oɗgo ti paate toɗ, an suune nuɗ an ni ziida ɗaɗgay miɗ kono naabo ere a urzi k'Almasi.

14T'urzi seeduzó adda dangay ette, zemba baadaŋ an d'ele kooke a urzi Galmeega, iŋkino maŋ an d'iiziga wehini a jiire an di kazita ono Raa daa k'orgiso.

15Derec, doŋ oŋgo an kazita rabila k'Almasi ti kolbiso wo ti elkiso ere an ti n' kime nuŋ k'ita, wo doŋ oŋgo an kazita t'urzi k'adde doŋ beehiye.

16Kane geŋ an kazita t'urzi geyyiso, kono an suune nuŋ an ni ziida dangay miŋ kono ni naakiwsa Rabila Majjaanawa k'Almasi, n'an di kaza tod'te derec.

17Wo kane doŋ i kazita rabila k'Almasi ti elkiso ere an ti n' kima nuŋ k'ita geŋ, kane elkisadaŋ ki diine ye, an elkiyo dabaradó ere adda dangay gette on oo t'aagulu.

18Iŋkino toŋ i k'ise munda ye! T'urzi tuuku toŋ suma k'Almasi kane an kizita, ise ti elkiso ere derec ye, ise ti elkiso ere derec toŋ maŋ, nuŋ ulbó'ŋ uŋse. Wo ulbó'ŋ aasa uŋse sey,

19kono ni suune, t'urzi tondiyaguŋ a Raa wo ti noogiyo k'Unde k'Isa Almasi gette, suldi pay geŋ a-t'etta a urzi k'uttiyadó.

20Iŋkino maŋ munda wede ni delliyo gottitoŋ wo ni zaapu elkisadó eego eŋ, sukiyagi munda soo toŋ i ki n' seeda ye. Ki too maŋ ti aŋki wo ki daayum suma k'Almasi gette n'a ti kize ti tuddó pay daa k'orgiso, ise nuŋ n'a lekke, ise n'a t'inda toŋ maŋ.

21Derec ki nuuno maŋ, Almasi miŋ yoŋ lekkiyadó, wo n'inda maŋ, geŋ munda wede beehiye a jiire.

22Wo aame a duniya eŋ ni lekkiyo sey maŋ, o-t'ele urzi n'aase naabo ere beehiye, iŋkino maŋ oo giige, tuuku ni beere te.

23A diine k'elkiso ere sire si-sittú ette, nuŋ oo t'ize ooŋe: ni dehu lekkiyo duniya ette ni-t'ooli, n'ette n'a lekkey aame k'Almasi, geŋ beehiye a jiire a nuŋ me.

24Wo de kono kune geŋ, koduwo baadaŋ a jiire sey n'a lekke a duniya me.

25Kono suldi eŋ, nuŋ ni suune adda k'addó ni lekka me, wo ni lekka ti kune pay kono n'un di'n nooga, kun di t'ihira wo kun di lekka t'uŋsuwo a urzi zaapu k'adduguŋ a Isa.

26Iŋkino maŋ aame ni gima ki tudduguŋ sey maŋ, t'urzi nuŋ geŋ ulbuguŋ aasey uŋse a ceere sey a urzi lekkiyo ere kettiyo kaŋ soo t'Isa Almasi te.

Pool y'an eliyo kooke a zemba

27Munda wede beehiye ni dehu'ŋ, kune kun di lekke a lekkiyo ere a-t'ette a urzi ki Rabila Majjaanawa k'Almasi. Iŋkino maŋ aame n'iida n'un ti'n wollo, ni k'iida

ye toŋ maŋ, n'a olliga kun lekkiyo kettiyo kaŋ soo zakidi, wo kun deyyiso pay kaŋ soo t'adde soo a urzi zaapu k'adde a Isa ere itatú Rabila Majjaanawa.

²⁸Kun an orgida ye tak a kane doŋ k'olmidaguŋ geŋ me. Kun likka iŋkino maŋ, a kane an t'isa aa munda wede y'an kaza kane a urzi wede ki daggiya, wo kune a urzi wede k'uttiyo. Wo geŋ iido ti Raa,

²⁹kono yoŋ y'un ize beeko kun di naabe k'Almasi, kun di naabe kun ki zaape adduguŋ a yode daŋŋal ye, wo soŋ kun di dabire kono yoŋ me.

³⁰Aŋkenŋo kun deyyiso deyyiso ere aa kun di'n wulle n'a diyye ti kaaga, wo aŋki ni deyyiso sey aa kun zuune.

Pilip 2

Almasi yoŋ toogo wo yi ki koliyo tuddi ye

¹Aa kune kun suune, lekkiyaguŋ ere kun lekkiyo kettiyo kaŋ soo t'Almasi gette, tod' t'un d'eliyo toogo. Kun suune geyyiso k'Almasi gette, tod' t'un d'eliyo kooke. Kun suune kun sooru kaŋ soo t'Unde Kamileŋ. Wo kun suune un d'ede sommagi wo kun isiyoo beehiyko ti tudduguŋ geŋ me.

²Iŋkino kun lekko lekkiyaguŋ ere kaŋ soo, kun geyyo tudduguŋ t'adde soo, biziguŋ soo wo elkisaguŋ toŋ i-t'ette kaŋ soo. Geŋ iŋkino addo kun oo ti'n oŋa t'uŋsuwo.

³Kun ise ye munda wede a urzi k'elkiso ere wede a ti y' kime k'ita, ise t'urzi k'elkiso ere oldo kun di kili tudduguŋ me. Ki too maŋ daa koliyo tudde kun'ni wollo eebuguŋ aa kane deero t'eggug.

⁴Wenda soo toŋ yi dehe munda wede k'aggadi daŋŋal ye, wo de ti diinaguŋ wede tuuku toŋ y'a elko a doŋ oŋgo pay.

⁵Ti diinaguŋ kun lekko lekkiyo ere aakede doŋ i lekkiyo kettiyo kaŋ soo t'Isa Almasi:

⁶Yode wede t'ume k'eesiyo aa Raa batum, wo toŋ t'urzi wede i-d'ede geŋ, a umayi geŋ y'a ki dihe ti toogo an ki d'ette ti Raa kaŋ soo ye.

⁷Ki too maŋ yode batum ume wede suma geŋ yi-d'iili, y'a t'ize wede naabo. Y'a t'ize wede tudde a diine duwo, kane an di y' wulle miŋ yoŋ wedusu.

⁸Yoŋ y'a iyye y'a t'ize neŋku, y'a illiga ono Raa bini y'a iyye unto, untadi ere sukiyagi ekk'undumu wede zaapu t'ekki bakadi kaŋ tontilko.

⁹Kono kamo Raa yi-ti y' gili, yi-d'ele ume wede majjaane a jiire pay t'awwa a kandaane, wo yi-d'ele suma ere a jiire sumbiyagi pay,

¹⁰kono ɗoŋ pay i lekkiyo a kandaane, ɗoŋ i lekkiyo a siido, wo ɗoŋ ti ɗandi siido, kane pay an di dikkey a suma ere ki yode Isa.

¹¹Wo geŋ ɗoŋ pay an di rootey kereŋ: «Isa Almasi yoŋ Galmeega!» Wo t'urzi geŋ ɗuwo an di t'imme suma Meega Raa.

Kun tooro aa biŋge adda duniya

¹²Zemba ki nuŋ kune ɗoŋ ki geyyiso, kune daayum ono Raa kun illiga. Injino'ŋ kono Raa y'un utte geŋ, aŋkeŋ i dehu kune toŋ kun di naabe a-t'ette a urzi k'uttiyo gettiyo, wo kun naabo ti orgiso wo ti ottilso. Kun ise injino aame nuŋ a diinaguŋ ɗaŋŋal ye, aŋkeŋno nuŋ umbo enno toŋ maŋ kun iso sey a ceere,

¹³kono yode Raa batum i naabiya adda k'adduguŋ me, y'un di'n isiyo ɗoŋ aane i dehu wo i t'isiyo munda wede a-t'ette aa Raa addi i dehu.

¹⁴Naabo pay ere kune kun ise gette, kun iso daa gurgirso daa niiku,

¹⁵kono ɗuwo an k'ambe sunduguŋ k'ulsuko ye, kune kamilen, inŋi Raa daa k'oldiko munda, adda diine ɗoŋ duniya kane ɗoŋ i t'udde t'urzi wede ɗerec, ɗoŋ isiyo ulsu mirsi geŋ me. Kune a diinayaŋ kun di toore aa moldali ɗoŋ a kandaane,

¹⁶geŋ kun an kazita Rabila Majjaanawa i d'eliyo lekkiyo. Injino maŋ nuŋ ulb'oŋ aasa uŋse kono kune a onniyo ere k'aaniya k'Almasi gette, kono a naabadó ere n'ize wo n'a iidiba yeebadó gette, i ki t'ize ki bita ye.

¹⁷Urzi zaapu k'adduguŋ a Isa geŋ, aakede sedefe ere kun ele a Raa. Wo aame aŋki eŋ puuzadó t'iba toŋ maŋ, a-t'etta aa munda wede an y'ergu a sedefe gettiyo. Aame iza injino maŋ, geŋ nuŋ ulb'oŋ uŋse, wo kune pay toŋ ulbuguŋ aasa uŋse ti nuuno me.

¹⁸Geŋ kune toŋ ulbuguŋ un iso uŋse, wo nuŋ n'aase uŋsuwo ti kune kay.

Pool y'agisa Timote kane ti Epapirodit

¹⁹T'urzi Galmeega Isa, n'elkiyo saŋ n'un di-t'igiba Timote, kono nuŋ batum aame n'uuna rabilaguŋ ti bey yode maŋ, o-t'ela toogo.

²⁰Wenda ti doolo umbo daa yode Timote ulbi i di t'oodé a nuuno me, wo ki kotto ulbi i di t'oodé a kune me.

²¹Kane ɗoŋ pay oŋgo geŋ wede tuuku toŋ ulbi i oodiyo a naabadí ere k'aggadí k'aggadí, wo wede a elke a naabo ere k'Isa Almasi umbo.

²²Wo kune kun suune yode Timote eŋ tuddi yi ti gize kun wulle yi ziida zakidi a naabadí te, y'a niibe ti nuŋ a urzi kazita Rabila Majjaanawa aakede ulu a sirpa meegi.

²³Inkino'ŋ n'elkiyo, aame a lekkiyadó ette urzutú ni ti y' wulla kereŋ maŋ, Timote n'un ti t'igiba.

²⁴Wo adda k'addó ni suune, saŋ maŋ nuŋ batum n'etta n'un ti'n wollo, kono Galmeega y'o ruute.

²⁵Wo ni t'ilke maŋ beehiye leemadiŋ Epapirodit n'un ti y' t'igibe me, yode wede ay niibe wo ay diyye kaŋ soo, yoŋ kun y'igibo y'o d'iido ti noogiyo ere ni dihe ginno te.

²⁶Yoŋ mosogo kune pay yi dehu y'un ti'n wolle sey, wo yoŋ a eenizí aa kun d'illiga geŋŋo toŋ, ulbí i-d'oodiyo baadaŋ a kune me.

²⁷Derec, yoŋ y'aaze eeni baadaŋ taŋ lelle y'unto, wo Raa yi-d'ize adde koduwo, wo y'ize adde koduwo a yode danŋal ye, a nuuno pây, kono n'a ki t'ise sommagi dondoŋ a ki ceere ye.

²⁸Inkino n'a naare kesiko n'un ti y' t'igibe, kono aame kune kun yi wulley sey maŋ ulbuguŋ aasey uŋse, wo nuŋ toŋ addó a-t'udiga.

²⁹Inkino maŋ yode eŋ kun yi soodo bey sire ti uŋsuwo, aakede leema a urzi Galmeega. Duwo doŋ aakede yode kino eŋ, kun an ottilo baadaŋ,

³⁰kono taŋ lelle y'unto miŋ a urzi naabo k'Almasi. Yoŋ y'a iyee y'a t'umbe puuzadí, kono y'o d'etto ti noogiyo ere kune batum kun k'iine kun ki d'iido ye gettiyo.

Pilip 3

Mummino k'a koone ki diine a daana Raa me

¹Ankeŋ zamba ki nuŋ, ulbuguŋ un iso uŋse kono kune kettiyo kaŋ soo ti Galmeega. Ono doŋ n'un riine ti poone geŋ, a nuŋ oo k'oone ye n'un ti'n doole me, wo inkino geŋ a kune toogo a urzi zaapu k'adduguŋ a Isa me.

²Kun koona mentikagi ti doŋ ulpi, kane aa gahiti kono naabo ere an isiyo gette oldo, an dooyiso duwo an di walda ponde doo, para maŋ kane doŋ Raa ye.

³Ki too maŋ doŋ waldu toc miŋ kine, kono in naabiya a Raa t'urzi k'Undí, kine ulbiŋ in isiyo uŋse a Isa Almasi, wo in ki ziipe addiŋ a urzi tuddiŋ ye.

⁴Ki too maŋ nuŋ toŋ n'aane n'a zaape addó a urzi tuddiŋ geŋ me. Wo nuŋ ni-t'oone urzi a ceere n'aase, ise doŋ tuuku ti doolo toŋ maŋ.

⁵Inkino t'ume an ti n'ehe iide onniyo gessire maŋ, an oo di wilda ponde, nuŋ itadó doŋ k'Izirayel ti biza bumbu Benzamen, nuŋ Eber maawó toŋ doŋ k'Eber pây. Wo a urzi k'oogoro Yawudiyagi geŋ ni ziida zakidi, kono nuŋ ti diine doŋ sundaŋ Pariziyen.

⁶A naabadó ere wehini n'ize a Raa geṅ, doṅ ogiyso ti suma k'Isa n'anni dibire baadaṅ. A urzi lekkiyo ere ki diine oogoro ti rootiyo gette n'a ziida zakidi, kono duwo an ki zaapu ono a eedó ye.

⁷Wo urzi wede pay ti poone n'ilke munda wede beehiye n'a t'oone geṅ, aṅkeṅṅo a nuṅ oo t'ize ki bita kono k'Almasi me.

⁸Derec, suldi doṅ pay geṅṅo toṅ n'a zuune a t'ize ki bita, kono aṅkeṅ munda wede beehiye a jiire sey ni y'uune baa: N'a suune Isa Almasi yoṅ Galmeegó. Kono yode geṅ n'a iyye suldi pay geṅ a t'ize ki bita, kane pay n'an ize aa iizi, kono munda wede a di jiire pay a nuṅ, Almasi daṅṅal,

⁹wo n'a lekke kettiyo kaṅ soo ti yode. A elkiyadó maṅ ni ki t'ise ki diine ye a daana Raa t'urzi sooruzó ere a-t'ette a oogoro gette. Ki too maṅ n'a t'ise ki diine a daana Raa t'urzi zaapu k'adde a Almasi. Geṅ derec, lekkiyo ere ki diine ette t'ettiyo ti Raa t'urzi zaapu k'adde a Almasi.

¹⁰Geṅ munda wede addó i dehu, n'a suune Almasi adda k'addó, wo n'a suune toogadí ere a ti y' bilde. Ni dehu n'a di-kette kaṅ soo ti yode, n'a dabire aa yoṅ yi dibire bini unto toṅ maṅ, n'a oyya n'a deey'a aa yode a urzi k'untadí me.

¹¹Iṅkino maṅ ni zaapu elkisadó aame n'inda toṅ, Raa yi ti n' balda kay ti diine doṅ unto me.

In okko ki daana a urzi k'Almasi me

¹²Nuṅ ni k'elkiyo ye okko dalala ni ti diṅge baa me, ise a lekkiyadó ere aṅkeṅṅo ni t'ize wede derec ki diine baa toṅ maṅ. Wo nuṅ a urzi ni peddiṅso, n'okko n'a t'ambey agga te, kono k'iṅkino nuṅ batum miṅ Isa Almasi yi n'umbe.

¹³Zemba ki nuṅ, nuṅ toṅ maṅ ni k'elkiyo ye agga ni t'uune baa me, wo munda wede soo nuṅ n'isiyo me: ni-k'elkiyo ye baa a munda wede n'ize i t'iṅgile me, ni peddiṅso n'a t'ambey munda wede a daanadó.

¹⁴Raa y'inni waaku t'awwa ti kandaane, kine in d'ette sirpadí in seedey aggadiṅ t'urzi k'Isa Almasi. Iṅkino maṅ nuṅ n'okko dalala ki daana, n'a t'ambey agga te.

¹⁵Kine doṅ pay i-dirse a urzi zaapu k'adde a Isa eṅ, in aa elko a suldi geṅṅo wo in d'oziro eego. Wo a ume tuuku kun t'ilke elkiyo ere ti doolo maṅ, a ume geṅ Raa y'un di kiza urzizí, kun di suuna.

¹⁶Aame ise muno toṅ maṅ, kine in'do daayum ki daana ki urzi wede in daaniya bini aṅkeṅṅo.

¹⁷Zemba ki nuṅ, kune pay kun ambo zindó. Urzi wede kun di wolle wo kun di daane geṅ, ay un y'ele. Iṅkino maṅ kun zaapo ersaguṅ a tukki kane doṅ i sooru a urzi wede geṅṅo.

¹⁸Nuɗ ti poone toɗ n'un ruutite, wo aɗkeɗ n'un di doolo sey ti zumari edayó, i d'ede doɗ ede baadaɗ kane geɗ a sooruzan gettiɗ i-kaza doɗ k'adu ki Almasi wo a munda wede y'ize a urzi k'untadí ekk'undumu wede zaapu t'ekki bakadí kaɗ tontilko.

¹⁹Kane geɗ raazan miɗ addaɗ, iɗkino maɗ urzizaɗ a-ti dagga adda k'ahu. An tamma tuddaɗ a suldi doɗ ki sukuyagi, wo elkisadaɗ pay tiɗ a suldi duniya.

²⁰Ki kine maɗ, duniya ette siidadiɗ ye, siidadiɗ a kandaane, ume wede kine in delliyo ettiyo ki Wede k'Uttiyadiɗ, Galmeegiɗ Isa Almasi.

²¹Yode wede y'iido maɗ, tuddiɗ ere k'unto i-k'ede toogo ye ette, y'a ti kima tudde ere i deey'iso aa tuddí, tudde ere i-d'ede toogo. Y'isiyo iɗkino t'urzi toogo ere i-d'eliyo urzi suldi pay an d'ottilso a mozikadí gettiyo.

Pilip 4

Pool y'an eliyo kooke a zamba

¹Zamba ki nuɗ kune doɗ ki geyyiso, nuɗ mosogo addó i dehu n'un ti'n wolle sey. Kune doɗ addó kun oo ti'n assiya, kune a nuɗ aa kaɗumul ere ki wede y'a jiiere a eedó. Iɗkino maɗ zamba ki nuɗ kune doɗ ki geyyiso, kun soodo daayum zakidi a lekkiyo ere kettiyo kaɗ soo ti Galmeega gette.

²Nuɗ n'eliyo kooke a Ebodi kane ti Sentis geɗ, kono onamaɗ i-t'ette kaɗ soo a lekkiyadaɗ ere kettiyo kaɗ soo ti Galmeega te.

³Wo kee pây wede i seedu zakidi naabadiɗ kaɗ soo ti nuɗ, ni ki tonɗiyo erayi sire eɗ k'anni noogo kono an di-t'okkiy'e. Kane ti nuɗ ay diyye kaɗ soo a urzi ki kazita Rabila Majjaanawa, soɗ Kilema wo ti doɗ oɗgo pay naabadey kaɗ soo. Kane pay geɗ sumbiyagaɗ raaniya adda mattup ere ki lekkiyo.

⁴Kun lekko daayum t'unɗuwo kettiyo kaɗ soo ti Galmeega. N'a di doole sey, kun lekko t'unɗuwo.

⁵Aa kun suune Galmeega saɗ goppon y'ettiyo, iɗkino kun t'iso doɗ tasse a daana duwo pay.

⁶Kune ulbuguɗ un t'ooɗe a munda ye, wo de a suldi doɗ pay kune kun dehu geɗ, daayum kun i-ti zaapo a Raa t'urzi tonɗiyo yode, ti obe bey wo ti rootiyo koduwo a Raa.

⁷Iɗkino maɗ toose ere ki Raa gette, tod'te t'a jiiere suuniyo pay, tode gette t'a booha biza k'ulbuguɗ wo elkisaguɗ a urzi lekkiyo ere kettiyo kaɗ soo t'Isa Almasi.

⁸Ki ɗaŋgiya zemba ki nuɗ, ni dehu n'un di roote'ŋ, kun zaapo elkisaguɗ a sulɗi ɗoɗ pay beehiye, ɗuwo an di'n t'imme, ɗoɗ pay derec wo ɗuwo an d'ottile, ɗoɗ pay ki diine wo kamileɗ, ɗoɗ i t'iide kun di'n geyye, wo a t'ele suma.

⁹Munɗa wede nuɗ n'unni duuye wo kun uune, munɗa wede kun illiga ni rootiyo wo kun wulle n'isiyo geɗ, kane pay geɗ kun oziro eego. Injino maɗ Raa wede eliyo toose geɗ y'a koona ti kune.

Pool yi tamma ɗoɗ k'Almasi ki Pilip a eliyo beezan

¹⁰A lekkiyadó ere ni lekkiyo kettiyo kaɗ soo ti Galmeega ette, nuɗ ulbó aaze uɗse baadaɗ, kono a munɗa wede aɗkeɗ kun gitte toonuguɗ sey geɗ, kun o d'ele a nuuno. Ki kotto a munɗa geɗ kune kun ilke baa, wo kun k'uune urzi k'isiyo ye ɗaɗɗal.

¹¹Nuɗ ni rootiyo injino a munɗa wede o biite ko? Aha! Ni rootiyo injino kono ni-diile ulbó o isiyo uɗse a munɗa wede ki beezó.

¹²Nuɗ urzi lekkiyadó ni suune, ise nuɗ oo k'ede ye, ise nuɗ adda darna toɗ maɗ. A ume tuuku wo aame ize munɗa toɗ maɗ, nuɗ oo ti diile ise addó boo, ise addó mosogo, ise nuɗ adda darna, ise nuɗ oo biite toɗ maɗ.

¹³A sulɗi pay geɗ, n'aane n'a lekke t'urzi toogo ere k'Almasi y'o eliyo te.

¹⁴Wo toɗ geɗ, kune kun ize beehiye kun d'ele aggaɗuɗ a di n' nuuge a dabaradó.

¹⁵Zemba ɗoɗ ki geeger Pilip, kune batum kun suune t'ume k'eesiyo kazita Rabila Majjaanawa aame ni t'iiziga ti siido Maseduwan geɗ, ɗoɗ ogiyo ti suma k'Isa ti doolo umbo kine in nuuge ti tuddiɗ. Kune ɗaɗɗal a ni nuuge me.

¹⁶Wo soɗ kun suune aame nuɗ a geeger Tessaloni toɗ, kun ni nuuge taɗ sire taɗ aɗo a munɗa wede oo biite me.

¹⁷Nuɗ ni rootiyo injino kono ni dehu kun o t'ele munɗa ko? Aha! Ni rootiyo injino kono ni dehu a naabo ere kun isiyo a urzi zaapu k'adduguɗ a Isa gette, a-t'obi eego a aagila.

¹⁸Injino maɗ n'un di rooto, sulɗi ɗoɗ pay kun o igibo geɗ ni'n uune, nuɗ adda darna. Aɗkeɗ Epapirodit y'o d'iido sulɗuguɗ me, geɗ baadaɗ o iide baa. Kane pay eɗ aa munɗa wede in eliyo a Raa eediyadí uɗse, sedeke ere Raa yi giyye wo ulbí i-d'isiyo uɗse.

¹⁹T'urzi lekkiyo kettiyo kaɗ soo t'Isa Almasi geɗ, Raa wede ni daaniya y'aana y'un di'n ôona ti sulɗi ɗoɗ pay un biite, ti laalayí wede baadaɗ a jiiire pay geɗ me.

²⁰Injino'ŋ tamma t'a koone a Meegiɗ Raa ki daayum! Eyye.

Toose ki ɗaɗu

²¹Kun an t'isoy toose a kane don pay ki Raa i lekkiyo kettiyo kan soo t'Isa Almasi. Zemba don ti nuɗ ton an un t'ize toose pây.

²²Kane don pay ki Raa a enno en an un t'ize toose, wo toc miɗ zemba don i naabiya di mozigo goole ki Romeɗ an un t'ize toose pây.

²³Geɗ beeko ki Galmeega Isa Almasi ti koono ti kune pay.

Kolos

Kolos 1

Toose ki Pool

¹Mattup ette i raaniya nuŋ Pool wede zina k'Isa Almasi aa Raa yi dehu, nuŋ ti leemadiŋ Timote,

²a kune doŋ ki Raa a geeger Kolos, kune zemba doŋ daayum i seedu zakidi a Almasi, i lekkiyo kettiyo kaŋ soo ti yode. Geŋ beeko ti toose ere ki Meegiŋ Raa i koonaa eggun.

Pool yi tondiyo Raa kono zemba a Kolos

³Adda tondiyo Raa ere daayum kaye ay tondiyo kono kune gette, ay rootiyo koduwo a Raa Meeki Galmeegiŋ Isa Almasi,

⁴kono ay illiga a lekkiyagun ere kun zaapu addugun a Isa Almasi wo kun'ni geyyiso doŋ pay ki Raa me.

⁵Kun isiyo inŋkino kono kun zaapu elkisagun a munda wede Raa y'un boohiyo a kandaane. Zaapu k'elkisagun gette, kun ti zuune t'urzi k'ono doŋ derec ki Rabila Majjaanawa aame t'iina di kune geŋ me.

⁶Rabila Majjaanawa gette ti-teepiyo adda siido pay, ti d'aagulu aa undumu y'ohire wo yi d'ehiyo inŋni. Geŋ inŋkino a t'aaze di kune ti onniyo ere ki poone, kun d'illiga ono doŋ ki beeko Raa, wo kun di zuune geŋ derec.

⁷Dooyiso gette unni duuye Epapiras leema wede ki geyyiso, yode wede naabadey kaŋ soo. Yoŋ daayum yi seedu zakidi a naabo k'Almasi ere y'isiyo a kune te.

⁸Yoŋ y'ay t'iide taaya a geyyiso ere Unde Raa t'un ele adda k'addugun gette.

⁹Kono kamo ti onniyo ere ay illiga rabilagun geŋ, kaye toŋ ay k'ooliyo ye ti tondiyo Raa kono kune me. Ay yi tondiyo y'un di'n ôone ti suuniyo ki suldi doŋ pay Raa addi i dehu, t'urzi pay ki suuniyo k'ono ti eego soodo a elkiso kane doŋ Unde Raa t'un ele.

¹⁰Inŋkino maŋ kun d'aane kun di lekke aakede doŋ i daaniya urzi Galmeega an di lekke, wo daayum kun d'ise munda wede ulbi i-d'ise unse. Geŋ kun d'isa naabo pay ere tuuku beehiye wo Raa kun di y' suuna adda k'addugun a ceera ki ceeriyo.

¹¹Kaye ay tondiyo Raa y'un t'ele toogo a ume tuuku toŋ maŋ t'urzi toogadi ere meeda ki ki ti dooze ye gettiyo, kono kune a suldi pay kun di seeda zakidi ti ombiŋe bini danŋu.

¹²Kun rooto koduwo a Meega Raa ti un̄suwo, yode wede un di'n ize don̄ aane a t'ooney aggadañ t'adda suldi don̄ yi boohiyo a kane don̄zi adda mozikadi ere a toore gettiyo.

¹³Yoñ y'in di'n udf̄de ti bey k'Ere toogo adda zimolo, wo y'in di'n t'iide k'adda moziko k'Ulí, yoñ yi y' giyye baadañ.

¹⁴T'urzi yode geñ Raa y'in udf̄de t'adda k'old̄fiko, y'in t'ize tambobino a old̄fikadiñ te.

Almasi mozigo t'ekki suldi pay

¹⁵Raa geñ wenda yi k'aane yi ki y' wolle ye, wo in woliyo Almasi geñ, yoñ miñ Raa koyok. Yoñ geñ yi jire suldi don̄ pay Raa y'ikkima,

¹⁶kono t'urzi yode, Raa y'ikkima suldi don̄ pay a kandaane wo a siido, suldi don̄ in'ni woliyo wo don̄ in ki'n woliyo ye toñ mañ, kane undiyagi don̄ pay a dandaane k'ume, kane don̄ deero, kane don̄ an d'ede urzi ki dokkiyo wo kane don̄ an d'ede toogo. Kane pay geñ an ikkima Raa t'urzi k'Almasi wo a Almasi.

¹⁷Yoñ ede too ki poone Raa y'a okkima suldi pay geñ me, wo t'urzi yode kane suldi pay geñ an d'oh̄ire a umayañ me.

¹⁸Yoñ eego, wo tuddi kane don̄ pay ogiyo ti suma k'Isa. Yoñ eesiyo ki suldi pay, yode wede i-bilde ki poone wo ki daayum ti diine don̄ unto, kono y'a koone wede goole t'ekki suldi pay.

¹⁹Derec, yo Raa batum yi dihe suldi don̄ pay adda k'addi wo a tuddi geñ, a tuk'Ulí toñ in̄kino ede p̄ay,

²⁰wo t'urzi yode, Raa y'a dihe suldi don̄ pay y'ikkima, ise a siido ise a kandaane toñ, an di-kimo an di t'okkiye ti yode Raa. T'urzi puuzo k'Ulí ere ibi ekk'undumu wede zaapu t'ekki bakadi kañ tontilko geñ, Raa y'an d'ele toose.

²¹Wo kune toñ ti kaaga kun likke aa torgagi dokki ti daana Raa me. Kune don̄ k'aduzi, kun d'ilkite kun d'ise old̄fiko, wo old̄fiko kun ti t'ize.

²²Wo an̄keñ, t'urzi k'unto k'Ulí ere ki tudde gette, Raa y'un ti'n gimo kun t'ukkiye ti yode. Y'ize in̄kino kono y'un di'n t'etta daanadi kune don̄ kamilen, daa k'old̄fiko munda, duwo an k'ambe sundugun̄ k'ulsuko ye.

²³Wo geñ i dehu kun di seeda daayum zakidi wo toogo a urzi zaapu k'addugun̄ a Isa me, wo kun gi di led̄de dokki ye t'urzi Rabila Majjaanawa ere in zaapu elkisadiñ eego gette. Tode ere kun illiga, an di gizite a duwo adda duniya pay, wo nuñ Pool en̄ n'a t'ize wede naabo kono ni kazita rabila gettiyo.

Naabo Pool a don̄ ogiyo ti suma k'Isa

²⁴Anken nuɲ ulbó unse a dabaradó ere n'ooniyo adda naabo ere n'isiyo a kune gette. Inkinno maɲ adda tuddó n'a-ti danɲe dabar k'Almasi ere yi ni wiike n'a dabire kono tuddí te, wo to tuddí tiɲ kane don pay ogiyso ti suma yode.

²⁵Nuɲ ni t'ize wede naabo ki don pay ogiyso ti suma k'Isa, a-t'ette a naabo ere Raa y'o ele a beezó ki noogiyaguɲ: nuɲ n'un di kizite ono Raa pay.

²⁶Ono geɲ kane munda wede t'ume k'eesiyo ombide a don pay, wo anken Raa y'an t'iidiba ita a donzi.

²⁷Raa y'a dihe y'an di y' kize a donzi munda wede ombide geɲ, yoɲ goole i jiiere wo laalayí baadaɲ, Raa yi y'ize a nooga kane don pay Yawudiyagi ye. Wo kun wollo munda wede ombide geɲ, yoɲ Almasi adda k'adduguɲ, t'urzi yode kun di zaapu elkisaguɲ a goaliko ere ki Raa gettiyo, kune toɲ adda kay.

²⁸Inkinno maɲ kaye ay kazita rabila ki yode Almasi a duwo pay. A wede tuuku toɲ ay yi di tookiyo kuudí wo ay di y' dooyiso t'urzi suuniyo k'ono don pay, kono kane pay an t'ise don i-dirse a urzi lekkiyo ere kettiyo kaɲ soo ti Almasi.

²⁹Geɲ inkinno ni naabiya wo ni deyyiso ti toogo ere k'Almasi y'o ele, tode gette ti naabiya adda k'addó ti toogo.

Kolos 2

¹Inkinno maɲ nuɲ ni dehu kun di suune deyyiso ere zakidi ni deyyiso kono kune, kono ki don Raa a geeger Lahodise wo kono ki don Raa baadaɲ ongo nuɲ batum t'edayaɲ an ki n' wulle ye.

²Ni dehu addaɲ i-t'ône ti toogo, an di lekke kettiyo kaɲ soo a urzi geyyiso tuddaɲ wo ôoniyo ti eego soodo a elkiso. Inkinno an di y' suuna munda wede ombide ki Raa me, yoɲ Almasi batum.

³Laale pay wede ki suuniyo k'ono wo ti suuniyo gette, kane ombide a bey k'Almasi.

⁴Ni raaniya inkinno kono wenda soo toɲ y'un ti'n mabilda ye t'urzi k'ono don k'a t'ese derec me.

⁵Derec, nuɲ dokki ti kune me, wo toɲ elkisadó daayum ti kune, wo nuɲ ulbó unse a munda wede n'ollige, kune kun sooru ki diine kaɲ soo wo kun seedu zakidi a urzi zaapu k'adduguɲ a Almasi me.

Lekkiyo ere kettiyo kaɲ soo ti Almasi

⁶Kune kun umbe Isa Almasi yoɲ Galmeega geɲ, inkinno kun oziro daayum kettiyo kaɲ soo ti yode,

⁷aa undumu sondayzí i ti d̄iige, wo kun zaapo addugun̄ a yode aa wedusu yi zaapu ɓoy itadí zakid̄i. Kun soodo daayum zakid̄i a urzi zaapu k'addugun̄ a Isa wede an unni duuye geṅṅo, wo kun rooto koduwo a Raa t'addugun̄ pay.

⁸Kun koona mentikagi, kun i oola urzi a wenda soo toṅ y'un ti'n mabilda kun t'ooraa adda k'ikka ki suuniyo k'ono d̄oṅ daa k'urzizaṅ geṅṅo ye. Suuniyo k'ono gette t'ettiyo t'urzi k'elkiyo ere ki duwo wo t'urzi k'undiyagi d̄oṅ toogo i-dokkiyo duniya geṅṅo, tode gette t'ettiyo t'urzi k'Almasi ye.

⁹Ni rootiyo in̄kino kono Almasi a tuddí ere aa ki wedusu gette, suldí d̄oṅ pay adda k'adde Raa wo a tuddí geṅ, a tukk'Almasi toṅ ede p̄ây.

¹⁰Wo kune munda un ki'n biite ye a urzi k'Almasi me, kono kun aa ti gitte kaṅ soo ti yode, yoṅ goole t'ekki kane d̄oṅ pay an d'ede urzi ki dokkiyo wo t'ekki kane d̄oṅ pay an d'ede toogo.

¹¹A lekkiyo ere kaṅ soo kun aa ti gitte t'Almasi gette, aakede kun uune waldu ponde, waldu ere ti bey wedusu ye, wo waldu ere ettiyo t'urzi k'Almasi. Waldu gette y'un ize aame munda wede adda tuddugun̄ y'un di'n t'ettiyo k'adda k'oldiko geṅ, y'un ti y'udde.

¹²Kune an unni zuyye batem geṅ aakede an un ti'n ittiba kaṅ soo ti Almasi, wo kun di-bilde kaṅ soo p̄ây ti yode me, kono kun umbe a toogo ere ki Raa a bilde Almasi ti diine d̄oṅ unto gettiyo.

¹³Kune ti kaaga eggun̄ aa unto a daana Raa me kono kun aa ti diipida a urzizí, wo kono munda wede adda tuddugun̄ y'un di'n t'ettiyo k'adda k'oldiko geṅ yoṅ botto daa k'ad̄iya. Wo aṅkeṅ kune Raa y'un ti'n bilde kaṅ soo ti Almasi me, y'in t'ize tambobino a doopidadiṅ pay ere in aa ti diipida a urzi Raa geṅ me.

¹⁴Raa geṅ mattup ere yi-kaza oldikadiṅ t'inni sakiysa gette y'a-t'ũide mentú baa, tode ere adu ti kine kono a urzi k'oogoro Raa. Yi-t'ũide aame Almasi an ti y'tiike ekk'undumu wede zaapu t'ekki bakadí kaṅ tontilko.

¹⁵Soṅ undiyagi d̄oṅ an d'ede urzi ki dokkiyo wo d̄oṅ an d'ede toogo toṅ, toogadaṅ Raa y'an ti d̄iggite aame yoṅ y'anni jiire t'urzi k'unto k'Almasi ekk'undumu geṅ me, y'a ti'n wiire a daana d̄oṅ pay aakede an zid̄do bulagi t'ume k'arka.

¹⁶In̄kino maṅ kun i oola urzi a wenda soo toṅ yi dekka booro eggun̄ a urzi k'ombo ye, ise a urzi sobo, ise a urzi laayagi, ise a urzi k'aagulu tere, ise a onniyo ere ki puukiyo toṅ maṅ.

¹⁷Kane pay geṅ Raa y'in elo aa undiso ki munda wede saṅ a etto, wo munda wede d̄erec ki kotto miṅ, yode Almasi.

¹⁸Kun i oola urzi a wenda soo toṅ y'un ti'n dagga ye, y'a t'eesa aggagun̄ umbo a kandaane me. Kane geṅ a daana duwo an ti t'isiyo tuddaṅ d̄oṅ i ki koliyo tuddaṅ

ye, wo soŋ ulbaŋ uŋse an ottilso a maaleekiyagi. Kane geŋ an aa seedu zakidi baadaŋ a munda wede y'an ettiyo aa suniye. Kane doŋ iŋkino geŋ ti elkisadaŋ ere a urzi tudde gette, an koliyo tuddaŋ ki makilsa,

¹⁹an ki dehu an ki lekke kettiyo t'Almasi ye. Ki too maŋ Almasi batum yoŋ eego ki doŋ pay i ziipe addaŋ a yode, kane geŋ tuddí. Kune kun suune eego gette ti moddiyo tudde pay, wo t'urzi tode okilagi ti sondayi an ti t'okkiso tudde pay kaŋ soo, ti d'ohire aa Raa yi dehu. Geŋ iŋkino kay ki kine doŋ i ziipe addiŋ a Almasi me.

Unto wo baldiya t'Almasi

²⁰Kune t'ume kun aa ti gitte kaŋ soo ti Almasi geŋ, aa kun t'inda ti yode, wo y'un di'n udfde ti bey k'undiyagi doŋ toogo i-dokkiyo duniya me. Wo de ki moo me kun di lekkiyo aakede kune a bey k'undiyagi doŋ i-dokkiyo duniya sey me? Kun d'ooyiso kun di daaniya ita k'urziyagi k'oogoro doŋ aakede:

²¹«Munda eŋ k'ambu ye», «Munda eŋ k'owwiyo ye», wo «Munda eŋ ki bottiyo ye» sey me.

²²Urziyagi geŋ an rootiyo ti suldi doŋ saŋ i-t'eŋgilso aame duwo an ti'n isiyo maŋ. Kane geŋ urziyagi k'oogoro wo dooyiso ere ettiyo t'urzi duwo daŋŋal.

²³Kane an un rootiyo: kun di daane urzi Raa wede kane duwo batum an ilkite, soŋ kun ti-t'ise tuddugun doŋ i ki koliyo tuddaŋ ye, wo kune batum kun dabirsa tuddugun. Derec, urziyagi pay geŋ a eda duwo an t'isiyo beehiye. Ki too maŋ kane ki bita, kane beehiykadaŋ tiŋ a urzi wede tudde ti dehu daŋŋal.

Kolos 3

¹Kune Raa y'un ti'n bilde t'Almasi kaŋ soo, iŋkino maŋ kun deho suldi doŋ a kandaane, a ume wede Almasi yi-guune a ammade Raa.

²Kun d'elke ki poone a suldi doŋ a kandaane, a suldi doŋ a siido ye.

³Derec, kun t'inda t'Almasi kaŋ soo, wo lekkiyagun ere aware Raa y'un ele gette itatú i ki t'iidiba ye botto, tod'te t'Almasi a bey Raa.

⁴Lekkiyagun ere aware gette, un t'eliyo Almasi ki daayum. Iŋkino'ŋ aame y'iina y'an ti giza tuddí a duwo maŋ, kune toŋ Raa y'an di kiza tuddugun a duwo ti yode Almasi kaŋ soo, wo doŋ pay an di wolla dary'ikadi gette kune toŋ adda.

Lekkiyo ere ti kaaga wo ti ere aware

⁵Iŋkino maŋ suldi doŋ pay ulpi a lekkiyagun ere a siido gette, kun ti'n adfo mendaŋ ti biza k'ulbugun me, suldi doŋ aakede: boliyo, suldi pitinjo, ŋaapu, suldi doŋ ulpi tudde ti dehu, wo okkiso a suldi pay. Suldi doŋ kee k'okkiso eego geŋ, i t'ize loŋgayzá i jiire Raa.

⁶Ita k'oldiko ere inĳino, kulkuwo Raa ti-dēegu a tukki dōŋ i-ti toogiyo a yode me.

⁷Geŋ kune toŋ kun izire inĳino aame ti kaaga kun likke adda k'oldiko geŋ me.

⁸Wo de aŋkeŋ, kane pay geŋ kun di sebbo darguŋ, sulđi dōŋ aakede: kulkuwo, zehiso kulkuwo wo bundiko. Soŋ kaldita tudde, ise ono dōŋ ki sukiyagi toŋ i k'adde ye ti biziguŋ me.

⁹Kun lihite ono ti tudduguŋ ye, kono lekkiyo ere oldo ti naabatú pay kun t'iili,

¹⁰wo kun t'umbe lekkiyo ere aware. Geŋ kune dūwo dōŋ aware, wo Raa yi naabiya daayum adda k'adduguŋ kono kun deeye aa yode wede unni ziipe. Y'isiyo inĳino kono kun di y' suune a ceere ki ceeriyo.

¹¹Aŋkeŋ âhuntu tudde umbo a edayí me, ise eŋ Yawudiyagi, eŋ Yawudiyagi ye, ise eŋ dōŋ i wilda ponde, eŋ dōŋ daa walđu, ise eŋ dōŋ daa suuniyadaŋ, eŋ dōŋ k'ita dūwo aa seyđi, ise eŋ bule, eŋ bule ye toŋ maŋ, wo munda wede a di jiiire pay Almasi, yoŋ yi lekkiyo adda k'adde ki dōŋ pay i ziipe addaŋ a yode.

¹²Kune Raa y'un ti'n ize dōŋzí, y'unni biire wo y'unni giyye baadaŋ. Kono kamo kun iso naabo ere aakede: kun wollo sommagi dūwo, kun iso beehiye, kun kili tudduguŋ ye, kun koonaa dōŋ tasse wo dōŋ an d'ede ombiŋe.

¹³Ise wede tuuku ti lekkiyadi lekkiyadi toŋ kun soodó tudduguŋ, wo aame wede ti diinaguŋ i-d'ede ono ti bakadí maŋ, an aa t'iso tambobino ti tuddaŋ me, aa Galmeega y'un t'ize tambobino a kune pây.

¹⁴Wo t'ekki sulđi pay geŋ kun geyyo tudduguŋ. Geyyiso tod'te aa sibe wede un ti'n kettiyo kune pay biŋ biŋ.

¹⁵Geŋ toose ere k'Almasi ti dokko biza k'ulbuguŋ. Geŋ inĳino Raa y'unni wiike kun di lekke pay adda toose gettiyo, kono kune tudde soo. Wo Raa kun y'elko daayum.

¹⁶Geŋ rabila k'Almasi ti laalatú pay i lekko adda k'adduguŋ. Kun dooyo tudduguŋ, kun tooko kuude ti tudduguŋ ti suuniyo k'ono ere pay. Kun ôoro wo kun rooto koduwo a Raa t'adduguŋ pay t'urzi k'ôrdari dōŋ ki tamma Raa, ti ôrdari dōŋ k'ono Raa wo ti dōŋ ettiyo t'urzi k'Unde Raa.

¹⁷Sulđi dōŋ pay kun ise geŋ, ise t'urzi rootiyo k'ono ise t'urzi naabo toŋ maŋ, kun iso a suma ere ki Galmeega Isa, wo t'urzi yode kun di roote koduwo a Meega Raa.

Urzi lekkiyo ere aware

¹⁸Ni rootiyo a kune erayi, kun kili t'ekki kuuluguŋ ye, inĳino beehiye aakede dōŋ i daaniya urzi Galmeega an d'isiyo.

- ¹⁹Ni rootiyo a kune kuuli, kun geyyo erayguṅ, kun an ise baaze ye.
- ²⁰Ni rootiyo a kune inṅi, kun ollo ono pay ki maawugun, geṅ munda wede Galmeega ulbí i-d'ise unse.
- ²¹Ni rootiyo a kune maawi, inṅiguṅ kun ti'n kulkuwe ye, para maṅ tuddaṅ a rorriga.
- ²²Ni rootiyo a kune bulagi, kun ollo ono pay ki galmaawugun doṅ a siido. Kun ise inṅino aame kane a daanaguṅ kono ulbaṅ an d'ise unse doo ye, wo de kun ollo onamaṅ t'adde soo kono kun orgiso a Galmeega Isa.
- ²³A naabo ere tuuku kun isiyo gette, kun ti naabo t'addugun pay aa kun naabiya a Galmeega batum, a duwo ye.
- ²⁴Kun ise inṅino kono kun suune kun t'ooney munda wede Galmeega yi dehu y'un t'eley t'adda suldi doṅ yi boohiyo a kandaane a doṅzi. Geṅ Galmeega wede kun i-naabiya miṅ, yoṅ Almasi.
- ²⁵Wo a wede i ki sooru ki diine ye geṅ, Raa yi-t'ela daṅgay a sooruzi ere ki diine ye gette, kono Raa geṅ y'inni wolliyo kine duwo pay miṅ kaṅ soo.

Kolos 4

¹Ni rootiyo a kune galmaawi, kun an iso beehiye a bulagugun me a urzi wede ki diine derec, kono kun suune kune toṅ un d'ede Galmeega a kandaane.

Kooke Pool wede ki daṅgu

- ²Kun soodo zakidi a urzi tonduyo Raa, adda tonduyaguṅ kun lekko zeere wo kun rooto daayum koduwo a Raa.
- ³Wo aame kun tonduyo Raa geṅ, kun tondo kono kaye pay, kono y'ay di t'ihina urzi ay di kizite onami a duwo, kono ay di roote munda wede ombide Raa y'a t'iidiba ita t'urzi k'Almasi. Geṅ kun suuno, kono ni gizite onami, ankenno nuṅ adda daṅgay me.
- ⁴Inṅino maṅ kun tondo Raa kono rabila k'Almasi te n'a ti roote kereṅ, i dehu n'a-t'ise.
- ⁵Kun lekko ti suuniyo k'ono a daana doṅ i ki suune urzi k'Almasi ye me, a peedo ere tuuku kun uune a daanaguṅ maṅ.
- ⁶Ono doṅ adde ti biziguṅ geṅ aase unse ti sumadizaṅ, wo kun suuno kama k'ono t'urzi wede beehiye a wede tuuku toṅ maṅ.

Toose ki Pool ere ki daṅgu

- ⁷Tisik leemadey wede ki geyyiso ay naabiya kaŋ soo a urzi naabo Galmeega me, yoŋ wede naabo yi seedu zakidi a naabo Galmeega geŋ, rabiladó pay y'un di-t'eley.
- ⁸Iŋkino maŋ nuŋ ni y'agisa toc miŋ, kono y'un di kizey mummino ay lekkiyo me wo y'un di-tasseŋ adduguŋ.
- ⁹Yoŋ an'te ti Onezim leemadey wede ki geyyiso, daayum yi seedu zakidi a urzi k'Almasi, yoŋ ti diinaguŋ. Kane geŋ an un di-t'idey taaya a suldi pay doŋ isiyo a eŋŋo.
- ¹⁰Aristarko wede adda daŋgay ti nuŋ eŋ y'un t'ize toose, wo Markus taasa ki Barnabas toŋ y'un t'ize toose pây. Yode wede n'un ruute kun d'isey mummino ti yode aame y'iiney di kune maŋ. Aame y'iida di kune maŋ, kun yi soodoy bey sire.
- ¹¹Isa wede sundi soo Zistus toŋ y'un t'ize toose pây. Ti diine Yawudiyagi doŋ i ziipe addaŋ a Isa geŋ, kane ado geŋŋo daŋŋal i naabiya ti nuuno a urzi Moziko Raa me. T'urzi kane geŋ ni d'uune toogo baadaŋ.
- ¹²Epapiras wede naabo k'Isa Almasi yode toŋ ti di kune, y'un t'ize toose pây. Adda tondiyadi ere kono kune gette, yoŋ daayum wehini yi k'ormiyo ye. Yi tondiyo Raa kono kun di seeda zakidi, kun t'isa doŋ i-dirse a urzi k'Almasi, wo doŋ iyye aase suldi doŋ pay aa Raa addi i dehu.
- ¹³Nuŋ batum ni wulle t'edayo y'oodibe yeebadi baadaŋ kono kune, kono doŋ geeger Lahodise wo kono doŋ geeger Irapoli pây geŋ me.
- ¹⁴Lik wede ki geyyiso yoŋ wede daawiya, kane ti Demas toŋ, an un t'ize toose pây.
- ¹⁵Kun an t'iso toose a zemba doŋ ki Lahodise, ti teema Nempa wo doŋ ogiyo ti suma k'Isa adda boytú toŋ, kun an t'iso toose pây.
- ¹⁶Aame mattup ere n'un raaniya ette kun ti girey maŋ, kun an t'agiboy a doŋ ogiyo ti suma k'Isa a Lahodise, an di-garey kay. Wo zemba doŋ a Lahodise toŋ mattup ere n'an riine gette an un d'eloy, kune toŋ kun di-garoy kay.
- ¹⁷Anken kun i-ti rooto a Arsip geŋ y'a soodo zakidi a naabo ere an i ele a urzi Galmeega gette, y'a ti-daŋgo ti beehiye.
- ¹⁸Kun wollo ume ki toose ki nuŋ Pool eŋ, i riine nuŋ batum ti beezó. Un dandé ye nuŋ adda daŋgay me. Geŋ beeko Raa ti koonaa eggug.

1 Tessaloni

1 Tessaloni 1

Toose ki Pool

¹Mattup ette i raaniya nuɗ Pool ti Silas wo Timote, a kune ɗoɗ ogiyo ti suma k'Isa a geeger Tessaloni, kune ɗoɗ ki Meega Raa wo ki Galmeega Isa Almasi. Geɗ beeko ti toose ki Raa i koonaa eggoo.

Lekkiyo wo zaapu k'adde a Isa ki ɗoɗ Tessaloni

²Adda tonɗiyo Raa ere kaye ay tonɗiyo gette, daayum ay rootiyo kooɗuwo a Raa kono kune pay wo sundugoo ay gi-di sedɗiyo ye.

³Adda tonɗiyadey a ɗaana Meegin Raa gette, kaye'ŋ ay elkiyo daayum a kune, a naabagoo ere a urzi zaapu k'addugoo a Isa, a lekkiyagoo ere kun geyyiso Raa t'adde soo, wo a zaapu k'elkisagoo a Galmeegin Isa Almasi ere kun seedu zakidii bini ɗango.

⁴Zemba ki nuɗ, kaye ay suune Raa y'unni giyye, y'unni biire kun t'ize ɗoɗ ki yode.

⁵Munɗa geɗ ay yi suune kono Rabila Majjaanawa k'Isa ere ay un gizite gette, tod' t'iina di kune t'urzi k'ono ɗoɗ uɗɗe ti bizey ɗanɗal ye, wo soɗ ti toogo ti noogiyo k'Unde Kamilen, wo ay zuune adda k'addey ono ɗoɗ ay gizite geɗ kane ɗerec. Inkiino kun suune lekkiyo ere kaye ay likke a diine kune gette, tod'te un d'ize beehiye a kune.

⁶Kune kun t'ize ɗoɗ umbe zina kaye wo ki Galmeega. Adda dabar baadaɗ toɗ ono Raa kun di'n ziida t'unsoowo ere ettiyo t'urzi k'Unde Kamilen.

⁷Inkiino maɗ kune lekkiyagoo ti konso aa urzi a kane ɗoɗ pay i ziipe addaɗ a Isa a siido Maseduwan ti Akayi geɗ, an di wolle an d'ozire eego.

⁸Ono Galmeega geɗ ti di kune i-tiipe adda siido Maseduwan ti Akayi ɗanɗal ye, wo soɗ rabila ere a urzi zaapu k'addugoo a Raa gette i-tiipe a ume tuuku toɗ maɗ, inkiino i ki dehu ay ki roote munɗa ye baa a urzi zaapu k'addugoo me.

⁹Duwo pay an toowo taaya a tukki kaye an'de, mummino a ettiyadey ere di kune gette kun ayni ziida me, wo mummino kun di-gime ki tukki Raa me. Urzi loɗgayi kun d'iili, kun di daaniya Raa ki kotto zeere kono kun i di naabe,

¹⁰wo kun di delle Ulí Isa y'a kimo ti kandaane. Yo Ulo geɗ Raa y'a ti y' bilɗe ti diine ɗoɗ unto, wo yoɗ y'in di'n utta ti booro Raa ere aana.

1 Tessaloni 2

Naabo ki Pool a geeger Tessaloni

- ¹Zemba ki nuɲ, kune batum kun suune beehiye ettiyadey di kune gette ki bita ye.
- ²Soɲ kun suune ki poone ay d'aaney di kune geɲ, adda geeger ki Pilip gette an ay di'n dibire wo an ay di'n gildite. Wo de saɲ Raa y'ay d'eele toogo ay un di gizite daa k'orgiso urzi Rabila Majjaanawa adda dabar ere baadaɲ gettiyo toɲ maɲ.
- ³Rabila Majjaanawa ere ay kazita a duwo ette, tod'te ita k'ono doɲ butte ye, elkisadey oldo ye, wo ay ki dehu duwo ay gi di'n mabilde ti metiɲko ye.
- ⁴Wo de ki kotto maɲ, kaye Raa y'ay ti'n niime, y'ay di'n wulle doɲ aane i-t'ise naabadi, maɲ y'ay d'ele a beezey naabo ay di kizite Rabila Majjaanawa. Ankeɲ ono doɲ ay kazita eɲ, ay k'okkime onamey kono duwo ulbaɲ an ki d'ise unse do ye, wo de ay kazita kono ulbe i-d'ise unse a Raa, yode wede i suune ono k'addey.
- ⁵Geɲ iɲkino kun suune beehiye, pidipidiɲ kaye ono doɲ ki mabilsa duwo ulbaɲ an d'ise unse ay ki gizite ye, pidipidiɲ t'urzi k'onamey ay ki dihe ye ay t'oone munda ti beyguɲ me, ono doɲ ay rootiyo eɲ Raa toɲ yi wolliyo wo y'ollige.
- ⁶Kaye ay ize iɲkino kono ay ki dehu wenda y'ay gi di'n t'imme ye, ise kune, ise wede doolo toɲ maɲ.
- ⁷Ki too maɲ kaye doɲ zina k'Almasi geɲ, ay d'ede urzi ay un di'n dokke ki toogo. Wo de kaye a diinaguɲ geɲ, ay ti t'isse tuddey poyoyo aakede erewo ti boohiyo iɲɲitu a gulbatu.
- ⁸Kaye ay unni giyye baadaɲ geɲ, ay di dihe ay un kizite Rabila Majjaanawa ki Raa daɲɲal ye, wo de ise k'unto toɲ ay di-t'inda kono kune me. Derec, geyyisadey a tukki kune gette baadaɲ a jiire!
- ⁹Zemba ki nuɲ, kun suune naabo ere ay y'iidi yeebadey diddo onnu ay d'urme gette, kono ay ki dehu a wenda soo toɲ ti diinaguɲ ay yi-ki t'ele attidi ye, wo geɲ iɲkino ay un gizite Rabila Majjaanawa ki Raa te.
- ¹⁰Kune kun wulle wo Raa toɲ yi wulle, sooruzey a daana kune doɲ i ziipe adduguɲ a Isa gette tod'te kamileɲ, ki diine wo wenda yi k'ambe sundey k'ulsuko ye.
- ¹¹Wo kun suune, aame kaye a diinaguɲ geɲ, ay likke ti wede tuuku toɲ aa lekkiyo meege t'iɲɲizi.
- ¹²Kaye ay un d'eele kooke, kun d'uune toogo wo ay di gid'dima ay un ti'n ziipe urzi kono kun di lekke lekkiyo ere aa Raa yi dehu, yoɲ y'unni waaku kun di lekkey adda dary'ika ki Mozikadi.
- ¹³Kaye daayum ay roote koduwo a Raa ki munda soo sey: Aame ay un gizite ono Raa geɲ, kun d'illiga wo kun d'umbe, kun k'ilke ye eɲ ono doɲ tudde me, wo de

kun ilke'η kane ono Raa d'erec. Kane ono geη an di naabiya adda k'adde kune d'oj i ziipe addugun a Isa.

¹⁴Geη zemba ki nuη, kune kun diine ita d'oj ki Raa ogiysito ti suma k'Isa a siido Ziide, kane an lekkiyo kettiyo kaη soo t'Isa Almasi. Kune'η d'oj siidagun batum an un di'n dibire, aakede Yawudiyagi an dibire d'oj ki Raa ogiysito ti suma k'Isa a siido Ziide.

¹⁵Kane Yawudiyagi geηno batum ũide Galmeega Isa ti nebiyagi me, wo kaye toη an ay di'n dibire. Raa geη ulb' i-k'isiyo unse ye ti kane me, kane adu ki duwo pay.

¹⁶Kane an ay t'eegirso ay di kizite a kane d'oj Yawudiyagi ye ono d'oj an t'oone uttiyo me. An isiyo iηkino geη, an a-ti kummiyo oldikadaη ekk'oldiko maawaη ere daayum an ize, wo de kane geη an a-ti d'inge ti kulkuwo Raa a eedaη.

Pool yi dehu y'a kime ki Tessaloni

¹⁷Zemba ki nuη, aηkeη kaye ay ti lid'fo ti tuddugun k'onniyto miibi, d'erec ki tudde kine dokki wo biza k'ulbiη kaη soo. Kaye ay d'ede mosogo baadaη ki kune, ay dehutu urzi ay d'ette ay un ti'n wollo sey.

¹⁸Kono kamo ay dehu ay di kime di kune, wo nuη Pool eη n'a dihe taη baadaη n'a ette, wo de Meeda siitandani t'ay t'iigire.

¹⁹A kama ki Galmeegiη Isa Almasi geη, ki kotto zaapu k'elkisadey, unsuwadey wo kadumul ay kiley tuddey tiη kune a daanadi me.

²⁰Eyye, t'urzi kune ay t'oona tamma, wo ulbey aasa unse.

1 Tessaloni 3

Agisa Timote ki Tessaloni

¹Kaye ay ki d'iine ombiηe ye daa k'ollige rabilagun me. Iηkino maη ay d'ilke, beehiye ay di lekke siidey a geeger k'Aten te.

²Wo kaye ay un d'igibe leemadey Timote, yoη wede yi naabiya ki Raa ti kaye kaη soo a urzi kazita Rabila Majjaanawa k'Almasi. Ay un y'igibe kono y'un t'eeley kooke wo kun t'ooney togo a urzi zaapu k'addugun a Isa me.

³Iηkino maη ti diinagun wenda soo toη yi t'ooro ye ti dabar ere aηkenno ette, kono kune batum kun suune beehiye, dabar gette a-t'ette a munda wede Raa yi dehu y'aase a tukki kine.

⁴Aame kaye di kune geη ay un di ruute ki poone, ay'de: «Kine in t'oona dabar baadaη.» Wo geη iηkino kun suune, dabar gette t'a iina.

⁵Kono kamo ni k'iine ombiηe ye n'a delle me, iηkino n'a t'igibe Timote y'a sed'fo mekk'ono a urzi zaapu k'addugun a Isa. N'ize iηkino n'orgiso, koo Meeda

siitandani t'unni naamey daggiya koo maŋ, geŋ oodibe yeebadey a urzi kazita k'ono Raa di kune gette a ki t'ise ki bita ye.

Kooke a nuuge doŋ Tessaloni

⁶Wo de aŋkeŋ Timote ti di kune yi-gimo, y'ay d'iido ti rabila majjaanawa a urzi zaapu k'addugun a Isa ti geyyiso ere un d'ede a diinagun te. Yoŋ y'ay ruute kune toŋ kun elkiyo daayum a kaye me, kun dehu kun ay ti'n wolle sey aa kaye toŋ ay dehu ay un ti'n wolle kay.

⁷Iŋkino maŋ zamba ki nuŋ, adda k'ulbe k'oodiyo baadaŋ ti dabar ere a eedey gette, kaye ay d'uune toogo t'urzi zaapu k'addugun a Isa geŋ me.

⁸Wo aŋkeŋ kaye toŋ addey i t'udige, kono kun seedu zakidi a urzi lekkiyo kettiyo kaŋ soo ti Galmeega me.

⁹Kune a daana Raa addey kun ay ti'n uune t'unŋsuwo, wo kono kune geŋ ay di roote koduwo a Raa kaŋ mummino toŋ ay ki suune ye.

¹⁰Didfo, onnu ay kodfime tonديو Raa kono y'ay di t'ihina urzi ay d'ette ay un ti'n wollo sey, wo munda wede a biite a urzi zaapu k'addugun a Isa geŋ ay un ti y' dangey.

¹¹Iŋkino kaye ay tonديو Meegiŋ Raa batum ti Galmeegiŋ Isa, an ay di-t'ihina urzi wede ay d'etta di kune.

¹²Wo soŋ geyyiso ere un d'ede ti tuddugun wo ki doŋ pay gette, Galmeega y'un t'aagal k'aagulu, tod'te aakede geyyiso ere kaye batum ay d'ede a tukki kune.

¹³Geŋ Galmeega y'un elo toogo a biza k'ulbugun, iŋkino a onniyo ere Galmeegiŋ Isa y'aana ti doŋzi pay gette, kune a daana Meegiŋ Raa ooyiso kese a yode, wenda y'a ki roota k'ulsuko a tukki kune ye baa.

1 Tessaloni 4

Lekkiyo ere aa Raa yi dehu

¹Iŋkino ki dangu zamba ki nuŋ, kune'ŋ an unni duuye mummino kun di lekke a urzi wede Raa ulbi i-d'ise unse me, wo derec kun sooru miŋ a urzutú. Wo de aŋkenno ay un obe bey wo ay un d'eelo kooke a munda wede kun d'ise ti suma Galmeega Isa, geŋ lekkiyagun gette un d'odo t'iŋkino.

²Kune kun'ni suune ono doŋ ay un ruute, kane geŋ Galmeega Isa y'a ruute.

³Enno munda wede Raa yi dehu me: Kun lekko doŋ ooyiso kese a Raa, kun ooli tuddugun a urzi boliyo ye.

⁴Wede tuuku toŋ ti diinagun yi suuno seedu tuddi, y'a lekko ooyiso kese a Raa wo duwo an i di t'ele suma.

⁵Y'a k'ooli tuddí ki ñaapu a sulfi ñoŋ ulpi tudde ti dehu geŋŋo ye, aakede ñoŋ i ki suune Raa soo ñaŋŋal ye ge d'isiyo.

⁶A urzi sulfi geŋ, wede tuuku toŋ yi isa ulsu a leemadí ye wo yi ti y' mabildá yi deha eddí ye, ise erewo toŋ iŋkino. A wede y'isiyo iŋkino geŋ i-ti dooza Galmeega ti siidí, ono eŋ ay un ti'n ruute wo ay un ti'n ñoolo sey.

⁷Kine Raa y'inni wiike in gi di lekke a urzi pitiŋko dehu tudde ye, wo ñe y'inni wiike in di lekke ñoŋ ooyiso kese a yode.

⁸Kono kamo, wede y'a ti doopide a sulfi ñoŋ ay un ruute kun d'ise geŋŋo maŋ, yi koogire wedusu ye, yi koogire Raa wede un ele Unde Kamileŋ.

⁹A urzi geyyiso tudde aakede zembá geŋ, i k'ise ye baa ay un di raaje sey me, kono kune batum Raa y'un ti'n duuye a urzi geyyiso tudduguŋ me.

¹⁰Geyyiso tiŋ, tod'te ere un d'ede a tukki zembá ñoŋ pay i ziipe addaŋ a Isa a siido Maseduwan pay gettiyo. Wo ñe zembá ki nuŋ, kaye ay un t'ele kooke ay t'ese un d'odo t'iŋkino.

¹¹Kun deho lekkiyo ere ti toose ti ñuwo, kun wollo naabaguŋ, wo k'ombaguŋ kun naabo ti beyguŋ, geŋ kun iso aakede ay un ruute kun d'ise.

¹²Kun iza iŋkino maŋ, lekkiyaguŋ t'a kooná beehiye a ñaana ñoŋ i ki ziipe addaŋ a Isa ye me, wo kune toŋ kun ki tonda munda ti bey wenda ye.

Baldiya ki ñoŋ i t'inda

¹³Zembá ki nuŋ, ay dehu ay un di roote a urzi ñoŋ i t'inda, kono kun ki-t'ise sommagi dondoŋ ye, aakede ñoŋ i ki zaapu elkisadaŋ a Isa ye.

¹⁴Derec, kine in umbe Isa y'inda wo yi bilde ti diine ñoŋ unto. Geŋ iŋkino kay kane ñoŋ i ziipe addaŋ a Isa wo an t'inda geŋ, Raa y'a ti'n balda wo y'a ti'n t'okkiya kaŋ soo t'Isa a sirpadí.

¹⁵Kun ollo, ay un rootiyo eŋ ono Galmeega yi ruute: Onniyo ere Galmeega yi kimo gette, kine ñoŋ i ziipe addiŋ a Isa i lekkiyo zeere botto geŋ, in k'ooguma ye ki ñaana kane ñoŋ i ziipe addaŋ a Isa i t'inda me.

¹⁶Aame geŋ ñuwo an d'olliga ñolle, tod'te golla ki goole maaleekiyagi yi baahu parre Raa. Iŋkino yode Galmeega Isa batum y'a ñeego ti kandaane. Wo kane ñoŋ i ziipe addaŋ a Almasi wo i t'inda geŋ, an di-balda ki poone.

¹⁷Saŋ maŋ, kine ñoŋ i lekkiyo zeere botto geŋ, in d'eŋgila k'awwa ti kane kaŋ soo ekki dondari, k'okkime Galmeega a kandaane. Geŋ iŋkino, in di lekkey ti Galmeega ki daayum.

¹⁸Iŋkino maŋ kun elo kooke ti tudduguŋ t'urzi dooyiso ette.

1 Tessaloni 5

Onniyo kama Galmeega

¹Zemba ki nuɗ, i k'ise ye ay un di raaje a urzi k'onniyo, ise a urzi peedo ere suldi pay geɗ an d'aana me.

²Kune batum kun suune adda k'addugun: Onniyo ere ki Galmeega y'a kimo gette, t'aana aa wede k'oogire y'ettiyo a diddo, wenda soo toɗ umbo a suuna me.

³Aame duwo an iisa rootiso: «Ankenno kine adda toose, munda k'orgiso umbo baa» maɗ, inkiyo a kaamiki geɗ miɗ dabar baadaɗ t'a deega eedaɗ. Geɗ dabar gette t'aana a kaamiki, aakede kakkisa k'erewo addutu i t'umbe k'ehiyo, wenda soo toɗ umbo a t'alda me.

⁴Wo de zemba ki nuɗ, kune adda zimolo ye kono onniyo gette t'un di'n kiira sutte aa wede k'oogire me.

⁵Kune donɗ ki toore Raa, lekkiyagun aa a onnu. Kine ki diddo ye, ki zimolo ye.

⁶Inkiyo maɗ in t'udige ye aa kane donɗ ongo me, wo de in lekko zeere, tuddin in ti soodo.

⁷Kane donɗ i moone geɗ an moone a diddo, wo donɗ i sobo toote i ceeriyo eedaɗ geɗ an sobo a diddo.

⁸Wo de kine donɗ lekkiyadiɗ aa a onnu geɗ, tuddin in ti soodo. In lekko a urzi zaapu k'adiɗ a Isa wo ti geyyiso tuddin, kane geɗ a kine aakede asigursu yi t'usse saapa. Wo in zaapo elkisadiɗ a Raa wede yi'n utte kono zaapu k'elkiso gette, tod'te aakede asigursu yi t'usse kakkile maala.

⁹Kine Raa yi dihe y'inni wiike toc miɗ y'a ki deka booro eediɗ ye, wo de y'inni wiike kono in t'ooney uttiyo t'urzi Galmeegiɗ Isa Almasi.

¹⁰Isa y'inda kono kine, inkiyo a kamadi gette ise kine in lekkiyo zeere, ise in t'inda toɗ maɗ, in lekkiyo kettiyo kaɗ soo ti yode.

¹¹Inkiyo maɗ kun elo kooke wo kun noogo tuddugun kono kun di t'ihira a urzi zaapu k'addugun a Isa, wo ni suune naabo gette kun isiyo too.

Toose ti kooke wede ki dangu

¹²Zemba ki nuɗ, ay un di roote'ɗ, kun an ottilo a donɗ oodibe yeebadaɗ a naabo ere a diinagun, kane donɗ Galmeega y'an ele urzi an un di'n dokkiyo wo an un di'n aapudu geɗ me.

¹³Kono naabo ere an isiyo a kune gette, kun an ottilo baadaɗ wo kun'ni geyyo. Kun lekko ti toose ti tuddugun.

¹⁴Zemba ki nuŋ, ay un t'eele kooke, ay t'ese'ŋ: Doŋ golguwo kun aapaŋ, doŋ an d'ede orgiso addaŋ kun an eelo kooke, kun noogo doŋ weedayaŋ umbo wo kun lekko t'ombiŋe ti duwo pay.

¹⁵Kun koonaa mentikagi, wenda soo toŋ a bakadi yi-kima ulsuko t'ulsuko ye, wo kun deho daayum isiyo beehiyko ti tudduguŋ wo ti duwo pay.

¹⁶Kun lekko daayum t'unŋsuwo,

¹⁷kun tondo Raa daa puukiyo,

¹⁸aame ize munda tuuku toŋ maŋ, kun rooto koduwo a Raa. Genno suldi doŋ Raa yi dehu kun d'ise a urzi lekkiyaguŋ ere kettiyo kaŋ soo t'Isa Almasi te.

¹⁹Kun i t'eegire ye a naabo k'Unde Kamileŋ te.

²⁰Kun'ni kiigira ye ono doŋ Raa y'agisa zemba an un di rootiyo geŋ me,

²¹wo de ono geŋ kun ti'n wollo pay: Doŋ beehiye kun di zaapo adduguŋ,

²²wo kun ti ledfo t'ita suldi doŋ ulpi tuuku toŋ maŋ.

²³Geŋ Raa wede i d'eliyo toose geŋ, yode batum y'un ti'n iso doŋ ooyiso kese a yode a urzi lekkiyaguŋ ere pay gette, y'unni booho pay, yi booho tudduguŋ, unduguŋ, wo biza k'ulbuguŋ. Inŋkino maŋ a onniyo ere Galmeegiŋ Isa Almasi yi kimo gette, wenda y'a ki roota k'ulsuko a tukki kune ye baa.

²⁴Raa wede unni waaku geŋ, yoŋ yi seedu zakidi a munda wede yi rootiyo y'aasa me, geŋ yi t'isa suldi geŋ me.

²⁵Zemba ki nuŋ, kun tondo Raa kay kono kaye me.

²⁶A zemba pay kun an t'iso toose kaŋ bey sire sire aa zemba.

²⁷Wo aŋkeŋ kun ollo, n'un di rooto ti suma Galmeega, mattup ette kun an ti-garoy a zemba pay.

²⁸Geŋ beeko ki Galmeegiŋ Isa Almasi ti koonaa egguŋ.

2 Tessaloni

2 Tessaloni 1

Toose ki Pool

¹Mattup ette i raaniya nuɗ Pool ti Silas wo Timote, a kune ɗoɗ ogiyo ti suma k'Isa a geeger Tessaloni, kune ɗoɗ ki Meegiɗ Raa wo ki Galmeega Isa Almasi.

²Geɗ beeko ti toose ki Meegiɗ Raa ti Galmeega Isa Almasi i koonaa eggun.

Booro ere a onniyo k'ita

³Zemba ki nuɗ, i dehu ay di roote daayum koduwo a Raa kono kune geɗ me. Eyye geɗ a urzutú ay di roote koduwo a Raa me, kono urzi zaapu k'addugun a Isa geɗ yi neeriyo ki neeriyo, wo geyyiso ere un d'ede ti tuddugun gette t'aagulu k'aagulu.

⁴Kono kamo kaye ulbey ay d'isiyo unse, sundugun ay gi di sedfiyo ye a diine ɗoɗ ki Raa ogiysito ti suma k'Isa, kono kun seedu zakidi a urzi zaapu k'addugun a Isa me, kun d'ombiɗe a dabar ere duwo an unni dabirsa wo ti sulfi ɗoɗ ooɗe un ettiyo geɗ me.

⁵Kane sulfi geɗ i-kaza Raa yi dekkiyo booro ere ki diine, wo t'urzi kane geɗ kun t'isa ɗoɗ iide kun t'etta ki Moziko Raa. Kono tode gettiyo kun dabirsa me.

⁶Derec Raa yon ki diine, kane ɗoɗ un oofibe yeebagun geɗ san Raa y'an d'oofiba yeebadan kay.

⁷Wo a kune ɗoɗ oofibe yeebagun geɗ, san kun t'oonaa puukiyo ti kaye. Geɗ aasa a onniyo ere Galmeega Isa yi-kimo ti kandaane ti maaleekiyagi ɗoɗ toogo, y'a kiza tuddi a duwo pay.

⁸Y'etto ti uwwu bila bila, kono y'an ti-dooza a kane ɗoɗ i ti toogiyo ki suuniyo Raa wo ki sooru ekk'ono ɗoɗ ki Rabila Majjaanawa ki Galmeegiɗ Isa geɗ me.

⁹Kane geɗ dangayadan Galmeega y'anni dagga ki daayum, dokki ti daanadi wo dokki ti toogo daryikadi.

¹⁰Geɗ aasa a onniyo ere Galmeega yi-kimo, inkiɗo man kane ɗoɗzi an di y' t'imma, wo ɗoɗ pay i ziipe addan a yode geɗ an di seeda gaggiraɗ k'unusuwo. Kune pay addaga ti kane, kono kun umbe a ono ɗoɗ ay un gizite.

¹¹Kono kamo ay tonɗiyo Raa daa puukiyo kono kune geɗ me. Ay tonɗiyo Raaziɗ y'un di'n ise ɗoɗ iide a urzi lekkiyo ere y'unni wiike. Ay tonɗiyo Raa sey, t'urzi toogadi y'un di'n nooge k'isiyo sulfi ɗoɗ pay beehiye kun dehu kun d'ise, kono kun ziipe addugun a Isa.

¹²Inkino t'urzi kune, duwo an t'imma suma ki Galmeegiŋ Isa, wo yode toŋ y'un di'n t'imma kay. Suldi pay geŋ aasa t'urzi beeko Raaziŋ wo ti Galmeegiŋ Isa Almasi.

2 Tessaloni 2

Munɗa wede ki poone etto t'onniyo kama Galmeega

¹Zemba ki nuŋ, a urzi kama Galmeegiŋ Isa Almasi wo ti ogiysadiŋ ere kaŋ soo a daanadi gette, ay un di rooto:

²Aame wenda y'un ruuta onniyo Galmeega y'a kimo gette t'iina baa maŋ, geŋ kesiko egguŋ ti dagga ye wo kun addira ye. Aame yi ruuta ono eŋ doŋ Raa y'igibo, ise ono eŋ ettiyo ti bize kaye, ise ono eŋ ettiyo t'urzi mattup ere kaye gi riine toŋ maŋ, onami kun amba ye.

³Kun i oola urzi a wenda soo toŋ y'un ti'n mabilɗa ye t'urzi tuuku toŋ maŋ. I dehu doŋ baadaŋ Raa an di y' kiigira doo miŋ, saŋ onniyo gette t'a aana kollo, wo soŋ Goole doopide k'oogoro Raa geŋ tuddi y'a ti kiza do, yoŋ wede Raa y'a yi dagga adda dabar ere ki daayum geŋ me.

⁴Yoŋ geŋ y'a-tooga, y'a ti-kila tuddi t'ekki suldi pay doŋ duwo an ottilso wo an elkiyo raazaŋ geŋ me. Inkino y'a t'etta k'adda Boy Raa, y'a-koonaa addaga y'a t'eesa yode batum miŋ Raa.

⁵Un dunde ko, suldi doŋ n'un ruute aame nuŋ di kune botto geŋ me?

⁶Wo aŋkenno, kun suune munda wede i ti y' seedu Goole doopide k'oogoro Raa me. Inkino yi kiza tuddi a duwo pay geŋ a onniyo ere Raa yi dehu danjal.

⁷Toogo ere kaŋ ombide i dokkiyo duwo an a di doopide oogoro Raa gette, aŋkenno ti naabiya adda duniya me. Wo de aame munda wede i ti seedu toogo gette Raa yi y'irga maŋ, tod' ti ki naaba kaŋ ombide ye baa.

⁸Inkino maŋ, saŋ Goole doopide k'oogoro Raa geŋ y'a kiza tuddi, wo Galmeega Isa yi-gimo maŋ, y'a yi t'ida ti maaye wede adɗa ti bizi, y'a ti y' niida ti toogadi.

⁹Aame Goole doopide k'oogoro Raa y'etto ti toogo ere ki Meeda siitandani geŋ, y'aasa ita suldi doŋ tuuku toŋ maŋ i-kaza yoŋ toogo, suldi k'armika, wo ti suldi doŋ i ceeriyo eego ki daggiya duwo.

¹⁰T'urzi suldi doŋ ulpi tuuku toŋ maŋ geŋ, y'a mabilɗa kane doŋ i t'umbe urzi daggiya genno. Kane an daggiya kono an k'umbe ye, wo an ki ti giyye ye derec ki Raa ere t'an di'n utte gette.

¹¹Kono kamo Raa y'an d'agisa toogo ere ki daggiya ti di rooniso addaŋ, an d'ambu a suldi doŋ ki lohito k'ono genno.

¹²Inkino maŋ kane doŋ pay i k'umbe a ono doŋ derec ki Raa ye, wo ulbaŋ an isiyo unŋe k'isiyo munda wede ki diine ye geŋ, Raa y'a deŋka booro eedaŋ.

Seedu zakidi a urzi zaapu k'adde a Isa

¹³Zemba ki nuŋ, kune doŋ Galmeega yi giyye, i dehu kaye ay di roote koduwo daayum a Raa kono kune geŋ me. Ay isiyo inkino kono kune Raa y'unni biire t'ume k'eesiyo duniya too, kono kun d'utte t'urzi naabo k'Unde Kamileŋ t'un di'n ooyiso kese a Raa, wo t'urzi zaapu k'addugun a derec ki Raa.

¹⁴Geŋ a suldi geŋno Raa y'unni wiike t'urzi Rabila Majjaanawa ere ay un gizite te, kono yi dihe kun t'ooney gooliko ti Galmeegiŋ Isa Almasi.

¹⁵Inkino maŋ zemba ki nuŋ, kun soodo zakidi wo kun ti booho beehiye dooyiso ere ay unni duuye gette, ise kaŋ bizey, ise t'urzi mattup toŋ maŋ.

¹⁶Geŋ Meegiŋ Raa y'inni giyye, wo t'urzi beekadi y'in ti'n selliyo ki daayum wo in zaapu elkisadiŋ ekki munda wede beehiye. Inkino ay ton-diyo yode Raa ti Galmeegiŋ Isa Almasi batum,

¹⁷kono an un ti'n selle wo an un t'eele toogo kun d'ise daayum beehiye ise t'urzi naabo, ise t'urzi k'ono bizigun toŋ maŋ.

2 Tessaloni 3

Kooke a urzi ton-diyo Raa

¹Inkino ki daŋgu zemba ki nuŋ, kun tondo Raa kono kaye, kono ono Galmeega a-teepe kesiko wo doŋ pay an di y' t'imme aakede a ize di kune.

²Kun tondo soŋ kono Raa y'ay ti'n ledde ti doŋ ulpi wo bundidi an ay ki d'ise ulsu ye. Derec, doŋ baadaŋ an ki ziipe addaŋ a Isa ye.

³Wo de yo Galmeega yi seedu zakidi a munda wede yi ruute y'aasa me, y'un t'ela toogo a urzi zaapu k'addugun a Isa wo y'un di'n booha kun ki t'ooro bey Mohita k'oldiko ye.

⁴T'urzi lekkiyo ere kettiyo kaŋ soo ti Galmeega gette, ay suune adda k'addey munda soo kono kune me: Munda wede ay un rootiyo kun d'ise geŋ kun di y'isiyo, wo kun d'isiyo inkino ki daanagun.

⁵Geŋ Galmeega yi dokko biza k'ulbugun kono kun di geyye Raa, wo kun di seeda zakidi aa ki Almasi y'a ziida zakidi bini daŋgu.

Kooke a urzi naabo

⁶Zemba ki nuŋ, ay un rootiyo ti suma Galmeega Isa Almasi munda wede kun d'ise'ŋ: Kun ti ledde dokki ti zemba doŋ pay i ziipe addaŋ a Isa kane golgagi geŋ me, wo sooruzan a ki t'ettiyo ye a urzi dooyiso ere ay unni duuye te.

⁷Kune batum kun suune beehiye mummino kun di dooze urzi lekkiyadey me. Aame kaye di kune geɗ, ay ki likko lekkiyo ere ki ɗoɗ golguwo ye.

⁸Kaye k'ombadey ay ki tunde bey wenda ye. Wo ɗe ay d'iyye oodibe yeebe ti ormiyo naabo oŋŋu didɗo toɗ maɗ, kono ay ki dihe ye ay i t'ele attidi a wenda soo toɗ ti diinaguɗ me.

⁹Derec, ay d'ede urzi kun ay di'n nooge, wo ɗe ay niibe ti beezey kono kun di wolle urzizey wo kun di dooze.

¹⁰Geɗ iɗkino, aame kaye di kune geɗ ay un di ruute munda wede kun d'ise, ay'de: «Wede yi ki dehu yi ki naabe ye maɗ, ombo toɗ kun i-t'ele ye.»

¹¹Ay rootiyo iɗkino kono ay ollige rabilaguɗ, ɗoɗ oŋgoɗ ti diinaguɗ kane golgagi, ita naabadaɗ umbo wo an t'eliyo eedaɗ ki lattiya naabo ɗuwo.

¹²A kane ɗoɗ iɗkino geɗ, ti suma Galmeegiɗ Isa Almasi ay an t'eele kooke, wo ay an di roote munda wede an d'ise me: Kane batum an naabo t'adde soo k'ombo bizaɗ me.

¹³Wo zemba ki nuɗ, kune'ɗ kun iso beehiyko daayum kun t'orme ye.

¹⁴Aame wede yi tuuga k'ollige k'ono ɗoɗ ay riine adda mattup ettiyo maɗ, kun an yi kaza a zemba wo kun di ledɗo ti tuddi me, kono yi seeda sukiyagi.

¹⁵Yoɗ geɗ kun yi wolle aa adu ye, wo ɗe kun y'aapa aakede kun aapuɗu leema.

Toose ere ki ɗangu

¹⁶Geɗ Galmeega i d'eliyo toose, yode batum y'un elo toose daayum t'urzi tuuku toɗ maɗ, wo yi koono ti kune pay.

¹⁷Ono ɗoɗ ki toose eɗ, i raaniya nuɗ Pool batum ti beezó. Geɗ iɗkino n'a-ti raaniya sundó, a mattupiyagó ɗoɗ pay ni raaniya me.

¹⁸Geɗ beeko ki Galmeegiɗ Isa Almasi ti koono eggun pay.

1 Timote

1 Timote 1

Toose ki Pool

¹Mattup ette i raaniya nuŋ Pool, wede zina k'Isa Almasi aa Raa Wede k'Uttiyadiŋ y'a ruute, wo ti Isa Almasi yoŋ in zaapu elkisadiŋ eego.

²Ni raaniya a kee Timote, kee wede a nuŋ aa ulo k'addó a urzi zaapu k'adde a Isa me. Geŋ beeko, isiyo adde koduwo, wo toose ki Meega Raa ti ere ki Galmeegiŋ Isa Almasi i koonaa eedá.

Doŋ eliyo dooyiso ere oldó

³A eŋgilsadó ki siido Maseduwan geŋ n'a di ruute munda wede k'aase, wo aŋkeŋ n'ay di-doolo sey, ki lekko a geeger ki Epez kono k'an di roota a doŋ eliyo dooyiso ere ti doolo a ki t'ettiyo a urzi k'Almasi ye gette, an d'ôhira.

⁴Wo k'an ti rooto an oolo kazita taaya ere daayum daa k'urzutú, ti d'ippiyo k'ita moŋgidagi doŋ i ki daŋgu ye geŋ me, kono kane geŋ i d'eliyo niikiyto wo a ki noogiyo ye a naabo Raa ere in isiyo a urzi zaapu k'adde a Isa te.

⁵Nuŋ n'a-rootiyo ono eŋ kono kun di geyye tudduguŋ ti geyyiso ere ettiyo t'urzi k'adde doŋ kamileŋ, t'urzi k'elkiso ere kun di suune munda k'ulsuko a tudde umbo, wo t'urzi zaapu k'adde a Isa t'adde soo.

⁶Doŋ oŋgo urzi wede majjaane eŋ an d'iili, an t'umbe urzi wede ki niikiyto ki bita.

⁷A urzi k'oogoro Raa an elkiyo kane doŋ suuniyo, wo a munda wede kane an elkiyo an yi suune beehiye geŋ, urzi i rootiyo munda toŋ an ki y' suuniyo ye.

Naabo k'oogoro Raa

⁸Derec, kine in suune oogoro Raa tod'te beehiye, aame in sooru eego maŋ.

⁹Inkino in suuno koduwo, oogoro gette a doŋ i sooru ki diine, Raa yi ki ti t'elo ye. Tod'te yi t'elo a doŋ i koliyo t'ekki duwo wo a doŋ i-ti tuuge a yode Raa, a doŋ isiyo naabo oldó wo a doŋ k'oldfiko, a doŋ i k'ottilso a Raa ye wo a doŋ oŋyilse suldi doŋ kamileŋ ki Raa, a doŋ i tôwwo meege ise meede wo a doŋ i tôwwo duwo mirsi.

¹⁰Yi t'elo soŋ a doŋ boliyo, a kule y'ebirso bakadí, a doŋ k'owilte bulagi, a doŋ lohito k'ono, a doŋ k'alzutu waawiye, wo a doŋ pay isiyo naabo ere oldó a ki t'ettiyo ti dooyiso ere derec ki Raa ye.

¹¹Ono doŋ ni rootiyo eŋ a-t'iide a Rabila Majjaanawa ere Raa y'o ele a beezó n'a kizite, ono doŋ iido ti Raa goole a jiire pay, yoŋ urzi k'uŋsuwo.

Tamma ki Pool a beeko ere ki Raa

¹²Nuɲ n'a roote koduwo a Galmeegiɲ Isa Almasi, yode wede y'o d'ele toogo ere n'a aane n'a t'ise naabadó ette. N'a roote koduwo sey kono yi ni wulle nuɲ wede ni seedu zakidí a naabo, iɲkino yi ni biire ni-d'ise naabadí,

¹³nuɲ wede ti kaaga n'a gildite sundí, n'a dibire doɲzɪ wo n'an d'ize ulsu baadaɲ. Wo toɲ y'o d'ize adde koduwo, kono naabo ere n'ize gette ni ki suune ye, kono nuɲ botto ni ki ziipe addó a yode ye.

¹⁴Yode Galmeegiɲ y'o d'ele beekadí daa dooziyo a tukki nuɲ, y'o d'ele urzi n'a ziipe addó a yode wo geyyiso ere ettiyo t'urzi lekkiyo kettiyo kaɲ soo t'Isa Almasi.

¹⁵Eyye, kane ono doɲ ni roota eɲ d'erec a urzizaɲ, kine pay in d'ambe eego: Isa Almasi y'iido ki duniya kono y'a utta doɲ k'oldíko. Geɲ nuɲ wede k'oldíko a di jiire ti diinayaɲ me.

¹⁶Wo geɲ kono k'iɲkino Raa y'o d'ize adde koduwo: T'urzi nuɲ wede k'oldíko a di jiire ti diine doɲ k'oldíko pay geɲ, Raa y'a dihe Isa Almasi y'a k'ize ombiɲadí pay a tukki nuuno. Ombiɲadí gette aa urzi a doɲ etto k'ita an di wolla an daana, kono an zaapa addaɲ a yode wo an t'oona lekkiyo ere ki daayum.

¹⁷A mozigo wede yi lekkiyo ki daayum, yi k'unto ye, wenda ki ki y' wolle ye, yoɲ Raa soo daɲɲal, iɲkino suma ti tamma a yode ki daayum! Eyye.

¹⁸Timote ulo ki nuɲ, ono eɲ nuɲ n'a ele k'anni booho, kane eɲ a-t'iide a ono doɲ nebiyagi an ruutite ti kaaga kono kee. Kane ono geɲ a di koone toogadá a d'eyyiso ere ki diine ki d'eyya gette.

¹⁹Urzi zaapu k'adde a Isa wo elkiyo ere k'a suune munda k'ulsuko a tudde umbo geɲ k'anni booho. Doɲ oɲgo an di giigira elkiyadaɲ ere an di suune munda eɲ beehiye eɲ ulsu gette, iɲkino urzi zaapu k'addaɲ a Isa an d'iili, an di zildíti.

²⁰Ti diinayaɲ i d'ede Imene wo Alegzandire, kane geɲ n'an di'n iili a bey Meeda siitandani kono an di suuna koduwo, suma Raa an ki kilda ye baa.

1 Timote 2

In tondo Raa ki doɲ pay

¹Iɲkino maɲ ni dehu ki poone'ɲ, kine in tonde Raa, in d'ahila, in sippe bere wo in roote koduwo a Raa kono duwo pay.

²In tonde Raa kono mozagi wo ki doɲ pay an d'ede urzi ki dokkiyo, kono in di lekke lekkiyo ere deddek ti toose, in di koone ti ottilso wo in di lekke kettiyo ti Raa.

³Geɲ munda wede beehiye wo i-d'ise uɲse a Raa Wede k'Uttiyadiɲ.

- ⁴Wo yoŋ yi dehu ɗuwo pay an d'utte wo an t'etto an di suune urzi wede ɗerec.
- ⁵Ɗerec, Raa yoŋ soo ɗaŋŋal, wo wede i konso a diine kine ɗuwo ti Raa, yoŋ soo ɗaŋŋal, Isa Almasi.
- ⁶Yode wede y'a ele tuddi kono y'a t'adde ɗuwo pay t'adda k'oldikadaŋ. Inŋkino unto k'Isa a onniyo ere Raa y'ele gette, i-kaza Raa yi dehu ɗuwo pay an d'utte.
- ⁷Geŋ inŋkino Raa y'a n'ize wede zina k'Isa wo wede kazita k'onami, y'o d'ele urzi n'a dooye ɗoŋ Yawudiyagi ye a urzi zaapu k'adde a Isa wo a urzi wede ɗerec ki Raa. Ni rootiyo eŋ ɗerec, ni ki lohito ye.

Lekkiyo kuuli ti erayi

- ⁸Inŋkino maŋ ni dehu a ume tuuku toŋ kuuli an tonde Raa, an di siki beyɗaŋ ɗoŋ kamileŋ geŋ k'awwa, daa kulkuwo wo daa niiku.
- ⁹Wo ni dehu soŋ erayi toŋ an d'osse koduwo, daa makilsa, ti ottilso. An di kini eedaŋ koniyo ere a k'ambe ersa ye. An d'osse koŋgidagi wo kokkide toŋ ɗoŋ zooyayaŋ ooŋe aa ki dap ye, ise ɗogoro toŋ inŋkino. Wo kallagi ɗoŋ zooyayaŋ ooŋe an ki d'osse ye.
- ¹⁰Wo ɗe an di lekke lekkiyo ere beehiye ki diine, a-t'ette aakede ki erayi ɗoŋ an rootiyo kane lekkiyo kettiyo ti Raa.
- ¹¹A ume k'ogiyso toŋ i dehu erayi an di koone poyoyo, an d'olliga dooyiso ti ottilso.
- ¹²Urzi umbo ni k'ele ye a erewo t'a dooye, ise t'a t'ambe ettú awwa t'ekki kuuli me, t'a ti seeda tuddutu poyoyo.
- ¹³Ɗerec, ki poone Raa y'ikkima Adum, saŋ Awa kollo.
- ¹⁴Wo geŋ Meeda siitandani ti mibilɗe Adum ye, ti mibilɗe erewo, saŋ tod' ti t'iire t'a di diipida ono Raa.
- ¹⁵Wo inŋkino toŋ kane erayi an i di'n ehiyo geŋ an t'oona uttiyo, aame an aa ziida zakidi a urzi zaapu k'addaŋ a Isa, ti geyyiso tudde wo ti sooru ere ki diine kamileŋ daa makilsa, ɗoo miŋ an d'utta kollo.

1 Timote 3

Lekkiyo ɗoŋ dokkiyo ki ɗoŋ ogiyso ti suma k'Isa

- ¹Eyye, kane ono ɗoŋ ni roota eŋ ɗerec a urzizaŋ: aame wede yi dehu y'a t'ise wede dokkiyo ki ɗoŋ ogiyso ti suma k'Isa maŋ, yoŋ geŋ y'umbe naabo ere beehiye.

²I dehu wede dokkiyo geɗ y'a t'ise wede duwo an ki zaapu ono eedí ye, wede eddí soo daɗɗal, wede tuddí yi ti seedu, wede i-d'ede elkiyo, wede koduwo a lekkiyadi te, wede yi seedu duwo, wo y'aane yi dooye duwo.

³Wede dokkiyo geɗ y'a ki t'ise wede sobo ye, wede bursido ye, y'a t'ise wede tasse, yi ki niikiyto ye, wo y'a ki geyye soŋko baadaɗ ye.

⁴Wede geɗ y'aane doŋ boozí yi ti'n dokke koduwo, wo inɗizí y'a-ti'n zaape a urzi, an d'olliga onamí deldel ti ottilso.

⁵Nuɗ ni rootiyo inɗino kono aame wede yi k'aaniya dokkiyo doŋ boozí ye maɗ, mummino y'a aane dokkiyo doŋ ki Raa ogiyso ti suma k'Isa me?

⁶Aame kun zaape wede dokkiyo maɗ, a ki t'ise wede tasse yi ziipe addí a Isa kaamiki ye, para maɗ koliyo tuddí t'a yi t'ida, maɗ booro Raa t'a yi seeda, aakede ti ziida Meeda siitandani.

⁷Wo i dehu soŋ wede dokkiyo geɗ, aase doŋ ti paate i ki ziipe addaɗ a Isa ye toŋ an d'ambe taayadí ki beehiye, kono onniyo soo yi ki seeda sukiyagi a daanadaɗ ye, wo yi ki t'oore a ikka Meeda siitandani ye.

Lekkiyo diyakire

⁸Kane diyakire toŋ inɗino, i dehu lekkiyadaɗ t'a koone ti ottilso, doŋ bizaɗ soo, doŋ sobo toote ye, doŋ a ki dehe sokiyo suldí kaɗ ombide ye.

⁹Kane an di lekke kettiyo a derec ere t'iido t'urzi zaapu k'adde a Isa, ti elkiyo ere an di suune munda k'ulsuko a tuddaɗ umbo.

¹⁰Aame kun dehu kun zappe diyakire maɗ, kun ti'n naama wo kun di wollo sooruzaaɗ doo, saɗ aame duwo an ki zaapu ono a eedaɗ ye doo miɗ, naabo ki diyakire kun an t'ele kollo.

¹¹Wo erayzaɗ toŋ lekkiyadaɗ t'a koone ti ottilso, an d'ooli t'ambu suma duwo te, doŋ tuddaɗ an ti seedu wo an seedu zakidí a suldí pay.

¹²I dehu diyakire geɗ eddí soo daɗɗal, wo y'aane inɗizí ti doŋ boozí pay yi ti'n dokke koduwo.

¹³Derec, kane diyakire i naabiya naabo ere beehiye a diine doŋ ogiyso ti suma k'Isa geɗ, doŋ pay an di'n t'imme, soŋ an di roote daa k'orgiso a urzi zaapu k'adde a Isa Almasi.

Munda wede goole wo i t'iidiba ita

¹⁴Nuɗ a kee Timote n'a raaniya mattup ette kono n'elkiyo saɗ maɗ n'etta, n'a ki ti wollo.

¹⁵Wo aame ni k'iiney kesiko ye maɗ, mattup ette t'a gi di zaapey urzi mummino kee k'a lekke a diine doŋ adda boy Raa me, kane doŋ ogiyso ti suma k'Isa, kane

ɗoŋ ki Raa zeere, kane geŋ aa dundulu wo aa eesiyo k'ita boy i-seedu derec ki Raa.

¹⁶Eyye, daa niikiyo munda wede kine in d'ambe wo in di daane geŋ, yode geŋno munda wede goole wo ombide Raa yi t'iidiba ita me. Munda geŋ, yoŋ Almasi y'a iido, tuddi y'a ti-gize yoŋ wedusu. T'urzi k'Unde Kamileŋ duwo an di y' suune yoŋ wede ki diine, wo maaleekiyagi an di y' wulle. Duwo an di gizite rabiladi a ita duwo pay, wo ɗoŋ baadaŋ adda duniya an di ziipe addaŋ a yode. Raa y'a y'umbe k'awwa ki kandaane a daryikadi.

1 Timote 4

Suldi pay Raa y'ize geŋ beehiye

¹Unde Raa ti ruute kereŋ, t'ede: a onniytagi ɗoŋ ettiyo k'ita eŋ, ɗoŋ oŋgo urzi zaapu k'adde a Isa an d'oola, an di daana urzi siitandani an di dagga, wo an d'olliga dooyiso ere siitandani an an t'ela.

²Kane ɗoŋ bizaŋ sire sire wo ɗoŋ lohito k'ono geŋ, elkisadaŋ ere ki suuniyo munda eŋ beehiye eŋ ulsu gette i-litte, an ti'n digge duwo t'urzi k'onamaŋ.

³Kane ɗoŋ ulpi geŋ an dooyiso an'de, seedu k'erewo ulu, ombu oŋgo toŋ ulu pay. Wo Raa yi ziipe suldi k'ombu eŋ kono kane ɗoŋ i ziipe addaŋ a Isa, derec an ti zuune koduwo geŋ, an tonde an di roote koduwo a Raa, doo miŋ an d'oomi kollo.

⁴Eyye, suldi pay Raa yi ziipe geŋ beehiye, munda wede k'a t'eese eŋ k'ombu ulsu umbo, wo i dehu a suldi pay k'a roote koduwo a Raa, doo miŋ k'a oomi kollo.

⁵Derec, ono Raa wo tonduyo Raa geŋ an di'n isiyo suldi'ŋ kamileŋ a daanadi me.

Wede naabo beehiye k'Isa Almasi

⁶K'an t'in dooyo suldi pay eŋ a zamba ɗoŋ i ziipe addaŋ a Isa. Injino maŋ kee k'a t'isa wede naabo beehiye a urzi k'Isa Almasi me, k'an kiza a duwo kee adda uune ti ono ɗoŋ a urzi zaapu k'adde a Isa, wo ti dooyiso ere derec daayum ki diine gettiyo.

⁷Wo kee k'a-sebbo daara taydayi ɗoŋ ki bita a ki t'ettiyo a lekkiyo ere kettiyo ti Raa ye geŋ me. Ki too maŋ kee ki dooyo lekkiyo ere kettiyo ti Raa.

⁸Dooyiso ere a urzi tudde ti dehu, tod'te beehiye miŋ ki munda booloŋ daŋŋal, ki too maŋ lekkiyo kettiyo ti Raa, tod'te beehiye a suldi pay, kono t'urzi geŋ in di'n nooge a lekkiyo ere ankenno, wo in t'oonu lekkiyo ere ki daana Raa yi ruute y'in t'ela.

⁹Eyye, kane eŋ ono ɗoŋ derec a urzizaŋ, kine pay in d'ambe.

¹⁰Geŋ iŋkino kine in oodibe yeebadiŋ wo in deyyiso miŋ kono in ziipe elkisadiŋ a Raa zeere, yoŋ Wede k’Uttiyo d’uwo pay, wo a jiire d’oŋ i ziipe addaŋ a Isa.

¹¹Enno munda wede k’an di roote an d’ise wo k’anni dooye me.

¹²Ki oola wenda soo toŋ yi ki-kiigira ye kono kee obulso geŋ me, wo lekkiyada t’a koone aa urzi a kane d’oŋ i ziipe addaŋ a Isa an di wolle an di daane: t’urzi k’onama, t’urzi sooruzá, t’urzi geyyisada, t’urzi zaapu k’adda a Isa, wo t’urzi lekkiyada ere kamileŋ gette.

¹³Koore ki delliyo aaniyado geŋ, k’elo tudda ki gariya k’ono d’oŋ an riine ti kaaga adda mattup ki Raa a daana d’uwo pay, k’anni dooyo wo k’an d’eelo kooke.

¹⁴Aame d’uwo an ruutite ono d’oŋ Raa y’igibo wo d’oŋ dokkiyo ki d’oŋ ogiyo ti suma k’Isa an ay di ziipe bezaŋ geŋ, kee k’a uune munda wede Unde Kamileŋ t’eliyo. Iŋkino kee tudda ki eeze lassiy ye.

¹⁵A suldi pay eŋ k’a soodo adda k’adda, k’a elo tudda pay a naabadá. Iŋkino maŋ d’oŋ pay an di wolla naabadá t’engilso ki daana.

¹⁶Geŋ a lekkiyada ti dooyisada k’a d’elko, k’a soodo zakidi a suldi pay geŋ me. Aame k’iza iŋkino maŋ, kee batum k’a utta, wo k’a utta d’oŋ i ki k’ollige pay.

1 Timote 5

Naabo a daana zamba d’oŋ i ziipe addaŋ a Isa

¹Aame ki-guune ti wede goole maŋ, ki y’ambe saac ye, ki eelo kooke ti golla tasse aa yoŋ meega. Wo d’oŋ obilagi k’an eelo kooke aa zembada kuuli,

²erayi gooldali k’an eelo kooke aa maawa erayi, wo d’oŋ konazi toŋ iŋkino aa zembada erayi, k’an eelo kooke t’adde d’oŋ pay kamileŋ.

³Mandaydayi d’oŋ toc d’oŋ noogiyadaŋ umbo geŋ, ki’ni geyyo wo k’anni noogo.

⁴Wo aame mandaayawa i-d’ede a beytu inni koo inni k’innitu koo maŋ, i dehu kane geŋ ki poone an d’ise aa urzi lekkiyo kettiyo ti Raa yi rootiyo, an di geyye d’oŋ boozan wo maawan an di’n modde aa kane an’ni mudde. Iŋkino geŋ ki kotto Raa ulbi i-d’ise unse.

⁵Mandaayawa ere toc wede noogiyatu umbo, daa k’inni beytu gette, ti zaapu elkisatu pay a Raa, ti tondiyo Raa diddo onnu ti k’ohire ye kono y’a di nooge.

⁶Wo ki erewo ere elkiyatu pay a unsuwo ki suldi d’oŋ tuddutu ti dehu geŋ, ti lekkiyo toŋ ettu aa t’inda baa.

⁷Soŋ enno munda wede k’an di roote mandaydayi an d’ise, kono d’uwo an ki zaape ono eedaŋ ye.

⁸Aame wede taasiyagi yi ki'n seedu ye, wo a jiiire don boozí yi ki'n seedu ye man, yon gen yi giigira urzi zaapu k'adde a Isa, wede yi ki ziipe addi a Isa ye gen yi y' jiiire sey.

⁹Erewo mandaayawa kun di raane sundutu adda mattup ki mandaydayi kun di nooge te, i dehu ozzinagutu fiide ada zoot doo. Wo son i dehu t'ume to konso min ti ziida kulatu soo,

¹⁰wo tode gette a koduwatu duwo an ti tamma ki naabatú ere beehiye gette: innitú ti'n uudibe beehiye, torgagi ti'ni ziida, don ki Raa t'anni nuuge a naabo, don an k'ede munda ye t'anni nuuge, wo tod' t'ize ita naabo ere pay beehiye.

¹¹Wo ki mandaydayi don kodiyagi gen, kun ki raane ye sudañ adda mattup ki mandaydayi te, kono aame gen unsuwo tuddañ t'an ki'n oola ye, an sedda kuuli, urzi k'Almasi an d'oola.

¹²Aame don an isiyo inkino man, booro ti'ni ziida kono an ti litte onaman don an ruute ti poone a urzi k'Almasi.

¹³Wo son kane don golguwo, an t'eliyo ompiso boydi k'eeban. Wo a di jiiire sey, an t'ize don bakkiya, munda ki rootiyo ye ton, an di y' rootiyo, wo munda ki kane ye ton, an d'ooriyo adda.

¹⁴Kono kamo nun ni dehu mandaydayi don kodiyagi gen, an di sedde kuuli, an t'ehe wo an seeda boydizan, kono don k'aduzin an ki t'oono urzi ki k'alditadin ye.

¹⁵Ni rootiyo inkino kono mandaydayi ongo urzi wede ki diine an iili baa, an daaniya Meeda siitandani.

¹⁶Aame erewo ere ti ziipe addutu a Isa gette taasiyagutu mandaydayi ede man, tode gette t'a di'n nooge. Ti k'ooli attidizan a don ogiyo ti suma k'Isa ye, kono kane an di wolle mandaydayi don toc an k'ede don noogiyadan ye.

Don dokkiyo ki don ogiyo ti suma k'Isa

¹⁷Don dokkiyo don i dokkiyo beehiye gen, an d'ede urzi kun an d'ottila baadan, a jiiire a don an d'ede naabo attidi ki kazita wo ki dooyiso k'ono Raa a duwo.

¹⁸Ono en an riine ti kaaga adda mattup ki Raa, an'de: «Aame buru yi sara mudu kan onyilse man, bizi ki ti t'ele baara ye», wo son «Wede naabo gen ranndadi ya ti t'one.»

¹⁹Aame wenda yi sakiya a tukki wede dokkiyo man, kee k'ambe ye, i dehu don sire t'ado i wulle wo illiga munda genno doo min kollo.

²⁰Don isiyo oldiko gen ki'n aapan a daana duwo pay, kono don ongo ton an d'orgide k'isiyo k'oldiko me.

²¹Kee k'ollo n'a rootiyo eŋ a ɗaana Raa, a ɗaana k'Isa Almasi wo a ɗaana maaleekiyagi ɗoŋ yi biire a yode: a dooyiso ette k'a soodo, ɗuwo ki'ni wollo pay miŋ kaŋ soo, wo t'urzi naabadá ki ki ŋaay'a a wede tuuku ye.

²²Kee ki naare ye zaapu beezá a ekki wede kono y'a naabe a diine ɗoŋ ogiyso ti suma k'Isa me. Aame k'iza iŋkino maŋ, geŋ aa k'a ti gitte kaŋ soo a oldiko ki ɗoŋ doolo. Kee batum ki ti booho tuddá kamileŋ.

²³A urzi k'eeni k'addá wede daayum geŋ, ki sibe ahu ɗaŋŋal ye, wo k'a goomo toote k'iŋŋi biŋ booloŋ.

²⁴Oldiko ki ɗoŋ oŋgo gette an di wolleiyo kereŋ ki poone an d'isa booro geŋ me, wo ki ɗoŋ oŋgo soŋ an t'ise booro ɗoo miŋ, a t'oodiba ita kollo.

²⁵Iŋkino kay ki naabo ere majjaanawa gette an di wolleiyo kereŋ, wo naabo ere majjaanawa wo ombide gette, bini saŋ a t'oodiba ita.

1 Timote 6

Bulagi ti galmaawaŋ

¹Kane ɗoŋ pay bulagi geŋ, i dehu an aa d'elke a galmaawaŋ me, kane an d'ede urzi an an d'ottile t'addaŋ pay, kono suma Raa ti dooyisadiŋ wenda soo toŋ y'a ki'n kilde ye.

²Aame kane bulagi geŋ an d'ede galmaawaŋ an ziipe addaŋ a Isa maŋ, i dehu a ottilso an an ki baate ye kono an elkiyo kane zemba toŋ maŋ. Ki too maŋ an an di naabe beehiye a ceere, kono galmaawaŋ ɗoŋ i ziipe addaŋ a Isa, kane ɗoŋ Raa yi giyye toŋ maŋ. Geŋ iŋkino ono ɗoŋ k'a dooya ɗuwo wo k'an t'eela kooke me.

Dooyiso ere majjaanawa ti ere oldo

³Aame wede y'eliyo dooyiso ere ti doolo wo yi t'addiya ti ono ɗoŋ ɗerec ki Galmeegiŋ Isa Almasi wo ti dooyiso ere a ki t'ettiyo a urzi lekkiyo kettiyo ti Raa ye maŋ,

⁴yoŋ geŋ koliyo tuddí ti y'iide, munda yi ki suune ye. Elkiso adda k'addí tiŋ a tukki suldi ɗoŋ pay ki niikiyto a tukk'ono oŋgo ɗaŋŋal. Geŋ t'urzi geŋŋo ettiyo kolbiso, niikiyto ono k'ulpi, kaldita tudde, elkiso ere oldo a tukki wede,

⁵wo niikiyto ere baadaŋ i ki ɗaŋgu ye a diine ɗoŋ elkisadaŋ oldo. Kane geŋ ɗerec an ki ti suune ye, an elkiyo t'urzi lekkiyo kettiyo ti Raa gette, kee wede k'a t'ise ki laale.

⁶Geŋ ɗerec, lekkiyo kettiyo ti Raa gette tod'te aa laale wede baadaŋ, aame wede tuuku ulbí i isiyo uŋse a munda wede i-d'ede geŋŋo maŋ.

⁷Iŋkino in suune aame an in ehe a duniya kine munda in k'umbo ye, wo in di t'inda toŋ in k'aana munda in k'amba ye.

⁸Inkino geŋ aame kine in d'ede ombo ti ossiyo maŋ, ulbiŋ aase uŋse eego.

⁹Wo doŋ i dehu an t'ise doŋ laale doo geŋ, an t'ooriyo adda naamiya daggiya, an d'isiyo suldi baadaŋ ulpi tudde ti dehu k'isiyo k'oldiko, kane geŋ an d'an t'ettiyo duwo ki daggiyadaŋ, an t'uuta aa uwwu t'oggiyo biino.

¹⁰Derec, geyyiso soŋko baadaŋ tod'te sotto k'oldiko ere tuuku toŋ maŋ. Doŋ oŋgo an di-geyyiso soŋko te, inkino maŋ kane geŋ an t'udde dokki t'urzi zaapu k'adde a Isa me, an di dabira baadaŋ kono k'oldikadaŋ.

Sooru beehiye a urzi k'ono Raa

¹¹Wo kee wede Raa geŋ, a suldi pay eŋ ki t'aldu. Wo k'a deho lekkiyo ere ki diine, lekkiyo kettiyo ti Raa, urzi zaapu k'adde a Isa, geyyiso, ombiŋe wo tassuwa.

¹²Urzi zaapu k'adde a Isa geŋ, yoŋ aa deyyiso ere ki diine. Inkino maŋ kee ki deyyo deyyiso gettiyo. K'a soodo a lekkiyo ere ki daayum, kono kee Raa yi ki wiike k'a ti zuune, aame ki t'iiziga a daana doŋ baadaŋ an d'illiga k'a ruute onamá doŋ beehiye kee ki ziipe addá a Isa me.

¹³Wo aŋkeŋ k'ollo n'a di rooto, a daana Raa wede i d'eliyo lekkiyo a suldi pay, wo a daana k'Isa Almasi wede y'a ruute onamá doŋ beehiye a daana Pons Pilat, y'a illiga yoŋ yi ziipe addí a Raa:

¹⁴Ono doŋ n'a ruute geŋ ki'ni soodo zakidi, k'a lekko kamileŋ wo duwo an ki d'ambe sundá k'ulsuko ye, bini aaniya ki Galmeegiŋ Isa Almasi.

¹⁵Aaniyadi gette y'aana a onniyo ere Raa y'ele ti t'iida doo: yoŋ goole soo daŋŋal, urzi k'uŋsuwo, Mozigo mozagi wo Galmeeki galmaawi.

¹⁶Yode siidí i k'unto ye me, ume yi lekkiyo i ralita wic wic, wenda soo toŋ y'a k'ette sirpa ye. Wede tudde umbo yi ki y' wulle ye wo yi k'aane yi ki y' wolle ye. Suma wo toogo a yode, ki daayum! Eyye.

¹⁷Kee k'an rooto a doŋ laale a duniya eŋ, an ki kili tuddaŋ ye, wo an ki zaape elkisadaŋ a laale wede saŋ a daŋga geŋŋo ye, wo de an di zaape elkisadaŋ a Raa. Yoŋ y'in d'eliyo suldi pay ti mozuwo kono kine in d'isiyo uŋsuwo.

¹⁸K'an rooto an iso naabo ere beehiye, an t'iso doŋ laale ki naabo ere beehiye, an t'iso wasigale, munda an an t'eele a doŋ oŋgo toŋ maŋ.

¹⁹Inkino geŋ an okumso laale beehiye wo zakidi ki daana, kono an t'ooney lekkiyo ere ki kotto.

Toose ere ki daŋgu

²⁰Timote ulo ki nuŋ, kee suldi doŋ Galmeega y'a ele eŋ, ki'ni booho koduwo. Milinso ere ki bita a ki t'ettiyo a lekkiyo ere kettiyo ti Raa ye, ti elkiso ere butte ettiyo t'urzi suuniyo wede gette, kee ki t'aldu.

21Don ongo an t'umbe urzi suuniyo gettiyo, wo urzi zaapu k'adde a Isa an d'iili.
Geŋ beeko Raa ti koonaa eggun.

2 Timote

2 Timote 1

Toose ki Pool

¹Mattup ette i raaniya nuɗ Pool wede zina k'Isa Almasi, aa Raa yi dehu, y'o d'ele naabo ni kazita urzi lekkiyo wede yi ruute y'in t'ela t'urzi k'Isa Almasi.

²Ni raaniya a kee Timote, kee aa ulo k'addó ni ki giyye baadaɗ. Geɗ beeko, isiyo k'adde koduwo, wo toose ki Meega Raa ti ere ki Galmeegiɗ Isa Almasi i koonaa eedá.

Kooke a urzi daaniya k'Isa

³Nuɗ daayum onɗu diddó adda tonɗiyadó a Raa gette, sundá ni gi di sedɗiyo ye, wo ni rootiyo koduwo baadaɗ a Raa, yode wede ni di naabiya ti elkiyo ere ni suune munda k'ulsuko a tuddó umbo, aakede moɗgidagó ti kaaga an i-di niibe.

⁴Nuɗ n'elkiyo a môoladá ere k'iile ti zumari gette, nuɗ mosogo kee baadaɗ ni dehu n'a ki ti wollo sey doo miɗ, saɗ addó i-t'ôona t'unɗuwo kollo.

⁵Wo soɗ n'elkiyo a zaapu k'addá a Isa t'adde soo gette, tod'te aakede ki mogadá Lowis ti meedá Enis doɗ i ziipe addaɗ ki poone ti kee, wo aɗkenɗo ni suune adda k'addó kee toɗ ki ziipe addá aa kane kay.

⁶Kono kamo nuɗ n'a-rootiyo, k'a d'elke a munda wede Raa y'a ele kee k'uune aame n'ay di ziipe beezó a eedá geɗ, ki y' booho beehiye y'a ti numma ye.

⁷Derec, Unde Kamileɗ ere Raa y'in ele gette, t'in gi di'n ise doɗ k'orgiso ye, t'in di'n ise doɗ toogo, doɗ i geyyiso tuddaɗ wo doɗ aaniya i ti seedu tuddaɗ.

⁸Inkino maɗ a daana duwo kee k'ise sukiyagi ye ki kazita k'ono doɗ k'illiga ki Galmeegiɗ Isa me, wo kee a-ise sukiyagi ye kono nuɗ an ni ziidá daɗgay toc miɗ a naabo ere n'isiyo a urzi yode gettiyo. Ki too maɗ k'a oyye k'a dabire aa ki nuɗ kono Rabila Majjaanawa te, wo k'a zaapo addá a toogo Raa.

⁹Geɗ yode wede y'in di'n utte wo y'in ti'n wiike toc miɗ in t'ize doɗzi. Y'inni wiike t'urzi naabadiɗ ere beehiye ye, wo de t'urzi munda wede yi dihe y'aase wo ti beekadí. Beeko gette y'in t'ele t'urzi k'Isa Almasi ti poone y'a okkima duniya botto too,

¹⁰wo aɗkenɗo tode gette Raa y'in t'iidiba ita t'urzi k'aaniya Wede k'Uttiyadiɗ Isa Almasi adda duniya. Geɗ yoɗ unto y'a ti jiiire toogatu umbo baa, wo yoɗ t'urzi Rabila Majjaanawa gette y'in ti gize kereɗ lekkiyo ere ki daayum, in ki t'inda ye te.

¹¹Nuɗ Raa y'a ti'n ziipe wede zina k'Isa, aakede wede koppiyo darru ki kaza Rabila Majjaanawa wo n'a dooye duwo.

¹²Geŋ kono k'ĩnkino nuŋ ni dabirsa me. Wo de a dabaradó ette o k'ede sukiyagi ye, kono ni y' suune wede ni ziipe addó a yode me, wo ki kotto ni suune adda k'addó, yon̄ i-d'ede toogo ki boohiyo suldí d̄on̄ y'o ele a beezó bini onniyo booro Raa.

¹³Ono d̄on̄ d̄erec k'illiga n'a ruute geŋ, k'oziro eego t'urzi zaapu k'adde a Raa wo ti geyyiso ere in d'ede a urzi lekkiyo kettiyo kaŋ soo t'Isa Almasi.

¹⁴Mundá wede beehiye Raa y'a ele beezá geŋ, ki y' booho t'urzi k'Unde Kamileŋ tod' ti lekkiyo adda k'addiŋ.

¹⁵Kee ki suune, kane d̄on̄ pay i ziipe addaŋ a Isa i lekkiyo a siidó k'Aazi geŋ, an t'irga ti tuddó me, ti diinayaŋ i d'ede Pizel ti Ermozen.

¹⁶Uupe'ŋ ti nuŋ yon̄ miŋ Onezipor. Geŋ Galmeega Raa y'iso adde koduwo ekki d̄on̄ boozí, kono daayum yi d'ettiyo y'o d'eeliyo kooke, wo yi k'isiyo sukiyagi ye a nuŋ wede adda dan̄gay eŋ me.

¹⁷Wo de t'ume y'iina a geeger Room geŋ miŋ, y'a ni dihite t'adde soo bini y'a n'uune.

¹⁸Geŋ Galmeega Isa y'iso kono Raa yi-d'isa adde koduwo a onniyo ere yi dekka booro te. Kee ton̄ ki suune i jiire d̄on̄ doolo, naabo ere pay beehiye y'o ize a geeger k'Epez gette.

2 Timote 2

Wede naabo Raa yon̄ aa asugursu

¹Ĩnkino ulo ki nuŋ, ki deho toogo ere ettiyo t'urzi beeko k'Isa Almasi.

²Ono d̄on̄ k'illiga ni gizite a daana d̄on̄ baadaŋ illiga ti kuudaŋ geŋ, dooyiso gette k'an t'elo a bey d̄on̄ a seedu zakidí a urzi k'Isa, wo kane batum an aane an dooye d̄on̄ doolo p̄ây.

³Ĩnkino maŋ, k'oyyo ki dabiro aa asugursu k'Isa Almasi wede i seedu zakidí a naabadí.

⁴Wede tuuku y'isiyo naabo k'asigar geŋ, yi ki t'ette adda lekkiyo d̄on̄ doolo kane asigiryagi ye ye, aame yi dehu goolayí ulbí i-d'ise uŋse maŋ.

⁵Geŋ ĩnkino kay wede y'obe dalala geŋ, yi t'oone kadumul ki wede i jiire aame y'ukke a t'iide a urzutú d̄oo.

⁶Wede derku i niibe ooŋe geŋ, yode ki poone a t'oone agga k'ĩn̄ni ki suldí d̄on̄ yi niibe me.

⁷Timote, k'elko a ono d̄on̄ ni rootiyo eŋ me. Galmeega y'a-d'isa k'anni suuna ita k'ono pay geŋ me.

⁸K'elko a Isa Almasi, yoŋ yi bilde ti diine doŋ unto wo yoŋ y'udfo ti biza bumbu mozigo Dawut, geŋ i rootiyo Rabila Majjaanawa ere ni kazita.

⁹Wo kono tode gettiyo nuŋ ni dabirsa, bini an a-ti'n gittite ti ziziri aa wede isiyo suldi doŋ ulpi. Wo de ono Raa, duwo an k'aane an ki ti'n kettite ye.

¹⁰Kono kamo nuŋ ni d'ombiŋe a suldi pay geŋ me kono duwo doŋ Raa yi biire a yode. N'isiyo iŋkino kono kane toŋ an t'oone uttiyo t'urzi k'Isa Almasi wo ti daryika ere ki daayum.

¹¹Eyye, kane ono doŋ ni roota eŋ derec a urzizaŋ: «Aame kine in t'inda ti Almasi maŋ, in di lekkey ti yode kay.

¹²Aame kine in a ziida zakidi a urzizi bini daŋgu maŋ, in d'oomey moziko ti yode kay. Aame kine in ruuta in ki y' suune ye maŋ, yode toŋ y'a roota yi'n ki'n suune ye kay.

¹³Aame kine in ki ziida zakidi a onami ye toŋ, yoŋ daayum yi seedu zakidi a onami me, kono a ono doŋ yi ruute geŋ, bizi yi ki y' kime ye.»

Wede naabo Raa wede ki diine

¹⁴Kee, ono pay eŋ a doŋ i ziipe addaŋ a Isa k'anni doolo daayum, k'ede: «N'un rootiyo eŋ a daana Raa, ki niikiyto a tukk'ono eŋ ulu, kono niikiyto gette ti k'okkime munda ye, tod' ti daggiya doŋ ollige daŋŋal.»

¹⁵K'elo gotono kono ki t'iida daana Raa maŋ, y'a t'eesa yoŋ ulbi unse ti kee me, iŋkino maŋ ki t'iso wede naabo i-k'ede sukuyagi ye a naabadi te, wo yi kazita ono doŋ derec ki Raa a urzizaŋ.

¹⁶Ki t'aldu ti tukki doŋ i miliŋso ki bita a ki t'ettiyo a lekkiyo ere kettiyo ti Raa ye te, kono doŋ i miliŋso iŋkino geŋ ti daana Raa an ledfiyo ki ledfiyo.

¹⁷Dooyisadaŋ gette aa bundu a tudde i guziŋso, aakede dooyiso ki Imene ti Piletos.

¹⁸Wo kane geŋ t'urzi wede derec an di lidde wo an di rootiyo, an'de: «Onniyo baldiya ti t'ingile baa.» Iŋkino maŋ an di daggiya doŋ baadaŋ i ziipe addaŋ a Isa.

¹⁹Wo de iŋkino toŋ, dooyiso ere derec Raa y'in ele gette ti lekkiyo daayum aa ita boy zakidi. Ekk'ita boy geŋ an a di riine ono doŋ enno: «Galmeega Raa yi'ni suune doŋzi me.» Wo soŋ: «Wede tuuku yi waaku suma Galmeega Raa maŋ, yi ledfo t'isiyo suldi doŋ ki diine ye me.»

²⁰Adda boy ki wede goole geŋ, i d'ede suldi doŋ k'eliyo k'ombo a duwo, kane ki dap, wo ki maala gurus, kane geŋ an d'isiyo ombo a onniyo tarnaape. Wo doŋ soŋ an cooliyo k'inda wo an aabufo ki lee pay, kane geŋ an di naabiya ki boozan.

²¹Wede tuddí yi ti t'addiya ti suldi don ulpi ni ruutite genno man, yon gen aa munda wede an d'isiyo ombo a onniyo tarnaape, ooyiso a kese ki Galmeega. Yon beehiye a naabo galmeegi me, tuddí yi-t'ikkima k'isiyo suldi don pay beehiye.

²²Ki ledfo ti naapu ere a urzi k'obilko, wo ki deho lekkiyo ere ki diine, zaapu k'adde a Isa, geyyiso tudde wo toose ti kane don i tonniyo Galmeega Raa t'adde don kamilen.

²³Ki t'ikkipe bizá ye ti don i rootiyto ono don ki bita daa k'elkiso gen me, kono ki suune kane gen i-t'ehiyo niikiyo k'ono k'ulpi.

²⁴Wo wede naabo Galmeega gen, y'a k'ise ono k'ulpi ye. Wo ki too man i dehu y'a geyye duwo pay, i dehu y'aane y'a dooye duwo, wo i dehu y'a ombiina a suldi don ooñe gen me.

²⁵I dehu kane don i ti toogiyo a onami gen, y'an di'n dooye ti tassuwa: koo Raa y'an isa addan an ti kima lekkiyadan man, derec ki yode an di-suuna.

²⁶Inkino man eedan t'a etto, an t'adfa t'adda lebidfo ki Meeda siitandani ere t'an t'ippe aa bulagi an d'isiyo munda wede tod' ti dehu gen me.

2 Timote 3

Onniytagi don ettiyo k'ita

¹Timote, ono en k'ollo koduwo: A onniytagi don ettiyo k'ita gen i d'isa onniytagi don lekkiyadan aasa ooñe.

²Aame gen duwo an t'isa beyyidi, an geyya sonko baadan, an t'imma tuddan t'urzi k'onaman, an kila tuddan, an kilda suma Raa, an di-tooga a maawan, an ki roota koduwo a wenda ye, an k'ottila ye a suldi don kamilen ki Raa me.

³Kane geyyiso tudde an k'ede ye, an ki wolla sommagi duwo ye, an dekka duwo, an k'aana seedu tuddan ye, kane bundidi wo adu ki don isiyo beehiye.

⁴Kane an ti'n t'ela duwo a bey don k'olmidayan, kane don borsale wo koliyo tudde ti ti'n towwo, Raa an ki y' geyya ye, an t'amba unsuwo duniya.

⁵An ti t'isa tuddan aa kane don i lekkiyo kettiyo ti Raa kacin kane dokki ti Raa me, toogadi an di-kiigira. Inkino ti tukki kane gen ki-ledfo.

⁶Ita duwo don aakede kane gen, an t'ettiyo adda boydi ti metinjo. A ume gen an d'ooniyo erayi don toogadan baata a urzi zaapu k'adde a Isa, an ti'n mabilisa an t'ooriyo adda lebidfo ki dooyisadan ere oldo gettiyo. Erayi gen an d'ede attidi k'oldiko a eedan, an d'isiyo munda wede tuuku aa tuddan ti dehu.

⁷Kane erayi don gen, daayum an'ni dooyiso wo an k'aaniya an ki ti suuniyo ye derec ki Raa te.

⁸Geŋ aakede ti kaaga Zanes ti Zambires an di tuuge a Muusa, iŋkino kay kane ɗuwo geŋno toŋ an di-tooga a ɗerec ki Raa. Kane ɗuwo geŋ elkisadaŋ oldo, wo urzi zaapu k'addaŋ a ɗaana Raa geŋ yoŋ ki bita.

⁹Wo ɗe kane ɗuwo geŋ ki ɗaana an k'etta dokki ye, kono ɗuwo pay an di'n suuna elkisadaŋ gette a gootu ye, aa ki Zanes ti Zambires ti kaaga geŋno.

Seedu zakidi a ono Raa

¹⁰Wo ɗe kee'ŋ, daayum ki ni diine a urzi dooyisadó, a urzi lekkiyadó, a urzi naabadó ere n'ize, a urzi zaapu k'addó a Isa, a urzi k'omɓinaɗó, a urzi geyyisadó wo a urzi naabadó ere ni ziiɗa zakidi.

¹¹Kee ki wulle ɗoŋ k'olmidayó an ni dibire wo sulɗi ɗoŋ ooŋe o iido a geeger k'Antiyos, ki Ikoniyoŋ wo ki Listire. Eyye, an ni dibire ɓaadaŋ, wo toŋ ti dabar pay gette Galmeega y'a n'udɗe.

¹²Wo ɗerec, ɗoŋ pay an dehu an lekke kettiyo ti Raa t'urzi lekkiyo ere kettiyo kaŋ soo t'Isa Almasi geŋ, an t'oona dabar ti bey ɗoŋ k'olmidayaŋ.

¹³Wo kane ɗoŋ ulpi ti ɗoŋ i mabilisa ɗuwo geŋ, lekkiyadaŋ ere adda k'oldfiko gette daayum an d'oŋkiba k'oŋkibe, an mabilisa tuddaŋ batum wo ɗoŋ doolo pây.

¹⁴Wo ɗe kee'ŋ, k'a soodo zakidi a dooyiso ere an ki duuye, ere k'a ziipe addá eego, kono ɗoŋ i ki duuye geŋ ki'ni suune.

¹⁵Iŋkino t'ume neŋkuwadá too, kee ki'ni suune ono ɗoŋ kamilen an riije ti kaaga adda mattup ki Raa me, kane geŋ an aane an a-t'ele suuniyo k'ono kono k'a t'oone uttiyo t'urzi zaapu k'adde a Isa Almasi.

¹⁶Ono ɗoŋ pay an riije ti kaaga adda mattup ki Raa geŋ iido ti Raa, kane geŋ beehiye ki dooyiso ɗuwo, ki kaza munda wede wedusu y'ize butte, ki oodiso wo ki deeziyo ɗuwo a urzi wede ki diine.

¹⁷T'urzi geŋ wede Raa y'a t'ise wede i t'iide munda a ki y' biite ye, k'isiyo naabo ere pay beehiye te.

2 Timote 4

Kazita k'ono Raa daayum

¹Timote k'ollo, n'a rootiyo eŋ ki kotto a ɗaana Raa, wo a ɗaana k'Isa Almasi wede a-kimo a ɗekka booro ekki ɗoŋ zeere wo ɗoŋ unto pây. Wo soŋ n'a rootiyo eŋ ki kotto ti suma k'onniyo kama k'Almasi wo ti suma mozikadí. Geŋ eŋno sulɗi ɗoŋ k'aase me:

²Ki kazita ono Raa t'adde soo, ise a onniyo ere majjaanawa, ise a onniyo ere oldo toŋ maŋ. Wede i t'ize munda ulsu maŋ, ki y'aapido. Duwo k'an elo kooke, ki'ni dooyo daayum ti ombiŋe.

³Saŋ i d'aana onniytagi doŋ duwo oŋgoŋ an ki deha ye ollige ki dooyiso ere d'erec ki Raa te, wo de an di deha isiyo munda wede ulsu tuddaŋ ti dehu. Kane an di waakita doŋ dooyiso baadaŋ an da t'an t'ogiya, doŋ dooyiso geŋ an an di kizita munda wede kane duwo geŋ an dehu an d'olliga.

⁴Kuuwagaŋ an a ti ŋay'ya k'ollige k'ono doŋ d'erec ki Raa me, wo an di t'ihinta kuuwagaŋ k'ollige taydayi doŋ ettiyo t'urzi k'elkiso ki duwo geŋŋo.

⁵Wo de kee'ŋ, ki-soodo tudda a munda tuuku toŋ maŋ, k'omboŋ a dabar, k'iso naabo ki kazita Rabila Majjaanawa, wo ki-t'iso naabadá pay ere Raa y'a ele te.

⁶Wo ki nuŋ Pool, peedadó t'ide an di n' t'ida aakede seysu an ele sedefe. Onniyadó t'ide, duniya ni-t'oola baa.

⁷Nuŋ ni diyye d'eyyiso ere ki diine a urzutú, aŋkeŋ onniyadó t'ide aakede wede y'okko dalala y'iiney ume k'ohire, wo urzi zaapu k'adde a Isa n'a yi buuhe.

⁸Ti aŋki eŋ miŋ, kadumul ki wede i jiire gette Raa y'o ti boohiyo, kono yi ni wolliyi nuŋ wede ki diine a daanadí. Tode gette Galmeega Isa wede i d'ekkey booro ere ki diine, y'o di t'eley onniyo booro t'ida maŋ. Yoŋ y'o t'eley a nuuno daŋŋal ye, wo a kane doŋ pay i delliyo ti geyyiso, onniyo ere yi kiza tuddi a duwo pay.

Pool yi daŋgu onami

⁹T'urzi tuuku toŋ, k'edi kesiko ki ni t'oono,

¹⁰Demas y'ingile ki geeger Tessaloni, yi n'iili kono yoŋ yi giyye suldi duniya doŋ aŋkeŋŋo eŋ baadaŋ. Yo Kirezanaŋ yi turguwe ki siido Galat, wo Tit ki siido Dalmasi.

¹¹Ti nuuno Lik daŋŋal. A ettiyadá gette k'a-ti waaki Markus ti kee, kono yoŋ geŋ y'a di n' nooga baadaŋ a urzi naabo Raa me.

¹²Tisik n'a y'igibe ki geeger k'Epez.

¹³Aame k'umbo k'ettiyo maŋ, k'o t'ambi kallayó wede goole ki reele ni d'iilo a geeger Tirowas di Karpis, wo k'oo di soki mattupiyagi doŋ lobide, ki k'aane ye toŋ doŋ ki golmodo geŋ k'oo oolo ye.

¹⁴Alegzandire wede addaadusu geŋ, y'o ize ulsu baadaŋ, geŋ naabadí ere y'ize gette Galmeega yi di ti dooza iŋkino kay.

¹⁵Kee toŋ ki koono metike ti yode me, kono yoŋ yi-tuuge biŋ a ono doŋ in kazita me.

16A ettiyadó ere ki poone k'ume booro n'iidiba eedó ti siidó, wenda soo toŋ y'a ki n' nuuge ye, kane pay an di n'iile. Geŋ Raa y'an t'iso tambobino a munda wede an ize geŋ me.

17Wo de nuŋ i ni nuuge Galmeega, y'o d'ele toogo. Inŋkino maŋ onamí pay n'a ti'n gizite wo kane ita d'wo pay an di'n illiga, wo t'unto y'a n'utte aa yi n'udde ti bize suwwu.

18Galmeega geŋ y'a n'adfa ti suldi doŋ pay ulpi etto ki tudde, wo y'a n'utta kono y'o do t'etta k'adda mozikadí ere a kandaane. Geŋ inŋkino tamma t'a koone a yode ki daayum! Eyye.

Toose ere ki dangu

19K'an t'isoy toose a Pirisil, Akilas wo doŋ boy k'Onezipor.

20Erasta y'a uupo a geeger Korent, wo Tiropim a geeger Mile kono yoŋ tuddí eeni.

21T'urzi tuuku toŋ k'edi, ki poone ume reele y'a t'eesa geŋ me. Aŋ Ebilis, Pidens, Linis, Kilodiya wo zemba oŋgo pay an a-t'ize toose.

22Geŋ Galmeega yi koono ti kee, wo beeko Raa ti koono eggun pay.

Tit

Tit 1

Toose ki Pool

¹Mattup ette i raaniya nuŋ Pool wede naabo ki Raa wo wede zina k'Isa Almasi. Raa y'o elo naabo ere doŋ yi biire'ŋ n'a ti'n waako a urzi zaapu k'adde a Isa, wo n'an di kize urzi wede derec a-t'ette a lekkiyo ere kettiyo ti Raa,

²inŋkino an di zaape elkisadaŋ an t'oona lekkiyo ere ki daayum. Lekkiyo gette Raa yi ruute y'in t'ela ti poone y'a okkima duniya botto too, yoŋ wede i ki lohito ono ye.

³Aame onniyo ere Raa y'ele gette t'iide maŋ, a lekkiyo gette y'o t'iidiba ita t'urzi k'onamí, wo y'o d'ele a beezó urzi ki kazita aa Raa Wede k'Uttiyadiŋ yi ruute.

⁴Mattup ette ni raaniya a kee Tit, kee wede a nuŋ aa ulo k'addó a urzi zaapu k'adiŋ kine kaŋ soo. Geŋ beeko ti toose ki Meega Raa ti Isa Almasi Wede k'Uttiyadiŋ i kooná eedá.

Naabo ki Tit a siido Kiret

⁵Nuŋ ni ki k'iilo a siido Kiret miŋ kono k'a ti daŋge naabo ere daa daŋgu, wo ki-zappe doŋ dokkiyo ki doŋ ogiyso ti suma k'Isa adda geeger ere tuuku toŋ maŋ, a urzi wede n'a ruute.

⁶Doŋ dokkiyo geŋ wede tuuku toŋ a lekkiyadi duwo an ki zaapu ono a eedí ye, wo eddí soo daŋŋal. Inŋizaŋ an ziipe addaŋ a Isa, duwo an ki roote sooruzan oldo ye, wo an ki koliyo t'ekki maawaŋ ye.

⁷Inŋkino maŋ wede dokkiyo an i ele yeeriyo ki suldi Raa geŋ, i dehu a lekkiyadi duwo an ki zaapu ono a eedí ye, y'a ki t'ise wede i koliyo tuddí ye, wede kulkuwo ye, wede sobo ye, wede bursido ye, wo y'a ki dehe sokiyo suldi kaŋ ombide ye.

⁸I dehu y'a seeda duwo, y'a geyye isiyo munda wede beehiye, yoŋ wede i-d'ede elkiyo, wede ki diine, kamilen, tuddí yi aaniya,

⁹y'a seeda zakidi a ono doŋ an d'ede urzi duwo an d'ambe eego, a-t'ette a dooyiso ere kine in duuye gettiyo. Inŋkino maŋ yoŋ y'a aana y'an t'ela kooke a doŋ oŋgo t'urzi dooyiso ere derec, wo a doŋ lattiya dooyiso gette y'a aana y'an di-kiza onamaŋ doŋ butte geŋ me.

¹⁰Inŋkino maŋ i d'ede doŋ baadaŋ miŋ ti diine kane doŋ Yawudiyagi i ziipe addaŋ a Isa, kane geŋ an di koliyo t'ekki duwo, wo ti onamaŋ doŋ daa k'urzizaŋ an ti'n daggiya duwo me.

¹¹Kane geɗ urzi ki rootiyo k'an ooli ye, kono ɗoɗ pay adda boyɗi an ti'n daggiya, an an d'eliyo dooyiso ere i k'ise t'eliyo ye, kono geɗ an dehu an sikiti sulɗi ti beezaɗ kaɗ ombide.

¹²Wo ti kaaga geɗ i d'ede wede ede ti siidadaɗ yoɗ nebi raazaɗ, y'a ruute, y'ede: «Kane ɗoɗ siido Kiret geɗ kane daayum ɗoɗ lohito k'ono, ɗoɗ aa seyɗi ulpi, ɗoɗ golguwo an elkiyo miɗ a addisadaɗ ɗaɗɗal.»

¹³Wo ono ɗoɗ yi'ni rootiyo geɗ kane ɗerec. Inkiɗo maɗ kee k'an rooto ti golla zakidi a munda ulsu an isiyo me, kono an di zaape addaɗ a Raa a-t'ette a urzizi.

¹⁴Wo soɗ an a-ki seeda zakidi a tayɗayi ki Yawudiyagi ɗoɗ daa k'urzizaɗ, wo a oogoro ere ki ɗuwo ti ti'n argu t'urzi wede ɗerec geɗɗo ye.

¹⁵Sulɗi pay miɗ kamileɗ ki ɗoɗ kane kamileɗ. Wo ɗe ki ɗoɗ ulpi ti ɗoɗ i-tuuge ki zaapu k'addaɗ a Isa geɗ, munda kamileɗ umbo kono kane eedaɗ soodo a elkiso ti elkisadaɗ ere ki suuniyo munda eɗ beehiye eɗ ulsu geɗ, i t'ize ganigi.

¹⁶Kane an rootiyo Raa an yi suune, wo ɗe a naabadaɗ ere an isiyo gette an yi giigira. Geɗ kane naabadaɗ gette k'a t'azzira, kane ɗoɗ toogyto, wo an k'aane an k'ise ye naabo ere beehiye soo toɗ maɗ.

Tit 2

Dooyiso ere ɗerec

¹Wo kee Tit, k'elo dooyiso ere a-t'ette ti dooyiso ere ɗerec ki Raa.

²Gôɗfali kuuli ki'ni dooyo tuddaɗ an ti-seeda, lekkiyadaɗ t'a koone ti ottilso, an d'ede elkiyo, wo an seedu zakidi a urzi zaapu k'adde a Isa wede ki kotto, a geyyiso wo a ombiɗe.

³Wo a erayi gôɗfali toɗ inkiɗo, ki'ni dooyo an di lekke lekkiyo ere ki diine, an d'ooli ti zappu k'ono ekki ɗuwo me, wo an ki t'ise bulagi toote ye. An di t'ele kooke wede beehiye,

⁴erayi ɗoɗ kodiyagi an di'n dooye an di geyye kuulizaɗ ti inɗizaɗ,

⁵an d'ede elkiyo, lekkiyadaɗ ki diine kamileɗ, an aane boyɗizaɗ an di'n seeda, an di koone ɗoɗ beehiye, wo an ki kili t'ekki kuulizaɗ ye, kono wenda soo toɗ y'a ki kilɗe ono Raa ye.

⁶Kuuli ɗoɗ kodiyagi toɗ, k'an eelo kooke an t'ise ɗoɗ an d'ede elkiyo.

⁷A sulɗi pay geɗ, kee batum a lekkiyadaɗ urzi naabadaɗ wede beehiye k'an yi kaza, an di wolla an di daana. Dooyisadaɗ gette k'anni dooyo koɗuwo wo t'adde soo,

⁸onamaɗ an di koone ono ɗerec daa niikiyo. Inkiɗo maɗ ɗoɗ k'olmidayaɗ pay an seeda sukiyagi kono an ki t'oona ye munda ulsu ki rootiyo a tukki kine me.

⁹I dehu bulagi geɗ a suldi pay an ki kili t'ekki galmaawaɗ ye, lekkiyadaɗ t'aase uɗse a kane galmaawaɗ me. An ki dehe niikiytadaɗ ye galmaawaɗ me,

¹⁰wo a munda tuuku toɗ an an ki'n oogira ye. A suldi pay geɗ an di kize tuddaɗ kane daayum an seedu zakidi a naabo galmaawaɗ te, kono naabo ere pay an isiyo gette a t'ele suma a dooyiso ere ki Raa Wede k'Uttiyadiɗ.

¹¹Derec, Raa yi t'iidiba ita a beekadi ere a urzi k'uttiyo ki doɗ pay.

¹²To beeko gette t'inni dooyiso in d'ooli sooru ere oldo, ti suldi doɗ ki duniya addiɗ i dehu geɗ pay, kono adda duniya ette in di lekke lekkiyo ere ti elkiyo, ere ki diine wo ere kettiyo ti Raa.

¹³Geɗ iɗkino in di delle uɗsuwo ere in zaapu elkisadiɗ eego gettiyo, wo in di delle soɗ onniyo ere duwo pay an di wolla dary'ika Raa goole ti Isa Almasi Wede k'Uttiyadiɗ.

¹⁴Yo wede y'a ele tuddi batum y'a inda kono kine, kono y'in di'n adde t'adda suldi doɗ ulpi pay, wo y'in di'n ise kine doɗzi doɗ kamileɗ, doɗ wehini k'isiyo naabo ere beehiye.

¹⁵Tit, geɗno munda wede i dehu kee k'a dooya ti toogo pay ere an a ele te, k'a t'ela kooke, wo a duwo k'a rootita ti golla zakidi a munda ulsu an isiyo me. Kee ki oola tudda wenda soo toɗ yi-konilsa ye.

Tit 3

Sooru ki doɗ i ziipe addaɗ a Isa

¹Tit, kee daayum k'an rooto a doɗ i ziipe addaɗ a Isa geɗ, an kili t'ekki doɗ booro ti deero k'akuuma ye, an d'olliga onamaɗ, an di lekke tuddaɗ daayum okkime k'isiyo naabo pay ere beehiye.

²A wenda soo toɗ an i roota ono ulpi ye, niikiyto an oolo, an di dehe an d'ise beehiye a duwo, wo an di kize daayum kane doɗ tasse a eda doɗ pay.

³Derec, ti kaaga geɗ kine toɗ elkisadiɗ umbo, in di-tuuge a Raa, in digge. In t'ize bulagi k'ita suldi doɗ tuuku toɗ tudde ti dehu ti uɗsuwo tudde. In di lekkiyo adda bundiko, in di zaapu addiɗ a suldi k'eebiɗ, iɗkino maɗ duwo an in di'n giigira, wo kine wede tuuku toɗ yi koogire bakadi.

⁴Wo aame Raa Wede k'Uttiyadiɗ yi gize beekadi ti geyyisadi a duwo pay geɗ,

⁵y'in di'n utte. Wo y'in utte kono kine in ize naabo ere ki diine ko? Aha, iɗkino ye! Y'in utte kono y'in ize adde koduwo, wo y'in d'ele ehiyo ere aware t'urzi suyyiso batem wo t'urzi k'Unde Kamileɗ.

⁶Unde gette Raa y'in ele daa doozyo adda k'addiɗ t'urzi k'Isa Almasi Wede k'Uttiyadiɗ.

⁷Inkino maŋ ti beekadí y'in di'n ize kine doŋ ki diine a daanadí, wo y'in d'ele urzi in t'oona lekkiyo ere ki daayum, ere in zaapu elkisadiŋ eego.

⁸Ono eŋ kane derec a urzizaŋ. Wo nuŋ ni dehu k'a seeda zakidi a ono eŋ me, kono doŋ i ziipe addaŋ a Raa geŋ an seeda zakidi an t'ele tuddaŋ pay k'isiyo naabo ere beehiye. Geŋ munda wede beehiye wo a nooga duwo pay.

⁹Wo kee ki t'aldu ti niikiyto ere ki bita, wo ti dippiyto k'ita mongidagi doŋ i ki daŋgu ye. Wo soŋ ki t'aldu ti dehu k'ono k'ulpi, wo ti rootiyto k'ono a lette adde a urzi k'oogoro Raa. Kane geŋ ki bita, a ki nooge munda ye.

¹⁰A wede i ti teepiyo zemba doŋ i ziipe addaŋ a Isa geŋ, kun i di roote kaŋ soo ki sirwe yi k'ambu ye maŋ, kun ti y' ledfo ti tudduguŋ me.

¹¹Kee ki suune wede inkino geŋ yoŋ yi t'udfe t'urzi wede derec ki Raa me, yoŋ wede k'oldiko, yode batum yi ti t'eliyo tuddi booro t'a yi seeda.

Ono doŋ ki daŋgu

¹²Aame nuŋ n'a-t'igiba Artemas koo ise Tisik koo maŋ, k'a ombini k'a edi kesiko k'anni t'oona a Nikopolis, kono anŋenno di dihe ni lekkey a ume reele me.

¹³Kee k'a d'elko baadaŋ a torguwo ki Zenas wede k'ooniyo ti Apolos, kono a torguwadaŋ gette munda a ki'n beete ye.

¹⁴Inkino maŋ zembadiŋ doŋ i ziipe addaŋ a Isa toŋ, an di dooye an t'ele tuddaŋ pay k'isiyo naabo ere beehiye, kono an t'okka d'ollo ere ooŋe a doŋ oŋgo, wo lekkiyadaŋ a ki t'isa ki bita ye.

¹⁵Doŋ pay ti nuŋ eŋ an a-t'ize toose, wo kee k'an t'iso toose a kane doŋ inni giyye a urzi zaapu k'adde a Isa. Inkino maŋ beeko Raa ti koono egguguŋ pay.

Pilemon

Pilemon 1

Toose ki Pool

¹Mattup ette i raaniya nuŋ Pool, wede an ni ziida dangay kono ni kazita rabila k'Isa Almasi, ay raaniya ti leema Timote. Mattup ette a kee Pilemon leemadey wede ki geyyiso, kee wede naabadiŋ kaŋ soo,

²wo a zemba doŋ ogiyso ti suma k'Isa a boozá, a teemadiŋ Aapiya, ti Arsip wede a ti giyye ti kine deyyisadiŋ kaŋ soo.

³Geŋ beeko ti toose ki Meegiŋ Raa ti Galmeega Isa Almasi i koonaa egguŋ.

Pool yi rootiyo koduwo a Raa kono Pilemon

⁴Nuŋ daayum adda tondiyadó a Raa gette, sundá ni gi di sedfiyo ye, wo ni rootiyo koduwo a Raazó,

⁵kono nuŋ n'ollige kee daayum k'a seedu zakidi a urzi zaapu k'adde a Galmeega Isa, wo doŋ ki Raa pay ki'ni geyyiso.

⁶Nuŋ ni tonديو Raa kono zaapu k'addá a Isa gette, kee k'a-ti kette ti kaye kaŋ soo. Tode gette t'a di t'ele elkiyo ere k'a suune suldi doŋ pay majjandani a urzi lekkiyadiŋ ere kettiyo kaŋ soo t'Isa Almasi.

⁷Leema ki nuŋ, nuŋ ulbó unse wo oo d'eliyo toogo kono kee doŋ ki Raa ki'ni giyye, wo k'an d'eliyo kooke.

Pool yi tonديو Pilemon a urzi k'Onezim

⁸Kono kamo beehiye'ŋ a urzi lekkiyo kettiyo kaŋ soo t'Almasi geŋ nuŋ oo d'ede urzi n'a di roote a munda wede kee k'aase me,

⁹ki too maŋ n'a ki tonde ti geyyiso k'o d'ise munda. Eyye, nuŋ Pool eŋ ni t'ize gôole, wo soŋ nuŋ adda dangay kono ni kazita rabila k'Isa Almasi,

¹⁰iŋkino toŋ ni ki tonديو kee k'aase adde beehiye a Onezim, yoŋ yi t'ize aa ulo n'ehe adda dangay a urzi k'Almasi me.

¹¹Aame ti poone yi ki nuuge ye toŋ maŋ, aŋkenŋo y'aane y'inni nooge, kee ti nuŋ me.

¹²Wo aŋkeŋ n'a di y'agiba, yode wede ni y' giyye t'addó pay.

¹³Ki too maŋ nuŋ n'a y'ooli y'a lekke a sirpadó, aame nuŋ botto adda dangay a urzi Rabila Majjaanawa k'Isa Almasi geŋ me, kono y'o di naabe a olde kee.

¹⁴Wo ni ki dehu ni ki y' boophe ye daa kee ki ki dihe ye me, kono munda wede beehiye kee k'aase an gi di k'ise ki toogo do ye, k'aase ti ulbe unse do.

¹⁵Onezim Raa yi ti y' lidde tuddá k'onniyo miibi koo maṅ, onniyo yi ti y' gima sirpadá maṅ y'a lekkey ki daayum.

¹⁶Aṅkenṅo yoṅ aa bule ye, yi jiire bule. Yoṅ aṅkeṅ yi t'ize leema wede k'ooṅiso. Nuṅ ni y' giyye baadaṅ wo a kee y'a t'isey wede k'ooṅiso a ceerey sey, kono yoṅ leema a urzi tudde wo leema a urzi k'Almasi.

¹⁷Aame ki ni zuune nuṅ laṅzayá maṅ, yoṅ ki y' soodoy aa ki seedu nuṅ batum.

¹⁸Wo aame y'a ize ulsuko, koo yi ziida mundazá toṅ maṅ, k'oolo a ekki nuṅ.

¹⁹Ki wollo a raaniya eṅ nuṅ Pool ti beezó: munda wede Onezim y'a di t'ela geṅ a di y' t'ela nuuno, wo de kee toṅ k'elko a-d'ede see a eedá? Derec, kee toṅ t'urzi nuuno doo miṅ k'a ziipe addá a Isa Almasi kollo.

²⁰Ki kotto leema ki nuṅ, t'urzi geyyiso ere ki Galmeega, addó k'o ti'n asso, kono kine sirwiṅ pay miṅ in lekkiyo kettiyo kaṅ soo t'Almasi.

²¹Nuṅ ni suune n'a raaniya eṅ naabo ere ni ki tondiyo ette k'o ti t'isa, wo ni suune k'aasa naabo a ceera ere ni ki tondiyo ettiyo sey.

²²Wo soṅ ni ki tondiyo: Kee k'o okkoṅ ume moone. Nuṅ n'ettiyo, kono n'elkiyo tondiyagun a Raa gette yoṅ y'ollige, saṅ maṅ an di'n adda n'un di'n t'ooney.

Ono doṅ ki daṅgu

²³Epapiras yoṅ adda daṅgay ti nuṅ kono ay kazita rabila k'Isa Almasi, y'a-t'ize toose.

²⁴Markus, Aristarko, Demas wo Lik doṅ ay naabiya kaṅ soo eṅ, an a-t'ize toose pây.

²⁵Iṅkino maṅ beeko Galmeega Isa Almasi ti koono eggun.

Eber

Eber 1

Raa y'a ruutite t'urzi k'Ulí

¹Ti kaaga, Raa y'an di ruutite taŋ baadaŋ t'urzi tuuku toŋ maŋ a moŋgidagiŋ t'urzi nebiyagi.

²Wo de a onniytagi k'ita eŋ, Raa y'in rootiyto t'urzi k'Ulí. T'urzi yode geŋ Raa y'a ikkima suldi pay a kandaane wo a siido, wo Raa y'a ti y' ziipe yoŋ wede yi oola suldi pay geŋ a beezí.

³Yo Ulo geŋ yi kaza gooliko ere meeda ki Raa, wo yoŋ geŋ miŋ Raa koyok. Wo kane suldi pay geŋ an lekkiyo t'urzi k'onamí doŋ an d'ede toogo geŋŋo. Yoŋ y'a t'ize munda wede i t'iide duwo an t'ise kamileŋ t'oldikadaŋ a daana Raa, maŋ y'a-gili k'awwa ki kandaane, y'a-guune a ammade Raa goole a jiiire pay.

⁴Iŋkino maŋ ki kotto, yo Ulo geŋ y'a t'ize goole a jiiire maaleekiyagi pay, wo suma ere Raa yi ele gette tod' t'a jiiire doŋ ki kane.

Ulo Raa yi jiiire maaleekiyagi

⁵Derec, Raa geŋ kudic a maaleeka soo toŋ yi-ki ruute ye, y'a t'eese: «Kee Ulo nuŋ me, wo ti aŋki duwo an di suune nuŋ Meegá.» Wo soŋ y'a t'eese: «Nuŋ a yode n'a t'isa Meegí, wo yoŋ y'a t'isa a nuŋ Ulo me.»

⁶Wo de aame Raa y'igibo Ulí yoŋ yi jiiire suldi pay adda duniya geŋ, y'a ruute, y'ede: «Kune maaleekiyagi Raa pay, kun ottilo a yode.»

⁷Geŋ ono doŋ Raa yi ruute ti kaaga a tukki maaleekiyagi, y'ede: «Kane maaleekiyagi geŋ yi di'n isiyo aa maaye, wo doŋ naabadí yi di'n isiyo aa ilze k'uwwa.»

⁸Wo Raa y'a ruute ti kaaga a tukk'Ulo, y'ede: «Kee'ŋ Raa, k'a koono a kaakido mozikadá ki daayum, wo ti dalka moziko ette k'a dokka doŋzá a urzi wede ki diine.

⁹Kee ki geyyiso munda wede ki diine, wo suldi doŋ ulpi ki'n azzuru. Kono kamo nuŋ Raa wede Raazá, ni ki biire ti diine laŋziyagá pay, n'ay di y'irge egey k'uŋsuwo a eedá, geŋ i-kaza ni ki ti ziipe mozigo.»

¹⁰Wo y'a ruute sey, y'ede: «T'ume k'eesiyo kee Galmeega Raa i ziipe siido te, wo kandaane toŋ ki y'ikkima ti beezá.

¹¹Kane geŋ an t'eŋgila, wo kee ki lekkiyo ki daayum. Eyye, kane pay geŋ a latta aakede kalle.

¹²Siido ti kandaane k'a ti'n damba aa wede yi dambu kalle wede goole, k'a ti'n naay'a a kese. Eyye, kane geŋ k'a ti'n pelka an ki lekka a umayan ye, wo de kee daayum kee miŋ kee, ozzinagá i ki danga ye.»

¹³Wo Raa geŋ kaŋ soo toŋ, kudic yi-ki ruute ye a maaleeka tuuku toŋ, y'a t'eese: «K'edi ki-koonaa a ammidadó kino, bini doŋ k'aduzá n'an isa aa munda ki bita ti dandi zonďá.»

¹⁴Wo kane maaleekiyagi geŋ, kane pay undiyagi doŋ i naabiya ki Raa. Kane geŋ yi'n akkisa k'isiyo naabiyagi ki noogiyi kane doŋ i t'oona uttiyo.

Eber 2

Uttiyo k'arbu ye

¹Kono kamo kine in koonaa mentikagi a ono doŋ in illiga geŋ me, para maŋ in ti'n ledďa t'urzi wede derec me, in di'n t'etta k'ume daggiya.

²Kun ollo, ono doŋ k'oogoro ti kaaga Raa y'an ele a bize maaleekiyagi an an gizite a maawiŋ geŋ, ki kotto kane derec. Wo doŋ pay a ti diipida wo an ti-tuuge k'ollige k'ono geŋno geŋ, an d'uune dangay ere derec a urzi naabadaŋ.

³Inkino maŋ kun ollo, in arbe ye t'uttiyo te, para'ŋ in a ti diipida maŋ, in ki t'alďa ye ti dangay ere ki Raa te. Urzi k'uttiyo eŋ, i y' ruute yode Galmeega batum ki poone me. Saŋ maŋ kane doŋ i y'illiga an in di gizite an'de, uttiyo gette tod'te derec.

⁴Wo Raa toŋ y'an di gize kane onamaŋ derec, t'urzi sulďi doŋ i-kaza munda, ti sulďi doŋ i-ceeriyo eego wo ti sulďi k'armika doŋ tuuku toŋ maŋ, wo t'urzi k'Unde Kamileŋ ere t'in di dikkida urziyagi k'isiyo naabo Raa a wede tuuku toŋ aa yoŋ yi dehu.

Isa yoŋ Wede k'Uttiyo duwo

⁵Kine duniya ere ki daana in ti rootiyo gette, Raa y'an ki t'ele a maaleekiyagi an gi di dokka ye.

⁶Wo de ki too maŋ, ono eŋ an riije ti kaaga adda mattup ki Raa, an'de: «Raa ki nuŋ, wedusu miŋ moo sey me, k'a elke a yode me? Wede tudde miŋ wee wee, kee k'a yi boohe me?

⁷Wedusu kee k'a ti y' ziipe ti dandi maaleekiyagi ki peedo booloŋ, ki-d'ele gooliko wo suma, ki di tuune kadumul ki moziko a eedí.

⁸K'a ti y' ziipe goole t'ekki sulďi pay.» Wede geŋ Raa y'a ti y' ziipe goole t'ekki sulďi pay, inkino maŋ munda soo toŋ yi k'iili ye a lekke t'ekki yode me. Wo aŋkeŋno kine in ki wolliyo ye botto sulďi pay geŋ kane ti dandi yode me.

⁹Wo kaciŋ in suune Isa Raa yi ti y' ziipe ti d'andi maaleekiyagi ki peedo booloŋ. Inŋkino maŋ ti beeko ere ki Raa, Isa y'a inda kono duwo pay. Wo aŋkenŋo Raa yi d'ele gooliko wo suma, yi di tuune kadumul ki moziko kono yi dibire wo y'a inda.

¹⁰Geŋ derec, suldi pay geŋ ikkima Raa wo an lekkiyo ki yode a beezí, wo yi dehu doŋ baadaŋ an t'ise inŋizí wo y'an d'an t'ette k'adda daryikadí. Inŋkino maŋ t'urzi dabar geŋ, Isa Raa y'a y'ize wede i-t'íide a munda wede Raa yi dehu, kono y'an di t'ihina urzi k'uttiyo a duwo.

¹¹Isa wede k'ooyiso duwo a kese a Raa, yode ti kane doŋ yi'n uuye a kese geŋ, kane pay geŋ miŋ Meegaŋ Raa soo. Inŋkino maŋ yoŋ i-k'ede sukiyagi ye y'an di'n waake kane zembadí me,

¹²wo y'a ruute, y'ede: «Raa ki nuŋ, nuŋ sundá n'an di-kiza a zembadó, wo n'a t'ôhira adda diine doŋzá gi t'ugiye n'a ki t'immey.»

¹³Soŋ y'a ruute, y'ede: «Nuŋ n'a zaapa addó pay a Raa.» Wo y'a ruute sey, y'ede: «Eŋ nuuno ti inŋi doŋ Raa y'o ele.»

¹⁴Inŋi geŋ kane pay miŋ kaŋ soo doŋ tudde an d'ede sey ti puuzo, inŋkino maŋ yode Isa toŋ y'a t'ize wede tudde i-d'ede sey ti puuzo aa kane kay. Yoŋ y'ize inŋkino kono t'urzi k'untadí geŋ, yi di dihima toogo Meeda siitandani, tode ere i-d'ede toogo ki tôwwo duwo gettiyo.

¹⁵Wo soŋ t'urzi k'untadí geŋ, y'a t'udde kane doŋ daayum i lekkiyo bulagi kono an orgiso a unto.

¹⁶Geŋ ki kotto, in suune Isa yi k'iido'ŋ noogiyo ki maaleekiyagi ye, wo y'iido'ŋ noogiyo k'ita k'inŋi k'Ibirayim.

¹⁷Kono kamo i dehu Isa y'a-t'ise tuddí pay a deeye zembadí, kono y'a t'ise mozigo goole doŋ sedeke wede addí koduwo ti duwo wo y'a seeda zakidí a naabo Raa, kono y'a-booye oldiko duwo.

¹⁸Derec, yode Isa batum toŋ yi dibire a urzi naamiya daggiya me. Inŋkino maŋ, aŋkenŋo eŋ y'aane yi'ni nooge kane doŋ adda naamiya daggiya me.

Eber 3

Isa goole i jiire Muusa

¹Kono k'inŋkino zamba ki nuŋ kune doŋ ki Raa, yoŋ y'unni wiike geŋ kun zaapo ersaguŋ a Isa, yoŋ wede zina Raa wo mozigo goole doŋ sedeke ki kine doŋ pay i ziipe addiŋ a yode.

²Isa geɗ i y' biire Raa k'isiyo naabo gette, wo y'a guune wede a ziida zakidɪ a naabadɪ, aakede ti kaaga Muusa y'a guune wede y'a ziida zakidɪ a naabadɪ ere pay y'ize a ɗoŋ adda ɓoy Raa.

³Inkino maŋ Isa geɗ y'a t'oone tamma baadaŋ a ceere ki Muusa, aakede wede iiziga booze geɗ ɗuwo an di y' t'imme baadaŋ a ceere yode booze batum.

⁴Kine in suune ɓoy tuuku toŋ i y'oozige wedusu, wo sulɗi pay geɗ iiziga Raa.

⁵Muusa geɗ y'a ziida zakidɪ a naabadɪ ere ki wede naabo a ɗoŋ adda ɓoy Raa, wo naabadɪ tiŋ y'an di kizite ono ɗoŋ Raa yi roota ki ɗaana.

⁶Wo Almasi geɗ y'a ziida zakidɪ a naabadɪ, yoŋ Ulo wo Raa y'a ti y' ziipe t'ekki ɗoŋ adda ɓoozɪ. Wo ɗoŋ ɓoozɪ miŋ kine, aame a lekkiyadiŋ in a seedu zakidɪ wo in zaapu elkisadiŋ a Raa daa sukuyagi maŋ.

Ume puukiyo ki ɗoŋ Raa

⁷Kono kamo Unde Kamileŋ t'a ruute ti kaaga adda mattup ki Raa, t'ede: «Aame aŋki kun illiga golla Raa maŋ,

⁸addugun kun ti'n isa zakidɪ ye, aakede moŋgidagun ti kaaga aame kane adda balɗa geɗ, an d'iiziga kulkuwo ti nuŋ Raa wo an di n' niime.

⁹⁻¹⁰Wo a ume geŋno moŋgidagun an di n' niime, an di dihe an di wolle n'isa muno me, wo naabo ere n'ize adda k'ozzine ada piɗe gette an ti wulle toŋ maŋ. Inkino maŋ ni-ti gulkuwe ti kane ɗoŋ geɗ me, wo n'a ruute, n'ede: "Kane ɗoŋ eŋ daayum biza k'ulbaŋ yi'ni daggiya, wo urzizó an ki y' zuune ye."

¹¹Maŋ nuŋ adda kulkuwadó n'a di n'iime tuddó, n'a ruute, n'ede: "Ki kotto, kane geɗ an k'etta ye k'adda k'ume wede n'an ikkima ki puukiyo me!"»

¹²Zemba ki nuŋ, kun koono mentikagi, kun i oola urzi a wenda soo toŋ ti diinagun yi'n isa addi ulpi yi tooga ye ki zaapu k'addi a Raa me, para maŋ a ti y' ledɗa dokki ti ɗaana Raa zeere me.

¹³Kun ollo, onniyo ere Raa y'a ti wiike «aŋki» gette ti lekkiyo baa maŋ, kune onniyo ti onniyo kun elo kooke ti tuddugun, kono wenda soo toŋ ti diinagun oldiko ti y' dagga yi'n isa addi zakidɪ ye.

¹⁴Inkino maŋ t'ume kine in ziipe addiŋ a Isa geɗ, in t'ize ɗoŋ i naabiya t'Almasi kaŋ soo. Wo i dehu a zaapu k'addiŋ gette in seeda zakidɪ, aa ti poone bini ɗaŋgu,

¹⁵kono ono eŋ an riije ti kaaga adda mattup ki Raa, an'de: «Aame aŋki kun illiga golla Raa maŋ, addugun kun ti'n isa zakidɪ ye, aakede moŋgidagun ti kaaga aame kane adda balɗa geɗ, an d'iizi kulkuwo ti nuŋ Raa wo an di n' niime.»

¹⁶Inkino kane miŋ aŋ wee wee ɗoŋ illiga ono Raa wo an d'iizi kulkuwo ti Raa me? Kane miŋ ɗoŋ pay Muusa y'an uɗɗo ti siido Misir.

¹⁷Wo soŋ kun suuno, adda k'ozzine ada pide geŋ Raa yi-ti gulkuwe ti kane kono an t'ize oldiko, iŋkino an t'indita nundanzaŋ a uupe adda balda.

¹⁸Raa y'a di n̄ime tuddí, y'a ruute, y'ede: «Kane an k'etta ye k'adda k'ume wede n'an ikkima ki puukiyo me.» Yi ruute iŋkino a kaŋ wee wee? Yi ruute a kane doŋ i-tuuge k'ollige k'onamí geŋno.

¹⁹Iŋkino kine in suune, kane geŋ an ki d'iine an ki t'iide ye k'adda k'ume wede Raa y'an ikkima ki puukiyo me, kono an ti tuuge k'ambu k'onamí me.

Eber 4

¹Eŋ ono doŋ Raa y'in ruute y'aasa: urzi ede yi ikkima k'ettiyo k'ume puukiyo me, geŋ derec kane ono geŋ aŋki toŋ i lekkiyo a kine. Iŋkino maŋ in koonamentikagi kono wenda soo toŋ ti diinaguŋ yi ti t'ôssa ye k'ettiyo k'ume puukiyo me.

²Derec, kine toŋ rabila majjaanawa a tukk'ume puukiyo an in gizite, aakede kane doŋ ti kaaga adda balda. Wo de ono doŋ an illiga geŋ, a kane an t'ize aa munda bita, kono aame an illiga geŋ zaapu k'addaŋ a Raa umbo, ono geŋ an gi di'n ziida ye.

³Wo etta k'ume puukiyo geŋ kine doŋ i ziipe addiŋ a Raa. Iŋkino y'a ruute a tukk'ume puukiyo geŋ, y'ede: «Adda kulkuwadó n'a di n̄ime tuddó, n'a ruute, n'ede: "Ki kotto kane geŋ an k'etta ye k'adda k'ume wede n'an ikkima ki puukiyo me!"» Yi ruute iŋkino kono ume puukiyo umbo ye, wo de kine in suune Raa y'a ti diŋge naabadí t'ume y'ikkima duniya too.

⁴Ono eŋ an riine ti kaaga adda mattup ki Raa a tukk'onniyo ere ki sarat, an'de: «Raa geŋ a onniyo ere ki sarat maŋ, y'a-buuke ti naabadí ere pay k'okkime suldi te.»

⁵Wo soŋ an riine a tukk'ume puukiyo, an'de: «Kane geŋ an k'etta ye k'adda k'ume wede n'an ikkima ki puukiyo me!»

⁶Kane doŋ ki poone illiga rabila majjaanawa gette, an di-tuuge ki sooru eego me. Iŋkino maŋ an ki t'iide ye k'ume puukiyo me. De geŋ a doŋ doolo urzi ede k'ettiyo k'ume puukiyo me.

⁷Kono kamo Raa yi ziipe onniyo ti doolo sey ere y'a ti wiike «aŋki». Saŋ îide ozzinagi baadaŋ maŋ, Raa y'a ruute a tukk'onniyo gettiyo ti bize Dawut. Ono geŋ ni ti'n ruute ti poone: «Aame aŋki kun illiga golla Raa maŋ, adduguŋ kun ti'n isa zakidi ye.»

⁸Ki kotto, Zozuwe geŋ doŋ k'Izirayel y'an gi di'n t'iide ye k'ume puukiyo me, kono k'iŋkino Raa yi rootiyo sey a tukk'onniyo puukiyo ere ti doolo te.

⁹Inkino maŋ ume puukiyo wede aakede onniyo ere ki sarat Raa y'a buuke gette yoŋ yi lekkiyo, wo Raa y'an di y' t'ela a doŋzi.

¹⁰Derec, wede yi t'iide adda k'ume puukiyo wede Raa y'ikkima geŋno maŋ, yode toŋ yi buuke kay, aakede yode Raa y'a-buuke ti naabadí.

¹¹Inkino maŋ in elo gotono kono in t'etta k'adda k'ume puukiyo geŋno. In iso inkino kono wenda soo toŋ ti diinayiŋ yi ki t'ooro ye, aakede moŋgidagiŋ ti kaaga an di-tuuge ki sooru eego k'ono Raa.

¹²Kun ollo, ono Raa geŋ kane an naabiya, an d'ede toogo, kane robboŋ i jiire kasigara kesiyagutú sirwaŋ pay korbe. Kane ono geŋ i-ti deegu adda k'adde wedusu i seedu biza k'ulbe ti unde, okilagi ti sulbo. Kane ono geŋ, an dekkiyo booro a suldi doŋ tuddiŋ ti dehu wo elkiyo ere adda k'addiŋ.

¹³Munda ombide a daana Raa umbo. Suldi doŋ pay y'ikkima geŋ, kane waariya kereŋ a daanadí me. Geŋ onniyo soo, a yode kine in t'idey taaya ki naabadiŋ ere in ize te.

Isa yoŋ mozigo goole doŋ sedefe wede a jiire

¹⁴Kine in d'ede mozigo goole doŋ sedefe wede a jiire, yoŋ Isa Ulo Raa yi-gili k'awwa ki kandaane k'ume Meegi. Inkino maŋ in a soodo zakidi a urzi zaapu k'addiŋ a Raa me.

¹⁵Geŋ ki kotto, kine in d'ede mozigo goole doŋ sedefe wede aane i wolle sommagiŋ a reŋkadiŋ te, kono yode toŋ Meeda siitandani t'a yi niime daggiya a urzi tuuku toŋ aa kine kay, ki too maŋ yoŋ yi k'ize ye oldiko te.

¹⁶Inkino maŋ kine in'do daa k'orgiso k'ume kaakido Raa ere ki beeko a jiire pay, wo aame geŋ y'in d'isey adde koduwo wo in t'ooney beekadí. Inkino y'a t'okka dolladiŋ, y'in di'n nooga aame peedo t'ida maŋ.

Eber 5

Naabo k'Almasi mozigo goole doŋ sedefe

¹Mozigo goole doŋ sedefe wede tuuku toŋ, Raa yi y' beeriyo ti diine kane duwo, yi-ti y' zaapu kono yi di naabe a yode Raa ki beehiyko a kane duwo. To naabadí tiŋ k'eliyo suldi a Raa wo k'isiyo sedefe ki booyiso k'oldiko.

²Mozigo goole doŋ sedefe wede tuuku toŋ, a urzi tudde yoŋ reŋ baadaŋ aa kane kay. Inkino maŋ yoŋ yi d'aaniya suuniyo k'ita reŋko duwo doŋ an k'ede suuniyo ye wo i t'addiya t'urzi wede derec geŋ me.

³Kono yode batum reŋ geŋ, i dehu y'aase sedefe ki booyiso k'oldiko ki doŋ doolo daŋnalaŋ ye, wo k'oldiko yode pây.

⁴Wenda soo toŋ yi k'aane yi ki t'ele tuddí ye, y'a t'ambe suma y'a t'ise mozigo goole doŋ sedeke ti siidí me. I waaku wedusu Raa ti siidí a naabo gette, aakede yi wiike Aronj ti kaaga y'a t'ize mozigo goole doŋ sedeke.

⁵Geŋ ki Almasi toŋ inŋkino, a urzi gooliko yode batum yi k'ele tuddí ti siidí ye, y'a t'ise mozigo goole doŋ sedeke me. Wo tode gette yi t'uune ti yode wede i ruute, y'ede: «Kee Ulo nuŋ, wo ti aŋki d̄uwo an di suune nuŋ Meegá.»

⁶Wo adda mattup ki Raa a ume doolo toŋ yi ruute p̄ây, y'ede: «Kee wede sedeke ki daayum a urzi yode Melkisedek ti kaaga.»

⁷Yode Isa geŋ, a lekkiyadi ere a siido gette, y'a tunde Raa t'obe bey ti d̄ollite baadaŋ wo ti zumari edayí a yode wede y'aane yi y'utte t'unto. Wo Raa y'a y'illiga, y'a di y' nuuge kono Isa yi ki gili t'ekki Raa ye.

⁸Derec, Isa yoŋ Ulo Raa toŋ maŋ, t'urzi dabaradí gette y'a-duuye ollige k'ono.

⁹A ettiyadi gette suldi pay geŋ y'an ize aa Raa yi dehu, inŋkino yode batum y'a t'ize wede i-t'ide. Inŋkino maŋ aŋken̄no, kane doŋ pay ollige ono k'Isa geŋ an d'uune uttiyo ere ki daayum t'urzi yode.

¹⁰Geŋ derec, Raa y'a ti y' ziipe Isa mozigo goole doŋ sedeke ki daayum a urzi yode Melkisedek ti kaaga.

Dersiyo a urzi zaapu k'adde a Isa

¹¹A tukki yode Melkisedek geŋ i d'ede suldi baadaŋ n'un di rootite me, wo kane sekiŋsadaŋ ooŋe kono eggun̄ attidi ki seedu k'ono me.

¹²Ki too maŋ aŋki kun t'ize doŋ dooyiso d̄uwo ti kaagine, wo aŋkeŋ i dehu d̄uwo an un di'n dooye sey dooyiso ere ti poone a urzi k'ono Raa, aa doŋ aware i ziipe addaŋ a Isa. Geŋ kun k'aane kun ki t'oomi ombo ere zakidi ye, i dehu kun di sibe udu aa in̄ni sun̄ni.

¹³Wede tuuku yi sobo udu botto geŋ, yi k'aane yi ki ti y' roote ye munda wede ki diine me, kono yoŋ ulo ŋeŋku.

¹⁴Wo de ki too maŋ, doŋ i dirse geŋ an d'oomi ombo ere zakidi. Kane urzi geŋ an d'isiyo daayum an ti duuye, an aane an di y' suune munda wede beehiye wo munda wede ulsu me.

Eber 6

¹Geŋ inŋkino kine in ôhor poone ti dooyiso ere ki poone a urzi k'Almasi gette, in a-t'onyol ekki dooyiso ere ki doŋ i-dirse. Kane suldi geŋ kun'ni suune ay un ki'n dooye ye baa, aakede: Dooyiso a urzi kama lekkiyo a suldi doŋ ulpi a-d'ette unto wo a urzi zaapu k'adde a Raa,

²dooyiso a urziyagi suyyiso batem wo a urzi zaapu bey ki beeko, wo dooyiso a urzi baldiya ki don i t'inda wo a urzi booro ki Raa ere ki daayum.

³Enno suldi don kine in d'ise ki don i-dirse me, aame Raa y'ela urzi man.

⁴Inkino man kun elko a don i iili urzi zaapu k'addan a Raa. Kane gen ti kaaga, derec ki Raa t'a-tuure addan, an y'uwwe munda wede Raa y'eliyo me, kane aggaran ede a suldi don Unde Kamilen t'isiyo me,

⁵an uwwe ono Raa kane unse me wo an ti zuune toogo duniya ere ki daana te,

⁶wo de ti suldi don an uwwe genno ton, an di gime k'adda lekkiyadan ere ti poone. Kane gen urzi umbo an di-kime lekkiyadan sey me, kono naabadan ere an ize gette aakede an taakiya Ulo Raa sey ekk'undumu wede zaapu t'ekki bakadi kan tontilko, wo gen an an eliyo urzi a duwo an di y' kildite.

⁷Kun ollo, aakede i d'ede doome siidadi gette mizzi yi koppiyto a ettu daayum man, tode gette ti d'ehiyo suldi don beehiye a don i ti derku gen me. Inkino Raa yi di zaapu beeko a siido gette.

⁸Wo de aame siido gette t'adfiya inda k'ahimagi ti woskani man, tode gette ki derku ye baa. Goppon Raa y'a ti duuda wo ki dangu y'a-t'ogga mentu.

⁹Zemba ki nun kune don ki geyyiso, kaye ay rootiyo inkino gen, ay suune adda k'addey kune a urzi wede beehiye, urzi wede k'uttiyo.

¹⁰Raa gen yon daayum ki diine, i-ki dandiya ye a naabo ere kun isiyo wo ti geyyiso ere un d'ede a sundi gette. Geyyiso gette kun ti gize t'urzi noogiyo ere kun nuuge don ki Raa ti kaaga, wo ankenno ton kun'ni noogiyo.

¹¹Wo anken, ni dehu t'addo pay n'un di roote, wede tuuku ton ti diinagan yi koonaa addi wehini aa kane bini dangu. Inkino man suldi don pay kun zaapu elkisagan eego gen, kun di'n t'oonaa.

¹²A urzi naabo Raa kun ti t'asse ye, wo de gen kun ambo zina kane don a urzi zaapu k'addan a Raa an ziida zakidi bini dangu. Inkino man an t'oonay munda wede Raa yi ruute y'an t'ela.

Raa bizi yi ki y' kama ye

¹³Ti kaaga Raa yi ruute munda wede yi di t'ela a Ibirayim. Aame gen y'a-ti nime ti suma yode batum kono wenda soo ton goole ti yode Raa umbo, y'a name tuddi me.

¹⁴Raa y'a ruute, y'ede: «Ki kotto nun n'ay di zaapo beeko daa dooziyo, wo inniza ton an d'aagila baadan.»

¹⁵Ibirayim gen y'a dille ozzinagi baadan ti ombine, san munda wede Raa yi-ruute yi di y' t'ela gen y'a y'uune.

¹⁶Duwo an nâamiya tuddaŋ geŋ, an nâamiya ti munda wede goole i jiire kane, nâamiya gette ti ti tôwwo ono, iŋkino niikiyto t'a d'ôhire goppon.

¹⁷Geŋ iŋkino, a kane doŋ i t'oono suldi doŋ Raa y'an ruute y'an t'ela geŋ, y'a dihe y'an di kize kereŋ munda wede yi ti y' ruute geŋ, bizi yi ki y' kima ye baa. Kono kamo y'a-ti nîime a onamí doŋ yi ruute geŋ me.

¹⁸Iŋkino i d'ede suldi sire, kane geŋ i ki kime ye, wo t'urzi kane geŋ Raa yi k'aane yi ki lihite ono ye. Kane geŋ an in d'eliyo toogo baadaŋ a kine doŋ uune ume k'ombide t'urzi yode, kono in a seeda zakidi a suldi doŋ in zaapu elkisadiŋ eego Raa yi ruute y'in t'ela.

¹⁹Zaapu k'elkisaadiŋ gette, t'in ti y' seedu biza k'ulbiŋ ume soo aakede maala meeda ere i-ti seedu tooko ume soo. Tode zaapu k'elkiso gette ti lekkiyo zakidi umatú soo, geŋ ti-ti doopide alboy wede adda Boy Raa a kandaane, ti d'aaniya a ume wede k'adda.

²⁰Geŋ k'ume geŋŋo Isa y'in uugume me, yi-t'iide y'in t'ihina urzi y'a t'ize mozigo goole doŋ sedeke ki daayum a urzi yode Melkisedek ti kaaga.

Eber 7

Melkisedek yoŋ mozigo wo wede sedeke

¹Ti kaaga yo Melkisedek geŋ, yoŋ mozigo ki geeger Salem, wo wede sedeke ki Raa goole a jiire pay. Ibirayim geŋ yi kama t'ume k'arka mozagi yi'ni jiire maŋ, Melkisedek y'a t'iide okkimayí wo yi di ziipe beeko a Ibirayim me.

²Geŋ a yode Melkisedek, Ibirayim yi-d'ele zakka ki suldi doŋ pay y'uubo t'ume k'arka me. To suma Melkisedek gette, i-kaza «mozigo wede isiyo munda wede ki diine a duwo». Wo soŋ yoŋ mozigo ki Salem, suma gette i-kaza «mozigo ki toose».

³Yode geŋ i-k'ede meege ye, meede ye, ita moŋgidagi ye, wo onniyo k'ehiyadí ti untadí toŋ umbo. Yoŋ geŋ yi deey'iso aa Ulo Raa, iŋkino yi lekkiyo wede sedeke ki daayum.

⁴Kun elko, Melkisedek geŋ ki kotto yoŋ goole a jiire! Yode mugiyiŋ Ibirayim wede ti diine moŋgidagi doŋ k'izirayel toŋ, a Melkisedek yi-d'ele zakka barta ere koduwo a jiire, ki suldi doŋ pay y'uubo t'ume k'arka.

⁵Wo kine in suune doŋ oŋgo ti biza bumbu Lebi geŋ, kane doŋ sedeke. Oogoro gette t'an rootiyo a kane, i dehu an di sedde zakka ere ki doŋ k'izirayel pay ise kane zembadaŋ toŋ maŋ. Wo kane pay geŋ miŋ ti biza bumbu k'Ibirayim.

⁶Wo de Melkisedek yoŋ ti biza bumbu Lebi ye toŋ, Ibirayim yi d'ele zakka ki suldi doŋ y'uubo. Wo Melkisedek yi di ziipe beeko a Ibirayim wede Raa yi ruute y'a t'oona suldi doŋ yi-t'ela geŋ me.

⁷Geŋ derec daa niiku, wede goole'ŋ yi di zaape beeko a wede ɲeŋku.

⁸Wo ki kane doŋ ti biza bumbu Lebi i seddu zakka geŋ, kane doŋ tudde an t'unto. Wo ki yode Melkisedek wede i ziida zakka geŋ, mattup ki Raa ti rootiyo a tukki yode, yoŋ yi lekkiyo ki daayum.

⁹Iŋkino maŋ ki daŋgu n'a roote'ŋ, Lebi wede i seddu zakka ere ki doŋ k'Izirayel pay geŋno toŋ, zakka gette y'a ele a Melkisedek t'urzi mugiyi Ibirayim.

¹⁰Derec, aame Melkisedek y'iide okkime k'Ibirayim geŋ, Lebi an ki ti y'ehe ye, yoŋ a moyte ki mugiyi Ibirayim botto.

Goole doŋ sedefe a urzi yode Melkisedek ti kaaga

¹¹Oogoro ere Raa y'an ele a doŋ k'Izirayel, tod' ti konso ekki naabo doŋ sedefe doŋ ti biza bumbu Lebi. Kane geŋ an d'ise naabo doŋ sedefe aa yode Aroŋ, wo urzi naabo doŋ sedefe geŋ y'a-ki t'iide ye a suldi doŋ pay Raa yi dehu me. Para maŋ ki moo me i d'ise wede sedefe ti doolo sey a urzi yode Melkisedek ti kaaga me?

¹²Aame doŋ sedefe geŋ Raa yi ti'n bilke ti doolo maŋ, urzi k'oogoro doŋ sedefe toŋ i dehu Raa y'a ti-pelke ti doolo kay.

¹³⁻¹⁴Kane ono eŋ doŋ an riine ti kaaga adda mattup ki Raa, kane geŋ an'ni ruute a tukki Galmeegiŋ. Wo kine in suune Galmeegiŋ yoŋ ti biza bumbu Lebi ye, y'uddo ti biza bumbu doolo, ti biza bumbu Ziida. Wenda soo toŋ ti biza bumbu geŋ aase naabo a ume sedefe adda Boy Raa umbo. Wo Muusa aame yi ruute a urzi naabo doŋ sedefe geŋ, munda soo toŋ yi ki ruute ye ki biza bumbu Ziida me.

¹⁵Kun ollo, eŋno munda wede in t'adfa ita suldi pay kereŋ a jiiere me: wede sedefe wede uddo ti doolo eŋ, yoŋ yi deeyiso aa Melkisedek.

¹⁶Yoŋ yi ki t'ize wede sedefe t'urzi k'oogoro ere ti rootiyo wede sedefe an yi t'ehe ti biza bumbu wede a urzi tudde ye. Wo de yi t'ize wede sedefe t'urzi lekkiyadi ere i-d'ede toogo, wenda soo toŋ yi k'aane yi-ki ti latte ye.

¹⁷Geŋ derec, ono eŋ an riine ti kaaga adda mattup ki Raa a tukki yode, an'de: «Kee wede sedefe ki daayum a urzi yode Melkisedek ti kaaga.»

¹⁸Iŋkino oogoro ere a urzi sedefe gette, Raa y'a-t'iide mentu kono t'a biite, t'a ki t'iide ye a munda wede Raa yi dehu me.

¹⁹Derec, oogoro Muusa suldi ti k'iine t'a ki ti'n iide ye a munda wede Raa yi dehu me. Ti kaaga duwo an ziipe elkisadaŋ ekk'oogoro gettiyo, wo aŋkenno Raa

y'in eelo munda wede a jiiire tode gettiyo sey, kine in zaapo elkisadiŋ eego, kono t'urzi zaapu k'elkiso gette kine in aane in t'ette ki daana Raa.

²⁰Wo soŋ aame Raa yi ti y' ziipe Isa wede sedefe ke geŋ, y'a-ti n̄ime tuddí. Wo doŋ oŋgo an t'ize doŋ sedefe daa n̄amiya tuddaŋ.

²¹Wo ki yode Isa geŋ Raa y'a di n̄ime tuddí doo miŋ, y'a ti y' ziipe wede sedefe kollo, kono Raa yi ruute ti kaaga, y'ede: «Nuŋ Galmeega Raa n'a ti n̄ime tuddó, wo bizó ni ki y' kima ye baa: Kee wede sedefe ki daayum.»

²²Kono kamo ti n̄amiya gette Isa y'a t'ize wede k'ambu k'attidi ki taasawa ere a jiiire taasawa ere Raa yi gitte ti poone.

²³Wo soŋ, doŋ baadaŋ an t'ize doŋ sedefe kono unto ti ki'n ooliyo ye, an di lekke daayum doŋ sedefe me.

²⁴Wo de ki Isa iŋkino ye, yoŋ yi lekkiyo zeere daayum geŋ, naabadí ere ki sedefe toŋ tod'te ki yode y'illak ki daayum.

²⁵Kono kamo aŋkenŋo yoŋ y'aane y'an utte ki daayum kane doŋ ettiyo ki daana Raa t'urzi yode me, kono yoŋ yi lekkiyo zeere daayum wo yi tonديو Raa kono kane.

²⁶Iŋkino maŋ Isa mozigo goole doŋ sedefe wede iddiza a kine: Raa ulbí i-d'ise uŋse ti yode, yi k'ize oldiko ye, i-k'ede munda k'ulsu a tuddí ye, yoŋ ti doŋ isiyo oldiko soo ye, wo y'a-gili k'awwa ki kandaane.

²⁷Deero doŋ sedefe pay geŋ i dehu onniyo ti onniyo an d'ise sedefe ki booyiso k'oldikadaŋ, saŋ ki doŋ doolo kollo. Wo de Isa'ŋ aakede kane geŋno ye, aame yode batum y'ele tuddí sedefe ki duwo maŋ, sedefe ere y'ele kaŋ soo gettiŋ a-t'ide baa.

²⁸A urzi k'oogoro Muusa geŋ an zippe deero doŋ sedefe, doŋ an ki t'ide ye k'isiyo munda wede Raa yi dehu me. Ti kaaga Raa y'ele oogoro a Muusa doo miŋ, saŋ maŋ y'a ruute ono doŋ y'a-ti n̄ime tuddí kollo, wo de t'urzi k'ono geŋ y'a ti y' ziipe Ulí mozigo goole doŋ sedefe ki daayum, geŋ y'a-ti diŋge suldi doŋ pay Raa yi dehu.

Eber 8

Isa yoŋ mozigo goole doŋ sedefe wede i jiiire

¹Enno munda wede toc n'un di roote eego me: Ki kotto kine in d'ede mozigo goole doŋ sedefe iŋkino. Yoŋ yi-guune a kandaane a ammade Raa toogo a jiiire suldi pay.

²Wo yoŋ wede naabo adda k'ume wede kamileŋ, yoŋ geŋ 'Boy Raa ki kotto ikkima Galmeega batum wedusu ye.

³Mozigo goole don sedefe wede tuuku ton, Raa yi y' zaapu kono yi di t'ele suldi wo y'aase sedefe. Injino man mozigo goole don sedefe wede ki kine enno ton, i dehu munda a beezí kono yi di t'ele a Raa.

⁴Aame anki Almasi yon adda duniya man, yi ki t'ise wede sedefe ye kono don sedefe a duniya ettiyo ton ede, kane an eliyi suldi a Raa don tode oogoro Muusa ti rootiyo.

⁵Naabo ki Raa ere don sedefe an isiyo a duniya ette, tod'te undiso, i deeyiso suldi don derec a kandaane. Gen aakede munda wede i iide aa suniye a Muusa, ki poone y'a okkima Boy Raa ki golmodo gen me. Aame gen Raa yi di ruute, y'ede: «K'ollo koduwo, k'odo k'a t'okkimoy boy aa wede ki wulle n'a-gize eego mukkolo.»

⁶Wo de ankenno Isa Raa yi ele naabo ere meeda a jire ere ki don sedefe pay, kono yon yi konso a diine kine duwo ti Raa, yi d'ambu attidi ki taasuwa ere a jire taasuwa ere Raa yi gitte ti poone. Taasuwa ere aware gette ti konso ekki suldi don beehiye Raa yi ruute y'an t'ela a donzi, kane suldi gen a jire don ki taasuwa ere ti poone.

⁷Taasuwa ere ti poone gette t'a ki t'iide ye k'isiyo munda wede Raa yi dehu me, injino Raa y'a ti bilke ti ere ki sirwe.

⁸Wo Raa yi wulle donzi an a ti doopide a urzizi, injino yi'n aapu, y'ede: «Kun ollo, san onniytagi an d'aana, aame gen nun Galmeega Raa n'a-ketta taasuwa ere aware ti don k'Izirayel wo ti don biza bumbu Ziida.

⁹Taasuwa ere aware gette ti k'isa ye aa ere n'a gitte ti maawan ti kaaga te, aame n'an zido beezan n'an udo ti siido Misir me. Kane an k'izire ki diine ye a urzi taasuwa gette. Injino man nun ton n'an gime dar. En i rootiyo nun Galmeega Raa.

¹⁰Kun ollo, ette taasuwa ere ni ketta ti don k'Izirayel, aame onniytagi gen an t'ingila man. Oogirado n'an ti raana adda k'eedan wo n'an ti zaapa adda k'addan, nun n'a t'isa Raazan, wo kane an t'isa donzo. En i rootiyo nun Galmeega Raa.

¹¹Wede tuuku ton ti diinayan i k'ise ye y'a dooya bakadi, ise leemadi ton man, a urzi suuniyo nun Galmeega Raa me. Derec, kane pay an di n' suuna, iise ti nenku a jire bini goole a jire.

¹²Gen a t'isa injino kono a doopidadan a urzizo gette n'an t'isa tambobino, wo oldikadan ni ki seeda addo ye baa.»

¹³Raa yi rootiyo injino ti taasuwa ere aware man, gen i-kaza taasuwa ere ti poone gette i t'ize mazzini. Wo munda wede i t'ize mazzini wo yi gulike gen, uupe goppon yi-t'engila.

Eber 9

Urzi wede ki poone k'ottilso a Raa

¹ Taasuwa ere ti poone gette, tod'te i-d'ede urziyagi k'ottilso a Raa, wo Boy Raa wede an ikkima a siido.

² Boy geŋ yoŋ ki golmodo, addi bindani sire dookide ti alboy. Biino ere ki poone gette, tod'te an ti waaku ume wede kamileŋ, adda an di ziipe munda aa gooro garziŋa sarat ti pitila eego eego, wo soŋ taabul ti mappa eego wede an ele a Raa.

³ Wo biino ere ti dar k'alboy gette, tod'te an ti waaku ume wede kamileŋ a jiiire,

⁴ adda an di ziipe munda aa sandup ki dap an d'oggiyo suldi koddiyo eediyadaŋ unse eego, soŋ an di ziipe sandup ki taasuwa ere Raa yi gitte ti doŋzi, tode gette an a di-tuuye dap. Adda sandup gette i d'ede seelo an ikkima ki dap, adda ŋ ombo sundutu mann. Dalka k'Aroŋ ere t'a giira puutagi t'a bubbe toŋ adda sandup paŋ, wo ti pakirtagi moŋgali sire raaniya eego urziyagi k'oogoro ki taasuwa ti doŋzi.

⁵ Wo t'ekki sandup gette an d'iibida duwo sire aakede maaleekiyagi sudaŋ seriben an ti'n zippe, i-kaza Raa batum yo adda. Undiso ki kambaraŋ ti-ti diibiyo ume wede mozigo goole doŋ sedefe yi sakkisa puuzo ki booyiso k'oldiko. Wo de ankenno peedo ti k'iide ye botto ki sekiŋso suldi pay geŋ me.

⁶ Geŋ suldi doŋ pay adda Boy Raa an di'n ikkima iŋkino, maŋ kane doŋ sedefe geŋ onniyo ti onniyo an d'ettiyo k'adda biino ere ki poone gettiyo, an d'isiyo suldi kono an d'ottilso a Raa.

⁷ Wo k'adda biino ere ki sirwe gette, ettiyo mozigo goole doŋ sedefe siidi, y'ettiyo kaŋ soo daŋŋal adda k'ozzine me. Wo y'ettiyo ti puuzo seysu a beezi ki sedefe a Raa, ki booyiso k'oldiko ki yode batum wo k'oldiko ki duwo paŋ.

⁸ Kun ollo, t'urzi geŋ Unde Kamileŋ ti'n kaza urzi k'ettiyo k'adda k'ume wede kamileŋ a jiiire geŋ umbo botto, koore Boy Raa wede ki poone an ikkima ki golmodo yi lekkiyo botto geŋ me.

⁹ Kane suldi geŋ undiso ki suldi doŋ iina a lekkiyadin ankenno. Geŋ i-kaza suldi doŋ an i eliyo a Raa wo ti sendikagi seydi doŋ an isiyo geŋ, kane an ki t'iide ye, an ti t'ise elkiyo ki wede isiyo suldi doŋ yi d'ottilso a Raa geŋ, delele aa Raa yi dehu me.

¹⁰ Wo suldi doŋ an eliyo a Raa ti sendikagi seydi doŋ an isiyo geŋ, kane an konso ekk'urziyagi k'oogoro doŋ an rootiyo a urzi k'ombito, sobito wo k'opilsito tudde, kane suldi geŋ an isiyo ti paate a biza k'ulbe ye. Kane urziyagi k'oogoro geŋ duwo an isiyo a urzi tudde, bini saŋ Raa y'an isa suldi pay awardi.

Almasi y'ele tuddi sedefe

11Wo de ankenno Almasi yi t'ize mozigo goole don sedefe, ki suldi don majjandani in uune ankenno. Yon yi-t'iide k'adda Boy Raa goole, munda a ki y' biite ye, a jire wede duwo an ikkima ki golmodo a siido. Boy gen i k'ikkima don tudde ye, gen i-kaza adda duniya ettiyo ye.

12Almasi gen y'iide k'adda k'ume wede kamilen a jire gen kan soo danjal a-t'iide baa. Yon y'iide ti puuzo modu ise k'ulo buru an ele ki sedefe ye, wo de yon y'iide ti puuzo ki yode batum, wo gen inkino yon y'in di'n udde ti oldikadij ki daayum.

13A urzi k'oogoro Muusa, puuzo modu ti puuzo k'ulo buru wo ti oddagi don an oggiyo k'ulo buru gen, an an di-rorriso a tukki don an t'ize ganigi a daana Raa genno, man tuddan i-t'isiyo kamilen a daana Raa.

14Wo de gen, puuzo k'Almasi i-d'ede toogo baadan a jire sey. T'urzi k'Unde Raa ere i lekkiyo ki daayum, yode batum y'a ele tuddi sedefe a Raa, yon wede aa seysu daa munda k'ulsuko a tuddi, an wilda ki sedefe. Puuzo k'Almasi gette t'in ti t'isa kamilen elkisadij ere ki suuniyo munda en beehiye en ulsu gette ti naabiyagi don ulpi in di'n t'ettiyo k'adda k'unto, kono in i di naabe a Raa zeere.

Taasuwa ere kettiyo ti puuzo k'Almasi

15Gen kono inkino Almasi yon yi konso a diine kine duwo ti Raa, yi d'ambu attidi ki taasuwa ere aware. Yon y'inda kono duwo y'an adde t'adda k'oldiko ere an ize aame an a ti diipida a urzi taasuwa ere ti poone. Inkino man kane don Raa yi'ni wiike gen an t'oone suldi don yi ruute y'an t'ela a donzi ki daayum.

16Aame wedusu yi lekkiyo zeere gen, onami don yi riije a urzi dokkide laalayij gen an k'ede toogo ye, y'inda doo min an d'ise munda wede yi riije kollo.

17Derec, aame yon gen yi lekkiyo zeere man, onami don yi riije gen an k'ede toogo ye, wo aame y'inda doo min an d'ede toogo kollo.

18Inkino kay taasuwa ere ti poone batum ton, tod' t'iise ti puuzo ere ibi doo min kollo.

19Ti kaaga ton urzi k'oogoro wede tuuku Raa y'ele a Muusa gen, y'an ti y' gize a duwo pay. San yi ziida puuzo ki modu ti puuzo k'ulo buru don an walduutu, y'a d'eezi ahu, y'a di ilmi ilali dambami teesibi, y'a-dihima soole sundi izop yi di zulpe adda puuzo, y'a di rorriso ekki mattup ere k'oogoro wo a tukki duwo pay.

20Aame yi rorriso gen, yi d'eesiyo: «Ette puuzo ere ki taasuwa Raa yi gitte ti kune, taasuwa ette y'un ruute kun d'ozire eego.»

21San Boy Raa wede an ikkima ki golmodo ti suldi don pay ki naabo a Raa ton, Muusa y'a di rurrige puuzo.

²²Geŋ derec t'urzi puuzo gette, a urzi k'oogoro suldi baadaŋ i t'isiyo kamileŋ a daana Raa, wo ki tambobino k'oldiko toŋ, i dehu puuzo t'a obi doo miŋ kollo.

Sedeke k'Almasi ti booyiso k'oldiko

²³Suldi doŋ pay ki naabo a Raa geŋ, kane undiso ki suldi doŋ a kandaane. Wo derec kane geŋ i ti'n isiyo kamileŋ sendikagi, geŋ iŋkino kay i dehu kane suldi doŋ ki kotto a kandaane batum toŋ i ti'n isiyo kamileŋ sendikagi doŋ majjandani a jiire geŋŋo.

²⁴Almasi geŋ yi k'iide ye k'adda k'ume wede kamileŋ duwo an ikkima me, yoŋ ki kotto undiso daŋŋal ki Boy Raa a kandaane. Yoŋ y'iide ki kandaane batum, aŋkenŋo yoŋ a daana Raa kono kine.

²⁵Mozigo goole doŋ sedeke ki Yawudiyagi geŋ y'ettiyo k'adda k'ume wede kamileŋ a jiire, ozzine ti ozzine ti puuzo seysu a beezí. Wo de Almasi geŋ, y'iide'ŋ y'a k'ele tuddí sedeke taŋ baadaŋ ye.

²⁶Para maŋ t'ume Raa y'ikkima duniya geŋ, Almasi y'a dabire taŋ baadaŋ bini untadí. Wo a onniytagi doŋ k'ita eŋ, yoŋ y'iido kaŋ soo daŋŋal k'adda duniya ette, kono oldiko y'a ti t'ide mentú t'urzi k'eliyo tuddí batum ki sedeke.

²⁷Kun ollo, wede tuuku toŋ y'a t'inda kaŋ soo daŋŋal, wo y'inda maŋ, saŋ y'a t'ettey daana Raa kono yi di dekkey booro.

²⁸Geŋ iŋkino kay Almasi toŋ y'ele tuddí sedeke kaŋ soo daŋŋal, kono ki booyiso k'oldiko doŋ baadaŋ. Wo yoŋ y'etto ki sirwe ki booyiso k'oldiko ye baa, wo y'etto k'uttiyo doŋ i delliyo kamadí.

Eber 10

Sedeke k'Almasi t'a jiire pay

¹Oogoro Muusa gette, tod' t'a ki t'iide ye a olde suldi doŋ derec a kandaane me, tod' ti deeyiso booloŋ daŋŋal suldi doŋ majjandani aana me. Tode gette ti rootiyo ozzine ti ozzine i dehu an d'ise sedeke seydi a Raa daayum aa ere an d'isiyto. Kono kamo doŋ ettiyo ki sirpa Raa geŋ, ki kotto oogoro gette duwo ti k'aane ti ki'n ise ye doŋ i t'iide a munda wede Raa yi dehu me.

²Para maŋ kane doŋ isiyo sedeke a Raa y'an ise kamileŋ t'oldikadaŋ, geŋ ti sedeke ere an isiyo kaŋ soo gettiŋ a-ti t'ide baa. Geŋ kane an di naabiya a Raa iŋkino ti elkiyo ere an di suuniyo munda k'ulsuko a tuddaŋ umbo, wo an ki d'isiyo sedeke ti doolo ye baa.

³Wo ki too maŋ, t'urzi sedeke seydi ere an isiyo ozzine ti ozzine gette, duwo an ki dandiya ye an a d'elkiyo a oldikadaŋ te.

⁴Derec, puuzo k'ulo buru ti puuzo modu gette, kudic ti k'aane ti ki booye oldiko wede ye.

⁵Kono k'injino, aame Almasi y'ettiyo k'adda duniya geṅ, yi di ruute a Raa, y'ede: «Kee ki ki dihe duwo an a-ki d'ise sedeke seydi ye, ise an a-di t'ele munda toṅ maṅ, wo kee k'a-n'ize tudde.

⁶Kee'ṅ ulbá a-k'ize uṅse ye a seydi doṅ an oggiyo a ume sedeke, ise sedeke ere an isiyo ki booyiso k'oldikadaṅ toṅ maṅ.

⁷Injino maṅ n'a ruute, n'ede: "Raa ki nuṅ, aṅkeṅ nuṅ batum n'a ette, munda wede ki dehu geṅ n'a-di y'iso, Eṅ munda wede an riṅe ti kaaga adda mattup ki Raa a tukki nuuno."»

⁸Geṅ Almasi y'a ruute ki poone, y'ede: «Kee ki ki dihe duwo an a-ki d'ise sedeke seydi ye, ise an a-di t'ele munda toṅ maṅ, ise sedeke ere an t'oggiyo a ume sedeke wo sedeke ere ki booyiso k'oldiko toṅ maṅ. Kane pay geṅ miṅ ulbá a-k'ize uṅse ye.» Wo ki too maṅ kane pay geṅ miṅ sendikagi doṅ oogoro Muusa ti ruute duwo an d'ise.

⁹Maṅ Almasi y'a ruute sey, y'ede: «Aṅkeṅ nuṅ batum n'a ette, munda wede kee ki dehu n'a-di y'iso.» Injino maṅ urzi wede ki poone y'a-y'iide, wo y'a ti y' bilke ti wede ki sirwe.

¹⁰Almasi yi di t'ize naabo ere Raa yi dehu te, injino y'in di'n uuye kese a yode Raa t'urzi sedeke ere k'Isa Almasi y'ele tuddi kaṅ soo daṅṅal, gettiṅ a-t'iide baa.

¹¹Wede sedeke tuuku toṅ onniyo ti onniyo yi lekkiyo kaṅ ôhire jep kono yi d'isiyo naabadí, yi d'eliyo daayum sedeke ere tod'tiṅ tode deṅ, wo de tod'te kudic ti k'aane ti ki booye oldiko ye.

¹²Wo de ki yode Almasi geṅ, y'ele tuddi sedeke ki booyiso k'oldiko kaṅ soo daṅṅal, saṅ y'iide'ṅ y'a-guune a ammade Raa ki daayum.

¹³Wo a ume geṅ yi-delliyo, bini onniyo ere Raa y'an isa doṅ k'aduzi aa munda ki bita ti dandí zoṅdí.

¹⁴Geṅ t'urzi sedeke ere Almasi y'ele tuddi kaṅ soo daṅṅal gettiṅ, kane doṅ yi'n uuye kese a Raa geṅ y'an ize doṅ i t'iide a munda wede Raa yi dehu ki daayum.

¹⁵Unde Kamileṅ toṅ t'in ruute ti kaaga, derec ti ruute ki poone, t'ede:

¹⁶«Galmeega Raa y'a ruute, y'ede: Ettiyo taasua ere ni ketta ti kane te, aame onniytagi geṅ an t'ingila maṅ. Oogiradó n'an ti zaapa adda k'addaṅ, wo n'an ti-raaṅa adda k'eedaṅ.»

¹⁷Soṅ y'a ruute sey, y'ede: «Nuṅ oldikadaṅ wo suldi doṅ ulpi an isiyo geṅ ni ki seeda addó ye baa.»

18Wo aame wede y'uune tambobino k'oldikadí maṅ, i ki dehu y'a ki t'ele munda ki sedefe a Raa ki booyiso k'oldikadí ye baa.

Almasi yoṅ urzi wede aware

19Iṅkino kun ollo zamba ki nuṅ, t'urzi puuzo k'Isa geṅ, kine in d'ede urzi k'ettiyo daa k'orgiso k'adda k'ume wede kamileṅ a jiire geṅ me.

20Geṅ i-kaza Isa y'in ihina urzi aware y'in di'n t'etta k'ume lekkiyo, y'in ihina aame yi ti diipida alboy ki Boy Raa, i-kaza urzi geṅ y'in ihina t'urzi tuddí batum ere y'ele sedefe.

21Wo kine in d'ede wede sedefe i jiire pay, Raa y'a ti y' ziipe t'ekki doṅ boozí.

22Iṅkino maṅ kine in a odo goppon ki sirpa Raa t'adde soo, òoniyo ti zaapu k'adde a Isa, addiṅ kamileṅ ti suldi doṅ pay i-ti lattiya elkiyadiṅ ere in di suuniyo munda eṅ beehiye eṅ ulsu geṅ me, wo tuddiṅ suyyiso t'ahu doṅ kamileṅ.

23In soodo zakidi daayum a kazita munda wede kine in zaapu elkisadiṅ eego, kono Raa yi seedu zakidi a munda wede yi ruute y'aasa me.

24In aa elko ti tuddiṅ kono in t'ele kooke a urzi geyyiso wo a urzi k'isiyo naabiyagi doṅ beehiye.

25Kine in ti ðekke ye t'ogiyso ere ki zamba me, aakede doṅ oṅgo ge d'isiyo daayum me. Ki too maṅ in t'ele kooke baadaṅ a jiire sey ti tuddiṅ, kono kun suune onniyo ere ki Galmeega tod'te goppon.

26Aame kine ðerec ki Raa in ti zuune kereṅ wo in d'isiyo oldiko mirsi maṅ, geṅ sedefe ti doolo umbo a booya oldikadiṅ te.

27Wo ðe wede y'isiyo iṅkino geṅ i guute munda soo, yi dello t'orgiso baadaṅ booro ere ki Raa wo uwo ere t'oggiyo ki daayum, t'a t'oggey kane doṅ i-ti toogiyo a Raa.

28Kun suune ti kaaga geṅ, wede y'a ti doopide a oogoro Muusa maṅ, yoṅ ki t'owwo daa wolliyo sommagí, wo i dehu doṅ sire t'ado i wulle wo illiga munda geṅno doo miṅ kollo.

29Kun elko, wede yi t'oṅy'ile Isa Ulo Raa, yi ti wolliyo puuzo ki taasuwa ere t'a y'uuye kese a yode Raa gette ganigi, wo yi kalda Unde Raa ere t'in di kaza beeko Raa maṅ, ki kotto yoṅ geṅ y'a t'oono dabar ere ooṅe a jiire sey.

30Eyye, kine in yi suune yode wede yi ruute ti kaaga, y'ede: «Kun oolo, nuuno an ti dooza me, a wede tuuku toṅ daṅgayadí i-ti t'ela nuuno a munda wede y'ize me.» Wo y'a ruute sey, y'ede: «Galmeega Raa y'a ðekka booro a tukki doṅzi.»

31Geṅ ooṅe baadaṅ a wede i t'iira a bey Raa zeere maṅ.

³²Wo ɗe kun elko a munda wede ize ti kaaga aame kun uune toore Raa i d'eliyo uttiyo genno. Kune duwo an un di'n dibire baadan, wo kun a ziida zakidi bini dangu adda deyyiso ere zakidi gette.

³³Don ongon ti diinagon an an di'n gildite, an an di'n dibire, an an d'an d'ele sukiyagi a daana don duuru, wo don ongon ti diinagon kun di guune nollon ti kane a dabaradan gette.

³⁴Inkino man kune kun di wulle sommagi ki don an ti'n zidde dangay, wo aame suldugon an ti ziki ton, kun d'iyye ti unsuwo kono kun suune un d'ede suldi don Raa y'un ele, kane gen laale wede a jire i lekkiyo ki daayum.

³⁵Seedu zakidi ere kun seedu gette, kun ti dagga ye, kono ti tode gette kun t'ooney suldi baadan don Raa yi dehu y'un t'eley a naabagon te.

³⁶Gen i dehu kun d'ombina, kun di seeda zakidi bini dangu, kono kun i-ti t'ise naabo ere Raa yi dehu te. Inkino kun di y' t'ooney munda wede Raa yi ruute y'un t'eley me.

³⁷Ono en Raa yi ruute ti kaaga, y'ede: «Ume a guute goppon, tan boolon dangal, wede a etto gen y'a aana, yi ki ti t'osso ye.

³⁸Wede yon ki diine a daanado gen, y'a lekka t'urzi zaapu k'adde a nuuno, wo de aame t'urzi zaapu k'addi a nuuno yi t'irga man, ulbo o k'isa unse ye ti yode me.»

³⁹Kine en, kine ti diine don i t'argu t'urzi zaapu k'addan a Raa an di daggiya genno ye. Wo de kine don i ziipe addan a Raa, an d'utta undiyagan genno.

Eber 11

Zaapu k'adde a Raa ki don a ziida zakidi ti kaaga

¹Zaapu k'adde a Raa gette, tod'te urzi wede in d'ooniyo suldi don in zaapu elkisadin eego, wo tod'te urzi wede in di suune suldi don in ki'n woliyo ye gen kane ki kotto.

²Kane mongidagi ti kaaga gen an ziipe addan a Raa, inkino man Raa ulbi i di t'ize unse ti kane me.

³T'urzi zaapu k'adde a Raa gen, kine in suune suldi pay Raa yi'n ikkima t'ono don udde ti bizi. Gen inkino suldi don in'ni woliyo en, Raa yi'n ikkima t'urzi suldi don in ki'n woliyo ye.

⁴T'urzi zaapu k'adde a Raa gen, Abel yi-d'ize sedeke a Raa beehiye a jire ere ki Kayen. Abel gen yi ziipe addi a Raa, inkino man Raa y'a yi wulle ki diine a daanadi me, wo sedikadi ton y'a ti ziida bey sire. T'urzi zaapu k'addi a Raa, Abel gen y'inda ton, anki t'urzi munda wede y'ize gen aakede yi'n rootiyo sey.

⁵T'urzi zaapu k'adde a Raa geɗ, Enok Raa y'a y'umbe ki kandaane daa k'unto. Wenda soo ton yi ki y' wulle ye baa, kono Raa yi y'umbe ki sirpadí. Ono en an riije ti kaaga adda mattup ki Raa, an'de: Ki poone Raa y'a y'amba Enok ki kandaane geɗ, lekkiyadi gette i-d'ize unse a Raa me.

⁶Wo de wede yi ki ziipe addi a Raa ye man, geɗ i-k'ise ye Raa ulbi i-d'ise unse ti yode me. Derec, wede y'ette ki sirpa Raa yi-d'ottile geɗ, i dehu y'a ambe adda k'addi Raa ede wo Raa y'an d'isiyo suldi don beehiye a kane don i yi dehu t'adde soo me.

⁷T'urzi zaapu k'adde a Raa geɗ, Nowe Raa yi di-tuuke kuudi a munda wede yi ki y' wulle ye botto. A ono don Raa yi-ruute geɗ y'a umbe onami y'a t'ikkima tooko ere meeda a jiire, kono y'a utta don boozí. Injino man t'urzi munda wede y'ize geɗ, don duniya booro t'anni ziida wo yon y'a uune beeko, wo Raa y'a yi wulle yon ki diine a daanadi kono yi ziipe addi a yode.

⁸T'urzi zaapu k'adde a Raa geɗ, Ibirayim y'a iyye a waaku Raa, wo y'a illiga onami, injino man y'a ingile ki siido ere Raa yi-ruute yi di t'eley, wo y'a ingile daa suuniyo k'ume wede y'ette.

⁹T'urzi zaapu k'adde a Raa geɗ, Ibirayim y'a tiide y'a-guune aa torgusu a siido ere Raa yi ruute yi di t'ela te, yon yi likke adda bindani ki tanda, san k'ita man Isaaka ti Yakup an di likke aa yode kay, kane ton an uune kay munda wede Raa yi ruute yi di t'ela a Ibirayim me.

¹⁰Ibirayim y'ize injino kono yi delliyo geeger ere itatu zakidi, tode ere yode Raa batum y'ilke wo y'a-t'iiziga.

¹¹T'urzi zaapu k'adde a Raa geɗ, Sara gette tod'te goolowo wo karta ton, Raa y'a-t'ize t'a iine ti d'ehe ulo. Y'ize injino kono tod' ti zuune adda k'addutu Raa geɗ yi seedu zakidi a munda wede yi ruute y'aasa me.

¹²Geɗ injino t'urzi wedusu soo yi t'ize goole yi t'aahe k'unto ton man, i d'udde don baadan aakede moldali a kandaane, wo aa dolso ere a biza bar wenda yi ki ti'n kize ye.

¹³Kane pay geɗ min an ziipe addan a Raa bini an t'inda, daa k'ooniyo suldi don Raa yi ruute y'an t'ela. Suldi geɗ an di'n wulle ti dokki, ulban aaze unse, wo kane an di ruute kereɗ a daana duwo, a lekkiyadan a siido ette kane aa torgagi don ido torgowo.

¹⁴Kane don i rootiyo injino geɗ, i-kaza kereɗ kane an dehu siido ere ti doolo.

¹⁵Kane an k'elkiyo ye baa a siido ere an d'udde t'adda gette, wo aame an diha an di-kime k'adda sey man, urzi ede an aane an di-kime.

16Wo ki too maŋ, kane an zaapu elkisadaŋ a siido ere a kandaane a jiiire. Kono kamo Raa geŋ i-k'ede sukiyagi ye an di y' waake Raazaŋ me, iŋkino maŋ yoŋ geeger y'an ikkima.

17-18T'urzi zaapu k'adde a Raa geŋ, Ibirayim y'a iyye yi di t'ele ulí Isaaka ki sedeke a Raa aame yi y' niime geŋ me. Derec, Raa yi ruute ki poone, y'ede: «Geŋ t'ita k'inni k'Isaaka duwo an di'n waaka ita k'innizá.» Iŋkino toŋ, ulí yoŋ soo daŋŋal y'a iyye yi di t'ele sedeke a Raa.

19Wo Ibirayim geŋ y'elkiyo adda k'addí Raa i-d'ede toogo y'aane yi ti y' balde wede inda me, geŋ iŋkino Raa yi y' gimo ulí Isaaka aa ti bize k'olde. T'urzi geŋ i-kaza munda wede aana k'ita.

20T'urzi zaapu k'adde a Raa geŋ, Isaaka y'an di ziipe beeko a innizí kane Yakup ti Ezayu a urzi lekkiyadaŋ ere ki daana.

21T'urzi zaapu k'adde a Raa geŋ, Yakup aame y'ambe k'unto maŋ, a inni Yusup wede tuuku toŋ yi di ziipe beeko beeko wo yi d'uttile a Raa kaŋ dirsiyo a bize dalkadí.

22T'urzi zaapu k'adde a Raa geŋ, Yusup aame y'ambe k'unto maŋ, y'an di ruute a zembadí inni k'Izirayel, y'ede: «Onniyo soo ti siido Misir kun t'adfa kun t'aaha ki siidagun», wo y'an di ruute a munda wede an d'isa, y'ede: «A addiyagun gette, ossagó kun oola ye.»

23T'urzi zaapu k'adde a Raa geŋ, Muusa maawí an ti y'ehe maŋ, an di y'umbida y'a likke tere ado, kono an wulle'ŋ ulaŋ majjaane wo an ki d'urgide ye an a-ti diipida a oogoro ere mozigo Parahoŋ y'ize te.

24T'urzi zaapu k'adde a Raa geŋ, Muusa yi t'ize goole maŋ, y'a ki y'iyye ye baa duwo an di y' waake ulo k'uto Parahoŋ me.

25Y'a dihe duwo an i-d'ise ulsu ti kane doŋ Raa bee miŋ, y'aase unsuwo ki peedo booloŋ adda k'oldiko.

26Yoŋ y'ilke adda k'addí miŋ, y'a oyye y'a t'oone sukiyagi doŋ aa k'Almasi yi t'oona. Sukiyagi geŋ kane zooyayaŋ ooŋe a jiiire korbite ki siido Misir, kono yoŋ yi wolliyo munda wede Raa yi dehu yi-t'eley.

27T'urzi zaapu k'adde a Raa geŋ, Muusa y'a t'udde ti siido Misir daa k'orgiso a kulkuwo mozigo Parahoŋ, yoŋ y'a ziida zakidi kono yi wolliyo Raa wede wenda yi k'aane yi ki y' wolle ye.

28T'urzi zaapu k'adde a Raa geŋ, Muusa y'an di gize doŋ k'Izirayel an d'ise tarnaape Pak ki Yawudiyagi, iŋkino boha bumbiyagaŋ an a-t'unkite puuzo, kono maaleeka wede ki lattiya geŋ y'a ki ti'n t'ida ye inni kabba ki doŋ k'Izirayel me.

29T'urzi zaapu k'adde a Raa geɗ, Bar Teezewo a diikida sire, donj k'Izirayel an di diipida siido meedi. Wo de donj siido Misir an dehu an di doopida kay, maɗ ahu an da t'an bilde an t'inda.

30T'urzi zaapu k'adde a Raa geɗ, donj k'Izirayel an duule geeger Zeriko onniyo sarat, maɗ waaya monjali ki geeger gette t'a iire.

31T'urzi zaapu k'adde a Raa geɗ, Raahap ere t'ooniyo ombo bittú t'itatú tonj, donj seddiyo beere t'anni ziida ti toose. Injino maɗ donj k'Izirayel an di'n iide donj i-tuuge a Raa me, wo tod'te an gi di-t'iide ye.

32N'a t'eese moo sey me, peedo t'a ni biite n'a roote taaya ki donj aakede: Zedeyonj, Barak, Samsonj, Zepte, Dawut, Samiyel wo ti nebiyagi donj ongo me.

33T'urzi zaapu k'adde a Raa geɗ, donj ongonj ti diinayanj an di diyye mozagi wo an di jiire, donj ongonj an d'ize munda wede ki diine a duwo me, donj ongonj an d'uune munda wede Raa y'an ruute y'an t'ela, wo donj sonj suwwidi tonj bohananj an an t'ippite.

34Donj ongonj uwwo ti wehinkatú tonj an ti-t'iide, donj sonj an d'utte ti unto ere ki kasigara. Donj ongonj toogadanj umbo tonj an t'ize donj toogo, donj sonj an t'ize donj kuuli a urzi k'arka, wo donj sonj asigiryagi donj ki siido doolo tonj an di'n ilmi.

35T'urzi zaapu k'adde a Raa geɗ, erayi ongonj an di wulle donzanj donj i t'inda geɗ an ti bilde. Wo de donj ongonj an di'n dibire baadanj k'unto tonj, kane an di-tuuge k'addiya ti dabar te kono kane an suune an t'ooney baldiya ere a jiire.

36Ongonj an d'uune okko maade wo gorpiso ti marpa, donj sonj an ti'n gittite ti zinziri wo an di'n ibi danjay.

37Donj sonj an ti'n gikkite ti monjali an di'n iide, donj ongonj an ti'n dikkite sire sire ti si, wo donj ongonj an di'n iide ti kasigara. Donj ongonj an derilsito, ossiyadanj golmodo dambami ti moodé, an k'ede munda ye, duwo an an d'oodibe yeebadanj, wo an an d'isiyo ulsu.

38Kacij kane donj duniya batum an ki t'iide ye duwo geɗ an di lekke ti kane me. Injino an di sewiyso adda balda, adda monjali, an di lekkiyo adda k'urmidí wo adda k'oldagi.

39Kane pay geɗ munda wede Raa yi ruute y'an t'ela an ki y'uune ye tonj, an di ziipe addanj a Raa wo yonj ulbí i di t'ize unse ti kane me.

40Geɗ Raa y'a dihe y'in d'ise munda wede beehiye a jiire sey a kine me, injino maɗ Raa yi ki dihe ye, kane an t'ise donj i-t'iide a munda wede yi dehu, daa kine adda ye me.

Eber 12

Raa yoŋ Meegiŋ

¹Doŋ pay i gize urzi zaapu k'addaŋ a Raa geŋ, kane a kine aakede doŋ baadaŋ an di ti'n duule. Inkiŋo maŋ attidi pay wede in d'ede ti oldiko ere in ti'n seedu a sooruziŋ ere a urzi Raa gette, in ti'n booyo. Wo soŋ in okko ti ombiŋe a dalala ere Raa y'in ruute gette, bini ume k'aaniya.

²Kine in sebbo daayum edayiŋ ki tukk'Isa, yoŋ eesiyo k'urzi zaapu k'adde a Raa, wo y'a-di d'ingila bini a ti-t'ida a munda wede Raa yi dehu. Yoŋ y'a iyye y'a inda ekk'undumu wede zaapu t'ekki bakadi kaŋ tontilko. A unto ki sukiyagi kino ette, a yode i di t'ize aa munda ki bita, kono yoŋ yi wolliyo unŋsuwo ere yi t'oona, wo aŋkenŋo yoŋ yi-guune a ammade ki kaakido moziko Raa.

³Inkiŋo kun elko a yode Isa, kane doŋ k'oldiko geŋ an i d'ize ulsu baadaŋ, wo yoŋ y'a ziida zakidi bini daŋgu. Inkiŋo maŋ, kune'ŋ tudduguŋ i rorriga kun ti tasse ye.

⁴Kune'ŋ adda deyyisaguŋ ere ti oldiko gette, kun ki diyye bini puuzaguŋ t'a k'ibi ye.

⁵Ki kotto, kune un dunde kooke wede Raa y'un ele a kune inŋizí me! Derec, Raa yi ruute ti kaaga, y'ede: «Ulo ki nuŋ, kee k'orgide ye a deeziyo Galmeega Raa te, wo kee ki-tassa ye aame y'a rootiyo munda k'isiyo eŋ ulsu maŋ.

⁶Derec, Galmeega Raa yi deeziyo wede yi giyye, yi kossiyo ulo wede tuuku yi y' ziida bey sire.»

⁷Kun ombon a dabar ere ettiyo t'urzi deeziyo Raa te. Yoŋ y'un isiyo inkiŋo kono kune inŋizí wo y'un di'n oodibe. Ede ko ulo wede meegi yi ki y' deeziyo ye me?

⁸Aame kune Raa y'un ki'n deeziyo aa yi deeziyo inŋizí pay ye maŋ, geŋ kune inŋi k'addí ye, inŋi doŋ ki bande.

⁹Adda duniya ette kine wede tuuku toŋ i-d'ede meege an in di'n deeziyo wo in d'ollige onamaŋ. Inkiŋo maŋ derec, kine a Meegiŋ Raa a kandaane in i d'ottila a ceere sey kono in t'oona lekkiyo ere ki daayum.

¹⁰Maawiŋ kuuli geŋ an inni deeziyo ki peedo boolon aa addaŋ i dehu. Wo yo Raa y'inni deeziyo ki beehiyko a kine, kono yi dehu in t'ise doŋ kamileŋ aa yode batum.

¹¹Deeziyo ere pay gette a kaamiki a di t'owwe eeni, unse ye. Wo saŋ kane doŋ ooniyo deeziyo gette, adda k'addaŋ ti t'ehiyo lekkiyo ere ki diine ti toose.

Seedu zakidi a urzi daaniya k'Isa

¹²Inkiŋo maŋ kune doŋ beydiyaguŋ urme ti zibbanguŋ doŋ ombo gede gede geŋ, kun ti'n ôhor way'irak.

13Wo ki zoŋguŋ erkiyagi kun ti'n okkoŋ dfelele, kono wede jekese y'a ki di kima ti duŋdilsadĩ ye, wo ki too maŋ y'a t'oone beeko.

14Kun elo gotono ki lekkiyo ti toose ti duwo pay, wo soŋ kun di lekko doŋ ooyiso kese a yode Raa, kono wede ooyiso kese a yode ye maŋ, yi k'aana yi ki y' wolla ye Galmeega Raa me.

15Kun koonaa mentikagi, kono wenda soo toŋ yi ledfa ye t'urzi beeko ere ki Raa te. Ti diinaguŋ wenda soo toŋ yi t'isa wede lattiya k'ume ye, aakede undumu kadigi yi t'adfiya maŋ, kadigiwadĩ gette ti seedu doŋ baadaŋ.

16Kun koonaa mentikagi kono wenda soo toŋ ti diinaguŋ y'isa boliyo ye, wo soŋ suldi doŋ kamileŋ ki Raa yi'n onyilsa ye, aakede Ezayu, kono k'ombo ere kaŋ soo takkat y'a t'iwila aggadĩ ere ki gooliko k'ehiyadĩ.

17Wo kun suune, saŋ maŋ Ezayu y'a dihe yi-d'obe bey ti zumari edayĩ, meegi y'a-kime bizĩ yi di zaape beeko toŋ umbo, y'a ti y' lidde beeko y'a ki t'uune ye.

18Ankenno kune kun a k'iide ye k'ita munda wede k'a yi botte ti beezá me, aa mukkolo Sinayi ti kaaga doŋ k'Izirayel an a d'iide gette. Ekki mukkolo gette an di wulle uwwo t'oggiyo dala dala, ume zimolo dil aa diddo wo ursino.

19An d'illiga parre wo golla Raa ti rootiyo, wo kane doŋ k'Izirayel illiga golla gettiyo geŋ, an tunde Raa kono y'an ki roote ye baa ono ti doolo me.

20Kane an ize inkiŋo kono an k'iine an k'imbiŋa ye a ono doŋ Raa y'an ruute, y'ede: «Wede tuuku yi butta tokomo ettiyo ise seysu toŋ maŋ, an ti y' kakkita ti moŋgali an di y' t'ida.»

21A suldi doŋ an wulle geŋ, an di biiha k'orgiso. Inkiŋo Muusa y'a ruute, y'ede: «Nuŋ toŋ ni-biiha k'orgiso, ni noŋŋirso.»

22Wo ki kune inkiŋo ye, kune kun iide ki tukki mukkolo Siyoŋ, wo ki tukki geeger ere ki Raa zeere, tod'te Zeruzalem ere a kandaane. Wo soŋ kun iide ki tukki maaleekiyagi baadaŋ an t'ugiyee an isiyo unsuwo,

23wo ki tukki doŋ pay ogiyso ti suma k'Isa, kane geŋ aa inŋi kabba, sumbiyagaŋ raaniya adda mattup ere a kandaane. Soŋ kun iide ki tukki Raa wede a deka booro ki doŋ pay, wo kun iide ki tukki doŋ kane ki diine i t'inda ti kaaga, kane Raa yi'n ize a-t'iide a munda wede yi dehu.

24Soŋ kune kun iide ki tukk'Isa, yoŋ yi konso a diine kine duwo ti Raa, yi d'ambu attidi ki taasuwa ere aware, wo ki tukki puuzadĩ ere ibi t'in di'n ize kamileŋ a daana Raa, tod'te toogo i jiire puuzo ere ki Abel.

25Inkiŋo maŋ kun koonaa mentikagi, kun ti tooge ye k'ollige ki wede un rootiyto me. Derec, doŋ k'Izirayel an di-tuuge k'ollige k'ono doŋ Muusa y'an tuuke kuudaŋ adda duniya geŋ, ti booro Raa an ki t'ilda ye. Geŋ inkiŋo a jiire sey, kine

toŋ in ki t'aldá ye ti booro Raa te, aame in ti tuuga k'ollige k'ono ki wede in rootiyo ti kandaane maŋ.

²⁶Ti kaaga geŋ Raa a golladí ɗaŋŋal siido t'a ŋuŋŋire, wo aŋkenŋo in suune munda wede Raa yi ruute y'aasa me, y'ede: «K'ita eŋ, kaŋ soo sey ni ki ŋoŋŋira siido sittú ɗaŋŋal ye, wo kandaane pây.»

²⁷Ono ɗoŋ yi ruute, y'ede: «K'ita eŋ, kaŋ soo sey» i-kaza sulɗi ɗoŋ pay Raa y'ikkima geŋ, ɗoŋ aane i gozzige an t'eŋgila, kono sulɗi ɗoŋ i k'aane i ki gozzige ye, an di lekka.

²⁸I dehu kine in di roote koɗuwo a Raa, kono y'in ele moziko ere i ki gozziso ye. Inŋkino maŋ in naabo a Raa t'orgiso wo ti ottilso, kono yode toŋ ulbí i-d'ise uŋse.

²⁹Ki kotto Raaziŋ geŋ yoŋ aa uwwu, yi-t'oggiyo sulɗi ɗoŋ pay ulpi a ɗaanadí me.

Eber 13

Kooke a ɗoŋ i ziipe addaŋ a Isa

¹Kune daayum kun geyyo tudduguŋ aakede zemba.

²Un dande ye, ɗuwo kun'ni soodo bey sire, kono t'urzi geŋ ɗoŋ oŋgo an di'n ziiɗa maaleekiyagi bey sire, daa suuniyo kane maaleekiyagi me.

³Kun a elko a ɗoŋ an ti'n zidde ɗaŋgay, aakede kune toŋ adda ɗaŋgay ti kane kaŋ soo. Kun a elko a ɗoŋ ɗuwo an an isiyo ulsu, kono kune toŋ ɗoŋ tudde kun dabirsa aa kane kay.

⁴I dehu ɗoŋ pay an t'ele suma a urzi seedu geŋ me, wo kule yi ki t'udige t'ere bakadí ye, ise erewo toŋ inŋkino. Kun suune, ɗoŋ i moonite t'erayi ise ti kuuli k'eebaŋ wo ɗoŋ isiyo boliyo geŋ, Raa y'a ɗekka booro a eedaŋ.

⁵A lekkiyaguŋ gette unni dokke geyyiso soŋko ye, ulbuguŋ iso uŋse a munda wede un d'ede, kono Galmeega Raa batum yi ruute, y'ede: «Nuŋ, n'a-k'eeza ye wo ni ki kiigira ye tak.»

⁶Kono kamo kine in aane in zaape addiŋ pay a yode, wede tuuku y'a roote, «Galmeega Raa yoŋ wede yi ni noogiyo, ni k'orgide a munda ye. Kane ɗoŋ tudde an aane an o d'ise moo me?»

⁷Kun elko a ɗoŋ dokkiyaguŋ ɗoŋ un gizite ono Raa. Inŋkino kun elko a lekkiyadaŋ ere an likke mummino bini an a-t'inda geŋ me, wo geŋ kune toŋ kun doozo urzi zaapu k'addaŋ a Raa.

⁸Isa Almasi geŋ yi lekkiyo yoŋ miŋ yode, t'ume k'eesiyo, aŋki wo ki daayum.

⁹Geŋ kun oola tudduguŋ a ɗuwo an un ti'n dagga ye, t'urzi dooyiso ere ettiyo ti paate a ki t'ettiyo a Rabila Majjaanawa gettiyo ye. Geŋ beehiye'ŋ in t'oone toogo

adda k'addiŋ t'urzi beeko ere ki Raa, t'urzi daaniya k'oogoro ere a urzi k'ombito ye, tode gette kane doŋ i ti daaniya wenda soo toŋ ti ki nuuge ye.

10Kane deero doŋ sedefe ke ki Yawudiyagi doŋ i naabiya adda Boy Raa geŋ, an k'ede urzi an ki d'oomi ombo ere ettiyo t'ume sedefi kadiŋ ye.

11Kun suune seydi doŋ an waldutu ki sedefe geŋ, puuzadaŋ mozigo goole doŋ sedefe yi-t'ambu k'adda Boy Raa wede kamileŋ a jiire geŋno, kono ki booyiso k'oldiko. Wo tudde ki seydi doŋ an waldutu ki sedefe geŋ, t'adda k'ille an di'n addiya paate k'oggiyo mendaŋ.

12Geŋ iŋkino kay Isa toŋ, kono duwo y'an ooya kese a Raa ti puuzadi geŋ, ti geeger an di y'udde paate, an di y' dibire wo an di y'ide.

13Iŋkino maŋ kine toŋ t'adda k'ille in t'addo in t'odo okkime k'Isa, wo in ooyo sukiyagi doŋ aa yode y'uune geŋ me.

14A duniya ette kine in k'ede ye geeger ere in di lekke ki daayum te, wo de in dehu geeger ere ki daana in di lekka ki daayum.

15Iŋkino maŋ t'urzi k'Isa geŋ, kine in amma Raa daa puukiyo, wo tamma gette aa sedefe a Raa, tode gette ono doŋ addiya ti bize i-kaza Raa yoŋ wee wee.

16Kune un dande ye a isiyo beehiyko ti noogiyo tudduguŋ te, kono kane geŋ aakede sedefe ere Raa ulbi i-d'isiyo uŋse.

17Kun ollo ono doŋ dokkiyaguŋ, kun kili t'eedaŋ ye, kono kane geŋ ersadaŋ a tukki kune, wo an suune onniyo soo an t'idey taaya a Raa a naabo ere pay an ize a tukki kune gette. Kun iso t'urzi tuuku toŋ an d'ise naabadaŋ ti uŋsuwo, addaŋ i latta ye, para'ŋ addaŋ i litta maŋ, a kune beehiye ye.

18Kun tondo Raa ki kaye, kono ay suune adda k'addey ay d'ede elkiyo ere ay di suuniyo munda k'ulsuko a tuddey umbo, ay dehu ay di lekke ki diine aame tuuku toŋ maŋ.

19Nuŋ ni koddime a kune, kun di tonde Raa, y'o di t'ihina urzi n'a-kime kesiko k'ume kune.

Toose ere ki danggu

20Raa wede i d'eliyo toose, yoŋ wede a bilde Galmeegiŋ Isa ti diine doŋ unto. Isa geŋ goole k'elso dambami, wo t'urzi puuzadi ere ibi ki sedefe gette, Raa y'a gitte taasuwa ti kine ki daayum.

21Nuŋ ni ton-diyo Raa, y'un di'n ise doŋ aane i t'ise suldi doŋ pay beehiye kono kun d'ise munda wede aa yoŋ yi dehu, wo t'urzi k'Isa Almasi geŋ Raa yi-kama addiŋ kono ulbi i-d'ise uŋse. Iŋkino tamma t'a koone a yode ki daayum! Eyye.

²²Zemba ki nuŋ, n'un rootiyo eŋ ti obe bey, kooke wede adda mattup ette kun y'ollo t'ombiŋe, kono ono doŋ adda mattup n'un agisa eŋ kane baadaŋ ye.

²³Kun ollo, leemadiŋ Timote ti dangay an ti y'udde. Aame de y'iina kesiko maŋ, ay t'etta ti yode kaŋ soo ay un ti'n wollo.

²⁴Kun an t'iso toose a doŋ dokkiyaguŋ pay wo a doŋ ki Raa pay. Doŋ siido k'Itali an un t'ize toose.

²⁵Iŋkino maŋ beeko Raa ti koono eggun pay.

Zak

Zak 1

Toose ki Zak

¹Mattup ette i raaniya nuɗ Zak wede naabo ki Raa wo ki Galmeega Isa Almasi, n'un t'ize toose a kune pay ɗoɗ Raa ɗoɗ i lekkiyo teepiyo adda duniya.

Urzi zaapu k'adde a Raa wo suuniyo k'ono

²Zemba ki nuɗ, kune ulbuguɗ un iso unse baadaɗ aame un iido munda wede ooɗe tuuku toɗ maɗ,

³kono kun suune, aame a zaapu k'adduguɗ a Raa gette kun ôhire toogo a naamiya maɗ, kun t'isa ɗoɗ a seedu zakidi bini ɗangu.

⁴Wo kun lekko zeere kono a seeduguɗ ere kun ziida zakidi gette t'a k'ôhira ye bini ɗangu, inkiɗo kun t'isa ɗoɗ i-dirse, kun îide, kun a ki biite ye a urzi zaapu k'adduguɗ a Raa me.

⁵Aame wede soo ti diinaguɗ i baatiya suuniyo k'ono maɗ, yi tondo Raa wo yoɗ yi di t'ela, kono Raa yoɗ y'eliyo a ɗoɗ pay daa dooziyo wo ti beehiyko.

⁶Wo i dehu yoɗ y'a tonde ti zaapu k'adde a Raa daa niiku adda k'addi, kono wede i-d'ede niikiyo adda k'addi geɗ, yoɗ aakede ahu ɗoɗ ki bar maaye yi'ni kolzite baadaɗ an d'ambu keɗɗo keɗɗo.

⁷Wede inkiɗo geɗ y'elke ye yi-t'ona munda ti bey Galmeega Raa me,

⁸kono yoɗ yi-baakiya, elkiyadi soo ye a munda wede y'isiyo tuuku toɗ maɗ.

Wede i-k'ede munda ye ti wede laale

⁹Leema wede i-k'ede munda ye geɗ, ulbi i iso unse kono Raa yi y'ize goole,

¹⁰wo wede laale toɗ, ulbi i iso unse kono Raa yi y'ize neɗku, kono yoɗ yi-t'engila aakede bobbo k'inda.

¹¹Peedo ti koliyo, ti d'oggiyo wehini, bobbo i-ti baahu, i-t'eepiyo wo majjaanikatú ti-daggiya. Geɗ inkiɗo kay wede laale toɗ, y'a dagga adda diine naabiyagi ɗoɗ y'isiyo geɗ me.

Naamiya wo naamiya daggiya

¹²Unsuwo a wede y'a seedu zakidi a suldi ɗoɗ ooɗe bini ɗangu, kono aame Raa yi ti y' niime maɗ, y'a t'ooney kadumul ere ki wede i jiiere, tod'te lekkiyo ere ki daayum Raa yi ruute y'an t'ela a kane ɗoɗ i yi geyyiso.

¹³Aame wede yoɗ an yi niime daggiya maɗ, yi ki roote ye: «I ni niime daggiya Raa me», kono wede tuuku toɗ maɗ yi k'aane naamiya daggiya Raa y'a k'ise ulsu ye, wo yode Raa batum yi ki naame daggiya wede ye.

¹⁴Wo ki kotto maŋ, wede tuuku toŋ yi t'ettiyo adda naamiya daggiya geŋ, aame yi ooliyo tuddí a suldí doŋ ulpi tudde ti dehu maŋ, geŋ an di y'argu wo an ti y' daggiya.

¹⁵Wo aame yi ooliyo tuddí a suldí doŋ ulpi tudde ti dehu maŋ, i-t'ehiyo oldíko, wo oldíko gette ti d'ohire d'ohire, saŋ t'a ti d'angu ti wede y'a t'inda.

¹⁶Zemba ki nuŋ kune doŋ ki geyyiso, kune'ŋ wenda soo toŋ y'oola elkisadí ti ti y' dagga ye.

¹⁷Suldí doŋ pay majjandani munda a ki'n biite ye in ooniyo geŋ, kane an'tiyo ti kandaane, ti Raa wede i ziipe suldí doŋ i-tooriyo a kandaane. Wo yo Raa geŋ yi ki kama tuddí ye, yoŋ i-k'ede munda aa undiso ere i-ti kama t'enno t'enno ye.

¹⁸Yode batum y'a dihe kine in d'ûune ehiyo ere aware t'urzi k'onamí doŋ d'erec geŋ me, kono kine in t'ise ki poone ti diine suldí doŋ pay y'ikkima.

Kun ollo wo kun d'iso

¹⁹Zemba ki nuŋ kune doŋ ki geyyiso, ono eŋ kun ollo koduwo: Wede tuuku toŋ kuwwagí i-t'iso soodo k'ollige k'ono, bizí attidí ki rootiyo wo kulkuwadí ti koonaa attidí,

²⁰kono wede yi ti gulkuwe geŋ, yi k'aane yi ki lekke ye lekkiyo ere ki diine aa Raa yi dehu te.

²¹Iŋkino kun oolo suldí doŋ pay un di'n isiyo ganigi, ti bundiko ere i ceeriyo eego un d'ede gette. Ono doŋ Raa y'un ele adda k'addugun geŋ, kun'ni soodo ti tassuwa, kono kane geŋ an d'ede toogo k'uttiyagun.

²²Kune'ŋ, ono Raa kun ti'n olli ollige d'angal ye, wo kun'ni soodo kun d'oziro eego, para maŋ kune batum kun ti dagga tuddugun te.

²³Derec, wede geŋ ono yi'n ollige wo yi ki sooru eego ye maŋ, yoŋ geŋ yi deeyiso aa wede yi woliyo ume k'edayí adda kaynaaŋa miŋ, yoŋ miŋ yode.

²⁴Aame yi ti woliyo y'eŋgilso maŋ, a kaamiki i-dandiya yoŋ mummino geŋ me.

²⁵Wo eŋ ki wede i ti woliyto koduwo urzi k'oogoro ere beehiye munda a ki ti biite ye, ere in di'n udfde t'adda k'oldíko gettiyo. Yoŋ yi lekkiyo kettiyo daayum a tode, ono Raa yi'n ollige ere saŋ i ki dandiya ye, wo yi sooru eego. Iŋkino wede geŋ y'a t'oonaa uŋsuwo a munda wede y'isiyo geŋ me.

²⁶Aame wede y'elkiyo yi daaniya urzi Raa wo bizí yi ki ti y' seddu ye maŋ, geŋ yi ti daggiya tuddí batum, urzi daaniya Raazí ki bita.

²⁷Urzi wede kamilen daa k'oldíko ki daaniya Meega Raa enno: Mandaydayi ti noŋgayi kun'ni noogo adda dabaradaŋ te, wo k'a booho tuddá ti suldí pay doŋ ulpi adda duniya.

Zak 2

Wolliyo duwo pay kaŋ soo

- ¹Zemba ki nuŋ, kune urzi wede duwo kun ki'n wolliyo kaŋ soo ye geŋ, kun a ti y' key'ye ye t'urzi zaapu k'adduguŋ a Galmeegiŋ Isa Almasi yoŋ goole a di jiiire me.
- ²Kun ollo, aakede i d'ede wede laale yi-t'usso kokkide ki dap a y'elsadi, ti kallagi majjandani, y'a t'iido k'ume k'ogiysaguŋ, wo wede soŋ i-k'ede munda ye yi-t'usso kallagi sattita y'a t'iido kay.
- ³Inkino maŋ a wede i t'usso kallagi majjandani geŋ, kun di y' seeda bey sire wo kun i di roote, kun t'eese: «Kee k'edi ki koona a ume wede majjaane kino.» Wo a wede i-k'ede munda ye geŋ, kun t'eese: «Kee ki t'ohor ohire» umbo'ŋ «Ki-koona a siido kino.»
- ⁴Wo kune kun isiyo inkino maŋ, geŋ kun'ni wolliyo duwo kaŋ soo ye, kun dekkiyo booro a urzi wede derec ye.
- ⁵Kun ollo, zemba ki nuŋ kune doŋ ki geyyiso, ki kotto duwo doŋ a eda duwo an k'ede munda ye geŋ, Raa yi'ni biire kono an t'ise doŋ laale a urzi zaapu k'adde a yode wo an t'ooney Moziko ere yi ruute y'an t'eley a kane doŋ i yi geyyiso.
- ⁶Wo de kune, kun di'n wolliyo doŋ an k'ede munda ye t'umbo soo. Wo ki kotto maŋ, kune'ŋ un oodibe yeebaguŋ doŋ laale, an un di'n t'ettiyo ki daana doŋ booro.
- ⁷De geŋ kane doŋ laale ye ko, i kaldita suma k'Isa ere majjaanawa Raa y'un ele te?
- ⁸Derec, aame kun a seedu a oogoro ki Moziko Raa, tode ere an riine ti kaaga adda mattup ki Raa, an'de: «Ki geyyo bakada aa ki geyyiso tudda batum» maŋ, geŋ kun isiyo beehiye.
- ⁹Wo de aame duwo kun ki'n wulla kaŋ soo ye maŋ, geŋ kun isiyo oldiko wo oogoro t'un di'n seeda kono kun a ti diipida.
- ¹⁰Inkino maŋ wede urziyagi k'oogoro geŋ pay yi ti'n sooru wo yi diipida urzi soo toŋ maŋ, geŋ aakede kane pay geŋ miŋ y'a ti diipida.
- ¹¹Derec, yode Raa wede i ruute, y'ede: «Ki moone t'ere bakada ise ti kule bakatu ulu», y'a ruute soŋ, y'ede: «Ki towwo wedusu mirsi ulu.» Wo de aame t'ere bakada ki ki moone ye too, wo ki iide wenda mirsi maŋ, geŋ miŋ oogoro pay k'a ti diipida.

¹²Inkino kun a elko a ono don kun roote wo a naabo ere kun ise gette, kono kune duwo don Raa y'a dekka booro a eggun t'urzi k'oogoro ere in di'n udfe t'adda k'oldiko.

¹³Inkino man onniyo ere Raa yi dekka booro gette, wede i k'isiyo adde koduwo a don ongo ye gen, Raa yi-k'isa adde koduwo ye kay. Wo de wede isiyo adde koduwo a don ongo gen, yon i-k'ede orgiso a booro Raa ye.

Zaapu k'adde a Raa ti naabatú

¹⁴Zemba ki nun, a wede koduwatú moo me y'a t'eese: «Nun ni ziipe addó a Raa», wo yi ki-ti kaza t'urzi naabo ere beehiye ye man? Ki kotto zaapu k'adde ere inkino gette ti ki y'utte ye!

¹⁵Kun ollo, aakede i d'ede leema ise teema an lekkiyo daa munda k'ossiyo, munda k'ombo daayum an baatiya.

¹⁶Wo a wede soo ti diinagun koduwatú moo me y'an di roote, y'a t'eese: «Kun engilo ti toose, tuddugun kun t'osoy t'a-kookoy wo kun a d'oomoy a mosikagun te», daa kun an k'ele munda ki noogiyadan ye man?

¹⁷Gen inkino kay, zaapu k'adde a Raa daa kaza naabo ere beehiye gette, tode sittú aakede munda unto.

¹⁸Wo de wenda y'a roote, y'a t'eese: «I d'ede don an d'ede zaapu k'addan a Raa, ongo an d'ede naabo ere beehiye.» Inkino nun Zak ni di roote, n'a t'eese: «De kee k'o kazi zaapu k'adda a Raa daa naabo ere beehiye, wo ki nuuno man t'urzi naabadó ere beehiye n'a-di kiza ki kotto nun ni ziipe addó a Raa.»

¹⁹Derec, kee k'umbe Raa yon soo danjal, beehiye. Wo kane siitandani ton man an ambu kay Raa yon soo danjal me, wo a daanadi an orgiso an di nonnirso.

²⁰Kee wede elkisada umbo! Ki dehu k'a suune, to zaapu k'adde a Raa daa naabo ere beehiye gette ki bita ko?

²¹Kune kun suune mugiyin Ibirayim gen Raa y'a yi wulle yon ki diine a daanadi t'urzi naabo ere y'ize, kono y'a iyye uli Isaaka y'a ti y' duwwe a ume sedeke y'a walda.

²²Kun ollo, zaapu k'addi a Raa gette t'a-t'iide kan soo ti naabadi te, inkino naabadi ere beehiye gette a t'ikkima urzi zaapu k'addi.

²³Wo gen a-t'iide a ono don an riine ti kaaga adda mattup ki Raa, an'de: «Ibirayim y'a ziipe addi a Raa, inkino man Raa y'a yi wulle yon ki diine a daanadi me.» Man Raa y'a yi wiike lanjayi.

²⁴Gen kun suune, wedusu Raa yi yi wolle ki diine a daanadi t'urzi naabo ere beehiye, t'urzi zaapu k'addi a yode danjal ye.

²⁵Wo ki Raahap ere t'ooniyo ombo bittú t'itatú ton inkiño, t'urzi naabatú ere beehiye Raa y'a ti wulle ki diine a daanadí, kono don zina ki don k'Izirayel t'anni ziida bey sire wo t'an di'n unzile t'urzi doolo.

²⁶Geñ kun wollo, tudde ere daa k'unde gette tod'te unto, wo inkiño kay zaapu k'adde a Raa daa naabo ere beehiye gette, tod'te aakede munda unto.

Zak 3

Sedfu bize

¹Zemba ki nun, ti diinagun don baadan an dehe ye an t'ise don dooyiso duwo a urzi k'ono Raa me, kono kun suune kaye don dooyiso en Raa yi dekkey booradey ooñe a ceerey don ongo.

²Kine pay in eliyo morkiye t'urzi baadan. Aame wede adda k'onami yi k'isiyo oldiko ye man, yon geñ yi-dirse a urzi zaapu k'addi a Raa me, y'aaniya tuddi pay yi ti seedu.

³Kine in eliyo aljima a bize puzu miñ kono y'in d'otile, wo tin geñ in d'aaniya in di dokkiyo tuddi pay.

⁴Wo son kun wollo tookiyagi adda k'ahu geñ, ise kane deero deero wo maaye baadan y'anni naay'u ton man, an d'oyyiso a wedusu yi di'n dokkiyo ti undumu wede ñenku ki dokkiyadan geñno, y'an d'an t'ettiyo k'ume wede yon yi dehu y'an di'n t'ette.

⁵Inkiño kay ilze geñ yon munda ñenku adda tudde, wo de y'aane y'a kili tuddi k'isiyo suldi deero deero. Wo kun wollo i d'ise rippinso k'uwo ñanjal t'aane t'a t'ogge balda pay.

⁶Ilze ton yon aa uwo, yon adda tuddin aa duniya ere uune t'oldiko, yi d'aaniya tuddin pay yi-ti t'isiyo ganigi t'oldiko. Ilze geñ yi-t'oggiyo lekkiyadiñ pay gette ti uwo ere ettiyo t'ume k'uwo ere ki dabar.

⁷Wede tudde geñ y'an d'aaniya a ita seydi pay geñ me, don ki balda, ise embi, ise don sunni i morkimso t'addan wo ise puuni ton man.

⁸Wo ilze geñ wenda soo ton i-d'aane umbo, yon geñ munda ulsu, lekkiyadiñ tin dekilso baa, wo ono don addiya ti yode geñ aa naawa k'unto.

⁹Ti yode in di tamma Meegin Galmeega, wo son ti yode pay in di duudiyo duwo don Raa y'ikkima an deeyiso aa yode.

¹⁰Ise ono don ki tamma, ise ono don ki duudiyo ton man, addiya miñ ti bize soo geñno. Zemba ki nun, geñ inkiño ise ye.

¹¹Ersa k'osso soo t'a t'idiga ahu don unse wo don son kadigi umbo.

¹²Zemba ki nuɗ, ki kotto tormo ti k'aane ti ki t'ehe inɗi golgolo ye, wo sunto ti k'aane ti ki t'ehe inɗi tormo ye. Soɗ t'ersa k'osso ere ahutu ɗobobo gette, ki k'eesi ye ahu ɗoɗ uɗse me.

Suuniyo k'ono ere ettiyo ti Raa

¹³Aame wede ti diinaguɗ y'elkiyo yoɗ i-d'ede suuniyo k'ono wo eedí soodo a elkiso maɗ, kane geɗ yi ti'n kaza t'urzi sooruzí ere ki diine, wo t'urzi naabadí ere y'isiyo ti tassuwa gettiyo.

¹⁴Wo ɗe aame adduguɗ i t'ûune ti kolbiso ɓaadaɗ wo ti elkiyo ere bakadá k'a ti y' kime k'ita wo kee k'a ceere maɗ, geɗ kun d'oolo ti koliyo tudduguɗ me. Para maɗ gette lohito k'ono a ɗerec ki Raa.

¹⁵Ita suuniyo k'ono ere inɗino gette ti k'ettiyo ti Raa ye, tode gette t'ettiyo t'urzi duniya, t'urzi ɗuwo wo t'urzi Meeda siitandani.

¹⁶Aame ɗuwo an lekkiyo ti kolbiso wo ti elkiso ere bakadá k'a ti y' kime k'ita wo kee k'a ceere maɗ, a ume geɗ toose umbo, wo ita k'oldiko ere tuuku toɗ ede pây.

¹⁷Wo ɗe suuniyo k'ono ere ettiyo ti Raa gette, tod'te ki poone ti'n di'n isiyo ɗoɗ kamileɗ, ɗoɗ i dehu toose, ɗoɗ tasse, ɗoɗ i suune okkiso ɗuwo, ɗoɗ isiyo adde koduwo a ɗuwo wo isiyo naabo ere beehiye, ɗoɗ an'ni wolleyo ɗuwo kaɗ soo wo ɗoɗ addaɗ soo.

¹⁸Kane ɗoɗ i dehu toose t'a koone adda diine ɗuwo pay geɗ, kane an naabiya ti toose wo munda wede an t'oone geɗ, lekkiyo ere ki diine.

Zak 4

Kun oolo sulɗi duniya

¹Kune kun elkiyo miɗ, ɗeyyiso ti niikiyto k'ono a diinaguɗ geɗ an ettiyo ti too me? Kane geɗ an ettiyo t'urzi ɗaapu ere i ɗeyyiso daayum adda k'adduguɗ gettiyo.

²Kune kun di dehu sulɗi ɗoɗ ulpi tudde ti dehu, wo kun ki'n ooniyo ye. Kun di t'ôwwo ɗuwo mirsi wo kun di kolbiso, toɗ kun k'aane kun ki'n t'oone ye. Inɗino kun di ɗeyyiso, kun di niikiyto, toɗ sulɗi geɗ kun ki'n t'oone ye, kono kun ki tonɗiyo Raa ye.

³Wo aame kun tonde Raa toɗ, munda kun ki y' t'oone ye kono elkisaguɗ oldo, kun dehu pay kun di latte a ɗaapu ere tudduguɗ ti dehu.

⁴Kune ɗoɗ i ki seedu urzi Raa ye, ki kotto kun suune kee ti duniya laɗziká maɗ, geɗ kee adu ti Raa. Inɗino geɗ ɗerec, wede yi dehu laɗziká ti duniya maɗ, yoɗ geɗ y'a t'ise adu ti Raa.

⁵Kune kun elkiyo miɲ ono ɗoŋ an riije ti kaaga adda mattup ki Raa geɲ ki bita ko, ono ɗoŋ an'de: «Raa yoŋ y'okkiso, yi ti geyyiso baadaŋ unde ere y'in ele te?»

⁶Wo beeko ere Raa y'in ize gette, tod'te a jiiere sey, kono soŋ an riije ti kaaga adda mattup ki Raa, an'de: «A ɗoŋ i koliyo tuddaŋ geɲ Raa y'an di-toogiyo, wo ɗe y'an d'isiyo beehiye a ɗoŋ i ki koliyo tuddaŋ ye.»

⁷Iŋkino maŋ Raa geɲ kun i ottilo, wo ɗe a Meeda siitandani kun i-ti toogo wo tod' t'a leɗɗa dokki ti tuddugaŋ me.

⁸Kun a odo goppon ki sirpa Raa, wo yoŋ y'a d'etta goppon ki sirpagaŋ. Kune beyɗiyagaŋ ɗoŋ kun d'isiyo oldiko geɲ kun ti'n iso kamilen, wo kune ɗoŋ i baakiysa geɲ addugaŋ kun ti'n iso kamilen.

⁹Kun t'iso sommagi dondoŋ, kun lekko adda m̄olo wo kun ôolo ti zumari a edagaŋ. Koobiyaŋ gette ti-kama ti m̄olo, wo un̄suwagaŋ ti-kama ti ulbe k'oodiyo.

¹⁰Kun ti-t'iso tuddugaŋ neŋkiti a ɗaana Galmeega, wo yoŋ y'un di'n isa deero.

Ɗekkiyo booro ulu ekki leema me

¹¹Zemba ki nuŋ, kun ɗekke tuddugaŋ ye. Wede yi ɗekkiyo leemadí, ise yi ɗekkiyo booro ekki leemadí maŋ, geɲ yi rootiyo ulsu a oogoro Raa wo yi ɗekkiyo booro ettú. Wo ɗe aame ki ɗekkiyo booro ekk'oogoro maŋ, kee ki t'ize wede ɗekkiyo booro wo ki-t'ize tuddá aa wede i ki daaniya oogoro ye baa.

¹²Ki too maŋ Raa ɗaŋŋal elo oogoro wo i ɗekka booro me, yode ɗaŋŋal eliyo uttiyo a ɗuwo wo i t̄owwo me. Iŋkino maŋ k'elkiyo kee wee wee ki ɗekkiyo booro ekki bakadá me?

Koliyo tudde ulu

¹³Aŋkeŋ kun ollo, kune ɗoŋ kun rootiyo, kun'de: «Aŋki, koo soggo koo maŋ ay t'etta k'adda geeger soo, ay di lekko ozzine, ay d'isey suuk wo ay a-t'ooney soŋko t'eego.»

¹⁴Wo kune kun ki suune ye munda wede un aana a lekkiyagaŋ ere ki soggo te. Derec, kune lekkiyagaŋ gette aakede koliyo ti d'ettiyo taŋ booloŋ, saŋ ti-t'engilso gettiyo.

¹⁵Ki too maŋ munda wede kun di roote en̄no: «Aame Galmeega yi dehu maŋ, kaye ay di lekka wo ay d'isa munda kino kino.»

¹⁶Wo ki kotto, t'urzi k'onamgaŋ geɲ kun koliyo wo kun tamma tuddugaŋ. Ita koliyo tudde ere iŋkino gette oldo.

¹⁷Iŋkino maŋ wede tuuku yi suune isiyo beehiyko wo yi ki ti t'isiyo ye maŋ, yoŋ geɲ yi t'ize oldiko.

Zak 5

Ondirso a don laale

- ¹Wo anken kun ollo, kune don laale noo! Kun ofultu molo a dabar ere etto eggun.
- ²Laalagun gen i ruume, kallagugun diibe yi t'iimi.
- ³Daapiyagun ti sonkagun gen a ti gili puunu, wo puunu gen y'a koonaa aa wede i wulle naabo ere oldo kun ize gettiyo, puunu y'a t'aadima tuddugun aa uwwo t'oggiyo. Wo gen aasa inkino kono ankenno kun okumso laale a duniya ere goppon t'a dange.
- ⁴Kun ollo, kune kun an di-toogiyo a ranraa ki don aydu dombugun. Inkino man kane an sakiya, wo dollite ki don naabo gette ti ti gili a kandaane ibey a daana Raa, Galmeega Goole k'arka.
- ⁵Kune kun likke duniyagun ere a siido adda k'unusuwo, inkino kun di bikkidita aakede seydi don onniyo soo an d'an t'etta k'ume waldutu.
- ⁶Don ki diine kun ti'n zidde kun'de booro ti'ni ziida, kun di'n iide, wo an un gi-di tuuge ye.

Ombine ti tonduyo Raa

- ⁷Inkino man zamba ki nun, kun ombon bini aaniya Galmeega. Kun wollo wede derku gen, yon yi suune yi-delliyo ti ombine mizzi wede ki morkini bini mizzi wede ki sommide, suldi don yi dirke gen an t'ehiyo beehiye.
- ⁸Kune ton kun ombon, biza k'ulbugun yi koonaa zakidi kono ettiyo Galmeega tod'te goppon.
- ⁹Zamba ki nun, kun gurgire ti tuddugun ye, para man Raa y'a dekkey booro eggun. Kun ollo, wede dekkiyo booro yi t'uddo yo a biza bumbu.
- ¹⁰Zamba ki nun, kun elko a nebiyagi don ti kaaga i gizite ti suma Galmeega Raa, kane gen an dibire ti ombine. Inkino kun wollo urzi kane genno wo kun di daano.
- ¹¹Kun ollo, kine in di roote unusuwo a kane don a seedu zakidi bini dangu. Kune kun illiga taaya ki Zop a ombine ere y'imbiina gette, wo kun suune munda wede Galmeega Raa yi ele aame dangu me. Derec, yode Galmeega gen i-d'ede beehiyo baadan wo yi wolliyo sommagi duwo.
- ¹²Zamba ki nun, a suldi pay gen ki poone kun nama tuddugun ye, ti kandaane ise ti siido, wo ise t'urzi tuuku ton man. Aame kun roote «eyye» man, kun rooto «eyye» dangal, wo aame kun roote «aha» man, kun rooto «aha» dangal. Inkino booro Raa t'un gi di'n seeda ye.

¹³Aame wede soo ti diinaguŋ yoŋ yi dabirsa maŋ, geŋ yi tondo Raa. Aame wede yoŋ ulbí uŋse maŋ, geŋ y'amma Raa ti ôrdari.

¹⁴Aame wede soo ti diinaguŋ yoŋ tuddí eeni maŋ, geŋ y'a waake doŋ dokkiyo ki doŋ ogiyso ti suma k'Isa. Kane geŋ an tonde Raa kono yode wo an i yerge egey a eedí ti suma Galmeega.

¹⁵Ita ton-diyo ere t'urzi zaapu k'adde a Raa iŋkino gette, wede k'eeni y'a utte. Galmeega y'a y'ooziga wo aame yi t'ize oldíko toŋ maŋ, Raa yi-t'isa tambobino.

¹⁶Iŋkino maŋ kun t'oofo'ŋ adduguŋ a oldíko ere kun ize, wo kun tondo Raa ti tudduguŋ kono kun t'oonaa bee. Ton-diyo Raa ki wede yoŋ ki diine geŋ, tod'te i-d'ede toogo baadaŋ.

¹⁷Eli geŋ yoŋ wede tudde aa kine, y'a tunde Raa ti toogo kono mizzi y'a ki koppe ye, maŋ mizzi y'a ki guppe ye ozzine afo ti tere zoot a siido me.

¹⁸Saŋ maŋ y'a tunde Raa sey, maŋ mizzi y'a guppe wo suldí a siido an d'ehe.

¹⁹Zemba ki nuŋ, aame wede soo ti diinaguŋ yi t'irga t'urzi wede derec wo wede doolo yi ti y' gimo maŋ,

²⁰geŋ kun suuno, wede yi ti kama wede k'oldíko t'urzi wede yi digge geŋno maŋ, yode geŋ leemadí yi y'utte wo yi ele urzi, Raa yi-t'isa tambobino a oldíko baadaŋ.

1 Piyer

1 Piyer 1

Toose ki Piyer

¹Mattup ette i raaniya nuŋ Piyer wede zina k'Isa Almasi. Ni raaniya a kune doŋ Raa yi biire, i lekkiyo a borkiyagi, i-tiipite k'adda siidiyagi ki Pontus, ki Galat, ki Kapados, ki Aazi wo ki Bitini pây.

²Ti kaaga too Meega Raa y'unni biire a yode me, geŋ a-t'iide a munda wede yi dihe y'aase ti poone. Y'un di'n uuye kese ti toogo ere k'Unde Kamileŋ kono kun d'olliga ono k'Isa Almasi, wo t'urzi rorriso puuzadí kun t'isa doŋ kamileŋ a daana Raa. Geŋ toose ti beeko ere daa doozyo i koon a egguŋ.

Uttiyo t'urzi k'Isa Almasi

³In amma Raa, meeki Galmeeŋiŋ Isa Almasi, y'in d'ize adde koduwo baadaŋ, iŋkino in d'uune ehiyo ere aware t'urzi baldiya k'Isa Almasi ti diine doŋ unto. Kono k'iŋkino kine in di zaapu elkisadiŋ in di lekke kaŋ soo ti yode.

⁴Geŋ iŋkino Raa y'in okkime suldi doŋ a kandaane yi boohiyo a kine doŋzi, suldi doŋ a lekka ki daayum, i k'isa ganigi ye, majjaanikadaŋ i ki dagga ye.

⁵A kune doŋ i ziipe adduguŋ a Raa, y'un di'n booha ti toogadí kono y'un utte. Uttiyo gette a t'oodiba ita kereŋ onniyo ere ki Raa t'iida maŋ.

⁶Iŋkino maŋ kun di lekkiyo adda k'uŋsuwo, ise aŋkenŋo kun t'ize sommagi dondoŋ toŋ maŋ k'onniyto miibi daŋŋal, kono kun uune naamiya t'urzi wede baadaŋ.

⁷Naamiya gette kun di-t'oone kono an di suune kun ziipe adduguŋ a Raa deŋ ko? Kune kun suune dap gette aane a lette, wo an t'eliyo adda k'uwo doo miŋ an di wolliyo majjaanikatú kollo. Wo zaapu k'adduguŋ a Raa gette iŋkino kay, tod'te zooyatú ooŋe baadaŋ a jiire dap, wo toŋ an di niime kono an ti wolle tod'te d'erec deŋ ko. Iŋkino maŋ kun t'oona tamma, dary'ika wo suma a onniyo ere Isa Almasi yi kiza tuddí a duwo pay geŋ me.

⁸Kune'ŋ, Isa Almasi kun ki y' wulle ye, toŋ kun di y' geyyiso, wo aŋkenŋo kun ki y' wolliyo ye botto toŋ, kun di zaapu adduguŋ a yode. Kono kamo ulbuguŋ i d'isiyo uŋse baadaŋ, kun d'isiyo uŋsuwo ere soo wenda yi k'aane yi ki ti roote ye.

⁹Uŋsuwo gette kun uune kono Raa y'un utte. Geŋ munda wede kun t'oone kono kun ziipe adduguŋ a Isa.

¹⁰Kono k'uttiyo gette, ti kaaga toŋ kane nebiyagi an di dihite urzutú ki koduwo, wo an di gizite ki poone a urzi beeko ere Raa yi dehu y'un t'ela.

11 Injino maŋ Unde k'Almasi adda k'addaŋ, tod' t'an di ruute ki poone dabar ere Almasi Raa yi biire'ŋ yi t'oona wo saŋ dary'ika ere i-etta te. Kane an di dihe, an di suune aame muno wo t'urzi mummino suldi geŋ an d'aana me.

12 Wo eŋ munda wede Raa y'an t'iidiba ita a nebiyagi: ono doŋ an kazita geŋ a kane batum ye, wo de a kune. Aŋkeŋ kane ono geŋ, doŋ i kazita Rabila Majjaanawa an un ti'n ruute ti toogo k'Unde Kamileŋ ere iido ti kandaane. Wo rabila gette kane maaleekiyagi toŋ an dehu baadaŋ an di suune.

Lekkiyo ere ki diine

13 Kono kamo kun koono mentikagi a munda wede kun ise, kun lekko daayum zeere. A zaapo k'elkisaguŋ gette, kun i ti zaapo pay a beeko ere Raa y'un t'ela a onniyo ere Isa Almasi yi kiza tuddi a duwo pay.

14 Kun ollo ono Raa aa inŋi an ollige ono meegaŋ, wo kun ooli tudduguŋ a suldi doŋ ulpi tudde ti dehu ye, aakede ti kaaga kun d'ize aame kun ki zuune Almasi ye botto.

15 Wo de aakede Raa wede unni wiike yoŋ kamileŋ, geŋ injino kay kun lekko kamileŋ a sooruguŋ pay te.

16 Derec ono eŋ an riije ti kaaga adda mattup ki Raa, an'de: «Kun lekko kamileŋ kono nuŋ Raa kamileŋ.»

17 Adda tondiyaguŋ a Raa'ŋ, yoŋ kun di y' waaku kun d'eesiyo Meega. Geŋ injino a daanadi kun di lekko t'orgiso a onniytagi doŋ kune botto adda duniya eŋ me, kono Raa yi dekkiyo booro a wede tuuku toŋ a naabo ere y'ize y'ize, wo yi'ni wolliyo duwo pay kaŋ soo.

18 Wo kun suune ti zooye miibi Raa y'un di'n udde t'urzi lekkiyo ere ki bita ki maawi an unni duuye te. Geŋ y'un udde ti suldi doŋ i-ti lettiyo aa dap ti soŋko geŋno ye,

19 wo y'un udde ti puuzo k'Almasi ere zooyatu oone baadaŋ, yoŋ wede aa ulo damu kamileŋ daa k'oldiko munda a tuddi, an wilda ki sedeke.

20 Yo Almasi geŋ Raa yi biire ti poone t'ume y'a okkima duniya botto too, wo aŋkenno a onniytagi doŋ ki danŋu eŋ, Raa y'an ti y' gize a duwo kono aasa beehiye a kune.

21 T'urzi yode Isa kun di zaapu adduguŋ a Raa, Raa wede a ti y' bilde ti diine doŋ unto, wo yi-d'ele gooliko. Kono kamo kun di zaapu adduguŋ wo kun di zaapu elkisaguŋ a yode Raa.

Geyyiso tudde

²²T'urzi soorugun ere a-t'iide a urzi wede derec ki Raa, kun t'ize don kamilen kono kun di geyye tuddugun t'adde soo aakede zemba. Inkinno man kun geyyo tuddugun daayum t'addugun pay.

²³Geñ kun suune kun uune ehiyo ere aware. Ehiyo ere aware gette, kun ki ti t'oone ye t'urzi wede ki maawi don i-t'unto me, wo kun ti t'oone t'urzi Raa batum wede i k'unto ye, t'urzi k'ono Raa don i-lekkiyo ki daayum wo i d'eliyo lekkio.

²⁴Ono en an riine ti kaaga adda mattup ki Raa, an'de: «Duwo pay kane aa soole, majjaanikadan aa bobbo. Onniyo miibi soole i di baahu wo bobbo i-t'eepiyo,

²⁵wo kane ono Galmeega Raa i-lekkiyo ki daayum.» Wo kane ono geñ Rabila Majjaanawa an un gizite gettiyo.

1 Piyer 2

Isa yon makkolo ere majjaanawa a jiiere

¹Inkinno man kun di sebbo dargun ita suldi don ulpi pay, aakede: daggiya duwo ti metinko, bize sire sire, zaapu k'adde a munda wede, wo dekkiyo duwo.

²Kun t'iso aakede inni don adda buddiko, an dehu daayum udu ki meede daa kalsiya. Geñ inkinno kun deho ono Raa kono kun di t'ihira a urzizi, wo kun t'ona uttiyo.

³Derec, ono en an riine ti kaaga adda mattup ki Raa, an'de: «Kun suune adda k'addugun Galmeega Raa yon beehiye a jiiere.»

⁴Kun aa odo ki sirpa Galmeega yi d'eliyo lekkio, yon aa makkolo duwo an di zidde mentu, wo de a daana Raa makkolo zooyatu onne, yi biire a yode.

⁵Wo kune don kun uune lekkio ere aware geñ, kune ton kun t'isa aa mongali don Raa yi zappu k'oozige boy ume lekkio k'Unde Raa. Wo kun t'isa don sedeke ki Raa, kun i di naaba t'adde soo, kun d'isa sedeke ere a urzi k'Unde Raa, i-d'isa unse a Raa kono k'Isa Almasi geñ me.

⁶Derec, ono en an riine ti kaaga adda mattup ki Raa, an'de: «Kun wollo, ni biire makkolo ere majjaanawa a jiiere k'oozige boy, tode gette n'a ti zaapa adda geeger ki Siyon, wo n'a-t'ooziga boozó eego, wo wede yi ziipa addi a tode man, yi-ki seeda sukiyagi ye.»

⁷Makkolo ette tod'te beehiye baadan a kune don i ziipe addugun a Raa me, wo de a kane don i ki ziipe addan a Raa ye geñ, inkinno ye. Derec, ono en an riine ti kaaga adda mattup ki Raa, an'de: «Makkolo ere don k'oozige boy an di zidde mentu gette, tode gettiyo a t'ize makkolo ere majjaanawa a jiiere k'oozige boy te.»

⁸Wo soŋ an riije, an'de: «Mokkolo ette k'eliyo morkiy'e a duwo, mokkolo ere k'a oore.» Kane geŋ an eliyto morkiy'agi kono an ti tuuge k'ambu a ono Raa me. Geŋ ti kaagine too munda wede Raa yi dihe aasa iŋkino.

⁹Wo kune ita duwo doŋ Raa yi biire, doŋ sedeke ki Raa wede mozigo, doŋ kamilen, doŋ a yode y'illak. Kune Raa y'unni biire, y'un di'n udfde t'adda k'ume zimolo, y'un di'n t'iide k'ume toorayí beehiye a jiire, kono kun kizite a duwo suldi doŋ majjandani Raa y'ize.

¹⁰Ti kaaga kune doŋ ki Raa ye, wo aŋkenno kun t'ize doŋzı. Ti kaaga kun ki zuune ye Raa y'isiyo adde koduwo, wo de aŋkenno kun zuune yoŋ y'isiyo adde koduwo a kune me.

Lekkiyo ere ki doŋ naabo Raa

¹¹Zemba ki nuŋ kune doŋ ki geyyiso, kun suune adda duniya eŋ kune aa torgagi, doŋ i lekkiyo a borkiyagi. Iŋkino maŋ kun ollo n'un di rooto, kun ooli tuddugun a suldi doŋ ulpi tudde ti dehu, i deyyiso ti undiyagun geŋno ye.

¹²Soorugun ti koonaa beehiye a daana doŋ i ki suune Raa soo daŋŋal ye me, kono aame ise kane an unni kalda kune doŋ ulpi toŋ, an di wolla naabagun ere beehiye gettiyo, wo an di t'imma Raa a onniyo ere y'etto gette.

¹³Kun kili t'eedaŋ ye doŋ deero k'akuuma pay a siido me, aa Galmeega yi dehu. Kun kili t'eedı ye mozigo goole ki Romeŋ me, kono yoŋ t'ekki doŋ pay,

¹⁴wo a doŋ deero siido, kane mozigo goole yi'n agisa seddu doŋ isiyo naabo ere oldo k'eliyo daŋgay, wo doŋ isiyo beehiyko an di'n tamma.

¹⁵Iŋkino enno munda wede Raa yi dehu me, t'urzi naabo ere beehiye kun isiyo, kane doŋ elkisadaŋ umbo an ki suune munda ye'ŋ, bizaŋ an ki ti y' t'ihina ye.

¹⁶Soorugun t'a koone aa doŋ eedaŋ toore. Iŋkino maŋ a eggun toore gette, kun t'ise aa munda wede ki diibiyo a bundikagun ye, wo kun oziro aakede doŋ naabo Raa.

¹⁷Kun an elo suma a duwo pay, kun geyyo zemba doŋ i ziipe addaŋ a Isa, kun orgido a Raa, wo kun elo suma a mozigo goole ki Romeŋ.

Lekkiyo ki doŋ naabo a daana galmaawan

¹⁸Kune doŋ naabo, galmaawugun kun an orgido kun kili t'eedaŋ ye, kun olliga ono ki kane doŋ beehiye tasse daŋŋal ye, wo ki kane doŋ unni dabirsa paŋ.

¹⁹Derec, gette beeko a daana Raa, a wedusu y'a ombiŋa a dabar ere y'ooniyo a urzi ki diine ye, kono yoŋ y'isiyo munda wede aa Raa yi dehu.

²⁰Aame kun iza oldiko, in̄kino kun t'oonā kossiyo wo kun d'ombiṅa toṅ, un di'n t'imma wee wee? Wo aame kun iza beehiye, in̄kino an un di'n dabira wo kun imbiṅa maṅ, gette beeko a daana Raa me.

²¹Geṅ a urzi geṅṅo Raa y'unni wiike me, kono yode Almasi batum yi dibire kono kune. Urzi geṅ y'un iili a kune kono kun di wolle kun d'ambe zindí.

²²Yoṅ oldiko yi k'ize ye, wo ono doṅ ki lohito toṅ, umbo i k'udde ye ti bizí me.

²³Aame an yi gildite, yoṅ y'an ki'n gilde ye. Aame an yi dibire toṅ, yoṅ y'an ki ruute ye y'an d'isa ulsu me, wo yoṅ yi ziipe addí a Raa i dekkiyo booro ere derec.

²⁴Geṅ yode Almasi batum y'a t'umbe oldikadiṅ a tukki yode aame an ti y' tiike ekk'undumu. Y'ize in̄kino kono y'in di'n udde ti lekkiyadiṅ ere a urzi k'oldiko, wo in di lekke lekkiyo ere ki diine. Geṅ t'urzi kundayi doṅ y'uune, kun d'uune beeko k'oldikaguṅ.

²⁵Derec, kune ti kaaga aakede dambami doṅ i digge, wo aṅkenṅo kun ti gimo ki tukki yode wede y'unni dokkiyo, aa wede k'elso yi dokkiyo dambamí.

1 Piyer 3

Lekkiyo k'erayi ti kuulizaṅ

¹Kune erayi toṅ, kun kili t'ekki kuuluguṅ ye, kono aame ti diinayaṅ doṅ ongo ono Raa an k'umbe ye botto toṅ, an di wolla sooru ere beehiye ki kune erayzaṅ, maṅ an di zaapa addaṅ a Isa daa ki rootiyo k'ono Raa a kane.

²An t'ida edayaṅ an di wolla sooruguṅ ere ki diine kamileṅ ti ottilso gettiyo.

³Kune erayi kun dehe majjaanika ere ti paate ye, aakede: koniyo k'eego ere a ambe ersa, ossiyto suldí ki dap, wo ossiyo kallagi doṅ majjandani zooyayaṅ ooṅe.

⁴Ki too maṅ kun di dehe miṅ majjaanika ere t'ettiyo ti adde doṅ tasse ki toose. Gette majjaanika i ki ruumiyo ye, zooyatú ooṅe baadaṅ a daana Raa me.

⁵Geṅ in̄kino majjaanika k'erayi doṅ ki Raa doṅ ti kaaga, doṅ an ziipe elkisadaṅ a yode me. Kane an ki gili t'ekki kuulizaṅ ye,

⁶aakede Sara t'a illiga ono kuulatú Ibirayim, wo ti di y' waaku galmeegutú. Wo aṅkenṅo kune toṅ in̄ni doṅ erayi ki tode, aame kun isiyo beehiyko wo kun k'orgiso a munda ye maṅ.

⁷Kune kuuli toṅ, a lekkiyo ere ti erayguṅ, kun a elko a tuddaṅ ere tasse i jiiere ki kune gettiyo. Kun an elo suma kono kane toṅ maṅ an t'oonā ti kune kaṅ soo, lekkiyo ere Raa y'un ele ti beekadí. Kun iza in̄kino maṅ, munda un t'eegira a urzi tondiyaguṅ a Raa umbo.

Seedu tudde

⁸Enno onamó donj ki dangu me, kune pay miñ kun lekko addugun kanj soo, kun wollo sommagi tuddugun, kun geyyo tuddugun aakede zamba, kun iso adde koduwo, daa koliyo tudde ti tuddugun me.

⁹Aame bakadá y'a ize ulsu manj, ki-ti kime ti ulsuko ye, wo aame yi ki gilde manj, ki ki ti kime ti kalda ye. Ki too manj ki di ti kime ti zaapu beeko, kono tode gettinj zaapu beeko ere Raa yi ruute kun t'oono, aame y'unni wiike me.

¹⁰Ono enj an riije ti kaaga adda mattup ki Raa, an'de: «Wede yi diha y'a geyye lekkiyo ere unse wo onniytadi t'aase majjaanawa manj, y'a sedde bizi ki rootiyto k'ono donj ulpi wo ti lohito k'ono.

¹¹Ti oldiko y'a-ledde, y'aase beehiyko, y'a dehe urzi ki toose wo y'a seeda zakidi.

¹²Derec, eda Galmeega Raa kane a tukki donj ki diine, wo kuwwagi an ollige tondiyadanj te. Wo a kane donj isiyo ulsu'ñ, Galmeega Raa y'an kama dar.»

K'a oyye dabirsa

¹³Aame kune wehini k'isiyo beehiyko manj, wee wee un d'isa ulsu me?

¹⁴Wo soñ aame duwo an unni dabirsa kono kun isiyo munda wede ki diine manj, ulbugun iso unse. Kun an orgida ye, tuddugun kun ti-tasso kono kane me.

¹⁵Ki too manj Almasi kun i-t'ele suma daayum adda k'addugun, kono yonj Galmeega soo. Aame wede tuuku yi ki tunda y'iisa kee ki zaapu elkisada a Almasi moo me manj, ki koono daayum gopponj ki towwo taaya a zaapu k'elkisada gette.

¹⁶Wo kun i rooto ti tassuwa, ti ottilso wo ti elkiyo ere kun di suune munda k'ulsuko a tuddugun umbo. Injino kane donj unni kalda a soorugun ere beehiye a urzi k'Almasi, a kane sukiyagi a kalditadanj gette.

¹⁷Beehiye a kee wede k'a dabire a munda wede k'ize beehiye aame Raa yi dihe manj, miñ k'a dabire a munda wede k'ize ulsu.

Almasi y'a jiire unto

¹⁸Injino manj Almasi yode batum y'a dibire kono k'oldiko duwo, untadi y'inda kanj soo gette a-t'iide, ki sirwe yi ki t'inda ye baa. Yode wede ki diine, y'a inda kono donj ki diine ye, kono y'in di'n t'etta k'ume Raa. Yonj duwo an y'iide a urzi tudde, wo Raa yi-d'ele puukiyo t'urzi k'Unde Kamilenj.

¹⁹Ti toogo k'Unde gette, y'a t'iide kazita Rabila Majjaanawa a undiyagi donj a dangay.

²⁰Kane undiyagi genj duwo donj ti kaaga i-ti tuuge a Raa, aame y'ni delliso t'ombiye a ozzinagi donj Nowe y'a ikkima tooko ere meeda a jiire. Donj miibi

ɗaɗɗal i t'iide adda tooko me, kane pay miɗ gessire ɗoɗ Raa y'an utte t'urzi k'ahu me.

²¹Kane ahu geɗ i-kaza urzi suyyiso batem ere aɗki t'un di'n uttiyo. To suyyiso batem gette i ki d'opilso ganigi tudde ye, wo tod'te i-kaza wede y'ele tuddi a Raa ti elkiyo ere y'a suune munda k'ulsuko a tuddi umbo. Suyyiso batem gette t'un di'n uttiyo t'urzi baldiya k'Isa Almasi,

²²yode wede iɗgile k'awwa ki kandaane, yi lekkiyo a ammade ki Raa, yoɗ goole t'ekki maaleekiyagi wo t'ekki ɗoɗ an d'ede urzi ki dokkiyo ti ɗoɗ an d'ede toogo a kandaane.

1 Piyer 4

Lekkiyo ere ti kaaga wo ti ere aware

¹Kine in suune Almasi y'uune dabar a tuddi, iɗkino'ɗ kune toɗ kun oyyo kun di dabire aa ki yode, kono wede uune dabar a tuddi yi ki lekke a urzi k'oldiko ye baa.

²Iɗkino maɗ ti aɗki eɗ, lekkiyaguɗ ere a guute a duniya ette, kun di lekke aa Raa yi dehu, wo kun gi di lekke a isiyo suldi ɗoɗ ulpi tudde ti dehu ye.

³Geɗ ɗerec, kune'ɗ ti kaaga ume baadaɗ kun di y'iɗgile a isiyto suldi ɗoɗ aa kane ɗoɗ i ki suune Raa soo ɗaɗɗal ye addaɗ i dehu. Kune kun likke a urzi boliyo, kun d'ize suldi ɗoɗ ulpi tudde ti dehu, kun d'iibe i ceeriyo eego, kun d'iimi duniyaguɗ, kun d'iifite kaɗ soo, wo munda wede ki sukiyagi kun d'uttile a loɗgayi.

⁴Wo aɗkeɗ kane an seedu giggiraɗ kono kun ki sooru ti kane ye baa a urzi lekkiyadaɗ ere oldo daa k'ume dirsiyatú gette. Iɗkino'ɗ an un di'n kaldita.

⁵Wo kane'ɗ onniyo soo an i-t'idey taaya a Raa ki naabadaɗ ere an ize, kono yoɗ gopponɗ y'a ɗekka booro ki ɗoɗ zeere wo ti ɗoɗ unto pây.

⁶Kono k'iɗkino ɗoɗ i t'inda ti kaaga toɗ, Rabila Majjaanawa an an gizite. Geɗ Raa y'an dikke booro a eedaɗ an t'inda, aakede y'aasa ki duwo pay. Wo aɗkeɗ, t'urzi k'Unde Kamileɗ kane an aane an di lekke a lekkiyo ere aa Raa yi dehu.

Doɗ naabo ɗoɗ beehiye ki Raa

⁷Onniyo a guute gopponɗ duniya t'a ɗaɗga me. Iɗkino maɗ kun lekko ti suuniyo k'ono wo daayum zeere, kono kun di tonde Raa.

⁸Munda wede ki poone a jire, kun geyyo tudduguɗ t'adduguɗ pay, kono geyyiso gette ti d'eliyo urzi k'isiyo tambobino k'ita k'oldiko baadaɗ.

⁹Kun soodo tudduguɗ bey sire, daa gurgirso.

¹⁰Raa y'un ele beeko t'urzi baadaŋ, a wede tuuku toŋ Unde Raa ti d'ele munda k'isiyo naabo Raa kono a nooge tuddugun. Injino maŋ kun t'isa doŋ yeeriyo beehiye ki suldi doŋ Unde Raa t'un ele me.

¹¹Geŋ wede Unde Raa ti ele munda ki kazita k'ono maŋ, y'a kizite ono Raa. Wo wede Unde Raa ti ele munda ki noogiyo duwo maŋ, y'anni nooge ti toogo ere Raa yi ele. Injino'ŋ a suldi doŋ pay kun ise'ŋ, a t'ele tamma a Raa t'urzi k'Isa Almasi. Geŋ a yode tamma wo toogo ki daayum! Eyye.

Dabar a urzi k'Isa Almasi

¹²Zemba ki nuŋ kune doŋ ki geyyiso, kun ki seeda gaggirgun ye a munda un iido ooŋe baadaŋ aa uwwo dala dala toŋ maŋ. Kun elke ye dabar gette aa munda wede a urzizi ye me.

¹³Wo de kun lekko t'unŋsuwo kono kun dabirsa a urzi lekkiyo kettiyo kaŋ soo t'Almasi. Wo geŋ injino a onniyo ere duwo pay an wulla dary'ikadi maŋ, ulbugun aasa unŋe baadaŋ a ceera.

¹⁴Aame duwo an unni kaldita kono kun umbe a suma k'Almasi maŋ, kun lekko t'unŋsuwo kono Unde Raa tod'te i-d'ede toogo, tod'te ti kune.

¹⁵Aame wenda ti diinagun yi dabirsa kono yoŋ wede towwo duwo mirsi, ise wede k'oogire, ise wede isiyo suldi doŋ ulpi, wo ise wede eliyoo eedi a suldi doŋ doolo toŋ maŋ, geŋ munda wede beehiye ye.

¹⁶Wo de aame wede yi dabirsa kono yoŋ wede k'Almasi maŋ, y'a k'ise sukiyagi ye. Ki too maŋ y'a t'imme Raa kono duwo an yi waaku yoŋ wede k'Almasi.

¹⁷Kun ollo, onniyo ere Raa y'a t'eesa dekkiyo booro a duwo t'iina baa, wo yi t'eesa booro ti doŋzi. Wo aame yi t'iisa booro ti kine doŋzi batum maŋ, a kane doŋ i-tuuge i k'umbe a Rabila Majjaanawa ki Raa ye, booradaŋ t'aasa ooŋe baadaŋ.

¹⁸Ono eŋ an riŋe ti kaaga adda mattup ki Raa, an'de: «Aame kane doŋ ki diine'ŋ ooŋe an utta me maŋ, ooŋe baadaŋ sey a doŋ k'oldfiko i ti toogiyo k'ambu a ono Raa me.»

¹⁹Geŋ injino doŋ i dabirsa a urzi wede aa Raa yi dehu'ŋ, kane an d'ise beehiye daayum, wo an i-d'ooli tuddaŋ pay a Raa wede i'n ikkima, yoŋ yi seedu zakidi a munda wede yi ruute y'aasa me.

1 Piyer 5

Kooke a doŋ dokkiyo

¹Ankeŋ ni rootiyo eŋ kooke a doŋ kane ti diinagun i dokkiyo doŋ ogiyso ti suma k'Isa. Nuŋ toŋ wede dokkiyo aa kane kay. Aame Almasi yi dibire, nuŋ ni y' wulle,

wo nuɲ toŋ aggadó n'a ti t'ooney onniyo ere Raa yi kiza dary'ikadí gette. Enno munda wede n'an rootiyo me:

²Kun'ni soodo beehiye doŋ Raa y'un ele beyguɲ me, aakede wede k'elso yi boohiyo dambami. Daayum kun ambo attidizaŋ t'adde soo aa Raa yi dehu, kun ise aa an un isiyo ki toogo do ye. Kun zaapo adduguɲ pay a naabo gettiyo, kun k'ise kono k'ooniyo k'agga ye.

³Kun koone zakidi ye a ekki doŋ Raa y'un ele a beyguɲ me, ki too maŋ konsaguɲ a diinayaŋ t'aase beehiye aa urzi an di wolle an d'ozire eego.

⁴Inkino geŋ aame Raa mozigo doŋ k'elso y'iina maŋ, yoŋ y'un t'ela kadumul ki gooliko ere a lekka ki daayum.

Kooke a doŋ i ziipe addaŋ a Isa

⁵A kune obilagi toŋ, kun ollo, n'un di rooto: kun kili t'ekki doŋ dokkiyo i jiiere kune ye. Wo onamó eŋ a kune pay: kun t'ise doŋ i koliyo tuddaŋ ye ti tudduguɲ me, kono ono eŋ an riije ti kaaga adda mattup ki Raa, an'de: «A doŋ i koliyo tuddaŋ geŋ, Raa y'an di-toogiyo, wo de a doŋ i ki koliyo tuddaŋ ye, beekadí a eedaŋ.»

⁶Inkino maŋ n'un di rooto: kun ottilo, kun kili tudduguɲ ye a daana Raa wede i-d'ede toogo geŋ me, kono yode batum y'un ti'n kila t'awwa a onniyo ere yi diha maŋ.

⁷Kun i ti zaapo attiduguɲ pay a bey ki Raa, kono wede k'ambu k'attiduguɲ yode.

⁸Kun lekko daayum zeere, kun koonaa mentikagi! Derec, Meeda siitandani ere k'aduguɲ gette t'unni dooliyo liw liw ti dehu wee wee ti seeda me, aa suwwu yi moolo wiy'irr wiy'irr yi dehu yi seeda seysu.

⁹Aame daayum kun konso zakidi a urzi zaapu k'adde a Raa maŋ, kun d'ohira toogo a daanatu me. Kune kun suune zembaguɲ doŋ a urzi k'Isa adda duniya pay geŋ, kane an dabirsa aa kune kay.

¹⁰Kune kun a-dabira sey k'onniyto miibi daŋŋal, wo Raa ki beeko ere pay y'unni wiike kun t'etta a dary'ikadí ere ki daayum kono kun lekkiyo kettiyo kaŋ soo t'Almasi. Inkino maŋ yode batum y'un di'n oodiba ki diine, y'un t'ela toogo wo y'un di'n isa kun seeda zakidi a urzi zaapu k'adduguɲ.

¹¹Geŋ toogo ti koonaa eedí ki daayum! Eyye.

Toose ere ki danɲu

¹²Nuɲ n'un riije ono doŋ booloŋ adda mattup ette ti noogiyo ki Silas. Ni suune yoŋ leema wede yi seedu zakidi a naabo. Nuɲ ni riije kono n'un d'eeliyo kooke, wo n'un di roote kereŋ: kun soodo zakidi a beeko ere derec ki Raa.

13Zemba don ogiyso ti suma k'Isa a enno a Babiloon geɗ, kane don Raa yi biire aa kune kay, an un t'ize toose. Wo Markus wede yoɗ aa ulo toɗ, y'un t'ize toose paɗ.

14Kun t'esito tuddugun kaɗ bey sire sire aa zemba. Geɗ toose ti koonna eggun, kune don pay i lekkiyo kettiyo kaɗ soo ti Almasi me.

2 Piyer

2 Piyer 1

Toose ki Piyer

¹Mattup ette i raaniya nuɗ Simo Piyer, wede naabo wo wede zina k'Isa Almasi, a kane doŋ i ziipe addaŋ a Isa aa kaye kay, t'urzi naabo ere ki diine ki Raaziŋ Isa Almasi Wede k'Uttiyadiŋ y'ize gettiyo.

²Geŋ beeko ti toose i koona eggun daa dooziyo, t'urzi suuniyo ere kun'ni zuune Raa ti Galmeegiŋ Isa geŋ me.

Sooru ki wede i ziipe addi a Isa

³T'urzi toogo Raa, Galmeega y'in d'elo suldi pay doŋ beehiye a kine kono in di lekke kettiyo ti Raa. Inkiŋo Raa y'in di y' gize Isa wede y'inni wiike t'urzi goolikadi wo t'urzi toogadi ere i naabiya.

⁴Geŋ inkiŋo y'in d'ele suldi doŋ a di jiiŋe baadaŋ wo zooyayaŋ ooŋe, doŋ ti poone yi ruute y'in t'ela geŋŋo, kono aame suldi geŋ kun uuna maŋ, kun aana kun t'alda ti suldi doŋ ulpi tudde ti dehu, an d'an t'ettiyo doŋ duniya k'ume daggiya, wo soŋ kun di lekke kettiyo kaŋ soo ti Raa.

⁵Wo kono inkiŋo toŋ, kune kun ziipe addugun a Isa geŋ, kun ti ketto toonugun zakidi kun d'oziro ki diine. Wo kun izira ki diine maŋ, kun t'isa doŋ i suune Raa ki kotto.

⁶Wo Raa geŋ kun yi zuuna maŋ, tuddugun kun i-d'aana. Wo tuddugun kun i iina maŋ, kun soodo zakidi. Wo kun ziiŋa zakidi maŋ, kun lekko kettiyo ti Raa.

⁷Ki daŋgu, kun likka kettiyo ti Raa maŋ, kun di geyyo tuddugun aakede zemba. Wo kun giyya tuddugun aakede zemba maŋ, duwo pay kun di'n geyyo.

⁸Aame suldi geŋ kun uuna baadaŋ adda k'addugun wo kun izira eego maŋ, kane geŋ an un ti'n isa doŋ tasse ye, wo de doŋ ettiyo ki daana a urzi suuniyo Galmeegiŋ Isa Almasi.

⁹Wo aame suldi geŋ wede yi ki'n uune adda k'addi ye maŋ, yoŋ geŋ yi ki woliyo dokki ye aa wede koosiyo, geŋ i dunde a oldikadi ere ti kaaga Raa yi y'ize kamileŋ geŋ me.

¹⁰Kono kamo zemba ki nuŋ, kun ketto toonugun zakidi sey a ceere kono kun di seeda zakidi a waaku ere Raa y'unni wiike, wo a beeriyo ere yi biire kune doŋzi. Derec, suldi geŋ kun a ziiŋa zakidi maŋ, umbo kun ki t'ooro adda k'oldiko ye.

¹¹T'urzi geŋ Raa y'un d'ooley urzi waŋ wede kun t'ettey a moziko ere ki daayum ki Galmeegiŋ Isa Almasi Wede k'Uttiyadiŋ.

¹²Geŋ iŋkino ni dehu sulɗi geŋ n'un ti'n ɗoole ɗoole sey me, aame sulɗi geŋ kun'ni zuuna baa, wo kun lekkiyo kettiyo zakidí a ɗerec ere kun uune gettiyo maŋ.

¹³Wo aame nuŋ ede botto ni lekkiyo geŋ, ni suune ɗerec sulɗi geŋ n'un ti'n ɗoole ɗoole beehiye, kono kun di lekke zeere.

¹⁴Nuŋ ni suune bini toŋ ni t'inda, aa Galmeegiŋ Isa Almasi y'o ruute.

¹⁵Nuŋ ni dehu n'aase t'urzi mummino toŋ maŋ, kono aame n'inda toŋ kun d'aana daayum kun d'elka a sulɗi geŋ me.

Gooliko k'Almasi

¹⁶Kun ollo, aame kaye ay un gizite ti poone Galmeegiŋ Isa Almasi y'iido ti toogadí geŋ, ono ɗoŋ ay ruutite geŋ ay k'iide taaya ere iido ti elkiso ɗuwo ye, kaye ay yi wulle t'edayey toore mozikadí me.

¹⁷Ki kotto, Meega Raa y'a y'ize yoŋ wede suma wo yi-d'ele gooliko. Wo Raa adda dary'ikadí ere meeda gette, golladí Isa y'a t'illiga, t'ede: «Eŋ ulo nuuno ni y' giyye baadaŋ, ulbó uŋse ti yode me.»

¹⁸Wo golla gette t'iido ti kandaane, kaye batum ay di-t'illiga aame kaye ti yode ekki mokkolo ere kamileŋ gette.

¹⁹Iŋkino kaye ay boohiyo sey adda k'addey ono ɗoŋ nebiyagi an ruutite me. A kune beehiye kun ziipa kuuduguŋ a onamaŋ geŋno maŋ, kono kane aakede toore i-tooriyo adda k'ume zimolo bini ompilso k'ume, wo toore k'Isa yi-tooriyo a biza k'ulbuguŋ aa moole biza soohe yi koliyo yi-tooriyo.

²⁰Munɗa wede ki poone a jiiire miŋ: Ono ɗoŋ nebiyagi an riije ti kaaga adda mattup ki Raa geŋ, wede tudde yi k'aane yi ki suune itadaŋ ye yode ti siidí me.

²¹Ɗerec, ono ɗoŋ nebiyagi an ruutite geŋ, soo toŋ umbo i k'iido ye t'urzi k'elkiso ɗuwo me, wo geŋ an i ŋiiy'a Unde Kamileŋ kono an di ruutite ono ɗoŋ iido ti Raa me.

2 Piyer 2

Ɗoŋ eliyo dooyiso ere oldo

¹Ti kaaga geŋ i d'ede ɗoŋ ede t'adda diine ɗoŋ k'Izirayel kane an ti t'ize tuddaŋ aa nebiyagi, wo geŋ iŋkino ti diine kune toŋ i d'adɗa ɗoŋ an t'ela dooyiso ere oldo. Kane geŋ dooyisadaŋ an ti kalsa kaŋ ombide ti ono ɗoŋ ɗerec ye ki daggiya ɗuwo, wo urzi Galmeega wede an di'n uɗɗe geŋ an d'oola. Iŋkino maŋ kane geŋ kesiko an t'oona kulkuwo Raa a eedaŋ ki daggiyadaŋ.

²Wo a lekkiyadaŋ ere ki boliyo gette ɗoŋ baadaŋ an di'n daana, wo t'urzi kane ɗuwo an di kildita urzi wede ɗerec ki Raa.

³Kane don eliyo dooyiso ere oldo geɗ an un t'in dagga t'urzi lohito k'ono a bizaɗ, kono an t'oona munda beyguɗ. Kane geɗ ti kaagine too booradaɗ Raa y'an ti-dikke, wo daggiyadaɗ t'aasa kesiko.

⁴Derec, kun suune kane maaleekiyagi don i t'ize oldiko toɗ, Raa yi ki'n iili ye, wo y'a ti'n zidde y'a ti'n gittite, yi ti'n ibi adda k'olde goole sohuru wo zimolo, yi di'n boohiyo an di lekke bini onniyo booro.

⁵Wo duwo don ti kaaga ulpi toɗ Raa yi ki'n iili ye, kane y'an iide pay ti ahu baadaɗ a t'iimi siido, wenda soo toɗ i k'utte ye. Wo a utte Nowe siidi, wede i gizite urzi wede ki diine, ti don sarat a itadi.

⁶Saɗ maɗ geegiryagi Sodom ti Gomor geɗ kane ulpi, Raa y'a dikke booro eedaɗ, y'an igge t'uwo ti donzaɗ pay a t'ize oddagi, kono a kiza urzi a don isa oldiko ki daana an di wolla.

⁷Aame geɗ Lot yoɗ wede ki diine Raa y'a y'utte, kono yoɗ i y'uune a lekkiyo ere ki boliyo ki don siido an isiyo daa sukiyagi gette.

⁸Derec, yo wede ki diine geɗ yi lekkiyo a diinayaɗ, yi wolliyo wo y'ollige naabo ere pay an isiyo onnu diddo gette. Injino lekkiyadaɗ tod'te sukiyagi i ti lattiya biza k'ulbi wede ki diine geɗno.

⁹Injino maɗ Galmeega geɗ yoɗ yi suune urzi mummino y'a t'adda don i lekkiyo kettiyo ti yode t'adda suldi don ooɗe an aaniya me, wo yoɗ yi suune urzi mummino don k'oldiko y'anni boohe bini yi ti'n t'ela daɗgay a onniyo ere Raa yi deka booro me.

¹⁰Wo yoɗ yi t'ela daɗgay ki poone kane don i daaniya urzi pitiɗko tuddaɗ ti dehu gettiyo, wo an aa ti diipida a ono Raa geɗ me. Kane don eliyo dooyiso ere oldo gette a wenda an k'orgiso ye, eedaɗ zakidi. Ottilso soo toɗ an k'ede ye a maaleekiyagi don toogo ti kandaane geɗ me, an di'n kaldita.

¹¹Wo kane maaleekiyagi don an ede toogo baadaɗ a jire geɗ, kane don eliyo dooyiso ere oldo toɗ an ki'n kaldita ye aame dekkiyo booro a daana Galmeega me.

¹²Wo kane geɗ eedaɗ aa seydi balda daa k'elkisaɗaɗ, kane geɗ a lekkiyadaɗ an ti'n seddu, an ti'n towwo. Geɗ an kaldita a munda an ki y' suune ye. An di-t'inda aa seydi balda.

¹³Injino maɗ a oldiko ere pay an ize gette, Raa y'an ti dooza. A onnu toɗ maɗ an isiyo unswadaɗ a urzi naabo ere oldo tuddaɗ ti dehu. Aame an aa konso a ombaguɗ toɗ, lekkiyadaɗ gette oldo a duwo sukiyagi baadaɗ, ulbaɗ an isiyo unse ki lohito k'ono daɗɗal.

¹⁴Edayaŋ bilbil ki moonite t'eraŋi k'eebaŋ. Kane an k'ormiyo ye k'isiyo k'oldfiko me, doŋ tasse an ti'n daggiya, wo an d'okkiso a suldi pay. Inkiŋo maŋ duudiyo Raa a eedaŋ.

¹⁵Kane geŋ urzi wede derec an d'iili, an digge, an di diine urzi wede ki Baalam ulo Bozor pây. Yode wede y'a giyye soŋko ere an i eliyo y'aase ulsu,

¹⁶wo yo nebi Baalam geŋ a oldfiko y'ize gette, Raa y'a y'iipide t'urzi bize buuru. Inkiŋo maŋ onniyo gette t'a ruute aa i rootiyo wedusu, inkiŋo t'a y'ihira kono y'a ki isa ye baa naabo daa k'elkiso gette.

¹⁷Kane doŋ eliyo dooyiso ere oldo gette, aa osso ahutu i t'iibe, aa dondari maaye wede baadaŋ yi-ti'n teepiyo, mizzi yi-ki koppiyo ye. Kane geŋ umayaŋ Raa y'an ti t'ikkima adda k'ume zimolo dil.

¹⁸Kane geŋ ti bizaŋ i d'addiya ono doŋ baadaŋ ki koliyo tudde wo ki bita. An d'isiyo naabo sukiyagi ere a jiire ki tuddaŋ ti dehu, kono an di mabilde kane doŋ i t'udfo ti ooŋe ti diine doŋ i lekkiyo a urzi daggiya.

¹⁹Kane geŋ an an di rootiyo a duwo an t'isa doŋ eedaŋ toore, kaciŋ kane batum miŋ bulagi ki naabo ere an isiyo daayum ki lattiya gettiyo, kono wede tuuku toŋ yoŋ bule ki munda wede i-iide.

²⁰Inkiŋo maŋ i d'ede doŋ oŋgo an t'udde t'adda suldi doŋ ganigi ki duniya t'urzi suuniyo ere ki Galmeegiŋ Wede k'Uttiyadiŋ Isa Almasi, wo aame saŋ an iila tuddaŋ an ti gima k'adda suldi doŋ ulpi an i-iide geŋno sey maŋ, kane geŋ lekkiyadaŋ ere k'ita ette oldo a jiire ere ki poone.

²¹A kane inkiŋo geŋ beehiye urzi wede ki diine an gi di y' suune ye toŋ bee, miŋ an di y' suune wo saŋ an d'ooli ono doŋ kamileŋ doŋ Raa y'an ruute an illiga geŋ me.

²²Geŋ an d'iina a-t'iide a munda wede ono ombide an ruute me, an'de: «Gede yi-ti kama ombo palditadi», wo soŋ «Kinzir kun ti y' zuuye toŋ, yi-ti kama k'adda nirdito sey.»

2 Piyer 3

Kama k'Isa ki duniya

¹Zemba ki nuŋ kune doŋ ki geyyiso, kun ollo mattup n'un raanjiya ette, ere ki sirwe. Ise a mattup ere ki poone, wo a ere ki sirwe toŋ maŋ, ni dehu kune eggun a lekke ohine a elkiso ere ki diine t'urzi k'ono pay doŋ n'un ruutite geŋno.

²Ni dehu kun aa d'elke a ono doŋ nebiyagi doŋ kamileŋ an ruutite ti kaaga, wo ti urziyagi k'oogoro doŋ ki Galmeega Wede k'Uttiyadiŋ kun illiga t'urzi kaye doŋ zina k'Isa.

- ³Wo munda wede kun di suune ki poone enno, a onniytagi don ettiyo k'ita i d'adda duwo an di lekka lekkiyo ere aa tuddan ti dehu. An un di'n t'okka maade,
- ⁴wo an t'eesa: «Eeyu Isa Almasi yi ruute san y'a-kimo, de anken too me yi d'aaniya me? Maawin ton an dinge baa, wo kane suldi pay min an lekkiyo a umayan t'ume Raa y'a t'ikkima duniya too.»
- ⁵A elkiyadan gette kane an dunde ti kaaga Raa y'ikkima siido kane ti kandaane t'urzi k'ono bizí me. Siido ti ahu y'a ti'n diikida, wo siido yi t'ikkima t'adda k'ahu.
- ⁶Wo gen inkinno t'urzi k'ahu don baadan a t'iimi siido, don adda duniya ti suldizan pay ti kaaga an t'uute.
- ⁷Wo ki kandaane kane ti siido don ankenno en, t'ono don ki bizí genno Raa yi'ni boohiyo k'uwo t'an uuta. Kane gen yi'ni boohiyo k'onniyo ere Raa y'a dekka booro wo k'onniyo daggiya don k'oldiko.
- ⁸Wo zamba ki nun kune don ki geyyiso, i-d'ede munda soo i dehu un ki dande ye: Galmeega a elkisadi onniyo soo gette aa ozzine dupu, wo ozzine dupu gen aa onniyo soo.
- ⁹Don ongo an elkiyo Galmeega yi t'ossiyo a munda wede yi ruute y'aasa gen me. Wo inkinno ye, yo y'ombine baadan kono kune, yi ki dehu wenda soo ton a ki dagge ye. Ki too man yo yi dehu duwo pay an di-kime lekkiyadan.
- ¹⁰Inkinno man onniyo kama Galmeega t'aana aa wede k'oogire, wenda soo ton yi ki suuna ye. A onniyo gette kandaane a nokkida ti tarkuuse baadan wede k'a orgide, suldi don pay a kandaane uwo t'an ogga a t'isa umbo, wo siido ti suldi don pay adda gen a t'isa umbo pay.
- ¹¹Derec, suldi pay gen an t'engila inkinno, gen kun suuno koduwo mummino kun di lekke me! I dehu kun di lekke don kamilen, wo a kize kune kettiyo ti Raa.
- ¹²Koore kun delliyo aaniya k'onniyo ere Raa y'a dekka booro gen me, kun di-kette toonugun zakidi kono onniyo gette t'a aane kesiko. Onniyo gette onniyo ere kandaane uwo t'a y'ogga a t'isa umbo, wo suldi don pay a kandaane gen a t'ombila ti wehinko k'uwo gettiyo.
- ¹³Wo Raa yi ruute yi d'isa kandaane aware wo siido ton aware, aame gen duwo an d'isa munda wede ki diine aa Raa yi dehu, wo genno kine in delliyo munda wede yi ruute y'aasa me.
- ¹⁴Kono kamo zamba ki nun kune don ki geyyiso, koore kun delliyo aaniya k'onniyo gettiyo gen, kun ketto toonugun zakidi, kono y'un di'n t'oona don kamilen, kun lekkiyo ti toose, wo duwo an k'ambu sundugun k'ulsuko ye.

15Wo kun elko koduwo ombiṅe Galmeegiṅ gette, t'un d'ele urzi kun t'oone uttiyo. Inḱino kay leemadiṅ Pool wede in giyye geṅ, a sulḱi geṅṅo toṅ y'un ti'n riṅe ti suuniyo k'ono ere Raa yi ele.

16Geṅ munda wede yi riṅe adda mattupiyagi pay inḱino, aame y'essiyo raanṅiya a urzi sulḱi geṅṅo maṅ, i d'ede omagi oṅgo ooṅe ki suuniyadaṅ me. Inḱino maṅ kane ḱoṅ i ki suune munda ye, wo an di baakiysa a sulḱi Raa, ono an ti'n kama t'urzi doolo aa an d'isiyo a omagi oṅgo adda mattupiyagi ki Raa ti doolo. An isiyo inḱino geṅ an daggiya tuddaṅ batum.

17Inḱino maṅ zemba ki nuṅ kune ḱoṅ ki geyyiso, aṅkeṅ n'un ti ruute ki poone sulḱi geṅ an d'aana. Kun koonā mentikagi, kono kane ḱoṅ i k'ambu ono Raa ye geṅ an un ki ti'n dagga ye, wo kun gi di t'assa lekkiyagun ere zakidi gettiyo ye.

18Wo ḱe kun'do ki ḱaana daayum a urzi beeko ti suuniyo ere ki Galmeegiṅ Wede k'Uttiyadiṅ Isa Almasi. Geṅ tamma t'a koone a yode ti aṅki wo ki daayum! Eyye.

1 Zaŋ

1 Zaŋ 1

Wede an yi waaku Ono yi d'eliyo lekkiyo

¹Kun ollo mattup ere ay un raaniya ette a tukki wede an yi waaku Ono yi d'eliyo lekkiyo, yoŋ geŋ wede t'ume k'eesiyo sulfi pay yoŋ ede to. Yode geŋ ay y'illiga ti kuudey, ay di y' wulle, ay yi wulle t'edayey ŋoo, wo beezey toŋ y'a yi butte.

²Aame wede i d'eliyo lekkiyo y'iido y'a gize tuddi geŋ, kaye ay di y' wulle. Kono kamo ay un di kazita rabiladi, rabila ki yode wede i d'eliyo lekkiyo ere ki daayum, yoŋ yi likke a sirpa Meega Raa, aŋkeŋ Raa y'in ti y' gize.

³Munda wede ay wulle wo ay illiga ti kuudey geŋ, a kune toŋ ay un ti y' kaza, kono kune ti kaye in lekkiyo kettiyo kaŋ soo. Wo lekkiyadiŋ kettiyo kaŋ soo gette, tod'te ti Meega Raa wo ti Ulí Isa Almasi.

⁴Geŋ kaye ay un raaniya iŋkino, kono kine pay addiŋ a ôona t'unŋsuwo.

Raa yoŋ toore

⁵Raa geŋ yoŋ toore, munda zimolo di yode umbo. Enno ono doŋ ay illiga ti bize k'Isa Almasi me, wo ay un ti'n kaza.

⁶Aame kine in'de in lekkiyo kettiyo kaŋ soo ti Raa wo in sooru adda zimolo maŋ, geŋ kine doŋ lohito k'ono, in ki sooru a urzi wede derec ye.

⁷Wo de aame in sooru adda toore aakede yode batum adda toore geŋ, in di lekka pay kettiyo kaŋ soo, wo puuzo k'Ulí Isa t'in di'n isa kamilen t'oldikadiŋ pay te.

⁸Aame kine in'de oldiko in k'isiyo ye maŋ, geŋ in daggiya tuddiŋ, munda derec di kine umbo.

⁹Wo aame kine in t'oodibe addiŋ a oldikadiŋ maŋ, yode Raa toŋ y'in t'isa tambobino a oldikadiŋ te, kono yoŋ wede ki diine, yi seedu zakidi a munda wede yi ruute y'aasa: iŋkino maŋ y'in t'isa tambobino a oldikadiŋ, wo y'in di'n isa kamilen ti sulfi doŋ pay ulpi.

¹⁰Aame kine in'de oldiko batum in k'ize ye maŋ, geŋ Raa in ti y'ize wede lohito k'ono, geŋ onami adda k'addiŋ umbo.

1 Zaŋ 2

¹Inni ki nuŋ, n'un raaniya iŋkino kono ni dehu kun ki d'ise oldiko ye. Wo de aame wede yi t'iire adda k'oldiko maŋ, kun suuno wede noogiyadiŋ ede a daana Meega Raa me, yoŋ Isa Almasi wede ki diine.

²Yode batum y'ele tuddí sedefe, y'a inda ki booyiso k'oldikadiŋ, wo kono k'oldikadiŋ dɛŋŋal ye, k'oldiko ki dɔŋ duniya pay.

Geyyiso tudde a urzi Raa

³Aame kine in seedu urziyagi k'oogoro Raa maŋ, t'urzi geŋ in di suune yoŋ in yi suune.

⁴Wede y'ede Raa yi y' suune wo yi ki seedu urziyagi k'oogiradí ye maŋ, yoŋ geŋ wede lohito k'ono, ono dɔŋ dɛrec di yode umbo.

⁵Wo wede y'a seedu ono Raa maŋ, yoŋ geŋ ki kotto yi giyye Raa t'addí pay. T'urzi seedu k'onamí geŋ i-kaza in yi suune, kine in lekkiyo kettiyo kaŋ soo ti yode.

⁶Aame wede y'ede yoŋ yi lekkiyo kettiyo ti Raa maŋ, i dehu y'a ozire aa Isa Almasi y'izire kay.

⁷Zemba ki nuŋ kune dɔŋ ki geyyiso, ono dɔŋ n'un raaniya eŋ kane urzi k'oogoro aware ye, wo de kane urzi k'oogoro ere ti kaaga kun illiga t'ume k'eesiyo. Urzi k'oogoro ti kaaga eŋ kane ono dɔŋ kun illiga.

⁸Wo aŋkeŋ ono dɔŋ n'un raaniya eŋ kane urzi k'oogoro aware. Naabo k'Isa Almasi y'ize wo ti sooru ere ki kune gette, i-kaza urzi k'oogoro geŋ dɛrec, kono naabo ere oldo a zimolo gette t'eŋgilso, wo iina ette naabo ere ki diine a toore kereŋ baa.

⁹Wede y'ede yoŋ adda toore wo y'olmide leemadí maŋ, yoŋ geŋ yi lekkiyo daayum adda zimolo.

¹⁰Wede yi geyyiso leemadí geŋ yi lekkiyo daayum adda toore, munda umbo yi ti y'oore leemadí adda k'oldiko me.

¹¹Wo de wede y'olmide leemadí maŋ, yode geŋ yi lekkiyo adda zimolo, y'ambe k'ume tunda'ŋ yi ki suune ye, kono zimolo ti t'ippe a edayí.

Duniya kun ti geyye ye

¹²Inni ki nuŋ, n'un raaniya kono oldikaguŋ Raa y'un t'ize tambobino t'urzi suma ki yode Isa.

¹³Kune maawi no, n'un raaniya kono kun yi zuune wede yo ede to t'ume k'eesiyo suldi pay me. Obilagi no, n'un raaniya kono Mohita k'oldiko kun ti jiiere.

¹⁴Inni ki nuŋ, n'un raaniya kono Meega Raa kun yi zuune. Kune maawi no, n'un riije kono kun yi zuune wede yo ede to t'ume k'eesiyo suldi pay me. Obilagi no, n'un riije kono kune un d'ede toogo, wo ono Raa kun'ni ziida zakidi, Mohita k'oldiko toŋ kun ti jiiere.

15Kune duniya kun ti geyye ye ti suldutú pay. Aame wede yi geyyiso duniya mañ, geñ geyyiso Meega Raa adda k'addí umbo.

16Kun ollo enño suldi ñoñ adda duniya me: suldi ñoñ ulpi tudde ti dehu, suldi ñoñ ersa ti zaapu wo koliyo tudde ti maala. Kane geñ i k'ettiyo ti Meega Raa ye, kane'ñ suldi duniya.

17Kun suune duniya ti suldutú ñuwo an zaapu adda eego geñ, an t'engila, wo ñe wede y'a ziidá zakidí a naabo ere Raa yi dehu mañ, y'a lekka ki daayum.

Kun koona mentikagi ti ñoñ k'olmide k'Isa

18Inni ki nuñ, onniyo k'ita t'iina aa kun d'illiga, a onniyo k'ita Wede k'olmide k'Almasi y'a etto, aŋkenño ñoñ k'olmide k'Almasi kane ede baadañ an t'uddo. Geñ i-kaza onniyo k'ita t'iina.

19Kane geñ an uddé ti diine kine ñoñ i ziipe addiñ a Isa, wo ñe ti poone to kane pay miñ ki kine ye. Derec, aŋki kane ki kine kotto mañ, an di lekke ti kine. Wo aŋken an t'uddé ti diinayiñ miñ, a t'iidiba ita kane pay ki kine ye.

20Wo kune'ñ, kun d'uune Unde Raa, tod'te Almasi wede kamileñ y'un ele, iŋkino mañ kune pay derec kun ti suune.

21Nuñ n'un riije kono derec kun ki ti zuune ye ye. Aha, n'un riije kono derec kun ti zuune, wo kun zuune derec i-k'ede lohito k'ono ye.

22Wede lohito k'ono miñ yoñ wee wee? Yoñ miñ wede i-tuuge yi rootiyo Isa yoñ Almasi Raa yi biire ye. Wede k'olmide k'Almasi geñ yoñ yi-tuuge yi rootiyo Raa yoñ meek'Almasi ye wo Almasi Ulo Raa ye.

23Wede yi-tuuge yi rootiyo Almasi Ulo Raa ye mañ, yode geñ Meega Raa toñ yi ki y' zuune ye. Wo wede y'umbe a Ulo Raa mañ, geñ yoñ yi zuune Meega Raa pây.

24Wo kune'ñ kun aa soodo zakidí a ono ñoñ kun illiga t'ume k'eesiyo. Aame ono ñoñ kun illiga t'ume k'eesiyo kun'ni ziidá zakidí adda k'addugun mañ, kune toñ kun di lekka kettiyo ti Ulo wo ti Meega.

25Enño munda wede Isa yi ruute y'in t'ela me: lekkiyo ere ki daayum.

26Nuñ n'un riije iŋkino kono kun di koone mentikagi ti ñoñ an dehu an un ti'n dagge.

27Wo kune'ñ, Almasi y'un ele Unde Kamileñ, wo tod' ti lekkiyo kettiyo ti kune. Geñ i ki dehu wede dooyiso ti doolo y'un gi di'n dooye ye baa. Tode Unde Kamileñ gettiñ t'un di'n dooye a suldi ñoñ pay derec, munda ki lohito k'ono umbo. Iŋkino mañ kun lekko daayum kettiyo t'Almasi aakede Unde Kamileñ t'unni duuye.

²⁸Wo aŋkeŋ inŋi ki nuŋ, kun lekko daayum kettiyo t’Isa Almasi. Inŋino onniyo ere y’aana yi-kiza tuddí a dúwo pay gette, y’in di’n t’oona daa niiku adda k’addiŋ, in ki seeda sukiyagi ye a daanadí me.

Inŋi Raa

²⁹Kun suune Almasi yoŋ ki diine geŋ, kun suune kay wede tuuku y’isiyo naabo ere ki diine maŋ, yoŋ geŋ ulo Raa.

1 Zaŋ 3

¹Kun ki wollo do Meega Raa y’in di’n giyye baadaŋ, y’in di’n waaku kine inŋizí, wo geŋ ki kotto kine inŋi Raa! Wo de kane doŋ duniya an in ki’n suune ye kine inŋi Raa me, kono kane Raa an ki y’ suune ye.

²Zemba ki nuŋ kune doŋ ki geyyiso, aŋkeŋ kine in t’ize inŋi Raa, wo de munda wede kine in t’isa a daana Raa y’in ki t’iidfiba ita ye botto. Wo in suune aame Isa Almasi y’iina maŋ, kine in t’isa aa yode, kono in di y’ wolla kereŋ eda ti eda.

³Wede tuuku yi zaapu elkiso ere inŋino a Almasi maŋ, y’a t’ise kamileŋ, aa yode batum kamileŋ.

⁴Wede tuuku y’isiyo oldiko geŋ, y’a ti doopide a oogoro Raa. Derec, isiyo k’oldiko gette, tod’te doopide a oogoro Raa.

⁵Wo de kun suune Isa Almasi y’iido k’adda duniya y’a buuye oldikadiŋ, yode wede i-k’ede oldiko ye.

⁶Wede tuuku yi lekkiyo kettiyo ti yode maŋ, y’a ki lekke adda k’oldiko ye, wo wede tuuku y’isiyo oldiko maŋ, geŋ Isa yi ki y’ wolle ye, wo yi ki y’ suune ye.

⁷Inŋi ki nuŋ, kun oola tudduguŋ wenda soo toŋ y’un ti’n dagga ye. Wede yi sooru ki diine geŋ yoŋ ki diine aakede Isa Almasi yoŋ ki diine.

⁸Wo wede y’isiyo oldiko geŋ, yoŋ ki Meeda siitandani, kono to Meeda siitandani gette t’isiyo oldiko t’ume k’eesiyo duniya too, wo yo Ulo Raa y’iido toc miŋ y’a-lette naabo ki Meeda siitandani.

⁹Wede tuuku yoŋ ulo Raa maŋ, y’a ki lekke adda k’oldiko ye kono yoŋ ono Raa i lekkiyo adda k’addí. Inŋino yi k’aane yi k’ise oldiko ye kono yoŋ ulo Raa.

¹⁰Wede tuuku yi k’isiyo suldi ki diine ye wo yi ki geyyiso zemba ye maŋ, yoŋ geŋ ki Raa ye. T’urzi eŋ kun di’n suune inŋi Raa koo ki Meeda siitandani koo maŋ.

Kun geyyo tudduguŋ

¹¹Kun ollo, enno ono doŋ kun illiga t’ume k’eesiyo me: Kine in geyyo tuddiŋ.

12Wo kine in ise ye aa ki Kayeṅ y'a îide leemadî me, kono yoṅ ki Mohita k'oldîko. Wo ki moo me yi y'îide leemadî me? Yi y'îide kono yo Kayeṅ geṅ naabadî oldo, wo ere ki leemadî beehiye ki diine.

13Zemba ki nuṅ, kune ulbuguṅ i t'oode ye aame doṅ duniya an un olmide maṅ.

14Kine in suune t'urzi k'unto in t'udde, aṅkeṅ kine in uune urzi lekkiyo kono in geyyiso zemba. Wede yi ki geyyiso zemba ye maṅ, yoṅ geṅ yi sooru daayum a urzi k'unto.

15Wede tuuku y'olmide zemba maṅ, yoṅ aa wede i tôwwo dūwo mirsi, wo kun suune wede i tôwwo dūwo geṅ i-k'ede lekkiyo ere ki daayum ye.

16Isa Almasi y'iido y'a ele tuddî, y'a inda kono kine. Inḱino maṅ kine toṅ maṅ in di geyye zemba, in t'ele tuddiṅ kono kane. T'urzi eṅ kine in di zuune geyyiso Raa mummino me.

17Aame wede i-d'ede maala ki duniya, wo yi wolleiyo leemadî yi daayisa y'a-t'appiya edayî yi ki wolleiyo sommagî ye maṅ, yoṅ geṅ i-k'ede geyyiso Raa adda k'addî ye.

18Inṅni ki nuṅ, kine in geyye tuddiṅ ti ono biziṅ dāṅṅal ye, wo de t'urzi naabo pay, geṅ i-kaza geyyisadiṅ tod'te derec.

19T'urzi geṅ in di suuna kine a urzi wede derec ki Raa, wo geṅ addiṅ a-t'assa a dāana Raa me.

20Wo aame addiṅ i dēkkiyo booro eediṅ maṅ, Raa yoṅ goole yi jiiire addiṅ wo yi suune suldi pay.

21Zemba ki nuṅ kune doṅ ki geyyiso, aame addiṅ i ki dēkkiyo booro eediṅ ye maṅ, geṅ kine in d'ette dāana Raa daa k'orgiso.

22A munda wede tuuku kine in tonde bey yode geṅ, in di y' t'oone kono kine in aa seedu urziyagi k'oogiradî, wo in isiyo naabo ere yoṅ ulbî i-d'isiyo uṅse.

23Kun ollo eṅṅo urzi k'oogiradî me: Kine in lekko in d'ambo a suma k'Ulî Isa Almasi wo in di geyyo tuddiṅ. Geṅ munda wede yoṅ yi ruute in d'ise.

24Wede yi seedu urziyagi k'oogoro Raa maṅ, yoṅ geṅ yi lekkiyo kettiyo ti Raa, wo Raa yi lekkiyo kettiyo ti yode. Wo kine in di suune, Raa yi lekkiyo kettiyo ti kine t'urzi k'Unde Kamileṅ ere y'in elo gettiyo.

1 Zaṅ 4

Doṅ daggiya dūwo

1Zemba ki nuṅ kune doṅ ki geyyiso, kane doṅ i rootiyo an'de an d'ede Unde Raa geṅ, kun ti wollo naabadaṅ dō, onamaṅ kun ambe baa ye. An d'ede Unde Raa

kotto maɗ kun di'n suuna, kono ɗoɗ an ti-t'ize tuddaɗ aa nebiyagi, an di tiipe baadaɗ adda duniya.

²Kun ollo, wede i-d'ede Unde Raa kun di y' suune a ono ɗoɗ adɗiya ti bizí. Injino wede tuuku yi rootiyo Isa Almasi y'iido k'adda duniya y'umbe tudde ki wedusu, geɗ yoɗ ki Raa.

³Wede tuuku yi ki y' zuune Isa injino ye maɗ, yoɗ geɗ ki Raa ye, unde ere i-d'ede gette t'ettiyo ti Wede k'olmife k'Almasi, wede kun d'illiga y'etto k'adda duniya geɗ, aɗkeɗ y'iina baa.

⁴Wo ɗe kune inɗi ki nuɗ, kune ki Raa, wo kane ɗoɗ an ti-t'ize tuddaɗ aa nebiyagi geɗ kune kun'ni jiiire, kono Unde ere un d'ede gette tod'te toogo ti jiiire ere i dokkiyo ɗoɗ duniya.

⁵Kane geɗ ki duniya. Injino maɗ an orbe aa ɗoɗ duniya ge d'orbe, wo ɗoɗ duniya an di'n ollige.

⁶Wo kine'ɗ ki Raa. Wede yi suune Raa y'in di'n olliga, wo wede ki Raa ye y'in ki'n olliga ye. T'urzi geɗ in di suuna Unde ere ɗerec ki Raa too te, wo unde ere ki lohito k'ono too te.

Raa yoɗ wede geyyiso

⁷Zemba ki nuɗ kune ɗoɗ ki geyyiso, kine in geyyo tuddiɗ, kono geyyiso gette t'ettiyo ti Raa, wo wede tuuku i-d'ede geyyiso geɗ yoɗ ulo Raa, wo yi suune Raa.

⁸Wede tuuku i-k'ede geyyiso ye geɗ, yoɗ yi ki suune Raa ye kono Raa yoɗ wede geyyiso.

⁹Ulí soo ɗaɗɗal y'aa di y'igibo ki duniya kono t'urzi yode kine in t'oone lekkiyo ere ki kotto. Geɗ injino Raa y'in ti gize geyyisadí a kine me.

¹⁰Kun ollo urzi geyyiso eɗɗo: kine ye i giyye Raa ki poone me, wo ɗe yode in i giyye ki poone me, y'a t'igibo Ulí y'iido y'a ele tuddí sedeke, y'a inda ki booyiso k'oldikadiɗ.

¹¹Zemba ki nuɗ kune ɗoɗ ki geyyiso, aa kine Raa y'inni giyye baadaɗ injino geɗ, kine toɗ in di geyye tuddiɗ.

¹²Wenda soo toɗ i wulle Raa umbo, wo aame kine in geyyiso tuddiɗ maɗ, Raa yi lekkiyo kettiyo ti kine, wo geyyisadí pay y'a-ti ɗiɗge a tukki kine.

¹³Wo Raa y'in elo Undí adda k'addiɗ. T'urzi geɗ kine in di suune in lekkiyo kettiyo ti Raa, wo yoɗ yi lekkiyo kettiyo ti kine.

¹⁴Meega Raa y'a igibo Ulí ki duniya kono yoɗ y'a utta ɗuwo pay, geɗ kaye ay yi wulle wo ay di rootiyo taayadí.

¹⁵Aame wede tuuku yi rootiyo bizí y'ede Isa Almasi yoŋ Ulo Raa maŋ, Raa yi lekkiyo kettiyo ti yode wo yoŋ yi lekkiyo kettiyo ti Raa.

¹⁶Wo kaye ay ti zuune geyyiso ere Raa y'ize a kaye te, wo ay d'umbe. Raa geŋ yoŋ wede geyyiso, wo wede yi lekkiyo a urzi geyyiso maŋ yoŋ geŋ yi lekkiyo kettiyo ti Raa, wo Raa yi lekkiyo kettiyo ti yode.

¹⁷Aame kine addiŋ ûune ti geyyiso maŋ, a onniyo ere Raa yi dekka booro toŋ kine in k'ede orgiso ye, kono lekkiyadiŋ a duniya ette tod'te aa lekkiyo k'Almasi.

¹⁸Aame in d'ede geyyiso maŋ orgiso toŋ umbo, wo geyyiso ti t'ôoniyo adda k'adde maŋ ti-ti lomme orgiso. Inŋkino maŋ wede i-d'ede orgiso geŋ, y'elkiyo yi t'oona daŋgay. Inŋkino maŋ wede i-d'ede orgiso geŋ, addí i ki t'ûune ti geyyiso ye.

¹⁹Wo kine in geyyiso Raa, in geyyo tuddiŋ kono Raa y'inni giyye ki poone.

²⁰Aame wede y'ede yi giyye Raa wo leemadí yi y'olmife maŋ, yoŋ geŋ wede lohito k'ono. Leemadí wede yi y' woliyo a daanadí miŋ yi gi di y' geyyiso ye de, y'a geyye Raa wede yi ki y' woliyo ye mummino me?

²¹Wede yi giyye Raa maŋ, leemadí toŋ y'a yi geyye. Geŋŋo urzi k'oogoro wede Isa Almasi y'in ruute in d'ise me.

1 Zaŋ 5

Kine toogo in jiire Meeda siitandani

¹Wede tuuku y'umbe Isa yoŋ Almasi Raa yi biire maŋ, yoŋ geŋ ulo Raa. Wo wede tuuku yi geyyiso Meega Raa geŋ, inŋizí toŋ y'anni geyye.

²Aame kine in geyyiso Raa wo in sooru a urzi k'oogiradí maŋ, t'urzi geŋ in di suune kine in geyyiso inŋi Raa.

³Derec, urzi geyyiso Raa geŋ yoŋ in di seeda urziyagi k'oogiradí. Wo urziyagi k'oogiradí geŋ, kane daaniyadaŋ i k'oone ye a kine me,

⁴kono kine pay inŋi Raa geŋ in d'ede toogo in jiire duniya, wo in t'ize toogo in di jiire ti zaapu k'addiŋ a Isa.

⁵Wee wee i ti jiire duniya te? Yode wede umbe Isa yoŋ Ulo Raa.

⁶Yode Isa Almasi y'iido y'a udfé t'urzi k'ahu wo ti puuzo ere k'untadí. Y'iido t'urzi k'ahu daŋŋal ye, y'iido t'ahu wo ti puuzo pây. Wo taaya gette i rootiyo Unde Raa, kono Unde Raa gette tod'te derec.

⁷Inŋkino maŋ kane doŋ afo i rootiyo Isa Ulo Raa me,

⁸kane Unde Raa, ahu doŋ ki batem wo puuzo ere k'untadí. Inŋkino maŋ kane afo geŋ an rootiyo bizaŋ soo.

⁹Aame ɗuwo an in rootiyo taaya a munda wede an wolleiyo maɗ, geɗ kine in d'ambu wo munda wede Raa yi rootiyo in d'ambe a ceere. Geɗ Raa yi ruute taaya a tukk'Ulí.

¹⁰Wede yi ziipa addí a Isa Ulo Raa maɗ, ono geɗ yi'ni zuune adda k'addí, wo wede yi k'umbe a ono Raa enno ye maɗ, geɗ Raa yi ti y'isiyo wede lohito k'ono, kono yi k'umbe ye a ono ɗoɗ Raa yi ruute a urzi k'Ulí me.

¹¹Geɗ enno ono ɗoɗ Raa yi ruute me: yoɗ y'in ele lekkiyo ere ki daayum, wo lekkiyo gette in t'uune t'urzi k'Ulí.

¹²Wede yi ziipe addí a Ulo Raa geɗ, yoɗ y'uune lekkiyo gette, wo wede yi ki ziipe addí a Ulo Raa ye geɗ, yoɗ lekkiyo gette umbo.

¹³N'un raaniya mattup ette kono kun di suune kun uune lekkiyo ere ki daayum, kune ɗoɗ umbe a suma k'Ulo Raa me.

In tondo t'adde soo

¹⁴Geɗ inkiyo kine in k'ede orgiso ye a ɗaana Raa me. Aame in tonɗiyo munda wede aa Raa addí i dehu maɗ, y'in di'n ollige.

¹⁵Aame munda wede kine in tonɗiyo geɗ in suune Raa yoɗ y'in ollige, geɗ in suune sey aa munda wede kine in tunde in y'uune.

¹⁶Aame wenda yi wulle leemadí yi t'iire adda k'oldíko ere i-ki d'etta unto ye maɗ, yi tondo Raa kono yode wo Raa yi di t'ela lekkiyo a leemadí me. Ni rootiyo ti oldíko ere i-ki d'etta unto ye kun tonde me. Wo oldíko ede a-d'ette unto te, wo geɗ ni rootiyo ti oldíko ere gettiyo ye kun tonde me.

¹⁷Naabo pay ere in isiyo oldo gettiyo oldíko, wo oldíko ongo a-ki d'ette unto ye.

¹⁸Kine in suune wede tuuku yoɗ ulo Raa geɗ oldíko yi k'ise ye, kono Ulo Raa yi y' boohiyo, Mohita k'oldíko ti-k'ise munda ye.

¹⁹Kine in suune kine ki Raa, wo kane ɗoɗ duniya pay geɗ an lekkiyo a bey Mohita k'oldíko.

²⁰Kine in suune soɗ Ulo Raa y'iido y'in d'ele eego soodo a elkiso in di suune Raa yi rootiyo ono ɗoɗ ɗerec. Wo in di lekkiyo kettiyo kaɗ soo ti Raa yoɗ yi rootiyo ono ɗoɗ ɗerec, t'urzi k'Ulí Isa Almasi. Yode wede i rootiyo ono ɗoɗ ɗerec, yoɗ Raa batum, y'in d'elo lekkiyo ere ki daayum.

²¹Inni ki nuɗ, kun koono mentikagi, kun daane ye ita longayi me!

2 Zaŋ

2 Zaŋ 1

Toose ki Zaŋ

¹Mattup ette i raaniya nuŋ wede dokkiyo, a koŋ erewo ere Raa yi biire wo soŋ a inŋizí doŋ ni giyye t'addó pay. Wo kane i ni giyye nuŋ siidó daŋŋal ye, doŋ pay i suune urzi wede derec geŋ an'ni giyye pây,

²kono derec ki Raa gette ti lekkiyo adda k'addiŋ, wo to t'a lekka ti kine ki daayum.

³Geŋ beeko, isiyo adde kofuwo ti toose ki Meega Raa wo ti Isa Almasi Ulo ki Meega, i koonaa eediŋ. Sulđi geŋ an in di'n t'elo kono in di lekke ti derec wo ti geyyiso.

Derec ti geyyiso

⁴Nuŋ ulbó uŋse baadaŋ aame n'illiga inŋizí oŋgo an sooru a urzi wede derec, a urzi k'oogoro wede ki Meegiŋ Raa y'in ruute.

⁵Wo aŋkeŋ koŋ erewo no, nuŋ ni di rooto kine in di geyye tuddiŋ. Kane ono doŋ ni raaniya eŋ urzi k'oogoro aware ye, kane miŋ doŋ kun d'illiga t'ume k'eesiyo geŋno.

⁶Wo to geyyiso gette, ti dehu kine in di daane urziyagi k'oogoro Raa yi rootiyo, wo urzi k'oogoro wede kun illiga t'ume k'eesiyo, yi rootiyo'ŋ kun di geyye daayum tudduŋ.

Kun koonaa mentikagi ti doŋ i ti t'isiyo tuddaŋ aa nebiyagi

⁷Nuŋ n'un rootiyo inŋkino kono aŋkenŋo i uđdo doŋ daggiya duwo baadaŋ adda duniya me. Kane geŋ an k'ambu ye Isa Almasi y'iido duniya y'a t'umbe tudde ki wedusu me. Yoŋ wede yi rootiyo inŋkino geŋ yoŋ wede daggiya duwo, yoŋ wede k'olmide k'Almasi.

⁸Inŋkino maŋ kun koonaa mentikagi, kono naabo ere in isiyo ette i-ki t'eŋgila ki bita ye, wo in aa ziida maŋ in di t'ooney munda wede Raa yi dehu y'in t'eley.

⁹Wede tuuku yi ki lekkiyo kettiyo a dooyiso ere ki Isa Almasi gi duuye ye, wo yi t'addiya ti paate maŋ, yoŋ geŋ ti Raa kettiyo ye. Wo wede yi lekkiyo kettiyo a dooyiso gettiyo maŋ, yoŋ geŋ kettiyo ti Meega Raa wo ti Ulí Isa Almasi.

¹⁰Aame wede y'iido tudduŋ wo yi ki dooyiso aa ere ki Isa ye maŋ, wede geŋ kun yi seeda ye a boyuŋ me, wo toose toŋ kun i ise ye.

¹¹Derec, wede isiyo toose a yode geŋ, aakede y'a ti gitte kaŋ soo ti yode a naabadí ere oldo y'isiyo gette.

Ono doŋ ki daŋgu

¹²Nuɗ oo d'ede ono baadaɗ n'un di roote miɗ ni ki raɗe ye, wo nuɗ n'elkiyo di kune n'etta wo in di rootey bize ti bize kono addiɗ a ôoney t'uɗsuwo.

¹³Iɗkino maɗ iɗɗi teemadí ere Raa yi biire an i-t'ize toose.

3 Zaŋ

3 Zaŋ 1

Toose ki Zaŋ

- ¹Mattup ette i raaniya nuŋ wede dokkiyo, a leema wede ki geyyiso Gayus, wede ni giyye t'addó pay.
- ²Leema ki nuŋ kee wede ki geyyiso, ni dehu tuddá t'a koone bee, naabadá pay t'aase ki diine kono nuŋ ni suune biza k'ulbá geŋ yoŋ daayum a Raa.
- ³Nuŋ ulbó uŋse baadaŋ kono zemba doŋ i ziipe addaŋ a Isa an iido t'ummey geŋ an oo ruute, kee ki sooru a urzi wede d'erec, wo d'erec kee k'isiyo munda wede ki diine.
- ⁴Aame nuŋ n'ollige inŋizó an sooru a urzi wede d'erec maŋ, ulbó i d'òoniyo t'uŋsuwo baadaŋ.

Kooke a leema

- ⁵Leema ki nuŋ kee wede ki geyyiso, ki seedu zakidi a urzi seedu zemba, ise torgagi toŋ maŋ.
- ⁶Kane doŋ geŋ an'tiyo kenno maŋ, an di rootiyo sundá a urzi geyyisadá a daana kane doŋ ogiyo ti suma k'Isa a enno, a beehiyko ere k'an isiyo gette. Inŋino maŋ n'a di rooto, doŋ inŋino geŋ k'anni noogo aa Raa yi dehu, an seeda urzi torguwadaŋ
- ⁷kono kane an adfiya ti boydizaŋ miŋ ki naabo a suma k'Isa Almasi. An ki tondiyo munda ye ti bey doŋ i ki suune Raa soo daŋŋal ye me.
- ⁸Inŋino maŋ kine toŋ in di'n nooge doŋ inŋino geŋ me, kono kine in t'ise doŋ naabadiŋ kaŋ soo a urzi wede d'erec.
- ⁹Adda mattup ette n'an riŋe ono booloŋ a zemba doŋ ogiyo ti suma k'Isa. Wo de Diyotirep wede yi dehu y'a t'ise ki daana do geŋ yi k'ollige ye onamey me.
- ¹⁰Inŋino maŋ nuŋ onniyo ere n'iida maŋ, munda wede ulsu geŋ n'a ti y' rootey a daana duwo. Ono doŋ ulpi y'orbe, lohito k'ono a eedó geŋno toŋ i k'iide ye, zemba doŋ ettiyo ti dokki yi ki'n seedu ye, wo doŋ ede i ni seeda toŋ yi ki dehu ye kane doŋ i dehu seedu torgagi geŋ yi-ti'n lomme ti diine kane doŋ ogiyo ti suma k'Isa me.
- ¹¹Leema ki nuŋ kee wede ki geyyiso, ki daane ye ita doŋ k'isiyo k'oldiko me, wo kee ki wollo munda wede beehiye, kono wede isiyo beehiye geŋ yoŋ ki Raa, wo wede y'isiyo ulsu geŋ yi ki suune Raa ye.

12Wo yo Demetirus geŋ ɗoŋ pay an rootiyo taayadí beehiye. Sooruzí ere ɗerec gettiyo toŋ ti rootiyo ti yode. Kaye toŋ ay rootiyo wo kun suune onamey geŋ ɗerec.

Ono ɗoŋ ki ɗaŋgu

13Ono ɗoŋ ni dehu n'a di roote baadaŋ miŋ ni ki raaje ye.

14Wo n'elkiyo saŋ maŋ n'etta n'a ki ti wollo, in di rootey bize ti bize.

15Inkino maŋ toose ti koono ti kee, laŋziyagá an a-t'ize toose, wo kee toŋ a laŋziyagey k'an t'iso toose soo soo pây.

Ziid

Ziid 1

Toose ki Ziid

¹Mattup ette i raaniya nuɗ Ziid, wede naabo k'Isa Almasi wo leema Zak, a kane doŋ Meega Raa yi'ni giyye. Kane y'a ti'n wiike wo yi di'n boohiyo t'urzi k'Isa Almasi.

²Geɗ isiyo k'adde koduwo, toose, ti geyyiso ki Raa i koonaa egguɗ daa dooziiyo.

Doŋ eliyo dooyiso ere oldo

³Zemba ki nuɗ kune doŋ ki geyyiso, nuɗ n'a dihe t'addo pay n'un di raane mattup a urzi k'uttiyo wede ki kine pay. Wo de ni wulle maɗ, a n'ele ankeɗ ni dehu n'un di raane kono un t'eley kooke kun di deyya a urzi zaapu k'adde a Isa, yo urzi geɗ Raa yi y'elo a doŋzi kaɗ soo daɗɗal tak.

⁴Nuɗ n'un raaniya kono doŋ ulpi ongo geɗ an t'iide diinaguɗ wo kune kun ki suune ye. Kane geɗ urzi beeko Raa an ti y' kama dergilagi kono an t'okkima urzi lekkiyadaɗ wede a urzi boliyo geɗɗo, wo an di koogire Isa Almasi, Galmeega wede dooyisadiɗ yoɗ soo daɗɗal. Aa an riine ti kaaga adda mattup ki Raa, kane geɗ booro Raa t'anni seeda.

⁵Derec, kane suldi geɗ kun'ni suune pay baa, wo toɗ n'un ti'n rooto sey kun a d'elke mummino Galmeega Raa y'an utte y'an uddo doŋ k'Izirayel ti siido Misir me, wo saɗ maɗ y'an d'ize a kane doŋ i-tuuge zaapu k'addaɗ a yode, an t'inda.

⁶Kun elko a maaleekiyagi doŋ urzi dokkiyo wede Raa y'an ele geɗ an gi di buuhe ye, ume lekkiyadaɗ an d'iili. Kane geɗ Raa yi'ni boohiyo kettiso ti ziɗziri ki daayum adda zimolo, bini onniyo meeda ere Raa y'a deka booro.

⁷Kun elko a geeger Sodom ti Gomor wo ti geegiryagi doŋ goppon ti kane. Kane doŋzaɗ toɗ maɗ sooruzaaɗ t'a guune oldo aa maaleekiyagi geɗɗo, an d'iili tuddaɗ k'isiyo boliyo wo kuuli toɗ an di moonite ti kuuli eebaɗ. Wo ankeɗɗo an uune daɗɗay adda k'uwo ere t'oggiyo ki daayum, daɗɗay ere Raa y'an ele a kane gette, tookiyo kuude a duwo pay.

⁸Geɗ inkiyo kay, kane doŋ eliyo dooyiso ere oldo gette, sooruzaaɗ tiɗ aa kane doŋ geegiryagi geɗɗo. Kane an ti t'isiyo tuddaɗ ganigi ti boliyo ere an ettiyo t'urzi suniye, inkiyo maɗ an di koogire Raa wede t'ekki suldi pay, wo an di kaldita maaleekiyagi doŋ toogo a kandaane.

⁹Wo goole maaleekiyagi Mikayel toɗ, aame an niikiyto wo an a-t'irba ti Meeda siitandani a tukki nuune Muusa geɗ, y'a-ziida tuddi, yi ki dihe y'a ki deka booro a tukki tode t'urzi kaldita ye, inkiyo yi di ruute, y'ede: «Galmeega Raa yi elo daɗɗay.»

10Wo de kane duwo geɗ, munda wede an ki y' suune ye toɗ an di kaldita. Wo munda wede kane an suune a urzi tudde geɗ, an t'isiyo aa seyɗi balɗa elkisadaɗ umbo, sulɗi geɗ an d'an t'ettiyo k'ume daggiya.

11Dabar a kane, kono an diine urzi Kayeɗ. An giyye soɗko baadaɗ geɗ an ti t'ele tuddaɗ a urzi daggiya aa ki Baalam, wo an t'inda kono an ti tuuge a Raa aa ki Kore.

12Derec, kane geɗ ettiyadaɗ ere k'adda diine zemba ɗoɗ i ziipe addaɗ a Isa an ti guune ombo geɗ, a duwo sukiyagi. A ume geɗ kane an d'ombo wo an di sobo baadaɗ daa sukiyagi, an lomme addisadaɗ. Kane geɗ aa dondari ɗoɗ maaye y'ambu i ki koppiyo mizzi ye. Kane geɗ aakede inda ɗoɗ i k'ehiyo ye, ume k'ehiyadaɗ i t'owwo toɗ maɗ, an di ɗekkita ti sondayzaɗ pay, iɗkino untadaɗ t'a ɗoola taɗ sire.

13Kane geɗ aa ooye y'ûune i-kolzite baadaɗ. Iɗkino maɗ sulɗi ɗoɗ ki sukiyagi an isiyo geɗ, kane aa goopiyo k'ooye i-paldita a ɗaanadaɗ. Kane aa moldali ɗoɗ i sewiyso a kandaane, wo kane geɗ umayaɗ Raa y'an ti y' buuhe ki daayum a ume zimolo dil.

14Yode Enok mugiye wede ki sarat iise ti Adum geɗ, a tukki kane toɗ yi ruute ti kaaga ono ɗoɗ Raa y'igibo, y'ede: «Kun ollo, Galmeega Raa y'a etto ti maaleekiyagi kamileɗ suma dupiyagi baadaɗ,

15kono y'a ɗekka booro a tukki duwo pay. Kane ɗoɗ k'oldiko pay geɗ, booro t'an di'n seeda kono a sulɗi ɗoɗ ulpi pay an ize kono an ti tuuge a Raa, wo a ono ɗoɗ pay ulpi an ruutite a tukki yode daa k'ottilso.»

16Kane duwo geɗ daayum ulbaɗ uɗse ye, an di m'oolo a urzi lekkiyadaɗ, wo an daaniya ita sulɗi ɗoɗ ulpi tuddaɗ ti dehu. Ti bizaɗ i d'adɗiya ono ɗoɗ ki tamma tudde wo kane an di tamma duwo kono an d'oomi bizaɗ.

Kooke a ɗoɗ i ziipe addaɗ a Isa

17Wo de zemba ki nuɗ kune ɗoɗ ki geyyiso, kun a elko a ono ɗoɗ ɗoɗ zina ki Galmeegiɗ Isa Almasi an ruute ti kaaga.

18Kane an un ruute, an'de: «A onniytagi ɗoɗ ettiyo k'ita geɗ, i d'adɗa duwo an un di'n t'okka maade wo an daana ita sulɗi ɗoɗ ulpi tuddaɗ ti dehu.»

19Kane geɗno i t'eliyo ɗoɗ i ziipe addaɗ a Isa an t'âhuntu tuddaɗ me, elkisadaɗ ki tudde ɗaɗɗal wo i ki'n dokkiyo Unde Raa ye.

20Wo de zemba ki nuɗ kune ɗoɗ ki geyyiso, kun iso t'urzi tuuku toɗ lekkiyaguɗ t'a koone daayum a sulɗi ɗoɗ derec ki Raa kun zaapu adduguɗ eego. Kun tondo Raa ti toogo k'Unde Kamileɗ.

21 Kun lekko daayum a geyyiso ere ki Raa, kun di dello onniyo ere Galmeegiŋ Isa Almasi y'un d'isa adde koduwo wo y'un t'ela lekkiyo ere ki daayum gette.

22 Kun wollo sommagi ki doŋ an d'ede niiku a urzi zaapu k'addaŋ a Isa,

23 doŋ oŋgo ette k'adda k'uwo geŋ kun ti'n kami kun'n utto. Wo a doŋ oŋgoŋ kun an d'iso adde koduwo kay, wo de ti metiŋko: Kun ti ledfo ti tuddaŋ, ise kallagaŋ toŋ kun a botta ye, para maŋ un di'n seeda, kono kane ganigi t'urzi suldi doŋ ulpi an isiyo.

Tamma a Raa

24-25 In amma Raa soo daŋŋal, yoŋ y'in di'n uttiyo t'urzi Galmeegiŋ Isa Almasi. Yoŋ i-d'ede toogo y'un t'eegire kun ki t'oore adda k'oldiko ye, wo y'aane y'un di'n t'ette ki daanadi k'adda daryikadi daa zaapu k'ono eggun, wo onniyo t'unŋsuwo. Geŋ moziko, gooliko, toogo, wo urzi dokkiyo, kane pay geŋ ki yode ki poone duniya t'a t'eesa botto too, bini aŋki, wo ki daayum! Eyye.

Apokalipse

Apokalipse 1

Sulfi don Isa Almasi yi gizite a Zan

¹Mattup ette ti kaza a sulfi don Isa Almasi y'an iidiba ita a don naabadí. Raa yi d'ele ono en a Isa Almasi kono y'an t'oodiba ita an di suune munda wede aana goppon. Kono k'inkino Isa Almasi y'a igibe maaleekayi ki tukki Zan wede naabadí, kono munda en yi di ti y' kize.

²Man Zan y'an di gizite a duwo sulfi don pay maaleeka yi gize, y'ede: «Ki kotto en ono Raa, wo gen yode Isa Almasi batum yi kaza ono gen derec.»

³Unsuwo a wede i gariya wo a don ollige ono don Raa y'igibo adda mattup ettiyo. Unsuwo a don ollige ono don an riije enno wo an aa seedu gen me. Gen kun suuno koduwo sulfi en peedadan goppon a t'isa.

Toose ki Zan

⁴Mattup ette i raaniya nuñ Zan. Toose a kune don ogiyso ti suma k'Isa a geegiryagi sarat ki siido k'Aazi. Beeko ti toose i koono eggun t'urzi Raa, yode wede t'ume duniya t'a t'eesa botto too, bini anki wo bini onniyo k'ita ton yon ede. Wo kane undiyagi don sarat ki Raa a daana kaakido mozikadi genno ton, an un elo beeko ti toose.

⁵Yode Isa Almasi wede i ziida zakidi a urzi kazita k'ono Raa, y'un elo beeko ti toose. Yode wede i bilde ki poone ti diine don unto, yon Mozigo mozagi a siido pay. Yon y'inni giyye, y'in di'n udde t'adda k'oldiko t'urzi puuzadi ibi.

⁶Yon mozigayin wo kine donzi, y'in di'n ize kine don sedeke ki Meegi Raa. Inkino tamma ti moziko a koone a yode ki daayum. Eyye.

⁷Kun wollo, y'ettiyo adda dondari. Wede tuuku ton y'a yi wolla, ise don i y' girbe t'aryagi ton an di y' wolla. Ita duwo pay adda duniya an dillita an d'ola kono yode. Gen ki kotto a t'isa! Eyye.

⁸Galmeege Raa y'a ruute, y'ede: «Nuñ sundó Alpa wo Omega. Nuñ Raa toogadó t'a jire pay, nuñ wede t'ume duniya t'a t'eesa botto too, bini anki wo bini onniyo k'ita ton nuñ ede.»

Zan i-d'iido munda aa suniye, y'a wulle Isa

⁹Mattup ette un raaniya nuñ Zan leemaguñ, nuñ ti kune in lekkiyo kettiyo kan soo t'Isa. Kine in dabirsa kan soo wo in seeda zakidi a urzi k'Isa me, yon mozigo kine pay. Wo nuñ an ti'n zidde a siido ere a diine k'ahu sundutu Patimos, kono an'de n'ize ulsu ni kazita ono Raa, wo ni gizite urzi wede derec Isa y'o iidiba ita.

10Onniyo soo, onniyo Dumas maŋ, Unde Raa ti-t'ûune adda k'addó, saŋ ki daaró n'a illiga golla awwa ti rootiyo aa ti parre,

11ti d'eesiyo: «Mundá wede ki wolliyo eŋ, ki ti y' raaja adda mattup, wo mattup gette k'an t'agiba a doŋ ogiysito ti suma k'Isa i lekkiyo a geegiryagi sarat: a Epez, a Simirn, a Pergam, a Tiyatir, a Sarde, a Piladelpi wo a Lahodise geŋŋo.»

12Aame n'illiga iŋkino maŋ, n'a gilɗe daaró n'a wolle o rootiyo wee wee. Maŋ n'a wulle pitila sarat ki dap.

13Wo a diine pitila sarat gette, ni wulle mundá i deey'iso aa wedusu yi t'usso kalle sohuru i d'argu a donɗali, wo ser ki dap y'a-zidɗe laŋkay'a.

14Ilali k'eedí tuwardí kar aa kaawa, edayí i d'omilte aa uwwo.

15Zoŋɗí aa maala teezowo an ti t'ele adda k'uwwo i d'oggirso doɗɗot, golladí i ɗurriyo aa ooye y'okko.

16A beezí k'ammade moldali sarat, wo ti bizí i d'adɗiya kasigara kesiyagutú sirwaŋ pay korbe robboŋ. Ume k'edayí i rala aa peedo ti ziida.

17Aame ni y' wulle maŋ, n'a iire a zoŋɗí aa n'inda, maŋ y'a-ti ziipe beezí k'ammade a tuddó wo y'o di ruute, y'ede: «Kee k'orgide ye, nuŋ wede ki poone wo k'ita toŋ nuŋ.

18Nuŋ wede ni lekkiyo zeere, wo nuŋ wede ti kaaga n'a inda wo n'a bilɗe, aŋken ni lekkiyo zeere ki daayum. Nuŋ oo d'ede toogo a tukk'unto wo a tukk'ume ki doŋ i t'inda.

19Iŋkino maŋ mundá wede ki wulle geŋ, pay ki ti y' raaja. Mundá wede ki wolliyo aŋkenŋo wo wede aana k'ita toŋ, ki ti y' raaja pay.

20A moldali sarat doŋ ki wolliyo a beezó k'ammade wo ti pitila sarat ki dap eŋ, k'ollo n'a di t'oodo itadaŋ. Moldali doŋ sarat eŋ, i-kaza maaleekiyagi sarat doŋ Raa y'igibe ki boohiyo doŋ ogiysito ti suma k'Isa a geegiryagi sarat geŋŋo. Wo kane pitila sarat geŋ, i-kaza doŋ ogiysito ti suma k'Isa a geegiryagi sarat geŋŋo.»

Apokalipse 2

Mattup a doŋ ogiysito ti suma k'Isa a Epez

1«Ki raaja a maaleeka wede i boohiyo doŋ ogiysito ti suma k'Isa a geeger k'Epez: Kun ollo, eŋ ono ki nuŋ wede i seedu moldali sarat a beezó k'ammade wo ni-sooru adda diine pitila sarat ki dap, ni rootiyo, n'ede:

2“Nuŋ ni ti suune lekkiyagun te, wo naabagun ere ooŋe gette kun a seedu zakidí, wo ni suune kun an k'ooliyo urzi ye a doŋ bundidí an di lekke a diinagun me.

Geŋ kun ti'n niime kane doŋ an'de kane doŋ zina k'Isa, kaciŋ kane doŋ zina ye. Inŋkino kun di'n zuune kane doŋ lohito k'ono.

³Kune kun seedu zakidi a urzi zaapu k'adde a Isa, kun dibire kono kun umbe a sundó wo kun ki t'isse ye.

⁴Wo de enno munda wede kun ize wo nuŋ addó i ki dehu ye me: Kune ankenno kun ki n' giyye aa t'ume k'eesiyo ye.

⁵Kun elko ume wede kun t'iire me, kun di kama lekkiyaguŋ wo kun t'ambo naabaguŋ ere ki poone, wo aame kun ti tuuga ki kama lekkiyaguŋ maŋ, n'a t'amba pitila t'umatú me.

⁶Wo de enno munda wede beehiye kun ize me: Kune naabo ere kane doŋ sudaŋ Nikolayit an isiyo gette, kun ti giigira aa nuŋ toŋ ni ti giigira.

⁷Wede i-d'ede kuwwa k'ollige maŋ, y'ollo koduwo ono doŋ Unde Raa t'an rootiyo a doŋ ogiysito ti suma k'Isa me. A doŋ i jiira maŋ, n'an t'ela an d'ooma inŋni k'undumu wede i d'eliyo lekkiyo, yoŋ geŋ adda jenne ki Raa.”»

Mattup a doŋ ogiysito ti suma k'Isa a Simirn

⁸«Ki raana a maaleeka wede i boohiyo doŋ ogiysito ti suma k'Isa a geeger Simirn: Kun ollo, eŋ ono ki nuŋ wede ki poone wo k'ita toŋ nuŋ, wede n'a inda wo saŋ n'a bilde, ni rootiyo, n'ede:

⁹“Nuŋ dabaraguŋ ni ti suune ti daayisaguŋ te, wo ki too maŋ a urzi Raa kune'ŋ ki laale. Nuŋ ni suune kaldita ere an unni kaldita te. Doŋ an rootiyo inŋkino geŋ an'de kane Yawudiyagi, kaciŋ Yawudiyagi ye, kane ogiysito ki doŋ ge dooyiso suldi Meeda siitandani.

¹⁰Kun orgide ye a dabar ere un etto te. Kun ollo, Meeda siitandani t'un di'n naama, doŋ baadaŋ ti diinaguŋ ti di'n oba daŋgay, wo duwo an un di'n dabira k'onniyto suma koomat. Kun a soodo zakidi a urzi zaapu k'adduguŋ a Isa, ise un iido unto toŋ maŋ, wo nuŋ n'un di t'ela kadumul ki doŋ i ceeriyo, tode gette lekkiyo ere ki daayum.

¹¹Wede i-d'ede kuwwa k'ollige maŋ, y'ollo koduwo ono doŋ Unde Raa t'an rootiyo a doŋ ogiysito ti suma k'Isa me. Kane doŋ i jiira maŋ, unto ere ki sirwe t'an ki'n seeda ye.”»

Mattup a doŋ ogiysito ti suma k'Isa a Pergam

¹²«Ki raana a maaleeka wede i boohiyo doŋ ogiysito ti suma k'Isa a geeger Pergam: Kun ollo, eŋ ono ki nuŋ wede a beezó kasigara kesiyagutú sirwaŋ pay korbe robboŋ, ni rootiyo, n'ede:

¹³“Nuŋ ni y' suune umaguŋ wede kun di lekkiyo me, yoŋ geŋ ume kaakido Meeda siitandani. Wo kun di lekkiyo kettiyo a suma nuŋ, kun ki giigira ye urzi

zaapu k'addugun a nuɗ me, ise aame Antipas wede i ziida zakidɪ a urzi kazita k'onamó an y'ide di kune, a ume wede Meeda siitandani ti lekkiyo toɗ maɗ.

14Wo de enno munda wede kun ize, wo nuɗ addó i ki dehu ye me: Di kune i d'ede doɗ ede, kane geɗ an daaniya urzi wede Baalam yi dooyiso, yode geɗ yi-di t'elite ono a Balak y'an t'ekke ikka a doɗ k'Izirayel, kono an d'aadi sey wede an ele sedefe a loɗgayi wo an d'ooli tuddaɗ k'isiyo boliyo.

15Wo soɗ di kune i d'ede doɗ ede kane an daaniya dooyiso ere ki doɗ sundaɗ Nikolayit.

16Kun ti kama lekkiyaguɗ, para maɗ nuɗ gopponɗ ni kama ki tuddugun, doɗ geɗ n'anni deyya ti kasigara ere adɗa ti bizó.

17Wede i-d'ede kuwwa k'ollige maɗ, y'ollo koduwo ono doɗ Unde Raa t'an rootiyo a doɗ ogiysito ti suma k'Isa me. A doɗ i jiira maɗ, n'an t'ela an d'ooma ombó ere ombide sundutú mann, wo a kane geɗ wede tuuku toɗ ni di t'eela sey wehilu tuware, raaniya eego suma aware wenda soo toɗ yi k'aane yi ki ti suune ye, a ti suune wede ni ele danɗal."»

Mattup a doɗ ogiyo ti suma k'Isa a Tiyatir

18«Ki raana a maaleeka wede i boohiyo doɗ ogiyo ti suma k'Isa a geeger Tiyatir: Kun ollo, eɗ ono doɗ ki nuɗ Ulo Raa, edayó omilte aa uwwo wo zoɗdó aa maala teezowo i d'oggirso doɗdot, ni rootiyo, n'ede:

19“Nuɗ ni suune lekkiyaguɗ, geyyisaguɗ, zaapu k'addugun a Isa, naabaguɗ ere ki noogiyo duwo wo a seedugun ere zakidɪ a urzi zaapu k'adde a Isa. Nuɗ ni suune naabaguɗ ere kun isiyo ankenno ette, i jiire ere t'ume k'eesiyo.

20Wo de enno munda wede kun ize wo nuɗ addó i ki dehu ye me: Kune kun t'ooliyo Zizabel erewo ere t'ede tod'te nebi ti kazita ono Raa. Kaciɗ doɗ naabadó ti'ni daggiya, ti di'n dooyiso kono an t'ette a isiyo boliyo, wo an d'aadi sey wede an ele sedefe a loɗgayi.

21Ni-iili peedo boolon kono t'a-kime lekkiyatú, wo de ti ki dehu ti ki kime lekkiyatú ere a urzi boliyo ye.

22Inkino maɗ n'a ti sedɗa eeni ekk'onɗgali ti doɗ isiyo boliyo ti tode me an di dabira baadaɗ, wo de a ki t'isa inkino ye aame kane an ti gima lekkiyadaɗ ere oldo an isiyo t'urzi tode gettiyo maɗ.

23Wo innitú toɗ n'a ti'n t'ida, inkino maɗ doɗ pay ogiysito ti suma k'Isa an di suuna nuɗ wede ni suune elkiyo wedusu ti munda wede addí i dehu. A kune'ɗ wede tuuku toɗ ni di t'ela munda a naabadí ere y'ize y'ize.

²⁴Wo kune ɗoŋ a Tiyatir, kun ki diine ye ita dooyiso ere oldo gette, wo kun ki duuye ye sulɗi ɗoŋ an’ni waaku sulɗi ombide ki Meeda siitandani me. In’kino nuŋ di rooto: A kune attidi ti doolo n’un ki zaape ye baa.

²⁵Wo de dooyiso ere kun uune gette kun aa soodo zakidi bini aaniyadó.

²⁶⁻²⁸A ɗoŋ i ziida zakidi a naabadó bini ɗaŋgu wo an jiira maŋ, n’an t’ela toogo ere nuuno batum n’uune ti bey Meegó, n’a ti’n zappa mozagi ekk’ita ɗuwo pay, an di’n dokka ti toogo ki dalka maala, an di’n kossita aa an kossiyto boŋgali lee, wo soŋ n’an t’ela moole biza soohe.

²⁹Wede i-d’ede kuwwa k’ollige maŋ, y’ollo koduwo ono ɗoŋ Unde Raa t’an rootiyo a ɗoŋ ogiysito ti suma k’Isa me.”»

Apokalipse 3

Mattup a ɗoŋ ogiysito ti suma k’Isa a Sarde

¹«Ki raana a maaleeka wede i boohiyo ɗoŋ ogiysito ti suma k’Isa a geeger Sarde: Kun ollo, eŋ ono ki nuŋ wede o d’ede undiyagi sarat ki Raa wo moldali sarat, ni rootiyo, n’ede: “Nuŋ ni ti suune lekkiyaguŋ te, sunduguŋ ti m’ôolo aa kune zeere a urzi Raa me, kaciŋ kune aa unto.

²Kun t’onno, kun a soodo zakidi a zaapu k’adduguŋ a Isa, kono rippani zaapu k’adduguŋ ɗoŋ a guute geŋ an a-ki ti t’inda ye. Derec ni wulle maŋ, lekkiyaguŋ a ɗaana Raazó gette a ki t’iide ye a munda wede Raa yi dehu me.

³In’kino kun elko a ono ɗoŋ an un i duuye wo kun illiga geŋŋo. Kun’ni boho beehiye wo kun di kama lekkiyaguŋ. Aame kun ki t’inna ye maŋ, nuŋ n’a etto n’un di’n oora aa wede k’oogire a peedo ere tuuku kun ki ti suuna ye.

⁴Wo toŋ a Sarde geŋ ɗoŋguŋ miibi ede, kallagaŋ an ki ti’n ize ganigi ye. Kane geŋ an t’ossa kallagaŋ tuwardi ay d’ozira kaŋ soo, kono kane an iide an d’ozire ti nuŋ.

⁵In’kino ɗoŋ i jiira maŋ, an t’ossa kallagi tuwardi. Sundaŋ t’adda mattup ere ki lekkiyo gette n’a ki t’ida ye, wo a ɗaana Meegó Raa wo a ɗaana maaleekiyagi toŋ n’a rootey eŋ ɗoŋzó.

⁶Wede i-d’ede kuwwa k’ollige maŋ, y’ollo koduwo ono ɗoŋ Unde Raa t’an rootiyo a ɗoŋ ogiysito ti suma k’Isa me.”»

Mattup a ɗoŋ ogiysito ti suma k’Isa a Piladelpi

⁷«Ki raana a maaleeka wede i boohiyo ɗoŋ ogiysito ti suma k’Isa a geeger Piladelpi: Kun ollo, eŋ ono ki nuŋ wede kamileŋ ni rootiyo ono ɗoŋ derec, a beezó kerle ki biza bumbu Dawut, ni t’ihina maŋ, wenda soo toŋ yi k’aane y’a ki

ti t'ippe ye, wo n'a t'ippe maŋ, wenda soo toŋ yi k'aane yi ki t'ihina ye. Ni rootiyo, n'ede:

⁸“Ni ti suune lekkiyaguŋ te, ni suune kune toogaguŋ baata wo toŋ onamó kun di'n ziidá zakidí wo sundó kun gi di zidde ye. Inŋkino maŋ ni d'ihina biza a daanaguŋ, wenda soo toŋ yi k'aane y'a ki ti t'ippe ye.

⁹Kun ollo munda wede n'an isa a doŋ ogiyo ge dooyiso suldi Meeda siitandani me, kane doŋ an'de kane Yawudiyagi, kaciŋ kane Yawudiyagi ye. Kane geŋ n'an isa ki toogo miŋ an d'etto an dikka a daanaguŋ, wo an di suuna nuŋ n'unni giyye.

¹⁰Onamó kun i ziidá zakidí t'ombiŋe wo kun di'n buuhe, inŋkino maŋ nuŋ toŋ n'un di'n booha a onniyo ere ki dabar t'etto ekki duwo pay ki naamiya doŋ pay a siido geŋ me.

¹¹Nuŋ gopponŋ n'ettiyo, kun a soodo zakidí a dooyiso ere kun uune te, para maŋ kadumulaguŋ ki doŋ i jiire gette wenda ti doolo y'a t'amba.

¹²Doŋ i jiira maŋ, n'an isa aa dundulu ki seedu Boy Raazó, wo an di lekka adda ki daayum. Wo a tuddaŋ n'an di raaja suma Raazó wo suma ki geeger ere ki Raazó, tod'te Zeruzalem aware, i diigo ti kandaane ti daana Raazó. Wo n'an di raaja suma nuuno ere aware.

¹³Wede i-d'ede kuwwa k'ollige maŋ, y'ollo koduwo ono doŋ Unde Raa t'an rootiyo a doŋ ogiysito ti suma k'Isa me.”»

Mattup a doŋ ogiyo ti suma k'Isa a Lahodise

¹⁴«Ki raaja a maaleeka wede i boohiyo doŋ ogiyo ti suma k'Isa a geeger Lahodise: Kun ollo, eŋ ono ki nuŋ wede sundó Eyye, nuŋ wede d'erec wo i ziidá zakidí a urzi kazita k'ono Raa, nuŋ wede t'ume k'eesiyo Raa y'ikkima suldi pay geŋ ti nuŋ soo, ni rootiyo, n'ede:

¹⁵“Nuŋ ni ti suune lekkiyaguŋ te, kune'ŋ aakede ahu doŋ ŋoyoyo ye, wehini ye. Nuŋ ni dehu kun t'ise wehini wehini, ise ŋoyoyo ŋoyoyo daŋŋal!

¹⁶Wo de kune'ŋ wehini ye ŋoyoyo ye, kune dullimo geŋ, n'a pidá leezó.

¹⁷Kun rootiyo kune ki laale, suldi kun t'ukumte, inŋkino un iide munda kun ki dehu ye baa. Wo kune kun ki suune ye kune adda daayika, munda un k'ede ye me, kune adda dabar, koŋzayi wo bontiliŋ.

¹⁸Inŋkino maŋ n'un d'eelo kooke, kun owol dap ere an ti t'ele adda k'uwwo i ralita wic wic di nuuno, kono kun t'isa doŋ laale ki kotto, soŋ kun owol kallagi tuwardi kun t'ossa kono kun ki lekka bontiliŋ ti sukkiyaguŋ ye, wo kun a d'owol dawwa k'eda kun a y'ergito edaguŋ a wolla.

¹⁹Nuɗ ɗoŋ pay ni'ni geyyiso, n'an di rootiyo a munda wede an isiyo ulsu me wo ni di'n deeziyo. Inkiŋo maŋ kun ti kama lekkiyaguŋ wo kun t'iso ɗoŋ wehini a naabo Galmeega Isa.

²⁰Kun ollo, nuɗ ni t'ihira a biza bumbu wo ni koppiyo. Aame wede y'illiga golladó wo y'o t'ihina biza maŋ, ni-t'etta di yode ay d'oomey ti yode kaŋ soo.

²¹A ɗoŋ i jiira maŋ, n'an t'ela urzi an di-koona ti nuuno a kaakido mozikadó wo ay d'ooma mozikadó kaŋ soo. Nuɗ toŋ maŋ inkiŋo, aame ni jiire geŋ n'a t'iide n'a-guune ti Meegó a kaakido mozikadí wo ay d'ombo mozikadí kaŋ soo.

²²Wede i-d'ede kuwwa k'ollige maŋ, y'ollo koduwo ono ɗoŋ Unde Raa t'an rootiyo a ɗoŋ ogiysito ti suma k'Isa me."»

Apokalipse 4

Daryika Raa

¹Saŋ maŋ n'a wulle sey biza bumbu ohine a kandaane, wo golla ere n'illiga ki poone gette aa t'o rootiyo ti parre, t'ede: «Ki-koli k'awwa keŋŋo n'a di kizita suldi ɗoŋ aana goppon.»

²A kaamiki Unde Raa ti-t'ûune adda k'addó, wo ni wulle kaakido moziko a kandaane, wo a kaakido gette wedusu y'a ti guune eego.

³Wede i-guune geŋ yoŋ yi ralita aa makkolo majjaanawa sundutú zasipe wo sarduwan. Kaakido moziko gette i ti ɗuule ti zakilsa, zakilsa gette i ralita i-ti kama bicici, teeze, aa makkolo majjaanawa sundutú emerood.

⁴Kaakido moziko gette ɗooliyo ti kaakidagi ada sire makumu pide, wo a kaakidagi geŋ i d'ede ɗoŋ deero ada sire makumu pide, konsito eego, ossiyto ti kallagi tuwardi wo a awhaŋ biibo ki dap.

⁵Ti kaakido moziko gette i d'adɗiya omilte bi-bididi bi-bididi aa ki mizzi wo ti eddisito togom togom. A ɗaana kaakido moziko gette pitila sarat i tooriyo baadaŋ, wo kane pintilagi sarat geŋ miŋ undiyagi ɗoŋ sarat ki Raa.

⁶Wo sey a ɗaana kaakido moziko gette i d'ede bar ɗeldel aa kaynaaŋa. A diine kaakido moziko gette, i d'ede seydi pide, tuddaŋ gettiŋ eda baa ki ɗaana wo k'ita. An ti ɗuule kaakido moziko gette, soŋ ti kese soo te soo te.

⁷Seysu wede ki poone geŋ aa suwwu, wede ki sirwe aa ulo buru, wede k'aduwe ume k'edayi aa wedusu, wo wede ki pidiwe aa kor t'obiyo.

⁸Kane seydi pide geŋ wede soŋ kambari zoot zoot, wo kambaraŋ geŋ ti paate t'adda i t'ûune eda baa. Didɗo onnu an deddiso miŋ: «Kamileŋ, kamileŋ, kamileŋ yoŋ Galmeega Raa toogadi t'a jiire pay, yode wede t'ume duniya t'a t'eesa botto too, bini aŋki wo bini onniyo k'ita toŋ yoŋ ede.»

⁹Geŋ iŋkino an i-d'eliyo tamma, suma wo an di rootiyo koduwo a Raa zeere yi-guune a kaakido moziko, yi lekkiyo ki daayum.

¹⁰A peeɗo tuuku kane seyɗi piɗe geŋ an eesiyo ɗeɗɗiso iŋkino maŋ, ɗoŋ deero ada sire makumu piɗe geŋ an di-dikkiyo ti zibbananŋ a ɗaana wede i-guune a kaakido moziko, an d'ottilso a yode wede i lekkiyo zeere ki daayum, an t'odɗiɓe biibiyaganŋ a ɗaana kaakido moziko wo an d'eesiyo:

¹¹«Eyye kee Galmeega Raazey, kee a-d'ede urzi ɗuwo an a t'ele tamma wo suma kono toogo pay tod'te ki kee, kane sulɗi pay geŋ ikkima kee. Kee k'an ikkima aa ki dihe.»

Apokalipse 5

Mattup liŋyiyiyo ti tiibi

¹Saŋ n'a wulle mattup lobide liŋyiyiyo ti tiibi omagi sarat, eego raanjiya t'addutu wo ti dartu, a bey k'ammade ki wede i-guune a kaakido moziko.

²Saŋ n'a wulle sey maaleeka toogo yi tonɗiyo ti golla awwa, y'ede: «Wee wee iide a borkite tiibi eego mattup wo y'a t'ihina me?»

³Miŋ wenda soo toŋ umbo, ise a kandaane, a siido wo ti ɗandi siido toŋ maŋ, a aane a t'ihina mattup wo y'a wolle addutu me.

⁴Maŋ n'a iise moolo baadanŋ kono wenda soo toŋ umbo a aane a t'ihina mattup wo a wolle addutu me.

⁵Wo ti diine ɗoŋ deero geŋ wede soo y'o di ruute, y'ede: «Kee k'ole ye! K'ollo wede'ŋ ede, an yi waaku “suwwu y'udɗo ti biza bumbu Ziida”, t'ita mozigo Dawut, yoŋ yi jiire ɗoŋ k'aduzi, yoŋ geŋ yi-borkite tiibi eego mattup a omagi sarat, wo y'a t'ihina.»

⁶Saŋ maŋ n'a wulle Ulo Damu kaŋ ohire a diine kaakido moziko, kane seyɗi piɗe ti ɗoŋ deero geŋ an di ti duule. Ki wulle maŋ yoŋ geŋ Ulo Damu wede ti kaaga an ti y' wilda. Yoŋ geŋ i-d'ede omba sarat wo edayi toŋ sarat, kane edayi geŋ undiyagi ɗoŋ sarat ki Raa yi d'akkisa k'adda duniya pay.

⁷Ulo Damu geŋ y'a iide, y'a-ziida mattup gette ti bey k'ammade ki wede i-guune a kaakido moziko me.

⁸Aame yi ziida mattup maŋ, kane seyɗi piɗe ti ɗoŋ deero ada sire makumu piɗe geŋ, an di-dikke ti zibbananŋ a ɗaana k'Ulo Damu. Kane ɗoŋ deero ada sire makumu piɗe geŋ, a beezan munda aa kundiŋe ti banjirka ki dap boo ti sulɗi koddiyo eediyadanŋ unse. Kane sulɗi koddiyo geŋ, i-kaza tonɗiyo ki ɗoŋ ki Raa a yode.

⁹An d'ôoro ôoro aware, an'de: «Kee k'iide k'a t'ambe mattup ettiyo, wo k'a borkite tiibi k'a-t'ihina kono kee an ki ti wilda, wo ti puuzada duwo t'oldikadaŋ k'an udde, an t'ize doŋ ki Raa, duwo ti boha bumbiyagi pay, t'ita k'ono pay, a siidiyagi pay wo t'ita duwo pay.

¹⁰Kee k'a t'ize mozigayaŋ wo kane doŋzá, doŋ sedeke a Raaziŋ wo an di koono mozagi ekki doŋ duniya pay.»

¹¹Saŋ maŋ n'a wulle, wo n'a illiga golla maaleekiyagi baadaŋ baadaŋ wenda yi ki ti'n k'ize ye. An di ti duule kaakido moziko gette, kane seydi pide ti doŋ deero pây.

¹²An d'ôoro ti golla awwa, an'de: «Ulo Damu wede an wilda geŋ, yoŋ toogo yi t'iide y'a-t'oone laale, suuniyo k'ono, gudire, suma, dary'ika wo tamma.»

¹³N'a illiga sey suldi pay Raa yi zippe, a kandaane ise a siido, doŋ ti dandi siido ise adda k'ahu, kane suldi pay geŋ an d'ôoro, an'de: «In amma wede i-guune a kaakido moziko wo Ulo Damu. A kane tamma, suma, dary'ika wo toogo, ki daayum.»

¹⁴Wo kane seydi pide geŋ an rootiyo, an'de: «Eyye, i t'iso injino!» Maŋ kane doŋ deero geŋ an di-dikkiyo wo an t'ottilso.

Apokalipse 6

Borkiso tiibi a omagi zoot

¹Saŋ n'a wulle Ulo Damu y'a-burke tiibi wede ki poone, aame geŋ n'a illiga seysu soo ti diine seydi pide y'a ruute ti golla awwa aa eddiso mizzi, y'ede: «K'edi!»

²Maŋ n'a wulle i d'uddo puzu tuware. Wede a ti gili eego'ŋ ti bedige a beezí wo an i-d'ele biibo moziko. Yoŋ geŋ yi jiiire wo y'a injile y'a ceero sey.

³Saŋ Ulo Damu y'a-burke tiibi wede ki sirwe, aame geŋ n'a illiga seysu wede ki sirwe y'a ruute ti golla awwa, y'ede: «K'edi!»

⁴Maŋ i d'uddo puzu teeze boŋ. Wede a ti gili eego'ŋ an i-d'ele urzi y'a t'oodiba toose adda duniya a t'ise umbo, kono duwo an di t'iide tuddaŋ. An i-d'ele kasigara sohoru a beezí.

⁵Saŋ Ulo Damu y'a burke tiibi wede k'aduwe, aame geŋ n'a illiga seysu wede k'aduwe y'a ruute ti golla awwa, y'ede: «K'edi!» Wo n'a wulle i d'uddo puzu gammili. Wede a ti gili eego'ŋ a beezí miido.

⁶Maŋ a diine seydi pide geŋ, n'a illiga munda aa golla i rootiyo, y'ede: «Soŋko ki naabo k'onnu soo gette, k'a t'owila jeenu soo ki mudu wo musido jeenu ado, wo de egey ti toote geŋ zooyayaŋ ki y' kila ye, i lekko injino.»

⁷Sañ Ulo Damu y'a burke tiibi wede ki pidiwe, aame geɗ n'a illiga seysu wede ki pidiwe y'a ruute ti golla awwa, y'ede: «K'edi!»

⁸Maɗ n'a wulle i d'udfo puzu bolile. Wede a ti gili eego'ŋ sundi «Unto», wo ume ki doŋ i t'inda geɗ yi di y' daaniya. An an d'ele toogo ki t'owwo duwo ti kasigara, ti mosogo, t'urzi k'endani wo ti seydi balda doŋ a siido, a kese soo ti diine kesiyagi pide ki siido.

⁹Sañ Ulo Damu y'a burke tiibi wede ki paat, aame geɗ n'a wulle ti dandi k'ume sefeke, undiyagi ki doŋ an ti'n iide kono an ziida zakidi a urzi k'ono Raa wo an di gizite.

¹⁰Kane an di dollite ti golla awwa, an'de: «Galmeegey, kee kamileɗ wo k'isiyo munda wede derec, bini woogo me k'a della k'a deka booro wo k'a daagila puuzadey a tukki doŋ a siido pay me?»

¹¹Maɗ an an d'eelite kallagi tuwardi a wede tuuku toŋ maɗ, wo an an di ruute, an'de: «Kun aa dello booloŋ kono zembagoŋ ti doŋ i naabiya aa kune a urzi Raa ede, kane geɗ an aa ti'n iida, eggoo t'iida maɗ, n'a-daagila kollo.»

¹²Sañ y'a burke tiibi wede ki zoot, aame geɗ n'a wulle siido t'a noŋŋire baadaɗ, peedo a t'ize gammilawa aa kuule, wo tere a t'ize teeze boŋ aa puuzo.

¹³Wo moldali ti kandaane an d'iise soldite, aa inŋi tormo zeere g'eepiyo a maaye baadaɗ.

¹⁴Kandaane a t'ilbida aa an lobide raaga, wo moŋgali pay ti siidiyagi doŋ adda diine k'ahu t'omagaɗ an digge tunda.

¹⁵Mozagi a siido pay, deero siido, deero k'asigiryagi, doŋ laale, doŋ toogo, kane bulagi wo doŋ boy pay an t'umbidita adda k'urmidu wo a ita zombali.

¹⁶Wo a zombali ti moŋgali geɗ an an di rootiyo, an'de: «Kun ay di ti'n ruugi eedey, kun ay ti'n ombidi, ti daana wede i-guune a kaakido moziko wo ti daana kulkuwo k'Ulo Damu.

¹⁷Eyye, onniyo ere meeda ki kulkuwadaɗ t'iide, wo de wee wee a o'hira a daanadaɗ me?»

Apokalipse 7

Doŋ ki Raa dupu meeda uto ada pide makumu pide

¹Sañ maɗ n'a wulle maaleekiyagi pide an t'hirte a kesiyagi pide ki siido. An di ziida maaye wede i baahu t'omagi pide geɗo, kono y'a ki baaha a siido ye, ekk'ahu ye, ise ekk'undumu tuuku toŋ maɗ ye.

²Wo ni wulle maaleeka ti doolo y’ettiyo ti kese peedo ge-koliyo wo a beezí suwwo k’appuzu ki Raa zeere. Y’a idili ti golla awwa a maaleekiyagi pide don an an ele urzi ki lattiya siido ti ahu genno, y’ede:

³«Kun oolo do, kun ti’n latte ye siido, ahu wo inda me, bini ay di’n eegire don naabo Raazey ay an t’appiza a zumbaman doo miñ kollo.»

⁴Wo n’a illiga kane don an an t’ippiza gen, kane dupu meeda uto ada pide makumu pide, kane gen pay ti boha bumbiyagi ki don k’Izirayel.

⁵Ti biza bumbu Ziida, dupu koomat makumu sire. Ti biza bumbu Riiben, dupu koomat makumu sire. Ti biza bumbu Gad, dupu koomat makumu sire.

⁶Ti biza bumbu ki Azer, dupu koomat makumu sire. Ti biza bumbu Nepitali, dupu koomat makumu sire. Ti biza bumbu Manase, dupu koomat makumu sire.

⁷Ti biza bumbu Simeyon, dupu koomat makumu sire. Ti biza bumbu Lebi, dupu koomat makumu sire. Ti biza bumbu ki Isakar, dupu koomat makumu sire.

⁸Ti biza bumbu Zabilon, dupu koomat makumu sire. Ti biza bumbu Yusup, dupu koomat makumu sire. Ti biza bumbu Benzamen, dupu koomat makumu sire. Kane pay an an t’ippiza appuzu ere ki Raa.

Don duuru a daana kaakido moziko

⁹Sañ man n’a wulle sey don baadan baadan wenda yi k’aane kazadan ye, kane gen t’ita duwo pay, ti boha bumbiyagi pay, ti siidiyagi pay wo t’ita k’ono pay. Kane gen an t’ihira a daana kaakido moziko wo a daana k’Ulo Damu, ossiyto ti kallagi tuwardi wo a beydan an dimbo puutagi k’inda, an tamma.

¹⁰An dollite ti golla awwa, an d’eesiyo: «Galmeegey Raa i-guune a kaakido moziko ti Ulo Damu gen, kane ay ele uttiyo me.»

¹¹Wo kane maaleekiyagi pay an ti-duule kaakido moziko gette, ti don deero ti seydi pide. Kane pay gen an di dikkite zumbaman a siido, a daana kaakido moziko, wo an d’uttile a Raa,

¹²an d’eesiyo: «Eyye! Tamma, dary’ika, suuniyo k’ono, rootiyo koduwo a Raa, suma, toogo wo gudire, kane pay gen a Galmeegin Raa ki daayum! Eyye.»

¹³Man wede soo ti diine don deero y’a ni tunde, y’ede: «Kane don ossiyto ti kallagi tuwardi gen an wee wee, wo an iido ti too me?»

¹⁴Wo ni di ruute, n’ede: «Galmee’ki nuñ, ni ki’n suune ye, i’ni suune kee.» Man y’o di ruute, y’ede: «Kane gen don an udo t’adda dabar ere baadan, an t’upile kallagan an di’n ize tuwardi ti puuzo k’Ulo Damu.

¹⁵Kono kamo an t’ihira a daana kaakido moziko Raa an i-di naabiya diddo onnu adda boozí. Wo yon yi-guune a kaakido moziko gen, y’anni booha.

- ¹⁶Mosogo ti ki'n t'îda ye, ôrme toŋ umbo. Peedo ise malla toŋ an ki'n seeda ye,
¹⁷kono Ulo Damu a daana kaakido moziko geŋ y'an elsa, y'an d'an t'etta ki biza k'ahu doŋ i d'eliyo lekkiyo. Wo Raa y'an di sippa zumari k'edayan.»

Apokalipse 8

Tiibi wede ki sarat

- ¹Saŋ Ulo Damu y'a burke tiibi wede ki sarat. Aame geŋ a kandaane i d'inda kuy, peedo suma k'a ozire kubbaara sire.
- ²Saŋ n'a wulle maaleekiyagi sarat an t'îhira a daana Raa, an an d'eele parragi sarat.
- ³I d'iido maaleeka ti doolo y'a t'îhira a sirpa k'ume sedefe, a beezí banjirka ki dap. An i-d'eele suldi koddio baadaŋ eediyadaŋ unse, yi di t'ele a Raa ti tondio ere pay ki doŋ ki Raa, a ume sedefe wede ki dap a daana kaakido moziko gettiyo.
- ⁴Saa ki suldi koddio eediyadaŋ unse ti tondio ki doŋ ki Raa adda banjirka a bey maaleeka gette, i di-koliyo ki daana Raa.
- ⁵Saŋ maaleeka y'a t'umbe banjirka gette, yi-t'ûune ti ubali doŋ a ume sedefe wo y'a-zibbe siido. Maŋ i d'ize tarkuuse, eddisito, omilte wo ŋoŋŋirso siido.

Parragi zoot doŋ ki poone

- ⁶Kane maaleekiyagi doŋ sarat ti parragi sarat a beezaŋ geŋ, an t'ikkima tuddaŋ ki baahu.
- ⁷Maaleeka wede ki poone y'a biiha parre, maŋ goyoyo wo uwo kalsiya puuzo a iipo siido, kese soo ti diine kesiyagi afo ki siido a t'igge, kese soo ti diine kesiyagi afo ki inda a t'igge, wo soole zeere pay a t'igge.
- ⁸Saŋ maaleeka wede ki sirwe y'a biiha parre, maŋ munda soo iŋkino aa mokoloo meeda a zida uwo wo an ti y' gibira adda bar, wo kese soo ti diine kesiyagi afo ki bar a t'ize puuzo.
- ⁹Kese soo ti diine kesiyagi afo ki seydi doŋ adda k'ahu a t'inda, wo kese soo ti diine kesiyagi afo ki tookiyagi a dimbe.
- ¹⁰Saŋ maaleeka wede k'aduwe y'a biiha parre, maŋ mooliso meeda i d'oggiyo dala dala aa binje t'a iiro ti kandaane, wo t'a-t'iire a kese soo ti diine kesiyagi afo ki oydayi wo ti omagi k'okko k'ahu.
- ¹¹Mooliso gette sundutu Makadigi. Kese soo ti diine kesiyagi afo ki ahu a t'ize kadigi, wo duwo baadaŋ an t'iibe ahu geŋno maŋ, an t'inda kono kadigi mooliso gettiyo.

¹²Sanj maaleeka wede ki pidfiwe y'a biiha parre. Aame geŋ munda a diine peedo, tere wo moldali, iŋkino maŋ kese soo ti diine kesiyagi aɔo ki toorayaŋ a digge. Wo kese soo ti diine kesiyagi aɔo ki oŋnu, toorayí a digge, wo ki didɔo toŋ iŋkino kay.

¹³Sanj maŋ n'a wulle kor kaŋ obiyso a kandaane wo n'a illiga ti rootiyo ti golla awwa, t'ede: «Dabar! Dabar! Dabar etto a tukki ɔoŋ a siido pay aame maaleekiyagi aɔo an baaha parragaŋ geŋ me!»

Apokalipse 9

¹Sanj maaleeka wede ki paat y'a biiha parre, maŋ n'a wulle mooliso ti doolo t'a iiro ti kandaane a siido. Wo an i-d'ele kerle ki biza k'olde wede aakede buldume.

²Mooliso gette t'a t'ihina biza k'olde wede aakede buldume geŋ me. Maŋ i d'udɔo saa gammilawa birin aa saa ki baala meeda. Saa gette peedo ti kandaane ti di'n ippe, ume a t'ize zimolo.

³T'adda saa gette i d'udɔo wessu a-tiipe adda siido. Wo an i-d'ele toogo aa ki otto a siido.

⁴An i di ruute y'an ki d'ise ulsu a inda ye, a soole ye, a munda doolo toŋ maŋ ye. Wo ɔe y'an d'ise ulsu a duwo ɔoŋ an k'ede appuzu ere ki Raa a zumbamaŋ ye ɔaŋŋal.

⁵A wessu geŋ an i-k'ele urzi ki t'owwadaŋ ye, wo y'an di'n dabira dabirsa ɔaŋŋal ki tere paat. Eeniko ere y'an isa gette aa aadumu k'otto aame ti tolge wedusu.

⁶Adda tedɔari paat geŋ duwo an di-deha unto te, wo ɔe umbo an ki ti t'oono ye. An di deha an di-t'inda toŋ, unto t'a t'omba dokki ti tuddaŋ me.

⁷Yo wessu geŋ yi deeyiso aa punzigi ɔoŋ an an ti zidde ki deyyiso, a eedí munda aa biibo ki dap wo ume k'edayí aa ume k'eda duwo.

⁸Ilalí dokiyoŋ aa ilali k'erayi, wo sinaní aa sina suwwu.

⁹A gaggirí munda aa saapa ki maala, wo tarkuuse kamarí aa tarkuuse puusiyagi baadaŋ ti punzigi an okko k'ume deyyiso.

¹⁰Silmi ɔeŋɔelele aa ki otto. Geŋ ti silmi geŋno i-d'ede toogo k'isiyo k'ulsu a duwo adda tedɔari paat geŋ me.

¹¹Wessu geŋ mozigayí maaleeka ki olde wede aakede buldume, t'ono ɔoŋ k'Eber an yi waaku sundí «Abaddon», wo t'ono Girek an yi waaku sundí «Apoliyon», i-kaza «Wede lattiya».

¹²Dabar ere ki poone i t'ingile, wo sanj maŋ a etto dabar sire sey.

¹³Sanj maaleeka wede ki zoot y'a biiha parre, mañ n'a illiga golla t'ettiyo ti kesiyagi k'omba pide k'ume sedefe ke ki dap a ðaana Raa.

¹⁴Golla gette ti di ruute a maaleeka wede ki zoot parre a beezí geñ, t'ede: «K'an t'eezo a maaleekiyagi ðoñ pide, kettiso gopponj a biza k'ooye goole sundí Epirata geñ me.»

¹⁵Injino mañ maaleekiyagi pide geñ an an t'iize, kane geñ an'ni buuhe toc miñ ki peedo gettiyo, k'onniyo gettiyo, ki tere geñño wo k'ozzine geñño, kono ki tôwwo ðuwo ðoñ a kese soo ti diine kesiyagi afo ki siido.

¹⁶Sanj an o di gize duuruko asigiryagi ti punzigi, kane dupiyagi dupiyagi.

¹⁷Geñ adda munda o iido aa suniye n'a wulle punzigi, wo ðoñ aa ti gili an d'ede saapa teezowo aa uwwo, bicici aa kandaane wo soñ aa derwe. Awhañ aa eego suwwu, wo ti bohanañ i d'adfiya uwwo, saa wo moonno ki suupire.

¹⁸Ti suldi ðoñ afo: uwwo, saa wo moonno ki suupire adfiya ti bizañ geñ, an t'ide ðuwo ðoñ a kese soo ti diine kesiyagi afo ki siido.

¹⁹Toogo punzigi gette tod'te adda bohanañ ti silmidaganj. Silmidaganj geñ an d'ede awahi aa mimbayi, wo ti awhañ geñño an an d'isiyo ulsu a ðuwo me.

²⁰Kane ðuwo pay uupe i ki t'inda ti dabar ere afo ye gette, lekkiyadañ an ki ti gime ye a suldi ðoñ ulpi an isiyo ti bezañ geñ me. An ki d'ohire ye ottilso a siitandani wo a loñgayi ðoñ an ikkima ki dap, ki maala gurus, ki toozi, ki moñgali wo ki inda me. Kane loñgayi geñ an ki wolliyo ye, an k'ollige ye, an ki sooru ye.

²¹Kane ðuwo geñ lekkiyadañ an ki ti gime ye a suldi ðoñ an isiyo aakede tôwwo ðuwo mirsi, kombidfiko, isiyo boliyo wo oogire te.

Apokalipse 10

Mattup ñeñko ohine

¹Sanj mañ n'a wulle maaleeka toogo ti doolo yi ðeegu ti kandaane tuddí tuuniyo ti dondirso, eedí tuuniyo ti zakkilsa, ume k'edayí i tooriyo aa peedo, wo zoñdí aa uwwo baadañ i dalðutu bila bila.

²A beezí mattup ñeñko ohine, zindí k'ammade y'a ziipe ekki bar wo ere ki geelo a siido.

³Y'a idili ti golla awwa aa suwwu yi môolo. Aame y'idili injino mañ, an i-ti gime ti eddisito sarat.

⁴Munda wede an i ruute geñ ni dehu n'a ti y' raañe, wo n'ollige golla ti kandaane t'o rootiyo, t'ede: «Munda wede eddisito sarat ti ruute geñ, ki ti y' booho adda k'addá, ki y' raañe ye.»

⁵Inkino mañ maaleeka wede ni wulle yi t'ihira zindí soo ekki bar, soo a siido geñ, y'a umbe beezí k'ammade ki kandaane.

⁶Wo y'a di nîime ti suma ki wede i lekkiyo zeere ki daayum, yode wede a ikkima kandaane ti suldi ñoñ addaga, a ziipe siido ti suldi ñoñ eego, wo bar ti suldi ñoñ addaga. Maaleeka y'a ruute, y'ede: «Añken peedo t'îide, delliyo umbo baa.

⁷Wo ñe onniytagi ñoñ maaleeka wede ki sarat yi t'eesa baahu parre geñ, munda wede ombide ki Raa a-t'isa, aa y'an gizite ti kaaga a nebiyagi ñoñ naabadí.»

⁸Sañ golla ere n'illiga ti kandaane gette t'o di ruute sey, t'ede: «K'odo ki seedi mattup ñeñko ohine a bey maaleeka wede i t'ihira zindí soo ekki bar, soo a siido geñno.»

⁹N'a iide k'ume maaleeka wo ni di ruute, n'ede: «Mattup gette k'o eli.» Mañ y'o di ruute, y'ede: «Ooho, wo k'a t'oomo, a biza k'a t'owwa uñse aa madde, wo ñe adda k'addá k'a t'owwa kadigi.»

¹⁰N'a-ziida mattup ñeñko gette ti bey maaleeka me, n'a t'iimi, tod'te a bizó uñse aa madde, wo ñe ni t'ihe mañ, adda k'addó n'a uwwe kadigi.

¹¹Inkino mañ an o di ruute, an'de: «I dehu k'a rootite sey ono ñoñ Raa y'agisa a tukki ñoñ a siidiyagi pay, a ita ñuwo pay, a ñoñ orbe ita k'ono pay, wo a mozagañ baadañ geñ pây.»

Apokalipse 11

Agisa nebiyagi sire

¹Sañ mañ an oo d'eele koy'ile wo an o di ruute, an'de: «K'odo ki doozi Boy Raa, ume sefeke wo k'a di kazi ñoñ ottilso a Raa adda boy geñno.

²Wo booro ere ti paate k'a t'oolo ki doozo ye, kono tode gette an an t'iili a ñoñ i ki suune Raa soo ñaṅṅal ye, an d'ony'ilsa geeger ere kamileñ gette ti zoñdañ adda teddari ada pide makumu sire.

³N'a t'igiba ñoñzó sire an di rootey ono ñoñ ñerec ki nuuno, an t'ossita kallagi m'oolo, an di kizita onamó adda k'onniyto dupu ti meeda sire uto ada zoot geñno.»

⁴Kane ñoñ sire geñ i-kaza inda k'olibiyere sire wo pitila sire i t'ihira a ñaana Galmee'ki duniya.

⁵Aame wede yi dehu y'an d'ise ulsu mañ, uwo t'a adda ti bize kane geñno t'a ti'n t'ida ñoñ k'aduzañ me. Geñ ki kotto inkino an t'ida ñoñ i dehu an an d'ise ulsu me.

⁶Kane an d'ede toogo k'appiya kandaane, kono mizzi y'a ki koppe ye a onniytagi ñoñ an rootita ono ñoñ Raa yi t'igibo geñ me. An d'ede toogo ahu an ti'n kime

puuzo, wo an d'ede toogo sey k'eliyo k'eeni wede tuuku tonj maŋ a duniya pay ise k'onniyto miibi tonj maŋ, aa addaŋ i dehu.

⁷Aame ono geŋ an ti gizita maŋ, seysu wede adɗa t'adda k'olde wede aakede buldume y'an di'n deyya, y'an di'n ceera wo y'an ti'n t'ida.

⁸Nundanzaŋ a lekka a bere doŋ duuru ki geeger meeda, ume wede an di tiike Galmeegaŋ ekk'undumu wede zaapu t'ekki bakadɗi kaŋ tontilko. Geeger gette an di waaku ti suma ombide Sodom wo Misir.

⁹Doŋ ti siidiyagi pay, doŋ ti boha bumbiyagi pay, doŋ orbe ita k'ono pay wo t'ita duwo pay an d'etta an di wolley nundanzaŋ adda k'onniyo ado ti gootiyo, wo nundanzaŋ an an ki t'ela urzi a doŋzaŋ an ki t'ottiba ye.

¹⁰Doŋ pay a siido ulbaŋ aasa uŋse a unto ki doŋ sire geŋ me, an d'isa tarnaape an dokkida sulɗizaŋ rosoŋ ti tuddaŋ kono nebiyagi sire geŋ an an iifiba yeebadaŋ baadaŋ.

¹¹Wo aame onniyo ado ti gootiyo iida maŋ, Raa y'an di baaha maaye ki lekkiyo an di balɗa an t'ooziga. Wo kane doŋ i'ni wolliyo geŋ orgiso t'an di'n seeda baadaŋ.

¹²Saŋ maŋ kane nebiyagi sire geŋ an d'olliga golla t'awwa ti kandaane t'an di roota, t'a t'eesa: «Kun ti koli keŋŋo.» Maŋ an di-kila ki kandaane adda dondari, wo kane doŋ k'olmidayaŋ an di'n wolla.

¹³A peedo gettiŋ siido t'a ŋoŋŋira, kese soo ti diine kesiyagi koomat ki geeger gette a-ruuga, wo doŋ dupu sarat an di-t'inda adda ŋoŋŋirso siido gettiyo. Wo kane doŋ a goota geŋ orgiso t'an di'n seeda, an di t'imma Raa wede a kandaane.

¹⁴Dabar ere ki sirwe i t'iŋgile. Wo kun koonaa mentikagi, dabar ere k'aduwe t'ettiyo gopponj sey.

Parre wede ki sarat

¹⁵Saŋ maaleeka wede ki sarat y'a biiha parre, maŋ n'a illiga golliyagi baadaŋ a kandaane an di ruute ti golla awwa, an'de: «Moziko duniya aŋkeŋŋo a bey Galmeegiŋ Raa ti Almasi Raa yi biire, wo y'a koonaa mozigo ki daayum.»

¹⁶Kane doŋ deero ada sire makumu pide konsito a kaakidagaŋ a daana Raa geŋ, an di-dikke zumbamaŋ a siido, an i-d'uttile a Raa,

¹⁷an'de: «Galmeegey Raa toogadɗa t'a jiiire pay, kee wede t'ume duniya t'a t'eesa botto too wo bini aŋki tonj kee ede, ay ki tamma kono a-d'ede toogo ere meeda ki dokkiyo duniya pay.

¹⁸Doŋ siidiyagi pay an gulkuwe ti kee, wo kee tonj maŋ kulkuwadɗa t'iina wo peedo t'iide k'a dekke booro a doŋ i t'inda. Peedo t'iide ere k'an t'ele munda

wede aa ki dehu, a don naabadá nebiyagi wo a donzá don pay orgiso a sundá, ise deero wo sunnidí ton man. Peedo t'íide ere kee k'a-t'íide don i lattiya siido.»

¹⁹Inkino man Boy Raa a kandaane a t'ihina, wo sandup ere ki taasuwa ti Raa ay di wulle adda boy genno. Aame gen a iise omilte, tarkuuse, edfiso, nonjirso siido wo goyoyo baadan a zilditi.

Apokalipse 12

Erewo ti maaloogo

¹Sañ man i d'ize munda goole a kandaane i-kaza munda, n'a wulle erewo t'usso kallatú ki peedo wo zontú t'a-t'ibi ekki tere, wo a ettú biibo ki moldali koomat makumu sire.

²Tod'te mahuwe, addutú i t'umbe k'ehiyo i di-kakkisa ti-dawilsa ti dollite.

³Sañ man i d'ize munda ti doolo a kandaane i-kaza munda, maaloogo meeda wo teezowo bon aa uwo. Awhutú sarat, ombantú koomat wo a awhutú sarat gen ossiyto ti saame moziko.

⁴Ti silmitú t'a ruuke moldali don a kese soo ti diine kesiyagi ado ki kandaane t'a zibbo siido. Maaloogo gette t'a t'ihira a daana k'ere ere ti dehu t'a t'eh gettiyo, kono ti t'eha man ulo gen t'a siha.

⁵Man erewo gette t'a t'eh ulo, ulo wede a dokka ita duwo pay ti toogo ere ki dalka maala. Wo ulo gen an di y'umbe kandaane, an di-t'íide ki daana Raa wo ki daana kaakido mozikadí.

⁶Wo erewo gette t'a t'umbe k'adda balda k'ume wede Raa yi ikkima, an dimodde adda k'onniyo dupu ti meeda sire uto ada zoot.

⁷Inkino man a kandaane gen i d'iiziga deyyiso, maaleeka Misel ti maaleekiyagi an di deyyiso maaloogo. Wo tode maaloogo ton ti maaleekiyagutú an di deyyiso Misel ti maaleekiyagi.

⁸Maaloogo gette an di jire ti maaleekiyagutú me, urzi an ki d'uune ye an di lekke a kandaane me.

⁹Tode maaloogo meeda gettin an ti-gibiro. Tod'te miipo ere ti kaaga sundutú Ere Sakiysa, tod'te Meeda siitandani ere daggiya don duniya pay. An ti-gibiro siido ti maaleekiyagutú pay.

¹⁰Sañ man n'a illiga golla awwa a kandaane ti rootiyo, t'ede: «Anken onniyo ere Raa y'in di'n utta t'iina baa, anken Raazin yi dokkiyo duniya pay ti toogo ere ki mozikadí, anken yo Almasi Raa yi biire ton i-d'ede urzi ki dokkiyo duwo pay. Wo tode Ere Sakiysa zembadin, tode gette ti'ni sakiysa diddo onnu a daana Raa, ti kandaane an ti-gibiro.

11Wo de kane zembadiŋ an ti jiiere t'urzi puuzo k'Ulo Damu, wo t'urzi k'ono doŋ derec an illiga wo an di gizite. Kane an d'iyye an d'ele tuddaŋ k'unto toŋ maŋ.

12Inkino maŋ kee kandaane ti kune doŋ i lekkiyo a kandaane, kun iso uŋsuwo. Wo de dabar baadaŋ a kune doŋ a siido wo suldi doŋ adda bar, kono Meeda siitandani an ti-gibira k'ume kune wo ti ti gulkuwe baadaŋ, ti zuune peedatú i guute booloŋ.»

13Aame maaloogo ti zuune ti kandaane an ti-gibiro a siido'ŋ, t'a iise lomme k'erewo ere ehe ulo gettiyo.

14Wo de erewo gette an i-d'eele kambari sire ki kor meeda, kono t'a t'obiye dokki ti daana maaloogo k'ume wede an i ikkima adda balda. A ume geŋ an di modde ozzine ado ti tere zoot.

15Inkino maŋ maaloogo gette t'a bidde sidiko aa ooye goole a ita k'erewo gettiyo, kono ahu an ti t'ambe.

16Maŋ siido gette ti d'uune erewo, ti d'ihina olde, ahu doŋ maaloogo ti bidde sidiko geŋ olde y'a t'iibe.

17Maaloogo t'a gulkuwe baadaŋ ti erewo gette, wo t'a ingile deyyiso k'ita k'inŋi k'erewo doŋ pay ti doolo, kane doŋ i sooru a urziyagi k'oogoro Raa wo i seedu zakidi a ono doŋ Isa yi gizite.

18Wo maaloogo gette t'iide, t'a t'ihira a biza bar.

Apokalipse 13

Seysu wede uddo t'adda bar

1Saŋ maŋ ni wulle seysu y'adfiya t'adda bar, awhizi sarat wo ombani koomat, wo opiso soŋ i-d'ede biibo ki moziko moziko, wo a awhizi raanyiya ti sumbiyagi ki kaldita suma Raa.

2Seysu wede ni wulle geŋ yi deeyiso aa golme, zoŋdi aa ki nuuniye wo bizi goole aa ki suwwu. Maaloogo gette ti-d'ele toogatu, mozikatu wo urzi dokkiyo wede a jiiere.

3N'a wulle ti diine k'awhutú geŋ, soo aa an i eele kuuno k'unto, wo de kuunatu k'unto gette i di t'isse. Inkino maŋ doŋ siido pay an ziida giggeraŋ wo seysu geŋ an di y' diine.

4Doŋ pay an i d'ottilso a maaloogo kono ti ele urzi dokkiyo a seysu genno, wo doŋ pay an i d'ottilso a seysu, an'de: «Wee wee goole aa seysu en me wo a aane a deyye ti yode me? Wenda soo toŋ umbo.»

5Wo seysu an i-d'ele ono doŋ y'a kili tuddi wo y'a kildite suma Raa. An i-d'ele urzi dokkiyo y'aase inkino bini tedfari ada pide makumu sire.

⁶Mañ y'a iise rootiyto ulsu a tukki Raa, yi kalda suma Raa, Boy Raa ti kane don pay i lekkiyo a kandaane.

⁷A seysu geñ an i-d'ele urzi sey ki deyyiso don ki Raa kono y'anni ceere, wo an i-d'ele toogo a tukki boha bumbiyagi pay, a tukki don a siidiyagi pay, a tukki don orbe ita k'ono pay, wo a tukk'ita duwo pay.

⁸Wo kane don a siido pay geñ an d'ottilso a seysu genno, i-k'ottilso ye kane don sumbiyagan raaniya adda mattup ere ki lekkiyo k'Ulo Damu wede an wilda genno. Mattup gette tod'te ede t'ume an d'okkima duniya botto too.

⁹Wede i-d'ede kuwwa k'ollige mañ, y'ollo koduwo.

¹⁰Aame Raa yi dihe, wede an di y' seeda bule mañ, ki kotto an di y' seeda, wo wede an yi t'ida ti kasigara mañ, ki kotto an di y' t'ida ti kasigara. Aame geñ don ki Raa an soodo zakidi a urzi zaapu k'adde a Isa bini dangu.

Seysu wede udfte t'adda siido

¹¹Sañ ni wulle seysu ti doolo y'adfiya t'adda siido, ombani sire aa ki ulo damu, wo yi d'orbe aa ki maaloogo.

¹²Yi naabiya ti toogo ere an i ele a seysu wede ki poone wo yon yi di y' woliyo. Yi'n isiyo ki toogo siido ti dondu pay an d'ottilso a seysu wede ki poone an i eele kuuno k'unto wo anken i t'isse genno.

¹³Yi d'isiyo suldi k'armika don oone. A daana duwo pay yi d'adfiya uwo ti kandaane yi-ti deegu ki siido, an di woliyo.

¹⁴Yi ti'n daggiya don pay a siido, ti toogo ere an i ele k'isiyo suldi k'armika a daana seysu wede ki poone genno. A don pay a siido y'an di rootiyo, y'ede: «Kun ollo, kun okkon undiso ki seysu wede an i eele kuuno ti kasigara wo anken yon zeere genno.»

¹⁵Wo seysu wede ki sirwe geñ an i-d'ele toogo yi di biha maaye a undiso ki seysu ere an ikkima gettiyo, inkino t'a iise puukiyo wo ti rootiyto pay, wo t'a-t'ide duwo don i-k'ottilso undiso seysu genno ye.

¹⁶A don pay, ise sunni wo deero, don laale wo don an k'ede munda ye, don boy wo bulagi pay, seysu geñ y'an ize ki toogo an an t'ippiza a beydan k'ammade ise a zumbaman.

¹⁷Aame wede yi dehu yi d'owila munda a yode, ise mundazi y'a t'owila mañ, i dehu i-d'ede appuzu. Appuzu gette tod'te suma ki seysu genno, ise kaza a-t'ette a sundi.

¹⁸Inkino mañ peedo t'ide kono duwo an t'oone suuniyo k'ono. Wede eedi soodo a elkiso geñ, kaza ki suma seysu gette y'a ti suune, kono kaza gette i-kaza suma wedusu. Kaza gette tod'te meeda zoot uto ada zoot makumu zoot.

Apokalipse 14

Ôoro aware a kandaane

¹Wo saŋ ni wulle Ulo Damu yi t'ihira ekki makkolo Siyoŋ, wo ti yode doŋ dupu meeda uto ada pide makumu pide an d'ede sundí ti suma Meegí raanjiya a zumbamaŋ.

²Maŋ n'a illiga golla ti kandaane i durriyo aa ooye goole y'okko wo soŋ aa eddiso mizzi. Wo golla n'illiga gette aa doŋ an ondige kundije.

³An d'ôoro ôoro aware a daana kaakido moziko, a daana seydi pide wo a daana doŋ deero. Wo wede a aane a ti suune ôoro gette umbo, daa ki kane doŋ dupu meeda uto ada pide makumu pide, doŋ Raa y'an uŋde t'adda diine doŋ duniya geŋno daŋŋal ye maŋ.

⁴Kane doŋ i-ki t'ize tuddaŋ ganigi ti erayi ye, kono kane an lekkiyo obilagi, an daaniya ita ki Ulo Damu k'ume tuuku y'ette toŋ maŋ. Raa y'an uŋde t'adda diine doŋ pay, kane an t'ize doŋ yode ki poone a daanadí wo a daana k'Ulo Damu geŋ me.

⁵Wo kaŋ soo toŋ a bizaŋ wenda yi k'illiga lohito k'ono ye, duwo an ki zaapu ono eedaŋ ye.

Booro Raa

⁶Saŋ ni wulle maaleeka ti doolo y'obiyo awwa a kandaane, i-d'ede Rabila Majjaanawa ere i lekkiyo ki daayum, y'an di kizite a doŋ pay i lekkiyo a siido: a ita duwo pay, a boha bumbiyagi pay, a doŋ orbe ita k'ono pay, wo a doŋ a siidiyagi pay.

⁷Y'an di ruute ti golla awwa, y'ede: «Kun orgido a Raa, kun y'amma kono peedo t'iide ere y'a deŋka booro a tukki duwo te. Kun i ottilo, yode wede ikkima kandaane ti siido, bar wo omagi k'ahu pay.»

⁸Maaleeka ti doolo, wede ki sirwe, y'a yi diine, y'ede: «Geeger ere meeda Babiloon mozikatú t'iire baa! Tod'te ita duwo pay t'a ti'n gumme ti tootatu kadigi, geŋ i-kaza t'a ti'n duuye k'isiyo suldi sukiyagi doŋ ti d'isiyo.»

⁹Maaleeka ti doolo, wede k'aduwe, y'anni diine wo y'a ruute ti golla awwa, y'ede: «Wede tuuku y'ottilso a seysu ti undisadi, wo y'uune appuzu ki seysu a zumayí ise a beezí geŋ,

¹⁰yode toŋ an i-di gumma toote kulkuwo Raa. Toote geŋ yoŋ kadigi daa kalsiya munda, Raa yi-t'oba adda kulso ki kulkuwadi. Wede geŋ y'a dabira baadaŋ adda k'uwo wo ti moonno ki suupire a daana maaleekiyagi doŋ kamileŋ wo a daana k'Ulo Damu.

11Wo saa ki uwwo dabaradaŋ t'a kila k'awwa ki daayum. Kane doŋ i ottilso seysu ti undisadí wo doŋ an d'ede appuzu ki sundí geŋ, an k'ede puukiyo ye, diddo oŋŋu kane adda dabar.

12Inkino maŋ kune doŋ ki Raa, doŋ i sooru a urziyagi k'oogiradí wo kun ziipe addugun a Isa geŋ, peedo t'íide kun soodo zakidí bini daŋgu.»

13Wo n'a illiga golla ti kandaane t'o di ruute, t'ede: «Ki raana: Kane doŋ i t'inda a urzi Galmeega, ti anki unsuwo a kane.» Wo Unde Kamilen t'a ruute: «Eyye, kane geŋ an ti buuke ti ormiyto ere a urzi naabadaŋ, kono naabadaŋ gette ti t'udde beehiye kereŋ.»

Peedo t'íide k'aydu

14Ni wulle sey dondirso tuware kar, wo ekki dondirso gette munda i deeyiso aa ulo wedusu a eedí biibo ki dap wo a beezí suwwo korbe robboŋ.

15Wo i d'uddo maaleeka ti doolo t'adda Boy Raa, yi di ruute ti golla awwa a wede i-guune ekki dondirso geŋ, y'ede: «Ki t'ambo suwwadá, k'eeso aydu baa kono peedo t'íide k'aydu, kono dombi a siido an iine k'aydu.»

16Maŋ wede i-guune ekki dondirso geŋ y'a t'umbe suwwadí, y'a iise aydu wo dombi pay a siido y'a t'iyda.

17Saŋ i d'uddo maaleeka sey ti doolo t'adda Boy Raa a kandaane, yode toŋ a beezí suwwo korbe robboŋ.

18Wo i d'uddo maaleeka ti doolo t'ume sedefe, i-d'ede toogo a tukkuwwo. Maŋ yi di ruute ti golla awwa a maaleeka wede ti suwwo korbe robboŋ a beezí geŋ, y'ede: «Ki t'ambo suwwadá, k'a odo k'adda dombi k'inda biŋ a siido, k'a t'aydi kono inŋizaŋ an iine.»

19Maŋ maaleeka y'a t'umbe suwwadí y'a t'iyda inŋi biŋ a siido me, wo inŋi y'íide'ŋ yi-t'íbi adda sôole goole ki kulkuwo Raa.

20Wo i d'ede sôole a paate ti geeger. An d'iise ŋay'yu k'inŋi biŋ adda sôole geŋŋo kono a t'adde ahuzan wo ahu i d'adfiya ki puuzo. Puuzo gette a ukke suma kubbaara meeda ado, wo k'awwa a iina a sukumagi punzigi.

Apokalipse 15

Dabar ere sarat

1Saŋ maŋ ni wulle a kandaane munda goole ti doolo a jiiire eedó i-kaza munda: maaleekiyagi sarat, a beydaŋ dabar sarat ere ki daŋgu, kono kulkuwo Raa a-ti daŋga ti kane geŋŋo.

²Sañ ni wulle munda aa bar ki kaynaaṅa kalsiya ti uwo i ralita wic wic. Wo kane doṅ i jiiere seysu, ti undisadí, wo ti kaza ere ki sundí geṅ, an t'íhirte a biza bar ki kaynaaṅa gettiyo, a beydaṅ kundinṅe wede Raa y'an ele.

³An d'ôoro ôoro ere ki Muusa wede naabo Raa wo ôoro ki Ulo Damu, an'de: «Galmeegey Raa toogadá t'a jiiere pay, naabadá tod'te baadaṅ wo majjaanawa. Naabadá ere k'isiyo gette tod'te ki diine d'erec, kee mozigo ki doṅ a siido pay.

⁴Galmeegey, wee wee a-k'orgide ye wo i ki t'imme sundá ye me? Derec, kee daṅṅal wede kamileṅ wo ita duwo pay an d'etto an d'ottila a daanadá, kono doṅ pay an zuune booradá ki d'ekkiyo ki diine.»

⁵Sañ maṅ n'a wulle Boy Raa a kandaane a t'ihina. Adda boy geṅ n'a wulle ume wede kamileṅ a jiiere, adda'ṅ sandup ki taasawa ere Raa yi gitte ti duwo.

⁶Kane maaleekiyagi doṅ sarat i seedu dabar ere sarat geṅ, an d'ud'fo t'adda Boy Raa ossiyto ti kallagi tuwardi i ralita wic wic, wo ser ki dap kettiso a ume ki giggiraṅ.

⁷Maṅ ti diine seydi pide geṅ, seysu soo y'an d'eele a maaleekiyagi sarat, kuṅzali dap sarat ôoniyto ti kulkuwo Raa, yoṅ yi lekkiyo ki daayum.

⁸Wo Boy Raa geṅ i d'ûune ti saa i-kaza dary'ika Raa ti toogadí. In'kino maṅ wenda soo toṅ yi k'aane yi ki t'ette k'adda boy geṅno ye, bini dabar ere sarat a bey maaleekiyagi ti-t'eṅgila doo miṅ kollo.

Apokalipse 16

Kuṅzali sarat ti kulkuwo Raa

¹Wo n'a illiga golla awwa ti rootiyo t'adda Boy Raa a maaleekiyagi sarat, t'ede: «Kun'do, kuṅzali sarat ti kulkuwo Raa geṅ kun ti sebbitoy siido.»

²Maṅ maaleeka wede ki poone y'a iide, y'a zibbe kulkuwo Raa ere adda kulsadí a siido, doṅ pay an d'ede appuzu ki seysu wo an ottilso a undisadí geṅ, tuddaṅ an di ti'n gusse dabar ki kundayi tuddaṅ rosidoṅ i'n aadumu.

³Maaleeka wede ki sirwe y'a iide, y'a zibbe kulkuwo Raa ere adda kulsadí adda bar. Wo ahu bar a-gime puuzo a-zid'fe, suldi pay doṅ i puukiyo adda bar an t'inda.

⁴Maaleeka wede k'aduwe y'a iide, y'a zibbe kulkuwo Raa ere adda kulsadí, adda k'oydayi ti omagi k'ahu pay, wo ahuzan pay a-gime puuzo,

⁵wo n'a illiga maaleeka wede i-d'ede toogo a tukk'ahu geṅ y'a ruute, y'ede: «Kee kamileṅ, kee wede ti poone wo aṅki toṅ kee ede, kee ki diine kono booro ette ki ti dikke a urzutú,

⁶kono ɗuwo an t'ïide ɗonɓá ti nebiyagi, wo kee k'an d'ele puuzo an di sibe geɗ, ɗerec a t'ïide.»

⁷Wo n'a illiga golla ti koliyo t'ume seɗeɗe t'a ruute, t'ede: «Eyye, Galmeega Raa toogadá t'a jiiɗe pay, ki ɗekkiyo booro ɗerec ki diine.»

⁸Maaleeka wede ki piɗiwe y'a iide, y'a zibbe kulkuwo Raa ere adda kulsadí a tukki peɗo. Wo peɗo ti d'uune urzi t'an igge ɗuwo ti wehinkatú aa uwwo.

⁹Duwo ɗon wehinko peɗo baadaɗ t'in igge geɗ, an di kaldíta suma Raa wede i-d'ede toogo ekki dabar gettiyo. Wo kane an di-tuuge ki kama lekkiyadaɗ wo ki tamma Raa me.

¹⁰Maaleeka wede ki paat y'a iide, y'a zibbe kulkuwo Raa ere adda kulsadí a tukki kaakido moziko seysu. Omagi pay ki mozikadí geɗ a t'ize zimolo, wo ɗuwo pay an d'aadumu sinanaɗ a dabar ere an iido gette.

¹¹An di kaldíta suma Raa a kandaane kono dabar ti kundɗayi ɗon an d'ede geɗ me. Wo ɗe lekkiyadaɗ an ki-ti gime ye a sulɗi ɗon ulpi an isiyo geɗ me.

¹²Maaleeka wede ki zoot y'a iide, y'a zibbe kulkuwo Raa ere adda kulsadí, adda k'ooye goole sundí Epirata. Wo ahuzí a t'iibe, kono an d'ooli urzi a mozagi ɗon ettiyo ti kese peɗo ti koliyo.

¹³Ni wulle siitandani aɗo aa gonɗaɗi, soɗ y'udɗe ti bize maaloogo, soɗ y'udɗe ti bize seysu, wo soɗ y'udɗe ti bize wede yi ti t'isiyo tuddí aa nebi.

¹⁴Kane geɗ siitandani, an d'isiyo sulɗi k'armika, an t'ette tussiyo mozagi pay a siido ki deyyiso. Deyyiso gette t'aasa a onniyo ere Raa toogadí t'a jiiɗe pay yi ɗekka booro a tukki ɗon duniya pay.

¹⁵Galmeega y'a ruute, y'ede: «Kun ollo koɗuwo, n'un etto aa wede k'oogire. Uɗsuwo a wede yi lekkiyo daayum zeere wo kallagí ossiyo a tuddí, kono aame nuɗ n'iina maɗ y'a ki lekka bontiliɗ a ɗaana ɗuwo wo yi-ki t'oona sukuyagi a ɗaana ɗon pay ye.»

¹⁶Kane siitandani aɗo geɗ an di'n ugiye mozagi pay a siido, a ume wede ti ono ɗon k'Eber an yi waaku Armegedonɗ.

¹⁷Maaleeka wede ki sarat y'a iide, y'a zibbe kulkuwo Raa ere adda kulsadí a maaye. Maɗ golla awwa t'adda Boy Raa t'ume kaakido moziko t'a ruute, t'ede: «A ti ɗiɗgi baa!»

¹⁸Iɗkino a iise omilte, tarkuuse, eddisito, wo siido ti ɗonɗirso baadaɗ. T'ume Raa yi ziipe wedusu a siido geɗ, ɗonɗirso siido baadaɗ kino i k'ize ye.

¹⁹Aame siido ti ɗonɗire geɗ, geeger meeda gette a dikkiɗa omagi aɗo, geegiryagi adda siidiyagi pay a ruugite. Wo Raa i ki dunde ye a oldiko ki geeger

meeda Babiloon gette, kono yi-ti gumme ti toote kulkuwadí. Kulso kulkuwadí baadaŋ gette t'a ti dínge ti sobo.

²⁰Siidfiyagi pay adda diine k'ahu ti monjali an di digge t'omagaŋ me, ki ki'n wolle ye.

²¹Sanj maŋ goyoyo baadaŋ wo deero, goyoyo soo gette attidítú suma suwal ki mudu, a zildító ti kandaane a tukki dūwo, wo kane dūwo an di kaldíta suma Raa kono dabar ere ki goyoyo gette ooŋe baadaŋ.

Apokalipse 17

Meeda boliyo

¹Sanj maŋ maaleeka soo ti diine dŋ sarat i ziidá kuŋzali sarat ti kulkuwo Raa geŋ, y'a iido wo y'o di ruute ono, y'ede: «K'edi, n'a di kiza booro ere Raa yi dekka a tukki meeda boliyo ere i-guune ekk'ahu baadaŋ gettiyo.

²Mozagi dŋ a siido pay an ti-t'ibi tuddaŋ adda boliyo ti tode, wo dŋ duniya pay geŋ t'a ti'n gumme ti toote boliykatú wo y'an îide.»

³Sanj maŋ Unde Raa ti-t'ûune adda k'addó, maaleeka y'a n' umbe y'a ti n' ziipe adda balda. Wo aame geŋ n'a wulle erewo ti-guune a tukki seysu teeze boŋ, seysu geŋ tuddí pay raanjiya ti sumbiyagi ki kaldíta suma Raa, awhizí sarat wo ombaní koomat.

⁴Erewo gette ti-t'usse juwa teezowo boŋ, suldi koŋsuwatú ki dap, ki dogoro tuwarwa kar wo ki makkolo majjaanawa pay, wo a beytú kulso dap boo ti suldi dŋ ganigi k'a azzira ki boliykatú.

⁵A zumatú raanjiya ti suma ere itatú ombide: «Nuŋ te sundó Babiloon geeger meeda, mekki dŋ boliyo wo ki suldi dŋ a siido k'azzuru k'a ki wolle ye.»

⁶Kane dŋ ki Raa i ruute kereŋ Isa yoŋ Galmeega geŋ, an di'n îide. Wo erewo gette n'a ti wulle ti-t'iibe puuzo kane i ti gili ettú. Aame ni ti wulle inkiyo n'a ziidó giggiró.

⁷Maaleeka y'o di ruute, y'ede: «Ki moo me ki seedu giggirá me? Munda wede ombide ki erewo geŋ n'a di t'oodiba ita wo ki seysu wede t'a ti guune, awhizí sarat wo ombaní koomat geŋ me.

⁸Seysu wede ki wulle geŋ, ti kaaga yoŋ ede wo saŋ y'a inda. Bini maŋ y'a balda, y'a-kilo t'adda k'olde wede aakede buldume me. Aame yi-gilo maŋ, Raa y'a yi dagga mendí. Wo kane dŋ duniya dŋ t'ume Raa y'ikkima duniya too, sumbiyagaŋ yi ki riine adda mattup ere ki lekkiyo ye geŋ, an wulla seysu geŋ maŋ an seeda giggiraŋ kono seysu geŋ ti poone yoŋ ede, saŋ y'a inda wo aŋkeŋ yi bildo geŋ me.»

⁹Maṅ maaleeka y’o di ruute sey, y’ede: «Peedo t’iide, i dehu duwo eedaṅ a t’ise soodo a elkiso wo a suuniyo k’ono. Kane awhi sarat ki seysu geṅ, i-kaza kessagi sarat doṅ erewo t’a ti guune eego geṅṅo, wo soṅ i-kaza mozagi sarat.

¹⁰Mozagi doṅ paat geṅ mozikadaṅ t’iire, wede ki zoot yo ede, wo wede ki sarat yi k’iina ye botto, wo aame y’iina maṅ mozikadí t’aasa ki peedo booloṅ.

¹¹Seysu wede yoṅ ti kaaga ede wo saṅ y’a inda geṅ, yoṅ mozigo wede ki gessire. Ti poone yoṅ ti diine kane mozagi sarat geṅṅo, wo yoṅ geṅ Raa y’a yi dagga mendí.

¹²Omba doṅ koomat ki wulle geṅ, kane mozagi koomat doṅ botto mozikadaṅ an ki t’uune ye. Wo aame an t’uuna maṅ, an di lekka a mozikadaṅ ti seysu kaṅ soo ki peedo booloṅ.

¹³Kane mozagi geṅ pay onamaṅ kaṅ soo, an i-d’ele toogadaṅ ti mozikadaṅ a seysu kono y’a oomi mozikadí.

¹⁴An di deyya ti Ulo Damu, wo Ulo Damu y’an di’n ceera kono yoṅ Galmeege y’a jiire pay wo Mozigo mozagi. Doṅzí doṅ yi wiike wo yi biire an seedu zakidí a urzizí geṅ, an di ceera ti yode kaṅ soo.»

¹⁵Maṅ maaleeka y’o di ruute, y’ede: «Ahu doṅ ki wulle ere boli t’a ti guune eego geṅ, kane doṅ siidiyagi pay, doṅ duuru, ita duwo pay, wo ti doṅ orbe ita k’ono pay.

¹⁶Kane omba doṅ koomat ki wulle geṅ, ti seysu an di kiigira ere boli gettiyo, sulduṭú an t’odḍipa pay i-t’oola bontiliṅ. Seytú an d’aadima, wo a guuta an aa t’oyya uwwu mendí.

¹⁷Derec, Raa y’ize adda k’adde mozagi koomat geṅ, an di gitte onamaṅ kaṅ soo aa yoṅ yi dehu, an i-d’ele toogadaṅ ti mozikadaṅ a seysu kono y’a oomi mozikadí bini ono doṅ Raa yi ruute a-t’etta.

¹⁸Wo erewo ere ki wulle gette, tod’te i-kaza geeger meeda mozikatú ekki mozagi pay a siido.»

Apokalipse 18

Babiloon suukatú t’iire

¹Saṅ maṅ n’a wulle maaleeka ti doolo yi deegu ti kandaane i-d’ede toogo baadaṅ, wo duniya pay gette a-tuure ti toore wede ki daryikadí.

²Y’a idili ti golla awwa, y’ede: «Babiloon geeger meeda meeda, ankeṅ suukatú t’iire baa! Ti t’ize ume lekkiyo siitandani pay, ume lekkiyo ki embi doṅ ulpi ki koobiko,

³kono ita duwo pay ti ti'n gumme toote wede ki boliykatú ere t'isiyo gettiyo. Wo kane mozagi pay a siido an ti t'ibi tuddaṅ moonite ti tode. Wo kane doṅ suuk adda duniya pay an t'ize doṅ bey ti toogo ere i-d'ede a sulđutú baadaṅ geṅṅo.»

⁴Maṅ n'a illiga golla ti doolo ti kandaane ti rootiyo, t'ede: «Kune doṅzó kun t'addi ti di tode me, kono kun a gi di ketta kaṅ soo ti tode a oldíkatú, wo karre ki dabaratú y'un gi di'n seeda ye.

⁵Derec, oldíkatú i t'ukume baadaṅ i ti gili a kandaane. Wo Raa geṅ i ki dunde ye a oldíkatú gette.

⁶Dabaratú kun i-ti doozo aa tod' t'an ize a duwo, kun i-ti doozo taṅ sire ti ere tod' t'an ize. Wo kulsatú kun i-t'ôono ti toote kadigi a doole sire, ti wede t'an ele a duwo.

⁷Tod' t'ossiyo sulđi koṅsuwo wo ti tamma tuddutú baadaṅ geṅ, kun ti-t'elo adda dabar ti môolo baadaṅ iṅkino kay, kono ti rootiyo adda k'addutú, t'ede: “Nuṅ ette ni guune mohita, nuṅ te mandaayawa ye, wo môolo munda toṅ ni k'isa ye.”

⁸A tamma tuddutú gette, i-daana ita dabar aakede unto, isiyo môolo wo mosogo a onniyo soo, wo uwwo t'a-t'ogga. Derec, Galmeega Raa i díkke booro a ettú geṅ, yoṅ toogo.»

⁹Wo mozagi pay a siido doṅ ize boliyo ti sulđi tamma tudde ti tode soo geṅ, aame an wulla saa ki uwwo ere ti t'oggiyo maṅ, an d'ôola wo an di lekka adda môolo kono tode.

¹⁰Kane mozagi geṅ an t'ôhira ti dokki kono an orgiso a dabar ere i aana gette, an díllita: «Wayya, wayya moo dabar kino te! Babiloon geeger meeda meeda wo toogo, adda peedo boolon kino miṅ booro t'a ti ziida!»

¹¹Wo doṅ suuk adda duniya an d'ôola wo an di lekka adda môolo kono tode, kono sulđizaṅ wenda an d'owila umbo baa.

¹²Sulđizaṅ doṅ aakede: dap, maala gurus, dogoro tuwarwa kar, moṅgali doṅ majjandani, sotor tuwarwa, juwa, ramica, sotor teezowo boṅ, ita k'inda doṅ eediyadaṅ uṅse, sulđi doṅ ki dilṅise k'elbi, sulđi doṅ majjandani an cooliyo k'inda, ki toozi, ki maala, ki mokololo ere morsowo,

¹³arardari, egey doṅ eediyadaṅ uṅse, mirr, sulđi koddiyo eediyadaṅ uṅse, toote, egey, moonono, geme, buṅgari, dambami, punzigi ti puusiyagi, bulagi wo doṅ an zidđo toṅ maṅ. Wenda an d'owila umbo baa sulđi geṅ me.

¹⁴Iṅkino doṅ suuk an i di roota, an t'eesa: «Sulđi doṅ aa addi i dehu geṅ i t'igge umbo baa, sulđi doṅ majjandani k'uuniyo geṅ i digge kane dokki ti koṅ me, an ki'n t'oona ye baa.»

¹⁵Kane don suuk i t'ize don bey t'urzi tode gen, an t'ohira ti dokki kono an orgiso a dabar ere i iide gette, an d'ola baadan wo an di lekka adda molo.

¹⁶An dillita, an t'eesa: «Wayya, wayya moo dabar kino te! Babiloon geeger meeda meeda don tu an ossiyo suldi k'uuniyo, juwa, sotor tezewo bon, wo suldi kon suwo ki dap, dogoro tuwarwa kar wo mongali don majjandani pay.

¹⁷Adda peedo boolon kino ettin maala baadan gette a t'igge!» Wo kane don pay i tuuliyo tooko, deero tooko pay, don pay adda tooko gen, an ambe ki geeger gettiyo, wo don pay ombadan t'urzi bar an t'ohira ti dokki

¹⁸aame an wulle saa ki uwo t'oggiyo geeger gettiyo man. An d'iise dollite: «Geeger meeda meeda aa tode kino ette umbo!»

¹⁹An di kossa puure a awhan, an di dillita, an d'ola wo an di lekka adda molo, an t'eesa: «Wayya, wayya moo dabar kino te! Geeger meeda meeda ere don tooko an t'ize don bey ti tode min, a peedo boolon a dimbe kame kamec!»

²⁰Kune don a kandaane pay kun iso un suwo kono geeger gette t'uute baa, wo kune don ki Raa, don zina k'Isa wo nebiyagi, kun iso un suwo kay kono Raa yi ti dikke booratú te a suldi don pay ulpi t'ize a tukki kune me.

²¹San man maaleeka togo yi d'umbe moko aa assa meeda, wo yi ti zidde adda bar, y'ede: «Gen in kino kay Babiloon geeger meeda meeda a kaamiki an ti sedda ki togo wo t'a dagga, duwo an gi di'n wolla ye baa.

²²Wo di tode gette wenda yi k'olliga don k'ondige kundiye ye, don k'oro ye, don siraro ye, wo don parre ye baa. Di tode wenda yi ki wolla naabo ere tuuku ton man ye, yi k'olliga molo k'assa massu ye.

²³Di tode wenda yi ki wolla toore pitila ye. Kudic an k'olliga ye ette golla kule yi ziida, ette golla k'erewo ti ziida me. Gen aasa in kino kono ti kaaga don suuk ki tode gen, kane an jire don suuk adda duniya pay, wo ita duwo pay mi ti'n digge t'urzi kombidikadi.

²⁴Wo di tode an d'uune puuzo ki nebiyagi, ki don ki Raa, wo ki don pay an ti'n wildite adda duniya.»

Apokalipse 19

¹San man n'a illiga tarkuuse a kandaane aa golla ki don duuru baadan. Golla gette t'a ruute, t'ede: «Aleluya! Kun amma Galmeega Raa! Yon Wede k'Uttiyadin. Dary'ika, togo kane'n ki yode Raazin.

²Yi dekkiyo booro derec ki diine. Geeger meeda boliyo, booratú yi-ti dikke kono don siido ti ti'n nukke ti boliykatú. Towwo ki don naabadi yi-ti duuze a tode ton man.»

³Wo golla gette t'a ruute sey, t'ede: «Aleluya! Kun amma Galmeega Raa! Saa ki geeger meeda ere an aa t'uyye gette ti koliyo ki daayum!»

⁴Kane don deero ada sire makumu pide ti seydi pide gen an di-dikke, an d'uttile a Raa wede i-guune a kaakido mozikadi, an'de: «Eyye! Aleluya! Kun amma Galmeega Raa.»

Ono ombide ki tarnaape ki seedu k'ere

⁵Ti kaakido moziko gette i d'ize golla, t'a ruute, t'ede: «Kune don naabadí pay gen, kun amma Raaziñ, kune duwo pay deero sunni, kun i ottilo.»

⁶Sañ mañ n'a illiga tarkuuse aa golla ki don duuru baadañ, i-durriyo aa ooye goole y'okko, wo aa eddiso mizzi. Golla gette t'a ruute, t'ede: «Aleluya! Kun amma Galmeega Raa toogadi t'a jiiere pay, kono y'ombo mozikadi baa!

⁷Ulbiñ in iso unse wo in lekko t'unusuwo. In y'amma, kono onniyo ere Ulo Damu y'a seeda eddi t'iina, tode eddi ton ti t'ikkima tuddutu.

⁸An i d'eele kalle majjaane kamilen i ralita wic wic. Kalle majjaane gen, i-kaza naabo ere ki diine ki don ki Raa.»

⁹Maaleeka y'o di ruute, y'ede: «Ki raaja, unusuwo a kane don soo an'ni wiiko a tarnaape seedu k'Ulo Damu.» Wo y'o di ruute sey, y'ede: «Gen ono don derec udde ti bize Raa.»

¹⁰Mañ n'a iire a zondí n'a dikke ki tammadi, miñ yon y'o di ruute, y'ede: «K'oolo, k'o ottilo ye, kono nuñ ton mañ wede naabo aa kee, wo aa zembada don umbe a ono don Isa yi ruutite. Kee ki ottilo a Raa, kono ono don Isa yi ruutite gen kane derec, kane gen miñ ono don Raa y'an ele a bize nebiyagi an di ruutite.»

Wede a ti gili a puzu tuware

¹¹Sañ n'a wulle kandaane a t'ihina, wo i d'uddo puzu tuware. Wede a ti gili eego an yi waaku sundi «Wede Derec, yi seedu zakidi a munda wede yi ruute y'aasa», yi dekkiyo booro wo yi deyyiso a urzi wede ki diine.

¹²Wo edayi i d'omilte aa uwwo, a eedi biibiyagi moziko, suma an riine a tuddi wenda soo ton yi ki ti suune ye, i ti suune yode siidi.

¹³Kallayi y'usso sulpiyo adda puuzo, wo an yi waaku sundi soo «Ono Raa.»

¹⁴Asigiryagi a kandaane ti punzigi tuwardi an di y' daaniya, kallagan tuwardi kar majjandani kamilen.

¹⁵Ti bizi i d'adfiya kasigara robbon, ti tode gette y'a oggipa ita duwo pay don i giigira yode wo y'anni dokka ti toogo ere ki dalka maala. Yode batum y'a ti'n nayya aa an nayyu inni bin adda soole. Gen i-kaza kulkuwo Raa toogadi t'a jiiere pay.

16A tukki kallayí wede goole wo a zindí an aa di riije suma ettiyo: «Yon Galmeege yi jiire pay wo Mozigo mozagi.»

Ombo a zumbi

17Sañ mañ n'a wulle maaleeka yi t'ihira ekki peeḍo. Y'a idili ti golla awwa a embi ḍoñ pay oppiyso awwa a kandaane, y'ede: «Kun'di kun t'ogiyi a ombo ere baadañ Raa y'un ize!

18Kun'di, kun ooma sey ki mozagi, sey ki deero k'asigiryagi wo ki asigiryagi, sey ki punzigi wo ki ḍoñ i gilo eego, sey ki ḍoñ pay bulagi wo bulagi ye, sey ki ḍoñ pay deero wo sunni.»

19Sañ mañ n'a wulle seysu, mozagi siido ti asigiryagañ an t'ugiyi ki deyyiso wede a ti gilo puzu ti asigiryagi.

20Seysu ti wede yi ti t'isiyo tuddí aa nebi, an ti'n zidde. Wede i-t'ize tuddí aa nebi geñ, yon y'aaze suldi k'armika a daana seysu, in kino ḍoñ an d'ede appuzu ki seysu wo an d'uttile undisadi geñ, yi ti'n digge. Seysu ti yode geñ an di'n ibi zeere adda k'olde oggiyo uwo dala dala ti moonno ki suupire.

21Asigiryagañ ḍoñ aa guute, wede a ti gilo a puzu y'aa di'n iide ti kasigara ere adiya ti bizi, wo embi an d'iimi seyañ an d'issite.

Apokalipse 20

Ozzine dupu

1Mañ n'a wulle maaleeka yi deegu ti kandaane a beezí kerle ki biza k'olde wede aakede buldume ti ziziri meeda.

2Y'a zida maaloogo, tod'te miipo ere ti kaaga Ere Sakiysa, tod'te Meeda siitandani, y'a ti-gitte ki ozzine dupu.

3Maaleeka yi-ti zidde adda k'olde wede aakede buldume biza y'a-t'ippe ti kerle wo y'a di nilde ti tiibi, kono maaloogo t'a ki dagge ita duwo ye bini a t'ida ozzine dupu. Sañ mañ yi-d'eeza ki peeḍo booloñ.

4Sañ mañ n'a wulle kaakidagi moziko, wo ḍoñ a ti gundite eego an an d'ele urzi ki dekkiyo booro. Wo soñ n'a wulle undiyagi ki ḍoñ an ti dikite awhañ kono an ruutite taaya k'Isa wo an di gizite ono Raa. Wo n'a wulle sey kane ḍoñ pay i k'uttile a seysu ye, a undisadi ye, wo appuzu ki seysu a zumbamañ umbo ise a beydañ toñ mañ. Kane geñ an di-bilde, an d'ooma moziko ti Almasi k'ozzine dupu.

5Gette baldiya ere ki poone. Wo kane ḍoñ unto ongo an gi-di balda ye bini ozzine dupu a t'ida.

⁶Uḡsuwo a kane ḡoḡ uune baldiya ere ki poone kono kane ḡoḡ ki Raa. Unto ere ki sirwe i-k'ede toogo ye a tukki kane me. Kane geḡ an t'isa ḡoḡ sedefe ki Raa wo ki Almasi, wo an d'ooma moziko ti Almasi adda k'ozzine dupu geḡḡo.

Deyyiso ere ki ḡaḡgu

⁷Aame ozzine dupu geḡ i t'ingila maḡ, Meeda siitandani ti ḡaḡgay an i-d'eeza

⁸wo t'a eḡgila daggiya ḡuwo ḡoḡ a kesiyagi pide ki siido, kane ḡuwo geḡ sumbiyagaḡ Goog wo Magoog t'a ti'n t'ogiya ki deyyiso, d'urikadaḡ t'aasa aa dolso k'ooye.

⁹An t'iizigo t'adda siido pay, ume ḡoḡ ki Raa an t'ugiye an da t'an ḡuule ti geeger ere Raa yi giyye gette pây. Wo ḡe i ḡiigo uwwu ti kandaane t'an igge kane ḡoḡ i-ḡuule ḡoḡ ki Raa geḡ me.

¹⁰Iḡkino maḡ Meeda siitandani, ere daggiyadaḡ, an ti zidde adda k'olde oggiyo uwwu ḡala ḡala ti moonno ki suupire, a ume wede seysu ti wede yi ti t'isiyo tuddi aa nebi adda. An di dabira diddo oḡḡu ki daayum.

Booro ere k'ita

¹¹Saḡ n'a wulle kaakido moziko meeda tuware kar, wo wede a ti guune eego'ḡ, siido kane ti kandaane an t'umbe dokki ti ḡaanadi me, wo wenda yi ki'n wulle ye baa.

¹²Saḡ maḡ n'a wulle ḡoḡ i t'inda deero suḡḡi an t'ihira a ḡaana kaakido moziko. N'a wulle sey mattupiyagi ohinte, wo adda mattupiyagi geḡ an a ti riine naabo ere ki wede tuuku y'ize. Wo mattup soo ti doolo ohine pây, tode gette mattup ere ki lekkiyo. Wo ḡoḡ i t'inda geḡ, wede i-guune a kaakido moziko y'a ḡikke booradaḡ a naabadaḡ ere an ize raaniya adda mattupiyagi geḡḡo.

¹³Bar t'an d'iize a ḡoḡ i t'inda t'urzi tode me, unto toḡ t'an d'iize ḡoḡ a beytu me, wo ume ki ḡoḡ i t'inda toḡ ḡoḡ aḡgeḡ y'an d'iize. Wo wede tuuku toḡ an'ni di ḡikke booradi a naabo ere y'ize.

¹⁴Saḡ unto ti ume ki ḡoḡ i t'inda geḡ, an di'n ibi adda k'olde oggiyo uwwu ḡala ḡala. Olde geḡ yoḡ unto ere ki sirwe.

¹⁵Wede tuuku sundi raaniya adda mattup ere ki lekkiyo gettiyo ye maḡ, an ti y' sedde adda k'olde oggiyo uwwu ḡala ḡala geḡḡo.

Apokalipse 21

Kandaane ti siido aware

¹Saḡ maḡ n'a wulle kandaane aware, siido toḡ aware, wo bar umbo kono kandaane wede ki poone ti siido ere ki poone kane an digge.

²Wo n'a wulle geeger ere kamilen, tode gette Zeruzalem aware ti deegu ti kandaane, Raa y'igibo an ti t'ikkimo aa erewo ti t'ikkima tuddutú majjaanawa ti t'ette k'ume kulatú.

³N'a illiga golla awwa ettiyo ti kaakido moziko, t'ede: «Ankenno Boy Raa yon a diine duwo. Yode Raa batum y'a lekka ti kane, kane an t'isa donzi wo yon Raazan.

⁴Aame gen Raa y'a sippa zumarzan pay a ume k'edayan. Unto umbo baa, molo umbo baa, dollite umbo baa, dabar ton umbo baa. Suldi don pay mazzini gen an t'ingile.»

⁵Man wede i-guune a kaakido moziko y'a ruute, y'ede: «Ankenno suldi pay ni'n ize awardi.» Wo y'o di ruute, y'ede: «Ono en ki ti'n raana, kono kane'n derec, duwo an d'ambe eego.»

⁶Wo y'o di ruute sey, y'ede: «Gen i t'ize baa! Nun sundo Alpa wo Omega, nun wede t'ume k'eesiyo wo ki dangu ton nun. Wede orme man y'edi ni di t'eela ahu ki waawiye yi siba. Ahuzo en i d'eliyo lekkiyo ere ki daayum.

⁷Wede tuuku yi jiira man, suldizo pay en ki yode. N'a t'isa Raazi wo yon y'a t'isa ulo nun.

⁸Wo a kane don dalwidi, don sooruzan ki diine ye, don isiyo suldi don ulpi k'a ki wolle ye, don t'owwo duwo mirsi, don isiyo boliyo, kombidagi, don daaniya longayi wo don pay i lohito ono, kane pay gen umayan adda k'olde oggiyo uwo dala dala ti moonno ki suupire. Ume gen sundi unto ere ki sirwe.»

Zeruzalem aware

⁹Maaleeka soo ti diine maaleekiyagi sarat don ti poone a beezan kunzali sarat oniyto ti dabar ere sarat ki Raa an di zibbite gen, y'a iido wo y'o di ruute, y'ede: «K'edi, n'a di kiza erewo ere i seeda Ulo Damu.»

¹⁰Unde Raa ti-t'uwune adda k'addo, maaleeka y'a-n'umbe, y'a-ti n' ziipe eego mokoloo meeda wo sohoro, y'o di gize geeger ere kamilen, Zeruzalem. Tod' ti deegu ti kandaane, Raa yi t'igibo,

¹¹ti-tooriyo ti toore wede ki daryika Raa batum, tooratú aa ki mokoloo ere majjaanawa sundutú zasipe kere kere aa kaynaana.

¹²Geeger gette dooliyo ti waaya mongali dullan wo awwa, boha bumbiyagutu'ng koomat makumu sire, wo maaleekiyagi koomat makumu sire an di boohiyo. A boha bumbiyagi gen, an aa ti riinge suma soo soo ki boha bumbiyagi koomat makumu sire ki don k'Izirayel genno.

¹³Boha bumbiyagi an di'n ikke ado ado. Ki kese peedo koliyo ado, ki kese peedo k'ooriyo ado, ki kese k'awwa ado, wo ki kese dandi ado.

14Waaya geeger gette an iiziga ekki moŋgali koomat makumu sire doŋ t'ume k'eesiyo i di seedu me, wo ekki moŋgali geŋ an aa ti riinŋite sumbiyagi doŋ zina k'Ulo Damu kane koomat makumu sire geŋŋo.

15Maaleeka wede o rootiyo geŋ a beezí dalka dap ki dooziyo geeger, ti boha bumbiyagi, ti waaya moŋgali gettiyo.

16Geeger gette ki sohirko wo ki tontilko geŋ, pay sohirkadaŋ kaŋ soo. Maaleeka y'a-duuze geeger gette ti dalka gettiyo, a iide dalka dupu koomat makumu sire, ki sohirko, k'awwa wo ki tontilko geŋ, pay sohirkadaŋ kaŋ soo.

17Waaya toŋ y'a-duuze ki tontilko a iide oole meeda uto ada pide makumu pide. Maaleeka yi duuze aa dooziyo ere ki duwo an di dooziyo.

18Waaya gette an iiziga ti moŋgali doŋ majjandani aa ossoyo sundaŋ zasipe wo tode geeger batum ki dap daa kalsiya munda, kabibalbal aa kaynaaŋa.

19Moŋgali doŋ k'ita waaya geeger an zippe ti moŋgali doŋ majjandani. Mekkolo an ziipe ki poone sundutú zasipe, ki sirwe sundutú sapir, k'aduwe sundutú kalseduwan, ki pidíwe sundutú emerood,

20ki paat sundutú sarduwan, ki zoot sundutú kornaliin, ki sarat sundutú kirizolit, ki gessire sundutú beril, ki gessat sundutú topaz, ki koomat sundutú kirizopaz, ki koomat makumu soo sundutú iyasent, ki koomat makumu sire sundutú ametiste.

21Boha bumbiyagi koomat makumu sire geŋ, wede soŋ an ikkima ki dogoro tuwarwa kar kar. Wo erkiyagi doŋ deero adda geeger geŋ ki dap, daa kalsiya munda deldel aa kaynaaŋa.

22Adda geeger gette ni ki wulle ye Boy Raa me, kono yode Galmeega Raa toogadí t'a jiiire pay, wo soŋ Ulo Damu kane ede, duwo an d'ottilso wo an di tamma a daana kane baa.

23Geeger gette i ki dehu peedo koo tere y'a ki ti toore doo ye, kono dary'ika Raa ti di tooriyo wo Ulo Damu biŋgatú.

24Ita duwo pay an d'ozira a tooratú wo mozagi pay a siido an d'etto ti laale mozikadaŋ a tode.

25Boha bumbiyagi a lekka ohinte daayum, kono ume daayum onnu, diddo umbo.

26Doŋ ti ita duwo pay an i-d'etto a tode ti laale mozikadaŋ.

27Wo munda ganigi soo toŋ i k'etta ye k'adda geeger gette, ise wede isiyo suldi doŋ k'azzurru k'a ki wolle ye, ise wede lohito k'ono toŋ maŋ. Etta k'adda wede sundí raaniya adda mattup ere ki lekkiyo ere k'Ulo Damu daŋŋal.

Apokalipse 22

¹Sañ mañ maaleeka y'o di y' gize ooye wede ahuzí i d'eliyo lekkiyo me. Ahuzí i ralita aa ossoyo wo i lohito pupuc ti kaakido moziko Raa ti Ulo Damu me.

²Wo ooye geñ yi d'okko adda diine geeger, wo a kuukulu k'ooye i d'udde undumu wede i d'eliyo lekkiyo, yi d'ehiyo adda k'ozzine tañ koomat makumu sire, a tere yi d'ehiyo d'ehiyo. Puutagí i d'eliyo beeko a ita duwo pay.

³Adda geeger gette, munda wede Raa yi ti y' duude umbo. Kaakido moziko Raa ti Ulo Damu t'aasa adda geeger gettiyo, wo don naabo Raa an i-d'ottila.

⁴An di y' wolla Raa t'edayan wo sundí t'a koonaa raaniya a zumbamañ.

⁵Aame geñ diddo umbo, wenda yi ki deha toore pitila ye, ki peedo ye, kono toore Galmeega Raa y'an toora, wo an d'ooma moziko ti yode ki daayum.

⁶Sañ mañ maaleeka y'o di ruute, y'ede: «Ono eñ kane'ñ derec, duwo an d'ambe eego. Galmeega Raa wede i d'eliyo Unde Kamileñ a nebiyagi geñ, y'a igibo maaleekayí y'an di kize a don naabadí suldi don aana goppon.»

Kama k'Isa

⁷Isa y'a ruute, y'ede: «Kun ollo, nuñ goppon n'ettiyo. Unsuwo a kane don a seedu ono don Raa y'igibo adda mattup ettiyo.»

⁸Suldi eñ, nuñ Zan ni'ni wulle wo ono n'illiga ti kuudó. Wo aame suldi eñ ni'ni wulle wo ono ni n'illiga mañ, n'a iire a zon maaleeka wede o di gize suldi geñno. Mañ n'a-dikke ni-d'ottila miñ,

⁹yon y'o di ruute, y'ede: «Kee k'oolo, k'o ottila ye, ki ottilo a Raa! Kono nuñ ton mañ wede naabo aa kee, aa zembadá nebiyagi wo aa don pay i seedu ono mattup eñ adda k'addañ.»

¹⁰Sañ mañ y'o di ruute, y'ede: «Ono don Raa y'igibo k'a ti'n riije adda mattup ette, k'a ti t'ippa adda ye, kono onniyo ere Raa yi dikke ki aaniya suldi gette, tod'te goppon.»

¹¹Wede ki diine ye geñ, i-d'onko k'isiyo munda wede ki diine ye, wo wede isiyo suldi ganigi geñ, i-d'onko k'isiyo suldi ganigi. Wo de wede ki diine geñ, i-d'onko k'isiyo munda wede ki diine, wo wede kamileñ geñ, i-d'onko ki lekkiyo kamileñ.»

¹²Isa y'a ruute, y'ede: «Kun ollo, nuñ goppon n'ettiyo, n'a t'ambo a beezó munda wede ni dehu n'un t'eley a naabo ere kun ize, wede tuuku ton y'a t'ooney a naabadí naabadí.

¹³Nuñ sundó Alfa wo Omega, nuñ wede ki poone wo k'ita ton nuñ, nuñ wede t'ume k'eesiyo wo ki dangu ton nuñ.

14Un̄suwo a kane ɗoŋ kallagaŋ opilso, kane geŋ an d'ede urzi k'ettiyo k'adda geeger ti biza bumbu wo k'om̄bo k'undumu wede i d'eliyo lekkiyo.

15Wo oopa ti paate ɗoŋ isiyo sulɗi ɗoŋ k'a azzira, kombidagi, ɗoŋ boliyo, ɗoŋ t̄owwo ɗuwo mirsi, ɗoŋ i daaniya longayi, wo ɗoŋ pay i geeyiso lohito k'ono wo an di lohito!

16Nuŋ Isa n'a igibo maaleekayó kono sulɗi geŋ y'an ti'n kizite a kane ɗoŋ ogiysito ti sundó. Nuŋ n'ud̄ɗo ti biza bumbu mugiyó Dawut, nuŋ moole biza soohe wede omilte wic wic geŋno.»

17Unde Kamileŋ kane ti erewo ere i seeda an di ruute, an'de: «K'edi!» Wede ono geŋ yi'n ollige maŋ, y'a roote kay: «K'edi!» Wede ôrme maŋ y'edi, yi dehu maŋ ni di t'eela ahu ɗoŋ i d'eliyo lekkiyo, yi siba ki waawiye.

Ono ɗoŋ ki ɗaŋgu

18Nuŋ Zaŋ, n'un ondirso a kune ɗoŋ pay ollige ono ɗoŋ Raa y'igibo wo n'a ti'n riije adda mattup ettiyo: Aame wede y'a uŋka munda t'eedi maŋ, dabar ere ni riije adda mattup ette Raa yi di-t'aagila kay.

19Wo ono ɗoŋ Raa y'igibo wo n'a ti'n riije adda mattup ette, wede tuuku yi iidiba munda booloŋ maŋ, Raa yi ki t'ela ye kay aggadí ere k'undumu wede i d'eliyo lekkiyo a ɗuwo me, wo k'adda geeger ere kamileŋ aa an riije adda mattup ette, yi k'etta ye.

20Wede yi'ni suune adda k'addi sulɗi eŋ ɗerec geŋ, y'ede: «Eyye, nuŋ goppon n'ettiyo!» Eyye! Geŋ i t'iso! K'edi Galmeega Isa!

21Beeko ere ki Galmeega Isa ti koono ti kune pay.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil